


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui' New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
58bf86df-ae22-508c-81dc-936dbf138c25

Contents

San Mateo	1
San Marcos	68
San Lucas	109
San Juan	179
Hechos	230
Romanos	294
1 Corintios	322
2 Corintios	348
Gálatas	364
Efesios	374
Filipenses	384
Colosenses	390
1 Tesalonicenses	397
2 Tesalonicenses	402
1 Timoteo	405
2 Timoteo	413
Tito	418
Filemón	422
Hebreos	424
Santiago	444
1 Pedro	451
2 Pedro	458
1 Juan	463
2 Juan	469
3 Juan	470
Judas	471
Apocalipsis	473
Salmos	503

DIDZA' DXI'A BUZÚAJĚ' MATEO

*Yugu' xuz xině'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xině'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchě'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xině'ë.

Booz gúquië' xuzë' Obed, ate' Rut gúcanu xině'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'eně' bönachi Israel, ate' butsaga ná'aleni'-nu nigula na' gúcanu zí'alö nigula queë' Urías, ate' David, en nigula ni guláquië' xuz xině'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' böchě'ë.

Yugu' bönni' ni gula'cu'ë dza ni' cate' yugu' bönni' Babilonia gula'chě'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

16 Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

17 Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

Yugu' le guca cate' guljë' Jesucristo

(Lc. 2:1-7)

18 Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'alenbi' José, en zí'atëlö cate' si' utsaga ná'alenë'-bi', en cabí ne sóalenë'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi.

19 Náquië' José na', bönni' queëbi' María, bönni' tsahui', pero biti' gú'unnë' uzéguie'-bi' didza' lógaca bönachi. Gú'unnë' ulá'alenë'-bi' bagáchi'sö.

20 Tsanni ni' rizá' ládxë'ë José ca na' gunë', buluí'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxi'ini zxi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi.

21 Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

22 Caní guca yúgu'të lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunnë':

23 Buli'yútsöca', tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'.

25 Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

1 Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë' saca' ga rilén gubidza.

2 Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' bölaj bení' naca bë' chigúlajbi', ate' za'tu' ni para tseaj ládxi'tu'-bi'.

3 Cate' gúquibe'enë' Herodes, bönni' rinná bë'ë, lë ni, gurö'ödë' böniga, en lësca caní gula'bö' böniga yúgu'të bönachi nacua' Jerusalén.

4 Ní'rö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'.

⁵ Të lë’:

—Lu yödzo Belén luyú Judea. Caní naca tu’ buzúajë’ tu bönni’ bë’ë didza’ uláz queë’ Dios le rnna caní:

⁶ Biti’ nácarö cá’asö yödzo Belén luyú Judá lahuë’ Dios ca nácagaca yödzo gapa nacuá’ nupa ta’nná bë’ luyú ni, tu’ irúajë’ tu bönni’ yödzo Belén, en gáquië’ lo, bönni’ na’ gun chi’ë bönachi Israel quia’.

⁷ Ní’irö Herodes bulidzë’ bagáchi’sö bönni’ ta’yéajni’inë’ na’, en gunábinë’ légaquië’ para inözinë’ dxi’a gáca’xte chiguca bulufi’ lahui bölaj na’ bila’lé’enë’.

⁸ Ní’irö gusöl-lë’ë légaquië’ tsöjáquië’ Belén. Rë’ légaquië’:

—Guli’tséaj ni’, en guli’tsöjnaba dxi’a nacxi naca queëbi’ bí’ido’ na’. Cate’ chibidzölili’-bi’, ididíxjö’ili’ neda’, para tseja’ ca’ neda’, tseaj ládxa’a-bi’.

⁹ Gudödi bila’yönnë’ didza’ bë’ë Herodes na’, söjáquië’ bönni’ ta’yéajni’inë’ na’, ate’ bölaj na’ bila’lé’enë’ cate’ ni’ nacu’ë ládzagaquië’ söjnöruba’ lógaquië’ ga bidxintë’ yöjsóa ga na’ dëbi’ bí’ido’ na’.

¹⁰ Cate’ bila’lé’enë’ bölaj na’, bulu’dzëjade’enë’.

¹¹ Cate’ gula’yázië’ yu’u, bila’lé’enë’-bi’ bi’i bönni’do’ na’, zóalenbi’-nu María, xiná’abi’. Bulu’zóa zxíbigaquië’ lobi’, en gula’yéaj ládxi’gaquië’-bi’. Gudödi na’ gula’saljë’ yugu’ yöxaj quégaquië’, ate’ bulu’nödzejë’ queëbi’ oro, en yalaj, en nörido’ rilá’ zxiqi que yaga mirra.

¹² Tu’ chibuzéajni’inë’ Dios légaquië’ lu yëla bëchigal para cabí tsöjhuöjquië’ ga zoë’ Herodes na’, que lë ni na’ yöjhuöjquië’ ládzagaquië’ nöza yúbölö.

José, en María, ta’chë’ë-bi’ Jesús luyú Egipto

¹³ Gudödi bulu’zë’ë yugu’ bönni’ ta’yéajni’inë’ ni’, bulufi’ lahuë’ tuë’ gubáz lá’ayi queë’ Xanru’ lu yëla bëchigal, ga na’ dë’ José, en rë’ lë’:

—Guyaschi. Guchë’-bi’ bí’ido’ ni, enca’ xiná’abi’, ate’ buzzunnaj ni. Guyéaj luyú Egipto, ate’ ugá’anu’ ni’ cate’ guiëra’ li’ ia’tú. Caní gunu’ tu’ uguiljë’ Herodes bí’ido’ ni para gútië’-bi’.

¹⁴ Ní’irö guyasë’ José, en ni’ naca chi’i dzö’ölö, guchë’-bi’ bí’ido’ na’, enca’ xiná’abi’, ate’ yöjáquië’ luyú Egipto.

¹⁵ Bulu’gá’anë’ ni’ cate’ gútirë’ Herodes. Caní guca para gaca lë na’ gunné’ Xanru’ Dios lu ru’ë tu bönni’ bë’ë didza’ uláz queë’, gunné’: “Ga naca luyú Egipto bulidza’ Zxi’ina’.”

Risöl-lë’ë Herodes bönni’ ilútië’-bi’ bi’i huë’ënido’ nacuá’abi’ yödzo Belén

¹⁶ Cate’ gúquibe’enë’ Herodes biti’ gulunë’ bönni’ ta’yéajni’inë’ ca rnnë’, gulënë’, ate’ gunná bé’enë’ bönni’ tsöjáquië’ ni’ para ilútië’-bi’ yúgu’tëbi’ bi’i bönni’do’ nacuá’abi’ yödzo Belén, en idú gásibi’ilö ga dë Belén na’, yugu’ bí’ido’ chiyú’ugacabi’ chopa iz, en bí’ido’ nahuë’ëngacaröbi’. Caní benë’ ca busáquië’ queë’ Herodes na’, tsa chiguca dza bulufi’ lahui bölaj na’, dza na’ bulu’zéajni’inë’ bönni’ ta’yéajni’inë’ na’ lë’.

¹⁷ Caní guca, bidxín lë na’ gunné’ Jeremías, bönni’ bë’ë didza’ uláz queë’ Dios, gunné’:

¹⁸ Lu yödzo Ramá riyön chí’igaca nupa ta’bödxí, en nupa ta’bödxí yechi’.

Raquel ribödxinu ni’a quégacabi’ zxi’ininu.

Biti’ gaca nu huë tsahui’ lënu, tu’ chinátigacabi’.

¹⁹ Gudödi gútië' Herodes na', ní'irö buluí' lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

²⁰ —Guyasa. Guchë'-bi' bi'i bönni'do' ni, enca' xiná'abi', ate' böaj luyú Israel, tu' chigulátië' bönni' ni' gulë'ënnë' ilútië'-bi' bi'i bönni'do' ni.

²¹ Ní'irö guyasë' José, ate' guchë'-bi' bi'i bönni'do' na', enca' xiná'abi', ate' yöhuöjquië' luyú Israel.

²² Cate' gúquibe'enë' José rinná bë'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea.

²³ Cate' bidxinë' ni', yöjsóë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' buluí' lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea.

² Juan na' rnnë':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyön chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxido'oli'.”

⁴ Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'.

⁵ Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'.

⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilé' nisa, gudxë' légaquië':

—Libí'ili', dí'a dza quégacaba' bëla sínia'. ¿Zoa nu buzéajni'i libí'ili' para izxúnajli' yöl-la' rusiúdxí na' si' gaca quégaca bönachi?

⁸ Guli'gún le gaca bë' chibubí'i ládxi'li'.

⁹ Biti' cuéqui ícjali', biti' innali' nácali' tsahui' tu' naca Abraham xuz gudödi queëli'. Rea' libí'ili', huáca gunë' Dios ga ulu'huóaca yugu' guiöj nacua' ni dí'a dza queë' Abraham.

¹⁰ Chizóa riböza guíë huága para ichugu yugu' yaga le rulu'í ca gaca queëli'. Yúgu'të yaga biti' ta'bia le naca dxí'a, írúgugaca, ate' ila'gu'ë léguequi lu guí.

¹¹ Le nácatë neda' ruquila' libí'ili' nisa lu nisa, núlöli' chibubí'i ládxi'li', pero Bönni' na' ral-la' guíde' cate' tödi quia' neda', Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi len guí' queë'. Bönni' ni nácatërë' lo ca neda', ate' neda' biti' naca' lesaca' ilecja' xiráchuë' nudë'ë.

¹² Zönë' lu në'ë böcö' queë', le ulúbinë' ga ridxi'a zxoá' xtila queë'. Cu'ë zxoá' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' biti' ca' ulu.

*Ridile' nisa Jesús**(Mr. 1:9-11; Lc. 3:21-22)*

13 Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'.

14 Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

15 Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj.

16 Cate' chinadilë' Jesús nisa, la' burúajtë' lu nisa. Ní'irö gyalaj lúzxiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dödo'.

17 Ní'irö biyön chi'i nu ruí' didza' yehua' yubá, rnna:

—Bönni' ni náquië' Zxi'ina'. Nadxí'ida' Lë', en raza ládxa'a Lë'.

4*Rë'ëni Satanás tu' xihui' ibaga' Jesús dul-la'**(Mr. 1:12-13; Lc. 4:1-13)*

1 Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

2 Idú choá' dza choá' yëla biti' bi gudahuë' Jesús, ate' gudödi ni' ridunë'.

3 Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxi'inë' Dios, gunná na'a ulu'huóaca guiöj nacuá' ni yöta xtila.

4 Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

5 Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'.

6 Ní'irö tu' xihui' rë Lë', rnna:

—Channö nacu' Li' idú Zxi'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',

ate' ulu'chisë' Li' lu ná'agaquië',

para cabí tsöjchégu'u guiöj, en cabí gunu' zi' ni'u.

7 Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

8 Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacuá' yödzölió ni, en yúgu'të yöl-la' tsahui' quéguequi.

9 Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxon.

10 Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxa'u, en udödi cuinu' lu na' tuzë' Lë'.”

11 Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

*Risí lahuë' Jesús runë' libán luyú Galilea**(Mr. 1:14-15; Lc. 4:14-15)*¹² Cate' biyönnë' Jesús nadjunë' Juan lidxi guié, guyijë' luyú Galilea.¹³ Buzë'ë yödzo Nazaret, ate' yöjsóë' lu yödzo Capernaum ga naca ra' nísado', lu buzá' quégaca bönachi Zabulón, en bönachi Neftalí.¹⁴ Caní guca, bidxín lë na' gunnë' Isaías, bönni' bë'ë didza' uláz queë' Dios, gunnë':¹⁵ Luyú Zabulón, en luyú Neftalí,

la' nöza ra' nísado' ia'tsólá'a yegu Jordán saca' ga rilén gubidza.

Luyú Galilea, ga nacua' bönachi bití' nácagaca judío.

¹⁶ Bönachi chul-la niti ni' bila'lé'e bení',

ate' bönni' ni' nácagaquië' ca nupa chinátigaca, gulén quégaquië' bení'.

¹⁷ Cate' ní'irö gusí lahuë' Jesús runë' libán, en rë' bönachi ni':

—Buli'bf'i ládxi'li', tu' chizóa idxín dza idinná bë' Nu na' zoa yehua' yubá luyú ni.

*Jesús rulidzë' tapë' bönni' uzxön böla para tsöjtá'gaquië' Lë'**(Mr. 1:16-20; Lc. 5:1-11)*¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxön böla.¹⁹ Jesús rë' légaquië':

—Guli'dutá' neda', ate' guna' ga ichë'ëli' bönachi quia', gunli' ca runli' rizönlí'-ba' böla.

²⁰ Chopë' ni la' bulu'cá' anatë' yugu' yöxaj böla quégaquië', ate' sôjácalenë' Jesús.²¹ Cate' gudödë' Jesús ia'lati' ní'ilö, bilé'enë' ia' chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' zxi'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'.²² La' bulu'cá' anatë' bárcodo' na', enca' xúzgaquië', ate' sôjácalenë' Jesús.*Jesús rusédinë' bönachi zían**(Lc. 6:17-19)*²³ Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sëdë' queë' Dios. Benë' libán ni' que didza' dxi'a ca si' idinná bë'ë Dios luyú ní', en bunë' yúgu'të nupa te'e tsca naca yödzöhuë' té'eguequi.²⁴ Guzé didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queégaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unígaquië' bin ní'a ná'agaquië', ate' Jesús bunë' yúgu'të bönni' na'.²⁵ Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsólá'alö yegu Jordán saca' ga rilén gubidza, ate' røjácalen Jesús.**5***Libán benë' Jesús ga naca lu guí'ado'**(Lc. 6:20-23)*

1 Cate' bilé'ené' Jesús bönachi zían sōjácálen Lë', ní'irō gurené' tu lu guí'ado' ga naca xitsá'alō, atē' gurō'è lu guí'a ni'. Ní'irō bulu'dubē' bōnni' usēda queē' ga zoē'.

2 Gusi lahuē' rusédinē' légaquiē', rnnē':

3 —Bica' ba yugu' bōnni' téquibe'ené' ta'yádzjanē' le naca queē' Dios, tu' nadéli'gaquiē' lataj ga rinná bē'è Bōnni' na' zoē' yehua' yubá.

4 'Bica' ba yugu' bōnni' tu'huí'ini ládxi'gaquiē' tu' nabága'gaquiē' dul-la', tu' huē' tsahuē'è Dios caz légaquiē'.

5 'Bica' ba yugu' bōnni' nácagaquiē' nōxaj ladxi' lahuē' Dios, tu' gata' quégaquiē' luyú ni.

6 'Bica' ba yugu' bōnni' ta'zē ládxi'gaquiē' le naca tsahui' lahuē' Dios, atē' raca quégaquiē' ca raca quégaca nupa ta'dún, en ta'bidxi nisa, tu' gunē' Dios ga ulu'zi'è xibé lē na' ta'zē ládxi'gaquiē'.

7 'Bica' ba yugu' bōnni' tu'huechi' ládxi'gaquiē' luzá'agaquiē', tu' huéchi' ládxi'è Dios légaquiē'.

8 'Bica' ba yugu' bōnni' naca tsahui' icja ládxi'do'gaquiē', en biti' bi dul-la' nabága'gaquiē', tu' ila'lé'ené' Dios.

9 'Bica' ba yugu' bōnni' ta'bequi dxíē' didza' bizxaj, tu' ila'zí' lágaquiē' xzí'ini cazē' Dios.

10 'Bica' ba yugu' bōnni' ta'zaca' ta'gui'è lu le ta'bía ládxi'gaca bönachi légaquiē' cate' tunē' le naca tsahui', tu' dē lataj quégaquiē' ga rinná bē'è Bōnni' na' zoē' yehua' yubá.

11 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquiē' libí'ili', atē' lu yöl-la' rizi' yē' ta'nnē' queéli' le xihui' tu' dá'ali' neda'.

12 Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquiē' bōnni' gulu'è didza' uláz queē' Dios, en gula'cu'è zí'atēlō ca libí'ili', tu' gula'bía ládxi'gaca ca' bönachi légaquiē'.

Bönachi dá'gaca Cristo ilaca ca zōdi', en ca bení'

(Mr. 9:50; Lc. 14:34-35)

13 Gunnē' ca' Jesús:

—Libi'ili' nácali' ca zōdi' luyú ni, pero channō initi zōdi' na' yöl-la' siná'a que, biti' gaca gunru' ga huóaca siná'a. Bíti'rō naca lesaca', pero chinaca tu le chú'unaru', atē' ulu'libi bönachi le.

14 'Libí'ili' nácali' ca bení' yōdzōlió ni para ulu'ili' lahui le naca queē' Dios. Ral-la' gácali' ca tu yōdzō rō'ō tu lu guí'a, tu' cabí gaca igachi' yōdzō na'.

15 Cate' ruquéla'ru' guí', biti' rigú'uru' le tu zxan guí'ina, pero ruzóaru' le ga liná' para uzení' yúgu'tē nupa nacuá' lu yu'u.

16 Ca na' run bení', ral-la' gunlí' ca' libí'ili', gü'ili' lataj gaca bē' le nácali' lógaca yúgu'tē bönachi, para cate' ila'lé'e le naca tsahui' runlí', ila'gú'u-nē' Xúzili' Dios zoē' yehua' yubá yöl-la' ba.

Rusédinē' Jesús que le gunná bē'è Dios lu nē'è Moisés

17 Gunnē' ca' Jesús:

—Biti' guéquili' bida' para usunítia' yugu' le gunná bē'è Moisés, o xibá na' bulu'sédinē' bōnni' gulu'è didza' uláz queē' Dios. Bida', calēga para usunítia' yugu' lē na', pero para ulu'a lahui idútē le tu'sedi lē na'.

18 Le nácate' rea' libí'ili'. Tsanni nacuá' lúzxiba, en yōdzōlió ni, biti' tōdi cá'asō nitú dídza'do', en nitú le rinná bē' xibá na', cate' gácarō yúgu'tē le ral-la' gaca.

¹⁹ Que lë ni na', núti'tës bönni' quitsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá.

²⁰ Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

Rusédinë' Jesús ca naca que nu rilé luzë'e
(Lc. 12:57-59)

²¹ Gunnë' ca' Jesús:

—Chibiyönili' ca gula'nnë' bönni' guta' lu ná'agaquië' le gulë' xuz xtó'oli': “Bití' gútili' bönachi. Nu bönni' gútië' bönachi, nabáguë'ë xíguia', ate' huadxinë' ga uchi'a usöröë' Dios lë'.”

²² Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxinë' ga uchi'a usöröë' Dios lë'. Lësca' caní, nu bönni' innë' zí'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guié' luzë'ë: “¡Böa' canöz!” nabáguë'ë xíguia' tsöjtsu'ë lu guí' gabila.

²³ 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o lí,

²⁴ bucá'ana lë na' unödzu' lu bucugu ni', en böaj lidxu'. Zí'alö yöjca' ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

²⁵ 'Channö zoa nu bönni' rinábinë' lí' bi ubi'u queë', en ichë'ë lí' ga uchi'a usöröë' tu bönni' lí', budzágatë tsahui' bönni' na' tsanni ni' yú'ulenu' lë' nöza, para cabí udödë' lí' lahuë' bönni' ruchi'a rusöröë', ate' bönni' ni udödë' lí' lu në'ë bönni' rusayjë' lidxi guié', ate' lë' cu'ë lí' lidxi guié' na'.

²⁶ Le nácatë rea' lí', bití' ca' uruju' ni' cate' idxinrö dza quizzju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

²⁷ Gunnë' ca' Jesús:

—Chibiyönili' ca na' gula'nnë': “Bití' gunu' dul-la' le riguitsaj xibá que yöl-la' nutsaga na'.”

²⁸ Na'a, neda' rea' libí'ili': Núti'tës bönni' ruyúë' tu nigula len yöl-la' rizë ladxí' le ruá' dö', chibenë' dul-la' len lënu lu icja ládxi'da'ahuë'.

²⁹ 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítiiu' tu guiöj lo', en calëga idúteo' tsöjtsú'u lu guí' gabila.

³⁰ Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítiiu' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'
(Mt. 19:9; Mr. 10:11-12; Lc. 16:18)

³¹ Gunnë' ca' Jesús:

—Lësca' gula'nnë': “Núti'tës bönni' rusanë'-nu nigula queë', ral-la' unödziejë' queënu tu guichi le rnna rulá'alenë'-nu.”

³² Na'a, neda' rea' libí'ili', channö zoë' nu bönni' rusanë'-nu nigula queë', en bití' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni'

yúbölö, ate' bönni' na' si' ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la' ayi queë' Dios

³³ Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idütë lë na' run tsutsu xtídzu'u ni'a queë' Lë'."

³⁴ Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rō'ë rinná bē'ë Dios.

³⁵ Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bē'ë.

³⁶ Biti' gun tsutsu xtídzu'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'.

³⁷ Ral-la' innásili': "Ön", o innásili': "Biti'", tu' naca que tu' xihui' le nadödi bē' ca náagaca didza' ni.

Rusédinë' Jesús ca naca que nu ruzí' lëbi luzë'e

(Lc. 6:29-30)

³⁸ Gunnë' ca' Jesús:

—Chibiyönili' ca naca le gunná bē'ë Moisés, gunnë': "Nu bi run que guiöj lahui luzë'e, ubí'i ca' que, enca' nu bi run que layi' luzë'e, ubí'i ca' que."

³⁹ Na'a, neda' rea' libí'ili': Biti' tá'baga'li' nu guá' dö' queëli', ate' channö nu capa' xagu' ibëla, bē' lataj capa' ca' ia'tú xagu' yögöla.

⁴⁰ Channö zoa nu gun ga uchi'a usöröë' tu bönni' li', en cuë' zxo', bē' ca' queë' lari' rixóa cúdzu'u.

⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i.

⁴² Nu bi rinábini li', bunödzej que, en nu bi guë'ëni gunnu' que tu chi'i, biti' tá'bagu'u lë na' inabi li'.

Rusédinë' Jesús ca ral-la' idxí'iru' nupa biti' ta'lé'e rë'u dxi'a

(Lc. 6:27-28, 32-36)

⁴³ Gunnë' ca' Jesús:

—Lësca' caní biyönili' lë na' gula'nnë': "Ral-la' idxí'inu' nu nadxí'i li', en udí'inu' nu biti' rilé'e li' dxi'a."

⁴⁴ Na'a, neda' rea' libí'ili', guli'dxí'i nupa biti' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa ta'nnë' queëli', en tuá' dö' queëli'.

⁴⁵ Channö gunli' caní, gácali' zxi'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacua' bönachi tuá' dö', enca' ga nacua' bönachi tsahui'. Risól-lë'ë tu nisa guiöj lu yu quégaca bönachi tsahui', enca' lu yu quégaca bönachi biti' náagaca tsahui'.

⁴⁶ Channö nadxí'isili' bönni' nadxí'iguequinë' libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' biti' náagaca tsahui' na', bönni' tu'quixzjë' uláz que yödzo zi'tu', nadxí'iguequinë' luzá'agaquië'.

⁴⁷ Channö rugápali' Dios tuzë' böchi' luzá'ali', ¿bizxi caz runli' le nácatërö dxi'a? Lësca' caní tunë' bönni' biti' núnbë'gaquië' Dios.

48 Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesús ca ral-la' gácalenru' bönachi

¹ Gunnë' ca' Jesús:

—Guli'güü' ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queëli'.

² Cate' bi unödzu' que nu bi riyadzaj, bití' gunu' ga ilá' lahui lë na' runu' ca tunë' bönni' tu'lú'isö tsahui' cuíngaquië' ga naca lu yu'u ga tu'dubë' bönni' judío, en tu'sédë' queë' Dios, enca' ga naca lu yé'ëyi. Caní tunë' para ila'gú'u bönachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégaquië'.

³ Pero li', cate' bi unödzu' que nu bi riyadzaj, bití' ca' gu'u lataj nu inözi.

⁴ Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

Rusédinë' Jesús ca ral-la' ulídzaru'-në' Dios

(Lc. 11:2-4)

⁵ Gunnë' ca' Jesús:

—Cate' ulídzali'-në' Dios, bití' gunli' ca tunë' bönni' tu'lú'isö tsahui' cuíngaquië', tu' ta'yaza ládxi'gaquië' ta'zuínë' tu'lídzë' Dios gapa naca lu yu'u ga tu'dubë' tu'sédë' bönni' judío queë' Dios, en gapa naca lu yé'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'.

⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lídzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queëli'.

⁷ Cate' ulídzali'-në' Dios bití' gunli' la' yé'ëyi la' lez ca na' tunë' bönni' bití' núnbë'gaquië' Dios, tu' téquinë' huayönnë' Dios légaquië' tu' tu'lídzë' la' yé'ëyi la' lez.

⁸ Bití' gunli' ca na' tunë' légaquië'. Xúziru' Dios, zí' atëlö cate' si' inábali'-në', chinóz quézinë' le riyadzaj queëli'.

⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li'

ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'

ca runtu' netu', runiti lotu' nupa bi tun queëtu'.

¹³ Bití' gu'u lataj si' bë' tu' xihui' netu',

pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní rë'ënitü' gácatíca'sö. ¡Ca' gaca!

¹⁴ Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'.

¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédiné' Jesús ca ral-la' gunru' gubasa

¹⁶ Gunné' ca' Jesús:

—Cate' gunli' gubasa, biti' gunli' bayechi' loli' ca tuné' bönni' tu'lu'isö tsahui' cuíngaqüé', tu' tuné' bayechi' lógaqüé' para iléquibe'e bönnachi tuné' gubasa. Le nácatè rea' libí'ili', cá'asö naca yöl-la' ba gata' quégacüé'.

¹⁷ Libí'ili', cate' gunli' gubasa, buli'pá'a ícjali', en guli'quibi loli',

¹⁸ para cabi iléquibe'e bönnachi runli' gubasa. Bagáchi'sö ral-la' gunli' gubasa, ate' Xúziru' Dios, zóalené' libí'ili' ga na' zóali' queézili', Lè' ubi'è queéli'.

Yehua' yubá ral-la' utúbiru' yöl-la' tsahui' queëru'

(Lc. 12:33-34)

¹⁹ Gunné' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'bané'.

²⁰ Buli'tubi yöl-la' tsahui' yehua' yubá, ga ni bélado' que biti' ulu'töba' le, en biti' gaca ditaj, en ga ni' biti' ila'yázié' bönni' gubán, en biti' ila'bané'.

²¹ Ga ni' dè yöl-la' tsahui' queéli', ni' güi'í ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunné' ca' Jesús:

—Guiöj loru' naca ca tu le rigú'u bení' icja ládxi'do'oru'. Que lè ni na', channö guiöj loli' naca tsahui', idútéli' tsépili' yösa bení'.

²³ Channö guiöj loli' biti' naca tsahui', idútéli' nachúl-lali'. Que lè ni na', channö bení' zóalen libí'ili' nuhuóaca le naca chul-la, yénni'terö nachúl-lali'.

Dios, en dumí

(Lc. 16:13)

²⁴ Gunné' ca' Jesús:

—Cuntu nu bönni' gaca guné' xichíngacüé' chopa xané', tu' uzóë' tué' tsólá'alö, ate' ia'túé' na' idxí'iné', o ugá'analené' tué', ate' ia'túé' na' usán ládxe'è. Biti' gaca gunli' xichiné' Dios, enca' dumí.

Dios rapa chi'è nupa néquiquequi queë'

(Lc. 12:22-31)

²⁵ Gunné' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'terö yöl-la' na'bán queéli' ca le gáguli', ate' nácatèrö lesaca' le nácali' ca lari' gáculi'.

²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoé' yehua' yubá, rugagu cazé' légacaba'. Nazáca'teröli' libí'ili' ca yugu' biguínido' na'.

²⁷ ¿Nuzxi caz bönni' nútsé'è ládjali' gaca guné' ga soè' ibané' ia'túz dza tu' ruúbi ruguí'iné' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rögaca la' guixi' ca ta'zxón. Biti' tun dxin, en biti' tun du lari'.

²⁹ Neda' rea' libí'ili', Salomón, bönni' ni' gunná bē'è, sal-la' gúta'da' yöl-la' tsahui' queë', lari' gúcuè' biti' gunná'terö lachi ca rinná'gaca yöjdo' na'.

³⁰ Dios cuz runë' lachi yöj guíxi'do', le r'ógaca la' guixi', le nacua' na'a dza, ate' cuz xö huidzaj ila'yegui lu guí'. Channö caní ruí'í láchxë'ë yöj guíxi'do', runë' léguequi lachi, gúnda'arë' ca' queéli', sal-la' bití' réajlë'ëli'në' idú láchxi'li'.

³¹ Que lë ni na', bití' ubi uguí'ili', en bití' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gácutsatu?"

³² Bönachi yödzöliö ni tu'úbi tu'guí' ni'a que yúgu'të lë ni, pero zoë' Xúziru' yehua' yubá, ate' Lë' nözinë' naquínili' yúgu'të lë ni.

³³ Na'a, guli'güí'irö láchxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni.

³⁴ Que lë ni na', bití' ubi uguí'ili' ni'a que le ral-la' gaca cuzö huidzaj, tu' huáca güí'í láchxi'li' cuzö huidzaj le gaca queéli' dza na'. Tu tu dza ilaca le ral-la' güí'í láchxi'li' dza na'.

7

Bití' ral-la' ichugu bë'ëru' böchi' luzá'aru'
(Lc. 6:37-38, 41-42)

¹ Gunnë' ca' Jesús:

—Bití' ichugu bë'ëli' böchi' luzá'ali', para cabí ichugu bë'ë Dios queéli',
² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' ruríxi rudódili' que luzá'ali', la' cá'asö urixi udödë' Dios queéli'.

³ ¿Bizx que ruyú' bëbudo' yu'u guiöj lahuë' böchi' luzó'o, en bití' réquibe'enu' yu'u le zxöntëro guiöj lo' li'?

⁴ ¿Guíëtso' böchi' luzó'o: "Gulöz, cueja' bëbudo' yu'u guiöj lo'", ate' li', le zxöntëro ca' yu'u guiöj lo' li'?

⁵ Li', bönni' rulu'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhui'do' para gaca cueju' bëbudo' yu'u guiöj lahuë' böchi' luzó'o.

⁶ Bití' güí'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u
(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'.

⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ Channö zoë' nu bönni' láchjali' libí'ili', ate' zóabi' bi'í queë', channö inábibi' lë' yöta xtila, ¿naru' unödzejë'-bi' guiöj?

¹⁰ Channö inábibi' lë' tuba' böla, ¿naru' unödzejë'-bi' bëla?

¹¹ Libí'ili' nácali' huiá' dö', pero nözili' unödzejali' zxí'inili' le naca tsahui'. Nácatëro löza, Xúzili' zoë' yehua' yubá unödzejë' nupa ta'nábini Lë' le naca dxí'a.

¹² Que lë ni na', ca na' rë'ënilí' ilún bönachi queéli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'
(Lc. 13:24)

13 Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nõza le røjácalenë' bönni' ga ni' ila'nítië', ate' ta'yázië' bönni' zían ni'.

14 Tsúpi'do' naca ga nu riyaza, en lásido'os naca nõza le røjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'

(Lc. 6:43-45)

15 Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'lu'i cuíngaqië' nõxaj ládxi'do' ca nácagacaba' bö'cu' zxíla'do', pero lu icja ládxi'do'gaqië' nácagaqië' ca bö'cu' guí'a sínia'.

16 Yugu' le tunë' ilaca bë' le nácagaqië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'.

17 Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a.

18 Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a.

19 Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'.

20 Caní naca, yugu' le tunë' bönni' na' ilaca bë' le nácagaqië'.

Nupa bití' ila'yázië' ga rinná bë'ë Dios

(Lc. 13:25-27)

21 Gunnë' ca' Jesús:

—Zian nupa të neda': "Xan, Xan", pero calëga yúgu'të ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca ré'ënë' Xuza' Dios, zoë' yehua' yubá.

22 Cate' idxín dza údxi que yödzülió ni, bönni' zían ilé' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxon."

23 Ní'irö neda' guía' légaqië': "Biti' ca' núnbë'a libí'ili'. Guli'cuíta ga zoa', libí'ili' ruá'ali' dö'."

Chopa ca gaca udxáru' xilibi zö'ö

(Lc. 6:47-49; Mr. 1:22)

24 Gunnë' ca' Jesús:

—Ia'stú ca', nu bönni' riyönnë' xtídza'a ni, en gunë' ca rnna, bönni' ni náquië' ca tu bönni' réajni'inë', budxíë' lidxë' ga naca lu guiöj.

25 Cate' gulaj guiöjsiu', en guzxön yegu gubó'o, en guyecja bö', gudibi nisa cuíta yu'u na', pero bití' gubixi, tu' dxía xilibi lu guiöj.

26 Na'a, nu bönni' riyönnë' xtídza'a ni, en bití' runë' ca rnna, bönni' ni náquië' ca tu bönni' bití' réajni'inë', budxíë' lidxë' lu yu dzöbi.

27 Cate' gulaj guiöjsiu', en guzxön yegu gubó'o, en guyecja bö', ní'irö gudá'a nisa cuíta yu'u na', ate' gubíxitë', en tsaz biguinnaj.

28 Cate' Jesús budxi bë'lenë' légaqië' didza' ni, bulu'bani bönachi zían nacua' ni' ca naca le rusédinë',

29 tu' rusédinë' légaqië' ca tu bönni' dë lu në'ë, en calëga ca tunë' bönni' yudo' usedi quégaqië'.

8

Ruhuöáquië' tu bönni' ré'enë' huë' nudzu' ruzödi

(Mr. 1:40-45; Lc. 5:12-16)

¹ Cate' bö'tjë' Jesús lu guí'a na', sōjácálen bö'nachi zían Lë'.

² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö rë'ënu', huáca unu' neda'.

³ Ní'irö Jesús la' bulitë në'ë, en gudanë' lë'. Rë' lë':

—Rë'ënda'. Huöácu' dxi'a.

La' bunítitë xihuë'ë bönni' huë' na'.

⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí' cuinu' lahuë' bixúz, ate' yöjnödzej le gunná bë'ë Moisés le uluí' bö'nachi chiböácu'.

Jesús ruúnë' bi' i huen dxin queë' tu bönni' rinná bë'ë lu gudil-la

(Lc. 7:1-10)

⁵ Cate' guyázië' Jesús yödzo Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' rōjáquië' gudil-la, ate' gúta'yuë' lahuë' Jesús,

⁶ en rë' Lë':

—Xan, bi' i huen dxin quia' dëbi' yu'u, ré'ebi' huë' nacú'unibi' bin, ate' riguí' rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' rōjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huöácabi' bi' i huen dxin quia'.

⁹ Lësca' neda', zoa nu rinná be'e neda', en nacu'ë ca' bönni' rōjáquië' gudil-la rinná bé'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'túë': "Gudá ni'", ridë'. Cate' rea'-në' bönni' huen dxin quia': "Ben dxin ni'", la' runtë' dxin na'.

¹⁰ Cate' biyönnë' Jesús didza' ni, bubáninë', ate' gudxë' bönni' sōjácálenë' Lë', rnnë':

—Le nácátë rea' libí'ili', ga nacuá' bö'nachi Israel, cuntu nu bönni' rōjxéqui'da'-në' réajlë'ë neda' ca runë' bönni' ni.

¹¹ Ia'stú rea' libí'ili': Ila'rúaj bö'nachi zían saca' ga rilén gubidza, en saca' ga ribía gubidza, ate' ila'bō'len tsözxön Abraham, en Isaac, en Jacob, yehua' yubá ni' ga rinná bë'ë Dios,

¹² pero yugu' bönni' na' gurö cazë' Dios para ila'yázië' ga na' rinná bë'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhuí'ini quégaquië'.

¹³ Ní'irö Jesús gudxë' bönni' na' rinná bé'enë' bönni' rōjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asó böácátëbi' bi' i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá.

¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunödzejanu le galahuë'.

Jesús ruúně' zían nupa te'e

(Mr. 1:32-34; Lc. 4:40-41)

16 Cate' chiridzö' dza na', dujuá'agaquié' zían bönni' yú'ugaca bö' xihui' légaquié' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e.

17 Caní guca para gaca ca na' gunné' Isaías, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzhüë' queëru'."

Nupa gulë'ëni tsöjácálen Jesús

(Lc. 9:57-62)

18 Cate' bilé'enë' Jesús nacua' bö'nachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'.

19 Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sálëna' Li' gáti'tës ga tseju'.

20 Jesús rë' lë':

—Yugu' böza' nacua' zخان guiöj quégacaba', ate' yugu' biguínido', nudxiágacaba' xicá'agacaba', pero neda', Bönni' Guljë' Bö'nachi, biti' dë ga quíxaj ícja'.

21 Ia'tué' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuzá'.

22 Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquië'.

Jesús ribequi dxie' bö' budunu'

(Mr. 4:35-41; Lc. 8:22-25)

23 Gurenë' Jesús lë'e bárcodo', ate' dzágagaquië' Lë' bönni' usëda queë'.

24 Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza nisa lë'e bárcodo' na'. Dë' rásië' Jesús lë'e barco na'.

25 Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

26 Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi.

27 Bulu'bánninë' bönni' na', ta'nnë':

—¿Nuzxi caz bönni' ni? Ru'ísë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'

(Mr. 5:1-20; Lc. 8:26-39)

28 Cate' bidxinë' Jesús ia'tsölá'a nísado' ga na' naca lu xiyú yödzhö Gadara, bila'rúajë' chopë' bönni' ga nacua' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'.

29 La' guluí'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

30 Ga ni' nacu'ë nacua'aba' cuchí zían ta'daba' táguba', nacua'aba' láti'do' ga naca zi'tu'.

31 Gulá'naba yechi' bö' xihui' na' Jesús, en të' Lë':

—Channò ubéaju' netu', benna lataj tsòjtsú'ugacatu'-ba' cuchi zían ni'.

³² Ní'irò Jesús gudxè' léguequi:

—Guli'tséaj.

La' bila'rúajtè' bō' xihui', en yōjcházagaca cuchi zían ni'.

Ní'irò yúgu'tēba' cuchi zían na' yōjbixitēgacaba' ga naca lē'e guiōj, en yōjcházagacaba' lu nísado', ga ni' gula'yépiba' nisa, en gulátiba'.

³³ Guládxinē' bōnni' tu'yúē'-ba' cuchi na', ate' bulu'zxúnnajē'. Cate' bila'dxinē' lu yōdzō, gula'guíxjō'è yúgu'tè lē na' guca quégaquiē' bōnni' ni' gula'yú'u bō' xihui' légaquiē'.

³⁴ Ní'irò bila'rúaj bōnachi lu yōdzō ni', yōjtságagaquiē' Jesús. Cate' bila'lé'enē' Lē', guláta'yue' lahuē' uzé'è lu xiyúgaquiē' na'.

9

Jesús ruúnē' tu bōnni' nacú'uniē' bin

(Mr. 2:1-12; Lc. 5:17-26)

¹ Ní'irò bubenē' Jesús lē'e bárcodo', en gudōdē' ia'tsōlá'a nísado' ni', ate' budxinē' ga naca ladzē'.

² Ní' dujuá'gaquiē' tu bōnni' nacú'uniē' bin ga zoē' Jesús, zxoē' lu da'a yaga. Cate' bilé'enē' Jesús ca na' ta'yéajlē'è bōnni' ni Lē', gudxè' bōnni' na' nacú'uniē' bin, rnnē':

—Butipa ládxi'u, zxi'ina'do'. Chibuníti lahua' dul-la' nabágu'u.

³ Nacu'è ca' bōnni' yudo' tu'sédinē' ni', ate' ta'nnē' lu icja ládxi'do'gaquiē', ta'nnē': “Didza' ru'è bōnni' ni ruzóa Dios tsōlá'alō.”

⁴ Cate' réquibe'enē' Jesús le ta'zá' ládxi'gaquiē', rē' légaquiē':

—¿Bizx que rizá' ládxi'li' caní le cabí naca tsahui'?

⁵ Biti' naca bōniga nu guiēsō bōnni' ni: “Yugu' dul-la' nabágu'u chibuníti lahua'”, pero naca bōniga nu gun ga huóasē', en uzé'enē'.

⁶ Na'a, ulu'ida' libí'ili' neda', Bōnni' Guljē' Bōnachi, dē lu na'a yōl-la' unná bē' uniti lahua' dul-la' luyú ni.

Ní'irò Jesús gudxè' bōnni' na' nacú'uniē' bin, rnnē':

—Guyása. Buchisa da'a yaga quiu', en bōaj lidxu'.

⁷ Ní'irò la' guyásatē' bōnni' na' nacú'uniē' bin, en bōajē' lidxē'.

⁸ Cate' bila'lé'enē' bōnni' nacu'è ni' lē ni, bulu'bánninē', ate' gula'gu'è Dios yōl-la' ba tu' bunōdzjē' yōl-la' huáca caní quégaca bōnachi.

Jesús rulidzē' Mateo

(Mr. 2:13-17; Lc. 5:27-32)

⁹ Cate' buzé'è Jesús ni', bilé'enē' bōnni' lē' Mateo, rō'è ga na' ruquíxjē' uláz que yōdzō zítu', ate' Jesús gudxè' lē':

—Gudá' neda'.

Ní'irò la' guyásatē' Mateo na', ate' sa'yéajlenē' Jesús.

¹⁰ Ia'tú le guca, cate' ni' rō'è Jesús rahuē' ga naca lidxē' Mateo, zían bōnni' tu'quíxjē', en yugu' bōnni' cá'asō bila'dxinē' ga zoē', ate' gula'bō'lenē' Jesús tsōzxon len yugu' bōnni' usēda queē'.

¹¹ Cate' bōnni' yudo' fariseo bila'lé'enē' lē ni, gula'nábinē' yugu' bōnni' usēda queē' Jesús, ta'nnē':

—¿Naru' bōnni' rusédinē' libí'ili' rágulentsē' tsōzxon bōnni' tu'quíxjē', en íá'zica rē' bōnni' dul-la'?

¹² Cate' biyōnnē' Jesús lē ni, rē' légaquiē':

—Biti' naquíniguequinē' bōnni' nácaquiē' dxi'a nu un bōnachi, pero bōnni' té'enē' naquíniguequinē' nu un bōnachi.

13 Guli'tséaj, en buli'sëda le rnna lë na' nazúaj lu guichi lá'ayi, le rnna caní: "Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'." Bida' ni, calëga para ulídzagaca'-në' bönni' tshui', pero bida' para ulídzagaca'-në' bönni' dul-la' para ulu'bí'i ládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

14 Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití' tunë' gubasa?

15 Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacua' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idüë' bönni' na' rutsaga në'ë ga nacu'ë. Dza ní'irö ilunë' gubasa.

16 Bucúdzu'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichóza'rö lari' tëbi na'.

17 Lëasca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë' taca chí'i.

Rubanbi' bi'i nigula queë' Jairo, en ruhuöácanu tu nigula gudannu lari' nacüë' Jesús

(Mr. 5:21-43; Lc. 8:40-56)

18 Tsanni ni' Jesús ru'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxië' lahuë' Jesús, en rë' Lë':

—Bi'i nigúlado' quia' la' gútitëbi'. Gudá ixóa no'o lëbi', ate' ubanbi'.

19 La' guzúitenë' Jesús, en sa'yéajlenë' lë'. Dzágagaquië' bönni' usëda queë' Lë'.

20 Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, bití' ruhu'í rön queënu que huë' quégaca cázanu nigula, ate' gudannu lari' nacüë' Jesús.

21 Caní bennu tu' rizá' ládxi'nu, rnnanu: Channö cansa' zxië', huóaca'.

22 Ní'irö buécjë' Jesús, en ruyüë' lënu, ate' rë'ë-nu:

—Butipa ládxi'u, zxi'ina'do'. Chiböácateu' tu' réajlë'u neda'.

La' ná'asö böácátënu.

23 Cate' bidxinë' Jesús lidxë' bönni' unná bë' na', bilë'enë' nacu'ë ni' bönni' tu'cödxë' gui, en nupa ta'bödxí yechi'.

24 Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacua' ni' bulu'titaj Lë'.

25 Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'.

26 Guzë didza' ca guca lë ni, ate' bila'yöni bönachi nacua' idütë luyú na'.

Jesús ruúnë' bönni' nachul-la guiöj lógaquië'

27 Cate' Jesús burúajë' ni', chopë' bönni' nachul-la guiöj lógaquië' sójácalenë' Lë'. Tu'ë zidzaj didza', ta'nnë':

—Zxi'ini xi'sóë' David, buéchi' ladxí netu'.

28 Cate' bidxinë' Jesús ga naca lu yu'u, bila'dxinë' chopë' bönni' na' nachul-la guió'j lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

29 Ní'irö Jesús gudanë' guió'j lógaquië', ate' rnnë':

—Ca réajlë'ëli', ca' gaca queé'li'.

30 La' böáljatë' guió'j lógaquië'. Ní'irö Jesús buzenë' bach légaquië', rnnë':

—Guli'gü'ítica'sö láchí'li' cuntú nu inózi lë ni.

31 Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' bití' ru'ë didza'

32 Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús naché'gaquië' lahuë' tu bönni' bití' ru'ë didza', tu' yu'u lë' bö' xihuí'.

33 Cate' bubéajë' Jesús bö' xihuí' na', la' gunnëtë' bönni' na' bití' guca gu'ë didza'. Bulu'bábinë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

34 Ní'irö bönni' yudo' fariseo gula'nnë' queë' Jesús, ta'nnë':

—Bönni' ni' rubéajë' yugu' bö' xihuí', rugunë' dxin yöl-la' unná bë' que xángaca bö' xihuí' na'.

Jesús ruhuéchi' láchxë'ë bönachi zían

35 Gudë' Jesús idú gásibi'ilö gapa nacuá' yödzö zxon, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí' ta'zaca' yugu' lu yödzö na'.

36 Cate' Jesús bilé'enë' bönni' zían ni', buéchi' láchxë'ë légaquië', tu' ta'guí' ta'záquië', en nudú láchí'gaquië' ca raca quégacaba' bö'cu' zxila' bití' zoa nu ruyú lécacaba'.

37 Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa.

38 Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihuí' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí' ta'zaca'.

² Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),

Andrés, (böchë'ë Simón na'),

Jacobo, (zxí'inë' Zebedeo),

Juan, (böchë'ë Jacobo na'),

³ Felipe, Bartolomé, Tomás,

Mateo, (bönni' uquízaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ru'i láchxë'ë yödzo queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

Jesús risöl-lë'ë gubáz queë' tsöjéngaquië' libán

(Mr. 6:7-13; Lc. 9:1-6)

⁵ Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacua' bönachi biti' nácagaca judío, en biti' tsú'uli' ládzagaca bönachi nacua' luyú Samaria.

⁶ Guli'tséaj ga nacua' bönachi Israel, nácagaquië' ca bö'cu' zxíla'do' nanítigacaba'.

⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni."

⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queéli' yöl-la' unná bë' ni. Buli'gún dxin le, en biti' bi uquízxjali'.

⁹ 'Biti' bi guá'ali' lu buzudi queéli', calëga dumí oro, en calëga dumí plata, en calëga dumí lásido'.

¹⁰ Biti' guá'ali' yöxaj yöta queéli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queéli', tu' idzöli quézínë' bönni' huen dxin le gahuë'.

¹¹ 'Gátitës yödzo zxön o yödzo'do' ga idxinli', guli'naba nuzxi naca idú ladxí' lu yödzo ni', ate' ugá'anali' lidxi nu na' cate' gála'rö dza urúajli' yödzo na'.

¹² Cate' tsú'uli' tu lu yu'u, buli'gapa Dios bönachi nacua' lu yu'u na', inábili'-në' Dios unödzejë' quégaquië' le cuéqui dxi icja ladxí'do'gaquië'.

¹³ Channö bönachi nacua' lu yu'u ni' nácagaca lesaca', ugá'analen le ribequi dxi ladxí' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxí' len léguequi.

¹⁴ Gátitës ga idxinli' ga bönachi ni' biti' ilún libí'ili' bal, en biti' ulu'zë nagui xtídza'li', buli'rúaj lu yu'u ni' o yödzo ni', ate' guli'cuíbi bëchtö da' lë'e lálali', le ulu'i' léguequi nabága'gaca xíguia'.

¹⁵ Le nácate' rea' libí'ili', cate' idxín dza ichúguië' Dios quégaca bönachi, ila'guí'i ila'záca'rö bönachi yödzo na' ca ila'guí'i ila'záca' bönachi gula'cuá' yödzo Sodoma, en yödzo Gomorra, nupa ni' busunítië' Dios.

Nupa biti' ta'yéajlë' ulu'saca' zi' nupa dá'gaca Cristo

¹⁶ Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxí' ca nácagacaba' gu'dödo'.

¹⁷ Guli'gún chí'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios.

¹⁸ Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquië' bönni' ni', en lógaquië' bönni' biti' nácagaquië' judío.

¹⁹ Ní'irö cate' ulu'dödë' libí'ili' lu ná'agaquië' bönni' unná bë' na', biti' cö'öli' böniga naxi innali', tu' ichizë' Dios icja ladxí'do'oli' didza' guí'ili', en ca innali' la' dza ná'asö.

²⁰ Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

²¹ 'Ila'cuá' bönachi ulu'dödi böchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxi'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'.

²² Yúgu'të bönachi ulu'zóa libí'ili' tsólá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá.

²³ Cate' ulu'saca' zi' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacua' yugu' yödzö quégaca bönachi Israel.

²⁴ 'Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'.

²⁵ Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

²⁶ Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándo'os, ate' huáca bë' yúgu'të le nagachi'.

²⁷ Yugu' didza' ru'í'lena' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi.

²⁸ Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idütë le nácali', en chú'unë' bö' naca cázali' lu guí' gabila.

²⁹ 'Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní.

³⁰ Lësca' caní, nabábagaca yúgu'të guitsa' ícjali' lahuë' Dios.

³¹ Que lë ni na', biti' gádxili'. Ru'ítërö ládxe'ë Dios libí'ili' ca ru'í ládxe'ë-ba' zianba' biguínido'.

Yugu' bönni' ta'z' lu ná'agaquië' Cristo lógaca bönachi

(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá.

³³ Bönni' ta'dá'baguë'ë lógaca bönachi, ila'nnë' biti' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi

(Lc. 12:51-53; 14:26-27)

³⁴ Gunnë' ca' Jesús:

—Biti' guéquili' za'a idigu'a le ribequi dxi bönachi yödzölió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi.

³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' zxi'ininu.

³⁶ Caní gaca, la' di'a dzasö quégaca bönachi ulu'saca' zi' luzë'eguequi.

³⁷ Nu nadxí'irö xuz xinë'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'.

³⁸ Nu biti' si' lu në'e gaca ca tu bönni' söjtë'ë lë'e yaga cruz, en ta' neda', biti' naca bachi guequi quia' neda'.

³⁹ Nu ru'í'i ladxí' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'.

⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'.

⁴² Nüti'tës nu unödzej queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús

(Lc. 7:18-35)

¹ Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

² Juan, bönni' buquilë' bönachi nisa, ni' yu'ë lidxi guié, ate' biyönnë' ca náca'gaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús.

³ Chopë' ni gula'nábinë' Jesús, tē' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'túë' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyónili', en rilé'eli'.

⁵ Guli'tsöjödxe' ca raca, tu lé'enë' bönni' guchul-la guiój lógaquië', ate' tu'zë'ë bönni' biti' guca ila'dé'. Nuhuóácagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'códzuë'. Nnita' nabángaquië' bönni' gulatië', ate' raca libán que didza' dxi'a lógaca bönachi yechi'.

⁶ Bica' ba nu bönni' biti' gáquië' chopa ládxë'ë, biti' ubéaj ládxë'ë neda'.

⁷ Cate' yugu' bönni' na' dá'gaquië' Juan bulu'zë'ë söjhuójgaquië', ní'irö gusí lahuë' Jesús ru'ílenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le?

⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácu'gaquië' lari' dxí'ado' nacué' lidxigaquië' bönni' ta'nná bë'ë.

⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'rë' lo ca ia'zica'rë' bönni' gulu'ë didza' uláz queë' Dios.

¹⁰ Caní naca, tu' náquië' Juan bönni' na' ru'í didza' le nazúaj lu guichi lá'ayi ca naca queë', le rnna:

Buyú, risól-la'a bönni' gubáz quia', inöruë' ca Li'.

Lë' upë'ë nöza ga tödu'.

¹¹ Le nácatë rea' libí'ili'. Idútë yödzölió ni, cuntu nu zoa nácarö lo ca Juan, bönni' ni' buquilë' bönachi nisa, pero nu naca cuídi'do'os ga rinná bè' Nu na' zoa yehua' yubá nácatë'rö lo ca Juan na'.

¹² 'Cate' ni' gusí lahuë' buquilë' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bè'ë Bönni' na' zoë' yehua' yubá, ate' nupa tunsö bayudxi ta'deli' le.

¹³ Ga bidxintë dza na' blë'ë Juan, le rinná bè' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulu'í didza' ca rinná bè'ë Bönni' na' zoë' yehua' yubá.

¹⁴ Channö ré'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunné' ral-la' ilá' lahuë' leyúbölö dza ni zóaru' na'a.

¹⁵ Nu zoa nagui, en riyöni ral-la' uzë nagui.

¹⁶ ¿Bizxi ubéqui'tseda' ca nácgaca bönachi nacua' dza ni zóaru' na'a? Nácgacquië' ca yugu' bí'ido' ta'bö'öbi' lu yë'ëyi. Zidzaj tu'lídzabi' luzá'agacabi',

¹⁷ ta'nnabi': "Rucódxitu' queë'li' gui. ¿Bizx que biti' ruyá'ali'? Rul-la yéchi'tu' queë'li'. ¿Bizx que biti' ribödxu yéchi'li'?"

¹⁸ Caní nácali', tu' bidë' Juan, ate' tu' cabí gü'í gudahuë' ca ráguli' libí'ili', gunnéli' queë', gunnali': "Tu' xihui' dzágui lë'."

¹⁹ Ní'irö bidxina' neda', Bönni' Guljë' Bönachi, ate' re'aj rahua', ate' rnnëli' quia', rnnali': "Náquië' bönni' huágulë'ë, en bönni' re'jë'. Náquië' luzá'agacquië' bönni' uquízxaj, en ia'zica'rö huen dul-la'." Yöl-la' réajni' queë' Dios naca bè' ni'a que le tun nupa ta'zí' lu në'eguequi le.

Le gaca que nu biti' run ca rnna xtídzë'ë Dios

(Lc. 10:13-15)

²⁰ Ní'irö gusí lahuë' Jesús ruzenë' bach bönachi nacua' yugu' yödzö gapa ni' benë' zían yöl-la' huáca, tu' cabí tu'bí'ini ládxi'guequi.

²¹ Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'bí'í ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'luf'í tu'bí'í ládxi'gaca bönachi na'.

²² Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'gu'í ila'zaca' bönachi yödzö Tiro, en yödzö Sidón, nupa na' busunítë' Dios.

²³ Libí'ili', bönachi Capernaum, guca queë'li' ca bidxintëli' ga nu riyaza yehua' yubá. Huójtali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintë na'a dza.

²⁴ Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'gu'í ila'zaca' bönachi Sodoma na'.

Rnnë' Jesús: "Guli'dá ga zoa', uzí' ládxi'li'"

(Lc. 10:21-22)

25 Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero buluf'inu' nupa nácgaca ca yugu' bí'ido' le.

26 Ca' gaca, Xuza', tu' caní guyaza ládxi'u Li'.

27 Yúgu'të nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' ré'ënda' ulu'ida' léguequi Dios Xuz.

28 Guli'dá ga zoa' yúgu'tëli' röjxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí' ládxi'li'.

29 Lu yöl-la' nōxaj ladxí' queëli' guli'gún xichina', gácali' ca bēdxi ta'z'í'iba' yugu' quégacaba'. Guli'sēda lu na'a neda', tu' naca' nōxaj ladxí', en do' ladxí', ate' idzöli yöl-la' ruzí' ladxí' queëli', le cuéqui dxi ládxi'li'.

30 Yugu' na' ugu'a libí'ili', le naca le inná bé'eda' libí'ili', bití' naca bōniga, ate' yua' ugu'a libí'ili' le naca le rusédida', dzá'do'os naca.

12

Ta'lecjë' do bönni' usēda queë' Jesús dza lá'ayi

(Mr. 2:23-28; Lc. 6:1-5)

1 Dza ni', le naca dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' ta'dunë' bönni' usēda queë', en gusí lógaquië' ta'lecjë' do ga dxía zxoá' xtila, en tahuë' zxoá' xtila na'.

2 Cate' bila'lé'enë' bönni' yudo' fariseo lë ni, tē' Jesús:

—Buyútsōca', tunë' bönni' usēda quiu' le cabí ral-la' gunru' dza lá'ayi.

3 Ní'irō Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'?

4 Guyu'ë lu yu'u queë' Dios, en gudahuë' yugu' yōta xtila nagú'ugaquië' lu bucugu lá'ayi, le cabí ral-la' gahuë' lë', en bití' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le.

5 ¿Naru' cabí nulábanili' le rinná bē' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en bití' ta'báguë'ë xíguia'.

6 Na'a, neda' rea' libí'ili', zoa' neda' ni, en naca' bönni' nácarë' lo ca yudo'.

7 Bití' réajni'ili' lë na' nazúaj lu guichi lá'ayi, le rnna: “Ré'ënda' huéchi' ládxi'li' luzá'ali', en caléga gútigacali'-ba' bōa' bēdxdio' ruzéguigacali'-ba' lu bucugu lá'ayi quia'.” La'tu' réajni'ili' lë ni, bití' ichúguli' quégaca nupa bití' nabága'gaca xíguia'.

8 Ca' naca, tu' naca' neda', Bönni' Guljë' Bōnachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

9 Ní'irō buzë'ë Jesús ni', ate' guyu'ë lu yu'u ga tu'dubë' bönni' judío, en tu'sēdë' queë' Dios.

10 Lu yu'u na' zoë' tu bönni' narequi' në'ë, ate' tu' té'ënnë' bönni' judío unná bē' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

11 Bubi'ë didza' Jesús, rë' légaquië':

—Nu bönni' núts'ë ladjali, channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'?

¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsólá'a në'ë.

¹⁴ Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunné' tu bönni' bë'ë didza' uláz queë' Dios ca ral-la' gaca queë' Jesús

¹⁵ Cate' réquibe'enë' Jesús lë ni, buzë'ë ni', ate' sôjácálen bönachi zían Lë'. Jesús bunë' yúgu'të nupa te'e ladaj bönachi na',

¹⁶ en gunná bé'enë' léguequi biti' usiyönguequi bönachi Nu náquië'.

¹⁷ Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

¹⁸ Buli'yútsöca', Bönni' ni náquië' Huen Dxin quia',

na' guró caza' neda' Lë'.

Nadxí'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna',

uchi'a usöróa' quéguequi.

¹⁹ Cuntu nu tíl-lalenë' didza', en biti' ulidzë' zidzaj.

Cuntu nu yöni chi'ë ga naca zi'tu'.

²⁰ Tu guído' zoa bö' biti' quítsjë' le,

ate' guí' chizóa ulu, biti' usúluë' le,

cate' uzóarë' le naca tsahui' queë'.

²¹ Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irö dujá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'.

²³ Que lë ni na' bulu'bani yúgu'të bönachi nacuá' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

²⁴ Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

²⁵ Réquibe'enë' Jesús lë na' ta'zá' ládxi'gaquië', ate' rë' légaquië':

—Gátitës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë' quéguequi. Lësca' caní, channö ila'rúaj choplö bönachi nacuá' tu yödzo o tu yu'u, en ila'dil-la, biti' gaca ila'día' bönachi nacuá' yödzo na' o yu'u na'.

²⁶ Lësca' caní, channö ubéaj Satanás tu' xihui' la' luzë'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'?

²⁷ Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'.

28 Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidxín le rinná bë'ë Dios ga zóali'.

29 '¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

30 'Nu bití' run neda' tsözxön, ridá'baga' neda', en nu bití' rutubi tsözxön len neda', rusilasi nu na'.

31 'Que lë ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë' zí'ë queë' Dios Bö' Lá'ayi, bití' ca' uniti lahuë' Dios lë'.

32 Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, bití' ca' uniti lahuë' Dios lë'. Bití' uniti lahuë' lë' dza ni zóaru' na'a, en bití' uniti lahuë' lë' dza si' za'.

Le runru' naca bë' le nácaru'
(Mt. 7:15-20; Lc. 6:43-45)

33 Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'.

34 Libí'ili' nácali' di'a dza quégacaba' bëla sínia'. ¿Nacxi gaca gú'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tuí'i didza'.

35 Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' bití' naca tsahui' tu' yu'u le cabí naca tsahui' icja ládxi'da'ahuë'.

36 Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'.

37 Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

Ta'nábinë' Jesús gunë' le gaca bë' nu náquië'
(Mr. 8:12; Lc. 11:29-32)

38 Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en të' Jesús:

—Bönni' Usedi, rë'ënitü' ilé'etu' tu le gunu' le gaca bë' dë lu no'o yöl-la' unná bë'.

39 Bubi'ë didza' Jesús, en rë' légaquië':

—Yugu' bönni' tuá' dö' ni, bití' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'ë didza' uláz queë' Dios.

40 Ca na' guca queë' Jonás na', bugá'anë' lé'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljë' Bönachi, tsonna dza tsonna yëla ugá'ana' zxan yu.

41 Ila'yasë' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le gulunë' usubaga' bönachi ni xíguia' tu' bulu'bí'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'.

42 Lësca' caní, nigula ni' gunná bé'enu yödzö dë saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë'

bönachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëro' zi'tu' para yóninu didza' réajni'i bëë Salomón, ate' na'a zoa' ni neda', en nácatëra' lo ca Salomón na'.

Cate' rudxín tu bö' xihui' xilataj

(Lc. 11:24-26)

⁴³ Gunnë' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzi' ladxi'. Channö cabí idzöli ga na' uzi' ladxi',

⁴⁴ ní'irö inná: “Huöja' xilatja' ga ni' birúaja'.” Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'.

⁴⁵ Ní'irö tseaj, tsöjxzi' ia'gadxi bö' xihui' nácacatëro' xihui' ca le, ate' ila'yaza yúgu'të, en ila'cuá' icja láxdida'ahuë' bönni' na', ate' ga údxi huayáli'tëro' ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

Xinë'ë Jesús, en yugu' bönni' böchë'ë

(Mr. 3:31-35; Lc. 8:19-21)

⁴⁶ Cate' ni' ru'ílenë' Jesús bönachi didza' ni, xinë'ë, en yugu' bönni' böchë'ë bila'dxinë' ni'. Gula'cu'ë lö'alö, en gulë'ëniagueuinë' ilu'ílenë' Jesús didza'.

⁴⁷ Ní'irö tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' böchu'u lö'alö, en té'ënnë' ilu'ílenë' Li' didza'.

⁴⁸ Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nözili' nuzxi caz xiná'a, en nupxi caz bönni' böcha'a?

⁴⁹ Ní'irö bulí në'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácaquië' ca xiná' caza', en yugu' böchi' caza'.

⁵⁰ Núti'tës nu run ca rë'ëni quëzinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzü'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

¹ La' dza ní'isö birúajë' Jesús niu' yu'u, ate' yöjchö'ë ra' nísado'.

² Tu' bila'dxín bönachi zían ga zoë' Jesús, gurenë' tu lë'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'.

³ Ní'irö Jesús bë'lenë' légaquië' didza', zían le busédinë' légaquië'. Bucúdzü'ë didza', rnnë':

—Buli'yútsöca', birúajë' tu bönni' guz, söjësië' xisedo'.

⁴ Tsanni ni' söjësië', bal-la xisedo' na' gulasi ra' nöza, ate' bila'dxinba' biguinnido', en gulë'ajba' xisedo' na'.

⁵ Gulasi ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí rö'öda' yu ni'.

⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí.

⁷ Gula'lén ia'zica'rö xisedo' na' ga bulu'lén lubá yötsi', ate' gula'zxón lubá yötsi' na', en bila'röli lë na' bësië', en gulún ditaj le.

⁸ Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tëro' ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'.

9 Nu zoa nagui, en riyöni, ral-la' uzë nagui.

Le tē'ēni ilún le bucúdzu'ē Jesús didza'

(Mr. 4:10-12; Lc. 8:9-10)

10 Ní'irö bila'dxinē' bönni' usēda queē' Jesús ga zoē', en gula'nábinē' Lē', ta'nnē':

—¿Bizx que ru'ílenu' bönachi didza' yugu' le rucúdzu'u didza'?

11 Bubi'ē didza' Jesús, en rē' légaquiē':

—Dios ru'ē libí'ili' lataj tséajni'ili' le nagachi' ca rinná bē'ē Lē' yehua' yubá, pero bönachi ni bití' tē'ēni ila'yéajni'.

12 Nu si' xtídzē'ē, Dios unödzejē' que ia'lati', ate' gáta'da'arö que, pero nu bití' si' le, la's dui le dē que udúa.

13 Que lē ni na' ru'ílenu' légaquiē' didza' yugu' le rucúdzu'a didza', tu' tu'yúē' pero bití' ta'lé'enē'. Ta'yönnē' pero bití' tu'zē nágagaquiē', en bití' ta'yéajni'inē'.

14 Caní raca quégaquiē' para gaca ca na' gunnē' Isaías, bönni' bē'ē didza' uláz queē' Dios, gunnē':

Le nácatē yónili' pero bití' tséajni'ili'.

Uyuli' iná'ali' pero bití' ilé'eli'.

15 Caní raca tu' nazidi ládxi'do'gaca bönni' ni, en bití' bi riyaza icja nágagaquiē'.

Nadzudi' guiöj lógaquiē', para cabí ila'lé'enē' len guiöj lógaquiē' na'.

Bití' ulu'zē nágagaquiē', en bití' ulu'zéajni'i ládxi'gaquiē', en bití' ulu'huóáquiē' quia' neda' para gaca una' légaquiē'.

16 'Na'a, bica' ba libí'ili', tu' rilé'e guiöj loli', en riyöni nágali'.

17 Le nácatē rea' libí'ili', zían bönni' gulu'ē didza' uláz queē' Dios en yugu' bönni' tsahui' gulē'ēnnē' ila'lé'enē' le rilé'eli' libí'ili' pero bití' bila'lé'enē' le. Gulē'ēnnē' ila'yönnē' le riyönili' libí'ili' pero bití' bila'yönnē' le.

Rigúxjö'ē Jesús le bucúdzu'ē didza'

(Mr. 4:13-20; Lc. 8:11-15)

18 Gunnē' ca' Jesús:

—Buli'zē nágali' ca naca le bucúdzu'a didza' que bönni' guz.

19 Núti'tēs nu riyöni didza' ca rinná bē'ē Dios yehua' yubá, en bití' réajni'i le, raca que didza' riyöni nu na' ca guca que xisedo' na' gulasi ra' nōza. La' za'tē tu' xihui', en rugúa didza' na' guyú'u icja ládxi'da'ahuē' bönni' na'.

20 Xisedo' na' gulasi luyú ga rō'ö guiöj ruluí'i ca raca queē' bönni' riyönnē' didza' na', en la' ruzetē náguiē' lu yöl-la' rudzeja queē',

21 pero ca na' bití' ridía' xisedo' na' tu' cabí dē ga gun luí, lē'sca' caní raca queē' bönni' ni. Cate' idxín tu le usaca' zi' lē', ate' ila'bía nágaca bönachi lē' tu' nazí' lu nē'ē didza' na', la' gácatē chopa ládxi'ē.

22 Xisedo' na' gulasi ga na' bulu'lén lubá yötsi' ruluí'i ca raca queē' bönni' na' riyönnē' didza' na', pero ru'í' ládxi'ē yugu' le dē yödzólió ni, ate' nazí' yē'ē bönni' na', tu' ru'í' ládxi'ē yugu' yöl-la' tsahui' que. Yugu' lē ni ta'röli didza' na', en tun ga bití' gun dxin lu icja ládxi'da'ahuē'.

23 Xisedo' na' gulasi luyú bēbu ruluí'i ca raca queē' bönni' riyönnē' didza' na', en réajni'inē' le, ate' run dxin didza' na' lu icja ládxi'da'ahuē'. Nácagaca

bal-la bönachi ca xisedo' na' bulu'nödzej ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla zxoá' xtila

²⁴ Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bē'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyüë'.

²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjöza lu xiyüë' xisedo' guíxi'do' cané le nalá' ca naca yöla zxoá' xtila, ate' böaj xilataj.

²⁶ Cate' gulén zxoá' xtila na', en gurö'ö do que, ga na' dxía xui'i, ní'irö gulaca bē' guíxi'do' cané na'.

²⁷ Ní'irö bila'dxinë' bönni' huen dxin ga zoë' bönni' xan la' yëla na', en tē' lē': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?"

²⁸ Xan yu na' gudxë' légaquië', rnnë': "Tu bönni' biti' rilé'enë' neda' dxi'a benë' caní." Ní'irö gula'nábinë' huen dxin queë' lē', ta'nnë': "¿Ba rē'ënu' tséajtu' tsöjölajtu' guíxi'do' cané na'?"

²⁹ Xángaquië' rë' légaquië': "¡Biti' ca! Nadx ca' cate' iládzu'li' guíxi'do' cané na', iládzu'lentëli' ca' yöla zxoá' xtila.

³⁰ Gácarö dxi'a güi'ili' lataj ila'zxongarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzéguiru' le, ate' ní'irö utúbili' zxoá' xtila lu yu'u quia'."

Rucúdzu'ë didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bē'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyüë'.

³² Le nácatë xisé mostaza na' nácatërö cuidi' ca yúgu'të xisedo' ia'zica'rö, pero cate' chinadúz, rizzöntërö ca yúgu'të guixi' cuan, en rizzön ca naca tu yaga, ate' ta'dxinba' biguinnido', en tunba' xicá'agacaba' lu ni'a nē'e.

Rucúdzu'ë didza' Jesús que cúa zi que yöta xtila

(Lc. 13:20-21)

³³ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bē'ë Dios yehua' yubá gaca ca le run cúa zi que yöta xtila, le buchixinu tu nigula len tsonna libixi yöjza zxoá' xtila, ate' guyaxza idütë cúa na'.

Le rē'ëni gun le rucúdzu'ë didza' Jesús

(Mr. 4:33-34)

³⁴ Yúgu'të lē ni bucúdzu'ë didza' Jesús, le bē'lenë' bönachi nacuá' ni' didza', en biti' bi didza' bē'lenë' légaquië' le cabí bucúdzu'ë didza'.

³⁵ Caní benë' para gaca lē na' buzúajë' lu guichi tu bönni' bē'ë didza' uláz queë' Dios, gunnë':

Gu'a didza' yugu' le ucúdzu'a didza'.

Inniá' yugu' le nagachi' cate' ni' gusí lo si' guta' yödzölió.

Riguíxjö'ë Jesús le bucúdzu'ë didza' que guíxi'do' cané

36 Ní'irò buzenè' Jesús bönachi nacuá' ni' didza', en gusöl-lè'è légaquiè', ate' guyu'è yu'u. Ní'irò bila'dxinè' bönni' usèda queè' ga zoè', en tè' Lè':

—Gudíxjoi'i netu' le ré'eni inná'è na' bucúdz'u didza' que guíxi'do' cané le nalá' ca naca yòla xzoa' xtila.

37 Bubi'è didza' Jesús, ate' rè' légaquiè':

—Bönni' razè' xisedo' dxi'a naca' neda', Bönni' Guljè' Bönachi.

38 La' yèla na' naca yòdzölió ni, ate' xisedo' dxi'a na' tu'luí'i ca nácagaca nupa nabábagaca ga rinná' bè'è Dios. Guíxi'do' cané na' le nalá' ca naca yòla xzoa' xtila tu'luí'i ca nácagaca nupa néquiguequi que tu' xihui'.

39 Nu na' bití' rilé'e dxi'a xan la' yèla na', en yòjza guíxi'do' cané na', tu' xihui' caz naca. Dza ulu'tubè' na' ruluí'i ca gaca dza údxi que yòdzölió ni, ate' nupa na' tu'tubi nácagaca gubáz lá'ayi queè' Dios.

40 Ca na' guca, bulu'tubè' guíxi'do' cané na', en bulu'zégui'è le lu guí, lèasca' caní gaca cate' údxi que yòdzölió ni.

41 Neda', Bönni' Guljè' Bönachi, isöl-la'gaca'-nè' gubáz lá'ayi quia', ate' ulu'béajè' ga rinná' bè'è Dios yúgu'tè nupa tun ga tun dul-la' luzè'eguequi, enca' nupa tuá' dö'.

42 Yugu' gubáz lá'ayi na' ila'gu'è bönni' tuá' dö' na' lu guí' gabila. Ni' ila'bödxè', en ulu'tíl-la láyi'gaquiè'.

43 Ní'irò ila'yèpi yösa bení' bönachi tsahui', en ilácagaquiè' ca gubidza ga ni' rinná' bè'è Dios yehua' yubá. Nu zoa nagui, en riyöni ral-la' uzè' nagui.

Rucúdz'u è didza' Jesús que tu yöl-la' tsahui' nagachi'

44 Lèasca' caní bucúdz'u è didza' Jesús, rnnè':

—Le rinná' bè'è Dios yehua' yubá naca ca tu yöl-la' tsahui' nagachi' tu la' yèla. Cate' bidzölinè' tu bönni' le, bucáchè'è le leyúbölö ga na' bigachi', ate' lu yöl-la' rudzeja queè' guyijè', yòjèti'è yúgu'tè le dè queè' ate' gú'uè' la' yèla na' para gata' yöl-la' tsahui' na' queè'.

Rucúdz'u è didza' Jesús que tu bugá le nazáca'da'

45 Gunnè' ca' Jesús:

—Ca ral-la' sè ládxi'li' le rinná' bè'è Dios yehua' yubá naca ca benè' tu bönni' rá'uè', en ruúti'è, en riguiljè' bugá nazáca'gaca.

46 Cate' bidzölinè' tu bugá le nazáca'da', guyijè', yòjèti'è yúgu'tè le dè queè', ate' gú'uè' bugá na'.

Rucúdz'u è didza' Jesús que tu yöxaj böla

47 Lèasca' caní gunnè' Jesús:

—Ca gaca ga ridxín le rinná' bè'è Dios yehua' yubá, gaca ca run tu yöxaj böla le ta'chiljè' bönni' lu nísado', le röjxi' zían böla izá'a.

48 Cate' chibidzá' yöxaj na', bulu'béajè' le luyú bidxi ra' nísado' na', ate' gula'böè' ni', en gula'gu'è-ba' yugu' böla dxi'a tu lu ga'böra, pero gula'ru'unè'-ba' yugu' böla cá'asö.

49 Lèasca' caní gaca cate' údxi que yòdzölió ni. Ila'ruájè' gubáz lá'ayi queè' Dios, ate' ulu'béajè' quez yugu' bönachi tsahui', ate' ulu'cuítiè' légaquiè' ladaj bönachi tuá' dö'.

50 Ní'irò ila'gu'è bönachi tuá' dö' na' lu guí' gabila. Ni' ila'bödxè', en ulu'tíl-la láyè'è.

Yöl-la' tsahui' le naca gula, en le naca cubi

51 Ní'irò Jesús gunábinè' yugu' bönni' usèda queè', rnnè':

—¿Ba réajni'íli' yúgu'tè lè ni'?

Bulu'bi'ë didza', të' Lë':

—Ön, Xan.

⁵² Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácacaca tsahui' le ruzi'ë xibë.

Le benë' Jesús lu yödzö Nazaret

(Mr. 6:1-6; Lc. 4:16-30)

⁵³ Cate' budxi bucúdzü'ë Jesús yugu' didza' ni, buzë'ë ni'.

⁵⁴ Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sëdë' queë' Dios, ate' bulu'bánninë', ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni?

⁵⁵ Náquië' bönni' ni xzí'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas.

⁵⁶ Lësca' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopá ládxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uláz queë', en bönachi nacua' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

14

Ca bëtgaquië' Juan, bönni' buquile' bönachi nisa

(Mr. 6:14-29; Lc. 9:7-9)

¹ Lu dza ni', biyönnë' Herodes, bönni' rinná bë'ë luyú Galilea, ca nácacaca yugu' yöl-la' huáca runë' Jesús.

² Herodes na' gudxë' yugu' ni'a në'ë, rnnë':

—Bönni' na' Juan, bönni' buquile' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunné' Herodes tu' gusöl-lë'ë lë cazë' bönni' gula'zönë' Juan, en gulúgu'ë lë' du guié, ate' gula'gu'ë lë' lidxi guié tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'.

⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzö ni' lë', tu' téquiquequi bönachi náquië' Juan na' tu bönni' ru'ë didza' uláz queë' Dios.

⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza ládxi'ë Herodes le benbi'.

⁷ Guzxí' lu në'ë Herodes, en benë' tsutsu xtídzë'ë unödzejë' queëbi' biti'tës bi inábibi' lë'.

⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjé' Juan, bönni' buquile' bönachi nisa. Gulú'u le tu lu zxiga' zxön.

⁹ Ní'irö bu'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjñödzaj icjé' Juan na' queëbi'.

10 Caní guca, gusól-lë'ë nu tsòjríxi yenë' Juan ga ni' yu'ë lidxi guié.

11 Bönni' na' nasól-lë'ë bu'ë icjë' Juan na', zxa lu zxiga' zxon, ate' bunòdzjë' le queébi' bi'i nigula na', ate' lëbi' buá'abi' le queénu xiná'abi'.

12 Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yójtíxjöi'iguequinë' Jesús ca gulaca lë ni.

Jesús rugahuë' zíanrö ca chi-un gayuá' bönachi

(Mr. 6:30-44; Lc. 9:10-17; Jn. 6:1-14)

13 Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queézë' tu lataj cá'asó. Cate' bila'yöni bönachi zéajë' ni', bila'rúaj yugu' yòdzö ni', en yójaca ga ni' idxinë' Jesús, ta'zë'e ní'aguequi.

14 Cate' burúajë' Jesús lë'e barco, bilé'enë' nacua' bönachi zían ni', ate' buéchi ládxe'ë léguequi, en bunë' nupa te'e, nútsa'gaca ládjaguequi.

15 Cate' chiridzó' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzó' na'a, ate' cá'asó naca lataj ni. Busól-la' bönachi ni para tsójaca gapa dë yòdzödo' para gá'ugaca bi ilagu.

16 Ní'irö Jesús gudxë' légaquië':

—Biti' run bayudxi tsójáquië'. Buli'nòdzaj libi'ili' le ilahuë'.

17 Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

18 Jesús rë' légaquië':

—Buli'dödi le lu na'a.

19 Ní'irö Jesús gunná be'enë' bönachi na' ila'bö' ga yu'u daca'. Gudödi na' gudélé'ë gayu' yöta xtila na', en chópaba' böla na', ate' guchisa lahuë', ruyúe' zaca' yehua' yubá. Gudxë' Dios: "Xclenu'." Ní'irö buzxuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'.

20 Gulahuë' yúgu'tégaquië', en bulu'huóljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra.

21 Bönni' ni' gulahuë' guláquië' idú chi-un gáyu'ë, pero cuntu nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

22 Ní'irö la' bentë' Jesús ga gula'benë' bönni' usëda queë' lë'e bárcodo', en tsójáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'.

23 Cate' chibusól-lë'ë Jesús bönachi na', gurenë' tu lu guí'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'.

24 Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'.

25 Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'.

26 Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bö'dxi'ë, ta'nnë':

—Tu' ridasö na'.

27 Ní'irö Jesús la' bulidztë' légaquië', rnnë':

—Buli'zxoní ládxi'li'. Neda' ni. Biti' gádxili'.

28 Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

29 Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

30 Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusi lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölä neda'.

31 Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa ládxi'u'u?

32 Cate' bulu'benë' lë'e bárcodo' na', gurö'ö dxi bö' na' recja.

33 Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruúnë' yugu' bönni' huë' nacu'ë yödzö Genesaret

(Mr. 6:53-56)

34 Cate' chigula'dödë' ia'tsolá'a nísado' na', la' bila'dxintë' lu xiyú yödzö Genesaret.

35 Cate' bulu'únbë'ë bönni' yödzö ni' Jesús, gula'söl-lë'ë didza' idütë luyú ni', ate' dujuá'gaquië' yúgu'të nupa te'e ga na' zoë' Jesús.

36 Guláta'yuë' lahuë' Jesús gu'ë légaquië' lataj ila'gansë' ru'i lari' nácuë', ate' la' bulu'huöácate' yúgu'të nupa na' bila'gán lari' na'.

15

Le tun ga biti' nácaru' tsahui' lahuë' Dios

(Mr. 7:1-23)

1 Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tē' Lë':

2—¿Bizx que tunë' bönni' usëda quiu' le ridödi bē' ca naca le nulaga loru' runru' ca gulunë' xuz xtó'oru'? Biti' ta'guíbi nē'ë ca naca que yudo' cate' si' ilahuë'.

3 Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga lolí' runli'?

4 Caní'raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu innë' zi' que xuz xinë'e, tsaz gati nu na'."

5 Pero libí'ili' rnnali': "Channö nu guíë xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios,

6 bítirö' bi run bayudxi gun nu na' que xuz xinë'e." Caní'runli', rucá'anali' cá'asö le gunná bē'ë Dios, para gunli' le nulaga lolí' runli'.

7 Libí'ili', bönni' ruluí'isö tsahui' cuinli', idú ca nácali' gudíxjö'ë Isaías, bönni' bē'ë didza' uláz queë' Dios, gunné':

8 Bönni' ni, len rú'agacsë' tunë' neda' bal,

en calëga idú ládxi'gaquië'.

9 Nítisö naca le ta'yéaj ládxi'gaquië' neda',

tu' tu'sédinë' yugu' le gula'nná bē' bönachi.

10 Ní'irö bulidzë' Jesús bönachi nacuá' ni', en rë' léguequi:

—Bulí'zë nágalí' le guía' libí'ili', en guli'tséajni'.

11 Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

12 Ní'irö yugu' bönni' usëda queë' Jesús gula'bígüi'ë ga zoë', en tē' Lë':

—¿Naru' nōztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubi'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl'jagaca idú lui.

¹⁴ Buli'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'tué' bönni' lo chul-la, iropë' ila'bixë' tu lu yeru.

¹⁵ Ní'irö bubi'ë didza' Pedro, en rë' Jesús:

—Buzéajni'i netu' lë ni rucúdu'u didza'.

¹⁶ Jesús rë' légaquië':

—¿Naru' cabí réajni'itseli' ca' libí'ili'?

¹⁷ ¿Naru' cabí réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'?

¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios.

¹⁹ Caní' raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xíhui'li'.

²⁰ Yugu' le caní' tun ga bití' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

Tu nigula izá'a réajlë'ënu Jesús

(Mr. 7:24-30)

²¹ Ní'irö buzë'ë Jesús ni', en guyéajë' lu xiyú yödzo Tiro, en yödzö Sidón.

²² Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, xzí'ini xi'söë' David, buéchi' ladxí' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

²³ Bití' bi didza' bubi'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busöl-la-nu, tu' zá'anu cúde'ru' ribödxi'anu.

²⁴ Ní'irö bubi'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa nácacaca ca bö'cu' xzíla'do' nanítigacaba'.

²⁵ Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

²⁶ Bubi'ë didza' Jesús, rnnë':

—Bití' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

²⁷ Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huöxaj ga tagu xángacaba'.

²⁸ Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

Jesús ruúnë' zían nupa te'e

²⁹ Ní'irō buzé'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'.

³⁰ Bönachi zían dujuá'gaquië' nupa biti' guca ila'zá', en nupa nachul-la guió'j lógaca, en nupa biti' guca ila'nnë', en nupa narugu ni'a në'eguequi, en ia'zica'rö zían nupa te'e, ate' gula'guíxaj lé'guequi xini'ë Jesús, ate' Lë' bunë' lé'guequi.

³¹ Bulu'bani bönachi ni' ca naca le benë' Jesús, tu' bila'lé'e tu'nnë nupa biti' guca ila'nnë', ate' nuhuóacagaca nupa gurugu ni'a në'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios qué'gaca bönachi Israel.

Jesús rugahuë' zíanrö ca choá' gayuá' bönachi

(Mr. 8:1-10)

³² Ní'irō Jesús bulidzë' yugu' bönni' usëda queë', en rë' lé'gaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usól-la'gaca-në' tsö'jhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irō yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zían lu lataj cá'asö ni, le ugá'gutu' bönachi zían ni?

³⁴ Gunábinë' Jesús lé'gaquië', rnnë':

—¿Bal-laxi yöta xtila dë queë'li'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queë'tu' ni.

³⁵ Ní'irō Jesús gunná bé'enë' bönachi zían na' ila'bö' lu yu.

³⁶ Gudélé'ë gadxi yöta xtila na', en yugu' böla na', ate' gudxë' Dios: "Xclenu'." Ní'irō buzuzxjë' iroptë na', en bunöd'zjë' qué'gaquië' bönni' usëda queë', ate' lé'gaquië' gula'guísië' le lógaca bönachi zían na'.

³⁷ Gulahuë' yúgu'të', en bulu'huöljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra.

³⁸ Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bí'ido'.

³⁹ Ní'irō busöl-lë'ë Jesús bönachi na' tsö'jhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

16

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

¹ Ní'irō yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

² Bubi'ë didza' Jesús, en rë' lé'gaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba."

³ Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë ya'alí' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a.

⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irō Jesús bucá'anë' lé'gaquië', söhuöjë'.

Le tu'sédinē' bōnni' yudo' naca ca cúa zi que yōta xtila

(Mr. 8:14-21)

⁵ Cate' bila' dxinē' ia'tsölá'a nísado' ni', guléquite' enē' bōnni' usēda queē' Jesús gulál-la lādxi' gaquiē' ilu'è le ilahuē'.

⁶ Ní'irō Jesús gudxē' légaquiē':

—Buli'yútsōca'. Guli'gún chi'i cuinli' que le naca ca cúa zi que yōta xtila quégaquiē' bōnni' yudo' fariseo, en quégaquiē' bōnni' yudo' saduceo.

⁷ Ní'irō la' légacasē' gulún xtídza' gaquiē' bōnni' usēda queē', ta'nnē':

—Rnnē' caní tu' cabí nuá'aru' yōta xtila.

⁸ Réquite' enē' Jesús lē ni, ate' rē' légaquiē':

—¿Bizx que run xtídza' li' la' libí'isili' tu' cabí nuá'ali' yōta xtila? Láti'do' os réajlē'ēli' neda'.

⁹ ¿Naru' cabí réajni'itseli', en biti' rōjnétseli' ca guca quégaca gayu' yōta xtila ni', lē na' gulahuē' chi-un gáyu'ē bōnni', ate' tsca xō ga'bōra butúbili'?

¹⁰ ¿Naru' cabí rōjnétseli' ca' ca guca quégaca gadxi' yōta xtila ni', lē na' gulahuē' choá' gáyu'ē bōnni', ate' tsca xō ga'bōra butúbili'?

¹¹ ¿Naru' cabí réajni'ili'? Biti' bē'a didza' que yōta xtila cate' gudxa' libí'ili' gun chi'i cuinli' que le naca ca cúa zi que yōta xtila quégaquiē' bōnni' yudo' fariseo, en quégaquiē' bōnni' yudo' saduceo.

¹² Ní'irō gula'yéajni'inē' biti' gudxē' Jesús légaquiē' ilún chi'i cuíngaquiē' que cúa zi que yōta xtila, pero ral-la' ilún chi'i cuíngaquiē' que le tu'sédinē' yugu' bōnni' yudo' fariseo, en yugu' bōnni' yudo' saduceo.

Pedro rnnē' Jesús náquiē' Cristo

(Mr. 8:27-30; Lc. 9:18-21)

¹³ Cate' bidxinē' Jesús lu xiyú yōdzō Cesarea, ga na' rinná bē'ē Filipino, gunábinē' yugu' bōnni' usēda queē', rnnē':

—¿Bizxi ta'nná bōnachi nu naca' neda', Bōnni' Guljē' Bōnachi?

¹⁴ Bulu'bi'ē didza', ta'nnē':

—Bal-lē' ta'nnē': "Juan nacu', bōnni' ni' buquilē' bōnachi nisa." Ia'zica'rē' ta'nnē': "Eliás nacu', bōnni' ni' bē'ē didza' uláz queē' Dios dza ni'te." Ia'zica'rē' ta'nnē': "Jeremías nacu', o ia'túē' bōnni' bē'ē didza' uláz queē' Dios."

¹⁵ Ní'irō Jesús gudxē' légaquiē':

—Naru' libí'ili', ¿nuzxi rnnali' naca' neda'?

¹⁶ Bubi'ē didza' Simón Pedro, en rē' Lē':

—Li' nacu' Cristo, Zxí'inē' Dios ban.

¹⁷ Bubi'ē didza' Jesús, rē' lē':

—Bica' xibó' li', Simón, zxí'inē' Jonás, tu' cabí buluí'inē' nu bōnni' li' lē ni. Xuza' zoē' yehua' yubá buluí'inē' li' lē ni.

¹⁸ Neda' rea' li', li' nacu' Pedro, ate' lu guiōj ni ucuá'a nupa ulu'dubi quia', ate' yöl-la' unná bē' que tu' xihui' biti' sequi' uzaga' xinōzgaquiē'.

¹⁹ Gunna' quiu' yugu' zxi'ini guié' que lataj ga rinná bē' Nu na' zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibē' lataj gaca lē na' Nu na' zoa yehua' yubá ni'.

²⁰ Ní'irō Jesús gunná bē'enē' yugu' bōnni' usēda queē' cuntu nu ilē'ē náquiē' Lē' Cristo.

Jesús riguúxjö'ē ca si' ilútiē' Lē'

(Mr. 8:31-9:1; Lc. 9:22-27)

²¹ La' dza ní'sò gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilütië' Lë', pero cate' gaca tsonna dza ubanë' lu yöl-la' guti.

²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, biti' gu'ë Dios lataj. Biti' ca' gaca quiu' ca rnno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za' sò ládxi'gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'ënë' të'ë neda', ral-la' uzöë' tsölá'alö yugu' le rë'ëni quezinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'.

²⁵ Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'.

²⁶ ¿Naru' uzi'tsë' xibé tu bönni' channö utubë' yúgu'të le dë yödzülió ni pero unítië' yöl-la' na'bán idú queë'? Biti' bi gaca unödzejë' tu bönni' para gata' yöl-la' na'bán idú queë'.

²⁷ Caní rnniá', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca.

²⁸ Le nácatë rea' libí'ili: “Biti' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi.”

17

Ridzá' ca nalá' lahuë' Jesús

(Mr. 9:2-13; Lc. 9:28-36)

¹ Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yöjáquië' quez tu lu guí'a sibi.

² Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'.

³ Ní'irö bila'lé'enë' bönni' usëda queë' buluí' lógaquië' Moisés, en Elías, ate' tu'ílenë' Jesús didza'.

⁴ Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ni' ru'ë Pedro didza' ni, la' guró'ötë tu böaj bení' le guzxoá légaquië', ate' lu böaj na' biyön chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

⁶ Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'.

⁷ Ní'irö gubígu'ë Jesús ga na' nacu'ë, ate' gudanë' légaquië', rnnë':

—Gulí'chasa. Biti' gádxili'.

⁸ Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

⁹ Cate' ni' tu'dínnië' lu guí'a na', Jesús gunná bë'enë' légaquië', rnnë':

—Cuntu nu guieli' ca guca lë ni bilé'eli' cate' ubanra' lu yöl-la' guti neda', Bönni' Guljé' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi ulu'í lahuë' Elías zí'alö ca ulu'í lahuë' Cristo?

¹¹ Bubi'ë didza' Jesús, rë' légaquië':

—Le nácatë ulu'í lo cazë' zí'alö Elías, en ucá'anë' tsahui' yúgu'të.

¹² Neda' rea' libí'ili': "Chibulu'í lahuë' Elías na', pero bití' bulu'únbë'ë lë', ate' yúgu'të ca rnasö quégaquië' gulunë' queë'." Lësca' caní ilunë' quia' neda', Bönni' Guljé' Bönachi, ulu'saca' zí'ë neda'.

¹³ Ní'irö gula'yéajni'inë' bönni' usëda queë', bë'lenë' Jesús légaquië' didza' ca guca queë' Juan, bönni' na' buquilé' bönachi nisa.

Ruünë'-bi' Jesús tubi' bi'i bönni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinë' ga na' nacua' bönachi zían, gubígui'ë tu bönni' ga zoë' Jesús, ate' buzóa zxibé' lahuë' Lë',

¹⁵ en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí' rizáca'da'abi', ate' zían luzuí ridzö'öbi' lu gu' o lu nisa.

¹⁶ Chidiguá'a-bi' lógaquië' bönni' usëda quiu' pero bití' guca ulu'únë'-bi'.

¹⁷ Bubi'ë didza' Jesús, rnnë':

—Libí'ili', bönachi cabí réajlë'ëli', en bití' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

¹⁸ Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatëbi' bi'i bönni'do' na'.

¹⁹ Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' bití' guca ubéajtu' netu' bö' xihui' na'?

²⁰ Jesús rë' légaquië':

—Bití' guxzéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queëli' Dios, nácatë ca tu xisedo' mostaza, huáca guieli' gu'ado' ni: "Gucuíta ni, en yöjsóa ní'ilö", ate' la' icuítatë gu'ado' na'. Bití' bi' zoa le cabí gaca gunli' channö réajlë'ëli' Dios idú ládxi'li'.

²¹ Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

²² Tsanni ní' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljé' Bönachi, lu ná'agaca bönachi.

²³ Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguíxaj lazë' que yudo'

²⁴ Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quízajë' bönachi lázagaca que yudo' ga zoë' Pedro, ate' të' lë':

—¿Naru' cabí quízaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguizxjè’.

Cate’ buáziè’ Pedro lu yu’u, Jesús la’ bulidztè’ lè’, en rè’ lè’:

—¿Nacxi rusaca’ quiu’, Simón? Bönni’ ta’nná bè’è luyú ni, ¿nupxi tu’quizxjè’ le riguizxaj laz, en lazxaj que yu? ¿Naru’ tu’quizxjè’ bönachi uládz quegaquiè’ o bönachi izá’a?

²⁶ Bubi’è didza’ Pedro, rè’ Lè’:

—Bönachi izá’a tu’quizxjè’.

Ní’irö Jesús rè’ lè’:

—Que lè ni na’, biti’ run bayudxi quizxaj laza’ que yudo’ tu’ naca’ Zxi’inè’ Dios ca na’ biti’ bi ta’guizxaj nupa nacagaca bönachi uládz queè’ bönni’ na’ ruquizxjè’.

²⁷ Na’a, para cuntú nu gun leru’, guyéaj ra’ nísado’, yözaj lu nisa le rizöninu’-ba’ böla, ate’ böla cueju’-ba’ zí’alö, guzxí’-ba’. Cate’ isalju’ ruá’aba’, ni’ idzölinu’ tu dumí lásido’. Guzxí’i le, ate’ gudizxaj laza’, en lazu’.

18

¿Núzxilö gaca lo?

(Mr. 9:33-37; Lc. 9:46-48)

¹ La’ dza ní’isö bila’dxinè’ bönni’ usèda queè’ Jesús ga zoè’, ate’ gula’nábinè’ Lè’, ta’nnè’:

—¿Núzxilè’ bönni’ ni gáquiè’ lo ga rinná bè’è Dios yehua’ yubá?

² Bulidzè’-bi’ Jesús tubi’ bí’i bönni’do’, ate’ buzóè’-bi’ gatsaj lähui’lö ga na’ nacué’.

³ Ní’irö rè’ légaquiè’:

—Le nácatè rea’ libí’ili’, channö cabí huóacali’ ca zeaj nacabi’ bí’ido’, biti’ ca’ tsú’uli’ ga ni’ rinná bè’è Dios yehua’ yubá.

⁴ Que lè ni na’, núti’tès nu gaca nöxaj ladxi’, en huóaca ca nacabi’ bí’ido’ ni, nu ni gaca lo ga ni’ rinná bè’è Dios yehua’ yubá.

⁵ Núti’tès nu gun bal tubi’ bí’ido’ caní tu’ néquibi’ quia’, neda’ caz gun bal.

Le tun ga nu gun dul-la’

(Mr. 9:42-48; Lc. 17:1-2)

⁶ Gunnè’ ca’ Jesús:

—Nu gun ga gunbi’ dul-la’ tubi’ bí’ido’ caní réajlè’èbi’ quia’, gácarö dxi’a queè’ bönni’ na’ la’tu’ ugalè’è guiøj riyètuni yaga yenè’, ate’ tsöjsuladzu’ cuinè’ lu nísado’.

⁷ Bica’ bayechi’ bönachi yödzölió ni tun ga gun dul-la’ luzè’eguequi. Nacuá’tica’sö le tun ga nu gun dul-la’, pero bica’ bayechi’ nu run ga nu gun dul-la’.

⁸ Que lè ni na’, channö gun no’o o ni’u ga gunu’ dul-la’, guchugu le, en gurú’una le. Gácarö dxi’a quiu’ tsöjtsáziu’ ga su’ ibanu’ biti’ rizó’o o narugu ni’a no’o, en calèga nacua’ chopa no’o, en chopa ni’u ate’ tsöjtsáziu’ lu guí gabila le catu caz ulu.

⁹ Channö gun guiøj lo’ ga gunu’ dul-la’, guléaj le, en gurú’una le. Gácarö dxi’a quiu’ tsöjtsáziu’ ga su’ ibanu’, zoa tuz guiøj lo’, en calèga nacua’ chopa guiøj lo’, ate’ tsöjtsáziu’ lu guí gabila.

Jesús rucúdzú’è didza’ que tu bö’cu’ zxila’ nanítiba’

(Lc. 15:3-7)

¹⁰ Gunnè’ ca’ Jesús:

—Guli'gún chi'i cuinli' para cabí uzóali'-bi' tsólá'aló tubi' bí'ido' caní. Neda' rea' libí'ili', gubáz lá'ayi tapa chi'è lé'gacabi' nacuá'tica'sè' lahuè' Xuza' zoè' yehua' yubá.

11 Bida' ni neda', Bönni' Guljè' Bönachi, para usölá' nu ni naniti.

12 ¿Nacxi rusáca'li' queé'li'? Tu bönni', nacuá'aba' tu gayuá' bö'cu' zxila' queé', channö nítiba' tuba', ¿naru' cabí uca'anè'-ba' tápalalaj yu' chënnaba' na', ate' tsejè' gapa naca lu gu'a, para tsöjtijè'-ba' bö'cu' zxila'do' na' nanítiba'?

13 Channö udzölinè'-ba', le nácatè rea' libí'ili', udzëjarönè' ni'a queé'ba' bö'cu' zxila'do' na' ca gunè' quégacaba' ia'tápalalaj yu' chënnaba' ni' bití' gula'nítiba'.

14 Lësca' caní, Xúziru' Dios, zoè' yehua' yubá, bití' rë'ënè' nítibi' tubi' bí'ido' caní.

Ca ral-la' uniti loru' böchi' luzá'aru'

(Lc. 17:3)

15 Gunnè' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenè' tsahui' la' libí'isili'. Channö uzè náguiè' li', chibuguélu'u böchi' luzó'o.

16 Channö cabí uzè náguiè' xtídzu'u, guchè'è ia'tué' o ia'chopè' bönni' para urúaj li xtídzu'u lógaquiè' chopa tsonnè' bönni', nupa gaca ilún ba nalí que xtídza'li'.

17 Channö cabí uzè náguiè' xtídza'gaquiè', gudxi ca' bönachi tu'dubi tu'sèdi queè' Dios, en channö cabí uzè náguiè' xtídza'gaca bönachi na', ní'irö bönni' na' gáquiè' quiu' ca tu bönni' bití' réajlè'è Dios, en ca tu bönni' ruquixjè' uláz que yödzö zi'tu'.

18 'Le nácatè rea' libí'ili', yúgu'tè le inná bë'èli' lu yödzölió ni, naca le chigunná bë'è Dios yehua' yubá, ate' yúgu'tè le gü'ili' lataj lu yödzölió ni, naca le chibè'è lataj Dios yehua' yubá.

19 'Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-nè' Dios, gunè' Xuz caza' Dios, zoè' yehua' yubá, lè na' rinábili'-nè'.

20 Ga nacuá' chopa tsonna nupa ni nudúbigaca quia' neda', zoa caza' neda' gatsaj láhui'ló ga na' nacu'è.

21 Ní'irö gubígui'è Pedro ga zoè' Jesús, en gunábinè' Lè', rnnè':

—Xan, ¿bál-laxitè luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

22 Jesús rë' lè':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'è didza' que tu bönni' huen dxin bití' buniti lahuè' luzè'è

23 Gunnè' ca' Jesús:

—Ia'stú, ca gun Nu na' rinná bë' yehua' yubá naca ca benè' tu bönni' rinná bë'è. Gú'unnè' uca'analenè' tsahui' yugu' bönni' huen dxin queè'.

24 Cate' gusí lahuè' rucá'analenè' légaquiè' tsahui', dujuá'gaquiè' ga zoè' tu bönni' ral-lè'è queè' zían gayuá' dumí.

25 Tu' cabí guca quizzjè', gunná bë'è xanè' idó'ogaquiè' lè', en nigula queè', en yugu' bi'i queè', en yúgu'tè le dè queè', ate' ní'irö gazxaj le ral-lè'è queè' xanè' na'.

26 Ní'irö bönni' huen dxin na' buzóa zxibè' lahuè' xanè', en gunábinè' lè', rnnè': "Xan, ben zxön ládxu'u neda'. Huaguixxaj caza' li' idutè."

27 Ní'irö xanë' na' buéchi' ládxë'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'.

28 Cate' burúajë' bönni' huen dxin na', la' yöjtsáгатë' tu bönni' rúnlenë' lë' tsözxón dxin, ate' bönni' na' ral-lë'ë queë' láti'do'os dumí. Ní'irö guzxónë' lë', en guzxínnajë' yenë', ate' rë' lë': "Gudíxjate' lë na' ral-lu'u quia'."

29 Ní'irö luzë'ë na' buzóa zxibë' lahuë', en gunaba yechë'ë lahuë', rnnë': "Ben zxón ládxu'u neda'. Huaguizxaj caza' li' iduté."

30 Biti' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë na' ral-lë'ë queë'.

31 Cate' bila'lé'enë' lë ni ia'zica'rë' huen dxin, bulu'huí'inide'enë' ni'a queë', ate' yöjtíxjoi'iguequinë' xángaquië' yúgu'të lë na' guca.

32 Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë na' gúl-lu'u quia' tu' gunaba yechu'u lahua'.

33 ¿Naru' cabí ral-la' huéchi' ládxu'u ca' luzó'o ca na' bena' neda', buéchi' ládxa'a li'?"

34 Ní'irö guléde'enë' xanë', en budödë' lë' lu ná'agaca nupa ulu'saca' zí' lë' dza quíxjarë' idútë le ral-lë'ë queë'.

35 Ní'irö rnnë' Jesús:

—Lësca' caní gunë' Xuza' zoë' yehua' yubá queëli' channö cabí uniti loli' idú ládxli'li' yugu' böchi' luzá'ali'.

19

Nupa tu'lá'a yöl-la' nutsaga na'

(Mr. 10:1-12; Lc. 16:18)

1 Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza.

2 Bönachi zían sőjácálen Jesús, ate' bunë' légaquië' ni'.

3 Ní'irö bila'dxinë' bal-lë' bönni' yudo' fariseo ga zoë' Jesús para ila'zí' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bíti'tës bi raca?

4 Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'.

5 Caní gunné' Dios: "Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huöáquië' tuz bönachi."

6 Caní naca, bíti'rö nácagaquië' chopë' pero tuz bönachi chinuhuöáquië'. Que lë ni na', bití' ral-la' ulu'lë'ë bönni' nupa na' benë' Dios tuz.

7 Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ru'íi lataj nu bönni' unödziejë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

8 Jesús rë' légaquië':

—Caní benë' Moisés tu' nazidi icja ládxli'do'oli'. Bennë' lib'íli' lataj usanli'-nu nigula queëli', pero cate' gusí lo guta' gurö'ö yödzölió, bití' guca caní.

9 Neda' rea' lib'íli', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu

bönni' utsaga ná'alenë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Biti' gaca ila'z'í lu ná'agaca yúgu'të bönachi didza' ni, pero núpasö na' Dios ruzéajni'inë' léguequi.

¹² Nacu'ë bönni' bití' tu'tsaga ná'alengaquië' nigula tu' cabí nácagaquië' idú bönni' biguiú', tu' gulaljë' ca', ate' ia'z'íca'rë' bönni' bití' tu'tsaga ná'alengaquië' nigula tu' bulu'zaga' bönachi xinözgaquië', ate' ia'z'íca'rë' bönni' bití' tu'tsaga ná'alengaquië' nigula para gaca ilunë' xichiné' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ni'a quegacabi', ate' bönni' usëda queë' bulu'zágui'ë xinözgaquië'.

¹⁴ Ní'irö Jesús rë' légaquië', rnnë':

—Guli'gü'i-bi' yugu' bí'ido' lataj ila'dxinbi' ga zoa', en bití' uzága'li xinözgacabi', tu' ila'z'í' lataj nupa nácagaca ca yugu' bí'ido' caní ga ni rinná bë'ë Dios yehua' yubá.

¹⁵ Jesús guxóa në'ë légacabi', ate' ní'irö buzë'ë ni'.

Tu bönni' unná bë' cuidi' dë yöl-la' tsahui' queë'

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nöztsenu' lë na' rno' quia', rno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö rë'ënu' gata' yöl-la' na'bán idú quiu', ben ca rinná bë' xibá queë' Dios.

¹⁸ Ní'irö bönni' na' rë' Jesús, rnnë':

—¿Bíxilö xibá na'?

Jesús rë' lë':

—Xibá na' gunná bë'ë Moisés:

Bití' gútiu' bönachi.

Bití' gunu' dul-la' le riguitsaj xibá que yöl-la' nutsaga na'.

Bití' cuanu'.

Bití' inníó' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channö rë'ënu' gacu' tsahui', guyéaj, yöjëti' le dë quiu', ate' dumí na' si'u, bunödzej quegaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnë' didza' ni, söhuöjé' ruhu'innë' tu' dëda' yöl-la' tsahui' queë'.

²³ Ní'irö Jesús gudxë' yugu' bönni' usëda queë', rnnë':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá.

²⁴ Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tödiba' böa' lu nagui yötsi'.

²⁵ Cate' bila'yönnë' yugu' bönni' usëda queë' didza' ni, bulu'bánnë, ta'nnë':

—¿Nuzxi caz gaca ulá, channö?

²⁶ Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

²⁷ Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'lentú Li'. ¿Bíxzirö gata' queëtu'?

²⁸ Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljé' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bë'ëli', en uchi'a usöröli' quégaca idxinnu cö'të yödzö quégaca xzí'ini xi'sóë' Israel.

²⁹ Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' xzí'inë', o yugu' xiyúë', para gunë' xichina', bönni' ni si'ë ia'tú gáyua'tëro ca' queë', en gata' ca' yöl-la' na'bán idú queë'.

³⁰ Zían nupa nácgaca lo na'a, ulu'gá'ana cá'asö, ate' nupa nagá'anagaca cá'asö na'a, hualácgaca lo.

20

Rucúdzu'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljé' yugu' bönni' ilunë' dxin ga naca lu xiyúë' ga na' nadúzgaca lubá uva.

² Cate' chibugá'analënë' tsahui' yugu' bönni' huen dxin na', quíxjé' légaquië' tu dumí laxxaj que tu dza, gusól-lë'ë légaquië' ilunë' dxin ga naca lu xiyúë'.

³ Cate' burúajë' idú xsila, bilé'enë' ia'zícá'rë' bönni' nacué'asë' ca' ga naca lu yé'ëyi.

⁴ Rë' légaquië': "Guli'tséaj ca' libí'ili' ga naca lu xiyúá', ate' quíxjja' libí'ili' le naca tsahui'." La' yöjácatë' ca' légaquië'.

⁵ Burúajë' bönni' xan yu'u na' leyúbölö idú huagubidza, enca' idú xihuó udzö', en la' tuz ca benë', gusól-lë'ë yugu' bönni' yöjxáquië' lu xiyúë'.

⁶ Burúajë' ca' cate' ni' zoa ia'láti'do'os gubidza, en yöjxáquië' ia'zícá'rë' bönni' nacué'asë' ca' ni', ate' rë' légaquië': "¿Bíxz que zóatsali' ni cá'asö idú dza, bití' bi dxin runli'?"

⁷ Yugu' bönni' na' tē' lē', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúá', ate' quíxjja' libí'ili' le naca tsahui'."

⁸ Cate' chizóa gal-la, bönni' xan yu na' rë' bönni' yu'u lu nē'ë yugu' huen dxin na', rnnë': "Bulidza yugu' bönni' huen dxin na', ate' gu'u

láxjagaquië'. Quizxju' zí'aló yugu' bönni' na' bila'dxinë' yöjsetë. Udxí na' quizxju' yugu' bönni' na' bila'dxinë' zí'atëlö."

⁹ Ní'irö bila'dxinë' bönni' yójéngaquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza.

¹⁰ Cate' bila'dxinë' bönni' yójéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza.

¹¹ Cate' gula'zi'ë le, gula'nnëdë'ë queë' bönni' xan yu'u na',

¹² ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudíxjatsö' légaquië' ca netu', ate' netu' ni bentu' dxin idú dza, en gúguida'atu' gubidza."

¹³ Bubi'ë didza' xan yu na', en rë' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhuiru' si'u tu dumí lazxaj que tu dza?"

¹⁴ Guzxi' lazxju', en böaj lidxu'. Neda' ré'ënda' quizxja' bönni' ni yöjenë' dxin ga yöjsetë la' leze ca na' riguíxja' lí'.

¹⁵ ¿Naru' cabí dë lu na'a guna' ca ré'ënda' len le nequi quia'? ¿Naru' ruzxé'etsenu'-në' luzó'o tu rúnnada'a queë'?"

¹⁶ Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zica'rë' bönni', nácagaquië' lo na'a, ulu'gá'anë' cá'asö. Zián nupa nulidza', pero nabábasö nupa narögaca.

Rigúxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nōza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'.

¹⁹ Ulu'dödë' neda' lu ná'agaquië' bönni' zí'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

²⁰ Ní'irö bidxinnu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzágagaquië'-nu chopë' ni, ate' buzöa zxíbinu lahuë' Jesús, en gunábinu Lë' tu le uzá' ládxe'ë queënu.

²¹ Jesús gunábinë'-nu, rnnë':

—¿Bizxi ré'ënu'?

Rënu Lë':

—Gunná bë' cö'öbi' tubi' xzí'ina' ni cuita lë'u ibëla, en ia'tubi' cö'öbi' cuita lë'u yögöla ga ni' inná bë'u.

²² Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácaté le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que cö'öli' cuita lë'a ibëla o

cuita lë'a yögöla, biti' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

²⁴ Cate' ia'chíë' bönni' usëda queë' Jesús bila'yönnë' lë ni, gula'lenë'.

²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité bë' ta'nná bé'enë' légaquië', ate' nupa ni' nácagacarö lo ta'nná be'e la' luzë'eguequisö.

²⁶ Biti' gaca caní queëli'. Núti'tëslöli' libí'ili' nu rë'ëni gaca zxön ga zóali', nu ni ral-la' gun dxin que ia'zica'röli'.

²⁷ Lësca' caní, núti'tëslöli' libí'ili' nu guë'ëni gaca lo, ral-la' gaca ca tu bönni' nadó'o que ia'zica'röli'.

²⁸ Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichingaca bönachi, en udöda' yöl-la' na'bán quia', le quízxjada' ni'a quégaca bönachi zían para ulu'lágaca.

Ruünë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

²⁹ Cate' ni' tu'rúajë' yödzö Jericó, bönachi zían sójacalen Jesús.

³⁰ Nacu'ë chopë' bönni' nachul-la lógaquië' ni', rö'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

³¹ Bönachi zían nacua' ni' gulë' légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

³² Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënilí' guna' queëli'?

³³ Të' Jesús:

—Xan, rë'ënitú' gunu' ga huóalaj guiöj lotu'.

³⁴ Ní'irö Jesús buéchi' ládxë'ë légaquië', ate' gudanë' guiöj lógaquië'. La' böáljatëgaca guiöj lógaquië', ate' yójacalenë' Jesús.

21

Ridxinë' Jesús yödzö Jerusalén len yöl-la' ba zxön

(Mr. 11:1-11; Lc. 19:28-40; Jn. 12:12-19)

¹ Cate' bila'dxíngalë' yödzö Jerusalén, en ni' nacu'ë ga dë yödzö Betfagé ga na' zoa Gu'a Yaga Olivo, ní'irö gusöl-lë'ë Jesús chopë' bönni' usëda queë',

² ate' rë' légaquië':

—Guli'tsëajtsöca' yödzödo' ni' ca dödilö ga ni zóaru', ate' la' tsöjxáca'tëli'-ba' tuba' burro guná nága'ba', ate' dzaga lëba' tuba' burro biguiú'do'. Guli'tsösedxi-ba', en ichë'ëli'-ba' quia' ni.

³ Channö nu bi guié libí'ili', guli'guié nu na': "Xanru' riquinnë'-ba'." Ní'irö isöl-lë'ë légacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunné':

⁵ Guli'guié nupa nacua' yödzö Siön,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzu'ba' búrrodo' nácaba' xzí'iniba' böa' ruá'aba' yua'.

6 Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'.

7 Gula'ché'ë-ba' burro guná' na', en burro biguiú'do' na', ate' bulu'dxié' cúdzu'gacaba' yugu' lari' guitsa' quégaquië', ate' gudxié' Jesús lahui' lari' na'.

8 Nacua' ca' bönachi zían ni', ate' gula'chilaj yugu' lari' ta'xóa cúdzu'guequi la' nōza. Ia'zica'rë' bulu'chibë' zin le bulu'zxóë' ga naca la' nōza.

9 Gulu'i zidzaj didza' bönachi na' nanörugaca, en nupa na' sōjácalen Jesús, ta'nná:

—jYöl-la' ba Lë', zxi'ini xi'sóë' David! jBica' ba nu ni za' ni'a que Lë' Xanru'! jYöl-la' ba Dios!

10 Cate' guyazië' Jesús yödzö Jerusalén, bulu'dzatsa yúgu'të bönachi lu yödzö na', ate' zían nupa gulë luzë'eguequi, ta'nná:

—¿Nuzxi caz bönni' ni'?

11 Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

12 Cate' guyazië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsë'ë dumí yödzö zi'tu', en yugu' le ta'bö'i nupa tuti' gu'dödo'.

13 Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libi'ili' chinunli' lataj ni ca naca yu'u lídxigaca gubán.

14 Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'.

15 Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'ibi' bí'ido' zidzaj didza' ga naca chila yudo', ta'nnabi':

—jBica' ba Lë', zxi'ini xi'sóë' David!

16 Ní'irö të' Jesús:

—¿Naru' cabí riyönnu' ca ta'nnabi' bi'i ni'?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádxibi' gulúl-labi' yöl-la' ba le naca idú.”

17 Ní'irö Jesús bucá'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

18 Cate' za' rení', ate' ni' söhuöjë' Jesús Jerusalén, ridunë'.

19 Bilé'enë' tu yaga higo rö' gal-la' cuite nōza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'.

20 Cate' bila'lé'enë' bönni' usëda queë' lë ni, bulu'bábinë', ate' gula'nábinë' Jesús, ta'nnë':

—¿Nacxi caz guca, gubídxitë yaga ni'?

21 Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en bití' gaca chopa ládxi'li', calégasö huáca gunlí' ca na' bena' que yaga ni, pero channö guiéli' gu'a ni: Gucuíta, en yöjsóa lu nísado', gaca ca na' innali'.

22 Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunné' Dios queéli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

23 Ní'irö guyázië' Jesús chila yudo', ate' tsanni ni' rusédinë' bönachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

24 Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní.

25 ¿Nuzxi caz gusöl-la' Juan para buquilë' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: “¿Bizx que bití' guyéajlë'ëli' lë'?”

26 Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

27 Que lë ni na' bulu'bi'ë didza', të' Jesús:

—Bití' nöztu'.

Jesús rë' légaquië':

—Neda' ca', bití' guía' libí'ili' bizxi yöl-la' unná bë' dë lu na'a runa' lë ni.

Rucúdzu'ë didza' Jesús ca gulunbi' chópabi' zxi'inë' tu bönni'

28 Ní'irö Jesús gudxë' yugu' bönni' yudo' na':

—¿Nacxi rusáca'li' queéli'? Guzöë' tu bönni' nacuá'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': “Zxi'ina', guyéaj na'a tsöjenu' dxin ga naca luyú quia' ga ró'gaca lubá uva.”

29 Bubí'ibi' didza' bi'i na', gúdxibi'-në': “Bití' rë'ënda' tseja'.” Gudödi ni' bubí'i ládxi'bi', ate' yöjenbi' dxin.

30 Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, gúdxibi'-në': “Huaca, Dad. Uyéaja'.” Bití' guyéajbi' bi'i ni.

31 ¿Núzxilöbi' bi'i chopa ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'i zí'alö na'.

Ní'irö Jesús rë' légaquië':

—Le nácatë rea' libí'ili', ila'nöruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni' rinná bë'ë Dios.

32 Caní gaca, tu' bidë' Juan, bönni' buquilë' bönachi nisa, ga zóali', en busédinë' libí'ili' le naca tsahui' ca ral-la' gunlí', ate' libí'ili' bití' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, bití' bubí'i ládxi'li' para tséajlë'ëli' lë'.

Rucúdzu'ë didza' Jesús ca béngaquië' bönni' huen dxin biti' nácaquië' tsahui'

(Mr. 12:1-12; Lc. 20:9-19)

³³ Gunnë' ca' Jesús:

—Buli'zé nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu leri' guiöj ga isié' xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzo'zi'tu'.

³⁴ 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'.

³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bëtigaquië' lë', en ia'túë' bulu'ladxë' lë' guiöj.

³⁶ Leyúbölö bönni' xan luyú na' gusöl-lë'ë ca' ia'zica'rë' ni'a në'ë, ate' guláquië' ziantërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

³⁷ 'Ga yöjsete, gusöl-lë'ë ca' xzí'inë' ga na' nacu'ë. Guzá' ládxë'ë, rnnë': Hualunë' bal bi'í quia'.

³⁸ Cate' yugu' bönni' huen dxin na' bila'lé'enë'-bi' xzí'inë', la' gula'nnatë' la' légacasë': "Bi'í ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'."

³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' rögaca lubá uva, ate' bëtigaquië'-bi' ni'.

⁴⁰ Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿naxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', të' Jesús:

—Usunítie' bönni' tuá' dö' na', ate' luyú queë' na' udödë' lu ná'agaquië' ia'zica'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanili' lë' na' nazúaj lu guichi lá'ayi ca naca lë' ni? Caní rna:

Guiöj na' gula'rú'unë' bönni' tu'cu'ë zö'ö,

la' guiöj ná'asö chinaca guiöj len zö'ö.

Lë' cazë' Xanru' benë' ga naca caní,

ate' naca tu le run ga rubániru'.

⁴³ 'Que lë' ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadeli' lataj ni'.

⁴⁴ Nu tsöjchegu' lu guiöj ni, la' cuinsi quitsaj, ate' channö guiöj ni tseajbaga' bönni' na', uzxuzxaj lë'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë' na' bucúdzu'ë didza' Jesús, téquibe'enë' bë'ë Jesús didza' ca naca quégaquië'.

⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zían nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

22

Rucúdzu'ë didza' Jesús ca naca que laní que yöl-la' rutsaga na'

1 Jesús bē'lenē légaquiē' didza' leyúbölö, ate' bucúdzu'è didza', rnnē':

2 —Ca gaca quégaca nupa ila'yaza ga rinná bē'è Dios yehua' yubá naca ca guca quégaca nupa bulidzē' tu bönni' rinná bē'è cate' benē' laní que dza utsaga ná'abi' bi'i bönni' queē'.

3 Gusöl-lē'è ni'a nē'è tsöjxí'gaquiē' yugu' bönni' chinulidzē' para guídagaquiē' laní queēbi', pero biti' gulē'ënē' guídagaquiē'.

4 Ní'irö gusöl-lē'è ia'zica'rē' ni'a nē'è, en gudxē' légaquiē': "Guli'tsöjdxitsöca' nupa na' chinulidza', na' guiēli' légaquiē': Buli'yútsöca', chinupá'a la' huagu. Chibétia'-ba' yugu' xpēdxa', en yugu' böa' bēdxi renni' quia'. Yúgu'tē chinupá'a. Guli'dá, sóaru' laní queēbi' bi'i bönni' quia' utsaga ná'abi'."

5 Yugu' bönni' na' yöjlídzagaquiē' biti' gulunē' légaquiē' bal, ate' yöjáquiē' que queégaquiē'. Tuē' yöjenē' dxin, en ia'tué' guyijē' tsöjō'u tsöjéti'è.

6 Ia'zica'rē' gula'zönē' yugu' ni'a nē'è na', ate' gulu'è dö' quégaquiē', en bētgaquiē' légaquiē'.

7 Cate' bönni' na' rinná bē'è biyönnē' lē ni, gulénē', en gusöl-lē'è yugu' bönni' queē' röjáquiē' gudil-la, ate' bētigaquiē' yugu' bönni' hueti bönachi na', en bulu'quélē'è gu' ládzagaquiē'.

8 Ní'irö bönni' na' rinná bē'è gudxē' yugu' ni'a nē'è, gunnē': "Le nácatē chinupá'a que laní na', pero yugu' bönni' bulidza' biti' guláquiē' lesaca' guídagaquiē' laní quia'.

9 Guli'tséajtsöca' gapa naca la' nöza, en buli'lidza yúgu'tē nupa tsöjxáca'li' ni' para guídagaca laní queēbi' bi'i bönni' quia' utsaga ná'abi'."

10 Ní'irö bila'rúajē' ni'a nē'è na', söjáquiē' gapa naca la' nöza, ate' bulu'tubē' yúgu'tē nupa yöjxáca'gaquiē', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

11 'Cate' guyáziē' bönni' na' rinná bē'è para uyúē' nupa ni' nudúbigaca, bilé'enē' tu bönni' biti' nácuē' lari' tsahui' le bunödzejē' quégaquiē' bönni' nacu'è laní na'.

12 Ní'irö gudxē' bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacuá' laní?" Bönni' na' busayaj ru'è.

13 Ní'irö bönni' na' rinná bē'è gudxē' nupa na' tun xichinē', gunnē': "Guli'guga' ni'a nē'è bönni' ni. Guli'tsöjchú'un-nē' ní'ilö ga na' rö'ö chul-la. Ní' cödxē', en utíl-la láyē'è, lu yöl-la' ruhu'ini queē'."

14 Ní'irö Jesús gudxē' légaquiē':

—Zian nupa nulidza', pero nabábasö nupa ila'rógaca.

Jesús ru'è didza' ca naca le rigu'íxaj lázaru'

(Mr. 12:13-17; Lc. 20:20-26)

15 Ní'irö yugu' bönni' yudo' fariseo na' bulu'zē'è ni', ate' gulún xtídza'gaquiē' ilunē' ga bi innē' Jesús para gaca ulu'zéguiē' Lē' didza'.

16 Para ilunē' caní, gula'söl-lē'è bal-lē' bönni' dá'gaquiē' légaquiē', len bönni' dá'gaquiē' Herodes, ga zoē' Jesús, nupa na' gulē' Jesús:

—Bönni' Usedi, nöztu' Li' ru'u didza' cātēze naca, en naca idútē li ca rusédinu' ca naca queē' Dios, en biti' ru'í ládXu'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'.

17 Gudíxjō'i netu'. ¿Nacxi runi li'? ¿Naru' run bayudxi, o biti' run bayudxi quíxaj laztu' queē' César, bönni' yödzö zítu' na' rinná bé'enē' rē'u?

18 Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Libi'ili', bönni' rulu'isö tsahui' cuinli', ¿bizx que ru'ili' didza' le ruzóa neda' ra' gu'a?

¹⁹ Buli'lu'i neda' dumí le rigu'íxaj lázali'.

Ní'irö bulu'lu'inë Lë' tu dumí que yödzo Roma.

²⁰ Jesús gunábinë légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquië':

—Guli'gu'íxjë' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuóajtëgaquië'.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nnë' bití' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë',

²⁴ ta'nnë':

—Bönni' Usedi, Moisés gunné': “Channö gátie' tu bönni' zóanu nigula queë', en cuntú nu bi'i zóabi' queë', ní'irö bi'i böché'ë bönni' na' ral-la' utsaga ná'alénbi'-nu nigula uzëbi' queë', para cabí initi dí'a dza queë' bönni' böchi'bi' na'.”

²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'aló na' butsaga ná'alénbi'-nu nigula, ate' gútitébi'. Tu' cuntú nu bi'i queëbi' zóabi', bi'i buropi na' butsaga ná'alénbi'-nu nigula uzëbi' queëbi' bi'i böchi'bi' na'.

²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca quégacabi' igádxitébi', gulátibi' yúgu'tëbi'.

²⁷ Ga búdxité gútinu ca' nigula na'.

²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ní' guéquinu nigula na' queëbi', tu' bulu'tsaga ná'alénbi'-nu yúgu'tëbi' nigula na'?

²⁹ Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios.

³⁰ Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacu'ë yehua' yubá.

³¹ Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'?

³² Caní gunné': “Neda' naca' Dios queë' Abraham, en Dios queë' Isaac, en Dios queë' Jacob.” Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ní' nabángaquië' sal-la' gulátie'.

³³ Cate' bila'yöni bönachi nacuá' ní' didza' ní, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'.

³⁵ Tuë' bönni' nútsë'ë ládjagaquië', en nazëdë' xibá queë' Moisés, gú'unnë' sí' bë'ë Jesús.

36 Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

37 Jesús rë' lë':

—Ídxí'inu' Xanu' Dios idú ládXu'u, en idú icja ládxi'do'o, enca' len idú yöl-la' réajni'i quiu'.

38 Xibá ni naca lo, en nazáca'tërö.

39 Xibá na' naca buropi, la' ca nácatë, en caní rna: "Ídxí'inu' böchi' luzó'o ca nadxí'i cuiu'."

40 Chopa xibá ni náca gaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi zxi'ini náquië' Cristo?

(Mr. 12:35-37; Lc. 20:41-44)

41 Tsanni ni' nacu'ë tsözxön bönni' yudo' fariseo na', Jesús gunábinë' légaquië',

42 rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë David náquië'.

43 Ní'irö Jesús rë' légaquië':

—¿Bizx que na' lë' cazë' David bulidzë' Lë', gunné': "Xana"?' Caní gunné' cate' ni' bë'ë didza' uláz queë' Dios Bö' Lá'ayi, gunné':

44 Xanru' Dios gudxë' Xana':

"Guró'ö cuita lë'a ibëla, cate' gunra' ga ulu'zëchu zxi'bigaca Lo' nupa tequi Li' zi'."

45 Channö David na' gunné' queë' náquië' Xanë', ¿nacxi caz naca, rnnali' náquië' zxi'ini xi'sóë David na'?

46 Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

23

Jesús ruzéqui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

1 Ní'irö Jesús bë'lenë' bönachi nacuá' ni' len yugu' bönni' usëdi queë' didza'.

2 Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sédinë' bönachi.

3 Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'.

4 Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönachi, pero légaquië' biti' të'ënnë' ulu'tenë' le, calëga len tuze xibön ná'agaquië'.

5 Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácuagaquië'.

6 Të'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios.

7 Lësca caní, të'ënnë' ulu'gapa bönachi légaquië' didza' ba zxön gapa naca lógaca bönachi, en të'ënnë' ilë' bönachi légaquië': "Padiux, bönni' usëdi."

8 'Pero libí'ili', bití' ral-la' gunli' ga nu guíe libí'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'téli' nácali' böchi'li' tuli' ia'tuli'.

9 Cuntu nu guíeli', luyú ni, bití' innali': Xuz, tu' zoa tuz Nu naca Xúzili', zoë' yehua' yubá.

10 Bití' gunli' ga nu guíe libí'ili': Xan, tu' zoa tuz Nu naca Xanli', neda', Cristo.

11 Nu nutsa' ládjali' nu run xichinli' ia'zica'röli', nu ni na' gácarö lo ga zóali'.

12 Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

13 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza söjácálen bönachi para ila'dxín ga ni' rinná bē'ē Dios yehua' yubá. La' libí'isili' bití' sequi' tsú'uli', en bití' ru'í'ili' lataj ila'yú'u nupa tē'ēni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzēbido', en para ulu'isö tsahui' cuinli', xidzé rulídzali'-nē' Dios. Que lē ni na', zítērö írugu queéli' quí'i sáca'li'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzóliö ni para gunli' ga tseaj ládxe'ē tu bönni' Dios tsözxön len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsöjtsu'ē lu gu' gabila.

16 'Bica' bayechi' libí'ili'. Nachul-la loli', ate' rē'ēnili' ulu'í'ili' nöza bönachi. Caní naca queéli' tu' rnnali': "Channö bi rizi' lu nē'ē tu bönni' ni'a que yudo', bití' run bayudxi, pero channö runē' le ni'a que oro dzö'ö yudo', bayudxi gun."

17 Libí'ili', bönni' lo chul-la, en tu' caréajni'i. ¿Bízxilö nácarö lo? ¿Naru' oro na', o yudo' le run lá'ayi oro na'?

18 Lēscá' caní rnnali': "Channö nu bönni' gunē' le ni'a que bucugu lá'ayi, bití' gun bayudxi, pero channö gunē' le ni'a que gun zxoá lahui, bayudxi gun."

19 Libí'ili', nazídili', en nachul-la loli'. ¿Bízxilö nácarö lo? ¿Naru' gun zxoá láhuisö, o bucugu lá'ayi na' run lá'ayi gun na'?

20 Que lē ni na', channö nu bönni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxóagaca láhuisö.

21 Lēscá' caní, channö nu bönni' runē' le ni'a que yudo', runē' le ni'a que le, enca' ni'a queē' Dios, nun cazē' xilatjē' ni'.

22 Lēscá' caní, channö nu bönni' runē' le ni'a que yehua' yubá, runē' le ni'a que lataj ga rö'ē rinná bē'ē Dios, enca' ni'a que Lē cazē' Dios rö'ē ni'.

23 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' riguízjali' que yudo' tu cō' huéaj tu' chi cō' le rizi'ili' que xōhuéaj, en que guixi' anís, en que comino la' huagu, pero rucá'anali' le nácarö lo le rinná bē' xibá queē' Dios, tu' cabí runli' le naca tsahui', en bití' ruhuéchi' ládxi'li' luzá'ali', en bití' réajlē'ēli'-nē' Dios. Yugu' lē ni run bayudxi gunli', en lēs bití' ucá'anali' ia'zica'rö lē na' runli', le riguízjali' que yudo'.

24 Libí'ili', nachul-la loli', en rē'ēnili' ulu'í'ili' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'biē'-ba' bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Nácali' ca xzíga'do' ré'jali', en yó'öna ráhuili'. Rigubili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'.

26 Libí'ili', bönni' yudo' fariseo lo chul-la. Zí'alö guli'quibi le nuá' lu xzíga'do', en lu yó'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

27 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Caní naca queëli' tu' nácali' ca yugu' yeru ba quégaca nupa chinátigaca, le nácagaca chiguíchido'os cuita lë'e, en le nácatë lachi nalá'gaca, pero nalígaca dxita quégaca nupa chinátigaca, enca' yúgu'të le siguti.

28 Lëasca' caní nácali' libí'ili'. Le nácatë láhuisö ruluí'i cuinli' tsahui' lógaca bönachi, pero lu icja ládxi'do'oli' nalili' yugu' le ruluí'isö tsahui' cuini, en le ruá' dö' runli'.

29 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'ili' biquitaj gapa nagáchi'gaca bönachi tsahui'.

30 Lëasca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios."

31 Tu' rnnali' caní, la' libí'isili' runli' ba nalí nácali' xzí'ini xi'sóagaca nupa ni' bétigaca yugu' bönni' gulu'ë didza' uláz queë' Dios.

32 Caní naca, rusubaga' cuinli' xíguia' na' gula'báguië' xuz xtó'oli'.

33 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila?

34 Que lë ni na', neda' isöl-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö.

35 Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, xzí'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' bóa' bëdxido' lahuë' Dios.

36 Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

Jesús ribödxë' ni'a que yödzö Jerusalén

(Lc. 13:34-35)

37 Lëasca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxi'gacali' guiöj nupa nasöl-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' bórado' queëba' xzan xíliba', pero biti' gú'unili'.

38 Buli'yútsöca', cá'asö ugá'ana yu'u lídxili'.

39 Caní gaca, tu' rea' libí'ili', na'a isí lo biti' ulé'eli' neda' cate' innárolí': "Lá'ayi náquië' Bönni' na' zë'ë uláz queë' Xanru'."

24

Riguíxjö'ë Jesús ca si' ulu'quínnajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'lu'ínë' Lë' ca nácgaca zö'ö nagú'ugaca lë'a yudo'.

² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiöj nabaga' luzë'e ni, le cabí iguínnaj.

Le ilaca bë' chizóa idxín dza údxi que yödzölió

(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Gu'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjö'i' netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili',

⁵ tu' zá'gaquië' zían bönni' légaquië' ca lea' neda'. Ila'nnë' nácgacaquië' Cristo, en ila'z'í' yé'enë' bönachi zían.

⁶ Huayónili' raca gudil-la, en le ru'í' didza' que gudil-la, pero biti' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni.

⁷ Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zían lataj tödi budó' zxu'.

⁸ Yúgu'të lë ni nácgaca le isí lógaca yugu' le ila'gu'í' ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' z'í' libí'ili'. Yúgu'të bönachi ulu'dí'í' libí'ili' tu' dá'ali' neda', en ilútië' bál-lali' libí'ili'.

¹⁰ Cate' gaca caní, gaca chopa ládxi'gaca zían bönachi, en ulu'cá'ana neda', ate' yödödi tu ia'tú luzë'e, en tu ia'tú udí'í' luzë'e.

¹¹ Ní'irö ulu'lu'í' lógaquië' zían bönni' ta'z'í' yë'ë. Ulu'lu'í' cuíngaquië' ca yugu' bönni' tu'ë didza' uláz queë' Dios, en ila'z'í' yé'enë' bönachi zían.

¹² Iluá'ada' dö' bönachi, ate' que lë ni na' bítirö ila'dxí'í' böchi' luzé'eguequi.

¹³ Nu guequi tsaz queë' Dios ga idxintë dza údxi, nu ni ulá.

¹⁴ Idú yödzölió gaca libán que didza' dxi'a ca rinná bë'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

¹⁵⁻¹⁶ 'Nu ulaba lë ni ral-la' uzéajni'í' ladxí'. Gunnë' Daniel, bönni' bë'ë didza' uláz queë' Dios, gunné': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnnajli' saca' gu'ado'.

¹⁷ Nu dxía ícjo'olö biti' gal-la' huötaj tsöjzxí' bi dë que lu yu'u, pero ral-la' izxúnnajtë.

¹⁸ Nu zoa la' guixi', biti' gal-la' huöaj tsöjzxí' lari' que.

¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'.

²⁰ Buli'lidzë' Dios inábili'-në' cabí idxín dza ni' izxúnnajli' cate' raca beo' ziaga o cate' naca dza lá'ayi,

21 tu' ila'gu'i ila'záca'tërö bönachi dza ni' ca gula'gu'i gula'zaca' bönachi dza ni'te cate' si' guta' gurö'ö yödölió, ga ridxintë na'a dza, en calëga dza zá'gaca biti' ila'gu'i ila'zaca' caní.

22 Cate' idxín dza ni', channö Dios biti' cuéqui lahuë' quégaquië', cuntu nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

23 'Ní'irö biti' tséajlë'ëli' channö nu idxín queëli', en guië libí'ili': "Buli'yútsöca', ni zoë' Cristo", o inná: "Ni' zoë'."

24 Ulu'lui' ilógaquië' zían bönni' ta'z'í yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'z'í yé'enë' nupa gurö cazë' Dios channö huala'zéqu'ne'.

25 Buli'yútsöca', chigudxi caza' libí'ili' yúgu'të lë ni z'í'atëlö ca si' ilaca.

26 Que lë ni na', biti' irúajli' channö ila'dxín queëli' nupa ilë libí'ili': "Buli'yútsöca', ni' zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'."

27 Ca na' raca cate' rëpi yösa ga rilén gubidza, en ruzen' ga ribía gubidza, lësca' caní gaca cate' huöda' neda', Bönni' Guljë' Bönachi.

28 Ilacatë caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

Ca gaca cate' huödë' Bönni' Guljë' Bönachi

(Mr. 13:24-37; Lc. 21:25-33; 17:26-30, 34-36)

29 Gunnë' ca' Jesús:

—Tödi yugu' dza ni' cate' ila'gu'i ila'zaca' bönachi caní, ichul-la gubidza, ate' beo' biti' gunna bení' que. Ila'guínnajba' böljaj lúzxiba, ate' ila'zxízi le nalá'gaca naca tsutsu lúzxiba.

30 Ní'irö ilá' lahui lúzxiba le gaca bë' huöda' neda', Bönni' Guljë' Bönachi, ate' ila'bödxí yechi' yúgu'të bönachi yödölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön.

31 Ní'irö isöl-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'atë yödölió, en yúgu'të lataj znan lúzxiba.

32 'Buli'zëajni' i ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inözili' chizóa idxín cusubá.

33 Lësca' caní, cate' ilé'eli' taca yúgu'të lë ni, inözili' chizóa idxín dza údxi na', en chiridzaga lahui.

34 Le nácate' rea' libí'ili', yúgu'të lë ni ilaca z'í'atëlö ca ilátigaca bönachi nacua' dza ni'.

35 Huadödi quégaca lúzxiba, en luyú ni, pero yugu' xtídza'a biti' ila'dödi cá'asö.

36 'Cate' idxín dza ni' cuntu nu nözi. Biti' nözguequinë' gubáz lá'ayi queë' Dios nacué' yehua' yubá, en biti' nözda' neda', Zxí'inë' Dios, pero tuzë' Dios Xuz nözinë'.

37 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi.

38 Yugu' dza ni' z'í'atëlö ca si' idxín nisa guiöj le busuniti yödölió, gulë'aj gulahuë', bulu'tsaga ná'agaquië', en bulu'dödë' zxi'inigaquië' lu yöl-la' rutsaga na' ga bidxintë dza guyazië' Noé lë'e barco zxön ni' benë'.

39 en biti' gulëquibe'enë' cate' bidxintë nisa guiöj le busuniti yödölió, ate' gula'nitië' yúgu'të'. Lësca' caní gaca cate' si' huöda' neda', Bönni' Guljë' Bönachi, cuntu nu guéquibe'e.

40 Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'tuë' ucá'ana'-në'.

41 Ila'cuá'anu chópánu nigula nacuá'anu huëtu. Tunu uchë'a-nu quia', ate' ia'tunu ucá'ana'-nu.

42 'Buli'subán ládxi'li' tu' cabí nözili' bizxi dza huöda' neda', Xanli'.

43 Na'a, guli'tséajni'i lë ni. La'tu' nözinë' xan yu'u bizxi dza guidë' gubán, huanë'ë yëla, en bití' gu'ë lataj nu quidaj zö'ö para cuan le dzö'ö lidxë'.

44 Que lë ni na', buli'subán ládxi'li' ca' libí'ili', tu' huöda' neda', Bönni' Guljë' Bönachi, tu dza bití' nuzóa icjali'.

Bönni' huen dxin tsahui', en bönni' huen dxin bití' náquië' tsahui'
(Lc. 12:41-48)

45 Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacuá' lidxë' para gu'ë le ilágugaca cate' idxín dza?

46 Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë.

47 Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní.

48 Channö huóáquië' bönni' huen dxin queë' huiá' dö', en sa' ládxë'ë, innë': “Huadzenë' xana', en bití' huódatië'”,

49 en channö isí lahuë' gundë' zí' bönni' túnlenë' lë' tsözxön dxin, en isí lahuë' ca' gu'aj gágulenë' nupa ta'zudxi,

50 ní'irö huödë' xanë' bönni' huen dxin na' tu dza cate' bití' zoë' ribözë', o tu yëla bití' réquinë'.

51 Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'luí'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

1 Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'z'í'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë.

2 Gáyu'bi' nácagacabi' bi'i bití' ta'yéajni'ibi' ate' ia'gáyu'bi' nasína'gacabi'.

3 Yugu' bi'i nigula bití' ta'yéajni'ibi' na' gula'z'í'ibi' le nuá'gaca guí' quégacabi' pero bití' guluá'abi' ia'lati' za régui.

4 Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'.

5 Tu' gudzenë' bönni' utsaga në'ë, gudödi yëla lógacabi', en gulásitëbi'.

6 Cate' bidxín idú guluhuëla, biyön chí'i nu rinnë zidzaj, rnna: “¡Chizë'ë bönni' utsaga në'ë! ¡Guli'rúaj tsöjtságali'-në'!”

7 Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'.

8 Gulu'ibi' didza' bi'i bití' ta'yéajni'ibi' na', en gulëbi' yugu' bi'i sina' na': “Guli'gunna queëtu' láti'do' za régui queëli' tu' tu'úlu le nuá'gaca guí' queëtu' ni.”

⁹ Bulu'bí'ibi' didza' bi'i sina' na', gula'nnabi': "Biti' gaca, tu' cabí bi ugá'ana queétu', en queéli'. Guli'tséajtsöca' ga ridó'o za régui, tsójö'uli' queéli'."

¹⁰ Tsanni ni' sōjácabi' sōjxi'gacabi' le, bidxinē' bōnni' utsaga nē'ē. Yugu' bi'i na' nacu'abi' sina', en ta'bōzabi' lē' gula'yú'ulentēbi' lē' ga na' raca laní que utsaga na', ate' la' guyáyajtē yu'u.

¹¹ Gudōdi ni' ia'zica'rōbi' bi'i nigula ra'bando' na' bila'dxinbi' ni', ate' bulu'lídzabi'-nē', en gula'nnabi': "Xan, Xan, gusalaj queétu'."

¹² Lē' bubí'ē didza', rnnē': "Le nácatē rea' libí'ili', bití' nōzda' gazxi libí'ili'."

¹³ Ní'irō Jesús gudxē' légaquiē':

—Bulí'subán lādxi'li', tu' cabí nōzili' bizxi dza o bizxi yēla huōda' neda', Bōnni' Guljē' Bōnachi.

Rucúdzu'ē didza' Jesús ca naca que dumí zaca'

¹⁴ Gunnē' ca' Jesús:

—Ca gun Nu na' rinná bē' yehua' yubá naca ca benē' tu bōnni', chizóa tsejē' zī'tu'. Bulidzē' yugu' bōnni' huen dxin queē' en gulu'ē yugu' le dē queē' lu ná'agaquiē'.

¹⁵ Tuē' bōnni' huen dxin na', gulu'ē gayu' dumí nazaca' lu nē'ē, ate' ia'túē' gulu'ē chopa dumí nazaca' lu nē'ē. Ia'túē' gulu'ē tu dumí nazaca' lu nē'ē. Tu tuē' gulu'ē lu nē'ē tsca huéaj le ila'zéqui'nē'. Ní'irō la' guzá'atē' ga naca zī'tu'.

¹⁶ Guyijē' bōnni' huen dxin na' guzxi'ē gayu' dumí nazaca' na', en yōjtíljalenē' le ia'gayu' dumí nazaca'.

¹⁷ Lē'sca' caní, bōnni' na' guzxi'ē chopa dumí na', yōjtíljalenē' le ia'chopa ca'.

¹⁸ Bōnni' na' guzxi'ē tu dumí guyijē', en yōjchō'ōnē' lu yu, ate' bucáchē'ē dumí queē' xanē' lu yu ni'.

¹⁹ 'Cate' chigudzé, budxinē' xángaquiē' bōnni' huen dxin na', ate' bucá'analenē' légaquiē' tsahui'.

²⁰ Ga gusí lo bidxintē' bōnni' na' guzxi'ē gayu' dumí nazaca' na', en sunu'ē ia'gayu' dumí ca', ate' rē' xanē': "Xan, gayu' dumí gulú'u lu na'a. Ni dē ia'gayu' dumí ca' yōjtíljalena' le."

²¹ Xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a yénni'tērō cu'a lu no'o. Guyaza ga zoa', udzéalenu' neda'."

²² Gudōdi ni' bidxinē' ca' bōnni' huen dxin na' guzxi'ē chopa dumí nazaca', ate' rnnē': "Xan, chopa dumí gulú'u lu na'a. Ni dē ia'chopa dumí ca' yōjtíljalena' le."

²³ Ní'irō xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a, yénni'tērō cu'a lu no'o. Guyaza ga zoa', udzéalenu' neda'."

²⁴ Ní'irō cate' bidxinē' bōnni' huen dxin na' guzxi'ē tu dumí nazaca' na', rnnē': "Xan, nōzda' nacu' bōnni' bizxaj, tu' rulapu' ga bití' guzu', en rutubu' ga bití' guchilju'.

²⁵ Que lē' ni na' gúdxida' lí', ate' guyija', yōjcácha'a dumí quiu' lu yu. Ni dē na'a le nequi quiu'."

²⁶ Ní'irō bubí'ē didza' xanē', en rē' lē': "Nacu' huen dxin bití' naca tsahui', en xōhuēdi. Nōz quézinu' rulapa' ga bití' guza', en rutuba' ga bití' guchilja'.

27 Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíjalenë' le ia'lati', para cate' huöda' neda', uzi'a le nequi quia' len icja ca'."

28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí."

29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' biti' rugún tsahui' dxin le dë lu në'e, la's dui le dë queë' idúa.

30 Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxi yéché'ë, en gagu zxea láyë'ë.

Cristo uchi'a usöröë' quégaca bönachi

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi.

32 Ulu'dubi dërö lahua' neda' bönachi yödzölió ni, ate' ucu'a léguequi tsólá'a huéaj ca runë' bönni' uyú bö'cu' zxila', rucu'ë-ba' tsólá'a huéajba' yugu' chivo, en yugu' bö'cu' zxila'.

33 Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla.

34 Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió.

35 Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'.

36 Biyadzaj le gácua', ate' bugáculi' neda' le ráculi'. Gü'ida', ate' buduyúli' neda'. Guyu'a lidxi guié, ate' buduyúli' neda'."

37 Ní'irö ulu'bi'ë didza' bönni' tsahui' na', ilë neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u?"

38 ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'?"

39 ¿Bátaxi bilé'etu' Li' gü'ínu', o guyú'u lidxi guié, ate' buduyútu' Li'?"

40 Übi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

41 Ní'irö guía' nupa nacuá' cuita lë'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupë'ë Dios ni'a que tu' xihui', en quéguequi gubáz dá'gaca le.

42 Caní gaca queëli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'.

43 Guca' ca bönni' ridë' zi'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Gü'ida', enca' guyu'a lidxi guié, ate' biti' buduyúli' neda'."

44 Ní'irö ila'nná ca' nupa na', ilë neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridë' zi'tu', o biyadzaj le gacu', o gü'ínu', o guyú'u lidxi guié, ate' biti' gúcalentu' Li'?"

⁴⁵ Ní'irō ubi'a didza' neda', bönni' unná bē', guía' légaquiē': "Le nácatē rea' libí'ili', tu' cabí bi benlí' que tu nu nutsa' ladaj nupa nacua' ni, sal-la' naca cá'asō nu na', bití' bi benlí' quia' neda'."

⁴⁶ Ní'irō bönachi tuá' dō' na' la' tsōjtsázagacatē ga ni' ila'guí'i ila'záca'tica'sō, pero bönachi tsahui' ni' gata' yöl-la' na'bán idú quéguequi.

26

Tun xtídza'gaquiē' bönni' yudo' ila'zönē' Jesús

(Mr. 14:1-2; Lc. 22:1-2; Jn. 11:45-53)

¹ Cate' budxi bē'ē Jesús yugu' didza' ni, gudxē' yugu' bönni' usēda queē',
² rnnē':

—Nöz quézili' ia' chopa dza idxín Laní Pascua, ate' dza na' neda', Bönni' Guljē' Bönachi, ulu'dödē' neda' lu ná'agaca nupa ulu'dá' neda' lē'e yaga cruz.

³ Ní'irō bila'dxinē' yugu' bixúz unná bē' len yugu' bönni' yudo' usedi, en bönni' gula tu'zėjni'inē' bönachi judío, ate' bulu'dübē' ga naca lö'a lidxi bixúz lo, lē' Caifás.

⁴ Ni' gulún xtídza'gaquiē' ila'zönē' Jesús, lu yöl-la' rizí' yē' quégaquiē', para ilútiē' Lē'.

⁵ Ta'nnē':

—Bití' gunru' lē ni dza laní, para cabí ila'dzatsa bönachi.

Tu nigula rigú'unu le rilá' zxixi icjē' Jesús

(Mr. 14:3-9; Jn. 12:1-8)

⁶ Cate' ni' zoē' Jesús lu yödzo Betania lu yu'u lidxē' Simón, bönni' na' gü'inē' huē' nudzu' ruzōdi,

⁷ bidxinnu cúdzu'lē' Jesús tu nigula, nu'ánu tu böga'do' néquini guiōj nazaca', en yudzu tu le rilá' zxixi le nazáca'da', ate' gulú'unu le icjē' Jesús cate' ni' rō'ē' rahuē'.

⁸ Cate' bila'lē'enē' bönni' usēda queē' Jesús lē ni, gula'lenē', ta'nnē':

—¿Bizx que réqui ditaj lē ni?

⁹ Guca nu guti' lē ni, en si' dumí zían para gácalenru' yugu' bönachi yechi'.

¹⁰ Cate' biyönnē' Jesús lē ni, rē' légaquiē':

—¿Bizx que rnnēli' queēnu nigula ni? Tsahui' naca le bennu quia'.

¹¹ Yugu' bönachi yechi' ila'cuá'lentica'sō libí'ili', pero neda' bití' ugá'analentica'sa' libí'ili'.

¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba.

¹³ Le nácatē rea' libí'ili', gátitēs luyú yödzölió ga gaca libán que didza' dxi'a ni, lēscá' ila'guixjō' bönachi le bennu nigula ni quia' para nu tsójné lēnu.

Rizí' lu nē'ē Judas udödē' Jesús lu ná'agaquiē' bönni' unná bē'

(Mr. 14:10-11; Lc. 22:3-6)

¹⁴ Ní'irō guyijē' Judas Iscariote ga na' nacu'ē bixúz unná bē'. Náquiē' bönni' dzáguie' chínnuē' na' dá'gaquiē' Jesús,

¹⁵ ate' gudxē' légaquiē':

—¿Bizxi gúnnali' quia' channō neda' udōda'-nē' Jesús lu ná'ali'?

Bulu'gá'analenē' lē' tsahui' ilu'ē lē' chi uruá' dumí plata.

¹⁶ Ní'irō gusí lahuē' Judas na' risí ribō'ē udödē' Jesús lu ná'agaquiē'.

Le ráguru' le rusá' ládxi'ru' ca gútiē' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Cate' naca dza risí lo laní quégaquië' bönni' judío cate' tahuë' yöta xtila le cabí nazí'í cúa zi que, gula' bígui' è bönni' usëda queë' Jesús ga zoë', en të Lë':

—¿Gazxi rë'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

18 Jesús rë' légaquië':

—Guli'tsëajtsöca' yödzo ni' ga na' zoë' tu bönni', en guli'guíë': "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua."

19 Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

20 Cate' chigudzö' dza na', Jesús gurö'lenë' idxínnutë' bönni' usëda queë' tahuë'.

21 Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ládjali' ni udödi neda'.

22 Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

23 Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'.

24 Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

25 Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

26 Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzxuzxjë' le, en bunödzejë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni rulu'í ca gaca que le naca caza'.

27 Gudélë'ë ca' tu zxíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Guli'gui'aj yúgu'tëli'.

28 Lë ni rulu'í ca naca xichöna' le run tsutsu didza' cubi rucá'ana tsahuí'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'.

29 Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn. 13:36-38)

30 Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo.

31 Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'."

32 Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

33 Ní'irö bubi'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

34 Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí' biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxinlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' zxi'inë' Zebedeo, ate' gusi lahuë' ruhu'innë', en risëbi ládxe'ë.

³⁸ Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ladxí. Guli'gá'ana ni, en guli'ná' yëla tsözxón len neda'.

³⁹ Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxón yëla tu chí'ido'?

⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacu'idi'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxi'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'.

⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunnë' zí'alö rnnë'.

⁴⁵ Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'.

⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasöl-la'gaquië' légaquië'.

⁴⁸ Judas, bönni' na' rudödë' Jesús, chibuluf'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'.

⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús.

⁵¹ Tuë' bönni' dzáguië' Jesús gulecjë' guié tuchi' queë', en benë' huë', guchúguië' guidi náguië' bönni' huen dxin queë' bixúz lo.

⁵² Jesús gudxë' lë':

—Bugú' guié tuchi' quiu' lidxi. Yúgu'të nupa tu'dí'ini guié tuchi', lu guié tuchi' ilátigaca.

⁵³ ¿Naru' cabí nözinu' huáca ulidza' Xuza', ate' Lë' la' isöl-la'të' ziantërö ca chinnu cö' gubáz lá'ayi le naca zían gáyu'ë tu cö' huéaj?

⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guié tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'.

⁵⁶ Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zöngaquië' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

⁵⁸ Pedro söjnáhuë' Jesús zi'tu' zi'tu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gátie'.

⁶⁰ Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nnë' queë',

⁶¹ ta'nnë':

—Bönni' ni gunné': "Huaca uquínna' yudo' queë' Dios, ate' uchisa' le ia'tsonna dzasö."

⁶² Ní'irö guzuinë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë' ni ta'nnë' bönni' ni quiu'?

⁶³ Jesús biti' bi gunné'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjö'i' netu' channö nacu' Li' Cristo, Zxi'inë' Dios.

⁶⁴ Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúzxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¡Gunnë' zi'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zi' bë'ë queë' Dios.

⁶⁶ ¿Nacxi rusáca'li' queéli'?

Bulu'bi'ë didza', gula'nnë':

—Nabáguë'ë xíguia' gátie'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë',

⁶⁸ en të' Lë':

—¿Nácatso' Li' Cristo? Gunnéya'atsöca' na'a, ¿nuzxi na' gudapa' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö'ë Pedro lö'alö, ate' bidxinu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni' gudálenë' ca' Jesús, bönni' Nazaret na'.

⁷² Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni'.

⁷³ Iá'látido'os gudzé, gula'biga' nupa nacuá' ni' ga na' zoë' Pedro, en të' lë':

—Le nácatë' li' nunu' ca' tsözxön légaquië' tu' naca bë'u yöl-la' ru'isö quiu' didza'.

⁷⁴ Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' ni'.

La' ná'asö gurödxitë'ba' böra.

⁷⁵ Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en gurödxí yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús.

² Gula'ché'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinózinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátie', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'.

⁴ Rë' légaquië':

—Bena' dul-la' tu' budöda'-në' bönni' tsahui' gátie'.

Ní'irö të' lë':

—Biti' gun lë ni ga cö'ötu' böniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazjé' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'.

⁸ Que lë ni na', ga ridxintë na'a dza nazí'i le lataj na', La' Yëla Rön.

⁹ Caní guca ca na' gunné' Jeremías, bönni' bë'ë didza' uláz queë' Dios, gunné': "Gula'guélé'ë chi uruá' dumí plata na', tsca le gula'zéqui'në' bönni' Israel Lë',

¹⁰ ate' dumí na' gulá'uinë' la' yëla queë' tu bönni' huen rö'ö. Lë ni buluf'inë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödz Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rno'.

¹² Cate' yugu' bixúz unná bë' len bönni' gula tu'zéajni'inë' bulu'zéqui'ë Jesús didza', biti' bi didza' bubí'ë Jesús.

¹³ Ní'irö Pilato rë' Jesús:

—¿Naru' cabí riyöntsenu' cate' xö le ta'nnë' quiu'?

¹⁴ Jesús biti' bi didza' bubí'ë. Caní guca, bubáninë' bönni' unná bë' na'.

Rirugu queë' Jesús gatië'

(Mr. 15:6-20; Lc. 23:13-25; Jn. 18:38-19:16)

¹⁵ Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guíë, núti'tës nu tē'ëni usanë'.

¹⁶ Dza na' tu bönni' nabáguë'ë xíguia', lë' Barrabás, yu'ë lidxi guíë ni'.

¹⁷ Cate' bulu'dubi bönachi zían ni', Pilato gunábinë' légaquië', rnnë': —¿Nuzxi rē'ënilí' usana' queëli'? ¿Naru' Barrabás o Jesús, Bönni' na' lë' Cristo?

¹⁸ Caní gunné' Pilato tu' réquibe'enë' bulu'dödë' bönni' yudo' Jesús lu nē'ë tu' tu'zxé'enë' Lë'.

¹⁹ Tsanni ni' rö'ë Pilato ga na' ruchi'a rusöröë', nigula queë' gusöl-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nözinë' Lë'.

²⁰ Yugu' bixúz unná bë' len bönni' gula tu'zéajni'inë' gula'gú'u yöl-lë'ë bönachi zían na' para ila'nabi Pilato usanë' Barrabás na', ate' gútië' Jesús.

²¹ Leyúbölö bë'ë didza' bönni' unná bë' na', rë' légaquië':

—¿Núzxilé' chopë' ni rē'ënilí' usana'-në' queëli'?

Gula'nnë':

—Barrabás.

²² Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

²³ Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

²⁴ Cate' réquibe'enë' Pilato biti' birúaj xtídzë'ë, pero gula'dzátasarö bönachi, ní'irö gudélé'ë nisa, en gudibi nē'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

²⁵ Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' zxí'initu'!

²⁶ Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' röjáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

²⁷ Yugu' bönni' röjáquië' gudil-la nacu'ë lu në'ë bönni' unná bë' na' gula'ché'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús.

²⁸ Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chulla, ca rácu'gaca nupa ta'nná bë'.

²⁹ Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guído' lu në'ë ibëla le rulu'i ca tu yaga que bönni' yúlahui'. Ní'irö bulu'zóa zxibë' lahuë', en bulu'titjë' Lë', ta'nnë':

—¡Bica' ba Li', rinná bé'enu' bönachi judío!

³⁰ Ní'irö bulu'chejë' Lë' zxoná, ate' bulu'guéllë'ë gui na', en gula'guinë' icjë'.

³¹ Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'ché'ë Lë' para tsöjdá'agaquië' Lë' lë'e yaga cruz.

Tu'dë'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

³³ Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru',

³⁴ bulu'gui'jë' Jesús nupi zi nutsí'i zxígala'aba' böa' guixi'. Cate' buxí'i ru'ë Jesús, biti' gú'unnë' gu'jë'.

³⁵ Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guísië' lari' nácuá', en bulu'quitjë' lahui le gaca bë'."

³⁶ Ní'irö gula'bö'ë ni', tu'yúë' Jesús.

³⁷ Lësca' bulu'zóë' lë'e yaga cruz ícjälë' Jesús tu didza' le riguixjö' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

³⁸ Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'túë' na' cuita lë'ë yögöla.

³⁹ Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë',

⁴⁰ ta'nnë':

—¡Ön, Li' na' uquínaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inë' Dios! ¡Bötjatsöca' lë'e yaga cruz na'!

⁴¹ Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

⁴² —Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'.

⁴³ Lë' buzöni ládxië'ë Dios. Dios usölá cazë' Lë' na'a channö raza ládxië'ë Lë', tu' gunné': "Zxí'inë' Dios nabá'."

⁴⁴ Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

*Ratië' Jesús**(Mr. 15:33-41; Lc. 23:44-49; Jn. 19:28-30)*

45 Cate' bidxin huagubidza, guchul-la idütë yödzoülió ga bidxintë idú ridödi xihuó.

46 Idú ridödi xihuó na', b'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bizx que nubéaj ládXu'u neda'?"

47 Cate' nupa nacuá' ni' bila'yöni didza' ni, ta'nná:

—Bönni' ni rulidzë' Elías, bönni' ni' b'ë didza' uláz queë' Dios.

48 La' guxítit'ë tuë' bönni' nútsë'ë ládjagaquië', en gudélë'ë tu le bululu rixxupi nisa, ate' buxúpinë' le nupi zi, en buzóë' le tu lu gui, ate' butságüië' le ru'ë Jesús para xupë'.

49 Ní'irö ia'zica're' bönni' ni' ta'nnë':

—¡Gulözagarö! ¡Uyútsöca'ru' channö huidë' Elías usölë' Lë'!

50 Leyúbölö gurödxí'ë zidzaj Jesús, ate' burúajtë bö' naca cazë', gútitë'.

51 La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj.

52 Gula'yalaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'.

53 Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzo lá'ayi Jerusalén, ga ni' bila'lé'e bönachi zían légaquië'.

54 Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunnë':

—Le nácatë bönni' ni' gúquië' Xzí'inë' Dios.

55 Zí'tu'sö gula'cuá'anu nigula zían tu'yunu Jesús, nigula na' gula'dalennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'.

56 Lësca' María Magdalena, en María, xiná'agaquië' Jacobo, en José, nútsa'gacanu ládjagacanu, ate' zóanu ca' ni' xiná'agaquië' yugu' xzí'inë' Zebedeo.

*Ta'gu'ë Jesús yeru ba le nadaj lë'e guí'a guiöj**(Mr. 15:42-47; Lc. 23:50-56; Jn. 19:38-42)*

57 Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús.

58 Bönni' ni yöjyüë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzejë' queë' Jesús.

59 Guzxí'ë José Lë', en buchölinë' Lë' tu lari' nazaca'.

60 Ní'irö gulu'ë Lë' lu yeru ba cubi queë' le naguidjë' lë'e guí'a guiöj. Budë'ë tu guiöj blaga zxon ga nu riyaza yeru ba na', ate' söhuöjë'.

61 Gula'cuá'anu María Magdalena, en ia'tunu María ni', rö'gacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

62 Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato.

63 Të' Pilato:

—Bönni', röjnetu' bi gunnë' bönni' rizi' yë'ë na', cate' ni' zoë' nabanë', gunnë': "Cate' gaca tsonna dza ubana' lu yöl-la' guti."

⁶⁴ Que lë ni na' gunná be'e nupa ilún chí'i ba ni' ga idxintë dza bunni, para cabí ídigaquië' bönni' usëda queë' chí'i dzö'ölö, en ulu'béajë' Lë'. Ní'irö ilë' bönnachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë güntërö huiá' dö' ca ben didza' cabí nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' rójáquië' gudil-la. Guli'chë'ë queëli'. Guli'tséaj, guli'gún chí'i yeru ba na' tsca séqui'li' gunli'.

⁶⁶ Ní'irö yójáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' rójáquië' gudil-la ilún chí'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús.

² Tsáldo'os gudödi budó' zxu'. Caní guca, tu' böjtjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudúë' guiöj blaga zxön na', en gurö'ë lu guiöj na'.

³ Nalá' lahui gubáz lá'ayi na' ca yösa bení', ate' zxíla'do'os naca lari' nácuë'.

⁴ Cate' yugu' bönni' na' rójáquië' gudil-la tapa chí'ë yeru ba na' bila'lé'enë' lë', guládxinë', en gula'zxízíë'. Gula'dzö'ë lu yu, en guláquië' ca bönni' nati caz.

⁵ Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguúljali'-në' Jesús, bönni' na' bulu'dë'ë lë'e yaga cruz.

⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'.

⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácacu söjtíxjöi'iguequinu yugu' bönni' usëda queë'.

⁹ Tsanni ni' söjácacu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'.

¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi'i yugu' böcha'a tsójáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' rójáquië' gudil-la

¹¹ Tsanni ni' söjácacu nigula na', yugu' bönni' na' rójáquië' gudil-la gulún chí'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca.

¹² Cate' chibulu'tubë' yugu' bönni' gula tu'zéajni'inë', gulún xtídzagaquië'. Ní'irö bulu'nödzjë' dumí zían quégaquië' bönni' na' rójáquië' gudil-la.

¹³ Të' légaquië':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'."

¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga bití' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazëdagaquië'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu gu'ado' na' chibulu'ínë' Jesús légaquië'.

¹⁷ Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'.

¹⁸ Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni.

¹⁹ Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxi'ini, en Lë' Dios Bö' Lá'ayi.

²⁰ Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

DIDZA' DXI'A BUZÚAJË' MARCOS

Libán benë' Juan, bönni' buquilë' bönachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Caní gusí lo didza' dxi'a ca guca queë' Jesucristo, Zxí'inë' Dios.

² Budxín lë na' buzúajë' lu guichi Isaías, bönni' bë'ë didza' uláz queë' Dios, le gunnë' Dios:

Buyútsöca', risöl-la'a bönni' gubáz quia', inöruë' Lo'.

Lë' upë'ë nöza ga tödu'.

³ Yön chi'ë tu bönni' ulidzë' zidzaj lu lataj cá'asö, innë':

"Buli'pá'a nöza para idxín Xanru' yichaj lázxdo'oli'.

Buli'béaj li yugu' nöza lasi ga tödë'."

⁴ Caní budxín, tu' ruquile' Juan bönachi nisa lu lataj cá'asö, en runë' libán para ila'dila bönachi nisa, bönni' na' bulu'bí'i ládxi'gaquie' para uniti lahuë' Dios dul-la' nabága'gaquie'.

⁵ Bila'rúaj bönachi zían yúgu'të yödzö luyú Judea, enca' yödzö Jerusalén, en yöjáquie' ga na' zoë' Juan, ate' Juan na' buquile' légaquie' nisa lu yegu Jordán, bönni' na' gula'xóalëpë' dul-la' nabága'gaquie'.

⁶ Nácüë' Juan lari' néquini lítsa'ba' böa', en núguë'ë lë'ë tu guídi. Rahuë'-ba' böchi'zu, en re'jë' le zxixi que buzdo'.

⁷ Runë' Juan libán, rnnë':

—Si' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchua', para ilecja' xiráchuë' nudë'ë.

⁸ Neda' ruquila' libí'ili' nisa, pero Lë' gunë' le ruluí'isö yöl-la' ridila nisa ni, uchízië' libí'ili' Dios Bö' Lá'ayi.

Ridilë' Jesús nisa

(Mt. 3:13-17; Lc. 3:21-22)

⁹ Tu dza ni' birúajë' Jesús yödzö Nazaret luyú Galilea, ate' Juan na' buquile' Lë' nisa lu yegu Jordán.

¹⁰ Cate' burúajë' Jesús lu nisa, la' ná'asö bilé'enë' guyalaj lúzxiiba, en ruhuötjë' Dios Bö' Lá'ayi, ruluí' cuinë' ca tuba' gu'dödo', en bidisóalenë' Lë'.

¹¹ Biyön chi'i nu ruí' didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

Rë'ëni tu' xihui' gun ga ibáguë'ë Jesús dul-la'

(Mt. 4:1-11; Lc. 4:1-13)

¹² Ní'irö Dios Bö' Lá'ayi guchë'ë Jesús bayudxi lu lataj cá'asö.

¹³ Guzöë' Jesús lataj cá'asö na' idú choá' dza, ate' gu'uni Satanás tu' xihui' gun ga ibáguë'ë Jesús dul-la'. Guzöë' Jesús ga ni' ta'daba' böa' guixi' dzö'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

Rusédinë' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios.

¹⁵ Caní rnnë':

—Chibidxín dza. Chizóa idinná bē'ē Dios. Buli'bí'i ládxi'li', en guli'tséajlě' didza' dxi'a ni.

Rulidzē Jesús tapē' bōnni' uzxōn bōla

(Mt. 4:18-22; Lc. 5:1-11)

¹⁶ Tsanni ni' ridē' Jesús ra' nísado' luyú Galilea, bilé'enē' Simón len Andrés, bōnni' bōchē'ē Simón na'. Nácagaquiē' uzxōn bōla, en ta'chiljē' yōxaj bōla quégaquiē' lu nisa na'.

¹⁷ Jesús gudxē' légaquiē', rnnē':

—Guli'dutá' neda', ate' guna' ga ichē'ēli' bōnachi quia' neda', gunli' ca runli' rizōnli'-ba' bōla.

¹⁸ La' bulu'cá'anatē' yōxaj quégaquiē', en sōjácalenē' Jesús.

¹⁹ Gudōdē' Jesús ia'látido' ní'ilo, ate' bilé'enē' Jacobo, en Juan, yugu' zxi'inē' Zebedeo, nacu'ē lē'e bárcodo' quégaquiē', tu'únē' yōxaj bōla quégaquiē'.

²⁰ Jesús la' bulidztē' légaquiē', ate' bulu'cá'anē' xúzgaquiē' Zebedeo, dzáguie' yugu' huen dxin queē' lē'e bárcodo' na', ate' sōjácalenē' Jesús.

Tu bōnni' yu'u lē' bō' xihui'

(Lc. 4:31-37)

²¹ Bila'dxinē' Jesús, en yugu' bōnni' dá'gaquiē' Lē' lu yōdzō Capernaum. Cate' ni' naca dza lá'ayi quégaquiē' bōnni' judío, guyáziē' Jesús yu'u ga tu'dubē' bōnni' judío, en tu'sedē' queē' Dios, ate' gusi'lahuē' rusédinē' nupa nudúbigaca ni'.

²² Bulu'bánninē' ca na' rusédinē' Jesús, tu' rusédinē' ca runē' tu bōnni' dē lu nē'ē, en calēga ca tunē' bōnni' yudo' usēdi.

²³ Zóatē' ca' tu bōnni' yu'u lē' bō' xihui' lu yu'u ga na' tu'dubē' tu'sedē' queē' Dios, ate' gurōdxi'ē bōnni' na', rnnē':

²⁴ —¿Bizxi rál-la'tu' quiu', Jesús, bōnni' Nazaret? ¿Za'tsu' usunítui' netu'? Núnbē'a Li', nacu' Bōnni' Lá'ayi queē' Dios.

²⁵ Jesús buzenē' le bach, rnnē':

—Busayaj ru'u, en burúaj lu bōnni' ni.

²⁶ Ní'irō bō' xihui' na' buxízida' bōnni' na' yu'u lē', ate' gurōdxi'a zidzaj, en la' burúajtē.

²⁷ Bulu'bánninē' yúgu'tē bōnni' nacu'ē ni', ate' gula'nabi luzē'egaquiē', ta'nnē':

—¿Bizxi caz lē' ni? ¿Naru' nácatsō xibá cubi? ¡Len yōl-la' unná bē' rinná bé'enē' yugu' bō' xihui', ate' tun ca rnnē'!

²⁸ La' guzētē' didza' que yōl-la' huáca queē' Jesús, ate' bila'yōni bōnachi idútē luyú Galilea na'.

Ruúnē' Jesús xiná'anu nigula queē' Pedro

(Mt. 8:14-15; Lc. 4:38-39)

²⁹ Ní'irō burúajē' Jesús lu yu'u ga na' tu'dubē' tu'sedē' queē' Dios, en la' guyéajlentē' Jacobo, en Juan, ate' bila'dxinē' lídxigaquiē' Simón, en Andrés.

³⁰ Ní' dēnu xiná'anu nigula queē' Pedro, yú'unu tu xilá. La' gula'guíxjoi'itenē' Jesús ca raca queēnu.

³¹ Ní'irō gubígui'ē Jesús, ate' gudélē'ē ná'anu, en guchisé'-nu. La' burúajtē tu xilá na' yú'unu, ate' bupá'anu le gulahuē'.

Ruúnē' Jesús zían nupa te'e

(Mt. 8:16-17; Lc. 4:40-41)

³² Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús.

³³ Yúgu'të bönachi lu yödzö bila'guirö ga nu riyaza yu'u ga na' zoë' Jesús.

³⁴ Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios.

³⁶ Simón, en nupa nacua'len lë' söjdíljagaquië' Jesús.

³⁷ Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yüë' lahuë', rnnë':

—Channö rë'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóácu'.

⁴² Ca gunné' ca', la' bunítitë huë' ré'enë', en böáquië' dxí'ado'.

⁴³ Ní'irö Jesús buzenë' bach bönni' na', en la' busól-la'të' lë'.

⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjlu'i' cuinu' lahuë' bixúz, en yöjnodzaj para le böácanu' li' que yudo' ca na' gunná bë'ë Moisés, lë na' uluf'i' bönachi chinuhuóácu'.

⁴⁵ Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, biti'rö guca tsazië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të yödzö bila'dxin ga na' zoë' Jesús.

2

Bönni' ré'enë' huë' nacú'unië' bin

(Mt. 9:1-8; Lc. 5:17-26)

¹ Cate' chigudödi chopa tsonna dza, buázië' Jesús yödzö Capernaum, ate' guzë' didza' zoë' yu'u.

² La' bulu'dúbitë bönachi zían ga na' zoë' Jesús, ga bidxintë biti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'.

³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin.

⁴ Biti' guca ila'dxinë' lahuë' Jesús tu' nacua' bönachi zían ni'. Que lë ni na' gula'saljë' icjo'olö ca dödilö ga zoë' Jesús. Cate' budxi bulu'dxië' yeru na', ni' bulu'zötjë' le denë' bönni' huë' na'.

- 5 Cate' gúquibe'enē' Jesús ca na' ta'yéajlë'è Lë', gudxë' bönni' huë' na':
 —Zxi'ina', chibunít lahua' li' ca naca dul-la' nabágu'u.
 6 Rõ'õgaquië' bal-lë' bönni' yudo' usedi ni'. Ta'zá' ládxi'gaquië', ta'nnë':
 7 ¿Bizx que ru'ë caní didza' bönni' ni? Rucá'anë' cá'asõ Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni.
 8 La' gúquibe'etenë' Jesús le ta'zá' ládxi'gaquië', ate' gudxë' légaquië':
 —¿Bizx que rizá' ládxi'li' caní?
 9 Biti' naca böniga nu guiësõ bönni' huë' ni chibuníti lo dul-la' nabáguë'ë, pero naca böniga nu gun ga huõásë', en u'ë le denë', en uzë'e ni'ë.
 10 Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.
 Ní'irõ Jesús gudxë' bönni' huë' na':
 11 —Li' rea': Guyasa. Buá' le denu', en böaj lidxu'.
 12 La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bánninë' yúgu'të', en gula'gu'ë Dios yöl-la' ba, ta'nnë':
 —Catu caz rilé'etu' le caní.

Jesús rulidzë' Leví

(Mt. 9:9-13; Lc. 5:27-32)

- 13 Burúajë' Jesús yödzo Capernaum, na' gudödë' leyúbölõ ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'.
 14 Cate' ridödë' Jesús ni', bilé'enë' Leví, zxi'inë' Alfeo, rõ'ë ga ruquíxjë' uláz que yödzo zítu'. Jesús gudxë' lë':
 —Gudá' neda'.
 La' guyásatë' Leví na', sa'yéajlenë' Jesús.
 15 Gudödi guca lë ni, rõ'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asõ rõ'õlengaquië' tsõzxõn Jesús, en yugu' bönni' usëda queë'. Caní guca, tu' røjaca bönachi zían len Jesús.
 16 Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rõ'ë rágulenë' tsõzxõn yugu' bönni' uquíxaj, en ia'bal-lë' bönni' cá'asõ, gulë' yugu' bönni' usëda queë' Jesús, ta'nnë':
 —¿Bizxi caz runtsë'? ¿Rë'aj rágulentsë' yugu' bönni' uquíxaj, en ia'bal-lë' bönni' dul-la'!
 17 Biyönnë' Jesús didza' ni tu'ë, en gudxë' légaquië':
 —Nupa nacuá' dxi'a bití' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tshui', pero rulídzagaca' bönachi dul-la' para ulu'bí'i ládxi'gaca.

Ru'ë Jesús didza' que yöl-la' run gubasa

(Mt. 9:14-17; Lc. 5:33-39)

- 18 Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:
 —¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?
 19 Bubi'ë didza' Jesús, rë' légaquië':
 —¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa.
 20 Idxín dza cate' udüë' bönni' na' rutsaga në'ë, en bití'rõ sóalenë' légaquië', ate' dza ní'irõ ilunë' gubasa.
 21 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachõza' lari' tëbi na', ate' huarõza'rõ lari' tëbi na'.

²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië' Jesús ta'lecjë' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quë'gaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí lógaquië' ta'lecjë' do ga dxía xzoa' xtila.

²⁴ Ní'irö bönni' yudo' fariseo gulë' Jesús, ta'nñë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacué'len lë'

²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacué'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'z' xibé bönachi, calëga benë' bönachi para ilún chi'i dza lá'ayi.

²⁸ Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyübölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë.

² Bönni' yudo' nacué'ë ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'.

³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxí'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yö'l-la' na'bán o usunitiru' le? Gula'cuá' dxisö bönachi ni'.

⁵ Ní'irö len yö'l-la' rilé queë', buyúë' Jesús bönachi na' nacué' gásibi'ilë'. Ruhuf'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë.

⁶ Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zían ra' nísado'

⁷ Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' söjácálen Lë' bönachi zían narúajgaca luyú Galilea, en luyú Judea.

⁸ Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacué' idú gásibi'ilö ga nacué' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxon runë' Jesús.

⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zián na' Lë'.

¹⁰ Caní guca tu' chibunë' zián nupa te'e, ate' bila'guírö bönachi zián na' ga zoë' para ila'gán Lë'.

¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxi'a, ta'nná:

—Nacu' Li' Zxi'inë' Dios.

¹² Jesús buzenë' le bach bö' xihui' na', cabí ila'guixjö' nu náquië' Lë'.

Riböë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa ré'enë'. Gula'biguë'ë bönni' ni gásibi'ilë'.

¹⁴ Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán.

¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi.

¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzóë' ia'tú lágaquië', Boanerges, le rna lu didza' xidza':

Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ru'í ladxë'ë yödzo queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u.

²⁰ Leyúbölö bila'guírö bönachi zián ga zoë' Jesús, ate' bití'rö guta' lataj bi ilahuë' Jesús, en bönni' na' dá'gaquië' Lë'.

²¹ Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

²² Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'?

²⁴ Channö ila'rúaj choplö bönachi tu yödzo, en ila'díl-lalen luzë'eguequi, bití' gaca idía' yödzo na'.

²⁵ Lësca' caní channö ila'rúaj choplö bönachi nacué' tu yu'u, en ila'díl-lalen luzë'eguequi, bití' gaca ila'día' bönachi nacué' yu'u na'.

²⁶ Que lë ni na', channö Satanás tu' xihui' tá'baga' luzë'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

²⁷ 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

²⁸ 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná,

²⁹ pero núti'tës nu innë schanní' queë' Dios Bó' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunnë' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lõ'alö, en gula'sól-lë'ë nu tsöjlidza Jesús.

³² Bönachi zían na' rő'gaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lõ'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

³⁴ Ní'irö buyúë' nupa na' rő'gaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' böcha'a.

³⁵ Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

4

Rucúdzu'ë didza' Jesús ca naca queë' bönni' guz

(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'.

² Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³ —Gulí'zë nágali' didza' ni. Birúajë' tu bönni' guz, sőjësië' xisedo'.

⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulë'ajba' le.

⁵ Gulasi ia'bal-la xisedo' na' ga rő'ö guiöj ga biti' rő'ö yenni' yu. Bayón gula'lén xisedo' na' tu' cabí rő'ö yenni' yu.

⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'.

⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzej.

⁸ Gulasi ia'bal-la xisedo' na' ga naca luyú bëbu, ate' gula'zxón, en xitsá' ra' gula'bó'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

Ríguíxjö'ë Jesús bizx que rucúdzu'ë didza'

(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxón idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'.

¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bē'ē Dios, pero nupa na' bití' nácgaca tuz len rē'u, ruí'lena' légaquiē' didza' yugu' le rucúdzu'a didza'.

¹² Caní runa' para gaca lē na' nazúaj lu guichi lá'ayi, rna: Ulu'yúē', en bití' ila'lé'enē'.

Ulu'zē nácgacaquiē', en bití' ila'yéajni'inē'.

Bití' ulu'bí'i ládxi'gaquiē' para gaca uniti lahua' légaquiē' ca naca dul-la' nabága'gaquiē'.

Rigúxjö'ē' Jesús le bucúdzu'ē' didza'

(Mt. 13:18-23; Lc. 8:11-15)

¹³ Jesús gudxē' ca' yugu' bōnni' dá'gaquiē' Lē', rnnē':

—¿Naru' cabí réajni'itseli' lē na' bucúdzu'a didza'? ¿Nacxi caz gaca tséajni'ili' ia'zica'rō le ucúdzu'a didza'?

¹⁴ Bōnni' guz na' náquiē' nu ruzē xtídzē'ē Dios.

¹⁵ 'Nácgaca bal-la bōnachi ca xisedo' na' gulasi ra' nōza. Ta'yōnnē' xtídzē'ē Dios, en ca ta'yōnisinē' ca', la' za'tē Satanás tu' xihui', en rigúa didza' na' bidxín lu icja ládxi'do'gaquiē'.

¹⁶ 'Nácgaca ia'bal-la bōnachi ca xisedo' na' gulasi ga rō'ō guiōj. Ta'yōnnē' didza' na', ate' len yōl-la' rudzeja quégaquiē' ta'zi'ē le.

¹⁷ Bití' riyaza icja ládxi'do'gaquiē', ate' tu chí'isō ta'dē'ē le. Cate' bi raca quégaquiē', o zoa nu ribía ladxí' légaquiē' tu' ta'dē'ē didza' na', la' tu'huōatē ládxi'gaquiē'.

¹⁸ 'Nácgaca ia'bal-la bōnachi ca xisedo' na' gulasi ga na' tu'lén lubá yōtsi'. Ta'yōnnē' didza' na',

¹⁹ pero tufi' ládxi'gaquiē' le nácgaca que yōdzōlió ni. Nazí' yé'eguequinē' tu' nadxí'iguequinē' yugu' yōl-la' tsahui', en ta'zē ládxi'gaquiē' yugu' le dē. Ta'yaza icja ládxi'do'gaquiē' yúgu'tē lē ni, en tu'suniti didza' na', para cabí gun dxin lu icja ládxi'do'gaquiē'.

²⁰ 'Nácgaca ia'bal-la bōnachi ca xisedo' na' gulasi ga naca luyú bēbu. Ta'yōnnē' didza' na', en ta'zí' lu ná'agaquiē' le, ate' run dxin lu icja ládxi'do'gaquiē'. Nácgaca bal-la bōnachi caní ca xisedo' na' bulu'nōdzaj ia'chí uruá' huéaj. Nácgaca ia'bal-lē' ca xisedo' na' bulu'nōdzaj ia'tsónnalalaj ca', ate' nácgaca ia'bal-la bōnachi ca xisedo' na' bulu'nōdzaj ia'tu gayuá' ca'.

Rucúdzu'ē' didza' Jesús que tu le rigú'u bení'

(Lc. 8:16-18)

²¹ Jesús gudxē' ca' bōnni' dá'gaquiē' Lē', rnnē':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Bití' ca' runru' caní. Ruzóaru' guí' ga naca xitsá' ga cu'u bení'.

²² Yúgu'tē le nagachi' ilá' lahui, ate' yúgu'tē le raca balándo'os ila'rúaj ga liná'.

²³ Nu zoa nagui, en riyōni ral-la' uzē nagui.

²⁴ Gudxē' ca' légaquiē':

—Gulí'güí' ládxi'li' le riyōnili'. Ca naca le ruríxili', la' leze urixē' Dios queēli', ate' gunnē' queēli' ia'lati'.

²⁵ Nu nazí'i le za' que, gu'ē que ia'lati', pero nu bití' nazí'i le, la's dui le dē que, udúa.

Rucúdzu'ē' didza' Jesús ca rizxōn xxa' xtila

²⁶ Gunnē' ca' Jesús:

—Ca raca ni le rinná bē'ē Dios naca ca raca cate' ruchejē' tu bönni' xzoa' xtila lu yu.

²⁷ Chi'i dzö'ölö rásiē', en riyasē' cate' za' rení'. Ta'lén xzoa' xtila na', en ta'zxön, pero bití' nözinē' lē' nacxi raca ta'zxön.

²⁸ La' cuinsi luyú na' ruxön le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que.

²⁹ Cate' chinal-la xui'i na', la' tséajtē' tsöjchibē' do na' tu' chibidxín dza uzi'ē xui'i.

Rucúdu'ē didza' Jesús ca raca que xisé mostaza
(Mt. 13:31-32; Lc. 13:18-19)

³⁰ Gunnē' ca' Jesús:

—¿Bizxi caz innaru' ca raca ni le rinná bē'ē Dios? ¿Bizxi ucúdu'ru' didza' ca raca?

³¹ Raca ca raca que tu xisedo' mostaza. Cate' riyaza luyú naca tu xisedo' nácatērö cuidi' ca yúgu'tē xisedo' dzö'ö luyú,

³² pero cate' chinadúz, rilén, en rizxöntērö ca yúgu'tē guixi' cuan rō'gaca luyú. Tsca run yana' ní'a nē'e, gaca ila'dxinba' biguinnido', en ulu'dxíaba' xicá'agacaba' lu zxul-la que.

Ca rugunē' dxin Jesús le rucúdu'ē didza'
(Mt. 13:34-35)

³³ Caní guca, busédinē' Jesús légaquiē', en zíanrö ca' le bucúdu'ē didza' tsca guca ila'yéajni'inē'.

³⁴ Yúgu'tē didza' bē'lenē' bönachi bucúdu'ē didza', ate' yúgu'tē didza' ni buchila lá'anē', buzéajni'inē' légacasē' bönni' usēda queē'.

Jesús ribequi dxíē' bö' budunu'
(Mt. 8:23-27; Lc. 8:22-25)

³⁵ La' dza ná'asó, cate' ridzö', Jesús gudxē' yugu' bönni' dá'gaquiē' Lē', rnnē':

—Töditsöca'ru' ia'tsölá'a nísado' ni.

³⁶ Ní'irö bulu'lá'alenē' bönachi zían nacua' ni', ate' bulu'sē'ē bárcodo' ga na' chizóasē' Jesús. Gula'cuá' ca' ni' ia'zica'rö bárcodo' sōjácalen légaquiē'.

³⁷ Gusí lo recja bö' budunu' lu nisa na', ate' gudá'a nisa lē'e bárcodo' na'. Ca' guca, zeaj ridzá' nisa lē'e bárcodo' na'.

³⁸ Dē' rásiē' Jesús lu xicúgüē' ga naca xitsá'alö lē'e bárcodo' na', ate' bulu'subanē' Lē'. Tē' Lē':

—jBönni' Usedi! ¿Naru' cabí ruí'i ládxi'tso' netu'? jHuáti caztu' lu nisa ni!

³⁹ Ní'irö guyasē' Jesús, en gunná bé'enē' bö' na' recja, gunnē':

—Gurö'ö dxi.

Gudxē' ca' nisa na', gunnē':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'.

⁴⁰ Ní'irö Jesús gudxē' yugu' bönni' dá'gaquiē' Lē', rnnē':

—¿Bizx que radxi ridzöbili' caní? ¿Naru' cabí réajlē'ēli' Dios?

⁴¹ Ní' tádxinē' gulē luzē'ē tuē' ia'túē':

—¿Nuzxi caz bönni' ni? jTun bö' recja, en nísado' ca rnna xtídzē'ē!

5

Bönni' Gadarayu'u bö' xihui' lē'
(Mt. 8:28-34; Lc. 8:26-39)

1 Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara.

2 Cate' burúajë' Jesús lë'e bárcodo' na', tu bönni' rirúajë' zxan bulóaj ga nacua' yeru ba la' dutságatë' Lë'. Bönni' ni yu'u bö' xihui' lë',

3 ate' nun xilatjë' ga na' nacua' yeru ba. Cuntu nu guca guga' bönni' na', calëga len du guíë.

4 Zián luzuí bulu'zöë' bregui' guíë yen në'ë, en ni'ë, en gulúgui'ë lë' du guíë. Yugu' du guíë na' bulë'ë, ate' bregui' guíë na' guditsjé'. Biti' rizéqui'në' nu bönni' inná bé'enë' lë'.

5 Ridática'së' ribödxi'ë rëla, en tē dza ga na' nacua' yeru ba, en gapa naca lu gu'ado', run huë' cuinë' yugu' lu guiöj dzö'ö ni'.

6 Cate' bilé'enë' zë'ë zi'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'.

7 Bë'ë zidzaj didza', rë' Jesús:

—¿Bizxi ral-la'a quiu' Jesús, Zxi'inë' Dios nayëpisëtërë'? Ni'a queë' Xanru' Dios ráta'yua' lo', biti' usaca' zi'u neda'.

8 Cani gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

9 Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

10 Gula'nabi yechi' yugu' bö' xihui' na' Jesús para cabí isöl-lë'ë léguequi zi'tu' luyú ni'.

11 Nacua'aba' cuchi zián lu gu'ado' ní'isö, ta'daba' táguba' ni'.

12 Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

13 La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' gu'a, yöjcházagacaba' nísado'. Lu nísado' na' gula'yëpiba' nisa, gulátiba', en nácagacaba' ca galaj gayuá'aba'.

14 Ní'irö bulu'zxunnaj nupa ni' gulún chi'i cuchi zián na'. Yöjtíxjöi'igüequinë' bönachi lu yödzö ni', enca' bönachi nacua' la' guixi' ni'. Bila'rúaj bönachi lu yödzö, söjyúgaquië' bizxi na' guca ni'.

15 Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácüë' lari', en zoë' dxi'ado', ate' guladxi bönachi na'.

16 Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'.

17 Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'.

19 Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i di'a dza quiu' yugu' le zxon bena' quiu' neda', naca' Xanu', en ca bena' buéchi' ládxa'a lí'.

²⁰ Söhuöjê' bönni' na', en ruzê' didza' yugu' yödzö Decápolis ca nácagaca le zxön benê' Jesús queê', ate' bulu'bani yúgu'tê bönachi nacua' yugu' yödzö ni'.

Bi'i nigula queê' Jairo, en nigula na' gudannu lari' nácuê' Jesús
(Mt. 9:18-26; Lc. 8:40-56)

²¹ Cate' budxinê' Jesús ia'tsolá'a nísado' na', ní'irö bulu'dubi bönachi zián ga na' zoê' ra' nísado'.

²² Bönni' lè' Jairo, bönni' rinná bē'ē lu yu'u ga tu'dubē' bönni' judío, en nazedē' queê' Dios, bidē' ga zoē' Jesús. Cate' bilé'enē' Jesús, buzóa zxibē' lahuē',

²³ en gúta'yuē' lahuē', rnnē':

—Chiraquí gátibi' bi'i nigúlado' quia'. Gudá ixóa no'o lēbi' para huóacabi', en biti' gátibi'.

²⁴ Sa'yéajlenē' Jesús lē', ate' bönachi zián sōjácalen Jesús, tu'quirō Lē'.

²⁵ Tu nigula, chinaca chinnu iz ré'enu, zóanu ca' ni'. Biti' ruhuí'i rön queēnu que huē' quégaca cázanu nigula.

²⁶ Yenni' chigudí'i guzxacá'nu lu ná'agaquiē' zián bönni' tu'únē' bönachi. Nítisō chibutōnu dēra le dē queēnu, tu' cabí bi gúcalen lēnu, pero riyali' queēnu.

²⁷ Cate' biyōninu tuí'i didza' bönachi ca naca queê' Jesús, gudōdinu ládjalō bönachi zián na', en bidxinnu zaca' cúdzu'lē' Jesús, en gudannu lari' nácuē'.

²⁸ Caní bennu tu' rnnanu: “Channō cansa' le nácuē', huóaca'.”

²⁹ La' buí'tē rön queēnu, ate' réquibe'enu chibóacanu que le guca queēnu.

³⁰ La' gúquibe'etenē' Jesús ben dxin yöl-la' huáca queē', ate' buécjē', ruyúē' bönachi zián na'. Rnnē':

—¿Nuzxi na' gudán neda'?

³¹ Ní'irö bönni' dá'gaquiē' Lē' tē' Lē', ta'nnē':

—Rilé'e quézinu' bönachi zián ni tu'quirō Li', en rnnatso': “¿Nuzxi na' gudán neda'?”

³² Ruyúē' Jesús gásibi'ilē' para ilé'enē' nuzxi na' gudán Lē'.

³³ Ní'irö nigula na' gubíga'nu lahuē'. Rádxinu, en rizxízinu tu' chinōzinu bi na' guca queēnu, ate' buzóa zxíbinu lahuē' Jesús, en gúdxinu Lē' idútē le nácatē.

³⁴ Jesús rē'ē-nu:

—Nigúlado'. Chibóacu' tu' réajlē'u neda'. Böaj lidxu' idú ládxi'u. Tsaz nuhuóacu' que le guca quiu'.

³⁵ Tsanni ni' ru'ē caní didza' Jesús, bönni' narúajgaquiē' lidxē' bönni' na' rinná bē'ē lu yu'u ga tu'dubē' tu'sedē' queē' Dios bila'dxnē' ni', en tē' bönni' na':

—Chigútibi' bi'i nigúlado' quiu'. Bítirō upízxjanu' Bönni' Usedi.

³⁶ Biti' bē' ládxi'ē Jesús lē na' ta'nnē', ate' gudxē' bönni' unná bē' na', rnnē':

—Biti' gádxinu'. Guyéajlē'ēsē' Dios.

³⁷ Biti' bē'ē lataj Jesús tsōjácalen Lē' ia'zica'rö bönachi, pero légacasē' Pedro, en Jacobo, en Juan, bóchē'ē Jacobo na'.

³⁸ Cate' bidxinē' lidxē' bönni' na' rinná bē'ē ga tu'dubē' tu'sedē' queē' Dios, bilé'enē' raca dzatsa, enca' nupa ni' ta'bōdxi, en nupa ta'bōdxi yechi'.

³⁹ Guyáziē' Jesús, en gudxē' légaquiē':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjé' Jesús, pero Lë' bubéajé' yúgu'të bönachi na' ní'ilo, ate' guché'ë xuz xiná'abi' bi'i nigúlado' na', enca' nupa nacué'len Lë', ate' guyazié' ga na' dëbi'.

⁴¹ Gudélé'ë ná'abi' bi'i nigúlado' na', en gudxé'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa.

⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacué' ni'.

⁴³ Ní'irö Jesús gunná bé'enë' légaquié' cunttu nu ulu'siyönnë' lë na' guca. Gudxé' légaquié':

—Guli'güi' le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

¹ Buzé'ë Jesús ni', budxinë' ladzë', ate' yugu' bönni' dá'gaquié' Lë' sójácalenë' Lë'.

² Cate' bidxín dza lá'ayi quégaquié' bönni' judío, gusí lahuë' Jesús rusédinë' bönachi ga na' tu'dubë' tu'sedë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá?

³ Náquié' bönni' ni gubëdxi yaga na', en zxf'ininu María. Náquié' böchi'gaquié' Jacobo, en José, en Judas, en Simón. Nigula zanë' nacué'lennu ca' rë'u.

Que lë ni na' bulu'cá'anë' Lë' cá'asö.

⁴ Ní'irö Jesús gudxé' légaquié', rnnë':

—Gáti'tës tunë' bal nu bönni' ru'ë didza' uláz queë' Dios, pero bönachi uláz queë', en bönachi di'a dza queë', en bönachi nacué' lidxë' biti' tun lë' bal.

⁵ Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi.

⁶ Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacué' gásibi'ilo, rusédinë' bönachi ni'.

Risöl-lë'ë Jesús bönni' dá'gaquié' Lë' tsójéngaquié' libán

(Mt. 10:5-15; Lc. 9:1-6)

⁷ Ní'irö bulidzë' Jesús idxínnutë' bönni' dá'gaquié' Lë', en gusí lahuë' risöl-lë'ë légaquié' chopa huéajgaquié'. Budödë' lu ná'agaquié' yöl-la' unná bë' ulu'béajé' yugu' bö' xihui' yú'ugaca bönachi.

⁸ Gunná bé'enë' légaquié' biti' bi' ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquié', pero iluá'asë' xiyágado'.

⁹ Ral-la' ulu'dë'ë xiráchugaquié', pero calëga chopa lari' ulu'xóa yéngaquié'.

¹⁰ Gudxé' ca' légaquié':

—Gáti'tës ga tsú'uli' tu' yu'u, guli'sóa yu'u na' cate' uzá'aröli' yödzö na'.

¹¹ Channö tsú'uli' tu' yödzö ga biti' ilún bönachi lu yödzö na' libí'ili' bal, en biti' ulu'zë' nágaagaquié' xtídzalí', buli'rúaj ni', en buli'quínnaj bëchtö da' lë'e lálali'. Lë ni gaca bë' nabága'gaquié' xíguia'. Le nácaté' rea' libí'ili',

cate' idxín dza ichúguie' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'záca' bönachi Sodoma, en Gomorra, yugu' yödzö na' busunítié' Dios.

¹² Ní'irö bila'ruájé' bönni' dá'gaquié' Lè', yöjéngaquié' libán ca ral-la' ulu'bí'i ládxi'gaca bönachi.

¹³ Bulu'béajé' zían bõ' xihui' yú'ugaca bönachi. Gula'gu'è le za zían nupa te'e, ate' bulu'huöáquié'.

Ca bétigaquié' Juan, bönni' buquilé' bönachi nisa

(Mt. 14:1-12; Lc. 9:7-9)

¹⁴ Biyönné' Herodes, bönni' unná bē', ca naca le runé' Jesús, tu' rizé didza' gátitēs que yöl-la' huáca queé'. Bal-la bönachi ta'nná:

—Chibubané' Juan, bönni' ni' buquilé' bönachi nisa, lu yöl-la' guti. Que lè ni na' napé' yöl-la' huáca runé' yugu' lè ni.

¹⁵ Ia'bal-la bönachi ta'nná:

—Naquié' Elías, bönni' bē'è didza' uláz queé' Dios dza ni'te.

Ia'bal-la bönachi ta'nná:

—Naquié' bönni' ru'è didza' uláz queé' Dios ca guláquié' bönni' gulu'è didza' uláz queé' dza ni'te.

¹⁶ Cate' biyönné' Herodes yugu' lè ni, gunné':

—Naquié' Juan, bönni' na' burixa' yené'. Chibubané' lu yöl-la' guti.

¹⁷ Caní gunné' Herodes tu' gusöl-lè'è lè cazé' bönni' yöjxõngaquié' Juan na', ate' gulúgu'è lè' du guié lu yu'u lidxi guié. Caní bené' Herodes tu' rilenu Herodías Juan na'. Nácanu nigula na' gúcanu nigula queé' Felipe, böchē'è Herodes na'. Herodes gudúé'-nu Herodías na', en butsa ná'aléné'-nu.

¹⁸ Juan na' gudxé' Herodes:

—Biti' ral-la' sóalenu'-nu nigula queé' böchu'u.

¹⁹ Que lè ni na' gusí gurö'õnu Herodías. Gú'uninu bi gunnu queé' Juan, tu' gú'uninu gútinu lè', pero biti' bi guxzéqui'nu

²⁰ tu' rádxiné' Herodes Juan. Nöziné' náquié' Juan na' tsahui', en lá'ayi. Que lè ni na' gudapa chí'è lè', en buzé náquié' lè' idú ládxi'è sal-la' lè na' rnné' Juan ben ga gurö'è böniga Herodes na'.

²¹ Ní'irö bidxín tu dza guxzéqui'nu Herodías na', le naca dza runé' Herodes laní que dza guyé'ené' iz. Bupé'è le ilé'aj ilahué' bönni' dè lu ná'agaquié' uláz queé', en bönni' ta'nná bé'ené' bönni' röjáquié' gudil-la, enca' bönni' nácaquié' lo luyú Galilea.

²² Guyázabi' bi'i nigula queénu Herodías ga na' tē'aj tahué', en buyá'abi' lógaquié'. Guyaza ládxi'è Herodes ca runbi', en gula'yaza ládxi'gaca ca nupa tē'aj tágulen lè'. Ní'irö Herodes gudxé'-bi' bi'i nigula na', gunné':

—Gunaba bi ré'ènu' gunna' quiu', ate' guna' ca'.

²³ Bené' tsutsu xtídzé'è, gudxé'-bi':

—Ni'a queé' Xanru' Dios gunna' quiu' bítitēs bi inabu' ga idxinté gatsaj ga rinná bē'a.

²⁴ Burúajbi' lèbi', ate' gunábabi' xiná'abi':

—¿Bizxi inábatsa'?

Lènu gúdxinu-bi':

—Icjé' Juan, bönni' buquilé' bönachi nisa, inabu'.

²⁵ La' buázatēbi' ga na' zoé' Herodes, en rēbi'-nē':

—Rē'ènda' ixú' quia' na'a lu zxiga' zxõn icjé' Juan, bönni' na' buquilé' bönachi nisa.

26 Ní'irö buf'innë' Herodes, pero tu' buzötjé' Dios, en tu' bila'yöni ca' nupa tágulen lë', bití' gú'unne' initi xtídzë'ë na' guzxi' lu në'ë queëbí'.

27 Herodes la' gusöl-la'të' tu bönni' rejé' gudil-la zoë' rapa chi'ë, ate' gunná bé'enë' lë' tsöjxi'ë icjé' Juan.

28 Bönni' na' rejé' gudil-la guyijé' lidxi gufé, yöjrixë' yen Juan na', ate' bu'ë icjé', nuxóë' le tu lu zxiga' zxon. Budödë' le lu ná'abi' bi'i nigula na', ate' lébi' bunödzbabi' le queënu xiná'abi'.

29 Cate' bönni' dá'gaquié' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcáchi'gaquié' lë' yeru ba.

Rugahuë' Jesús zíanrö ca chi-un gayuá' bönachi

(Mt. 14:13-21; Lc. 9:10-17; Jn. 6:1-14)

30 Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sëdinë' bönachi.

31 Nacuá' bönachi zían ni', nupa zá'gaca, en nupa søjaca, ga bidxintë bítirö dë lataj ilahuë' Jesús, en yugu' bönni' dá'gaquié' Lë'. Que lë ni na' Jesús gudxë' légaquié', rnnë':

—Guli'dá. Uyëaj cázaru' ga naca lataj cá'asö, en uzí ládxi'ru' tu chi'i.

32 La' légacasë' yöjáquié' tu lë'e bárcodo', ate' bila'dxinë' tu lataj cá'asö.

33 Bila'lë'e bönachi zían légaquié' søjáquié' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquié' ni'. Gula'zé'e ní'agaquié', ate' bila'dxinë' ni' zí'atëlö ca Jesús, en yugu' bönni' dá'gaquié' Lë'.

34 Cate' burúajé' Jesús lë'e bárcodo' na', bilé'enë' bönachi zían na', ate' buéchi' ládxi'ë légaquié' tu' nácagaquié' ca bö'cu' zxi'la'do' bití' zoa nu gapa chi'i légacaba'. Gusí lahuë' rusëdinë' légaquié' le zían.

35 Cate' chiridzö' dza na', yugu' bönni' dá'gaquié' Jesús bila'dxinë' ga zoë', en të' Lë':

—Chiridzö', ate' lataj cá'asö naca ni.

36 Busöl-la' bönachi zían ni para tsøjaca yugu' yú'udo', en yugu' yödzödo' nacua' gásibi'ilö, tsöjögaca yöta, tu' cabí bi dë ni le ilagu.

37 Bubi'ë didza' Jesús, gudxë' légaquié':

—Guli'güf libí'i cázali' le ilahuë'.

Gulë' Lë':

—¿Naru' tsöjö'utsatu' yöta xtila len lázxjatu' que idú xunu' beo', ate' güí'itu' le ilahuë'?

38 Jesús gudxë' légaquié':

—¿Bal-laxi yöta xtila dë queëli'? Guli'tsöjyútsöca'.

Cate' chinóziguequinë', të' Lë':

—Gáyu'sö yöta xtila dë, en chópasöba' böla dëba'.

39 Ní'irö gunná bé'ë Jesús ilunë' ga ila'bö' bönachi zían na', ila'cuá' tu có' huéajguequi ga naca lachi' lu daca'.

40 Gula'cu'ë tu có' huéajgaquié', tu gayuá' huéajgaquié', en chi-un huéajgaquié'.

41 Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúzxiba, en gudxë' Dios: “Xclenu'.” Ní'irö buzuzxjé' yöta xtila na', en bé'ë quégaquié' bönni' usëda queë' para ila'guísië' quégaca bönachi zían na'. Gudísië' ca' irópateba' böla na' quégaca yúgu'të bönachi na'.

42 Gulahuë' yúgu'të', en bulu'huóljanë'.

43 Ní'irö bulu'tubë' le bizxaj que yöta xtila na', en quégacaba' böla, ate' chinnu ga'böra bulu'lié'.

44 Guláquié' ca chi-un gáyu'ë bönni' na' gulahuë'.

Rizë'e ni'ë Jesús lu nísado'

(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzö Betsaida, tsanni ni' Lë' rusöl-lë' bönachi zián na' lídxiguequi.

⁴⁶ Cate' chibudxi busöl-lë' légaquië', guyijë' tu lu guí'ado', ate' ni' ruí'ilenë' Dios didza'.

⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'.

⁴⁸ Bilë'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gu'unnë' tódisë' ga na' nacu'ë.

⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë

⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' guró'ö dxi bö' na' recja, ate' légaquië' gula'niti gula'tíqui'sinë' bulu'bánninë'.

⁵² Biti' ta'yéajni'ininë' le ruluí'i lë na' benë' Jesús que yöta xtila na'. Ni' naca zidi icja ládxi'do'gaquië'.

Ruúnë' Jesús nupa te'e lu yödzö Genesaret

(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsólá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'.

⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús.

⁵⁵ Gula'xiti' bönachi na', yójaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús.

⁵⁶ Gáti'tës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yüë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacaté dxi'ado'.

7

Le tun ga biti' náca'gaca bönachi tsahui' lahuë' Dios

(Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús.

² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rRNA: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'.

³ Yugu' bönni' yudo' fariseo na', en ia'zícá'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zián luzuí ca na' nalëbiguequinë' tunë', biti' ca' tahuë'.

⁴ Cate' tu'dxinë' röjö'ugaquië' lu yë'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Ziánrö ca' tunë', yugu' le nalëbiguequinë' tunë'. Caní ta'guibë' zxiga' yó'óna, en yugu' zxiga' guíë, en yugu' le táti'në'.

⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yóta bití' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libí'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné': Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Ní'ti'sö naca yól-la' ba ta'gu'ë neda' tu' tu'sëdinë' le ta'nná bë' bönni', calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönni'.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'.

¹⁰ Moisés gunné' caní: “Ben bal xuz xin'ó.” Gunnë' ca': “Nu ulidza zi' xuzi o xin'ë, guli'gútité nu na'.”

¹¹⁻¹² Libí'ili' rnnali' caní: “Channö nu bönni' guíë' xuzë' o xin'ë: Biti' gaca bi' gunna' queëli', tu' naca Corbán.” (Didza' ni' rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi' gunë' bönni' na' quëgaquië' xuz xin'ë.”

¹³ Caní naca, rucá'anali' cá'asö xtídzë' Dios para gunli' le nulaga loli' runli', yugu' le rudödili' lu ná'agaca xzí'ini xi'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zián na' nacu'ë ni', en rë' légaquië':

—Guli'zë nágali' didza' gu'a, yúgu'tëli', en guli'tséajni'.

¹⁵ Biti' bi' dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios.

¹⁶ Channö zoa nágali', en riyónili', buli'zë nágali'.

¹⁷ Cate' Jesús bulá'alenë' bönni' zián na', guyu'ë tu' yu'u, ate' yugu' bönni' usëda queë' gula'nábinë' Lë' ca naca lë na' bucúdzü'ë didza'.

¹⁸ Jesús gudxë' légaquië':

—¿Riyádzjatsö ca' queëli' yól-la' réajni'i? ¿Naru' cabí réajni'ili', yúgu'të le riyaza nu bönni', bití' gaca gun ga bití' náquië' tsahui' lahuë' Dios?

¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunné' caní Jesús, buluí'inë' rë'u naca dxi'a yúgu'të le rë'aj ráguru'.

²⁰ Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios.

²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yól-la' nutsaga na', en yugu' le ruá' dö'. Tun ga tútië' bönni',

²² en ta'banë', en ta'zë ládxi'gaquië' le dë que luzá'agaquië', en tu'ë dö', en ta'zi' yë'ë, en ta'zxë'ë, en ta'nná zi'ë que luzá'agaquië', en tun ba xzön cuíngaquië', en tunë' le canöz.

²³ Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

Tu nigula izá'a réajlě'ěnu Jesús

(Mt. 15:21-28)

²⁴ Buzě'ě Jesús ni', ate' bidxině' gala' ga nacua' yödzo Tiro, en yödzo Sidón. Guyaziě' tu yu'u ni', en gú'unně' cuntu nu inōzi, pero biti' ca' guca ucachi' cuině'.

²⁵ Tu nigula zóabi' bi'i nigúlado' queěnu, yu'u bö' xihui' lěbi', biyōninu didza' rizě ca naca quee' Jesús, ate' la' bídatěnu ga zoě' Jesús, en buzóa zxíbinu xini'ě.

²⁶ Nigula ni biti' nácanu judío, pero nabábanu bōnachi Sirofenicia. Gúta'yunu lahuě' Jesús ubéajě' bö' xihui' na' yu'u-bi' bi'i nigúlado' queěnu.

²⁷ Ní'irō Jesús gudxě'-nu, rnně':

—Bě' lataj ulu'huōlaj zí'alō nupa nácagaca ca zxf'ini xan yu'u, tu' cabí naca dxi'a ugúaru' yōta quegacabi' bi'i na', en chú'unaru' le lógacaba' bō'cu'do'.

²⁸ Bubí'inu didza' nigula na', gúdxinu Jesús:

—Ōn, Xan, pero yugu' bō'cu'do' nacua'aba' zxani ga tágubi', táguba' le bizxaj tu'huōxaj ga na' tágubi'.

²⁹ Ní'irō Jesús gudxě'-nu, rnně':

—Tu' gunnó' caní, huáca huōaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinnu lídxinu, bilé'enu-bi' bi'i nigúlado' queěnu na', dēbi' lu da'a, en chinurúaj bö' xihui' na' guyú'u lěbi'.

Jesús ruúně' tu bōnni' nacōdzuě', en biti' gaca inně'

³¹ Burúajě' Jesús lataj na' nababa yödzo Tiro, ate' gudödě' gapa dē yödzo Sidón, en yugu' yödzo Decápolis, ate' bidxině' ra' nísado' lu xiyú Galilea.

³² Bōnachi ni' dujuá'gaca tuě' bōnni' nacōdzuě', en biti' raca inně' ga zoě' Jesús, ate' ta'ta'yu lahuě' Jesús ixóa nē'ě lě'.

³³ Jesús bubéajě' lě' tsólá'alō lād jagaca bōnachi na', ate' buně'ě xibōn nē'ě yeru náguiě' bōnni' na'. Gurú'uně' zxōna'do', en gudaně' lúdxě'ě.

³⁴ Ní'irō buyúě' lúzxibálō, en gunně' lúdxě'ě, rnně':

—Efata.

Didza' hebreo ni rnna lu didza' xidza': Guyalaj.

³⁵ La' bōáljatě náguiě', en la' bugúítjatě lúdxě'ě, en gunně'tě' dxí'ado'.

³⁶ Jesús gunná bé'eně' légaquiě' cuntu nu ilé' ca', pero tsca gunná bé'eně' légaquiě', bulu'zětě'rě' ca' didza' que lě na' beně'.

³⁷ Bulu'bánnině, ta'nně':

—Tsáhui'do' runě' yúgu'tě. Runě' ga tu'yōni nupa gulaca cōdzu, en ga tuí'i didza' nupa biti' guca ila'nně.

8

Rugahuě' Jesús zíanrō ca choá' gayuá' bōnachi

(Mt. 15:32-39)

¹ Yugu' dza na' bulu'dubi bōnachi zían ga zoě' Jesús. Tu' cabí dē le ilágugaca, Jesús bulidzě' bōnni' usēda quee', ate' bē'leně' légaquiě' didza'.

² Gudxě' légaquiě':

—Ruhuechi' lādxa'a bōnachi zían ni tu' chinaca tsonna dza nacua'len neda' ni, en biti' dē le ilágugaca.

³ Channō usōl-la'a léguequi lídxigaca ta'dunsō ca', huala'cuídi' la' nōza, tu' zá'gaca zi'tu' bál-lagaca.

⁴ Bulu'bi'ě didza' bōnni' usēda quee', tē' Lě':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

⁶ Ní'irö Jesús gunná bé'enë' bönachi zían na' ila'bö' lu yu. Gudélé'ë gadxi yöta xtila na', ate' gudxë' Dios: "Xclenu'." Ní'irö buzuzxjë' léguequi, en bë'ë quégaquië' bönni' usëda queë' para ila'guisië' lógaca bönachi zían na'.

⁷ Guta' ca' quégaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légacaba' lógaca bönachi.

⁸ Gulagu yúgu'të bönachi na', en bulu'huö'la. Ní'irö bulu'tubë' le bizxaj nagá'anagaca, ate' gula'lí idú gadxi ga'böra.

⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca,

¹⁰ ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulë'ënnë' ila'zi' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá.

¹² Gunnëda' ládxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', biti' ca' ilé'eli' tu le naca bë' za' yehua' yubá.

¹³ Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsölá'a nísado'.

Le tu'sëdinë' bönni' yudo' naca ca cúa zi que yöta xtila

(Mt. 16:5-12)

¹⁴ Gulal-la ládxí'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'.

¹⁵ Ní'irö Jesús buzéajni'inë' légaquië', rnnë':

—Buli'yútsöca' queéli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

¹⁶ Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷ Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsö zidi icja ládxí'do'oli'?

¹⁸ ¿Zóatsö guiöj loli', en biti' rilé'eli', en zóatsö guídi nágali', en biti' riyönili'? ¿Naru' cabí röjnétseli'?

¹⁹ Cate' ni' buzuzxja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulilí' le bizxaj butúbili'?

Gula'nnë':

—Chinnu.

²⁰ Gunnë' ca' Jesús:

—Cate' ni' buzuzxja' gadxi yöta xtila, ate' gulagu choá' gayuá' bönachi, ¿bál-laxi ga'böra bulilí' le bizxaj butúbili'?

Gula'nnë':

—Gadxi.

²¹ Ní'irö Jesús gudxë' légaquië':

—¿Naru' cabí réajni'itseli' na'a, bē'a didza' que le tu'sēdinē' bōnni' na'?

Jesús ruúnē' bōnni' Betsaida nachul-la lahuē'

²² Cate' Jesús, en bōnni' dá'gaquiē' Lē' bila'dxinē' yōdzō Betsaida, bila'dxín ga zoē' Jesús nupa dujuá'gaquiē' queē' tu bōnni' nachul-la lahuē'. Ta'tá'yuē' lahuē' canē' bōnni' na'.

²³ Jesús gudélē'ē' nē'ē' bōnni' na' nachul-la lahuē', ate' guchē'ē' lē' ní'ilō' ra' yōdzō. Ní' budxíē' zxōna' guiōj lahuē', en guxóa nē'ē' lē'. Ní'irō gunábinē' lē', rnnē':

—¿Ba rilé'enu' lati'?

²⁴ Buyúē' bōnni' na' nachul-la lahuē', rnnē':

—Rilé'egacada' bōnachi, nalá'gaca ca yugu' yaga, pero ta'dá bōnachi na'.

²⁵ Leyúbölō guxóa nē'ē' Jesús guiōj lahuē', ate' buyúdē'ē' bōnni' na' nachul-la lahuē', ate' bōácate' dxí'ado' guiōj lahuē'. Na'a rilé'enē' dxí'ado' yúgu'tē.

²⁶ Ní'irō Jesús gusól-lē'ē' lē' lidxē', rnnē':

—Biti' tsōjdōdu' lahuí' yōdzō, en cuntu nu guío' le bena' nu zoa lu yōdzō ni.

Rnnē' Pedro: "Jesús náquiē' Cristo"

(Mt. 16:13-20; Lc. 9:18-21)

²⁷ Gudōdi na', bulu'zē'ē' Jesús, en yugu' bōnni' usēda queē' ní', ate' gula'dōdē' yugu' yōdzōdo' nabábagaca Cesarea, ga na' rinná bē'ē' Filipo. Tsanni ní' yú'ugaquiē' nōza, Jesús rinabi yudxē' yugu' bōnni' usēda queē', rnnē':

—¿Nuzxi ta'nná bōnachi naca'?

²⁸ Bulu'bi'ē' didza', ta'nnē':

—Ta'nná bal-la bōnachi nacu' Juan, bōnni' buquilē' bōnachi nisa. Ta'nná ia'bal-la nacu' Elías, bōnni' bē'ē' didza' uláz queē' Dios dza ni'te. Ta'nná ia'bal-la nacu' bōnni' yúbölō bē'ē' didza' uláz queē' Dios dza ni'te.

²⁹ Ní'irō Jesús gunábinē' légaquiē', rnnē':

—Nazxi libí'ili', ¿nuzxi rnnali' naca'?

Bubi'ē' didza' Pedro, rnnē':

—Li' nacu' Cristo.

³⁰ Ní'irō Jesús gunná bé'enē' légaquiē' cuntu nu ulu'siyōnnē' Nu náquiē'.

Rigu'xjō'ē' Jesús ca si' ilútiē' Lē'

(Mt. 16:21-28; Lc. 9:22-27)

³¹ Ní'irō gusí lahuē' Jesús rusēdinē' bōnni' dá'gaquiē' Lē', rnnē':

—Run bayudxi qui'í saca'a neda', Bōnni' Guljē' Bōnachi. Bōnni' gula tu'zéajni'inē', en yugu' bixúz unná bē', en bōnni' yudo' tu'sēdinē' ulu'zōé' neda' tsólá'alō. Ilútiē' neda', pero cate' gaca tsonna dza ubana'.

³² Yálajsō bē'lenē' légaquiē' didza' ni. Ní'irō Pedro guchē'ē' Jesús tsólá'alō, en gusí lahuē' ridil-lē' lē' didza'.

³³ Buécjē' Jesús, en buyúē' ia'zícá'rē' bōnni' usēda queē', ate' buzenē' bach Pedro, rnnē':

—Gucuita ga zoa'. Nacu' ca Satanás, tu' xihui'. Le rizá' ládxi'u bití' za' lu nē'ē' Dios, pero ca ta'zá' ládxi'gaca bōnachi naca.

³⁴ Ní'irō Jesús bulidzē' yugu' bōnni' usēda queē', enca' bōnachi nacua' ní', en gudxē' légaquiē':

—Channō rē'enē' nu bōnni' tē'ē' neda', ral-la' uzóē' tsólá'alō le rē'ēni quézínē', en gáquiē' ca tu bōnni' sa'yéajē' sōjtē'ē' lē'e yaga cruz, ate' ní'irō huáca tē'ē' neda'.

³⁵ Nu bönni' ruí'ida' ládxë'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'.

³⁶ ¿Naru' uzi'tsë' xibë tu bönni' channö utubë' yúgu'të le dë yödzölió ni, pero uniti cuinë'?

³⁷ Biti' bi gaca unödzjë' tu bönni' le huóá'ui cuinë'.

³⁸ Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacué' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu guí'a sibi. Ni' bidzá'a ca riná' lahuë' Jesús lógaquië' yonnë' na'.

³ Guyëpi yösa bení'lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'.

⁴ Bulu'luí'i lógaquië' Elías, en Moisés, tuí'ilenë' Jesús didza'.

⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí'nözinë' bi na' rnnë', tu' tádxinë' bönni' usëda queë' Jesús na'.

⁷ Ní'irö gurö'ö böaj le gulú'u zxul-la légaquië', ate' biyön chi'i nu ruí' didza' lu böaj na', rnna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

⁸ La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

⁹ Tsanni ni' yú'ugaquië' nöza, tu'dínnië' lu guí'a sibi na', Jesús gunná bé'enë' légaquië' cuntú nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi.

¹⁰ Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunné' ubanë' lu yöl-la' guti.

¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guidé' Cristo?

¹² Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rnna run bayudxi qui'i sáquë'ë Bönni' Guljë' Bönachi, ate' cá'asö ulu'cá'ana bönachi Lë'?

¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

14 Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lë'enë' nacua' bönachi zián ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'.

15 Cate' bönachi zián na' bila'lë'e Jesús, bulu'bani, en carelô zá'gaca ga na' zë'ë, dijódxigaca Lë': "Padiux."

16 Ní'irô Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

17 Bubi'ë didza' tu bönni' nútsë'ë ladaj bönachi zián na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'.

18 Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítibi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zëqui'në'.

19 Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libi'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

20 Djujá'agaquië'-bi' ga na' zoë' Jesús. Cate' bö' xihui' na' bil'é Lë', la' buxízitë lëbi'. Gudzô'öbi' lu yu, ate' burixi butula lëbi', ate' bidxía bidxina' zidi' ruá'abi'.

21 Ní'irô Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ní' nácátëbi' bí'ido' ré'ebi' caní.

22 Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

23 Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

24 La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

25 Cate' bil'éenë' Jesús zá'gaca bönachi zián, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bí'tirö tsu'u lëbi'.

26 Guródxí'a bö' xihui' na', en burixi butúlada' bi'i na'. Ní'irô burúajtë, en bucá'ana bi'i na' ca bi'i nati cázabi'. Ca' naca, gulu'i didza' bönachi zián ni', ta'nná:

—Chinátibi'.

27 Ní'irô Jesús gudélë'ë ná'abi', en buchisë'-bi', ate' guzuíbi' bi'i na'.

28 Ní'irô guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

29 Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús riguáxjö'ë leyúbölö ca si' ilútië' Lë'

(Mt. 17:22-23; Lc. 9:43-45)

30 Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesús nu inózi ga na' zoë'

31 tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tódi gátia', cate' gaca tsonna dza ubana'.

³² Biti' gula'yéajni'inë' didza' ni rë' légaquië', ate' tu' tádxinë', bití' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irö Jesús, en bönni' dá'gaquië' Lë' bila'dxinë' yödzo Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilôgaquië' gáquië' bönni' lo.

³⁵ Ní'irö gurö'ë Jesús, en bulidzë' idxinnutë' bönni' usëda queë'. Rë' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'téli'.

³⁶ Ní'irö Jesús gudélë'ë-bi' tubi' bí'ido', en buzöë'-bi' gatsaj láhui'lö ga na' nacu'ë. Ni' runidë'-bi', rë' légaquië':

³⁷ —Nu bönni' si' lu në'ë tu' bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

Nu bití' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bítirö gunë' ca', tu' cabí dë'ë rë'u.

³⁹ Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' innë' zi'ë quia'.

⁴⁰ Caní naca, nu bití' ridá'baga' rë'u, rácalen nu na' rë'u.

⁴¹ Núti'tës nu gunna queëli' tu zxíga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queëru' gunru' ga nu gun dul-la'

(Mt. 18:6-9; Lc. 17:1-2)

⁴² Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'.

⁴³ Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopa no'o, ate' tsöjtsáziu' lu guí' gabila, ga ni' bití' ulu guí' que.

⁴⁴ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

⁴⁵ Lëscá' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopa ni'u, ate' tsöjtsáziu' lu guí' gabila, ga ni' bití' ulu guí' que.

⁴⁶ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

⁴⁷ Lësca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bē'ē Dios zoa tuz guiöj lo', caléga zoa chopa guiöj lo', ate' tsöjtsáziu' lu guí' gabila.

⁴⁸ Lataj ní' bití' ilátiba' buzuga' yú'ugacaba' nupa tsöjcuá' ní', ate' guí' na' bití' ca' ulu.

⁴⁹ 'Ruxi'iru' bēla' zödi', en rugála'ru' le ra' guí', para cabí gaca ditaj. Lē ni rusedi rē'u ca ulu'huóaca dxi'a yúgu'tē bönachi. Lësca' caní, rē'enē' Dios izxí'i zödi' yúgu'tē bōa' bēdxido' tu'zégui'gaquiē'-ba' lu bucugu lá'ayi queē'.

⁵⁰ Dxi'a naca zödi', pero channö iníti yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxi'ado' tuli' len ia'tuli'.

10

Rusēdinē' Jesús que nu rulá' yöl-la' nutsaga na'

(Mt. 19:1-12; Lc. 16:18)

¹ Buzē'ē Jesús yödzo Capernaum, ate' guyijē' luyú Judea, en gudödē' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoē', ate' leyúbölö busēdinē' légaquiē' ca run cazē'.

² Ní'irö bila'dxinē' bönni' yudo' fariseo ga zoē' Jesús, ate' té'ennē' ilunē' ga bi innē' Jesús para gaca ulu'zéguiē' Lē didza'. Gula'nábinē' Lē, ta'nnē':
—¿Dē lataj bönni' nutsaga nē'ē usanē'-nu nigula queē'?

³ Bubi'ē didza' Jesús, rnnē':

—¿Bizxi gunná bé'enē' Moisés libí'ili'?

⁴ Gula'nnē':

—Moisés bē'ē lataj nu bönni' uzúajē' lu guichi le rnna rulá'alēnē'-nu nigula queē' na', ate' ní'irö usanē'-nu.

⁵ Bubi'ē didza' Jesús, rnnē':

—Gunná bé'enē' Moisés libí'ili' caní tu' naca zidi icja lādxi'do'oli',

⁶ pero cate' gusí lo rata' yödžolió, Dios benē' légaquiē' bönni', en nigula.

⁷ Gunnē': "Que lē ni na' ucá'anē' bönni' xuz xinē'ē, en tsöjsóalenē'-nu nigula queē',

⁸ ate' chopē' ni ulu'huóaqiē' ca tuz bönachi." Que lē ni na' bítirö nácagaquiē' chopē' pero tuz chinácagaquiē'.

⁹ Que lē ni na' ca', nu naca bönachi bití' ral-la' ulá'a nupa na' chin-utságuiē' Dios.

¹⁰ Cate' gula'yáziē' yu'u, gula'nabi yúdxinē' bönni' usēda queē' Jesús ca naca didza' na' bē'ē.

¹¹ Jesús gudxē' légaquiē':

—Núti'tēs bönni' ulá'alēnē'-nu nigula queē', en utsaga ná'alēnē'-nu nigula yúbölö, runē' dul-la' le riguitsaj xibá que yöl-la' nutsaga na' tu' rusubáguē'ē-nu dul-la' nigula na' guzóalenē'-nu zí'alö.

¹² Lësca' caní channö tu nigula nutsaga ná'lennu bönni' usannu-nē', en sí'inu-nē' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuē'ē-bi' yugu' bí'ido'

(Mt. 19:13-15; Lc. 18:15-17)

¹³ Ní'irö bila'dxin bönachi ga zoē' Jesús dujuá'gaquiē' bí'ido' quéguequi. Té'eni ixóa nē'ē légacabi', ate' gula'sí lógaquiē' bönni' usēda queē' Jesús ta'dil-la dídza'gaquiē' nupa na' dujuá'agaca légacabi'.

¹⁴ Cate' bilé'enē' Jesús lē ni, gulēnē' légaquiē', en gunnē':

—Guli'güü'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bē'ē Dios.

¹⁵ Le nácatē rea' libí'ili': Nu cabí'si' lu nē'e le rinná bē'ē Dios ca runbi' tu bí'ido', bití' ca' tsaza ga ni' rinná bē'ē.

¹⁶ Ní'irō Jesús bunidē'-bi' yugu' bí'ido' na'. Guxóa nē'ē lé'gcabi', en bulidza tsáhuē'ē-bi'.

Bönni' cuidi' napē' yöl-la' tsahui'

(Mt. 19:16-30; Lc. 18:18-30)

¹⁷ Cate' bu'ē Jesús nōza, carelō bidē' tu bönni', en buzóa zxibē' lahuē' Jesús, en gunábinē' Lē', rnnē':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸ Jesús gudxē' lē':

—¿Bizx que ru'u neda' didza', rnno': "Idú dxi'a"? Cuntu nu bönni' náquiē' idú dxi'a. Tuzē' Dios náquiē' idú dxi'a.

¹⁹ Chinōz quézinu' yugu' le gunná bē'ē Dios, gunnē':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácate'.

Biti' ucáchi'lanu'.

Ben bal xuz xinó'o.

²⁰ Bubi'ē didza' bönni' na', rē' Jesús:

—Bönni' Usedi, yúgu'tē lē' ni run caza' cate' ni' nácatea' bí'ido'.

²¹ Len yöl-la' dxi'i ladxí' queē', Jesús buyúē' lē', rnnē':

—Tu le riyadzaj quiu'. Guyéaj, yōjēti' yúgu'tē le dē quiu', en bunōdzaj quégaca bönachi yechi' lē' na' sí'u, ate' gata' quiu' yöl-la' tsahui' yehua' yubá. Ní'irō huōdu' quia', gacu' ca tu bönni' sa'yéajē' sōjtē'ē lē'e yaga cruz, ate' to'o neda'.

²² Cate' biyōnnē' didza' ni, bu'innē', ate' sōhuōjē' risēbi ládxi'ē tu' dēda' yöl-la' tsahui' queē'.

²³ Ní'irō buyúē' Jesús gásibi'ilē', en gudxē' yugu' bönni' usēda queē':

—Böniga naca ila'yaza nupa ta'lē'e yöl-la' tsahui' ga rinná bē'ē Dios.

²⁴ Bulu'bánnē' bönni' usēda queē' ca naca xtídzē'ē, ate' leyúbölō Jesús gudxē' légaquiē':

—Libi'ili', xzí'ina'do', böniga naca ila'yáziē' bönni' tu'zxōni ládxi'gaquiē' yöl-la' tsahui' quégaquiē' ga rinná bē'ē Dios.

²⁵ Nácáro böniga tsáziē' nu bönni' ril'é'nenē' yöl-la' tsahui' ga rinná bē'ē Dios, ca tōdiba' bōa' ta'bía-ba' bönachi lu nagui yōtsi'.

²⁶ Cate' bila'yōnnē' didza' ni, bulu'bánnitērōnē' ca'. Ta'nnē' la' lé'gcasē':

—¿Nuzxi caz gaca ulá, channō?

²⁷ Buyúē' Jesús légaquiē', rnnē':

—Biti' gaca gun bönachi lē' ni, pero huáquiē' Dios, tu' rizéqui'nē' Dios yúgu'tē.

²⁸ Ní'irō Pedro gudxē' Lē':

—Xan, netu' nucá'anatu' yúgu'tē, en dá'atu' Li'.

²⁹ Bubi'ē didza' Jesús, rnnē':

—Le nácatē rea' libí'ili', nu bönni' ucá'anē' lidxē', o bōchē'ē, o zanē', o xuzē', o xinē'ē, o nigula queē', o yugu' xzí'inē', o xiyúē', tu' runē' xichina' o tu' runē' libán que didza' dxi'a quia',

³⁰ bönni' ni huazí' queē' ia'tú gayuá'tērō ca' dza ni zóaru' na'a, yugu' lidxē', en yugu' bōchē'ē, en yugu' zanē', en yugu' xinē'ē, en yugu' xzí'inē',

en yugu' xiyüë', enca' yugu' le ila' bía ládxi' gaca bönachi lë', ate' lu yödzülió si' za', gata' yöl-la' na' bán idú queë'.

³¹ Zián nupa nácgaca lo na'a, ilaca cuíd'sö ni', ate' nupa nácgaca cuíd'sö na'a, ilaca lo ni'.

Leyúbölö rigúxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'ugaquië' nōza, ta'benë' sōjáquië' Jerusalén, nanōruë' Jesús lógaquië' bōnni' usēda queë'. Nanítiguequinë', en lu yöl-la' rádxisō sōjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ílenë' légaquië' didza' ca naca le ral-la' gaca queë'.

³³ Rnnë':

—Rilë'e quezili' ribenru' zéajru' Jerusalén ga ni' zoa nu udödi neda', Bōnni' Guljë' Bönachi, lu ná'agaquië' bixúz unná bē', en lu ná'agaquië' bōnni' yudo' usedi, ate' chúguië' quia' gátia', en ulu'dödë' neda' lu ná'agaquië' bōnni' zi'tu'.

³⁴ Bōnni' na' ulu'titjë' neda', en ilúndë'ë neda' zi'. Ulu'chejë' neda' zxōna'. Ní'irō ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

³⁵ Ní'irō gula'bigüë'ë Jacobo, en Juan, zxí'inë' Zebedeo, lahuë' Jesús, en tē' Lë':

—Bōnni' Usedi, rē'ēnitu' gunu' queëtu' le inábatu'.

³⁶ Jesús gudxë' légaquië':

—¿Bizxi rē'ēnili' guna' queëli'?

³⁷ Gulë' Lë':

—Cate' idxín dza cō'u ga inná bē'u, ben ga cō'ōtu' tutu' cuitu' ibëla, en ia'tutu' cuitu' yögöla.

³⁸ Ní'irō Jesús gudxë' légaquië':

—Biti' nōzili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa,

⁴⁰ pero biti' dë lu na'a cōa' nu cuía cuita' ibëla, en nu cuía cuita' yögöla. Dios unödzejë' quégaquië' bōnni' chinupë'ë quégaquië' yugu' lataj na'.

⁴¹ Cate' bila'yōnnë' ia'chíë' bōnni' usēda queë' Jesús didza' ni, gula'lenë' Jacobo, en Juan na'.

⁴² Ní'irō Jesús bulidzë' légaquië', rnnë':

—Nöz quezili' ca tun nupa ta'nná be'e yugu' yödzü, tu'zenë' bach bönachi, ate' nupa nácgaca lo ladjagaquië' ta'nná be'e luzë'eguequi.

⁴³ Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zica'röli',

⁴⁴ ate' nütí'tëslöli' nu guë'ëni gaca lo ral-la' gaca ca bōnni' huen dxin tsaz queëli' yúgu'tëli'.

⁴⁵ Caní ral-la' gunli' tu' bida' ni neda', Bōnni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na' bán quia' le huóá'uída' bönachi zián.

Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zián. Ra' nöza ni' rö'ë tu bönni' nachul-la lahuë', lë' Bartimeo, xzí'inë' Timeo. Rinabë' nu bi gúnnašö queë'.

⁴⁷ Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—Jesús, xzí'ini xi'sóë' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¡Xzí'ini xi'sóë' David! ¡Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxu'u! ¡Guyaschi! ¡Rulidzë' li'!

⁵⁰ Ní'irö gurú'unë' tsólá'aló lari' naxóa yenë'. La' guyásatë', en bidë' ga na' zoë' Jesús.

⁵¹ Jesús gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huóálaj guiöj lahua'.

⁵² Jesús gudxë' lë':

—Böaj lidxu'. Chinuhuóácu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

11

Riyazië' Jesús yödzö Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusöl-lë'ë chopë' bönni' usëda queë',

² en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribáni lëba'. Guli'sedxi-ba', en guli'ché'-ba' quia' ni.

³ Channö nu bi guië libí'ili' tu' runli' lë ni, guli'guië nu na': "Xanru' riquinnë'-ba', ate' la' usöl-la'të'-ba' quiu'."

⁴ Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza ló'a, ate' gula'sedxë'-ba'.

⁵ Nupa nacua' ni' tē légaquië':

—¿Bizxi ni' runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj.

⁷ Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cüdzu'ba', ate' Jesús gudxë'-ba'.

⁸ Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanörugaca lahuë' Jesús, en nupa na' zá'gaca cúdzu'lë' tuí'i zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'!

¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyúë' yúgu'të le nacua' idú gásibi'llo ní', burúajë' zaca' yödzo Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení ia'tú dza, ate' tu'rúajë' Jesús, en yugu' bönni' dá'gaquië' Lë' yödzo Betania, ridunë' Jesús.

¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxaquië' le ribía. Xilágui'sö dxía tu' cabí ridxini dza cuía.

¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzo Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí zá'a, enca' yugu' ga ta'bö' nupa tuti' yugu' gu'dödo'.

¹⁶ Biti' ca' bë'ë lataj nu bi guá', uzóa nöza ga naca lö'a yudo'.

¹⁷ Busëdinë' nupa nacua' ni', rnnë':

—Nazúaj lu guichi lá'ayi, rna: “Lidxa' si'i le, yu'u ga bönachi idütë yödzölió ulu'lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusëdinë' Jesús.

¹⁹ Cate' chiridzö' burúajë' Jesús lu yödzo na'.

Ribidxi yaga higo bulidza zi'ë Jesús

(Mt. 21:20-22)

²⁰ Cate' za' rení ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú lú.

²¹ Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios.

²³ Le nácatë rea' libí'ili', channö nu bönni' guíë' guí'ado' ni: “Gucuíta ni, yöjsóa lu nísado'”, en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca.

²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tseajlë' chibennë' Dios queëli' lë na' rinábali', ate' gunnë' queëli'.

²⁵ Cate' ni' rulídzali'-nè' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'.

²⁶ Channö cabí uniti loli' bönachi, bití' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bē' dē lu nē'ē Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lē' yōjhuōjgaquië' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bönni' yudo' usedi, en bönni' gula tu'zéajni'inē', ga zoë'.

²⁸ Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

²⁹ Bubi'ē didza' Jesús, rē' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni.

³⁰ ¿Nuzxi budödi lu nē'ē Juan uquilé' bönachi nisa? ¿Naru' Dios o bönachi? Guli'nnátsōca'.

³¹ Gula'sí lógaquië' tun xtídza'gaquië' la' légacasē', ta'nnē':

—Channö innaru' Dios gusól-lē'ē lē', guíē' rē'u: “¿Bizx que bití' guyéajlé'ēli' lē'?”

³² ¿Naru' guiétsaru'-nē': Gula'sól-lē'ē bönni' lē'?

Caní ta'zá' ládxi'gaquië' tu' tádxinē' le ilún bönachi zían nacuá' ni' tu' téquiguequi yúgu'tē bönachi na' bē'ē didza' Juan na' uláz queé' Dios.

³³ Que lē ni na' gulé' Jesús:

—Bití' nöztu'.

Ní'irö Jesús gudxē' légaquië':

—Neda' ca' bití' quíxjöi'ida' libí'ili' bi yöl-la' unná bē' dē lu na'a rúnida' yugu' lē ni.

12

Rucúdzu'ē didza' Jesús ca gaca quégaca huen dxin bití' náca gaca tsahui'

(Mt. 21:33-46; Lc. 20:9-19)

¹ Ní'irö gusí lahuë' Jesús rufílenē' yugu' bönni' dá'gaquië' Lē' didza' yugu' le rucúdzu'ē didza', rnnē':

—Guzöé' tu bönni', budē'ē lubá uva zían ga naca lu xiyúé'. Guléquië' lē'a que, en guchō'önē' tu rōga' guiōj ga isié' xisi uva na'. Budxíé' tu yu'u gupa ga naca xitsá' ga nu uyú xiyúé' na'.

'Ní'irö budödē' xiyúé' na' lu ná'agaquië' huen dxin, ila'zi'ē gatsaj huéaj le unödzej, ate' guyijé' yödzo zì'tu'.

² Cate' bidxín dza ulu'chibē' le ribía, gusól-lē'ē-bi' bi'i huen dxin tsōjxí'ibi' lu ná'agaquië' huen dxin na' le ral-la' si'ē xanbi' que le gula'bía lubá uva na'.

³ Ní'irö yugu' huen dxin na' gula'guélé'ē-bi' bi'i na', en gulundē'-bi' zì', ate' bulu'sól-lē'ē-bi' cá'asōbi'.

⁴ Ní'irö bönni' xan luyú na' gusól-lē'ē-bi' ia'tubi' bi'i huen dxin queé', ate' bi'i ni bulu'ladxē'-bi' guiōj. Bulu'lē'ē ícjabi'. Gulu'ē dō' queébi'.

⁵ Ní'irö bönni' xan luyú na' gusól-lē'ē-bi' ca' ia'tubi' bi'i huen dxin queé', ate' bi'i ni gulútiē'-bi'. Gusól-lē'ē-bi' ca' zíanrōbi', ate' bál-labi' gulúngacadē'-bi' zì', en ia'bál-labi' gulútagaquië'-bi'.

⁶ 'Cúnturö nu nagá'ana queë' xan luyú na'. Nagá'anasibi' zxi'iné', ate' nadxí'ide'ené'-bi'. Ga yöjsetë, gusöl-lë'ë-bi' zxi'iné', rnnë': "Ilunë' bal zxi'ina'."

⁷ Ní'irö yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni."

⁸ Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ ¿Naru' cabí nulábanili' lë na' nazúaj lu guichi lá'ayi? Caní rnna:

Guiój na' gula'ru'unë' bönni' tu'cu'ë zö'ö, na'a naca guiój len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóa ta'bö'ë ila'zönë' Jesús tu' téquibe'enë' bucúdu'ë didza' ca naca quégaquië', pero tádxinë' le ilún bönachi zían nacuá' ni', en que lë ni na' bulu'cá'anë' Lë', söhuöjgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'.

¹⁴ Bila'dxinë' bönni' ni ga na' zoë' Jesús, en të' Lë':

—Bönni' Usedi, nözitu' ru'u didza' idútë li. Biti' ruí'i ládxi'u bi ta'nnasö bönachi, tu' cabí ruyusu' le tu'lu'isö cuínguequi bönachi, pero rusédinu' ca nácatë le r'ë'në' Dios ilún bönachi. ¿Ruí'i netu' lataj xibá queë' Moisés quíxaj laztu' le tu'quixjë' uláz queë' César? ¿Naru' uguíxajtu' o bití quíxajtu'?

¹⁵ Réquibe'enë' Jesús tu'ë didza' lu yöl-la' riguílaj ladxí' quégaquië', ate' rë' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

¹⁷ Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bábinë' ca naca didza' bubí'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

¹⁸ Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulé' Jesús, ta'nnë':

¹⁹ —Bönni' Usedi, Moisés nuzúajë' queëru' lu guichi channö gátíë' tu bönni' bití' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alénbi'-nu, en uzóabi' bí'ido' gácabi' bi'i queëbi' böchi'bi'.

²⁰ Gula'cuá'abi' gádxibi' bi'i nácacacabi' böchi'gacabi'. Bi'i huáca na' butsaaga ná'alénbi'-nu nigula, ate' gútibi', cuntú nu zoa bí'ido' queëbi'.

21 Bi'i buropi na' butsaga ná'aleni'-nu nigula uzëbi na', atë' gútibi' ca', cuntu nu zoa bí'ido' queëbi'. Lësca' caní guca queëbi' bi'i bunny.

22 Caní guca, bulu'tsaga ná'aleni'-nu yúgu'tëbi', cuntu nu zoa bí'ido' quégacabi'. Ga yöjsetë, gútinu ca' nigula na'.

23 Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'aleni'-nu igádxitëbi'?

24 Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en bití' nözili' ca naca yöl-la' huáca queë' Dios.

25 Cate' ulu'bán nupa chinátigaca, bití' ca' ulu'tsaga ná'agaquië', atë' yugu' bönni' bití' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá.

26 Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí' didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunnë' caní quégaquië', naca bë' nabángaquië' sal-la' gulátië' zí'alö.

27 Dios náquië' Dios quégaca nupa nabángaca, calëga quégaca nupa nátigaca tsaz. Richíxitéröli'.

Le naca lo le gunná bë'ë Dios

(Mt. 22:34-40)

28 Bidë' ca' tu bönni' yudo' usedi ga zoë' Jesús. Biyönnë' ca na' gulú'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatërö lo ca yúgu'të le gunná bë'ë?

29 Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rnna: "Guli'yöni bönnachi Israel. Xanru' Dios, tuzë' Lë' náquië' Xanru'.

30 Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácatërö lo.

31 Le gunná bë'ë le naca buropi, lëbisö ca naca. Caní rnna: "Ral-la' idxí'inu' luzó'o ca nadxí'i cuinu'." Bití' ca' zoa ia'tú le gunná bë'ë le nácáro lo ca chopá ni gunná bë'ë.

32 Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios.

33 Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácáro lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

34 Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi zxi'ini náquië' Cristo?

(Mt. 22:41-46; Lc. 20:41-44)

35 Cate' ní' rusédinë' Jesús bönnachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxi'ini xi'sóë' David?

³⁶ Lë cazë' David na' bë'ë didza', zóalenë' Dios Bö' Lá'ayi lë', gunnë':

Xanru' Dios gudxë' Xana':

“Gurö'ö cuita lë'a ibëla
cate' gunra' ga ulu'zóa zxíbigaca lo'
nupa bití' ta lé'e Li' dxi'a.”

³⁷ ¿Naru' nácatsë' Cristo xzí'ini xi'sóë' David channö lë' cazë' David na' rnnë' queë' náquië' Xanë'?

Bönachi zían nacua' ni' tu'zë' nágagaca Lë' gula'yaza ládxi'gaca didza' ni.

Jesús ruzéqui'ë didza' bönni' yudo' tu'sëdinë'

(Mt. 23:1-36; Lc. 11:37-54; 20:45-47)

³⁸ Ni' rusëdinë' Jesús yugu' bönni' dá'gaquië' Lë', rë' légaquië':

—Guli'gún chi'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi.

³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' t'ë'aj tahuë'.

⁴⁰ Rugúagaquië' lídxigacanu nigula uzëbi, en para ulu'lu'isö tsahui' cúngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

Le bunödžjanu tu nigula uzëbido' queë' Dios

(Lc. 21:1-4)

⁴¹ Tsanni ni' rë'ë Jesús chila yudo' ga zoa gu'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ina. Dumí zían ta'gu'ë bönni' dë' yöl-la' tsahui' quégaquië'.

⁴² Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os.

⁴³ Ní'irö bulidzë' Jesús yugu' bönni' usëda queë', en rë' légaquië':

—Le nácate' rea' libí'ili', nigula yechi' uzëbido' ni' gulú'urönu ca yúgu'të nupa bi ta'gú'u lu gu'ina que yudo'.

⁴⁴ Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idütë la's dui tsca le dësö queënu, le ral-la' gáhuinu.

13

Rigúxjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

² Bubi'ë didza' Jesús, rë' lë':

—Rilë'enu' yugu' yu'u zxön ni, pero bití' ca' ugá'ana guiöj lahui luzë'e ni, tu' ulu'quínnaj bönachi léguequi.

Le ilaca bë' cate' si' údxi que yödžölió

(Mt. 24:3-28; Lc. 21:7-24; 17:22-24)

³ Ní'irö yójáquië' Jesús, en yugu' bönni' dá'gaquië' Lë' lu Gu'á Yaga Olivo, gu'á na' dë' ca dódilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjö'i' netu' bátaxi ilaca lë' ni. ¿Bizxi gaca bë' chizóa ilaca yúgu'të lë' ni?

⁵ Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'.

⁶ Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'z'í' yé'enë' bönachi zían.

⁷ Ní'irö cate' yönili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi.

⁸ Tu yödzo tíl-lalen ia'tú yödzo, en tu ga nu rinná bë' tsöjtíl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'guí'i ila'zaca' bönachi dza ní'.

⁹ Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzo z'í'tu'. Ilunë' caní queéli' tu' dá'ali' neda', pero gunli' ba nalí quia' neda' ní'.

¹⁰ Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzoilió.

¹¹ Cate' ní' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'í' ládxi'li' bizxi innali'. La' dza ní'isö Dios gunnë' queéli' didza' gü'í'li', ate' lë ni innali'. Cate' ní' gü'í'li' didza', calëga libí'isili' na' innali', pero Dios Bö' Lá'ayi innë'.

¹² Ulu'dödi bönachi la' böchi'gacasö lu ná'agaquië' bönni' ilútië' lëgaquië'. Yugu' bönni' nacuá'abi' bi'i quëgaquië' ulu'dödë' la' zxi'inigaca cazë' ca', ate' zxi'inigachië' na' ulu'dödibi' la' xuz xiná'agaca cázabi' lu ná'agaquië' bönni' ilútië' lëgaquië'.

¹³ Yúgu'të bönachi ulu'zóa libí'ili' tsölá'alö tu' dá'ali' neda', pero nálöli' guá' ilenli' lë na' ga idxinrö dza údxi, uláli'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ní' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacuá' luyú Judea, en tsöjaca gapa naca lu gu'ado'.

¹⁵ Nu zoa ícjo'olö dza ní' ral-la' izxúnnajtë, en biti' huötaj zxan yu'u para tsöjzxi' bi dë que lu yu'u.

¹⁶ Nu zoa la' guixi' ral-la' izxúnnajtë, en biti' huóaj tsöjzxi' lari' rixóa yeni.

¹⁷ Bica' bayechi' yugu' nigula dza ní' nuá'agacanu-bi' bí'ido', enca' nigula tu'gádxinu-bi' bí'ido'.

¹⁸ Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'.

¹⁹ Yugu' dza ní' ila'guí'i ila'zaca'rö bönachi ca le guca zí'atëlö cate' si' guta' yödzoilió le benë' Dios ga ridxintë na'a dza, ate' dza zá'gaca biti' gaca caní.

²⁰ La'tu' cabí nunë' Dios ga ulu'huóaca nabábasö yugu' dza ní', cuntu nu ulá, pero tu' nadxi'inë' nupa chigurö cazë', chinunë' queë' gunë' ga ulu'huóaca nabábasö yugu' dza ní'.

²¹ Na'a, channö nu guíe libí'ili': "Buli'yútsöca, ni zoë' Cristo", o inná: "Buli'yútsöca, ní' zoë'", biti' ca' tséajlë'ëli' nu na'.

²² Ila'lá' lahuë' zían bönni' ila'z'í' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'lu'inë' le ilaca bë', en ilunë' yugu' yöl-la' huáca zxon. Huala'z'í' yé'enë' ca' nupa gurö cazë' Dios channö ila'zéqui'në'.

²³ Ní'irō libí'ili', guli'sóa ban ladxi'. Yúgu'tè chigudxa' libí'ili' zí'atëlō ca gaca.

Ca huödë' Bönmi' Guljë' Bönachi
(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tōdi gaca dza na' ila'guí'i ila'zaca' caní bönachi, ichul-la gubidza, en bití' cu'u bení' beo'.

²⁵ Ila'guínnaj bōlaj lúzxiba, en ila'zxizi le nál-lagaca nalá'gaca lúzxiba na'.

²⁶ Ní'irō ila'lé'eni neda', Bönmi' Guljë' Bönachi, za'a lu bōaj lúzxiba, napa' yöl-la' huáca xzōn, en yöl-la' bení' quia'.

²⁷ Isól-la'gaca'-në' gubáz lá'ayi quia', ate' ulu'tubë' bönachi gurō caza' quia' nacuá' idapa la'a yōdzōlió, ga naguéla'tè luyú bidxi, ga ridxintë ga naguela' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e huë'enido', en rubía xilagui' yulu, nōzili' chizóa idxín beo' cusubá.

²⁹ Lësca' caní, cate' ilé'eli' taca lë ni, inōzili' chizóa idxín dza údxi na', en chiridzaga lo.

³⁰ Le nácatë rea' libí'ili', yúgu'tè lë ni ilaca zí'atëlō ca ilátigaca nupa nacuá' dza na'.

³¹ Huadōdi que lúzxiba, en que luyú ni, pero xtídza'a catu caz tōdi que.

³² 'Cate' idxín dza ni' o rëla ni', cuntu nu nōzi. Bití' nōzguequinë' gubáz lá'ayi nacu'ë yehua' yubá, en bití' nōzda' neda', Xzí'inë' Dios. Tuzë' Dios Xuz nōzinë'.

³³ Que lë ni na', buli'subán lādxi'li'. Guli'sóa sina', en buli'lidzë' Dios tu' cabí nōzili' bizxi dza gaca lë ni.

³⁴ Gaca ca raca cate' sa'yéajë' zì'tu' tu bönmi'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chí' ga nu riyaza.

³⁵ Guli'sóa libí'ili' ban ladxi' tu' cabí nōzili' bátaxi huödë' xan yu'u, cate' chiridzō', o gatsaj lahui' yëla, o cate' ribōdxiba' bōra, o zílado'.

³⁶ Guli'gún caní, para cabí idixáquië' libí'ili' rásili' channō huödë' tsárido'os.

³⁷ Lë ni rea' libí'ili', rea' ca' yúgu'të bönachi: Guli'sóa ban ladxi'.

14

Tun xtídza'gaquië' bönmi' yudo' ila'zönë' Jesús
(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönmi' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yōta xtila bití' nazí' cúa zi que. Ta'zóa ta'bō'ë yugu' bixúz unná bë', en bönmi' yudo' tu'sëdinë' ila'zönë' Jesús bagáchi'sō para ilútië' Lë'.

² Ta'nnë':

—Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús
(Mt. 26:6-13; Jn. 12:1-8)

³ Zoë' Jesús yōdzō Betania, lu yu'u lidxë' Simón, bönmi' gü'inë' huë' nudzu' rujōdi. Tsanni ni' rō'ë rahuë' Jesús, guyázanu tu nigula, nuá'anu tu bōga'do' néquini guiōj zaca', yudzu le rilá' zxixi que yōj susën lasi idú,

le nazaca' yenni'. Gulá'anu böga'do' na', en gulú'unu le rilá' zxixi na' icjé' Jesús.

⁴ Gula'lélané' bal-lé' bönni' nacu'ë ni'. Ta'nné' la' légacasé':

—¿Bizx que guca ditaj le zxixi na'?

⁵ La'tu' nu guti' lé na', huazí' que ia'lati' ca lázxjaru' que tu iz para nu quisi le quégaca bönnachi yechi'.

Gula'nnédé'ë queénu.

⁶ Ní'irö Jesús bë'ë didza', rnné':

—Guli'güí'i-nu lataj. ¿Bizx que rinné' zí'ili' queénu? Naca dxi'a le bennu quia'.

⁷ Nacuá'lentica'sö bönnachi yechi' libí'ili', en bátati'tës gué'ënilí', huáca gunlí' dxi'a quégaquié', pero neda' bití' sóatica'sa' ga zóalí'.

⁸ Tscá le guxzéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atélö ca igácha'a yeru ba.

⁹ Le nácaté' rea' libí'ili', gátí'tës ga gaca libán que didza' dxi'a quia' idú yödzo'lió, soa nu quixjö' ca' lé ni bennu nigula ni quia'. Caní gaca para nu tsöjné' lénu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajé' Judas Iscariote, bönni' nabábalené' chínnué' na' dá'gaquié' Jesús. Guyijé' ga nacu'ë bixúz unná bë' para udödë' Jesús lu ná'agaquié'.

¹¹ Cate' bila'yönné' xtídzé'ë Judas na', bulu'dzéjané', ate' gula'zí' lu ná'agaquié' ilu'ë lé' dumí. Ní'irö gusí lahué' Judas rizóa ribö'ë udödë' Jesús lu ná'agaquié'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahué' yöta xtila bití' nazí'i cúa zi que, dza na' tutië'-ba' bö'cu' xzila'do' tahué'-ba' dzö' Laní Pascua na', cate' tu'subané' ca bené' Dios busólé' bönnachi judío luyú Egipto. Ní'irö bönni' uséda queé' Jesús gula'nábiné' Lé', ta'nné':

—¿Gazxi ré'ënu' tséajtu' tsöjpa'atu' le gáguru' xtsö' que Laní Pascua?

¹³ Ní'irö Jesús gusöl-lé'ë chopé' bönni' uséda queé', en rë' légaquié':

—Guli'tséaj lu yödzo. Ní' huadzágali' tu bönni' nu'ë tu rö'ö nisa. Guli'tséajlené'.

¹⁴ Ga na' tsázié', guli'guié' xan yu'u na': “Rnné' Bönni' Usedi: ¿Gazxi zoa yu'u ga na' gágulengaca-né' bönni' uséda quia' xtsö' que Laní Pascua?”

¹⁵ Ní'irö uluí'iné' libí'ili' tu yu'u xzön ga naca buropi cuía ga chinabá'a. Bulí'pá'a le gáguru' ní'.

¹⁶ Bila'rúajé' bönni' uséda queé' na', en bila'dxiné' lu yödzo, ate' yöjxáca'gaquié' yúgu'té ca na' chigudxé' légaquié' Jesús. Bulu'pé'ë le ilahué' ní' que Laní Pascua.

¹⁷ Cate' chizá' ral-la, bidxiné' Jesús ní', dzágagaquié' idxínnuté' bönni' uséda queé' Lé'.

¹⁸ Tsanni ní' rö'ögaquié' tahué', bë'ë didza' Jesús, rnné':

—Le nácaté' rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönnachi.

¹⁹ Ní'irö bulu'huí'inné', en gula'sí lógaquié' tu tué' të' Lé':

—¿Naru' neda'?

Ia'túë' ca' gunnë':

—¿Naru' neda'?

²⁰ Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna.

²¹ Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu zxi'ga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le.

²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían.

²⁵ Le nácatë rea' libí'ili', bití'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulú-lë' yöi-la' ba, bila'rúajë' sójáquië' Guí'a Yaga Olivo.

²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rna: "Gutia'-në' uyú bö'cu' zxila', ate' ilásilasiba' bö'cu' zxila' na'."

²⁸ Tödi ubana' lu yöi-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxi'ë.

³⁴ Gudxë' légaquië', rnnë':

—Huati caza' lu yöi-la' risëbi ladxi'. Guli'cöz ni, en guli'ná' yëla.

³⁵ Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáqué'ë dza na'.

³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

37 Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'?

38 Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuidi'li'.

39 Ní'irö sa'yéajë' Jesús leyúbölö, rulidzë' Dios, en la' tuz ca gunné'.

40 Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bi'ë, le ilë' Lë'.

41 Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsa'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'!

42 ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

43 Ni' ru'ë Jesús didza' ni, bidxinë' Judas, bönni' nabábalenë' chinnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasól-la'gaquië' légaquië'.

44 Judas, bönni' na' rudödë' Jesús lu ná'agaquië' chinulu'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

45 Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús.

46 Ní'irö gula'zönë' Jesús, en gula'chë'ë Lë' nadzunë'.

47 Ní'irö tuë' bönni' ni' dë'ë Jesús guléajë' guíë tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'.

48 Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán?

49 Yugu' dza guzóalena' libí'ili' rusëdigacada' bönachi ga naca chila yudo', ate' bití' guzxönli' neda', pero raza caní para gaca le nazúaj lu guichi lá'ayi.

50 Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rizxúnnajbi' tubi' bi'i ra'bán

51 Zóabi' ca' ni' tubi' bi'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi'

52 pero busanbi' lari' na', en xiguídisöbi' buzxúnnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

53 Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi.

54 Pedro yöjnahué' Jesús zí'tu' zí'tu'sö, en guyazië' lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guí'.

55 Yugu' bixúz unná bē' len yúgu'tē bönni' yúlahui' lo bulu'guiljē' tu le ulu'subáguiē' Jesús para gaca ila'chúguiē' queē' gátie' pero biti' bi bulu'dzölinē'.

56 Bönni' zian gula'nnē' queē' Jesús le cabí nácatē, pero biti' yöjlözagaca le gula'nnē' queē'.

57 Ní'irö gula'zuínē' yugu' bönni' gula'nnē' queē' Jesús le cabí nácatē, ta'nnē':

58—Netu' biyönitu' didza' bē'ē bönni' ni, gunnē': "Uquínaja' yudo' ni, lē ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi."

59 Lēscá' lē ni, biti' yöjlözagaca xtída'gaquiē'.

60 Ní'irö guyasē' bixúz lo na' gatsaj láhui'lö bönachi nacua' ni', en gunábinē' Jesús, rnnē':

—¿Naru' cabí rubi'itso' didza'? ¿Bizxi na' ta'nnē' quiu' bönni' ni'?

61 Jesús, dxisö zoē'. Biti' bi didza' rubi'ē. Gunábinē' Lē' leyúbölö bixúz lo na', rnnē':

—¿Naru' nacu' Li' Cristo, Zxí'inē' Dios Lá'ayi?

62 Bubi'ē didza' Jesús, rnnē':

—Naca'. Ilé'eli' neda', Bönni' Guljē' Bönachi, soa' cō'a cuitē' ibēla Dios napa cazē' yöl-la' huáca cate' ni' huöda' lu böaj lúzixiba.

63 Ní'irö bixúz lo na', lu yöl-la' rilé queē' guchözē' lari' nácuē', rnnē':

—¿Núzxirö naquíniru' nu quixjö'?

64 ¿Riyön quézili' rucá'anē' Dios cá'asö len didza' ru'ē! ¿Nacxi rusáca'li' queēli'?

Yúgu'tē' gula'chúguiē' queē' gátie'.

65 Ní'irö gula'sí lógaquiē' bal-lē' tu'chejē' Jesús zxöna'. Bulu'sayjē' lahuē', en gulundē' Lē' zi', ta'nnē':

—Gunnē' yá'atsöca' nuzxi na' bē' Li'.

Yugu' bönni' ni'a nē'ē bixúz lo gula'gápē'ē ru'ē Jesús.

Rnnē' Pedro biti' núnbē'ē Jesús

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoē' Pedro lö'a zxan yu'u, bidxinbi' tubi' bi'i nigula huen dxin queē' bixúz lo na' ga na' zoē'.

67 Cate' bilé'ebi' Pedro, rö'ē rutsē'e cuiné' ra' guí, buyubi' lē', rnnabi':

—Do'o ca' li' Jesús, bönni' Nazaret na'.

68 Gudá'baguiē' Pedro, rnnē':

—Biti' núnbē'a-nē', en biti' nözda' bizxi na' ranno'.

Burúajē' Pedro yöjsöé' ga nu riyaza lö'a. Ní'irö gurödxiba' böra.

69 Buyubi' lē' leyúbölö bi'i nigula huen dxin na', en gusí lobi' rēbi' nupa nacua' ni':

—Bönni' ni dzáguiē' légaquiē'.

70 Leyúbölö gudá'baguiē' Pedro. Ia'lati' gudzé nupa nacua' ni' tē Pedro, ta'nná:

—Le nácatē dzagu' légaquiē', tu' nacu' bönni' Galilea. Yöl-la' ru'isö quiu' didza' naca bē'u, tu' tuz ca ru'ili' didza'.

71 Gusí lahuē' Pedro ruxía dö' cuiné', en ruzötjē' Dios, rnnē':

—Biti' ca' núnbē'a-nē' bönni' na' ru'ili' didza' ca naca queē'.

72 La' gurödxitēba' böra le buropi luzuí. Ní'irö yöjnenē' Pedro didza' na' bē'ē Jesús, gudxē' lē': "Zi'alö cödxiba' böra le buropi luzuí, tsonna luzuí innó' biti' núnbē'u neda'." Cate' yöjnenē' didza' ni, gusí lahuē' ribödxidē'ē.

15

Ridxinë' Jesús lahuë' Pilato, bönni' rinná bē'ë
(Mt. 27:1-2, 11-14; Lc. 23:1-5; Jn. 18:28-38)

¹ Ní' naca zílado', yugu' bixúz unná bē' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bē'ë uláz que yödz Roma.

² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rno'.

³ Yugu' bixúz unná bē' bulu'zéguië' Jesús didza' le zían.

⁴ Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsöca' nagu' cate' xö zían le ta'nnë' quiu'.

⁵ Biti' bi didza' bubí'ë Jesús. Ca' guca, bubábinë' Pilato.

Ta'chúguië' queë' Jesús gátië'
(Mt. 27:15-31; Lc. 23:13-25; Jn. 18:38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guië', núti'tës nu ta'naba.

⁷ Nadzunë' tu bönni' lë' Barrabás lidxi guië', ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'.

⁸ Cate' bila'dxín bönachi zían ní', gula'sí lógaquië' ta'nabë' lahuë' Pilato gunë' quégaquië' ca run cazë'.

⁹ Bubi'ë didza' Pilato, rnnë':

—¿Rë'ënili' usana'-në' queë'li' Bönni' Inná Bé'enë' Bönachi Judío?

¹⁰ Caní gunné' Pilato tu' réquibe'enë' bulu'dödë' yugu' bixúz unná bē' Jesús lu në'ë tu' tu'zxé'enë' Lë'.

¹¹ Yugu' bixúz unná bē' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás.

¹² Ní'irö Pilato gunábinë' légaquië' leyúbölö, rnnë':

—¿Bizxi rë'ënili' guna' queë' bönni' na' ru'íli' lë', Bönni' Inná Bé'enë' Bönachi Judío?

¹³ Gulu'ë zidzaj didza', ta'nnë':

—¡Budë'ë lë'e yaga cruz!

¹⁴ Gunábinë' Pilato légaquië', rnnë':

—¿Bizxi caz dö' nu'ë'?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

¹⁵ Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

¹⁶ Ní'irö yugu' bönni' röjáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ní'.

¹⁷ Bulu'gacuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxië' icjë'.

¹⁸ Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

¹⁹ Gula'guinë' gui icjë', en bulu'chejë' Lë' zxöna'. Bulu'zóa zxi'bigaquië' lahuë', en lu yöl-la' rutitaj gulunë' Lë' bal.

²⁰ Cate' budxi bulu'titjë' Lë', bulu'güë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'ché'ë Lë' ní'ilö yúlahui' na' para tsöjda'gaquië' Lë' lë'e yaga cruz.

Tu'dë'ë Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunë' ga bi'ë tu bönni' Cirene yaga cruz queë' Jesús, ridödisë' ní' suzë'ë la' guixi'. Lë' Simón, xúzgacabi' Alejandro, en Rufo.

²² Gula'ché'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'.

²³ Gulu'ë le guí'jë' Jesús xisi uva nutsi' nöri silá' que yaga mirra, pero Lë' biti' gu'ë le.

²⁴ Ní'irö bulu'dë'ë Jesús lë'e yaga cruz, ate' gula'guisië' lari' nácuë', le gula'zí' que queëgaquië' bönni' na' röjáquië' gudil-la. Bulu'béajë' le gaca bë' para ila'nözinë' bíxilö idela' que queëgaquië'.

²⁵ Naca idú xsila cate' bulu'dë'ë Lë' lë'e yaga cruz.

²⁶ Didza' na' bulu'zöë' lë'e yaga cruz ícjälë' Jesús ca naca le tu'quíë' Lë' rnna caní: "Bönni' Rinná Bé'enë' Bönachi Judío."

²⁷ Bulu'dá'lenë' Jesús tsözxön lë'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yögöla.

²⁸ Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

²⁹ Yugu' bönni' ta'dödë' ní' tu'lidza zi'ë Jesús, en tu'tá ícjagaquië', ta'nnë': —jÖn! ¿Naru' uquínnajtso' yudo' queë' Dios, ate' tsonna dzasö uchísatsu' le?

³⁰ jBusölá cuinu' na'a, en bötaj lë'e yaga cruz na'!

³¹ Lë'sca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'túë':

—Bönachi yúbölö busölë', pero biti' gaca usölá cuinë'.

³² Ta'nnë' ca':

—jÖn! ¿Nácatsu' Cristo, Bönni' Inná Bé'enë' Bönachi Israel? jBötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idütë yödzölió. Guca caní ga bidxintë idú ridödi xihuö.

³⁴ Idú ridödi xihuö na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj ládXu'u neda'?

³⁵ Yugu' bönni' nacué' ni' bila'yönnë' didza' ni, ate' ta'nnë':

—Bulí'zëtsöca' nágali'. Elías rulidzë'.

³⁶ Ní'irö guxatí'ë tu bönni' nútsë'ë ládjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

³⁷ Gurödxí'ë zidzaj Jesús, en la' gútitë'.

38 Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö.

39 Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurödx'i'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

40 Nacuá'anu ca' ni' nigula, zí'tu'sö tu'yunu. Nútsa'gacanu ládjacaganu María Magdalena, en Salomé, en María, xiná'agacabi' Jacobo cuidi', en José.

41 Nigula ni yöjácalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

42 Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío.

43 Que lë ni na' bidë' José, bönni' yödzö Arimatea, bönni' lo ládjagaquië' bönni' yúlahui' lo. Ribözë' ca' dza idinná bë'ë Dios. Idú ladxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús.

44 Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús.

45 Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús.

46 Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e guí'a guiöj. Budë'ë tu guiöj blaga zxön ga nu riyaza ba na'.

47 María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

1 Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'zí'inu yugu' le rilá' zxixi para tsöjlú'ugacanu Jesús.

2 Ni' naca zílado' dza risi lo, yöjácanu ra' yeru ba queë'. Bila'dxinnu ni' cate' si' gulén gubidza.

3 Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

4 Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca.

5 Gula'yú'unu yeru ba lë'e guí'a guiöj na', ate' ni' bila'lé'enu-bi' tubi' bi'i bönni' ra'bán, nácabí' gubáz lá'ayi queë' Dios. Rö'öbi' tsölá'a ibëla lu yeru ba na', nácabí' lari' tunna chiguíchido'os. Guládxide'enu.

6 Ní'irö bi'i na' gúdxibi' légacanu, rnnabi':

—Bí'ti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'.

7 Guli'tséaj na'a, guli'tsöjtixjöi' i ca' yugu' bönni' usëda queë', enca' Pedro. Guiëli' légaquië': "Tsejë' Jesús luyú Galilea zí'alö ca libí'ili'. Ni' ulé'eli-në' ca na' chigudxi cazë' libí'ili'."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena

(Jn. 20:11-18)

⁹ Cate' bubanë' Jesús zílado' dza na', buluí'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu.

¹⁰ Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'.

¹¹ Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'

(Lc. 24:13-35)

¹² Gudödi na', nadzá'alö buluí'i lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guíxi'.

¹³ Ní'irö bulu'dxinë', dutíxjöi'iguequinë' ia'zíca'rë', ate' ni xtídza'gaquië' biti' gula'yéajlë'ë.

Le rigü'ë Jesús lu ná'agaquië' bönni' gubáz queë'

(Mt. 28:16-20; Lc. 24:36-49; Jn. 20:19-23)

¹⁴ Ga yöjsetë, buluí'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'.

¹⁵ Ní'irö gudxë' légaquië', rnnë':

—Gulí'tseaj idútë yödzölió tsöjenli' libán que didza' dxi'a lógaca yúgu'të bönachi.

¹⁶ Nu tséajlë' neda', en idila nisa, ulá nu na', pero nu biti' tséajlë', irugu que gati nu na'.

¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a.

¹⁸ Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bé'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'.

²⁰ Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácagaca bë' naca idútë li didza' tu'ë. Ca' náca.

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru',

² ca na' bila'lé'e nupa ni' dza ni'te, ate' bulu'lu'i rë'u, en bulu'zë didza' que.

³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te.

⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxi'ini xi'sóë' Aarón, bönni' gúquië' bixúz lo dza ni'te.

⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cuntú nu guca bi innë' quégaquië'.

⁷ Cuntu nu zoa bi'i quégaquië', tu' nácanu Elisabet nigula huödx, ate' chinagúлагаquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'.

⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios.

¹⁰ Tsanni ni' ruzégui'ë Zacarías na' yalaj, gula'cuá' yúgu'të bönachi ní'lö, tu'lidza Dios.

¹¹ La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölä'a ibëla bucugu lá'ayi ga na' régui yalaj.

¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'.

¹³ Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan.

¹⁴ Gata' quiu' le uzi'u xibé, en udzéjanu', ate' zían nupa ulu'dzeja ládxi'gaca cate' gálajbi' bí'ido' na',

¹⁵ tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'.

¹⁶ Gunë' Juan ni ga ulu'huóca zían bönachi Israel queë' Xanru'.

¹⁷ Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len zxi'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'z' lu në'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

19 Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ilenä' li' didza', en usiyönda' li' didza' dxi'a ni.

20 Na'a, tu' cabí guyéajlë'u xtízza'a, icödzu', en bítirö gaca innó' cate' gácarö lë ni. Yúgu'të lë ni udxín cate' idxín dza que.

21 Tsanni ni' raca lë ni, nacuá' bönachi ní'ílö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi.

22 Cate' burúajë' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

23 Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'.

24 Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lidxigaquië'. Guzá' ladxí'nu, rnnanu:

25 “Caní runë' Xanru' quia'. Ruzá' ladxë'ë quia' bí'ido', en runë' ga bítirö utuí'ida' lógaca bönachi.”

Rigúxjö'ë gubáz lá'ayi ca si' gálajbi' Jesús

26 Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzö luyú Galilea.

27 Dios gusöl-lë'ë lë' ni' tsóyüé'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te.

28 Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ladxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

29 Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ladxí'bi' nacxi sa'yéaj didza' na' bulidzë'-bi' gubáz lá'ayi na'.

30 Ní'irö gubáz lá'ayi na' gudxë'-bi', rnnë':

—María, biti' gádxinu', tu' chibidéli'nu' le ruzá' ladxë'ë Dios quiu'.

31 Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

32 Jesús ni tsëpisëtë'rë', en si' Lë' Zxí'inë' Dios, Nu nayëpisëtë'rö. Xanru' Dios gunë' ga inná bë'ë ca na' gunná bë'ë David, xuz gula gudödi queë'.

33 Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

34 Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

35 Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios.

36 Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queë'nu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'.

37 Biti' bi' zoa le cabí séqui'në' Dios.

38 Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'tè' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzö luyú Judea.

⁴⁰ Ní' guyázabi' lidxë' Zacarías, en gúdxibi'-nu Elisabet:

—Padiux.

⁴¹ Cate' biyöninu Elisabet didza' na' bé'ëbi' María, la' butátè' cuinbi' bi'i hué'énido' na' yú'ubi' lé'ënu, ate' bidisóalenë'-nu Dios Bö' Lá'ayi.

⁴² Ní'irö bé'ënu Elisabet zidzaj didza', rnanu:

—¡Chinunë' Dios ga nácaru' li' bica' ba ca yúgu'tè' nigula, en chinunë' ca' ga nácabi' bica' ba bí'ido' na' yú'ubi' lé'u!

⁴³ ¿Núzxitë neda', zá'anu xinë'ë Xana' quia'?

⁴⁴ Cate' biyönda' didza' bé'u, bulidzu' neda', lu yöl-la' rudzeja queëbi' la' butátè' cuinbi' bi'i hué'énido' ni yú'ubi' lé'a.

⁴⁵ ¡Bica' ba li' tu' guyéajlë'u xtidzë'ë gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irö gunabi' María:

¡dútè' le naca' rigú'u Xanru' yöl-la' ba,

⁴⁷ en rudzeja láchxi'lëna'-në' Dios, Nu rusölá neda'!

⁴⁸ ¡Dios caz buzá' láchxë'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

⁴⁹ ¡zxöntërö naca' le benë' Dios unná bé' quia'!

¡Lá'ayi naca' Lë'!

⁵⁰ Lë' ruhuéchi' láchxi'tica'së' bönachi tadxí Lë' na'a dza, en dza zá'gaca.

⁵¹ Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéquequi.

⁵² Bugúë' yöl-la' unná bé' quégaca nupa gulaca lo, en benë' ga gulaca lo nupa gulaca nõxaj ladxí'.

⁵³ Benë' ga bulu'huölej bulu'dzë'e nupa gula'dún, en bucá'anë' cá'asö nupa bila'lé'e yöl-la' tsahuí'.

⁵⁴ Gúcalenë' bönachi Israel, nupa na' tun xichinë', tu' yöjnenë' légaquie', en buéchi' láchxë'ë légaquie'.

⁵⁵ Benë' ca guzxí' lu në'ë gunë' quégaquie' xuz xtó'oru' enca' queë' Abraham, en quégaca di'a dza queë'.

⁵⁶ María bugá'analëbi'-nu Elisabet idú ca tsonna beo', ate' gudödi ni' böajbi' lidxibi'.

Le guca cate' gúlajbe' Juan, bönni' uquilë' bönachi nisa

⁵⁷ Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'.

⁵⁸ Bila'yöni dzaga yu'u queënu, en yugu' di'a dza queënu ca na' guca, buéchi' láchxë'ë-nu Dios, ate' bulu'dzéjalen lënu.

⁵⁹ Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguie' lu xipéla'bi' bi'i bönni'do' na' lë na' gaca bé' néquibi' queë' Dios, ate' té'ënnë' ilu'ë labi' Zacarías ca na' lë' xúzibi'.

60 Ní'irō bubí'inu didza' Elisabet, xiná'abi', rñnanu:

—Calēga. Juan si' labi'.

61 Gula'nábinē'-nu, ta'nnē':

—¿Bizx que? Cuntu nu di'a dza quiu' lē' Juan.

62 Ní'irō bulu'lá' bulu'luf'isinē', gula'nábinē' xúzibi' nacxi ré'ēnē' gu'ē labi'.

63 Zacarías na' gunabē' tu blágado', ate' buzúajē' lahui caní: Juan lēbi'. Bulu'bábinē' yúgu'tē'.

64 La' ní'isō bōáljatē ru'ē Zacarías na', en buguítjatē lúdxē'ē, ate' bē'ē didza' le gulu'ē Dios yōl-la' ba.

65 Ní'irō guládxinē', en bulu'bábinē' yúgu'tē dzaga yu'u quégaquiē', ate' yúgu'tē yōdzōdo' nacuá' lu gu'ádo' luyú Judea, guzē didza' ca guca lē ni.

66 Gula'zá' ládxi'gaca yúgu'tē nupa bila'yōni ca na' guca, ta'nná: “¿Nacxi caz gácabi' bi'i bōnni'do' ni? Le nácatē Xanru' zóalenē'-bi'.”

Didza' bē'ē Zacarías uláz queē' Dios

67 Ní'irō Dios Bō' Lá'ayi bidisóalenē' Zacarías, xúzibi' Juan, ate' bē'ē didza' uláz queē' Dios, rñnē':

68 ¡Yōl-la' ba Dios, Xángaca bōnachi Israel tu' buduyúē' rē'u, bōnachi queē', en bōá'uē' rē'u!

69 ¡Gusōl-lē'ē queēru' Bōnni' usōlē' rē'u,

len yōl-la' huáca zxōn queē'!

Bōnni' ni guljē' ládajgaca di'a dza queē' David,

huen dxin queē' Dios.

70 ¡Dza ni'te guzxi' lu nē'ē gunē' ga gaca caní!

Raca ca na' gunné' lu ruá'agaquiē' bōnni' gulu'ē didza' uláz queē'.

71 Guzxi' lu nē'ē usōlē' rē'u

lu ná'agaca nupa tequi rē'u zi',

enca' lu ná'agaca nupa biti' ta'lé'e rē'u dxi'a.

72 Guzxi' lu nē'ē huéchi' ládxi'ē xuz gudōdi queēru',

en tsōjnenē' le guzxi' lu nē'ē le naca lá'ayi.

73 Lē ni benē' tsutsu xtídzē'ē, en guzxi' lu nē'ē,

le gunē' queē' Abraham, xuz gudōdi queēru',

le naca tu le ral-la' gunē' queēru' rē'u.

74 Guzxi' lu nē'ē usōlē' rē'u

lu ná'agaca nupa biti' ta'lé'e rē'u dxi'a

para cabirō gádxiru' gunru' xichinē' Lē',

75 en para gácaru' ba'a ládxi', en idú dxi'a

lahuē' Lē' yúgu'tē dza sóaru' ibanru'.

76 Li', zxi'ina'do', si' lo' bōnni' ru'ē didza' uláz queē' Dios unná bē'

tu' tsōjnōru' ca Xanru' caz, en upó'o nōza ga tōdē'.

77 Gunu' ga ila'nōzi bōnachi queē' ca gaca ulu'lágaca,

en ca na' uniti lahuē' Dios dul-la' nabága'gaca.

78 Caní gaca, tu' ruhuéchi'da' ládxi'ē Dios rē'u,

en runē' ga tsení' queēru' Bōnni' na' náquiē' bení' idú.

79 Lē' uzení'ē quégaca nupa nacuá' gapa naca chul-la,

en gapa nacuá' nupa chizóa ilátigaca

para ugu'ē rē'u nōza ga cō'ō dxi ládxi'do'oru'.

80 Guzxōnbi' bi'i bōnni'do' na', en bidipa ládxi'bi'. Guzóasibi' gapa naca lu lataj cá'asō cate' bidxinrō dza buluí'i lōbi' lógaca bōnachi Israel.

2

*Le guca cate' gúlajbi' Jesús**(Mt. 1:18-25)*

¹ Lu dza na' gunná bē'ē Augusto César, bōnni' Roma, ila'yaza lu guichi yúgu'tē bōnachi nacuá' yōdzōlió.

² Cate' gusí lo ta'yaza lu guichi caní, rinná bē'ē bōnni' lē' Cirenio luyú Siria.

³ Yúgu'tē bōnachi yōjaca yōdzō que queēguequi ga na' zeaj nababa para ila'yaza lu guichi.

⁴ Guz'ē José yōdzō Nazaret luyú Galilea, sa'yéajē' luyú Judea, en bidxinē' yōdzō Belén, ga ni' guljē' David, tu' guljē' José ládajgaca di'a dza queē' David na'.

⁵ Guyijē' José ni' para tsáziē' lu guichi, ate' dzágabi'-nē' María, bi'i nigula nazí' lu ná'abi' utsaga ná'alēnbi' lē', en chizóa sóabi' bí'ido' queēbi'.

⁶ Cate' ni' nacu'ē lu yōdzō Belén, bidxín dza sóabi' bí'ido' queēbi'.

⁷ Buzóanu-bi' tubi' bi'i bōnni'do', bi'i huáca queēnu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' bōa' quégaca bōnachi yú'ugaca nōza. Caní guca, tu' cabí bidzōli lataj ila'cu'ē lu yu'u ga ni' ta'dxín bōnachi yú'ugaca nōza.

Tu'lu'i' lahuē' gubáz lá'ayi queē' Dios ga nacu'ē bōnni' tu'yúé'-ba' bō'cu' zxila'

⁸ Gala' ra' yōdzō Belén nacu'ē bōnni' tu'yúgaquiē'-ba' bō'cu' zxila' la' guixi', tapa chí'igaquiē'-ba' chi'i dzō'ólō.

⁹ La' bulu'itē'lahuē' gubáz lá'ayi queē' Xanru' ga na' nacu'ē. Yól-la'bení' queē' Xanru' buzení' ga na' nacu'ē, ate' guládxinē'.

¹⁰ Ní'irō gubáz lá'ayi na' gudxē' légaquiē', rnnē':

—Biti' gádxili'. Na'a rusiyōnda' libí'ili' didza' le gun ga udzėjade'eli', le ulu'z' ca' xibé yúgu'tē bōnachi.

¹¹ Na'a chigúlajbi' lu ladzē' David Nu usólá libí'ili'. Nu ni naca Cristo, Xanru'.

¹² Lē ni gaca bē'ēbi'. Udzólili'-bi' Bí'ido' na', narólibi' yugu' lári'do', en dēbi' tu lu yú'udo' ga tun chi'i le táguba' bōa' quégaca bōnachi yú'ugaca nōza.

¹³ Ga na' zoē' gubáz lá'ayi na', tsálido'os bulu'lu'i' lógaquiē' zianrō ca' gubáz lá'ayi queē' Dios, narúajgaquiē' yehua' yubá, en ta'gu'ē Dios yól-la' ba, ta'nnē':

¹⁴ ¡Yól-la' ba Dios zoē' xitsá',
ate' luyú gaca le cuéqui dxi ládxi'do'gaquiē'
bōnni' raza ládxi'ē Dios légaquiē'!

¹⁵ Cate' bulu'zē'ē gubáz lá'ayi na' ga ni' nacu'ē, sōjhuōjgaquiē' yehua' yubá, ní'irō gulē luzē'ē tuē' ia'tué' bōnni' uyú bō'cu' zxila' na', ta'nnē':

—Uyéajtsōca'ru' Belén para ilé'eru' lē ni chiguca ca na' chibusiyōnnē' Xanru' rē'u.

¹⁶ La' yōjácatiē', ate' yōjxáca'gaquiē' María len José, enca' bí'ido' na', dēbi' tu lu yú'udo' ga tun chi'i le táguba' bōa' quégaca bōnachi yú'ugaca nōza.

¹⁷ Cate' bila'lé'enē' lēbi', gula'guíxjō'ē lē na' si' busiyōnnē' gubáz lá'ayi na' légaquiē' ca naca queēbi' bí'ido' na'.

¹⁸ Bulu'bani yúgu'tē nupa bila'yōni didza' gulu'ē bōnni' tu'yúé' bō'cu' zxila' na'.

¹⁹ María gulú'usō icja náganu didza' ni, ate' guzá' ládxi'nu ca naca que.

²⁰ Søjhuøjgaquië' bönni' na' tu'yüë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lë'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'aló cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios.

²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'aló queënu xiná'agacabi', ulu'bëajë'-bi' quez queë' Xanru' Dios."

²⁴ Que lë ni na' yöjáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'sö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxë'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na',

²⁶ en chibulu'ínë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios.

²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na',

²⁸ ní'irö bunidë'-bi' Simeón na', en guyéaj ládxë'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usöla bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

³³ Bulu'báninë' José, en María, xiná'abi' bí'ido' Jesús, ca naca lë na' gunné' Simeón ca naca queëbi' Jesús.

³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzöë'-bi' Dios para gunbi' ga ila'chixi bönachi zían, ate' ulu'huöása bönachi zían ladaj bönachi Israel. Gácabi' tu le naca bë', ate' ila'nnë bönachi queëbi'.

³⁵ Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guië tuchi' le tsaza ládxi'do'o.

³⁶ Ana, nigula ru'ínu didza' uláz queë' Dios, zóanu ca' ni'. Nácanu xzí'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalenu bönni' queënu idú gadxi iz gudödi gúcanu ra'bando',

³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios.

³⁸ La' ná'asö bidxíntënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacua' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Søjhuøjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bè' xibá queë' Xanru' Dios, yöjhuójgaquië' ládzaqaquië' Nazaret luyú Galilea.

⁴⁰ Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá ládxe'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'.

⁴³ Cate' gudödi laní, söjhuójgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús.

⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bi' gapa nacuá' di'a dza quégaquië', en gapa nacuá' nupa núnbë'gaquië'

⁴⁵ bití' bulu'dzölinë'-bi'. Que lë ni na' yöjhuójgaquië' Jerusalén, söjdíljagaquië'-bi'.

⁴⁶ Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'.

⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca náca gaca didza' bubí'ibi'.

⁴⁸ Cate' bila'lé'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi rugu'i neda', en xuzu' buguúljatu' li'.

⁴⁹ Ní'irö gúdxibi' Jesús légaquië', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Bití' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni.

⁵² Ráta'rö yöl-la' réajni'i queëbi' bi'i Jesús, en rizxönbi'. Burúajbi' dxi'a lahuë' Dios, en lógaca bönachi.

3

Libán runë' Juan, bönni' ruquilë' bönachi nisa

(Mt. 3:1-12; Mr. 1:1-8; Jn. 1:19-28)

¹ Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë' Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia.

² Yugu' dza na' náca gacaquië' bixúz lo Anás, en Caifás, ate' la' ná'asö Dios bë'lenë' Juan, zxi'inë' Zacarías, didza' cate' ni' zoë' Juan lu lataj cá'asö.

³ Ridë' Juan ni yúgu'të lataj nacuá' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabá'gaca.

⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rna:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza lu icja ládxido'oli' para idxín Xanru' queéli'.

Buli'béaj li yugu' nöza lasi ga tödë'.

⁵ Ral-la' ulígaca yúgu'të gapa naca röga',

en ulu'huóáca lachi' yúgu'të guí'a sibi, en gu'ado'.

Ral-la' ulu'rúaj li nöza nayecja nabí'igaca,

ate' ulu'huóáca dxi'a nöza guiój.

⁶ Ila'lé'eni yúgu'të bönachi Bönni' na' isól-lë'ë Dios,

Nu usölá bönachi.”

⁷ Cate' bila'rúaj bönachi zían para ila'dila nisa lu në'ë Juan, lë' gudxë' légaquië':

—Libí'ili', di'a dza quégacaba' bëla sínia'. ¿Zoa nu buluf'i libí'ili' ral-la' izxúnajli' yöl-la' rusiúdxí si' gaca quégaca bönachi?

⁸ Na'a, guli'gún le ilaca bë' chibubí'i ládxi'li', en biti' sa' ládxi'li', biti' innali': “Nácatu' tsahui' tu' nácatu' di'a dza queë' Abraham”, tu' rea' libí'ili', huáca quélë'ë Dios yugu' guiój ni, en gunë' ga ulu'huóáca di'a dza queë' Abraham.

⁹ Nácali' ca yugu' yaga. Chizóa riböza guié huága para ichugu yugu' yaga. Yúgu'të yaga biti' ta'bía le naca dxi'a, ila'chúguië' yaga na', en ila'gu'ë léguequi lu guí'.

¹⁰ Ní'irö bönachi nacuá' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu biti' dë que, ate' nu dë le gagu, lësca' caní ral-la' quisi quégaca nupa biti' dë le ilágugaca.

¹² Bal-lë' bönni' tu'quizxjë' lázagaca bönachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Biti' uquízjaróli' tsca le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la' gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsca rázxlali'.

¹⁵ Ta'zá' ládxi'gaca bönachi na' ta'böza Bönni' na' ral-la' isól-lë'ë Dios, channö náquië' Juan na' Bönni' lë' Cristo.

¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-la' ridila nisa ni, ichízië' libí'ili' Dios Bö' Lá'ayi, en le naca gu' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ní'e.

¹⁷ Zönë' lu në'ë böcö' queë', ate' ulubë' ga rilubi xzoa' xtila queë', lë ni rulu'í le gaca quégaca bönachi. Utubë' xzoa' xtila, en cu'ë le xilataj, pero bëbu que uzégui'ë lu guí' le catu caz ulu.

¹⁸ Ca nácacaga didza' ni, en ia'zíca' rö zían didza' le guchízië' icja nágagaca bönachi, benë' libán Juan lógaquië' que didza' dxi'a.

19 Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böché'ë, enca' tu' runë' zían le ruá' dö'

20 Ní'irö benë' Herodes tu le nácarö huiá' dö', gulu'ë Juan na' lidxi guíë.

Ridíle' Jesús nisa

(Mt. 3:13-17; Mr. 1:9-11)

21 Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, guyalaj lúzxiba,

22 ate' bötjë' Dios Bö' Lá'ayi, bidxinë' ga na' zoë' Jesús. Buluí'i lahuë', rinë'ë ca riná' tuba' gu'dödo', ate' biyón chi'i Nu ruí'i didza' yehua' yubá, rna:

—Li' nacu' Zxí'ina'. Nadxí'ida' Li', en raza ládxa'a Li'.

Yugu' xuz xinë'e gudödi queë' Jesús

(Mt. 1:1-17)

23 Cate' gusí lahuë' runë' xichinë' Jesús, yu'ë ca chi uruá' iz. Téquiquequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

24 Elí na' gúquië' zxi'inë' Matat,

nu ni guca zxi'inë' Leví,

nu ni guca zxi'inë' Melqui,

nu ni guca zxi'inë' Jana,

nu ni guca zxi'inë' ia'túë' José.

25 José ni gúquië' zxi'inë' Matatías,

nu ni guca zxi'inë' Amós,

nu ni guca zxi'inë' Nahum,

nu ni guca zxi'inë' Eslí,

nu ni guca zxi'inë' Nagai.

26 Nagai na' gúquië' zxi'inë' Mat,

nu ni guca zxi'inë' ia'túë' Matatías,

nu ni guca zxi'inë' Semei,

nu ni guca zxi'inë' ia'túë' José,

nu ni guca zxi'inë' Judá.

27 Judá na' gúquië' zxi'inë' Joana,

nu ni guca zxi'inë' Resa,

nu ni guca zxi'inë' Zorobabel,

nu ni guca zxi'inë' Salatiel,

nu ni guca zxi'inë' Neri.

28 Neri na' gúquië' zxi'inë' ia'túë' Melqui,

nu ni guca zxi'inë' Adi,

nu ni guca zxi'inë' Cosam,

nu ni guca zxi'inë' Elmodam,

nu ni guca zxi'inë' Er.

29 Er na' gúquië' zxi'inë' Josué,

nu ni guca zxi'inë' Eliezer,

nu ni guca zxi'inë' Jorim,

nu ni guca zxi'inë' ia'túë' Matat.

30 Matat na' gúquië' zxi'inë' Leví,

nu ni guca zxi'inë' Simeón,

nu ni guca zxi'inë' Judá,

nu ni guca zxi'inë' ia'túë' José,

nu ni guca zxi'inë Jonán,
 nu ni guca zxi'inë Eliaquim.
³¹ Eliaquim na' gúquië' zxi'inë Melea,
 nu ni guca zxi'inë Mainán,
 nu ni guca zxi'inë Matata,
 nu ni guca zxi'inë Natán.
³² Natán na' gúquië' zxi'inë David,
 nu ni guca zxi'inë Isaí,
 nu ni guca zxi'inë Obed,
 nu ni guca zxi'inë Booz,
 nu ni guca zxi'inë Salmón,
 nu ni guca zxi'inë Naasón.
³³ Naasón na' gúquië' zxi'inë Aminadab,
 nu ni guca zxi'inë Aram,
 nu ni guca zxi'inë Esrom,
 nu ni guca zxi'inë Fares,
 nu ni guca zxi'inë ia'túë' Judá.
³⁴ Judá na' gúquië' zxi'inë Jacob,
 nu ni guca zxi'inë Isaac,
 nu ni guca zxi'inë Abraham,
 nu ni guca zxi'inë Taré,
 nu ni guca zxi'inë Nacor.
³⁵ Nacor na' gúquië' zxi'inë Serug,
 nu ni guca zxi'inë Ragau,
 nu ni guca zxi'inë Peleg,
 nu ni guca zxi'inë Heber,
 nu ni guca zxi'inë Sala.
³⁶ Sala na' gúquië' zxi'inë Cainán,
 nu ni guca zxi'inë Arfaxad,
 nu ni guca zxi'inë Sem,
 nu ni guca zxi'inë Noé,
 nu ni guca zxi'inë Lamec.
³⁷ Lamec na' gúquië' zxi'inë Matusalén,
 nu ni guca zxi'inë Enoc,
 nu ni guca zxi'inë Jared,
 nu ni guca zxi'inë Mahalalel,
 nu ni guca zxi'inë ia'túë' Cainán.
³⁸ Cainán na' gúquië' zxi'inë Enós,
 nu ni guca zxi'inë Set,
 nu ni guca zxi'inë Adán,
 nu ni guca ca zxi'ini cazë' Dios.

4

Satanás tu' xihui' rë'ëni usubaga' Jesús dul-la'

(Mt. 4:1-11; Mr. 1:12-13)

¹ Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asö.

² Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Bití' bi' gudahuë' Jesús yugu' dza na', ate' gudödi ni' ridunë'.

³ Ní'irö tu' xihui' na' gudxi Jesús, rnna:

—Channö naca cazu' Li' Zxí'inë' Dios, gunnátsöca' ulu'huóáca guiöj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irö guchë' tu' xihui' na' Jesús ga naca tu lu gu'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió.

⁶ Tu' xihui' na' rë Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisida' ruá'a que.

⁷ Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ládxi'u-në', en tuzë' Lë' gunu' xichinë'.”

⁹ Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni

¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisë' Li' para cabí tsöjchégu'u guiöj, en bití' gunu' zí' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': “Bití' sí' bë'u Xanu' Dios.”

¹³ Cate' bití' budzöli tu' xihui' na' ia'tú le sí' bë' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bóajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzë didza' ca naca queë', ate' bila'yöni bönachi nacua' yúgu'të yödzö idú gásibi'ilö.

¹⁵ Busédinë' Jesús bönachi gapa naca lu yu'u ga tu'dubë' tu'sédë' bönni' judío queë' Dios, ate' yúgu'të bönachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyazië' lu yu'u ga tu'dubë' tu'sédë' bönni' judío queë' Dios, ate' guzuinë' para ulabë' tu le nazúaj lu guichi lá'ayi.

¹⁷ Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zí' ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zí',

19 en guna' libán que dza ruzá' ládxë'ë Xanru' Dios quégaca bönachi.

20 Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús.

21 Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

22 Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxi'inë' José?

23 Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: "Li', bönni' ruún bönachi, bun cuinu'." Lësca' caní huëli' neda': "Yugu' le biyönitu' benu' Capernaum, ben ca' ga ni naca ladzu'."

24 Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, bití' tun bönachi uládz queë' lë' bal.

25 Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' bití' gulaj guiöj idú ca tsonna iz yu' xopa beo', ate' guca gubín luyú na',

26 pero Dios bití' gusöl-lë'ë Elías na' ga nacuá'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón.

27 Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero bití' böáquië' nu bönni' nútsë'ë ladaj bönachi Israel na', pero böáquië' tuzë' Naamán, bönni' nababë' luyú Siria.

28 Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios.

29 Ní'irö gula'yasë', en bulu'béajë' Jesús ní'ilö ra' yödzö. Gula'ché'ë Lë' ga naca lë'e guí'a guiöj ga na' dë'ládzaquië' para ulu'suládzuë' Lë' ga naca lë'e guí'a guiöj na'.

30 Ní'irö gudödë' Jesús gatsaj láhui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

31 Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío.

32 Bulu'bánninë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

33 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza',

34 rnnë':

—¿Busán netu! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

35 Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bití'rö bi ben queë'.

36 Bulu'bánninë' yúgu'të', en gulu'ë didza' tuë' len ia'túë', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

³⁷ Guzë didza' ca naca queë' Jesús, ate' bila'yöni bönachi yúgu'të yödzo idú gásibi'ilö.

Ruúnë' Jesús xiná'anú nígula queë' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anú nígula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu.

³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacua'len léguequi nupa na' te'e que queé'guequi yödzhue' bila'dxin ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi.

⁴¹ Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' xzí'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guílaj Jesús. Cate' bila'dxinë' ga na' zoë', gulë'ë'niguequinë' ulu'tsenë' Lë', para cabí uzë'ë ga na' nacu'ë.

⁴³ Ní'irö Jesús gudxë' légaquië', rnnë':

—Run bayudxi tseja' gapa nacua' ia'zica'rö yödzo, tsöjena' ca' libán ni' que didza' dxi'a ca rinná bë'ë Dios. Que lë' ni na' gusöl-lë'ë neda' ni.

⁴⁴ Caní guca, benë' libán yugu' yödzo luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

Ta'dzunba' böla zían

(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios.

² Ní'irö bilé'enë' Jesús chopá bárcodo', zxóagaca lu nísado' ga na' naca ra' yu bidxi, ate' narúajagaquië' bönni' uzxon böla lë'egaca bárcodo' na', en ta'guilbé' yöxaj böla quégaquië'.

³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látí'do' zítu' ga naca ra' yu bidxi na'. Ní'irö gurö'ë Jesús lë'e bárcodo' na', en rō'ösë' ca' ni' rusédinë' bönachi zían nacua' lu yu bidxi na'.

⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rō'ö zila, ate' ni' guli'zalaj yöxaj böla queë'li' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentü' dxin, en bití' bi böla nazönitu'-ba', pero didza' quiu' izáljagara' yöxaj.

⁶ Cate' chigula'zaljë le, gula'zönë' ziantëröba' böla, ate' réquitiqui' iröza' yöxaj böla na'.

⁷ Ní'irö bulu'lá'a bulu'luf'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa.

⁸ Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzöbinë' Pedro ni'a quégacaba' böla zían na' gula'zongaquië'-ba', en lësca' caní guca quégaca nupa nacuá'len lë'.

¹⁰ Guladxi gula'dzöbinë' ca' Jacobo, en Juan, yugu' xzí'inë' Zebedeo, nupa ni'nácagaca luzë'ë Simón Pedro na'. Ní'irö Jesús rë' Simón na', rnnë':
—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö rë'ënu', huáca unu' neda'.

¹³ Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxité huë' nudzu' queë' bönni' na'.

¹⁴ Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjluí'i cuinu' lahuë' bixúz, ate' yöjnödzej que yudo' le ruluí'i nuhuóacu' dxi'a ca gunná bë'ë Moisés, lë na' ulu'í légaquië' chiböacu'.

¹⁵ Guzëtëro didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugüë' yödzöhuë' té'eguequi.

¹⁶ Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin

(Mt. 9:1-8; Mr. 2:1-12)

¹⁷ Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacuá' ni'.

¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús.

¹⁹ Cate' biti' gula'dzölinë' nacxi ilunë', tu' nacuá' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láchui'lö bönachi ni' lahuë' Jesús.

²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le

rucá'ana Dios cá'asö? ¿Nuzxi caz gaca uniti lo dul-la'? Tuzë Dios runiti lahuë' dul-la'."

²² Réquibe'enë Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní'?

²³ Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga chasë', en së'e ni'ë.

²⁴ Guna' ga inözili' dë lu na'a neda', Bönni' Guljé' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë lë na' gúti'në', en söhuöjé' lidxë', rigu'ë Dios yöl-la' ba.

²⁶ Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjé', ate' Jesús rë' lë':

—Gudá' neda'.

²⁸ La' guyásatë' Leví, ate' bucá'anë' yúgu'të', en sa'yéajlenë' Jesús.

²⁹ Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bö'lenë' légaquië' tahuë'.

³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízxaj, en ia'zíca'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxi'a bití' naquíniguequinë' nu un bönachi, pero bönni' té'enë' naquíniguequinë' nu un bönachi.

³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'?

³⁵ Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶ Ní'irö bucúdzú'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejé' tsötaca' le udë'ë lë'e lari' tëbi. Channö gunë' caní, calëgasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlöza lari' tëbi na'.

³⁷ Lësca' caní, cuntu nu bönni' riguë'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'.

³⁸ Que lê ni na' ral-la' cá'aru' xisi uva cubi lu buzudi guídi cubi, ate' irópatë ilaca chi'i.

³⁹ Channö zoa nu rë'aj xisi uva gula, biti' guë'ënitë gu'aj xisi uva cubi, tu' rnna: "Nácarö sizxi' xisi uva gula na'."

6

Bönni' usëda queë' Jesús ta'lecjë' do zxoa' xtila dza lá'ayi
(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoa' xtila, ate' bönni' usëda queë' ta'lecjë' do ga dxía zxoa' xtila. Ta'zxubi'ni ná'agaquië' le, en tahuë'.

² Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lê na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë
(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busédinë' nupa nacuá'ni'. Zoë' ca' tu bönni' ni' narequi' në'ë ibëla.

⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'.

⁸ Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuinë'.

⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyúë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no' o.

Bulí në'ë bönni' na', ate' la' böácatë në'ë na'.

¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'
(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu gu'ado'. Bulidzë' Dios ni', ate' idú yöla bë'lenë' Dios didza'.

13 Cate' za' rení, bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

14 Bulidzë':
Simón, (lë' ca' Pedro),
Andrés, (böchë'ë Pedro),
Jacobo, en Juan, en Felipe, en Bartolomé,
15 Mateo, en Tomás,
Jacobo, (zxí'inë' Alfeo),
Simón, (bönni' ruí'i láchxë'ë yödzö queë'),
16 Judas, (böchë'ë Jacobo),
en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían
(Mt. 4:23-25)

17 Jesús böttjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' dégaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídzë'ë Jesús, en ulu'huóáca lu yödzöhuë' té'eguequi.

18 Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'.
19 Yúgu'të bönachi zían na' tuí'i láchxí'gaca ila'gán Jesús tu' ruúnë' léguequi len yöl-la' huáca queë'.

Nupa náca'gaca bica' ba, en nupa náca'gaca bica' bayechi'
(Mt. 5:1-12)

20 Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

–Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

21 'Bica' ba libí'ili' ridunli' le gunné' Dios queëli', tu' huóljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzzídxili'.

22 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nnë' zi' queëli', en ulu'cá'ana cá'sö le nazí'i lali' ca tu le naca xihui' tu' dá'ali' neda', Bönni' Guljë' Bönachi.

23 Buli'sí' xibé dza na', en buli'dzeja, tu' naca zxön le guequi queëli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

24 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

25 'Bica' bayechi' libí'ili' nuhuólaj nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' huí'inili', en cödxí yéchi'li'.

26 'Bica' bayechi' libí'ili' ta'nnë' yúgu'të bönachi dxi'a queëli'. Lësca' caní gulunë' xuz xtó'oli', gula'nnë' dxi'a quégaquië' bönni' gula'zí' yë'ë, gula'nnë' náca'gacië' bönni' tu'ë didza' uláz queë' Dios.

Ral-la' idxí'iru' nupa biti' ta'lé'e rë'u dxi'a
(Mt. 5:38-48; 7:12)

27 Gunnë' ca' Jesús:
–Libí'ili' zóali' ni, en riyónili' xtídzá'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'.

²⁸ Guli'nabi Dios gaca dxi'a quégaca nupa tua' dö' queëli', en buli'lidzë' Dios inábili'-në' gácalenë' nupa ta'nnë' zì' queëli'.

²⁹ Channö nu capa' tsölá'a xagu', buzé' ia'tsölá'a ca' xagu'. Channö nu cúa lari' naxóa cúdzu'u, bë' lataj cúa ca' xzo'.

³⁰ Núti'tës nu bi inaba le dë quiu', bunödzej que, ate' nu cúa le nequi quiu', bitì' unabu' le.

³¹ Ca rë'ënili' ilún bönachi queëli', lësca' caní guli'gún queguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquië'.

³³ Channö runli' le naca dxi'a quégacasö nupa tun dxi'a queëli', ¿bizxi yöl-la' ba idéli'li'? Lësca' caní tunë' bönni' dul-la'.

³⁴ Channö runödzejali' quégaca nupa runli' löza ulu'bí'i queëli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë' quégaca nupa tun dul-la', tu' tunë' löza ulu'bí'i quégaquië' lë na' bulu'nödzejë'.

³⁵ Neda' rea' libí'ili': Guli'dxí'i nupa bitì' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' bitì' runli' löza nu ubí'i queëli'. Channö caní gunli', zxon naca le gata' queëli', ate' gácali' zxi'ini cazë' Dios, Nu nácatëro lo, tu' runë' Lë' le naca dxi'a quégaca bönachi bitì' ta'yaza ládxi'gaca, en quégaca bönachi tuá' dö'.

³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxië' yúgu'të bönachi.

Bitì' ral-la' ichugu bë'ëru' que luzá'aru'

(Mt. 7:1-5)

³⁷ Gunnë' ca' Jesús:

—Bitì' ichugu bë'ëli' que luzá'ali', ate' cuntu nu ichugu bë' queëli'. Bitì' cuéaj bë'ëli' que luzá'ali', ate' cuntu nu cuéaj bë' queëli'. Buli'niti lo luzá'ali', ate' Dios uniti lahuë' ca' libí'ili'.

³⁸ Buli'nödzej que luzá'ali', ate' Dios gunnë' queëli'. Ulu'nödzejë' queëli' le ulu'rixë' len tu gu'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queëli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'túë' bönni' lo chul-la? Bitì' ca' gaca, tu' ila'bixë' iropë' tu lu yeru.

⁴⁰ Bitì' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ '¿Bizx que ruyú' bëbudo' yu'u guiöj lahuë' böchi' luzó'o, en bitì' rilé'enu' le zxon yu'u guiöj lo cazu'?

⁴² ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiöj lo'", en bitì' rilé'enu' le zxon yu'u guiöj lo cazu'? Li', bönni' rulu'isó tsahui' cuinu', guléaj zí'alö le zxon yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a bitì' cuía le naca cá'asö. Lësca' caní, tu yaga guí'a bitì' gaca cuía le naca dxi'a.

⁴⁴ Caní naca, le ribía tu yaga naca bë' ca naca yaga na'. Bitì' ruchíbiru' le ribía yaga higo lu yaga yötsi', en calëga lu bisequi' yötsi' bitì' ruchíbiru' le ribía lubá uva.

45 Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahué', ate' didza' xihui' ru'ë bönni' xihui' tu' yu'u icja ládxi'da'ahué' le xihui'. Rinně ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u

(Mt. 7:24-27)

46 Gunně' ca' Jesús:

—¿Bizx que rulídzali' neda', rnnali': "Xantu', Xantu'", pero biti' runli' ca rinná bé'eda' libí'ili'?

47 Uluí'ida' libí'ili' ca naca nu na' za' quia', en riyöni xtídza'a, en run ca rnna xtídza'a.

48 Nu ni naca ca tu bönni', cate' beně lidxě', guchö'öně' ga rě', en guléquiě' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj.

49 Na'a, nu riyöni xtídza'a, en biti' run ca rnna, nu ni naca ca tu bönni' beně lidxě' ga naca lu yu cá'asö. Biti' beně' xilibi. Cate' guchö'öna yegu gubó'o cuita yu'u na', la' biguínnajtě, ate' gubixi děrö zö'ö que.

7

Jesús ruúně'-bi' bi'i huen dxin queě' tu bönni' unná bě'

(Mt. 8:5-13)

1 Cate' Jesús budxi bě'leně' légaquiě' didza' ni, guyáziě' yödzö Caper-naum.

2 Lu yödzö ni' zoě' tu bönni' Roma rinná bé'eně' bönni' rójáquiě' gudil-la. Zoábi' bi'i huen dxin queě' nadxí'ide'eně'-bi', ate' bi'i ni ré'ebi', en chirequi gátibi'.

3 Cate' biyönně' bönni' ni didza' tu'ë bönachi ca naca queě' Jesús, la' gusöl-la'tě' bal-lě' bönni' gula tu'zėjni'ině' bönni' judío ga na' zoě' Jesús, tsöjota'yugaquiě' lahuě' Lě' guidě' uduhuéně'-bi' bi'i huen dxin queě' na' ré'ebi'.

4 Bönni' gula tu'zėjni'ině' na' bila'dxině' ga zoě' Jesús, ate' guláta'yuě' lahuě' idú ládxi'gaquiě', ta'nně':

—Náquiě' lesaca' bönni' na' gunu' queě' lě ni,

5 tu' runě' bal bönachi uládz queėru', en beně' tu yu'u queėru' ga rudúbiru' rusėdaru' queě' Dios.

6 Ní'irö Jesús guyėjajleně' légaquiě'. Cate' chizóa ila'dxině' lidxě' bönni' na', lě' gusöl-lě'ě bal-lě' böchi' luzě'ě ga zě'ě Jesús, ate' tě' Lě':

—Xan, rnně' bönni' na': "Biti' uguí'inu', tu' cabí naca' lesaca' tsáziu' lidxa',

7 en biti' naca' lesaca' guída' ga zu'. Que lě ni na' biti' burúguida' guída' ga zu'. Bě'ėsö didza', ate' huóacatěbi' bi'i huen dxin quia'.

8 Neda' ca', zoa nu rinná be'e neda', ate' nacu'ě ca' bönni' rójáquiě' gudil-la rinná bé'eda' légaquiě'. Rea'-ně' tuě': Guyėj ni', ate' rejě'. Rea'-ně' ia'túě': Gudá ni, ate' ridě'. Rea'-ně' ca' huen dxin quia': Ben dxin ni, ate' runě' dxin na'."

9 Cate' biyönně' Jesús didza' ni, bubánině' queě' bönni' na', ate' buécjě', en gudxě' bönachi na' zá'gaca cúdzu'lě', rnně':

—Le nácatě rea' libí'ili', cuntu nu bönni' Israel biti' rójxáqui'da'-ně' réajlě'ě quia' ca réajlě'ě quia' bönni' ni.

10 Cate' bulu'dxině' bönni' na' gusöl-lě'ě bönni' rinná bé'eně' bönni' rójáquiě' gudil-la, gula'yáziě' ga naca lu yu'u lidxě', en bila'lě'eně' chiböacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzo Naín, ate' dzágagaquië' bönni' usëda queë' Lë', len bönachi zián.

¹² Cate' bidxinë' gala' ra' yödzo na', bilé'enë' yugu' bönni' nuá'agaquië'-bi' tubi' bi'i bönni' nati. Söjçáchi' gaquië'-bi'. Bi'i nati na' nácabi' la's dui bi'i queënu tu nigula uzëbido'. Zián bönachi uladza queënu nigula uzëbi na' söjácalen-nu.

¹³ Cate' Xanru' bilé'enë'-nu, buéchi' ládxe'ë-nu, ate' gudxe'-nu:

—Bíti'rö cödxu'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

¹⁵ Ní'irö bubanbi'. Gurö'öbi' bi'i na' z'falö nátibi', ate' gusí lobí ru'íbi' didza'. Jesús budödë'-bi' lu ná'anu xiná'abi'.

¹⁶ Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzo luyú Judea, en yúgu'të yödzo idú gásibi'ilö.

Le rinabë' Juan, bönni' buquilë' bönachi nisa

(Mt. 11:2-19)

¹⁸ Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë,

¹⁹ ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guídë', o naru' ral-la' cöztu'-në' bönni' yúbölö?"

²⁰ Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' cöztu'-në' bönni' yúbölö?"

²¹ La' ná'asö ruúnë' Jesús zián nupa te'e, yugu' bönni' huë', en bönni' yú'ugaca légaquië' bö' xihui', ate' zián bönni' lo chul-la busaljë' guiöj lógaquië'.

²² Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóácaquië' bönni' gü'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulátie'. Ta'yönnë' bönni' yechi' didza' dxi'a.

²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusöl-lë'ë Juan bulu'zë'ë ni', gusí lahuë' Jesús ru'lu'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le?

²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zi' xibé yöl-la' tsahui', nacua' lídxigaquië' bönni' ta'nná bë'ë.

26 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayépisëtërë' ca nu ru'í didza' uláz queë' Dios.

27 Náquië' Juan bönni' na' nazúaj lu guichi lá'ayi ca naca queë', rna: Buyútsöca', risöl-la'-a-në' gubáz quia', inöruë' ca Li'. Bönni' ni uchi'ë nöza ga tödu'.

28 'Neda' rea' libí'ili': Gapa nacua' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' bönachi nisa, pero nu nácatërö cuídi'sö ga rinná bë'ë Dios nayépisëtërö ca Juan na'.

29 Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan,

30 pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

31 Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácagaquië'?

32 Nácagaquië' ca bí'ido' ta'guítjabi'. Ta'bö'öbi' lu yé'ëyi, en ta'bödxí'abi'. Ta'nnabi' tubi' ia'tubi': “Rucódxitu' queéli' gui, pero biti' ruyá'ali'. Rul-la yéchi'tu', pero biti' ribödxili'.”

33 Caní nácali' tu' bidë' Juan, bönni' buquilë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': “Tu' xihui' dzaga lë'.”

34 Cate' bida' neda', Bönni' Guljë' Bönachi, en rë'aj rahua', rnnali' quia': “Bönni' ni náquië' bönni' huágulé'ë, en bönni' re'jë'. Náquië' luzá'agaquië' bönni' tu'quizxjë', en ia'zíca'rë' bönni' dul-la'.”

35 Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

36 Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'.

37 Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiój nazaca' le yudzu tu le rilá' zxixi.

38 Cate' bidxinnu zaca' cúdzu'lë' Jesús, gurö'önu xini'ë ribödxinu. Ní'irö gusí lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi.

39 Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': “La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga.”

40 Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

41 Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjé' que chopa iz, ate' ia'tué' na' ral-lë'ë queë' lazxjé' que chopa beo'.

⁴² Tu' cabí dë quégaquië' dumí ulu'guíxjé' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rnnö'.

⁴⁴ Ní'irö buécjé' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbidá' ni'a, pero nigula ni gulú'unu ni'a nisa ribódxinu, en buzxinu ni'a len guítsa' ícjanu.

⁴⁵ Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a.

⁴⁶ Biti' gulú'u ícja' le za, pero nigula ni gulú'unu ni'a lë na' rilá' zxixi.

⁴⁷ Que lë ni na' rea' lí, dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

⁴⁸ Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bör'lenë' Jesús tahuë' gula'sí lógaquië' tē' luzá'agaquië', ta'nñë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irö Jesús gudxë'-nu nigula na', rnnë':

—Tu' réajlë'u neda', chibuló' lí. Bōaj lidxu', zoa dxi ládXu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudë' Jesús gapa nacua' zían yödzö zxön, en yugu' yödzödo', ate' benë' libán ni', en bē'ë didza' que didza' dxi'a ca rinná bē'ë Dios, ate' idxínnutë' bönni' usëda queë' dzágagaquië' Lë'.

² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzöhuë' gü'iguequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu.

³ Juana, nigula queë' Chuza, bönni' yu'u lu nē'ë le dë lidxë' Herodes, nútsa'nu ca' ládjagacanu, ate' cá'unqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nódzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj bönachi zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, sōjésië' xisedo'. Cate' ni' sōjésië', bulu'huöxaj bal-la xisedo' na' ga naca la' nōza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nōza.

⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë tu' cabí nalupa' yu na'.

7 Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi.

8 Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnné':

—¡Nu zoa nagui, en riyöni ral-la' uzé nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

9 Ní'irö yugu' bönni' uséda queë' Jesús gula'nábinë' Lë', ta'nné':

—¿Bizxi sa'yéaj lë na' bucúdzu'u didza'?

10 Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönachi ni, ru'ílëna' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

Rigúxjö'ë Jesús le rulu'í le bucúdzu'ë didza'

(Mt. 13:18-23; Mr. 4:13-20)

11 Gunné' ca' Jesús:

—Caní naca le rulu'í lë na' bucúdzu'a didza'. Xisedo' na' naca xtídzë'ë Dios.

12 Xisedo' na' bulu'huöxaj la' nöza tu'lu'í ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'.

13 Xisedo' na' bulu'huöxaj lu yu ga rö'ö guiöj tu'lu'í ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huöatë ládxi'do'gaquië'.

14 Xisedo' na' bulu'huöxaj ga bulu'lén lubá yötsi' tu'lu'í ca raca quégaquië' bönni' ta'yönnë' didza' na', en cate' chibila'yönnë', yugu' le tu'í ládxi'do'gaquië' yödzölió ni, en yugu' yöl-la' tsahui' que, en yugu' le ta'yaza ládxi'do'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'.

15 Xisedo' na' bulu'huöxaj ga naca luyú bëbu tu'lu'í ca raca quégaquië' bönni', idú ládxi'do'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ládxi' tunë' ca rnna didza' na'.

Rucúdzu'ë didza' Jesús que le rigú'u bení' lídxiru'

(Mt. 4:21-25)

16 Gunné' ca' Jesús:

—Cuntu nu bönni' ruquélë'ë guí', ate' la' rudúsi'të' le gu'ína, en bití' rigü'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'.

17 Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

18 Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' bití' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë

(Mt. 12:46-50; Mr. 3:31-35)

19 Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala' ga zoë' tu' nacua' bönachi zían ni'.

20 Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' ilu'ilenë' Li' didza'.

21 Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'

(Mt. 8:23-27; Mr. 4:35-41)

22 Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö söjácate'.

23 Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zcan nisa, en zoa bönadxi quégaquië'.

24 Ní'irö gula'bíguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxiada', ate' guzóa dxi bö' na' recja, en gurö'ö dxi lu nísado' na'.

25 Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulë luzá'agaquië' tuë' ia'tué':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

26 Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

27 Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizöë' lu yu'u, pero nun xilatjë' lu zcan bulóaj ga nádjagaca yeru ba.

28 Cate' bönni' na' yu'u bö' xihui' lë' bilé'enë' Jesús, gurödxí'ë zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayëpisëtë're'? Ráta'yua' lo' cabí usaca' zí'u neda'.

29 Caní gunnë' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö.

30 Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zían lea'.

Caní gunná tu' yú'ugaca bö' xihui' zían bönni' na'.

31 Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca.

³² Nacuá'aba' ca' tu có'öba' cuchi zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchi zián na'. Jesús bë'ë léguequi lataj.

³³ Bulu'rúaj yugu' bö' xihui' lu bönni' na', en yöjtsú'ugaca cuchi zián na', ate' yöjácabá' cuchi zián na' ga naca tu lë'e guió. Yöjbíxigacaba' lu nísado', ate' ni' gula'yépiba' nisa, gulátiba'.

³⁴ Cate' bila'lé'enë' bönni' tu'yúgaquië'-ba' cuchi zián na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhuójgaquië' yöjtíxjöi'iguequinë' nupa nacua' yödzö na', en nupa nacua' la' guixi' ni'.

³⁵ Ní'irö bila'rúajë' bönni' yödzö na', yöjyúgaquië' lë na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizóë', ate' guládxinë'.

³⁶ Nupa na' bila'lé'e lë na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'.

³⁷ Ní'irö yúgu'të bönachi zián na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuóje'.

³⁸ Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnnë':

³⁹ —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idúju yödzö ni' ca naca le zxön benë' Jesús queë'.

Jesús ruínë'-bi' bi'i nigula queë' Jairo enca' nigula na' gudannu lari' nácuë'

(Mt. 9:18-26; Mr. 5:21-43)

⁴⁰ Cate' budxinë' Jesús ia'tsölá'a nísado' na', bulu'dzeja bönachi zián nacua' ni' ni'a queë' Lë', tu' ta'böza Lë'.

⁴¹ Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'.

⁴² Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zián Lë'.

⁴³ Nútsa'nu tu nigula ladaj bönachi zián na', chiguca chinnu iz riguí'i rizáca'nu. Biti' ruhuí'i rön queënu que huë' quégaca cázanu nigula, ate' chibutönu dëra le dë queënu, riguízxjanu nupa tu'ún bönachi, pero bití' guca nu bönni' únë'-nu.

⁴⁴ Gubíga'nu zaca' cúdzu'lë' Jesús, en gudannu ruí'i lari' nácuë', ate' la' buí'të huë' rön queënu.

⁴⁵ Ní'irö Jesús gunábinë' nupa nacua' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacua'len lë' gulë' Lë', ta'nnë':

—Bönni' Usedi, nacua' bönachi zián ni, tu'quirö Li', en tu'dxiga' Li', ate' ¿rnnatso': "¿Nuzxi na' gudán neda'?"

⁴⁶ Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruín bönachi.

⁴⁷ Cate' réquibe'enu nigula na' nōzinē' Jesús le bennu, ní'irō guzxízinu. Biyéchunu xini'ē Jesús, en gudíxjōi'inu Lē' lógaca bōnachi zían na' bizx que na' gudannu lari' nácuē', en ca na' guca, la' bōácatēnu.

⁴⁸ Ní'irō Jesús gudxē'-nu:

—Nigúlado', tu' réajlē'u neda' chibōácu'. Bōaj lidxu', zoa dxi ládxi'u.

⁴⁹ Cate' ni' ru'ē Jesús didza' ni, bidxinē' tu bōnni' ni', zē'ē lidxē' bōnni' lo na' que yu'u ga tu'dubē' tu'sedē' queē' Dios, ate' gudxē' bōnni' lo na':

—Chigútibi' bi'i nigúlado' quiu'. Bítirō upízxjanu'-nē' Bōnni' Usedi.

⁵⁰ Cate' biyōnnē' Jesús lē ni, bubí'ē didza', rē' bōnni' lo na':

—Bíti' gádxinu'. Guyéajlē'ēsō Dios. Huōácabi' bi'i nigúlado' quiu'.

⁵¹ Cate' guyáziē' Jesús yu'u na', bití' bē'ē lataj nu tsázalen Lē', pero légacāsē' Pedro, en Jacobo, en Juan, enca' xuz xiná'abi' nigúlado' na'.

⁵² Ta'bōdxi nupa nacua' ni'. Ta'bōdxi yechē'ē ní'a queébi' bi'i nigúlado' na', ate' Jesús rē' légaquiē', rnnē':

—Bítirō cōdxili'. Bíti' nátibi' nigúlado' ni. Rásisibi'.

⁵³ Bulu'titjē' Lē' tu' nōzguequinē' chinátibi'.

⁵⁴ Ní'irō gudélé'ē Jesús ná'abi', en bē'ē zidzaj didza', rnnē':

—Bi'i nigúlado', guyaschi.

⁵⁵ Ní'irō bu'u bō' naca cázabi', bubanbi', ate' la' guyásatēbi'. Jesús gunná bē'enē' légaquiē' ilu'ē le gágubi'.

⁵⁶ Bulu'báninē' xuz xiná'abi', pero Jesús gunná bē'enē' légaquiē' cuntu nu ilē' ca na' guca.

9

Risöl-lē'ē Jesús bōnni' usēda queē' tsōjéngaquiē' libán

(Mt. 10:5-15; Mr. 6:7-13)

¹ Ní'irō butubē' Jesús idxínnutē' bōnni' usēda queē', ate' budödē' lu ná'agaquiē' yöl-la' huáca, en yöl-la' unná bē' para ulu'béajē' bō' xihui' yú'ugaca bōnachi, en ulu'únē' nupa te'e.

² Gusöl-lē'ē légaquiē' tsōjéngaquiē' libán ca rinná bē'ē Dios, en tsōjhuéngaquiē' nupa te'e.

³ Jesús gudxē' légaquiē':

—Bíti' bi guá'ali' para la' nōza, calēga xiyágado', en calēga yōxaj, en calēga yōta, en calēga dumí, en bití' ixóa yenli' chopa lari'.

⁴ Bíti'tēs yu'u ga tsú'uli', guli'sóa ni' cate' uzá'arōli' yōdzō na'.

⁵ Gátí'tēs ga bití' ilún bōnachi libí'ili' bal, buli'rúaj yōdzō na', en guli'cuíbi bēchtō da' lē'e lálali', le uluí' légaquiē' nagá'ana xiguia' nabága'gaquiē'.

⁶ Ní'irō bila'rúajē' bōnni' usēda queē' na'. Gula'dödē' yúgu'tē yōdzōdo', tunē' libán que didza' dxi'a, en tu'únē' nupa te'e yúgu'tē lu yōdzō na'.

Ca gútiē' Juan, bōnni' buquilē' bōnachi nisa

(Mt. 14:1-12; Mr. 6:14-29)

⁷ Biyōnnē' Herodes, bōnni' rinná bē'ē, ca naca yúgu'tē le runē' Jesús, ate' gurō'ē bōniga, tu' ta'nná bōnachi:

—Juan na' chibubané' lu yöl-la' guti.

⁸ Ia'bal-lē' ta'nnē':

—Chibulē'ē Elías, bōnni' na' bē'ē didza' uláz queē' Dios.

Ia'bal-lē' ta'nnē':

—Chibubané' tu bōnni' bítsē'ē yugu' bōnni' gulu'ē didza' uláz queē' Dios dza ni'te.

⁹ Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi
(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yójáquië' tu lataj cá'asö lu xiyú yödzö Betsaida.

¹¹ Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bé'lenë' léguequi didza' ca rinná bé'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsójaca gapa dë yödzödo', en gapa dë yú'udo' idú gásibi'ilö para tsöjtjljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöjjö'öutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Cani gulunë', ate' gula'bö'ë yúgu'të'.

¹⁶ Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzxuzxjë' léguequi, en bé'ë quégaquië' bönni' usëda queë' para ulu'cu'ë lógaca bönachi na'.

¹⁷ Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo
(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Rigúxjö'ë Jesús ca si' ilútië' Lë'
(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'.

²² Ní'irö rë' légaquië':

—Run bayudxi qui'i saca'a neda', Bönni' Guljé' Bönachi, zían le gaca quia'. Ulu'cá'ané' neda' cá'asó yugu' bönni' gula tu'zéajni'iné', en yugu' bixúz unná bē', en yugu' bönni' yudo' usedi. Ilútiē' neda', pero dza tsonna dza Dios usubanē' neda' lu yól-la' guti.

²³ Gudxē' ca' yúgu'tē':

—Channö rē'ēnē' nu bönni' tē'ē neda', ral-la' uzóē' tsólá'alō le dē queē', en gáquiē' ca tu bönni' sa'yéajē' sójtē'ē lē'e yaga cruz, ate' ní'irō gaca tē'ē neda'.

²⁴ Núti'tēs bönni' ruí'i lādxē'ē gun chi'ē yól-la' na'bán queē', unítiē' le, pero channö unítiē' yól-la' na'bán queē' tu' dē'ē neda', bönni' ni gata' yól-la' na'bán idú queē'.

²⁵ Biti' bi uzi'ē xibé tu bönni' channö utubē' queē' yúgu'tē le dē yōdzólió ni, pero unítiē' tsaz yól-la' na'bán queē'.

²⁶ Nu bönni' rutuí'inē' neda', en rutuí'inē' ca' xtídza'a, lē'sca' neda', Bönni' Guljé' Bönachi, utuí'ida' bönni' na' cate' huōda' idinná bē'a, dzágagaca neda' yól-la' zxōn queē' Xuza', en yól-la' zxōn quégaquiē' gubáz lá'ayi queē' Dios.

²⁷ Le nácatē' rea' libí'ili', nacua' bal-lē' bönni' ni biti' ilátiē' cate' ila'lé'erönē' dza idinná bē'ē Dios.

Ridzá' ca riná' lahuē' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudōdi bē'ē Jesús yugu' didza' ni, ní'irō guchē'ē Pedro, en Juan, en Jacobo, ate' gurenē' tu lu guí'ado', ga na' bulidzē' Dios.

²⁹ Tsanni ni' ru'ílenē' Dios didza', bidzá' ca riná' lahuē', ate' böáca chiguí'chido'os lari' nácuē', en guyēpi yōsa bení'.

³⁰ Ní'irō bulu'luí'i lógaquiē' chopē' bönni' ga zoē' Lē' tu'ílenē' Lē' didza'. Nácagaquiē' Moisés, en Elías.

³¹ Chopē' ni gula'yēpē' yōsa bení', ate' tu'ílenē' Jesús didza' ca si' uzē'ē yōdzólió ni, gátiē' lu yōdzó Jerusalén.

³² Sal-la' chirácada' ilásiē' Pedro, en nupa nacua'len lē', bayudxi gula'ná'asē', ate' bila'lē'enē' yól-la' bení' queē' Jesús, en chopē' na' nacua'lenē' Lē'.

³³ Cate' bulu'zē'ē chopē' na' ga na' zoē' Jesús, ní'irō Pedro gudxē' Lē':

—Bönni' Usedi, dxi'a naca zóaru' ni. Gúntsōca'tu' tsonna yu'u lága'do', tu quiu', ia'tú queē' Moisés, en ia'tú queē' Elías.

Biti' réquibe'enē' Pedro bi na' rnnē'.

³⁴ Tsanni ni' ru'ē didza' ni, la' gurō'otē böaj le bugacu légaquiē', ate' guládxinē' tu' nacu'ē lu böaj na'.

³⁵ Ní'irō biyōn chi'i Nu ruí'i didza' lu böaj na', rnna:

—Bönni' ni náquiē' Zxí'ina'. Nadxí'ida' Lē'. Buli'zē' nágali' didza' gu'ē.

³⁶ Cate' budxi bē' didza' chi'i na', tuzē' Jesús nagá'analenē' légaquiē'. Ta'cuá' dxíē' bönni' usēda queē', ate' dza na' cuntu nu gulē' ca naca le bila'lē'enē'.

Ruúnē' Jesús bi'i bönni' yu'u bö' xihui' lēbi'

(Mt. 17:14-21; Mr. 9:14-29)

³⁷ Cate' za' reni' ia'tú dza bulu'huōtjē' Jesús, en bönni' na' dzágagaquiē' Lē' lu guí'ado' na', ate' bila'rúaj bönachi zían dutságagaca Jesús.

³⁸ Ní'irō bē'ē zidzaj didza' tu bönni' nūtsē'ē ladaj bönachi zían na'. Bulidzē' Jesús, rnnē':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'.

³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxóna' ruá'abi', en rurixi rutúluda' lëbi', ate' catu caz rusán lëbi'.

⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libi'ili', en guá' ilena' queëli'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'.

⁴³ Bulu'bani yúgu'të bönachi ni' ca naca yöl-la' huáca zxon queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxon runë' Jesús, Lë' gudxë' yugu' bönni' usëda queë',

⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo.

⁴⁷ Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'.

⁴⁸ Ní'irö rë' légaquië':

—Núti'tës bönni' gunë' bal tu' bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali' nácare' nōxaj ladxi', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén.

⁵² Gusöl-lë'ë yugu' bönni' gubáz queë' ila'nöruë' ca Lë', ate' yójáquië' tu yödzo' quégaca bönachi Samaria para tsöjpá'agaquië' ga ugá'anë' Jesús tu yëla.

⁵³ Yugu' bönni' yödzo' na' biti' gulunë' Jesús bal tu' chinaca queë' sa'yéajë' Jerusalén.

⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjé' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'.

⁵⁶ Bida' ni neda', Bönni' Guljé' Bönachi, calëga para usunitia' yöl-la' na'bán quégaca bönachi, pero bida' dusólá' bönachi.

Ní'irö yójáquië' yödzö yúbölö.

Nupa té'ëni tsójácalen Jesús

(Mt. 8:19-22)

⁵⁷ Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, ré'ënda' sá'lena' Li' gáti'tës ga tseju'.

⁵⁸ Jesús rë' lë':

—Yúgu' böza', nacua' zxan bulóaj quégacaba', ate' biguínido', dxíagaca xcá'agacaba', pero neda', Bönni' Guljé' Bönachi, biti' dë' quia' ga gáta'a uzí' ládxa'a.

⁵⁹ Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuzá'.

⁶⁰ Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégaquië', pero li', guyéaj, yójén libán ca inná bë'ë Dios.

⁶¹ Ní'irö bidxinë' ia'tué' ca', en rë' Jesús:

—Xan, ré'ënda' sá'lena' Li', pero benna neda' lataj tseja' tsöjzégacada'-në' didza' di'a dza quia'.

⁶² Jesús gudxë' lë':

—Núti'tës bönni' ru'í' ládxe'ë le raca yödzölió náquië' ca tu bönni' rugá'anë'-ba' bëdxi, en ruyúé' zaca' cúdzu'lë'. Nu run caní' biti' naca lesaca' tsaza ga rinná bë'ë Dios.

10

Risöl-lë'ë Jesús tsónnalalaj yu' chië' bönni' tsöjéngaquië' libán

¹ Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopa huéajgaquië' para ila'nóruë' ca Lë', en tsójáquië' yúgu'të yödzö, en yödzödo' gapa chizóa tödë' Lë'.

² Gudxë' légaquië':

—Le nácatë, dëda' dxin quia', le naca ca tu la' yëla zxon ga nu tsöjlapa', pero nabábasö huen dxin quia' nacua'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'.

³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' sójacaba' ladjagacaba' bö'cu' guí'a sínia'.

⁴ Biti' guá'ali' yöxaj dumí, en calëga buzudi yöta, en biti' guá'ali' ia'tú cö' xiráchuli', en biti' tseli' para guí'ilenli' bönachi didza' gapa naca la' nöza.

⁵ Gáti'tës yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni."

⁶ Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábalí, pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábalí'.

⁷ Guli'gá'ana yu'u ga na' tsú'uli', en guli'gu'aj guli'gagu bi ilunnë' queéli', tu' udzöli queézinë' bönni' huen dxin le gahuë'. Biti' tödili' yu'u yu'u.

⁸ Gátitës yödzö ga tsú'uli', ate' ilún libí'ili' bal, guli'gagu le ulu'cu'ë loli'.

⁹ Buli'ún nupa te'e nacuá' yödzö na', en guli'guíë léguequi: "Chibidxín le rinná bë'ë Dios ga zóali'."

¹⁰ Gátitës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali':

¹¹ "Bëchtö que lászali' le da' lë'e lábatu' ruquínnajtu', le rulu'í nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'."

¹² Neda' rea' libí'ili', cate' idxín dza ichúguië' Dios quégaca bönachi, ila'gu'í ila'zaca'rö bönachi yödzö ni' ca ila'gu'í ila'zaca' bönachi yödzö Sodoma, nupa ni' busunítië' Dios.

Le gaca quégaca nupa biti' ulu'bí'i lászali' gaca

(Mt. 11:20-24)

¹³ Gunnë' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i lászali'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'í'gaca chibulu'bí'i lászali'gaquië'.

¹⁴ Que lë ni na', cate' idxín dza ichúguië' Dios quégaca bönachi, qu'í sáca'röli' ca ila'gu'í ila'záquië' bönni' yödz Tiro, en yödz Sidón.

¹⁵ Libí'ili', bönachi Capernaum. Réquili' tsázali' yehua' yubá. Huötjali' tsöjtsázali' lataj chul-la quégaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnë':

—Nu ruzé nagui libí'ili', ruzé nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

Bönni' yöjéngaquië' libán tu'dxinë' ga zoë' Jesús

¹⁷ Cate' tsónnalalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

¹⁹ Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a.

²⁰ Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'sö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë',

pero bulu'iguequinu'-bi' bí'ido' ca naca. ¡Ca' gaca, Xuza', tu' caní guyaza ládxi'u!

²² Ní'irö gunné':

—Yúgu'tè budödè' Xuza' lu na'a. Cuntu nu bönni' nözine' Nu náquiè' Zxi'inè' Dios, pero tuzè' Dios Xuz nözine', ate' cuntu nu nözi Nu náquiè' Dios Xuz, pero tuzè' Zxi'inè' nözine', ate' inözigaca ca' nupa na' Zxi'inè' ré'enè' ulu'inè' léguequi Xuzè'.

²³ Ní'irö Jesús buyué' yugu' bönni' usèda queè', en rè' légaquiè':

—Bica' bágaca nupa ta'lé'e le rilé'eli' libí'ili',

²⁴ tu' rea' libí'ili': Zián bönni' gulu'è didza' uláz queè' Dios, enca' bönni' gula'nná bè'è, gulé'ennè' ila'lé'enè' le rilé'eli', pero biti' bila'lé'enè' le. Gulé'ennè' ila'yönnè' le riyönili', pero biti' bila'yönnè' le.

Tu bönni' Samaria, bönni' tsahui'

²⁵ Ní'irö guyasè' tu bönni' yudo' usedi, en para si' bè'è Jesús, gunábinè' Lè', rnnè':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rè' lè':

—¿Bizxi caz nazúaj lu guichi lu xibá queè' Moisés? ¿Nacxi rusaca' quiu' lè na' rulabu'?

²⁷ Bubi'è didza' bönni' na', rnnè':

—Caní rna: "Idxi'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxi'inu' bönni' luzó'o ca nadxi'i cuinu'."

²⁸ Jesús rè' lè':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnè' bönni' na' ubéaj dxi'a cuinë', rè' Jesús:

—¿Nuzxi na' bönni' luzá'a?

³⁰ Bubi'è didza' Jesús, rè' lè':

—Buzè'è tu bönni' Jerusalén, rudínniè', sa'yéajè' yödzo Jericó. La' nöza ni' gula'zönè' gubán lè'. Gula'gúè' lari' nácuè', en gulunè' lè' huè'. Ní'irö bulu'zè'è ni', en nucá'anagaquiè' lè', chirati cazè'.

³¹ Ní'irö gudödè' tu bixúz la' nöza ni'. Cate' bilé'enè' bönni' huè' na', tsölá'alö gudödè'.

³² Gudödè' ca' ni' tu bönni' nababè' zxi'ini xi'sóè' Leví, yugu' bönni' na' tunè' dxin que yudo'. Cate' bilé'enè' lè', tsölá'alö ca' gudödè'.

³³ Lësca' yu'è tu bönni' Samaria nöza na', ate' bidxinè' gala' ga dè' bönni' huè' na'. Cate' bilé'enè' lè', buéchi' ládxi'è lè'.

³⁴ Gubígui'è ga na' dè', ate' gulu'è le za, en xisi uva nál-la lu huè' queè', ate' buchólinè' le lari'. Ní'irö budxi'è lè' cúdzu'ba' böa' queè', en bu'è lè' yu'u ga ta'dxinè' bönni' yú'ugaquiè' nöza, ate' ni' gudapa chi'è lè'.

³⁵ Cate' za' rení' ia'tú dza, en chizóa uzè'è bönni' Samaria na', guléajè' lászjaru' que chopa dza, le bucá'anè' lu nè'è bönni' xan yu'u na', en rè' lè': "Gudapa chi'è bönni' ni, en channö utóu' ia'lati' dumí, ubi'a neda' quiu' cate' huöda'."

³⁶ Na'a, ¿nacxi runi li'? ¿Núzxilè' bönni' yonna ni gúquiè' bönni' luzè'è bönni' na' gulu'è dö' bönni' gubán queè'?

³⁷ Bubi'è didza' bönni' yudo' usedi na', rè' Jesús:

—Bönni' na' buéchi' ládxi'è lè'.

Ní'irö Jesús gudxi'è lè':

—Guyéaj na'a, yójén ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yödžodo' ga ni' tu nigula lënu Marta guchë'ënu Lë' lídxinu.

³⁹ Marta ni zóanu nigula xzílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë.

⁴⁰ Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i xzila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxi'u runu'.

⁴² Tuz le run bayudxi nu gun, ate' María ni guröbi' lë na' nácatëro dxi'a, ate' lë na' guröbi' biti' udúa queëbi'.

11

Ca ral-la' ulídzaru'-në' Dios

(Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'ilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'ilenli'-në' didza', guli'ná: Xuztu', zu' yehua' yubá, gá'ana xzön Lo'.

Gudá inná bë'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila

⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'.”

⁷ ¿Naru' ubi'ë didza' caní bönni' na' zoë' yu'u, guíë' lë': “Biti' utsó'o neda' tu' chinayayaj yu'u, en chidë'lengacabi' bi'i quia' neda', ate' biti' gaca chasa' bi gunna' quiu'”?

⁸ Neda' rea' libí'ili': Sal-la' biti' chasë' bi unödžjë' queë' tu' náquië' böchi' luzë'ë, pero chasë', en unödžjë' queë' idutë le riquinnë' para cabirö upíxjanë' lë'.

⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'.

¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoë' nu bönni' ládjali', en náquië' xuz, ate' channö xzí'inë' inábibi' lë' yöta xtila, ¿naru' unödžjatsë' queëbi' guió? Channö inábibi' lë' tuba' böla, ¿naru' unödžjatsë' queëbi' bëla?

12 Channö inábibi' lë' dxita que böra, ¿naru' unödztatsë' queëbi' xöjnö'?

13 Caní naca, nácali' libí'ili' huiá' dö', pero nözili' unödztjali' quégacabi' xzí'inili' le naca dxi'a. Nácatërö löza Xúzili' zoë' yehua' yubá gunnë' queëli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

14 Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacua' ni'.

15 Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

16 Ia'bal-la bönachi na' gulë'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá.

17 Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzë'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údxi quéguequi.

18 Lë'sca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'?

19 Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'.

20 Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

21 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'.

22 Na'a, channö zë'ë ia'tué' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quisië' le dë queë' bönni' na'.

23 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' ruxín xilataj

(Mt. 12:43-45)

24 Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzí' ladxi'. Channö cabí idzöli que, inná: “Huöja' xilatja' ga ni' birúaja'.”

25 Cate' ruxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'.

26 Ní'irö reaj, en röjxi' ia'gadxi bö' xihui', nácacatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idü

27 Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

28 Bubi'ë didza' Jesús, gunnë':

—Nácacatërö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'.

³⁰ Ca na' guca queë' Jonás, gúquië' tu le naca bë' lógaca bönachi yödzo Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a.

³¹ Cate' idxín dza ichúguië' Dios quégaca bönachi ila'guí' ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí'i nabága'gaca bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'.

³² Lësca' caní, Dios uchisë' bönni' gula'cu'ë yödzo Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí'i nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'.

³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la.

³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o.

³⁶ Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzeni' quiu' guí'.

Jesús ruzégui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', guröë' rahuë'.

³⁸ Cate' bönni' yudo' fariseo na' bilé'enë' Lë', bubábinë' tu' cabí gudibi në'ë Jesús cate' sí' gahuë'.

³⁹ Xanru' rë' lë':

—Libí'ili', bönni' yudo' fariseo, rigui'bi cuinli' ca riguíbili' láhuilögaca le rë'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dö'.

⁴⁰ Libí'ili', bönni' biti' réajni'ili'. ¿Naru' cabí nözili', Nu ben le zoa láchuisö ben ca' le yu'u lé'elö'?

⁴¹ Na'a, guli'gún gun le dë queëli', ate' ní'irö huóaca dxi'a yúgu'të le dë queëli'.

⁴² Bica' bayechi' libí'ili', bönni' yudo' fariseo. Riguíxjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca

guixi' cuando', pero rudödisili' le naca tsahui', en yöl-la' nadxí'i queéli' Dios. Yugu' lè ni run bayudxi gunli', en biti' ucá'anali' ia'zica' lè na' runli'.

⁴³ 'Bica' bayechi' libí'ili', bönni' yudo' fariseo. Rë'ënili' cõ'öli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza bönachi libí'ili' ba zxon gapa naca láhuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö bubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lè':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' caléga láti'do'os biti' ruláhuili' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'.

⁴⁸ Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lè ni na', lu yöl-la' réajni'i queë', Dios gunné' caní: "Isöl-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia ná'li' légaquië'."

⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzülió,

⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhuilö ga dë bucugu lá'ayi ga na' tu'zégui'gaquië'-ba' bõa' bédxido' lahuë' Dios, en ga dë lataj lá'ayi. Que lè ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxi'ini guié que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa tã'ëni ila'yaza.

⁵³ Cate' Jesús budxi bë'lenë' légaquië' didza' ni, bönni' yudo' tu' sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca,

⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zían gayuá' bönachi ga zoë' Jesús ga bidxintë ta'rölisó luzë'eguequi bönachi na'. Ní'irö gusí lahuë' Jesús rë' yugu' bönni' usëda queë cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'.

² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bē'.

³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bē'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'

(Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bítirö bi gaca ilunë' quéquequi.

⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu nē'ë yöl-la' unná bē' chū'unë' libí'ili' lu guí'gabila. Ön, rea' libí'ili', guli'gadxi Nu na'.

⁶ Túti'gaquië'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'.

⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'tëröli' libí'ili' ca zianba' biguínido'.

Nupa ta'nнасö néquiquequi queë' Jesús

(Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios,

⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, biti' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chí'a ulu'söröë' libí'ili', en lógaquië' bönni' dë lu ná'agaquië', biti' ubi uguí'ili' nacxi gunli' o bizxi didza' ubí'ili', o bizxi innali'.

¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

¹³ Tu bönni' núts'ë'ë ladaj bönachi zían na' rë' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

¹⁵ Ní'irö Jesús gudxë' bönachi nacúa' ni', rnnë':

—Buli'yútsöca'. Guli'gún chí'i cuinli' para cabí uhuí'di'li'. Le uzi'ë xibé nu bönni' biti' nácasö le zían le dë queë'.

¹⁶ Ní'irö Jesús bē'lenë' légaquië' didza', bucúdzu'ë didza', rnnë':

—Zöë' tu bönni' rilé'enë' yöl-la' tsahui' queë', ate' runódzjada' gulapa lu xiyúë'.

¹⁷ Ní'irö guzá' ládxe'ë bönni' na', rnnë': “¿Nacxi guntsa'? Biti' dë ga gapa chí'a le rulá' quia'.”

18 Ní'irö rnnë': "Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntëro' ca', ate' gapa chi'a le rulá' quia' ni', len yugu' le dë quia'.

19 Ní'irö gaca guié' cuina': Chidéda' quia' zían le chinutuba', le gáhuída' zían iz. Uzi' ládxa'a. Guí'aj gahua', en udzédada'."

20 Ní'irö Dios rë' lë': "Lí, bönni' biti' bi nözinë'. Na'a dzö' gátui'. Na'a, ¿nuzxi caz guequi que, lë na' chinutubu'?"

21 Caní' raca queë' bönni' rutubë' la' queézë' yöl-la' tsahui', en biti' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

22 Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'.

23 Nácarö lesaca' yöl-la' na' bán queëli' ca le ráguli', ate' nácarö lesaca' idú le nácali' ca lari' ráculi'.

24 Buli'yutëz ca raca quegacaba' boíquiaj. Biti' tázaba', en biti' ta'lápaba', en biti' nacuá' quegacaba' ga ilún chí'iba' le rulá' quegacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguínido'?

25 ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu ruúbi rugu'i ládxi'da'ahuë'?

26 Que lë ni na', channö cabí gaca gunli' lë ni naca cuídi'sö, ¿bizx que ruúbi rugu'ili' ni'a que le naca zxöntëro'?

27 'Buli'yutëz ca ta'zxön yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácgaca yöjdo' ni, sal-la' gúta'da' yöl-la' tsahui' queë'.

28 Channö Dios runë' lachi yöj guíxi'do' rő'gaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácarö dxi'a queëli', libí'ili' na' biti' réajlë'ëli' Dios idú ládxi'li'?

29 Que lë ni na', biti' güí'i ládxi'li' le ral-la' gáguli', en le ral-la' guí'jali', en biti' ubi uguí'i ládxi'do'oli'.

30 Yúgu'të lë ni ta'guilaj bönachi yödzölió ni, pero chinöz quezínë' Xúzili' Dios le riquínili'.

31 Guli'güí' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

Yöl-la' tsahui' rigú'uru' yehua' yubá

(Mt. 6:19-21)

32 Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxi'ë Xúzili' Dios gunné' queëli' lataj tsú'uli' ga ni' rinná bë'ë Lë'.

33 Guli'guti' le dë queëli', en buli'nödzej quegaca bönachi yechi'. Caní gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinë' bönni' gubán, en biti' usunítiba' böa'do' le.

34 Ga ni' dë yöl-la' tsahui' queëli', ni' güí'i ládxi'li' idxinli'.

Ral-la' sóaru' ban ladxi'

35 Gunnë' ca' Jesús:

—Guli'sóa sina', en guli'quela' guí' le uzení' queëli'.

36 Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë.

37 Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'.

38 Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'.

39 Lë ni ral-la' inözili'. La'tu' nözinë' xan yu'u bizxi dza huadxinë' bönni' gubán, usubán ládxë'ë, en bití' gu'ë lataj bönni' na' udxíë' yeru lidxë', para cabí cuanë' le dzö'ö lidxë'.

40 Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza bití' ribözali' neda'.

Bönni' huen dxin tsahui', en bönni' huen dxin bití' náquië' tsahui'

(Mt. 24:45-51)

41 Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdu'u didza', o reo' ca' caní yúgu'të bönachi?

42 Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queégaquië' le ilahuë'.

43 Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë.

44 Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'.

45 Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zica'rë' huen dxin, bönni' en nigula, en isí lahuë' gu'aj gahuë', en súdxinë',

46 ní'irö huödë' xanë' bönni' huen dxin na' cate' bití' ribözë' lë', en cate' bití' réquibe'enë', ate' usaca' zí'ë bönni' huen dxin bití' náquië' tsahui' na', en ichúguië' queë' qui'i sáquië' ca narugu quégaquië' bönni' bití' ta'yéajlë'ë.

47 'Bönni' huen dxin na' nözinë' le ré'ënë' xanë', en bití' zoë' sina', en bití' runë' ca rnnë' xanë', bönni' ni, químitërë' xanë' lë'.

48 Channö cabí nözinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntërö ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi

(Mt. 10:34-36)

49 Gunnë' ca' Jesús:

—Bida' neda' dujéna' ga tsegui guí' yödzölió ni, en caba ládxa'a chinaguéla' guí' na'.

50 Na'a, dë tu le ral-la' qui'i saca'a le naca ca tu le idílda' nisa, ate' rö'a böniga ga idxintë gaca caní quia'.

51 ¿Naru' réquili' bida' dulequi dxía' le raca yödzölió ni? Rea' libí'ili': ¡Caléga! Bida' duléquia' le gun ga ila'rúaj choplö bönachi.

52 Na'a isí lo ulu'lá'alén luzë'eguequi gayu' bönachi nacua' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'.

⁵³ Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula xzoa' lídxinu tá'baga'nu xzoa' lídxinu na', ate' nigula xzoa' lídxinu na' tá'baga'nu xto' xzí'ininu.

Le nácgaca bë' le taca na'a dza
(Mt. 16:1-4; Mr. 8:11-13)

⁵⁴ Jesús gudxë' ca' bönachi zían nacuá' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca.

⁵⁵ Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca.

⁵⁶ Libí'ili', bönni' rulu'isö tsahui' cuinli'. Nözili' le rulu'í le raca lúzxiba, en le raca luyú ni, pero biti' réquibe'eli' le rulu'í le nácgaca bë' taca dza ni zóaru' na'a.

Ral-la' ugá'analenu' tsahui' nu rilé rë'u
(Mt. 5:25-26)

⁵⁷ Gunnë' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'?

⁵⁸ Channö zoa nu bi unabi yudxi li', ate' zéajli' idxinli' yúlahui', bë' ladxi' ugá'analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröë' libí'ili', ate' bönni' uchi'a usöröë' na' udödë' li' lu në'ë bönni' rusayjë' lidxi guië, ate' bönni' na' rusayjë' lidxi guië cu'ë li' lidxi guië na'.

⁵⁹ Rea' li', biti' uruju' ni' cate' údxirö quizxju' yúgu'të dumí lásido' ral-lu'u que nu na'.

13

Run bayudxi ubí'i ládxi'ru'

¹ La' dza ní'sö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quegaquië', le bugútsi'në' xichöngacaba' böa' bëdxi chigulútië' légcaba' para íla'gu'ë xichöngacaba' na' lahuë' Dios.

² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'guí'i gula'zaquië' caní?

³ Rea' libí'ili': ¡Calëga! Channö cabí ubí'i ládxi'li', nítli' ca' yúgu'tëli'.

⁴ Lësca' caní guca quegaquië' chixxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zica'rö bönachi nacuá' Jerusalén?

⁵ Rea' libí'ili': ¡Calëga! Channö cabí ubí'i ládxi'li', nítli' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Røjtiljë' le ribía yaga na', pero biti' bi ridzölinë'.

⁷ Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzöliida'. Guchugu le. ¿Bizx que run nigui luyú ni?”

⁸ Ní'irö bubi'ë didza' bönni' huen dxin na', rë' lë': "Xan, buca'anagarö le ia'tú ízatëz, ate' uzatsa' yu zxani, en cu'a bëbu zxani.

⁹ Channö cuía yaga ni, gaca dxi'a, pero channö cabí bi cuía, ní'irö ichugu' le."

Ruínë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quegaquië'.

¹¹ Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en bití' ca' raca ulí' cuinnu.

¹² Cate' bilé'enë'-nu Jesús, bulidzë'-nu, rnnë':

—Nigúlado', chibóácu' que yödzöhuë' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba.

¹⁴ Ní'irö gulënë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irö bubi'ë didza' Xanru', rnnë':

—Libí'ili', bönni' rulu'isö' tsahui' cuinli', ¿naru' cabí rusédxigacali'-ba' böa' bëdxi que queéli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

¹⁶ Nácanu nigula ni xzí'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tu'finë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacua' ni', tu' ta'lé'enë' yugu' le zxön runë' Jesús.

Rucúdu'ë didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irö rnnë' Jesús:

—¿Nacxi caz raca rizxön le rinná bë'ë Dios, o bizxi uséqui'tseru' le?

¹⁹ Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

Rucúdu'ë didza' Jesús que cúa zi que yöta xtila

(Mt. 13:33)

²⁰ Lëscá' caní rnnë' Jesús:

—¿Bizxi caz uséqui'tseda' le rinná bë'ë Dios?

²¹ Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyaxaj idütë cúa na'.

Tu ga tödiru' le naca guído'

(Mt. 7:13-14, 21-23)

²² Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' bönachi nacua' gapa na'.

²³ Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnnë':

²⁴ —Guli'gü'i ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilë'ëni ila'yaza ni', pero biti' ila'zéqui'në'.

²⁵ Tödi chasë' Xan yu'u, en usayjë' yu'u, isí loli' libí'ili' na' zóali' ní'ilo ulídzali'-në' ra' yu'u na', ate' guié'li'-në': "Xan, Xan, gusalaj queétu'." Ní'irö ubi'ë didza' Lë', en guié' libí'ili': "Biti' nözda' nuzxi libí'ili'."

²⁶ Ní'irö isí loli' innali': "Gü'i gudágulentu' Li', ate' busédinu' gapa naca lu yë'ëyi queétu'."

²⁷ Ní'irö guié' libí'ili': "Rea' libí'ili', biti' nözda' gazxi bönachi libí'ili'. Guli'cuíta ga zoa', yúgu'tëli' ruá'ali' dö'."

²⁸ Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' soáli' ní'ilo.

²⁹ Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios.

³⁰ Ní'irö ilaca lo bal-la bönachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxí yechë'ë Jesús ni'a quégaca bönachi Jerusalén
(Mt. 23:37-39)

³¹ La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¡Burúaj! ¡Buzxunnaj ni! ¡Rë'ënë' Herodes gútië' Li'!

³² Jesús rë' légaquië':

—Guli'tséaj, guli'tsöjödxe' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxö, en cate' gaca lidzaj, údxi guna' dxin quia'."

³³ Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

³⁴ 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxi'gacali'-në' guiöj bönni' gubáz risöl-lë'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' börado' queëba' zxan xíliba', pero biti' gú'unili'.

³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'.

² Zoë' ca' tu bönni' ré'enë' huë' gui ga na' zoë' Jesús.

³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë' lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lé', ate' la' busöl-la'të' lé'.

⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

6 Biti' bi didza' guca ulu'bi'ë ca naca læ ni.

Nu cö' lataj lo

7 Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdu'ë didza', ate' rë' légaquië':

8 —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatërë' lo ca li'.

9 Ní'irö bönni' na' bulidzë' li' huidë' ga zu', en guíë' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö.

10 Que læ ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön.

11 Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

12 Jesús rë' ca' bönni' na' bulidzë' Lë', rnnë':

—Cati' gunu' tu güf'i huagu o tu lanído', biti' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí' quiu'.

13 Cate' gunu' tu güf'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la.

14 Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí' quiu' cate' idxín dza ulu'bán nupa gulún le naca tsahui', en gulátigaca.

Rucúdu'ë didza' Jesús que tu laní zxön

15 Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ní' rinná bë'ë Dios.

16 Jesús rë' lë':

—Zoë' tu bönni' benë' laní zxön, ate' zían nupa bulidzë'.

17 Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!"

18 Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo gunnu' neda' lataj."

19 Ia'tué' rnnë': "Si' guzxi'a gayu' nözaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj."

20 Ia'tué' rnnë': "Si' butsaga na'a, en que læ ni na' biti' gaca guída'."

21 Cate' böajë' bönni' huen dxin na', yöjtíxjöi'inë' xanë' yúgu'të læ ni. Ní'irö gulënë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nöza que yödzö ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la."

22 Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë' lataj."

23 Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para íli' lidxa'.

24 tu' rea' libí'ili': Biti' gahuë' que laní quia' nitúë' bönni' ni' bulidza' zí'alö'."

Le sáca'ru' cate' zéajlenru'-në' Cristo

²⁵ Yugu' dza ni' rōjácálen Jesús bōnachi zían, ate' buécjē' Jesús, en rē' légaquiē':

²⁶ —Channō guídalenē' neda' tu bōnni', en biti' idxí'irōnē' neda' ca nadxí'inē' xuz xinē'ē, en nigula queē', en yugu' zxi'inē', en yugu' bi'i bōchē'ē, en yugu' bi'i zanē', en yōl-la' na'bán queē', biti' gaca gáquiē' bōnni' usēda quia'.

²⁷ Nu bōnni' biti' gáquiē' ca tu bōnni' sa'yéajē' sōjtē'ē lē'e yaga cruz, ate' tē'ē neda', biti' gaca gáquiē' bōnni' usēda quia'.

²⁸ Channō zoē' nu bōnni' ladaj libí'ili' guē'ēnnē' gunē' tu yu'u zían cuía, ¿naru' cabí cō'ē zí'alō ulabē' gáca'xi dumí ral-la' utōē' para inōzinē' channō dē queē' tsa le riquinnē' para údxi gunē' yu'u na'?

²⁹ Channō cabí gunē' caní, en isí lahuē' cuéquiē' xilibi yu'u na', ate' biti' gaca údxi gunē' yu'u na', ní'irō ila'sí lógaca yúgu'tē nupa ila'lē'e le ulu'titaj lē',

³⁰ ila'nná: “Bōnni' ni gusí lahuē' runē' yu'u, pero biti' guca údxi gunē' le.”

³¹ Lē'sca' caní, channō zoē' nu bōnni' rinná bē'ē, en ral-la' tsejē' gudil-la tsōjtíl-lalenē' ia'túē' bōnni' rinná bē'ē, ¿naru' cabí cō'ē zí'alō, en cuéqui icjē' channō séqui'nē' tsōjtíl-lalenē' bōnni' ni' nachē'ē galaj milē' bōnni', ate' lē' chí mīlsē' bōnni' nachē'ē?

³² Channō cabí séqui'nē', cate' ni' zoē' zi'tu' ia'túē' bōnni' na' rinná bē'ē, isōl-lē'ē bōnni' gubáz queē', ate' inábinē' lē' nacxi ral-la' gunē' para ulu'dzáguiē' dxi'a.

³³ Caní naca, channō zoē' nu bōnni' ladaj libí'ili' biti' ucá'anē' yúgu'tē le dē queē', biti' gaca gáquiē' bōnni' usēda quia'.

Zōdi' le naniti yōl-la' siná'a que

(Mt. 5:13; Mr. 9:50)

³⁴ Gunnē' ca' Jesús:

—Dxi'a naca zōdi', pero channō initi yōl-la' siná'a que, ¿nacxi gaca úniru' le siná'a?

³⁵ Bítirō nazaca' zōdi' na', calēga para luyú, en calēga para ga rirú'uniru' bēbu, pero chú'unaru' le ní'ilō. Nu zoa nagui, en riyōni, ral-la' uzē nagui nu na'.

15

Rucúdzu'ē didza' Jesús ca naca queēba' bō'cu' zxila' gunítiba'

(Mt. 18:10-14)

¹ Bulu'dubē' yúgu'tē bōnni' tu'quízxjē' lázagaca bōnachi, en yugu' bōnni' cá'asō ga zoē' Jesús para ulu'zē náguiē' Lē'.

² Que lē ni na' yugu' bōnni' yudo' fariseo, en yugu' bōnni' yudo' usedi gula'nnē' queē' Jesús, ta'nnē':

—Bōnni' ni runē' bal yugu' bōnni' dul-la', en rágulenē' légaquiē'.

³ Ní'irō bucúdzu'ē didza' Jesús, rē' légaquiē':

⁴ —Channō zoē' tu bōnni' ladaj libí'ili', nacuá'aba' queē' tu gayuá'aba' bō'cu' zxila', en channō nítiba' tuba', ¿naru' cabí ucá'anē' ia'zica'rōba' tápalalaj yu' chēnnaba' na' ga naca lu lataj cá'asō, ate' tsejē' tsōjdiljē'-ba' bō'cu' zxila' na' nanítiba', cate' udzōlirōnē'-ba'?

⁵ Cate' udzōlinē'-ba', lu yōl-la' rudzeja queē' ixóē'-ba' ya' zxicjē',

6 en cate' udxinë lidxë' utubë' yugu' böchi' luzë'ë, en yugu' dzaga yu'u queë', ate' guié' légaquië': "Buli'dzéjalen neda', tu' chibudzöllda'-ba' bö'cu' zxila' quia' gunitiba'."

7 Rea' libí'ili': Lësca' caní' gácatërö yöl-la' rudzeja yehua' yubá ni'a queë' tuë' bönni' dul-la' ubí'i ládxi'ë ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bí'i ládxi'gaquië'.

Rucúdzu'ë didza' Jesús que tu dumí guniti

8 Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', çnaru' cabí uquéla' nu guí, ate' ulúanu yu'u, uguilaj yúdxinu le cate' udzölrönu le?

9 Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzöllda' dumí plata na' guniti."

10 Rea' libí'ili': Lësca' caní, ulu' dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxi'ë.

Rucúdzu'ë didza' Jesús queëbi' tu bi'i gunitibi'

11 Rnnë' ca' Jesús:

—Zoë' tu bönni' nacu'abi' chópabi' bi'i bönni' queë'.

12 Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísië' quégacabi' le dë queë'.

13 Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zí'tu', ate' ni' butöbi' dërö le dë queëbi'. Le ruá' dö' benbi'.

14 Cate' chibutöbi' dërö le dë queëbi', guca gubín lu yödzo ga na' zóabi', ate' biyadzaj queëbi'.

15 Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusól-lë'ë-bi' ga dë xiyúë' tsöjgágubi'-ba' yugu' cuchi queë'.

16 Guca ládxi'bi' gágubi' guixi' cá'asö na' táguba' cuchi, pero cuntú nu bi bë' le gágubi'.

17 Ní'irö bubí'i ládxi'bi', rnnabi': "Cate' xö bönni' huen dxin nacu'ë lidxë' xuzá, en dëda' le tahuë', pero neda' ni huáti caza' yöl-la' ridún.

18 Uzá'a ni, huója' ga zoë' xuzá, en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'.

19 Bítirö naca' neda' lesaca' gaca' xzí'ínu'. Ben neda' ca bönni' huen dxin quiu'."

20 Ní'irö guyú'ubi' nöza, söhuóajbi' ga zoë' xúzibi'.

'Cate' ni' zóabi' zí'tu' suzá'abi', bilé'enë'-bi' xúzibi', en buéchi' ládxi'ë-bi'. Carelö yöjzxi'galë'-bi' xúzibi', en yöjnidë' yenbi', gudahuë'-bi' zxixi.

21 Ní'irö xzí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' xzí'ínu'."

22 Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'tërö, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'.

23 Guli'tsöjzxi'-ba' bëdxi renni', ate' guli'guti-ba'. Gáguru'-ba', en gunru' laní,

24 tu' guca bi'i bönni' quia' ni ca tu bi'i chinátibi', ate' bubanbi'. Gunitibi', ate' chibulá'abi' na'a." Ní'irö gula'sí lógaquië' tu'dzéjanë'.

25 Tsanni ni' raca lë ni, zóabi' bi'i bönni' zí'aló queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huó'a lu yu'u na'.

²⁶ Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca.

²⁷ Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'."

²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gú'tayuë' lobi' tsú'ubi'.

²⁹ Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxlá'do' para gü'ílëna' xibé yugu' luzá'a.

³⁰ Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'."

³¹ Ní'irö xúzibi' rë'ë-bi', rnnë': "Zxí'ina', li' zóalen casu' neda' ate' yúgu'të le dë quia', quiu' nequi.

³² Ben bayudxi gunru' laní, en udzëjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunitibi' ate' chibulá'abi'."

16

Rucúdzu'ë didza' Jesús queë' bönni' huen dxin biti' náquië' tsahui'

¹ Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zëguie' bönni' huen dxin na' lahuë' xanë', ta'nnë' queë' rutösë' le dë queë' xanë' na'.

² Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'? Buluí'i neda' le naca bë' dxin nunu', tu' cabirö gata' lu no'o uláz quia'."

³ Ní'irö guzá' lãdxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuf'ida' inaba' nu bi gúnna'sö quia'.

⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zì' neda' lídxiguequi.

⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?"

⁶ Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gur'ötë ni, en buzúaj ia'tú lu guichi le inná chi-un rö'ö chugu ral-lu'u."

⁷ Gudödi ni' gunábinë' ia'túé', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoá' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u."

⁸ Réquibe'enë' xanë' na' sína'të benë' bönni' huen dxin biti' náquië' tsahui' na'. Caní naca, nácacagarë' sina' bönni' yödzölió ni lu le tunë' la' légcasë', ca nácacaca bönachi ta'dalen Dios lu bení' queë'.

⁹ 'Neda' rea' libí'ili': Gulí'cözalen bönachi dxi'a, ugunli' dxin yöl-la' tsahui' dë queë'li' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ 'Nu rugún dxi'a dxin tu le cuídí'sö dë lu në'e, lësca' ugún dxi'a dxin tu le zxon gata' lu në'e. Nu biti' rugún dxi'a dxin tu le cuídí'sö dë lu në'e, biti' ugún dxi'a dxin tu le zxon gata' lu në'e.

11 Que lë ni na', channö cabí rugunli' dxi'a dxin yöl-la' tsahui' dë queëli' yödžölió ni, ¿nuzxi caz udödi lu ná'ali' yöl-la' tsahui' le naca idú?

12 Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quežzili'?

13 'Biti' gaca nitüé' bönni' huen dxin guné' xichíngaca chopa xanë', tu' udí'inë' tué', en idxí'inë' ia'tué', o guné' bal tué', en uzóé' tsólá'aló ia'tué' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödžölió.

14 Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quegaquië', que lë ni na' bulu'titjé' Jesús.

15 Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nöžinë' Dios le yu' u'icja ládxi'do'oli', tu' naca lë na' tun zžön bönachi tu le ruzóé' Dios tsólá'aló.

Xibá queë' Moisés, en le rinná bë'ë Dios

16 Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

17 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

18 Gunnë' ca' Jesús:

—Channö tu bönni' ulá'alënë' nigula queë', ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alënë' nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

19 Ní'irö bucúdzu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquiní.

20 Zoë' ca' ni' tu bönni' yéchi'do' lë' Lázaro, bönni' rinabë' nu bi unödžaj queë', ate' huë'tëžë' rö'ë ra' yu'u queë' bönni' na' rilé'enë' yöl-la' tsahui'.

21 Raca ládxe'ë bönni' yéchi'do' na' gahuë' le bizxaj tu'huöxaj zžani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'.

22 Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba.

23 Cate' ni' riguí' rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zì'tu', en dzáguië' Lázaro na' lë'.

24 Ní'irö bë'ë zidžaj didza', rnnë': "Xuza', Abraham, buéchi' ladxi' neda'. Gusöl-la' Lázaro quia' para usubisë' xibön në'ë, en udusuhoálé' lúdxa'a, tu' riguí' rizáca'a lu guí' ni."

25 Abraham rë' lë', rnnë': "Zxí'ina', busá ládxi'u ca guca quiu', buzi'u xibé yöl-la' tsahui' tsánni ni' zu' nabanu', pero Lázaro ni, guca queë' yöl-la' yéchi', ate' na'a, ruzí' zžönë' Lázaro ni, pero li' riguí' rizácu'u.

²⁶ Ia'stú, tu ra' guí'a sibi rö', le zoa gatsaj láchui'lö ga ni' zóali' libí'ili', en ga ni' zóatu' netu'. Que lë ni na' nupa nacuá' ni, en ilé'ëni ila'dödi ga zóali' libí'ili', bití' ca' gaca iluné' ca', en bití' gaca ilida ni nupa nacuá' ni'."

²⁷ Ní'irö bönni' na' bilé'ené' yöl-la' tsahui' rë' lë', rnnë': "Xuza' Abraham, ráta'yua' lo' isöl-lu'u-në' Lázaro tsejè' lidxë' zuza',

²⁸ tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí' guídigaquië' ca' lataj ga ni riguí' rizáca'a."

²⁹ Ní'irö Abraham rë' lë', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zé náguië'."

³⁰ Bubi'ë didza' bönni' na' bilé'ené' yöl-la' tsahui', rnnë': "Xuza' Abraham, bití' gaca caní, pero channö ubanë' tu bönni' lu yöl-la' guti, en tsejè' ga na' nacu'ë, ulu'bí'í ládxi'gaquië'."

³¹ Abraham rë' lë', rnnë': "Channö cabí tu'zé náguië' didza' bë'ë Moisés, en le gula'nnë' bönni' gulu'ë didza' uláz queë' Dios, bití' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la'

(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'.

² Dxí'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bí'í néquibi' quia'.

³ Guli'gún chi'i cuinli'. Channö böchi' luzó'o gu'ë dö' quiu', buzéajni'ine', en channö ubí'í ládxe'ë, buniti lo lë'.

⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' lí: "Rubí'í ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídí'sö yöl-la' réajlë' queéli' Dios, nácasö ca tu xisedo' mostaza, huáca guiéli' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, guró'ö gagu'?"

⁸ ¿Caléga! Caní guíë' lë': "Bupá'a le gahua'. Guzóa sina' cu'u le guí'aj gahua', ate' tódíro na' huáca guí'aj gagu' lí'."

⁹ ¿Naru' huëtsë' bönni' nadó'o queë' na': "Xclenu'", tu' benë' ca gunná bé'enë' lë'? Runi neda', bití' gunë' caní.

¹⁰ Lë'sca' caní gaca queéli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chië bönni té'enë huë nudzu' ruzödi

¹¹ Tsanni ni' yu'ë Jesús nöza, sa'yéajë' Jerusalén, ridödë' gapa dë yödzoödo' nabábagaca luyú Samaria, en luyú Galilea.

¹² Cate' guyázië' tu yödzoödo', bila'rúajë' dutsáagagaquië' Lë' chië' bönni' té'enë huë nudzu' ruzödi, ate' gula'cu'ë zí'tu'sö,

¹³ en tu'ë zidzaj didza', ta'nnë':

—Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' söjáquië', bulu'huóáquië' dxi'a.

¹⁵ Ní'irö tuë' bönni' nútsë'ë ládjagaquië', cate' réquibe'enë' chinuhoóáquië' dxi'a, böajë' ga na' zoë' Jesús, ru'ítica'së' zidzaj didza', rigu'ë Dios yöl-la' ba.

¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu!"

Bönni' ni nababë' Samaria.

¹⁷ Ní'irö Jesús rë' lë':

—¿Naru' cabí bulu'huóáquië' dxi'a chië' bönni'? ¿Gazxi nacua'tsë' ia'zica'rë' bönni' na'?

¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zí'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chibóácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, bití' naca le ilé'eli'.

²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Bulí'yútsöca'! ¡Rinná bë'ë Dios lu icja ládxi'do' gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero bití' ilé'eli' le.

²³ Ila'cuá' nupa ilë libí'ili': "¡Ni zoë'!", o ila'nná: "¡Ni' zoë'!" Bití' tséajli' ni', en bití' tséajlenli' légaquië'.

²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi.

²⁵ Zí'alö ca gaca lë ni, run bayudxi quí'í sáca'da', ate' bönachi dza ni zóaru' na'a ulu'cá'ana neda' cá'asö.

²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi.

²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxi'inigaquië' lu yöl-la' rutsaga na' ga bidxintë dza guyázië' Noé lë'e barco zxon na' nazí'í le arca, ate' bidxintë nisa guió'j usuniti yödzoölió le busuniti yúgu'të'.

²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'.

²⁹ Cate' bidxín dza na' burúajë' Lot lu yödzo Sodomá, böxaj guí' ca tu nisa guió'j, enca' le ruzéguida' nazí'í le azufre, ate' bulu'suniti yúgu'të'.

³⁰ Lësca' caní gaca cate' idxín dza uluí'í lahua' neda', Bönni' Guljë' Bönachi.

³¹ 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöjë' lidxë'.

³² Guli'sá' ládxi'li' ca guca queënu nigula queë' Lot.

³³ Nu bönni' rë'ënë' gun chí'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélë'ë le.

³⁴ 'Rea' libí'ili': Cate' idxín rëla na', ila'cu'ë chopë' bönni' tsözxón ga tasië', ate' tuë' uduzxi'a-në', en ia'túë' ucá'ana' lë'.

³⁵ Ila'cuá'anu huëtu tsözxón chópanu nigula, ate' tunu uduzxi'a-nu, en ia'tunu ucá'ana'-nu.

³⁶ Ila'cu'ë chopë' bönni' la' guixi', ate' tuë' uduzxi'a-në', en ia'túë' ucá'ana' lë'.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

¹ Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ládxi'ru'.

² Rnnë':

—Zoë' tu bönni' ruchi'a rusöröë' tu yödzö, bönni' biti' rádxinë' Dios, en biti' runë' nu bönni' bal.

³ La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnanu: "Buchi'a busörö le run quia' nu ruá' dö' quia'."

⁴ Xidzé biti' gú'unnë' bi gunë' queënu, pero gudödi ni' guzá' ládxi'ë, rnnë': "Biti' rádxida'-në' Dios, en biti' runa' nu bönni' bal,

⁵ pero tu' rupíxjanu nigula uzëbi ni neda', que lë ni na' uchi'a usöröa'-nu, para cabí guídati'ca'sinu ni, en para cabí tódi bë' upíxjanu neda'."

⁶ Ní'irö Xanru' rë' légaquië', rnnë':

—Guli'zë nágali' ca na' gunnë' bönni' ruchi'a rusöröë' na', bönni' biti' náquië' tsahui'.

⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'?

⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzólida' nupa ta'yéajlë' neda' luyú ni?

Tu bönni' yudo' fariseo, en tu bönni' uquíxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaqië', en tu'cá'anë' cá'asö ia'zica'rö bönachi.

¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquíxjé' lázagaca bönachi.

¹¹ Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquíxaj ni.

12 Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'tè le rata' quia'."

13 Guzóazè' zi'tu' bönni' uquíxaj na', en biti' böázxjanè' ichisa lahuè' uyúé' lúziba, pero gudapè' luchu'è, rnnè': "Dios, buéchi' ladxi' neda', bönni' dul-la'."

14 Neda' rea' libí'ili: Böajè' lidxè' bönni' uquíxaj na', nuhuóáquiè' tsahui' lahuè' Dios, calèga ia'tué' bönni' ni'. Núti'tès bönni' run ba zxön cuinè', gunè' Dios ga huöta' igulé', pero nu bönni' rizóé' nöxaj ladxi', gunè' Dios ga gácarè' lo.

Jesús rulidza tsáhuè'è-bi' yugu' bí'ido'
(Mt. 19:13-15; Mr. 10:13-16)

15 Ní'irö' bila'dxinè' yugu' bönni', en nigula ga zoè' Jesús, nachè' gaquiè'-bi' yugu' bí'ido' quégaquiè' para ixóa nè'è Jesús légacabi'. Cate' bila'lé'enè' yugu' bönni' usèda queè' Jesús lè ni, gula'dil-lè' légaquiè'.

16 Ní'irö' Jesús bulidzè' yugu' bönni' dá'gaquiè' Lè', rnnè':
—Gulí'gú'i-bi' lataj ila'dxinbi' bí'ido' ni ga zoa'. Biti' uzága'li xinózagacabi', tu' gata' quégaca nupa nácgaca ca bi'i caní lataj ga rinná bè'è Dios.

17 Le nácatè rea' libí'ili: Nu cabí si' lu nè'e le rinná bè'è Dios, ca runbi' tubi' bí'ido', biti' ca' tsaza ga ni' rinná bè'è Lè'.

Tu bönni' rilé'enè' yöl-la' tsahui'
(Mt. 19:16-30; Mr. 10:17-31)

18 Tu bönni' unná bè' gunábinè' Jesús, rnnè':
—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

19 Jesús rè' lè':
—¿Bizx que rè'u neda': "Idú dxi'a"? Cuntu nu bönni' náquiè' idú dxi'a. Tuzè' Dios náquiè' idú dxi'a.

20 Nöz quézinu' yugu' le gunná bè'è Dios:
Biti' gunu' dul-la' le riguitsaj xibá que yöl-la' nutsaga na'.
Biti' gútigacu' bönachi.
Biti' cuanu'.
Biti' innío' que luzó'o le cabí nácatè.

Ben bal xuz xinó'o.

21 Bönni' na' rè' Jesús, rnnè':
—Yúgu'tè lè ni runa' ga gudela' naca' bí'ido'.
22 Cate' biyönnè' Jesús didza' ni, rè' lè':
—Ia'tú le riyadzaj quiu' gunu'. Bèti' yúgu'tè le dè quiu', ate' lè na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö' gudá, gudá' neda'.

23 Cate' bönni' na' biyönnè' didza' ni, ruhuí'innè', tu' dèda' yöl-la' tsahui' queè'.

24 Cate' bilé'enè' Jesús ca na' ruhuí'innè' bönni' na', rnnè':
—¡Bica' böniga gaca, ila'yaza nupa ta'lé'e yöl-la' tsahui' ga rinná bè'è Dios!

25 Gácarö tödiba' böa' nagui yötsi', ca tsáziè' tu bönni' rilé'enè' yöl-la' tsahui' ga rinná bè'è Dios.

26 Ní'irö' nupa bila'yöni didza' ni gula'nná:
—¿Nuzxi caz gaca ulá, channö?

27 Jesús gudxè' légaquiè':
—Le biti' gaca ilunè' bönni', huáca gunè' Dios.

28 Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

29 Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' zxi'inë', tu' ruí'i ládxë'ë inná' bë'ë Dios, 30 bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús riguúxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

31 Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi.

32 Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza zi'ë neda', en ulu'chejë' neda' zxöna'.

33 Ila'guinë' neda', ate' tódirö ni' ilútië' neda', pero cate' gaca tsonna dza ubana'.

34 Biti' gula'yéajni'inë' bönni' usëda queë' didza' ni, en bití' guléquibe'enë' ca sa'yéaj le ruí'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

35 Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnna'sö queë'.

36 Bönni' ni' biyönnë' ta'dödi bönachi zían ni', ate' gunabë' bizxi na' raca.

37 Bönachi ni' tē' lë':

—Jesús, bönni' Nazaret, ridödë' ni.

38 Ní'irö bönni' na' nachul-la lahuë' bē'ë zidzaj didza', rnnë':

—¡Jesús, zxi'ini xi'sóë' David, buéchi' ladxi' neda'!

39 Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bē'ë didza', rnnë':

—¡Zxi'ini xi'sóë' David, buéchi' ladxi' neda'!

40 Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

41 —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huóálaj guiöj lahua'.

42 Jesús rë' lë':

—Chibóálaj guiöj lo'. Chibóácu' tu' réajlë'u neda'.

43 La' ní'isö bul'é'tenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacua' ni', en bila'lé'e lë' na' guca gula'gú'u Dios yöl-la' ba.

19

Jesús, en Zaqueo

1 Ní'irö guyazië' Jesús yödzö Jericó, en ridödë' lu yödzö na'.

2 Zoë' tu bönni' lë' Zaqueo ni', bönni' lo' ládjagaquië' bönni' uquízaj, ate' dë yöl-la' tsahui' queë'.

³ Ruí'í láchx'è bönni' ni ilé'enè' Jesús, pero biti' guca queé' tu' nacua' bönachi zían ni', en náquiè' bönni' ga r'è'èdo'.

⁴ Ní'irö carelö yöjnöruè' lógaca bönachi zían na', ate' yöjchenè' tu lu yaga para gaca ilé'enè' Jesús, tu' ral-la' tödè' ni'.

⁵ Cate' bidxinè' Jesús ni', guchisa lahuè' ruyúè' ga na' dxíè' Zaqueo na', en r'è' lè':

—Zaqueo, bötjatè lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatè' Zaqueo lu yaga, ate' lu yöl-la' rudzeja queé' guchè'è Jesús lidxè'.

⁷ Cate' bila'lé'e bönachi nacua' ni' lè ni, gula'sí lógaquiè' yúgu'tè' ta'nnè' queé', ta'nnè':

—Guyáziè' Jesús ugá'analènè' bönni' dul-la'.

⁸ Ní'irö guzuínè' Zaqueo, en r'è' Xanru':

—Xan, buyútsöca'. Gatsaj le dè quia' gu'a quégaca bönachi yechi', en channö bi gudödi bè' buquizxja' bönachi, ubi'a quégaca bönachi na' tapa cö'telö ca'.

⁹ Jesús r'è' lè':

—Na'a dza ni bidxín yöl-la' rusölá quégaca nupa nacua' yu'u ni, tu' nababè' bönni' ni di'a dza queé' Abraham.

¹⁰ Bida' neda', Bönni' Guljè' Bönachi, ududilja', en udusölá' nupa nanítigaca.

Rucúdzu'è didza' Jesús que chi cö' dumí

¹¹ Tsanni ni' ta'yönnè' didza' ni ru'è Jesús, r'è' légaquiè' le rucúdzu'è didza', tu' chizóa'ila'dxinè' yödzö Jerusalén, ate' téquinè' chizóatè' ilá' lahui le rinná bè'è Dios.

¹² Caní rnnè' Jesús:

—Zoè' tu bönni' lo, sa'yéajè' tu yödzö zi'tu' para si' lu nè'è yöl-la' unná bè', ate' ní'irö huödè'.

¹³ Cate' chizóa' tsejè' ni' bulidzè' chiè' bönni' huen dxin queé', en bè'è que queégaquiè' tu cö' huéaj dumí, ate' r'è' légaquiè': "Guli'guílajlen dumí ni tsanni huöda'."

¹⁴ Yugu' bönni' uládz queé' biti' ta'lé'enè' lè' dxi'a, ate' gula'söl-lè'è yugu' gubáz quégaquiè' ga ni' tsejè', ila'nnè': "Biti' r'è'ènitu' inná bé'enè' bönni' ni netu'."

¹⁵ Ní'irö guzxí' lu nè'è yöl-la' unná bè', ate' budxinè' ladzè'. Cate' bidxinè' ni' gunná bé'enè' nu tsöjlidza yugu' bönni' huen dxin na' budödè' lu ná'agaquiè' dumí na', para inózinè' gáca'xi bulu'guílajlenè' le tu tuè'.

¹⁶ Cate' bönni' zí'alö na' bidxinè' lahuè', rnnè': "Xan, tu cö' dumí quiu' na' chibén icja ia'chí cö' ca'."

¹⁷ Xanè' na' r'è' lè': "Tshai' benu'. Nacu' huen dxin tshai'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö."

¹⁸ Ní'irö bidxinè' ia'tué' bönni' huen dxin na' lahuè' lè', rnnè': "Xan, tu cö' dumí quiu' na' chibén icja ia'gayu' cö' ca'."

¹⁹ Xanè' na' r'è' ca' lè': "Inná bé'enu' gayu' yödzö."

²⁰ Ní'irö bidxinè' ia'tué' lahuè' lè', rnnè': "Xan, ni dè tu cö' dumí quiu' na'. Ben chi'a le, butúlida' le lari'."

²¹ Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'."

22 Ní'irō xanē' na' rē' lē': "Nacu' huen dxin biti' naca tsahui'. Ni'a que didza' bē'ōa uchi'a usōrōa' li'. ¿Réquibe'enu' naca' bōnni' bizxaj: Ruzi'a le cabi' buzōa', en rulapa' ga biti' guza'?"

23 Na'a, ¿bizx que biti' yōjlú'u dumí quia' na' ga gun icja, para cate' huōda', uzi'a le idú len icja na'?"

24 Ní'irō rē' nupa nacua' ni': "Guli'cúa lu nē'ē dumí na', ate' guli'gū'i queē' bōnni' na' dē queē' chi cō' dumí."

25 Légaquiē' tē' lē': "Xan, chidē queē' chi cō' dumí."

26 Ní'irō bubi'ē didza' xángaquiē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxōni lādxi'gaca lē' ia'late', pero nu biti' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e.

27 Ca naca quégaquiē' bōnni' ni' biti' ta'lé'enē' neda' dxi'a, en biti' gulē'ennē' inná bé'eda' légaquiē', guli'tsōjzxi' légaquiē' para ídigaquiē' ni, ate' guli'guti légaquiē'."

Len yōl-la' ba zxōn raziē' Jesús yōdzō Jerusalén

(Mt. 21:1-11; Mr. 11:1-11; Jn. 12:12-19)

28 Cate' budxi gunnē' caní Jesús, buguelē'ē xinōzē', sa'yéajē' zaca' yōdzō Jerusalén.

29 Cate' bila'dxinē' gala' ga nacua' yōdzō Betfagé, en yōdzō Betania, ga naca ra' guí'ado' nazí'i le Guí'a Yaga Olivo, gusól-lē'ē Jesús chopē' bōnni' usēda queē',

30 ate' rē' légaquiē':

—Guli'tséaj yōdzōdo' ni' ca dōdilō ga zóaru', en cate' idxinli' ni', tsōjxáca'li'-ba' tuba' búrrodo' nága'ba' ni', búrrodo' na' cuntu nu ribíani lēba'. Guli'sedxi-ba', en guli'duchē'-ba' quia' ni.

31 Channō zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnē'-ba'."

32 Sōjáquiē' bōnni' usēda queē' na' nasól-lē'ē, ate' yōjxáca'gaquiē'-ba' ca na' chigudxē' Jesús légaquiē'.

33 Cate' gula'sedxē'-ba' búrrodo' na', yugu' bōnni' xanba' tē' légaquiē':

—¿Bizx que risédxili'-ba' búrrodo' na'?"

34 Bulu'bi'ē didza', ta'nnē':

—Xanru' riquinnē'-ba'.

35 Gula'chē'ē-ba' ga na' zoē' Jesús. Cate' chigula'xōē' yugu' lari' tsólá'a quégaquiē' cúdzu'ba' búrrodo' na', bulu'dxíē' Jesús cúdzu'ba' lahui lari' na'.

36 Gapa ral-la' tōdē' Jesús, gula'chiljē' lari' quégaquiē' la' nōza.

37 Cate' chibila'dxinē' gala' ga zoa lidinni que Guí'a Yaga Olivo, lu yōl-la' rudzeja quégaquiē' gula'sí lógaquiē' yúgu'tē bōnni' dá'gaquiē' Jesús, tu'ē zidzaj didza', ta'gu'ē Dios yōl-la' ba, ni'a quégaca yugu' yōl-la' huáca zxōn bila'lé'enē' benē' Jesús.

38 Ta'nnē':

—¡Yōl-la' ba bōnni' unná bē' ni zē'ē uláz queē' Xanru' Dios! ¡Yehua' yubá za' le ribequi dxi lādxi'ru'! ¡Yōl-la' ba Dios!

39 Ní'irō yugu' bōnni' yudo' fariseo nús'a'gaquiē' ladaj bōnachi zían ni' tē' Jesús, ta'nnē':

—¡Bōnni' Usedi, gudil-la yugu' bōnni' usēda quiu'!

40 Bubi'ē didza' Jesús, rē' légaquiē':

—Rea' libí'ili': Channō ila'cuá' dxíē' bōnni' ni, yugu' guiōj hualuí'i caz zidzaj didza'.

41 Cate' bidxinë' Jesús gala' ra' yödzo na', en rilé'enë' le, ní'irö ribödxë' que,

42 rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le.

43 Huala'dxin queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lé'alö, ate' yúgu'tè lataj idú gásibi'ilö ilúnlenë' libí'ili' gudil-la.

44 Ulu'quínajë' zö'ö run chi'i yödzo queéli', en ilútië' nupa nacua' lu yödzo ni. Biti' ugá'ana guiøj lahuí luzë'e. Yúgu'tè lë ni gaca queéli' tu' cabí gúquibe'eli' dza bidë' Dios buduyúë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

45 Ní'irö guyázië' Jesús lö'a yudo', en gusí lahuë' rubéajë' ní'ilö yúgu'tè nupa tuti', en nupa to'o ga naca lö'a yudo'.

46 Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

47 Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzo ilútië' Lë'.

48 Biti' bulu'dzölinë' nacxi ilútië' Lë', tu' idú ládxi'gaca tu'zë nágagaca yúgu'tè bönachi xtídzë'ë.

20

Yöl-la' unná bë' dë lu në'ë Jesús

(Mt. 21:23-27; Mr. 11:27-33)

1 Tu dza, cate' ní' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë',

2 ate' tē Jesús:

—Gudixjö'i' netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ní'?

3 Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'.

4 ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

5 Gulún xtídzagaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guië' rë'u: “¿Bizx que biti' guyéajlë'ëli'-në'?”

6 Channö guiëru'-në': Gula'söl-lë'ë yugu' bönni' lë', bönachi lu yödzo ni ulu'ladxi' rë'u guiøj, tu' nöziguequi bë'ë didza' Juan na' uláz queë' Dios.

7 Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

8 Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nácagaquië' tsahui'

(Mt. 21:33-44; Mr. 12:1-11)

9 Ní'irö la' gusí lotë' Jesús ru'ílenë' bönachi nacua' ní' didza'. Rucúdzu'ë didza', rnnë':

—Zoë' tu bönni' budé'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjé' len lë' le ulu'zi'ë, ate' guyijé' zi'tu' ga ni' bugá'anë' xidzé.

¹⁰ Cate' bidxín dza ulu'chibë' uva luyú na', gusól-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lë'ë lë' cá'asö.

¹¹ Leyúbölö gusól-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö.

¹² Leyúbölö gusól-lë'ë quégaquië' bönni' bunni gubáz queë', ate' bulu'dxié' ca' lë' huë', en bulu'béajë' lë' ní'ilo luyú na'.

¹³ 'Ní'irö guzá' láchë'ë xani luyú na', gunné': "¿Nacxi guntsa'? Isól-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal."

¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë, ta'nnë': "Bi'i ni guequi queë'bi' luyú ni. Guli'dá, gútiru'-bi', para guequi queëru' le ral-la' guequi queë'bi'."

¹⁵ Bulu'béajë'-bi' ní'ilo luyú na', en gulútië'-bi'.

'Na'a, ¿nacxi caz gunë' xani luyú na' quégaquië'?

¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacuá' ni' bila'yöni lë ni, gula'nnë':

—¡Inná Dios biti' gaca caní!

¹⁷ Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiöj na' gula'rú'unë' bönni' huen zö'ö,

guiöj ni chinaca guiöjlen squin zö'ö?

¹⁸ Núti'tës nu ibixi lahui guiöj ni, quitsaj nu na', ate' nu bönni' tsöjbága' guiöj ni lë', uzzuzxaj lë'.

Ca naca dumí ta'guizxaj lázagaca bönachi

(Mt. 21:45-46; 22:15-22; Mr. 12:12-17)

¹⁹ La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero guládxinë' bi ilún bönachi zían nacuá' ni'.

²⁰ Ní'irö bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'lu'i cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César.

²¹ Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchí'a rusöröu' ca naca le tu'lu'i'sö lahui bönachi, pero idütë li naca ca rusédinu' xibá queë' Dios.

²² Gudíxjöi'i netu'. ¿Naru' run bayudxi quizxaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bë'ëli' neda'?

²⁴ Buli'lu'i'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

²⁵ Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

²⁶ Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'báinë' ca naca didza' bubí'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷ Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bíla'dxinë' ni', ate' gula'nábinë' Jesús, ta'nnë':

²⁸ —Bönni' Usedi, Moisés buzúajë' queëru' lu guichi, le rnna: “Channö gátie' nu bönni', ate' ugá'ananu nigula queë', en channö cuntú nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.”

²⁹ Gula'cuá'abi' gadxi bi'i bönni' nácagacabi' böchi'bi', ate' bi'i zí'alö na' butsaga ná'alénbi' bi'i nigula, en gútibi', bití' zóabi' bi'i queëbi'.

³⁰ Ní'irö bi'i buropi na' butsaga ná'alénbi'-nu nigula na', ate' gútibi' ca' bi'i ni, bití' zóabi' bi'i queëbi'.

³¹ Butsaga ná'alénbi'-nu bi'i bunni na', ate' la' tuz ca gulunbi' igádxitëbi', ate' gulátibi', bití' zóabi' bi'i quégacabi'.

³² Ga búdxitë, gútinu ca' nigula na'.

³³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

³⁴ Ní'irö bubí'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzjë'-bi' zxi'nigaquië' para ulu'tsaga ná'agacabi'.

³⁵ Na'a, nupa nácagaca lesaca' ulu'bán lu yöl-la' guti, en tsöjcuá' yödzölió sí' gata', bití' ilún yöl-la' rizóalen nigula, en bití' ulu'tsaga ná'agaca.

³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxi'ini cazë' Dios.

³⁷ Ca na' ral-la' ulu'bán nupa chinátigaca, ruluí'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob.

³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítí'rö bulu'rúguinë' ila'nábinë' Lë' didza'.

¿Nuzxi zxi'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' zxi'inë' David”?

⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu zxi'bigaca lo' nupa ta'dá'baga' Li'.”

⁴⁴ David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' zxi'inë'?

Jesús ruzéqui'ë diza' bönni' yudo' tu'sédinë'
(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacua' ni' tu'zë nágagaca Jesús, rë' yugu' bönni' usëda queë':

⁴⁶ —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë' nácugaquië' lari' tunna, en té'ënnë' ulu'lidza bönachi légaquië' zxon gapa naca lu yë'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'.

⁴⁷ Ta'gúë' lídxigacanu nigula uzëbido', ate' para ulu'lu'í tsahui' cúngaquië', xidzé tu'lidzë' Dios. Yugu' bönni' ni, yënni'tërö gunë' Dios ga ila'gu'í ila'záquië'.

21

Gun le gulú'unu tu nigula yechi' lahuë' Dios
(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu gu'ina que dumí gun que yudo'.

² Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os.

³ Rnnë' Jesús:

—Le nácatë rea' libí'ili', tu le zxon'tërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí.

⁴ Yúgu'të, tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigú'xjö'ë Jesús ca ulu'sunítië' yudo'
(Mt. 24:1-2; Mr. 13:1-2)

⁵ Nacua' ni' nupa tufí didza' ca naca que yudo' na', ca na' nazí'i biquitaj que, yugu' guiój nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶ —Yúgu'të lë ni rilé'eli', huadxín dza cate' bití'rö ugá'ana guiój lahui luzë'e ni, tu' ulu'suníti bönachi yudo' ni.

Le ilaca bë' cate' si' idxín dza údxi
(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸ Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'.

⁹ Cate' yönili' raca gudil-la, en ta'dá'baga' bönachi yúlahui', bití' gadxi idzóbili', tu' run bayudxi ilaca le caní, pero bití' zuitëni dza údxi.

¹⁰ Ní'irö rë' ca' légaquië':

—Til-la tu yödzo len ia'tú yödzo, ate' bönachi tu ga nu rinná bë' ila'díl-lalen bönachi ia'tú ga nu rinná bë'.

11 Tödigaca budó' zxu', ate' zián lataj gaca gubín, en ilatsaj yödzöhué' zxön. Ila'lá' lahui lúzxiba le ilún gadxi bönachi, en le ilaca bé'.

12 'Zí'atélö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dubé' tu'sédë' queë' Dios para ilútië' libí'ili', en ila'gu'ë libí'ili' lidxi guíë. Ila'chë'ë libí'ili' lógaquië' bönni' ta'nná bé'ë, en lógaquië' bönni' lo, tu' dá'ali' neda'.

13 Gaca caní queëli' para séqui'li' gunli' ba nali' quia' neda'.

14 Tsutsu guli'gún ládxi'li', para cabí cuéqui ícjali' zí'alö nacxi innali' uláz queëli',

15 tu' gunna' queëli' didza' ubí'ili', en yöl-la' réajni'i, para cabí gaca ulu'cul-lé' libí'ili', en para cabí gaca bi ila'nnë' que xtídza'li' bönni' ni' biti' ila'lé'enë' libí'ili' dxi'a.

16 Ní'irö xuz quezili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quezili', en yugu' böchi' luzé'e quézili', ate' ilútië' bál-lali'.

17 Yúgu'të bönachi ulu'zóa libí'ili' tsölá'alö tu' dá'ali' neda',

18 pero biti' initi nitú guitsa' ícjali'.

19 Channö ugá'anali' tsutsu, idéli'li' yöl-la' na'bán idú.

20 'Cate' ilé'eli' bönni' rójáquië' gudil-la nagú'ugaquië' lë'a Jerusalén, inözili' chibidxín dza initi yödzö ni.

21 Ní'irö nupa nacua' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacua' lu yödzö ni ral-la' ila'rúaj ni, ate' nupa nacua' la' guixi', biti' ral-la' ulu'dxín lu yödzö ni.

22 Yugu' dza ni' Dios gunë' xíguia' nupa nacua' yödzö ni para gaca yúgu'të le nazúaj lu guichi lá'ayi ca ral-la' gaca quegaquië'.

23 Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxinu-bi' bí'ido', tu' ila'gui'i ila'záca'da' bönachi nacua' ni', ate' Dios gúndë'ë bönachi ni' xíguia'.

24 Ilátië' zíanë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idütë yödzólió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quegaquië'.

Le ilaca bé' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)

25 Gunnë' ca' Jesús:

—Ní'irö ila'cuá' le ilaca bé' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chí'i guziú' yu que nísado', en que le riyasa ridxía nisa na'.

26 Ulu'dú ládxi'gaca lu yöl-la' radxi queguequi tu' ila'zá' ládxi'gaca quegaca le ral-la' ilaca lu yödzólió, en ila'zxizi le nalá'gaca lúzxiba.

27 Ní'irö ila'lé'enë' neda', Bönni' Guljë' Bönachi, guida' lu böaj lúzxiba, dë lu na'a yöl-la' unná bé', ate' ilá' lahui yöl-la' zxön quia'.

28 Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

29 Jesús gudxë' ca' légaquië' tu le bucúdzu'ë didza', rnnë':

—Buli'yútsöca' ca raca que yaga higo, en que bíti'tës yaga yúbölö.

30 Cate' rilé'eli' ta'lén ni'a në'e hué'ënido', nöz quézili' chizá' gala' cusu ba.

31 Lësca' caní, cate' ilé'eli' chitaca yugu' lë ni, inözili' chizá' gala' dza idinná bé'ë Dios luyú ni.

32 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni.

33 Ila'dödi que lúzxiba, en que luyú ni, pero xtídza'a, bití' tódi cá'asö, tu' idxín caz ca rnna.

34 'Guli'gún chi'i cuinli' para cabí gü'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulé'e, en yöl-la' rizudxi, en yöl-la' ruubi rugu'í, para cate' idxín dza ni', cabí sóali' niti ladxi',

35 en para cabí gaca queëli' ca tu le rizón bönachi, ca naca le gaca quegaca yúgu'të bönachi nacuá' idütë yödzölió.

36 Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljé' Bönachi.

37 Lahui' dza rizöë' Jesús chila yudo', rusédinë' bönachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo.

38 Yugu' zila bila'dxín yúgu'të bönachi ga zoë' Jesús chila yudo' para ulu'zë náagagaca xtídzë'ë.

22

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

1 Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na',

2 bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéqui'në' tu' tádxinë' bi ilún bönachi.

3 Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo.

4 Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'.

5 Bulu'dzéjanë' bönni' yudo' na', en gula'zí' lu ná'agaquië' ulu'nödzjé' queë' dumí.

6 Raza ládxe'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

7 Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua.

8 Jesús gusól-lë'ë Pedro, en Juan, rnnë':

—Guli'tséaj, guli'tsójpá'a queëru' le gáguru' dzö' Laní Pascua.

9 Të' Lë':

—¿Gazxi rë'ënu' tsöjpá'atu' queëru'?

10 Jesús rë' légaquië', rnnë':

—Buli'yútsöca', cate' tsú'uli' lu yödzö ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'.

11 Guli'guië' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?"

12 Ní'irö uluí'në' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

13 Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

14 Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bó'lenë' Lë' tsözxön.

15 Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'.

16 Rea' libí'ili': Bítí'rö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

17 Gudélé'ë Jesús tu zxíga'do', en gudxë' Dios: “Xclenu.” Ní'irö rë' légaquië':

—Guli'sí' lë ni, en guli'gu'aj lati' huéaj,

18 tu' rea' libí'ili': Bítí'rö guí'ja' xisi uva cate' idxinrö le rinná bë'ë Dios.

19 Ní'irö gudélé'ë yöta xtila, en gudxë' Dios: “Xclenu.” Gudödi ni' buzxuzxjë' le, en bë'ë que queëgaquië', rnnë':

—Lë ni naca idütë le naca' le rudöda' uláz queëli'. Guli'gún caní para usá' ládxi'li' neda'.

20 Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queëli'.

21 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön.

22 Le nácatë huayija' ga ilütie' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

23 Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tuí' i xtídzagaquië' núzxilógaquië' gáquië' lo

24 Ní'irö gulu'ë didza' la' légacasë' núzxilógaquië' idéli'në' lataj lo.

25 Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quëgaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen.

26 Libí'ili' bití' ral-la' gunli' caní, pero nu naca lo ládjali' ral-la' gaca ca nu naca cuídí'tërö, ate' nu rinná bë' ral-la' gaca ca nu run dxin quëguequi luz'ë.

27 ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

28 'Libí'ili' ni guzóalenli' neda' cate' ni' bi guca quia', yugu' le gula'zí' bë' neda'.

29 Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'.

30 Caní guna' para gaca cö'öli', en guí'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' zxi'ini xi'sóe' Israel.

Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Jn. 13:36-38)

31 Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila,

32 pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlé' quiu' neda'. Na'a, cate' huöacu' quia', butipa ládxi'gaquië' böchi' luzó'o.

³³ Pedro rē' Lē':

—Xan, chizóa' sá'lena' Li', calégasō tseja' lidxi guíë, pero lësca' gátilena' Li'.

³⁴ Jesús rē' lē':

—Pedro, rea' li': Zí'alō cōdxiba' bōra na'a, chigudá'bagu'u tsonna luzuí, innó' cabí núnbē'u neda'.

Le benē' Jesús cate' chizóa ilútiē' Lē'

³⁵ Jesús gunábinē' légaquiē', rnnē':

—Cati' gusól-la'a libí'ili' cabí nuá'ali' yōxaj yōta, en caléga buzudi dumí, en caléga chopa cō' xiráchuli', ¿naru' bi biyadzaj queéli'?

Légaquiē' ta'nnē':

—Bití' bi.

³⁶ Ní'irō rē' légaquiē':

—Na'a, nu dē yōxaj yōta que ral-la' guá' le, ate' lësca' caní ral-la' gun nu dē que buzudi dumí, ate' nu bití' dē que guíë tuchi' ral-la' guti' lari' rixóa yeni, en si' tu guíë tuchi'.

³⁷ Rea' libí'ili': Run bayudxi gaca quia' lē na' nazúaj lu guichi lá'ayi, rna: “Gulunē' queē' ca tunē' quégaca nupa tua' dō”, ate' ilaca yúgu'tē le nazúajgaca lu guichi ca ral-la' gaca quia'.

³⁸ Ní'irō légaquiē' ta'nnē':

—Xan, ni dē chopa guíë tuchi'.

Lē' rē' légaquiē':

—Chinaca.

Jesús rulidzē' Dios la' yēla Getsemaní

(Mt. 26:36-46; Mr. 14:32-42)

³⁹ Ní'irō birúajē' Jesús, en ca run cazē' sa'yéajē' lu Guí'a Yaga Olivo, ate' yugu' bōnni' usēda queē' sōjácalenē' Lē'.

⁴⁰ Cate' bila'dxinē' ni', Jesús rē' légaquiē', rnnē':

—Bulí'lídzē' Dios, inábili'-nē' cabí gata' lataj si' bē' tu' xihui' libí'ili'.

⁴¹ Ní'irō Jesús guzē'ē ga na' nacu'ē, en gudödē' ia'lati' tsa ga ridxín tu guió'j rirú'uniru', ate' ni' buzóa zxi'bē', en rulidzē' Dios.

⁴² Rnnē':

—Xúz, channō rē'ēnu', bucuása ga zoa' lē na' ral-la' quí'i saca'a, pero caléga ca rē'ēnda' neda', pero ca rē'ēnu' Li' gunu'.

⁴³ Ní'irō bulufí' lahuē' gubáz lá'ayi queē' Dios, zē'ē yehua' yubá, ate' butipē' ládxi'ē Jesús.

⁴⁴ Lu yöl-la' risēbi ladxi' queē', idú ládxi'ē Jesús bulidzē' Dios, ate' nisa yōsa queē' guca ca rōn raba' luyú.

⁴⁵ Cate' budxi bulidzē' Dios, guyasē', en bōajē' ga na' nacu'ē bōnni' usēda queē', ate' duxáquiē' légaquiē' tásiē' tu' tu'huí'inigaquiē'.

⁴⁶ Ní'irō Jesús rē' légaquiē':

—¿Rásitsali'? ¡Guli'chasa, en bulí'lídzē' Dios! Inábili'-nē' cabí gata' lataj si' bē' tu' xihui' libí'ili'.

Ta'zōnē' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ē didza' Jesús, la' bila'dxintē' bōnni' zían ni', ate' Judas, bōnni' na' nababē' idxínnuē' bōnni' usēda queē' Jesús dzáguíē' légaquiē', ate' nanōruē' lógaquiē' bōnni' zían na'. Gubíguí'ē ga zoē' Jesús para utsaga lahuē' Lē'.

⁴⁸ Ní'irō Jesús rē' lē':

—Judas, ¿naru' rudödito' caní neda', Bönni' Guljé' Bönachi, rutsaga lo' neda'?

⁴⁹ Cate' yugu' bönni' na' nacuá'lené' Jesús bila'lé'ené' ca na' raca queé' Lè', tē' Lè':

—Xan, ¿naru' güi'itu' légaquié' guié tuchi'?

⁵⁰ Tué' bönni' uséda queé' Jesús bené' hué' guídi náguié' bönni' huen dxin queé' bixúz lo. Burixé' guídi náguié' ibéla.

⁵¹ Jesús rnné':

—Chinaca na'a. Tsca' gaz.

Gudané' Jesús guídi náguié' bönni' huen dxin na', en buné' le.

⁵² Ní'iró rē' yugu' bixúz unná bē', en bönni' dē lu ná'agaquié' que yudo', en bönni' gula tu'zéajni'iné', bönni' na' bití' ta'lé'ené' Lē' dxí'a, rnné':

—¿Narúajtsali' nuá'ali' guié tuchi', en yaga para sönli' neda' ca runli' rizönli'-né' gubán?

⁵³ Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxín dza queéli', le naca dza dē lu nē'e nu na' zoa lataj chul-la.

Rnné' Pedro: "Bití' núnbē'a-nē' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'iró gula'zöné' Jesús, en gula'ché'ē Lē' ga na' bulu'sudxiné' Lē' lidxé' bixúz lo. Pedro yöjnahué' Jesús zí'tu' zí'tu'sö.

⁵⁵ Cate' ni'a nē'ē bixúz lo chigula'béquié' guí' lö'a lidxé' bixúz lo na', gula'bō'ē idú gásibi'ilö ra' guí' na', ate' Pedro gurō'lené' légaquié' tsözxön.

⁵⁶ Cate' tubí' bi'i nigula huen dxin bilé'ebi'-né' Pedro, ni' rō'ösē' ra' guí', buyubi' lē', en rnnabi':

—Bönni' ni dē'ē ca' Jesús.

⁵⁷ Gudá'baguié' Pedro, rnné':

—Nigúla, bití' ca' núnbē'a-nē' bönni' na'.

⁵⁸ Ia'lati' gudzé ia'tué' bönni' bilé'ené' Pedro, ate' rnné':

—Li' do'o ca' légaquié'.

Pedro gunné':

—Bönni', calēga neda'.

⁵⁹ Ia'lati'sö gudzé, gunné' ia'tué' bönni':

—Le nácatē bönni' ni dē'ē Jesús, tu' náquié' bönni' Galilea.

⁶⁰ Ní'iró Pedro gunné':

—Bönni', bití' nözda' bizxi na' ru'u didza' que.

Tsanni ni' ru'ē didza' ni, la' gurödxitéba' böra.

⁶¹ Ní'iró buécjē' Xanru', en ruyúé' Pedro, ate' yöjnené' Pedro xtídzē' Xanru', ca na' gudxé' lē': "Zí'aló cödxiba' böra na'a, li' chigudá'bagu'u tsonna luzuí, innó' bití' núnbē'u neda'."

⁶² Burúajé' Pedro ní'ilö, ate' rön caz gurödxé'.

Tu'titjē' Jesús

(Mt. 26:67-68; Mr. 14:65)

⁶³ Yugu' bönni' na' nazöngaquié' Jesús bulu'titjē' Lē', ate' gula'guínē' Lē'.

⁶⁴ Ní'iró bulu'sayjē' lahué' Jesús, ate' gula'gápē'ē lahué', en gula'nábinē' Lē', ta'nné':

—¡Gunnéya'atsöca! ¿Nuzxi na' gudapa' Li'?

⁶⁵ Zíánrö ca' gula'nné' queé' le gulu'ē dö' queé'.

Ridxiné' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë',

⁶⁷ ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda',

⁶⁸ en channö inábida' libí'ili' tu didza', biti' ubí'ili' didza', en biti' usanli' neda'.

⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyóniru' didza' ru'ë.

23

Ridxiné' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuínë' yúgu'të bönni' zían ni', ate' gula'chë'ë Jesús lahuë' Pilato,

² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guízxaj laz ruquízxjé' César, en rnnë' lë cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnnö'.

⁴ Ní'irö Pilato gudxë' yugu' bixúz unná bë', en bönachi nacua' ni', rnnë':

—Biti' bi rudzöllida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxiné' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea.

⁷ Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzëjanë', tu' chiguca xidzé rë'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'.

⁹ Ní'irö Herodes gunábinë' Jesús le zían, pero Jesús biti' bi didza' bubí'ë.

¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'.

11 Ní'irö Herodes, en bönni' queë röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato.

12 Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'tuë'.

Ta'chúquië' queë' Jesús gátië'

(Mt. 27:15-26; Mr. 15:6-15; Jn. 18:39-19:16)

13 Ní'irö butubë' Pilato yugu' bixúz unná bë', en bönni' dë lu ná'agaquië', en bönnachi lu yödzo,

14 ate' rë' légaquië':

—Djujá'ali'-në' bönni' ni lahua' neda', rnnali' queë' runë' ga tu'tsatsa bönnachi, pero cate' gunabi yúdxida'-në', ate' zóatëli' ca' ni, biti' bi budzöliida' le naca xíguia' nabáguë'ë, yugu' lë na' ruzéguii'-në' didza'.

15 Cate' gusöl-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'.

16 Na'a usaca' zi'a-në', ate' tódi na' usana'-në'.

17 Run bayudxi tu le gunë' Pilato, usané' lu ná'agaca bönnachi tuë' bönni' nadzunë' cate' raca laní na', ca na' run cazë'.

18 Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busané' queëtu' Barrabás.

19 Nadzunë' Barrabás na' lidxi guié' tu' gudíl-lalenë' yúlahui' lu yödzo na', en tu' bëtië' bönnachi.

20 Bulidzë' Pilato légaquië' leyúbölö, tu' rë'ënë' usané' Jesús.

21 Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

22 Ní'irö Pilato gudxë' légaquië' le bunny luzuí, rnnë':

—¿Bizxi caz le ruá' dö' benë' bönni' ni? Biti' bi budzöliida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

23 Zidzajrö gulu'ë didza', ta'nabë' të'ë Jesús lë'e yaga cruz. Tu' gula'bödxí'ë yenni' yugu' bönni' na', en yugu' bixúz unná bë', gula'déli'në' gaca ca na' té'ënnë'.

24 Ní'irö Pilato guchúguië' queë' Jesús, para gaca queë' ca na' ta'nabë'.

25 Busané' quégaquië' bönni' na' nadzunë' lidxi guié' tu' gudíl-lalenë' yúlahui', en bëtië' bönnachi, bönni' na' chigula'nabë', ate' budödë' Jesús para gaca queë' ca na' té'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzo Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzulë' Jesús.

27 Bönnachi zían, enca' yugu' nigula sönjógaca Jesús, ta'bödxinu nigula na', en ta'bödxí yéchi'nu queë' Lë'.

28 Ní'irö buécjë' Jesús, en ruyüë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxí que quézili', en quégacabi' zxi'inili'

29 tu' huadxín dza ila'nná: “Bica' bágaca yugu' nigula huödx, en nigula biti' guluá'anu-bi' bí'ido', en biti' bulu'gádxí'nu-bi' bí'ido'.”

30 Ní'irö ila'sí lógaca ila'nná bönnachi, ilë' yugu' guí'a sibi: “Guli'dubága' netu'”, en ilë' ca' yugu' guí'ado': “Guli'cachí' netu'.”

³¹ Channö caní tunë' quia' neda', naca' ca tu yaga ya'a, ¿naru' cabí ilúnterë' ca' queéli', nácali' ca yaga bidxi?

³² Gula'ché'ë ca' chopë' bönni' tuá' dö', para ilútië' légaquië' tsözxön len Jesús.

³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'tué' bulu'dë'ë cuita lë'ë yögöla.

³⁴ Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queëgaquië' le nácuë' Jesús, en bulu'quitjë' le gaca bë' lahui.

³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usólá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi,

³⁷ ta'nnë':

—Channö nacu' Li' bönni' inná bé'enë' bönachi judío, busólá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latin, en lu didza' hebreo, le rnna caní: “Bönni' Rinná Bé'enë' Bönachi Judío.”

³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busólá cuinu', enca' netu'.

⁴⁰ Bubi'ë didza' ia'tué' bönni' huiá' dö' na', en gudil-lë' luzë'ë na', rnnë':

—¿Naru' cabí rádxinu'-në' Dios? Lëscá' li' narugu quiu' gátiau'.

⁴¹ Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la iduté yödzülió ga bidxinrö idú ridödi xihuó.

⁴⁵ Guchul-la gubidza, ate' lari' nal-la' lu yudo' biröza' chopa dí'ilö.

⁴⁶ Ní'irö bë'ë zidzaj didza' Jesús, rnnë':

—Xuz, rigú'a lu no'ö bö' naca caza'.

Cate' budxi gunné' caní, birúajtë bö' naca cazë', gútië'.

⁴⁷ Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

⁴⁸ Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuöjgaquië' yödzo, ta'gapa' luchú'ugaquië' tu' tu'báninë'.

⁴⁹ Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yöjácalennu Lë' cate' ni' gudë' luyú Galilea, ate' tu'yúë' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzo Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús.

⁵³ Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e gu'a guiój, ate' lu ba na', cuntu nu nagú'iguequinë'.

⁵⁴ Dza na' naca dza tu'pë'ë que dza lá'ayi quégaquië' bönni' judío, tu' si' idxin dza na'.

⁵⁵ Yójácanu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'ë Lë' ni'.

⁵⁶ Cate' yójhuöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zi' ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxin dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu lé'gacanu ia'bál-lanu nigula.

² Cate' bila'dxinnu ni', bila'lé'enu chinadúa guiój na' gudá' ga nu riyaza yeru ba queë'.

³ Cate' gula'yázanu yeru ba na', biti' bulu'dzölinu zoa Xanru' Jesús ni'.

⁴ Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuinë' ga na' nacuá'anu.

⁵ Ní'irö guládxinu, en bulu'zötaj íc'gagacanu, tu'yunu lu yu, ate' chopë' gubáz lá'ayi na' tē' lé'gacanu, ta'nnë':

—¿Bizx que ruguíajli' nu zoa nabán xilataj nu nati?

⁶ Biti' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea.

⁷ Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjné'gacanu didza' na' bë'ë Jesús,

⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zícá'rë' ca', ca naca lë na' guca.

¹⁰ Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu lé'gacanu.

¹¹ Guléquinë' bönni' gubáz na' tu'ínu didza' chixi, en biti' gula'yéajlë' lé'gacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxintë' Emaús

(Mr. 16:12-13)

13 La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén.

14 Yú'ugacasë' ca' nöza, tu'ë didza' ca naca yúgu'të lë na' guca.

15 Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön.

16 Biti' bulu'únbë'ë Lë' tu' naca ca tu le nabaga' guiöj lógaquië'.

17 Ní'irö Jesús gunábinë' légaquië', rnnë':

—¿Bizxi didza' na' ru'íli' la' libí'isili' yú'uli' nöza? ¿Bizx que na' ruhu'ínili'?

18 Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzo' Jerusalén, en tuzu' li' bití' nözinu' lë na' guca néaje nasi ni'?

19 Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxon benë' dxin, en bë'ë didza' lahuë' Dios, en lógaca yúgu'të bönachi.

20 Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dë'ë Lë' lë'e yaga cruz.

21 Netu' bentu' löza gúquië' Lë' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lë ni.

22 Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza,

23 en cate' bití' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légacanu zoë' nabanë' Jesús.

24 Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

25 Ní'irö Jesús gudxë' légaquië':

—Libí'ili', bönni' bití' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios.

26 ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisetërë'?

27 Ní'irö gusí lahuë' Jesús riguíxjöi'inë' légaquië' yúgu'të le ru'íi didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

28 Cate' bila'dxinë' yödzodo' ga na' söjáquië', benë' Jesús ca tu bönni' zéajtërë' zi'tu'.

29 Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'.

30 Cate' ni' Jesús rö'ë rágulenë' légaquië', gudélé'ë yöta xtila, en gudxë' Dios: "Xclenu'." Ní'irö buzzuxzjë' le, en bë'ë quégaquië'.

31 La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'.

32 Ní'irö gulë luzë'ë tuë' ia'túë':

—¿Naru' cabí böála'tica' ládxi'do'oru' tsanni ni' ru'ílenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

33 La' ní'sö gula'zuínë' yõjhuõjgaquië' Jerusalén, ate' yõjxáca'gaquië' nudúbigaquië' idxinéajtë' bönni' gubáz queë' Jesús, en nupa nacua'len légaquië'.

34 Ní'irö yugu' bönni' na' nacu'ë ni' gulë' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

35 Ní'irö chopë' na' gula'guíxjõ'ë ca na' guca quégaquië' la' nõza, en ca na' bulu'únbë'ë Jesús cate' ni' buzuzxjë' yõta xtíla na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

36 Tsanni ni' tu'ë didza' ca náacagaca lë ni, la' yõjsóatë' Jesús gatsaj láchui'lö ga na' nacu'ë, ate' rë' légaquië':

—Guli'sóa dxi ládxi'li'.

37 Ní'irö guladxi gula'dzõbinë' tu' téquinë' bixín ta'lé'enë'.

38 Jesús rë' légaquië':

—¿Bizx que rõ'õli' bõniga? ¿Bizx que rizá' ládxi'li' yugu' lë ni?

39 Buli'yútsõca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

40 Ní' ruí'së' ca' didza' ni, buluí'inë' légaquië' në'ë, en ni'ë.

41 Tu' tu'dzëjaguequinë' biti' gula'yéajlë'ë, en gula'bõ'ë baniga. Que lë ni na' Jesús gudxë' légaquië':

—¿Dë queëli' ni le gahua'?

42 Ní'irö bulu'nõdzjë' queë' láti'do'oba' böla chinégui'ba', en tu quízxi'ba' buz.

43 Guzxi'ë Jesús le, en gudahuë' lógaquië'.

44 Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

45 Ní'irö buzéajni'inë' légaquië' lë na' nazúajgaca lu guichi lá'ayi.

46 Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yõl-la' guti cate' gaca tsonna dza,

47 ate' idútë yõdzõlió ral-la' gaca libán ca naca quia' neda' para ulu'bí'i ládxi'gaca bõnachi para uniti lahuë' Dios dul-la' nabága'gaquië'. Lu yõdzõ Jerusalén isí lo gaca libán na'

48 ate' libí'i cázali' na' bilé'eli' yugu' lë ni ral-la' gunli' ba nalí que.

49 Buli'yútsõca', isól-la'a queëli' le guzxi' lu në'ë Xuza' gunnë' queëli', pero buli'gá'anasõ Jerusalén cate' idxinrö queëli' yõl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

50 Ní'irö Jesús guchë'ë yugu' bönni' dá'gaquië' Lë', sõjáquië' yõdzõ Beta-
nia, ate' ni' guchisa në'ë, en bulidza tsáhuë'ë légaquië'.

51 Tsanni ni' rulidza tsáhui'së' ca' légaquië', buzátë' ga na' nacu'ë, buëpë' yehua' yubá.

52 Gudõdi gula'yéaj ládxi'gaquië' Lë', lu yõl-la' rudzeja quégaquië' yõjhuõjgaquië' Jerusalén.

⁵³ Gula'cuá'tica'së' chila yudo', ta'gu'ë Dios yö'l-la' ba, en tun zxönë' Lë'.
¡Ca' naca!

DIDZA' DXI'A BUZÚAJĚ' JUAN

Bönni' na' nazí'i lě' Didza' gúlajě' bönachi

¹ Cate' gusí lo, zí'atělö cate' si' gata' yödžölió, ni' zoa cazě' Bönni' lě' Didza', ate' Bönni' na' náquiě' Didza' zóaleně' Dios, ate' Didza' na' naca caz Dios.

² Bönni' na' náquiě' Didza' zóaleně' Dios cate' ni' gusí lo si' rata' yödžölió.

³ Lu ně'ě Bönni' ni, Dios beně' yúgu'tě le dě, en biti' bi dě le nuně' Dios le cabí beně' lu ně'ě Bönni' na'.

⁴ Dě caz queě' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi.

⁵ Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

⁶ Dios gusól-lě'ě ni tu bönni' lě' Juan.

⁷ Bidě' bönni' ni para gáquiě' nu gun ba nalí. Bidě' para guně' ba nalí queě' Bönni' na' náquiě' bení', para tséjlě'gaca yúgu'tě bönachi Dios ni'a que lě na' runě' ba nalí.

⁸ Biti' náquiě' Juan bení' na', pero bidě' para guně' ba nalí queě' Bönni' na' náquiě' bení'.

⁹ Bönni' na' náquiě' bení' le naca idú ni' raziě' yödžölió ni, ate' ruzeniě' lu icja ládxi'do'gaca yúgu'tě bönachi.

¹⁰ Bönni' na' náquiě' bení' bidxině' yödžölió ni, ate' lu ně'ě Lě' Dios beně' yödžölió ni, pero bönachi yödžölió biti' bulu'únbě'ě Lě'.

¹¹ Bidxině' ga nequi queě', pero biti' ca' gula'zí' lu ná'agaquiě' Lě' bönni' nabábaleně'.

¹² Yúgu'tě bönni' gula'zí' lu ná'agaquiě' Lě', bönni' ni' gula'yéajlě'ě Jesús, Lě' beně' ga dě lu ná'agaquiě' ilácagaquiě' xzí'ině' Dios.

¹³ Bönni' ni nácagaquiě' xzí'ině' Dios, calěga tu' nácagaquiě' xzí'ině' nu bönni', en calěga tu' nálajgaquiě' ni'a que le rizě ládxe'ě nu bönni', o ni'a que tu le rě'ěni' nu bönni', pero nácagaquiě' caní tu' naca le rě'ěni' quežině' Dios.

¹⁴ Bönni' na' náquiě' Didza' guljě' bönachi, en tu chí'isö guzóaleně' rě'u, idú dzágagaca Lě' le ruzá' ládxe'ě Dios queěru', en le naca idútě li. Bilé'etu' yöl-la' zxön queě', ate' yöl-la' zxön queě' na' naca le ruí' queěbi' bi'i la's dui que, Nu na' naca Xúzi'bi'.

¹⁵ Juan na' beně' ba nalí queě' Bönni' na', en bě'ě zidzaj didza', rnně':

—Bönni' ni náquiě' Nu na' gudíxjō'a que, gunní'a: Bönni' si' zá'tělě' ca neda' nayépisětě'ě ca neda', tu' zoa cazě' Lě' zí'alō ca neda'.

¹⁶ Le naca idú queě' buzí'iru' xibé yúgu'těru', lě na' buzá' ládxe'ě queěru' Dios, en zíanrō ca' le ruzá' ládxe'ě queěru'.

¹⁷ Bidxín queěru' xibá queě' Dios lu ně'ě Moisés, pero le ruzá' ládxe'ě queěru' Dios, en le naca idútě li bila'dxín queěru' lu ně'ě Jesucristo.

¹⁸ Catu caz nu bilé'e Dios, pero Lě', la's dui Xzí'ině' Dios, Bönni' na' nadxí'ide'eně' Dios Xuz, Bönni' ni na' beně' ga núbě'ěru'-ně' Dios.

*Le beně' ba nalí Juan, bönni' buquilě' bönachi nisa, ca náquiě' Jesús
(Mt. 3:1-12; Mr. 1:7-8; Lc. 3:1-17)*

¹⁹ Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni nácagaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guzxi' lu në'ë Dios isöl-lë'ë queëru'.

²¹ Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të'?

Gunnë' Juan:

—Biti' naca'.

Ní'irö të' lë':

—¿Naru' nacu' li' bönni' na' ral-la' guidë' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

²² Ní'irö të' lë':

—¿Nuzxi caz nacu'? Gudíxjö'i netu' para gaca usiyöntu' nupa gula'söl-la' netu'. ¿Bizxi rnnö' li' nuzxi nacu'?

²³ Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', rnna: Riyón chi'i nu rulidza lu lataj cá'asö, rnna: Buli'béaj li nöza para idxín Xanru' queëli'. Caní gunnë' Isaías, bönni' na' bë'ë didza' uláz queë' Dios.

²⁴ Yugu' bönni' ni nácagaquië' bönni' yudo' fariseo nasöl-la'gaquië' bönni' judío unná bë'.

²⁵ Gula'nábinë' Juan, të' lë':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calëga bönni' na' ral-la' guidë' gu'ë didza' uláz queë' Dios?

²⁶ Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj láhui'lö ga zóali' zoë' tu bönni' bití' núnbë'ëli'-në'.

²⁷ Bönni' ni náquië' Bönni' na' si' zá'tëlë' ca neda', en nayëpisëtëre' ca neda', ate' bití' naca' neda' lesaca' ulecja' xiráchuë' nudë'ë.

²⁸ Yúgu'të lë ni guca lu xiyú yödzo Betábara, ga naca ia'tsölá'a yegu Jordán, zaca' ga rilén gubidza, ga ni' buquilé' Juan bönachi nisa.

Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'

²⁹ Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gátië' para ugüë' dul-la' nabága'gaca bönachi yödzoilió.

³⁰ Lë' náquië' bönni' na' gunniá' queë': "Si' zá'tëlë' ca neda' tu bönni', nayëpisëtëre' ca neda', tu' zoa cazë' zí'alö ca neda'."

³¹ Neda' bití' bënbe'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

³² Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bötjë' birúajë' yehua' yubá, gunë'ë ca riná'aba' gu'dódo', ate' bidxinë' ga zoë' Jesús, en bugá'analënë' Lë'.

³³ Bití' bënbe'eda' Lë' zí'alö. Gudxi neda' Nu na' gusöl-la' neda' para uquila' bönachi nisa, gunnë': "Cate' ilé'enu'-në' huötjë' Dios Bö' Lá'ayi, tsöjsóalenë' Bönni' na', en ugá'analënë' Lë', Bönni' ni gunë' le ruluí'sö yöla' ridila nisa ni, uchízië' bönachi Dios Bö' Lá'ayi."

³⁴ Na'a, chibilé'eda' lè na', en runa' ba nalí queë' Bönni' ni, náquië' Zxí'inë' Dios.

Yugu' bönni' usëda zí'alö queë' Jesús

³⁵ Ia'tú dza ca', leyúbölö zoë' Juan ni', ate' nacuá'lenë' lè' chopë' bönni' dá'gaquië' lè'.

³⁶ Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lè', rnnë':

—Buli'yutsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lè', ate' yöjnéhoquië' Jesús.

³⁸ Ní'irö buécjë' Jesús, en buyúë' chopë' ni söjnéhoquië' Lë', ate' rë' légaquië':

—¿Bizxi riguúljalí'?

Të' Lë':

—Bönni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Guli'dá, uyulí'.

Ní'irö yöjácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la.

⁴⁰ Andrés, böchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnéhoquië' Jesús.

⁴¹ Andrés na', zí'alö yöjdiljë' bönni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasöl-lë'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiöj.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzö Betsaida, le naca ládzagaquië' Andrés, en Pedro.

⁴⁵ Felipe budzölinë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë Felipe li', cate' ni' zu' zxan yaga higo, bilé'eda' li'.

⁴⁹ Ní'irö bubi'ë didza' Natanael, rë' Lë':

—Bönni' Usedi, Li' nacu' Zxi'inë' Dios. Li' nacu' Nu inná be'e bönachi Israel.

⁵⁰ Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zxan yaga higo? Yugu' le zxöntërö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzo Caná

¹ Cate' chiguca tsonna dza, guca laní que yöl-la' rutsaga na' lu yödzo Caná luyú Galilea, ate' zóanu xinë'ë Jesús ni'.

² Lësca' zoa nu bulidza Jesús, en yugu' bönni' usëda queë' dijáquië' laní na'.

³ Cate' biyadzaj xisi uva ilë'ajë', ní'irö xinë'ë Jesús gúdxinu Lë', rnnanu: —Biti'rö dë xisi uva ilë'ajë'.

⁴ Bubi'ë didza' Jesús, rë'ë-nu:

—Nígúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guíë' libí'ili'.

⁶ Nacuá' ni' xopa yusu' guiöj tu'gunë' dxin bönni' judío cate' tu'pá'a cuíngaqië' ca nalëbiguequinë' tunë', en rúdzugaca chopá tsonna rö'ö nisa tu tu yusu' na'.

⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'líë' yugu' yusu' na' nisa.

⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'.

⁹ Buyúë' bönni' na' zoë' ra' yusu' channö nazxí'i nisa na' nuhuóaca xisi uva, pero bití' réquibe'enë' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë,

¹⁰ en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzejë' le cabí nazxí'i. Li', ga bidxintë na'a ben chi'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzo Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxon queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzo Capernaum, ate' dzágagaquië' xinë'ë, en yugu' bönni' böché'ë, en yugu' bönni' usëda queë' Lë', ate' zían dza gula'cu'ë Capernaum na'.

*Rulatjë' Jesús lö'a yudo', rubéajë' nupa tun le cabí ral-la' ilún ni'
(Mt. 21:12-13; Mr. 11:15-18; Lc. 19:45-46)*

13 Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzo Jerusalén.

14 Lu yödzo na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' xzila', en yugu' gu'dödo', böa' bëdxi na' tútigaquië'-ba' lahuë' Dios. Ró'ögaquië' ca' ni' bönni' tu'tsë'ë dumí za' iduté yödzo'lió.

15 Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'iló lö'a yudo', en bulágui'ë-ba' ca' ní'iló yugu' bö'cu' xzila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'.

16 Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu'yë'yi.

17 Ní'irö yöjnéguequinë' bönni' usëda queë' Jesús le nazúaj lu guichilá'ayi, rna: Tu' ruí'ida' ládxa'a lidxu', régui rilá ládxi'da'ahua'.

18 Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca ulu'ínu' netu' le gaca bë' dë lu no'o runu' yugu' lë ni?

19 Bubi'ë didza' Jesús, rë' légaquië':

—Guli'quinnaj yudo' ni, ate' tsonna dzasö uchisa' le.

20 Ní'irö të' Lë' bönni' judío, ta'nnë':

—Idú xopa-un iz guyá yudo' ni, ate' Li', ¿tsonna dzasö uchísatso' le?

21 Yudo' na' bë'ë didza' que Jesús naca la' cuin cazë'.

22 Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlë'ë le nazúaj lu guichilá'ayi, enca' yugu' didza' bë'ë Jesús.

Jesús núnbë'ë yúgu'të bönachi

23 Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'.

24 Biti' buzxöni ládxi'ë Jesús légaquië', tu' nunbë' cazë' yúgu'të bönachi.

25 Biti' naquinnë' Jesús nu quixjoi'i Lë' ca nácgaca bönachi, tu' nöz quézinë' Lë' le yu'u icja ládxi'do'gaca bönachi.

3

Jesús, en Nicodemo

1 Nicodemo, tu bönni' yudo' fariseo, nabábalenë' yugu' bönni' judío unná bë'.

2 Bidë' bönni' ni ga zoë' Jesús chi'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácgaca bë' ca nácgaca le caní runu' Li' channö cabí zóalenë' Dios lë'.

3 Bubi'ë didza' Jesús, rë' lë':

—Le nácatë rea' li', nu cabí galaj leyúbölö, bití' ca' ilé'e lataj ga ni' rinná bë'ë Dios.

4 Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xinë'ë, ate' galjë' ia'tú?

5 Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, bití' gaca tsázië' ga rinná bë'ë Dios.

⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queé' Dios Bó' Lá'ayi, Bó' Lá'ayi nabani nu na'.

⁷ Biti' ubániu' tu' rea' li', run bayudxi galju' leyúbölö.

⁸ Gátitës recja bö', ate' riyönnu' rnnë bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queé' Dios Bó' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë ni?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en biti' nözinu' yugu' lë ni?

¹¹ Le nácatë rea' li', le nöztu' ruí'itu' didza' que, en le bilé'etu' runtu' ba nalí que, pero biti' rizi' lu ná'ali' lë na' runtu' ba nalí.

¹² Channö cabí réajlë'ëli' neda' cate' ruí'ilena' libí'ili' didza' ca naca le raca yödzölió ni, ¿nacxi caz gaca tséajlë'ëli' channö guía' libí'ili' le raca yehua' yubá?

¹³ 'Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá.

¹⁴ Ca na' benë' Moisés lu lataj cá'asö, buchisë'-ba' bëla néquiniba' guíë, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'.

¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxi'ide'enë' bönachi yödzölió

¹⁶ Tu' bidxi'ide'enë' Dios bönachi yödzölió, buzá' lãdxë'ë quéguequi Zxi'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi.

¹⁷ Dios gusól-lë'ë Zxi'inë' yödzölió ni, calëga para ichúguië' quégaca bönachi yödzölió ni gátigaca, pero para ulu'lágaca bönachi yödzölió ni ni'a queé' Lë'.

¹⁸ Nu bönni' réajlë'ë Zxi'inë' Dios, biti' ca' narugu queë' inítie', pero bönni' na' biti' réajlë'ë Lë', chinarugu queë' gátie', tu' cabí réajlë'ë Zxi'inë' Dios la' buduínë'.

¹⁹ Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödzölió ni, pero gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nácagaca xihui' le tunë'.

²⁰ Yúgu'të bönni' tu'ë dö' biti' raza lãdxi'gaquië' bení', en biti' rídigaquië' lu bení', para cabí ilá' lahui le tunë'.

²¹ Nu run le naca idútë li ridxín lu bení' para gaca bë' núngaca ni'a queé' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

²² Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa.

²³ Lësca' ruquilë' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa.

²⁴ Raca caní zí'atëlö cate' biti' idzunë' Juan na' lidxi guíë.

²⁵ Ní'irö gula'sílógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'.

²⁶ Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' guzóalenë' li' ia'tsölá'a yegu Jordán, bönni' na' benu' ba nali queë', ruquilë' bönachi nisa, ate' ta'dxin yúgu'të bönachi ga zoë'.

²⁷ Ní'irö bubí'ë didza' Juan, rë' légaquië':

—Biti' bi dë lu në'ë nu bönni', channö cabí nudödë' Dios le lu në'ë.

²⁸ Biyön quézili' lë na' bena' ba nali, gunniá': "Biti' naca' neda' Cristo", pero Dios nasöl-lë'ë neda' para guá' bönachi si' zë'ë Lë'.

²⁹ Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böchi' luzë'ë bönni' rutsaga në'ë, en dzáguië' lë', ruzë náguië' didza' ru'ë, en rudzéjanë' tu' riyönnë' didza' ru'ë bönni' rutsaga në'ë. Lë'sca' caní, rudzéjade'eda' neda' tu' raca lë ni caní.

³⁰ Run bayudxi gácarë' zxon Cristo, pero neda', run bayudxi gácara' cuídi'sö.

Nu za' zaca' yehua' yubälö

³¹ Gunnë' ca' Juan:

—Bönni' na' zë'ë zaca' xitsá'alö nayëpisëtërë' ca yúgu'të bönachi. Nu bönni' náquië' bönachi yödölió ni, que yödölió ni náquië', en ru'ë didza' que le raca yödölió ni, pero Bönni' na' zë'ë zaca' yehua' yubälö nácatërë' lo ca yúgu'të bönachi.

³² Bönni' na' runë' ba nali que le bilé'enë', en le biyönnë', pero cuntú nu rizi' lu në'ë le runë' ba nali.

³³ Núti'tës bönni' rizi' lu në'ë lë na' runë' ba nali, bönni' ni rulu'ë lahui réajlë'ë naca iduté li didza' ru'ë Dios.

³⁴ Bönni' na' nasöl-lë'ë Dios, didza' queë' Dios ru'ë, tu' nuzóadërë' Dios Bô' Lá'ayi queë' lu Bönni' na'.

³⁵ Dios Xuz nadxí'inë' Zxí'inë', ate' yúgu'të le dë chinudödë' lu në'ë Zxí'inë' na'.

³⁶ Nu bönni' réajlë'ë Dios Zxí'ini, dë yöl-la' na' bán idú queë', pero bönni' na' bití' réajlë'ë Dios Zxí'ini, bití' idéli'në' yöl-la' na' bán na', pero nabáguë'ë xíguia' lahuë' Dios.

4

Jesús ru'ilenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan.

² Calëga Jesús caz ruquilë' bönachi nisa, pero bönni' usëda queë' tu' quilë' bönachi nisa.

³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölö luyú Galilea.

⁴ Ga ni' sa'yéajë', run bayudxi tödë' luyú Samaria.

⁵ Caní guca, bidxinë' Jesús tu yödözödo' luyú Samaria, nazí' le Sicar, gala' ga dë yu na' bunödzejë' Jacob queë'bi' José, zxi'inë' Jacob na', dza ni'te.

⁶ Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxéqui'në' yu'ë nöza. Guca idú huagubidza.

⁷ Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le gu'ja'.

⁸ Tuzë' zoë' Jesús tu' chisöjáquië' bönni' usëda queë' lu yödözö söjxí'gaquië' le ilahuë'.

⁹ Ní'irö nigula Samaria na' rënu Jesús, rnnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbé'u le runödzejë Dios, en Nuzxi na' rë li: “Benna le gui'ja”, li' inabu', ate' Lë' gunné' quiu' nisa runna yöl-la' na'bán.

¹¹ Ní'irö nigula na' rënu Lë', rnnanu:

—Bönni', bití' nu'u le cuéaju' nisa, ate' yeru nisa ni, dxí'tërö rë. ¿Gazxi dë nisa na' runna yöl-la' na'bán?

¹² ¿Naru' nácatërötso' Li' zxön ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulé'ajbi' ca' xzí'inë', en gulé'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa,

¹⁴ pero nu guí'aj nisa na' unödza' neda', bití'rö ubidxi icja ládxi'da'ahuë', tu' unödza' queë' nisa na' gaca lu icja ládxi'da'ahuë' ca tu ga ralaj nisa, le güi' yöl-la' na'bán idú queë'.

¹⁵ Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rno': “Cuntu nu zoa bönni' quia'”,

¹⁸ tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rno'.

¹⁹ Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios.

²⁰ Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' bití' idisóali' guí'ado' ni, en bití' tsöjsóali' Jerusalén.

²² Libí'ili' reaj ládxi'li' Nu bití' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusólá ni'a queégaquië' bönni' judío.

²³ Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idütë li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní.

²⁴ Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idütë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ruí'ilenë' li' didza'.

²⁷ La' ná'asò bulu'dxinè' bönni' usèda queè' Jesús, ate' bulu'báininè' tu' ru'ilenè'-nu nigula didza', pero biti' burúguiné' nitúé' inábinè' Lè', cabí innè': "¿Bizxi rinábinu' lènu?" o: "¿Bizxi didza' ru'ilenu'-nu?"

²⁸ Ní'irò nigula na' bucá'ananu xichö'önu ni', ate' böajnu la' yödzö, söjödxi nu nupa nacua' ni', rnnanu:

²⁹ —¿Guli'dá, ilé'eli'-nè' tu bönni' gudxè' neda' yúgu'tè le chinuna'! ¿Naru' cabí nácatsè' Lè' Cristo?

³⁰ Ní'irö bila'rúaj bönachi yödzö na', en bila'dxín ga zoè' Jesús.

³¹ Tsanni ni' söhuöajnu nigula na', bönni' usèda queè' Jesús gulunè' bayudxi, tè' Lè':

—Bönni' Usedi, gudagu.

³² Jesús rè' légaquiè':

—Dè tu le rahua', le cabí réquibe'eli'.

³³ Ní'irö gula'nabi luzá'agaquiè' bönni' usèda queè' tuè' ia'túè', ta'nnè':

—¿Zoa nu chidiguá'tsö le gudahuè'?

³⁴ Ní'irö Jesús rè' légaquiè':

—Le nabánida' naca guna' ca ré'ènè' Xuza' nasöl-lè'è neda', en údxi guna' xichiné'.

³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyulí' bönachi nácagaca ca gapa nadúzgaca, le chinabídxigaca para tsöjláparu'.

³⁶ Bönni' na' rulapè' rizi'è lazxjè', ate' lè na' rulapè' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxön nu raza, en nu rulapa.

³⁷ Naca idútè li lè na' rnnu caní: Tu nu raza, ate' ia'tú nu rulapa.

³⁸ Neda' gusöl-la'a libí'ili' tsöjlápali' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquiè'.

³⁹ Zían bönachi Samaria nacua' yödzö Sicar na' gula'yéajlè'è Jesús ni'a que xtídza'nu nigula na' bennu ba nali' queè', gunnúnu: "Gudxè' neda' yúgu'tè le chinuna'."

⁴⁰ Cate' bila'dxinè' bönni' Samaria ga ni' zoè' Jesús, guláta'yuè' lahuè' ugá'analènè' légaquiè'. Jesús bugá'anè' ni' ia'chopa dza.

⁴¹ Caní guca, zióntèrè' ca' bönni' ni' gula'yéajlè'è Jesús ni'a que didza' bè'è.

⁴² Ní'irö bönni' ni' gulè'-nu nigula na', ta'nnè':

—Na'a réajlè'ètu' Lè', calégasö ni'a que didza' bè'u li', pero lèsc'a tu' biyönitu' netu' Lè', en nöztu' le nácate' bönni' ni náquiè' Cristo, Nu rusölá bönachi yödzölió.

Ruínè' Jesús xzí'inè' tuè' bönni' dè lu nè'è

⁴³ Ia'chopa dza ca', buzè'è Jesús luyú Samaria, en sa'yéajè' luyú Galilea.

⁴⁴ Caní benè', tu' gudíxjö'è Lè' cazè' Jesús, gunné': "Bönachi uládz queè' nu bönni' ru'è didza' uláz queè' Dios biti' tun lè' bal."

⁴⁵ Cate' bidxinè' Jesús luyú Galilea, gulunè' bönni' Galilea na' Lè' bal tu' yöjáquiè' ca' Jerusalén cate' guca Laní Pascua, en bila'lé'enè' le benè' Jesús ni'.

⁴⁶ Ní'irö böajè' Jesús yödzö Caná luyú Galilea, ga ni' benè' ga böáca nisa xisi uva. Lu yödzö Capernaum na' zoè' tu bönni' dè lu nè'è uláz queè' bönni' rinná bè'è, ate' ré'ebi' bi'i bönni' queè' bönni' na' dè lu nè'è.

⁴⁷ Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yue' lahuë' guidé' lidxë', para uduhuënë'-bi' bi'i bönni' queë' na', tu' chirequi gátibi'.

⁴⁸ Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácgaca bë', en yugu' yöl-la' huáca guna'.

⁴⁹ Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰ Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuöjë'.

⁵¹ Tsanni ni' yu'ë nõza söhuöjë', duzxi' gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

⁵² Gunábinë' légaquië' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irö gúquibe'enë' xúzibi' bi'i na', böácabi' cate' ni' bë'lenë' Jesús lë' didza', en gudxë' lë': “Nabanbi' bi'i quiu'.” Que lë' ni na' guyéajlë'ë Jesús, ate' gula'yéajlë' ca' Lë' bönachi nacua' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

5

Ruúnë' Jesús tu bönni' nacú'unië' bin ga nazí'i le Betesda

¹ Gudödi guca lë' ni, guca laní quégaquië' bönni' judío, ate' guyijë' Jesús Jerusalén.

² Lu yödzo na', gala' ga tu'ú'uba' bö'cu' zxila', dë tu le zxön yudzu nisa, nazí'i le Betesda lu didza' hebreo, en nacua' gayu' chila don que.

³ Yugu' lu chila na' dégaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'.

⁴ Caní raca, tu' ruhuötjë' tu gubáz lá'ayi queë' Dios tu chi'i huéaj, en röjtsu'ë lu nisa na', en rutë' nisa na'. Huóacatë' nu bönni' tsöjtsú'utië' lu nisa na' cate' rutá cuini ca naca biti'tës yödzöhuë' raca queë'.

⁵ Zoë' tu bönni' ni', chiguca chizxunu' uruá' iz ré'enë'.

⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huóacu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böácate' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío.

¹⁰ Ní'irö bönni' judío unná bë' gulë' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': "Buá' le denu', en guzë'e." Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní li': "Buá' le denu', en guzë'e"?

¹³ Biti' nözinë' bönni' na' nuhuoáquië' nuzxi na', tu' chibuzë'ë Jesús lataj ni' tu' nacua' bönachi zían ni'.

¹⁴ Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböacu'. Biti'rö gunu' dul-la', para cabí gaca quiu' tu le nácarö zí' ca lë na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'.

¹⁶ Que lë ni na' bönni' judío unná bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë ni cate' naca dza lá'ayi quégaquië'.

¹⁷ Bubi'ë didza' Jesús, rë' légaquië':

—Xuzá' ná'atë runë' dxin, ate' neda' ca' runa' dxin.

¹⁸ Que lë ni na' gulë'ënrönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Zxí'inë' Dios

¹⁹ Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'.

²⁰ Dios Xuz nadxí'inë' neda', Zxí'inë', en ruluí'inë' neda' yúgu'të le runë', ate' yugu' le zxöntërö ca lë ni uluí'inë' neda', le ilún ga ubánili' libí'ili'.

²¹ Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödztja' quégaca bönachi yöl-la' na'bán ca rë'ëni quézida'.

²² Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöröa' bönachi.

²³ Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'.

²⁵ Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtídzá'a, en ilún ca rnna, huóata' yöl-la' na'bán quéguequi.

²⁶ Ca na' dë lu në'ë Dios Xuz unödztjë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödztja' yöl-la' na'bán quégaca bönachi.

²⁷ Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi.

²⁸ Bití' ubánili' ca naca lë ni, tu' huadxín dza cate' yúgu'të nupa chinátigaca ila'yöni chí'a,

²⁹ en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bē' le náquiē' Jesús

³⁰ Gunnē' ca' Jesús:

—Biti' bi gaca guna' la' neda'sö. Ca naca le riyönda' rē' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca ré'énisida' neda', pero ca ré'eni quézinē' Xuza' nasöl-lē'ē neda', runa'.

³¹ Channö neda' runa' ba nalí que la' cuin caza', bití' naca lesaca' lē na' runa' ba nalí.

³² Zoa Nu yúbölö Nu run ba nalí quia' neda', Lē' Xuza', ate' nözda' naca lesaca' le runē' ba nalí quia'.

³³ Libí'ili' gusöl-la'li' bönni' yöjnébiguequinē' Juan, ate' lē na' benē' ba nalí quia' naca idütē li.

³⁴ Neda' bití' naquinda' nu bönni' gunē' ba nalí quia', pero ruá'a didza' caní para uláli'.

³⁵ Didza' bē'ē Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ládxi'li' uzí'ili' xibé bení' queē'.

³⁶ Na'a, zoa le run ba nalí quia' neda' le nácarö idú li ladxe' ca lē na' benē' ba nalí quia' Juan. Yugu' le budödē' Dios Xuz lu na'a guna', la' leze na' runa', ate' yugu' lē na' runa', tun ba nalí quia', en nácgaca bē' gusöl-lē'ē Dios Xuz neda'.

³⁷ Lē'sca' Dios Xuz nasöl-lē'ē neda' runē' ba nalí quia'. Catu caz biyönili' chí'ē, en catu caz bilé'eli' lahuē',

³⁸ en cabí nazí' lu ná'ali' xtídzē'ē, tu' cabí réajlé'ēli' neda', Nu na' gusöl-lē'ē.

³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queēli' ni'a que lē na' nazúaj lu guichi lá'ayi, ate' lē na' nazúaj lu guichi run ba nalí quia' neda'.

⁴⁰ Biti' ré'ēnili' guídali' quia' neda' para gata' yöl-la' na'bán queēli'.

⁴¹ Biti' riguilja' yöl-la' ba le ila'gú'u bönachi neda'.

⁴² Neda' núnbē'a libí'ili', en nözda' bití' nadxi'ili'-nē' Dios.

⁴³ Bidxina' ni uláz queē' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, sí' lu ná'ali' nu na'.

⁴⁴ ¿Nacxi caz gaca tséajlé'ēli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíljalí' yöl-la' run zxön na' za' lu nē'ē la's dui Dios?

⁴⁵ Biti' uzóa ícjali' uzéguia' libí'ili' didza' lahuē' Xuza'. Nu na' uzegui libí'ili' didza' naca lē cazē' Moisés, bönni' na' ruzxöni ládxi'li'-nē', sal-la' gútiē' dza ni'te.

⁴⁶ La'tu' réajlé'ēli'-nē' Moisés, tséajlé'ēli' ca' neda', tu' buzúajē' Moisés lu guichi ca naca quia' neda'.

⁴⁷ Na'a, ¿nacxi caz gaca tséajlé'ēli' didza' ruá'a neda' channö cabí réajlé'ēli' yugu' le buzúajē' Moisés lu guichi?

6

Rugahuē' Jesús zíanrö ca chi-un gayuá' bönachi

(Mt. 14:13-21; Mr. 6:30-44; Lc. 9:10-17)

¹ Gudödi guca lē ni, guyijē' Jesús ia'tsölá'a Nísado' Que Galilea, nazí'i le ca' Nísado' Queē' Tiberias.

² Bönachi zían yöjnégaca Jesús tu' bila'lé'e yugu' yöl-la' huáca benē', cate' bunē' bönni' té'enē'.

³ Ní'irö gurenē' Jesús, guyijē' ga naca tu lu guí'ado', ga ni' gurö'ölenē' yugu' bönni' uséda queē'.

4 Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

5 Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöjõ'uru' yöta xtila le ilágugaca bönachi zían ni?

6 Caní gunné' Jesús para si' bë'e Felipe na', tu' chinözinë' Lë' naca gunë'.

7 Bubi'ë didza' Felipe, rnnë':

—La'tu' sí'iru' yöta xtila len láxjaru' que idú xunu' beo', biti' guequi láti'do' huéaj le ilágugaca bönachi zían ni.

8 Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

9 —Ni zóabi' tubi' bi'i bönni', nuá'abi' gayu' yöta xtila néquiguequini xzoa' cebada, en chópaba' böla cuídido'. ¿Naru' huéqui'tse ugagu le do' ni cate' xö bönachi?

10 Ní'irö Jesús rë' légaquië':

—Guli'gún ga ila'bó' bönachi zían ni lu yu.

Lataj na', rő'öda' daca', ate' gula'bó'ë idú ca chi-un gáyu'ë bönni' ni'.

11 Ní'irö gudélé'ë Jesús yugu' yöta xtila na'. Cate' chigudxë' Dios: "Xclenu", gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' rő'gaca lu daca' ni'. Lë'sca' caní gulunë' quégacaba' böla cuídido' na', ate' gulahuë' tsca gulé'ënnë' ilahuë'.

12 Cate' chibulu'huöljanë', Jesús gudxë' yugu' bönni' usëda queë', gunné':

—Buli'túbi le bizxaj nagá'anagaca, para cabí ilaca ditaj.

13 Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini xzoa' cebada na', le bulu'gá'ana quégaquië' bönni' na' gulahuë'.

14 Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödölió ni.

15 Tu' réquibe'enë' Jesús të'ënnë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

Rizë'e ni'ë Jesús lu nísado'

(Mt. 14:22-27; Mr. 6:45-52)

16 Cate' chizá' ral-la, yójáquië' bönni' usëda queë' Jesús, ate' bila'dxinë' ra' nísado'.

17 Gula'benë' tu lë'e bárcodo' ni', en sőjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë.

18 Gusí lo recja bö' budunu' lu nísado' na', ate' riyasa ridxía nisa na'.

19 Cate' chibulu'së'ë bárcodo' na', le guzá' le naca tsca rizá'aru' tu hórasö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzöbinë'.

20 Ní'irö Jesús rë' légaquië':

—Neda' caz ni. Biti' gádxili'.

21 Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sőjáquië'.

Bönachi zían tu'guilaj Jesús

22 Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlené' yugu' bönni' uséda queé' lè'e bárcodo' na', pero légacasé' na' yójáquié'.

23 Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dè gála'sö ga ni' gulahué' yöta xtila cate' ni' Xanru' Jesús gudxé' Dios: "Xclenu" que.

24 Tu' bila'lé'ené' bíti'rö zoé' Jesús ni', en biti' nacu'é bönni' uséda queé' ni', que lè ni na' gula'bené' lé'egaca bárcodo' na', ate' yójáquié' Capernaum, tu'guiljé' Jesús.

Náquié' Jesús yöta xtila nabánigaca tsaz bönachi

25 Cate' bila'dxín bönachi zían na' ia'tsölá'a nísado' na', yójxáca'gaquié' Jesús, en të' Lè':

—Bönni' Usedi, ¿bátaxi bidxinu' ni'?

26 Bubi'è didza' Jesús, rë' légaquié':

—Le nácaté' rea' libí'ili': Ruguílajli' neda', caléga tu' bilé'eli' yugu' yöl-la' huáca bena', pero tu' gudáguli' yöta xtila ni', en bőljalí'.

27 Guli'gún dxin, caléga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lè ni naca la' huagu neda', Bönni' Guljé' Bönachi, gunna' queéli', tu' bulu'é lahui Xuza' Dios naca' Zxí'iné'.

28 Ní'irö gula'nábiné' Lè', ta'nné':

—¿Bizxi run bayudxi guntu' para guntu' le raza ládxé'è Dios?

29 Bubi'è didza' Jesús, rë' légaquié':

—Lè ni le raza ládxé'è Dios, tséajlè'èli' neda', naca' nu gusöl-lè'è Lè'.

30 Ní'irö gula'nábiné' Lè', ta'nné':

—¿Bizxi le naca bë' runu', le ilé'etu' para tséajlè'ètu' Li'? ¿Bizxi yöl-la' huáca runu'?

31 Gulahué' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rna: "Yöta xtila que yehua' yubá Moisés bë'è quégaquié', gulahué'."

32 Bubi'è didza' Jesús, rë' légaquié':

—Le nácaté' rea' libí'ili': Caléga Moisés na' benné' queéli' yöta xtila que yehua' yubá, pero Xuza' Dios runné' queéli' yöta xtila le naca idú que yehua' yubá.

33 Yöta xtila na' runné' Dios quégaca bönachi naca' neda', lè na' birúaj yehua' yubá, en runödzej yöl-la' na'bán quégaca bönachi yödzölió ni.

34 Ní'irö të' Lè':

—Xan, bénnatica'sö queëtu' yöta xtila na'.

35 Jesús rë' légaquié':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queé' Dios, ate' nu tséajlè' neda', chiné'aj tsaz le naca queé' Dios.

36 Naca ca na' chigudxi caza' libí'ili': "Sal-la' rilé'eli' neda', biti' ca' réajlè'èli' neda'."

37 Yúgu'tè nupa na' runné' Xuza' quia', ídigaca quia', ate' nupa na' zaca quia', biti' usá'gaca'-né'.

38 Caní naca, tu' bötja' birúaja' yehua' yubá, caléga para guna' ca ré'ènda' neda' caz, pero para guna' ca ré'èné' Dios Xuz, nasöl-lè'è neda'.

39 Lè ni le ré'èné' Xuza' nasöl-lè'è neda', ré'èné' cabí unitia' nitú nupa na' benné' quia', pero usubana' léguequi dza údxi.

40 Lë ni le rë'ënë Dios Xuz nasöl-lë'ë neda', rë'ënë gata' yöl-la' na'bán quégequi, yúgu'të nupa na' ila'lé'e neda', Zxi'inë', en ila'yéajlë' neda', ate' neda' usubana' légequi dza údxi na'.

41 Ní'irö gula'nnë' queë' Jesús bönni' judío unná bë' tu' gunnë': "Neda' caz naca' yöta xtila na' bötaj, birúaj yehua' yubá."

42 Que lë ni na' ta'nnë':

—¿Naru' cabí bönni' ni Jesús, zxi'inë' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

43 Ní'irö bubi'ë didza' Jesús, rë' légaquië':

—Biti' innëli' quia' la' libí'isili'.

44 Biti' séqui'në' nitüë' bönni' guidë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi.

45 Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

46 'Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz.

47 Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'.

48 Neda' caz naca' yöta xtila nabánigaca tsaz bönachi.

49 Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulatië'.

50 Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, biti' ca' gatië' bönni' na'.

51 Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipëla'a, le runödza' para gata' yöl-la' na'bán quégaca bönachi yödzölió.

52 Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipëllë'ë le gáguru'?

53 Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipëla'a neda', Bönni' Guljë' Bönachi, en channö cabí guí'jali' xichöna', biti' ca' zóalen libí'ili' yöl-la' na'bán na'.

54 Núti'tës nu gagu xipëla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi.

55 Caní gaca, tu' naca xipëla'a la' huagu idú, ate' xichöna' naca tu le naca idú para nu guí'aj le.

56 Núti'tës bönni' gahuë' xipëla'a, en guí'jë' xichöna', sóalentic'a'së' bönni' na' neda', ate' neda' sóalentic'a'sa' lë'.

57 Ca na' zoë' nabanë' Dios Xuz nasöl-lë'ë neda', ate' neda' nabánida' Lë', lësca' caní ibáninë' neda' núti'tës bönni' gahuë' neda'.

58 Lë ni yöta xtila bötaj birúaj yehua' yubá, en biti' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quégaquië', gulatië'. Núti'tës bönni' gahuë' yöta xtila ni sóatica'së' ibanë'.

59 Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni' rusédinë' bönachi Capernaum.

Didza' rúnnagaca queëru' yöl-la' na'bán idú

⁶⁰ Cate' bila'yönnë' didza' ni, zián bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'?

⁶² ¿Nacxi caz gaca channö hualé'eli' neda', Bönni' Guljé' Bönachi, huëpa' huöja' ga ni' zoa' zí'alö?

⁶³ Le naca queë' Dios Bö' Lá'ayi naca le runna yöl-la' na'bán queëli'. Le naca bëla'sö cuntu nu uzí' xibé. Didza' na' bë'lena' libí'ili' nacagaca queë' Dios Bö' Lá'ayi, en rúnnagaca yöl-la' na'bán quegaca bönachi.

⁶⁴ Na'a, bál-lali' biti' réajlë'ëli'.

Gunnë' caní Jesús tu' nözinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'.

⁶⁵ Que lë ni na' gunné':

—Que lë ni na' chigudxi caza' libí'ili': Biti' séqui'në' nitúë' bönni' të'ë neda' channö Dios Xuz cabí gu'ë lë' lataj.

⁶⁶ Dza na' gulaca chopa ládxi'gaquië' zián bönni' usëda queë', en bití'rö gula'dálenë' Lë'.

⁶⁷ Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú.

⁶⁹ Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

⁷⁰ Bubi'ë didza' Jesús, rë' légaquië':

—Gurö caza' libí'ili' chínnulli' ni, pero tuë' bönni' ládajli' libí'ili' dzaga tu' xihui' lë'.

⁷¹ Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

7

Bönni' böchi' cazë' Jesús biti' ta'yéajlë'ë Lë'

¹ Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' të'ënnë' bönni' judío unná bë' nacu'ë ni' ilútië' Lë'.

² Dza ni' xtzóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' zxan libín lága'do'.

³ Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'.

⁴ Channö ré'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí' cuinu' lógaca yúgu'të bönachi.

⁵ Caní gula'nnë', tu' cabí ta'yéajlë'ë bönni' böchë'ë Jesús Lë'.

⁶ Ní'irö Jesús rë' légaquië':

—Biti' ridxini dza quia' para uluí' lahua' lógaca bönachi, pero dza queëli' tséajli' ni' chizóa caz.

⁷ Bönachi yödzülió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rnní'a' naca xihui' le tunë'.

⁸ Guli'tséaj libí'ili' laní na'. Biti' tseja' laní na' na'a tu' biti' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quegaca bönachi judío

¹⁰ Gudödi söjáquië' bönni' böché'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'.

¹¹ Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹² Bönachi zían ni' gulu'í'ida' didza' ca naca queë' Jesús. Bal-lë' ta'nnë':

—Náquië' dxí'a.

Ia'bal-lë' ta'nnë':

—Biti' náquië' dxí'a tu' rizí' yé'enë' bönachi.

¹³ Biti' bë'ë nitüë' bönni' didza' yálajdo' ca naca queë' Jesús, tu' tadxí bönachi zían na' le ilunë' yugu' bönni' judío unná bë'.

¹⁴ Cate' chibidxín gatsaj laní na', blë'ë Jesús ra' yudo', en busédinë' bönachi nacua' ni'.

¹⁵ Bulu'báinë' bönni' judío, ta'nnë':

—¿Nacxi caz naca, rácadë'ë bönni' ni, en biti' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusévida' neda', calëga quia' naca, pero queë' Dios Xuz na' nasöl-lë'ë neda'.

¹⁷ Channö rë'ënë' nu bönni' gunë' ca rë'ënë' Dios, huéquibe'enë' bönni' na' channö nequi queë' Dios le rusévida' bönachi o channö rácasö quia' ruá'a didza'.

¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idütë li, en biti' ca' rizí' yë'ë.

¹⁹ 'Moisés bennë' queëli' xibá queë' Dios, pero biti' runli' ca rinná bë' xibá na'. ¿Bizx que rizóa ribö'öli' gútili' neda'?

²⁰ Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribö'ö guti li'?

²¹ Bubi'ë didza' Jesús, rë' légaquië':

—Tu' yöl-la' huáca bena', ate' rubánili' yúgu'tëli'.

²² Le nácatë Moisés bennë' queëli' lë na' narugu lu xipëla'li' le naca bë', pero calëga Moisés caz bennë' queëli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipëla'gacabi' bi'i bönni'do' lë na' naca bë' néquiguequibi' queë' Dios.

²³ Channö ta'zí'ibi' lu xipëla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate' böáquië' dxí'ado' cate' naca dza lá'ayi?

²⁴ Biti' ral-la' uchi'a usörö lízili' ca', pero buli'chi'a buli'sörö ca naca le naca idütë li.

Rigúxjö'ë Jesús ga narúajë'

²⁵ Ní'irö gulu'ë didza' bal-lë' bönni' nacü'ë Jerusalén, ta'nnë':

—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'?

²⁶ Buli'yútsöca', yálajdo' ru'ë didza', en biti' bi të' Lë'. ¿Naru' téquibe'enë' bönni' ta'nná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u?

²⁷ Bönni' ni, nöz quéziru' gazxi bönni' Lë'. Cate' guidé' Cristo, cuntu nu inözi gazxi bönni' Lë'.

²⁸ Ni' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' núnbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasöl-lë'ë neda', ate' Lë', biti' núnbë'ëli'-në' libí'ili'.

²⁹ Neda' núnbe'eda'-në', tu' za'a queë' Lë', ate' Lë' cazë' nasöl-lë'ë neda'.

³⁰ Ní'irö gulunë' bayudxi ila'zönë' Lë', pero cuntu nu guzxón Lë', tu' cabí ridxini dza queë' tsu'ë lu ná'agaquië'.

³¹ Gula'yéajlë' zían bönachi ni' Lë', ta'nná:

—Cate' guidé' Cristo, ¿naru' gunë' zíanrö yöl-la' huáca ca le runë' bönni' ni?

Bönni' yudo' ta'söl-lë'ë nupa ila'zön Jesús

³² Bila'yönnë' bönni' yudo' fariseo yugu' didza' ni tu'í bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquië' para tsójxóngaqüië' Lë'.

³³ Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasöl-lë'ë neda'.

³⁴ Uguíjali' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' biti' udzöliru'-në'? ¿Naru' huayéajtsë' ga nacu'ë bönni' judío násilasigaquië' idütë yödzölió, en usédinë' yugu' bönni' zi'tu' ni'?

³⁶ ¿Bizxi rë'ëni inná didza' na' bë'ë: “Uguíjali' neda', pero biti' udzölili' neda'”, enca': “Ga ni' tsöjsóa' neda' biti' gaca guídali' libí'ili'”?

Nisa yegu le runna yöl-la' na'bán queëru'

³⁷ Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guidé' bönni' na' ga zoa', en guíjë'.

³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán quéguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunné' Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisëtëre'.

Ta'rúaj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxí' lu në'ë Dios isöl-lë'ë queëru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönachi:

—¿Naru' irúajtsë' Cristo luyú Galilea?

⁴² Nazúaj lu guichi lá'ayi le rnna: “Cristo galjë' ladaj di'a dza queë' David, en gáquië' ca' bönni' Belén le guca ladzë' David na'.”

⁴³ Caní guca, bila'rúaj bönachi na' choplö tu' nözinë' Jesús.

44 Tě'enně' bal-lě' ila'zöně' Jesús, pero cuntú nu bi ben queé'.

Biti' ta'yéajlě'ě Jesús bönni' unná bě'

45 Ní'irö bulu'dxině' ní'a ná'agaquiě' yugu' bixúz unná bě', en yugu' bönni' yudo' fariseo ga na' nacué' bönni' yudo' na', ate' légaquiě' gulé' ní'a ná'agaquiě' na', ta'nně':

—¿Bizx que bití' dichě'ěli'-ně'?

46 Bulu'bi'ě didza' ní'a ná'agaquiě', ta'nně':

—Cuntu nu bönni' ru'ě didza' ca ru'ě didza' Bönni' ni.

47 Ní'irö bulu'bi'ě didza' bönni' yudo' fariseo na', ta'nně':

—¿Naru' bě'tsali' lataj guzxi' yé'eně' ca' libí'ili'?

48 ¿Naru' guyéajlě'tsě' Lě' nu bönni' unná bě' o nu bönni' yudo' fariseo?

49 Libí'ili' dxíali' dö' tu' cabí rácali' xibá queé' Dios.

50 Zoé' ca' Nicodemo ní', bönni' na' bidxině' ga zoé' Jesús chi'i dzö'ölö, tu' náquiě' ca' bönni' yudo' fariseo, ate' rě' légaquiě':

51 —¿Naru' richúguru' queé' tu bönni' gátiě' lu xibá queeru' channö cabí yöñiru' lě' zí'alö para inöziru' bi beně'?

52 Ní'irö bulu'bi'ě didza' ia'zíca'rě' na', tě' lě':

—¿Nácatsö' ca' lí' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúě' bönni' ru'ě didza' uláz queé' Dios luyú Galilea.

53 Ní'irö yöjhuöjgaquiě' lidxi que queégaquiě'.

8

1 Guyijě' Jesús ga naca lu Guí'a Yaga Olivo.

Nigula nagútsjanu xibá que yöl-la' nutsaga na'

2 Cate' za' rení' budxině' Jesús ra' yudo', ate' bila'dxín yúgu'tě bönachi ga zoé'. Gurö'ě Jesús, rusédině' légaquiě'.

3 Ní'irö yugu' bönni' yudo' usedi, en yugu' bönni' yudo' fariseo duchě'ěgaquiě'-nu tu nigula ga zoé' Jesús, tu' gula'dzölině'-nu ní' rigútsjanu xibá que yöl-la' nutsaga na'. Bulu'sudxině'-nu lógaca bönachi na' tu'zě nágagaca Jesús,

4 ate' tě' Lě':

—Bönni' Üsedi, nigula ni guzxoñtu'-nu ní' runnu dul-la' rigútsjanu xibá que yöl-la' nutsaga na'.

5 Lu xibá queé' Moisés, gunná bé'eně' netu' uládxí'tu'-nu guiöj nu nigula runnu caní, para gátinu. ¿Názxiga Lí', nacxi rño'?

6 Caní gula'nně' para ila'zí' bě'ě Jesús para ila'zéqui'ně' ulu'zéguiě' Lě' didza'. Ní'irö biyéchuě' Jesús, ruyúě' lu yu, en ruzúajě' lu yu na' len xibön ně'ě.

7 Cate' gula'nábide'eně' Lě', ní'irö buzuíně' Jesús, en rě' légaquiě':

—Núli' cabí nunli' dul-la' isí loli' uládxí'li'-nu guiöj.

8 Leyúbölö biyéchuě' Jesús, ruyúě' lu yu, en buguélě'ě ruzúajě' leyúbölö lu yu na'.

9 Cate' bila'yönně' didza' ní, bulu'xösa ládxi'do'gaquiě' légaquiě', ate' bila'rúajě' tu tuě'. Gula'sí lógachiě' bönni' gúlarö ga bidxintě' bönni' cuidí'. Nagá'aně' Jesús ní, dzáganu nigula na' Lě' gatsaj láchui'lö nupa na' tu'zě nágagaca Lě'.

10 Ní'irö buzuíně' Jesús leyúbölö, en cuntú nu bilé'eně' nu ruzegui lěnu didza', pero túzinu nigula na', ate' rě'ě-nu:

—Nígúla, ¿gazxi nacúa' nupa na' bulu'zegui lí' didza'? ¿Naru' cabí zoa nu bönni' richúguiě' quiu'?

11 Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bití'rö gunu' dul-la'.

Náquië' Jesús bení' quégaca bönachi yödzölió

12 Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', biti' të' ga naca chul-la que dul-la', pero tu bení' sóalen bönni' na' le ulu'í lë' naca gata' yöl-la' na'bán idú queë'.

13 Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

14 Bubi'ë didza' Jesús, rë' légaquië':

—Sal-la' runa' ba nalí que la' cuinsa', idütë li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en calëga gazxi tseja'.

15 Libí'ili' ruchi'a rusöröli' ca náacagaca le taca yödzölió ni, pero neda', rácasö quia' cuntu nu bönni' ruchi'a rusöröa' queë'.

16 La'tu' uchi'a usöröa', ca nácatë uchi'a usöröa', tu' calëga néda'sö uchi'a usöröa', pero Xuza' nasöl-lë'ë neda' gunë' neda' tsözxön.

17 Lëzca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idütë li naca.

18 Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

19 Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lëzca' Xuza' gúnbë'ëli'-në'.

20 Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' guí'ina gapa ta'gu'ë gun que yudo', pero cuntu nu guzxön Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali'"

21 Leyúbölö Jesús rë' légaquië', rnnë':

—Uzá'a yödzölió ni, ate' uguíljali' nu usölá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

22 Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

23 Jesús rë' légaquië':

—Libí'ili' nácali' que luyú dë cadxí'ilo ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni.

24 Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usölá, ugá'ana dul-la' nabága'li', en gátili'.

25 Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te.

26 Zían le ral-la' guía' libí'ili', en uchi'a usöröa' le naca queéli'. Didza' idútë li ru'ë Xuza' nasöl-lë'ë neda', ate' didza' riyönda' ru'ë Lë', ru'ílena' bönachi yödzölió ni.

27 Biti' gula'yéajni'inë' ru'ílenë' légaquië' didza' ca naca queë' Dios Xuz.

28 Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusöla', en biti' bi runa' rácasö quia', pero ca na' rulu'í'ine' Xuza' neda', ca' ruá'a didza'.

29 Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

30 Cate' bë'ë Jesús didza' ni, bönni' zían gula'yéajlë'ë Lë'.

Nupa náca'gaca xzí'inë' Dios, en nupa nadzú'ngaca lu na' dul-la'

31 Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'.

32 Gúnbë'ëli' le naca idútë li, ate' le naca idútë li na' usöla' libí'ili'.

33 Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso: "Usöla' libí'ili'?"

34 Jesús rë' légaquië':

—Le nácatë rea' libí'ili': Yúgu'të nupa tun dul-la', nadzú'ngaca lu na' dul-la'.

35 Nu naca bönni' nadó'o biti' ugá'anatica'sö lidxë' xan yu'u, pero nu naca xzí'inë' xan yu'u na' rugá'anatica'sö lidxi nu na' naca xan yu'u.

36 Caní naca, channö Nu na' naca Xzí'inë' Dios usöla' libí'ili', le nácatë uláli'.

37 Nözda' naquië' Abraham xuz gudödi queéli', pero rizóa ribö'öli' gútili' neda', tu' cabí nazí' lu ná'ali' xtídza'a.

38 Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

39 Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú xzí'ini xi'sóë' Abraham, gunli' ca na' benë' Abraham.

40 Na'a, rizóa ribö'öli' gútili' neda', sal-la' ru'ílena' libí'ili' didza' idútë li, didza' na' biyönda' bë'ë Dios. Biti' benë' Abraham caní.

41 Libí'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

42 Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gúsöl-lë'ë neda'.

43 ¿Bizx que biti' gaca tséajni'ili' didza' ruá'a? Naca tu' cabí rë'ënili' uzë nágali' xtídza'a.

44 Xuz quézili' naca tu' xihui'. Néquili' que tu' xihui', en rë'ënili' gunli' le rizë'ladxi' xúzili' na'. Dza ní'te naca tu' xihui' nu guti bönachi, en cabí nazí' lu në'e le naca idútë li, tu' cabí ruí'i didza' idútë li. Cate' rizí' yë' tu' xihui', ca naca caz ruí'i didza', tu' naca nu rizí' yë', en naca ca xú'zgaca caz nupa ta'zí' yë'.

45 Tu' ruá'a neda' didza' idútë li biti' réajlë'ëli' neda'.

46 ¿Núzxilöli' gaca usubága'li' neda' dul-la'? Channö ruá'a didza' idütë li, ¿bizx que bití' réajlë'ëli' neda'?

47 Nu naca queë' Dios, ruzë nagui xtídzë'ë Dios, pero libí'ili', tu' cabí nácali' queë' Dios, bití' ruzë nágalí' xtídzë'ë.

Cristo zoa cazë' zí'atëlö ca Abraham

48 Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

49 Bubi'ë didza' Jesús, rë' légaquië':

—Bití' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö.

50 Bití' runa' zxön cuina'. Zoa Nu run zxön neda', ate' Lë' ruchi'a rusóroë' rë'u.

51 Le nácatë rea' libí'ili': Nu bönni' si' lu në'ë xtídzá'a, bití' ca' gátië' bönni' na'.

52 Ní'irö yugu' bönni' judío na' të' Lë', ta'nnë':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu në'ë xtídzá'a, bití' ca' gátië' bönni' na'."

53 ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

54 Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' bití' bi gaca. Xuza' runë' neda' zxön, ate' libí'ili' rnnali' náquië' Dios queëli'.

55 Libí'ili' bití' núnbë'ëli'-në' Dios Xuz, pero neda' núnbë'a-në'. La'tu' inniá': Bití' núnbë'a-në', gaca' nu rizi' yë' ca na' nácali' libí'ili', rizi' yë'ëli'. Na'a, le nácatë núnbë'a-në', en nazí' lu na'a xtídzë'ë.

56 Xúzili' Abraham budzëjanë' tu' ral-la' ilë'enë' dza soa' yödzülió ni, en sal-la' gútië' dza ni'te, bilé'enë' le, en budzëjade'enë'.

57 Ní'irö yugu' bönni' judío na' të' Jesús, ta'nnë':

—Bití' yu'ínu' chi-un iz. ¿Naru' bilé'etsenu' Abraham?

58 Jesús rë' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

59 Ní'irö gula'guélë'ë guiöj para ulu'ladxë' Jesús, pero Lë' bunítite cuinë', en burúajë' lö'a yudo' na'. Gudödë' gatsaj láhui'lö ga na' nacu'ë, ate' söhuöjë'.

9

Ruúnë' Jesús tu bönni' guljë' nachúl-latë lahuë'

1 Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

2 Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

3 Bubi'ë didza' Jesús, rë' légaquië':

—Bití' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni.

4 Run bayudxi gunru' xichinë' Xuza' nasól-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntú nu gaca gun dxin.

⁵ Tsanni ni zoa' yödzölió ni, naca' bení' quégaca bönachi yödzölió.

⁶ Cate' Jesús budxi bē'ē didza' ni, gurú'unē' zxōna' lu yu, en benē' gúna'do' len zxōna' na', ate' bugu'ē guna' na' guióǵ lahuē' bōnni' na' nachul-la lahuē'.

⁷ Ní'irō rē' lē':

—Guyéaj yójtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irō bōnni' na' nachul-la lahuē' guyijē' ni', yójtibi lahuē'. Cate' buzē'ē ni' chirilé'enē'.

⁸ Ní'irō bulu'bani bönachi dzaga yu'u queē', en nupa ni' bila'lé'e lē' zí'atēlō cate' ni' nachul-la lahuē', ta'nná:

—¿Naru' caléga bōnni' ni bōnni' na' ribō'ē rinabē' nu bi unödzej queē'?

⁹ Bal-lē' ta'nnē':

—Lē' na'.

Ia'bal-lē' ta'nnē':

—Caléga lē', pero ca rna' lahuē' bōnni' na', rna' lahuē' ca' bōnni' ni.

Lē' rnnē':

—Neda' na'.

¹⁰ Ní'irō gula'nábinē' lē', ta'nnē':

—¿Nacxi caz guca, guyalaj guióǵ lo'?

¹¹ Bubi'ē didza', rē' légaquiē':

—Bōnni' na' lē' Jesús benē' gúna'do', ate' gudēbē' gúna'do' na' guióǵ lahua', en gudxē' neda': “Guyéaj ra' beaj nisa nazí'i le Siloé, yójtibi lo'.” Guyija' ni', yójtibi lahua', ate' guyálajtē guióǵ lahua'.

¹² Ní'irō gula'nábinē' lē', ta'nnē':

—¿Gazxi zoē' bōnni' na'?

Lē' rē' légaquiē':

—Biti' nōzda'.

Yugu' bōnni' yudo' ta'náb yúdxinē' bōnni' na' guyalaj guióǵ lahuē'

¹³ Ní'irō gula'chē'ē bōnni' na' zí'alō nachul-la lahuē', en bulu'sudxinē' lē' lógaquiē' bōnni' yudo' fariseo.

¹⁴ Tu' naca dza lá'ayi quégaquiē' cate' benē' Jesús gúna'do' na', en gusaljē' guióǵ lahuē' bōnni' na' zí'alō nachul-la lahuē',

¹⁵ que lē' ni na' yugu' bōnni' yudo' fariseo na' gula'nábinē' lē' leyúbölō nacxi guca guyalaj guióǵ lahuē'. Lē' gudxē' légaquiē':

—Budxíē' gúna'do' guióǵ lahua', ate' yójtiba' le, en rilé'eda'.

¹⁶ Ní'irō gulu'ē didza' bal-lē' bōnni' yudo' fariseo na', ta'nnē':

—Biti' nasöl-lē' Dios bōnni' na', tu' cabí rapa chi'ē dza lá'ayi.

Ia'bal-lē' ta'nnē':

—¿Naru' huácatsō tu bōnni' dul-la' gunē' yugu' yöl-la' huáca runē' bōnni' na'?

Caní guca, bila'rúajē' choplō.

¹⁷ Leyúbölō gula'nábinē' bōnni' na' zí'alō nachul-la lahuē', ta'nnē':

—¿Bizxi rnno' li' queē' bōnni' na', gusaljē' guióǵ lo'?

Lē' rnnē':

—Náquiē' bōnni' ru'ē didza' uláz queē' Dios.

¹⁸ Biti' gula'yéajlé'ē bōnni' judío unná bē' na' guljē' nachúl-latē lahuē' bōnni' na', en guyalaj guióǵ lahuē', cate' bulu'lídzarē' xuz xinē'ē bōnni' na' guyalaj guióǵ lahuē',

¹⁹ ate' gula'nábinē' légaquiē', ta'nnē':

—¿Naru' náquiē' bōnni' ni zxi'nili', rnnali' guljē' nachúl-latē lahuē'? ¿Nacxi caz naca rilé'enē' na'a?

20 Bulu'bi'ë didza' xuz xinë'ë na', të légaquië':

—Nözitu' bönni' ni náquië' zxi'initu', en guljë' nachúl-latë lahuë',

21 pero nacxi guca, rilé'enë' na'a, biti' nöztu', en nuzxi na' gusalaj guiøj lahuë', biti' nöztu'. Guli'nabi-në' lë', tu' chináquië' bönni' chinaca. Lë cazë' quixjõ'ë.

22 Caní gula'nnë' xuz xinë'ë bönni' na' zí'alò nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sedë' queë' Dios.

23 Que lë ni na' gula'nnë' xuz xinë'ë: “Guli'nabi-në' lë', tu' chináquië' bönni' chinaca.”

24 Ní'irö yugu' bönni' judío unná bë' bulu'lidzë' leyúbölö bönni' na' zí'alò nachul-la lahuë', ate' të' lë':

—Ní'a queë' Xanru' Dios gudixjõ' le nácatë. Netu' réquibe'etu' bönni' na' náquië' bönni' dul-la'.

25 Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alò nachul-la lahua', ate' na' a rilé'eda'.

26 Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiøj lo'?

27 Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' rë'ënili' yónili' leyúbölö? ¿Naru' rë'ënili' tá'ali' ca' Lë'?

28 Ní'irö bulu'lidza zi'ë lë', ta'nnë':

—Li' do'o Lë', pero netu' dá'atu' Moisés.

29 Netu' nöztu' Dios bë'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

30 Ní'irö bubi'ë didza' bönni' na', rë' légaquië':

—Lë ni run ga rubánida'. Libí'ili' biti' nözili' nuzxi gusöl-la' bönni' ni, ate' Lë' gusaljë' guiøj lahua'.

31 Nöziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca rë'ënë' Lë', Dios riyönnë' bönni' ni.

32 Dza ni'te biti' riyön nu gunná channö nu bönni' gusaljë' guiøj lahuë' tu bönni' guljë' nachúl-latë lahuë'.

33 La'tu' cabí náquië' bönni' ni queë' Dios, biti' bi gaca gunë'.

34 Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'?

Ní'irö bulu'béajë' lë' ní'ilö.

Nupa nácacaga chul-la niti

35 Biyönnë' Jesús ca gulunë' bönni' judío unná bë', bulu'béajë' bönni' na' zí'alò nachul-la lahuë'. Cate' budzáguë' lë', gudxë' lë':

—¿Ba réajlë'u Zxi'inë' Dios?

36 Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

37 Jesús rë' lë':

—Chibilé'enu' Lë', ate' neda' ni ru'ílëna' li' didza', naca' Zxi'inë' Dios.

38 Ní'irö bönni' na', gusalaj guiøj lahuë', guyéaj ládxë'ë Jesús, en rë' Lë':

—Xan, réajlë'a Li'.

39 Jesús rnnë':

—Para uchi'a usöröa' bönachi bida' yödzülió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

⁴⁰ Cate' yugu' bönni' yudo' fariseo na' nacuá'lené' Jesús bila'yönné' didza' ni, ní'irö tē' Lē':

—¿Naru' nachul-la nanítitsatu'?

⁴¹ Bubi'ë didza' Jesús, rē' légaquié':

—La'náru' nachúl-lasö guiöj loli', biti' ibága'li' dul-la'. Na'a rnnali': "Rilé'etu'." Que lē ni na' nabága'li' dul-la'.

10

Rucúdzu'ë didza' Jesús que lē'a quégacaba' bö'cu' zxila'

¹ Gunnē' ca' Jesús:

—Le nácatē rea' libí'ili': Nu bönni' biti' raziē' saca' ga nu riyaza lē'a quégacaba' bö'cu' zxila', pero tsáziē' saca' ga yúbölö, bönni' ni náquiē' gubán, en ribán cazē'.

² Nu bönni' raziē' saca' ga nu riyaza náquiē' bönni' run chí'i cazē' bö'cu' zxila' na'.

³ Para tsáziē' bönni' ni, risalaj nu zoa run chí'i ga nu riyaza, ate' ta'yöniba' bö'cu' zxila' na' chí'ë, en tu'únbē'ëba'-nē'. Lē' rulidzē'-ba' que queëba' ca légacaba', en rubéajē' yugu' bö'cu' zxila' na'.

⁴ Cate' chinubéajē'-ba' yúgu'tēba' bö'cu' zxila' néquigacaba' queë', röjnöruē' lógacaba', ate' bö'cu' zxila' na' röjnógacaba' lē', tu' tu'únbē'ëba' chí'ë.

⁵ Bönni' yúbölö biti' tsöjnógacaba' lē', pero ulu'zxúnnajba' queë', tu' cabí núnbē'gacaba' chí'igaquiē' bönni' yúbölö.

⁶ Le rucudzu' didza' ni gudxē' Jesús légaquiē', pero biti' gula'yéajni'inē' lē na' rē' légaquiē'.

Náquiē' Jesús ca bönni' rapa chí'ë-ba' bö'cu' zxila'

⁷ Ní'irö Jesús rē' légaquiē' leyúbölö, rnnē':

—Le nácatē rea' libí'ili': Neda' naca' ca tu ga ta'yázaba' bö'cu' zxila'.

⁸ Chigula'lē'ë zían bönni' gula'nnē' nácaqaquiē' Cristo, pero yúgu'tē bönni' na' bila'dxinē' zí'alö ca neda', nácaqaquiē' gubán, en ta'bán cazē', ate' biti' bulu'zē' nágaba' bö'cu' zxila' na' légaquiē'.

⁹ Neda' naca' ca tu ga nu riyaza. Núti'tēs bönni' tsázalenē' neda', ulé' bönni' na', en gáquiē' ca tuba' bö'cu' zxila' rázaba', en rurúajba', en ridzöliba' le ráguba'.

¹⁰ 'Za'zē' bönni' gubán para cuanē'-ba', en gútiē'-ba', en usunítíē'-ba'. Neda' bida' para gata' yöl-la' na' bán idú quégaca bönachi nácaqaca ca bö'cu' zxila' quia'. Le nácatē gata' quégaquiē' yöl-la' na' bán idú na'.

¹¹ Neda' run chí'igaca' bönachi quia' ca runē' bönni' na', lu yöl-la' dxí'i ladxi' queë' rapa chí'ë yugu' bö'cu' zxila'. Bönni' na' rapa chí'ë-ba' bö'cu' zxila' caní zoa cazē' udödē' yöl-la' na' bán queë' ní'a quégacaba' bö'cu' zxila' queë'.

¹² Tu bönni' nazxjē' rapa chí'ë-ba' bö'cu' zxila', cate' rilé'enē' zá'aba' bö'cu' guí'a sínia', rucá'anē'-ba' bö'cu' zxila' na', en ruzxúnajē', ate' bö'cu' guí'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runē' bönni' na' rapa chí'ë-ba' bö'cu' zxila' tu' cabí náquiē' idú nu run chí'i-ba' bö'cu' zxila', ate' biti' néquigacaba' que cazē' bö'cu' zxila' na'.

¹³ Ruzxúnnejë' bönni' nazxjë' na' tu' rapa chi'ë-ba' bö'cu' zxila' na' para sí'së' dumí, en bití' ru'í ládxe'ë-ba' bö'cu' zxila' na'.

¹⁴⁻¹⁵ 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbë'egacada' bönachi quia' nácgaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiqueuiba' quia' núnbë'gacaba' neda'.

¹⁶ Lësca' nacuá'aba' ia'zica'röba' bö'cu' zxila' quia' bití' nabábagacaba' ni. Lësca' légacaba' ral-la' tsöjxí'gaca'-ba'. Léga'caba' ulu'zë' nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

¹⁷ 'Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti.

¹⁸ Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'.

²⁰ Zíanë' ta'nnë':

—Yu'u bö' xihui' Lë', en nachixi icjë'. ¿Bizx que ruzë' nágali' Lë'?

²¹ Ia'bal-lë' ta'nnë':

—Bití' ca' ru'ë caní didza' bönni' yu'u bö' xihui' lë'. ¿Naru huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zóë' Jesús tsölá'alö

²² Raca beo' ziaga, en naca dza na' tunë' laní yödzo' Jerusalén, tu'subanë' ca gula'gu'ë yudo' quégaquië' lu në'ë Dios.

²³ Ridë' Jesús ra' yudo' ga naca chila que, nazí'i le Chila Queë' Salomón.

²⁴ Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjöi' netu'.

²⁵ Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácgaca bë' Nu naca'.

²⁶ Libí'ili' bití' réajlë'ëli' neda', tu' cabí nabábalenli' nupa nácgaca bö'cu' zxila' quia', ca na' chigudxi caza' libí'ili'.

²⁷ Ta'yóniba' bö'cu' zxila' quia' chi'a, en tu'únbe'eba' neda', ate' neda' núnbë'egacada'-ba', ate' ridijácalenba' neda'.

²⁸ Neda' runödza' yöl-la' na'bán idú quégacaba', ate' bití' ca' ila'nítiba', ate' cuntu nu sequí' ubéaj léga'caba' lu na'a neda'.

²⁹ Xuza' Dios bennë' quia' léga'caba', ate' Lë' nápatërë' yöl-la' huáca ca yúgu'të bönachi, ate' cuntu nu sequí' ubéaj léga'caba' lu në'ë Xuza'.

³⁰ Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guélë'ë guiöj ulu'ladxë' Jesús.

³² Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxí'li' neda' guiöj?

³³ Bulu'bi'ë didza' bönni' judío unná bë' na', të' Lë':

—Ni'a que dxin dxi'a bití' uládxí'tu' li' guiöj, pero tu' cabí rnníó' dxi'a queë' Dios, tu' nacu' li' bönáchisö, en run cuinu' Dios.

³⁴ Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunné' Dios, rnna: "Neda' rnní'a: Nácali' yugu' dios"?

³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ru'i lágaquië' dios, bönni' ni' Dios bé'lenë' légaquië' didza'.

³⁶ Dios bubéajë' neda' quez queë', en gusöl-lë'ë neda' yödzülió ni. ¿Naru' rnnátsali' quia': "Li' biti' rnní'o' dxi'a queë' Dios", tu' gunní'a: Zxí'inë' Dios naca'?

³⁷ Channö cabí runa' dxin budödë' Xuza' Dios lu na'a, biti' ral-la' tséajlë'ëli' neda'.

³⁸ Channö runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácacaca bé' dxin na' runa', para guéquibe'ëli' náquië' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

⁴⁰ Ní'irö guyijë' Jesús leyúbölö ia'tsölá'a yegu Jordán, ga ni' buquilë' Juan bönachi nisa zí'atëlö, ate' bugá'anë' Jesús ni'.

⁴¹ Bila'dxín bönachi zían ga zoë' Jesús, ta'nná:

—Le nácatë biti' benë' Juan nitú yöl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idütë li zeaj naca.

⁴² Que lë ni na' gula'yéajlë'ë bönni' zían Jesús ga na' zoë'.

11

Le guca cate' gútië' Lázaro

¹ Dza ni' ré'enë' Lázaro, bönni' Betania, le naca ládizagacanu María, en Marta. Nácanu Marta na' zxílanu María na'.

² Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzxinu ni'ë len guitsa' ícjanu.

³ Gula'söl-la'nu nigula zanë' Lázaro na' nu yöjödë Jesús, gunná:

—Xan, buyútsöca, ré'enë' Lázaro, bönni' na' nadxí'ínu'-në'.

⁴ Cate' biyönnë' Jesús didza' ni, gudxë' nupa nacuá' ni', rnnë':

—Yödzühuë' ni biti' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzühuë' ni ilá' lahui ca' yöl-la' zxön quia' neda', Zxí'inë' Dios.

⁵ Jesús nadxí'inë' Marta, en nigula zxílanu Marta na', en Lázaro na'.

⁶ Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'.

⁷ Cate' bizá'a chopo dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

⁸ Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bé' ni' ulu'ladxë' Li' guiöj. ¿Naru' uyéajtso' leyúbölö ni'?

⁹ Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridë' lahui' dza, biti' tsöjchégu'ë, tu' rilë'enë', tu' zóalen lë' bení' zóa yödzülió ni.

¹⁰ Channö ridë' bönni' na' chi'i dzö'ölö, røjchégu'ë, tu' cabí zóalen bení' lë'.

¹¹ Cate' budxi bé'ë Jesús didza' ni, ní'irö gudxë' légaquië':

—Rásië' Lázaro, böchí' luzá'aru', ate' tseja' neda', en usubana'-në'.

¹² Ní'irö yugu' bönni' usëda queë' të' Lë', ta'nnë':

—Xan, channö rásië', huóáquië'.

¹³ Gunnë' caní Jesús tu' chigútië' Lázaro, pero légaquië' téquinë' gunnë':
Rásisë' Lázaro.

¹⁴ Ní'irö Jesús gudxë' légaquië' yálajdo', gunnë':

—Chigútië' Lázaro.

¹⁵ Rudzējada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

¹⁶ Ní'irö Tomás, bönni' na' tu'ë lë', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyéajru' ca' rë'u, en gátillenru'-në'.

Náquië' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dë yödzö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacuá'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba.

²⁰ Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'.

²¹ Marta na' rënu Jesús:

—Xan, la'tu' zu' ni, biti' gátië' bönni' zana'.

²² Lë'sca' na'a, nözda' yúgu'të le inábinu' Dios, Lë' gunnë' quiu'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

²⁵ Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz,

²⁶ ate' yúgu'të bönni' nabángaquië', en ta'yéajlë'ë neda', biti' ca' ilátië' tsaz. ¿Réajlë' u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxí' lu në'ë Dios isöl-lë'ë yödzólió ni.

Ribödxë' Jesús tu' ruí'í ládxe'ë nigula zanë' Lázaro

²⁸ Cate' budxi bë'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

²⁹ Cate' biyönninu María didza' ni, la' guyástënu, zéajnu ga na' zoë' Jesús.

³⁰ Biti' rázinë' Jesús la' yödzödo' na', pero zóasë' ga na' yöjtságanu Marta Lë'.

³¹ Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnéhoquië'-nu, ta'nnë':

—Uyéajnu ra' yeru ba tsójchödxinu ni'.

³² Ní'irö bidxinu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

³³ Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnëda' ládxe'ë.

³⁴ Rnnë':

—¿Gazxi bucáchi'li'-në'?

Të Lë':
—Gudá uyú'.

³⁵ Gurödxë' Jesús.

³⁶ Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

³⁷ Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

³⁸ Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiöj, ate' da' tu guiöjta'a le nusayaj ga nu riyaza le.

³⁹ Jesús gudxë' nupa nacuá' ni', rnnë':

—Guli'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

⁴⁰ Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxon queë' Dios?

⁴¹ Ní'irö gula'gúë' guiöjta'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'.

⁴² Neda' nözda' riyöntiqui'sinu' neda', pero ruá'a didza' ni para ulu'z'í xibë bönnachi zían ni, en ila'yéajlë' Li' na' nasól-lu'u neda'.

⁴³ Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴ Burúajë' bönni' na' gúquië' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

⁴⁵ Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'.

⁴⁶ Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús.

⁴⁷ Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë, en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxon.

⁴⁸ Channö gü'isiru'-në' lataj gunë' ca ni run cazë', ila'yéajlë' yúgu'të bönnachi Lë', ate' idijáquië' bönni' Roma ni, duquínnaajgaquië' yudo' lá'ayi queëru', en yödzö queëru'.

⁴⁹ Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nözili',

⁵⁰ en biti' réquibe'eli' run bayudxi gátië' tuë' bönni' ni'a quégaca bönnachi, para cabí initi idú yödzö.

⁵¹ Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönnachi yödzö na'.

⁵² Gátie' Jesús, calégasö ni'a que yödzo na', pero gátie' ca' para utubé' yugu' xzí'iné' Dios násilasigaquié', para ilácagaquié' tuz.

⁵³ Caní guca, la' dza ná'asö gulún xtídza'gaquié' ilútié' Jesús.

⁵⁴ Que lè ni na' bití'rö gudé' Jesús yálajdo' gapa naca'acá' bönachi judío, pero buzé'è ni', sa'yéajé' tu lataj gala' ga naca lataj cá'asö, ate' bidxiné' yödzo Efraín, ga ni' bugá'ané', ate' dzágagaquié' bönni' usèda queè' Lè'.

⁵⁵ Dza na' chizá' gala' Laní Pascua quégaquié' bönni' judío cate' tu'subané' ca bené' Dios, bubéajé' bönachi queè' luyú Egipto. Bila'rúaj bönachi zían yugu' yödzo ni', ate' gula'bené', sójáquié' Jerusalén cate' sí' idxín laní na' para tsöjpá'a cuíngaquié' ca naca que yudo'.

⁵⁶ Yugu' bönni' na' nacu'è Jerusalén tu'guiljé' Jesús, en cate' ni' nacu'è chila yudo', gula'nabi luzá'agaquié' tué' ia'tué', ta'nné':

—¿Bizxi rusáca'li'? ¿Huídatsé' laní, o bití' guidé'?

⁵⁷ Chigula'nná bē'è yugu' bixúz unná bē', en yugu' bönni' yudo' fariseo channö nu nōzi ga zoé' Jesús, ral-la' ududíxjōi'i légaquié' para gaca tsöjxōngaquié' Lè'.

12

María rigú'unu le rilá' zxixi ni'è Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subané' bönni' judío ca bené' Dios, bubéajé' bönachi queè' luyú Egipto, ní'irö bidxiné' Jesús lu yödzo Betania, ga na' zoé' Lázaro, bönni' na' gútié', en bubané' lu yöl-la' guti.

² Gula'gu'è tu gü'i huagu ni' le gahué' Jesús. Gulú'unu María le ilahué', ate' nútsé'è Lázaro ladaj bönni' rō'ölengaquié' Jesús ga na' tahué'.

³ Ní'irö gudéla'nu María ca tu guié le rilá' zxixi que yōj susén lasi idú, le nazáca'da', en gulú'unu le ni'è Jesús. Buzxinu ni'è len guitsa' ícjanu. Idúte' lu yu'u na' guzé bō' zxixi.

⁴ Ní'irö bē'è didza' tu bönni' usèda queè' Jesús, lè' Judas Iscariote, xzí'iné' tu bönni' lé' Simón, en náquié' bönni' na' udödé' Jesús lu ná'agaquié' yugu' bönni' yudo', rnné':

⁵ —¿Bizx que bití' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

⁶ Gunné' caní, caléga tu' ruí'i láchxé'è bönachi yechi', pero tu' náquié' gubán, en lè cazé' nu'è buzudi dumí quégaquié', en rubéajlané' dumí na' tu'chejé' lu buzudi na'.

⁷ Ní'irö Jesús ré' lè':

—Bē'è-nu lataj, tu' naca lè ni bennu tu le nabá'a para dza igácha'a.

⁸ Yugu' bönachi yechi' ila'cuá'lentica'sö libí'ili', pero neda' bití' ugá'anatica'sa' ga zóali'.

Tun xtídza'gaquié' bönni' judío unná bē' ilútié' Lázaro

⁹ Cate' bila'yönné' bönni' judío zoé' Jesús yödzo Betania, bila'dxiné' zíané' ni', calégasö tu' zoé' Jesús ni', pero lésca' tu' té'enné' ila'lé'ené' Lázaro, bönni' na' busubané' Jesús lu yöl-la' guti.

¹⁰ Ní'irö gulún xtídza'gaquié' yugu' bixúz unná bē', ilútié' ca' Lázaro,

¹¹ tu' ta'yéajlé'è zían bönni' judío Jesús ni'a queè' Lázaro na', en chin-ula'alengaquié' yugu' bixúz unná bē' na'.

Len yöl-la' ba zxön razië' Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'.

¹³ Ní'irö gula'guítsjë' zin, en bila'rúajë' söjxi'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzölinë' Jesús tuba' búrrodo', ate' gudxíë'-ba' ca na' nazúaj lu guichi lá'ayi, rnna:

¹⁵ ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bé'enë' libí'ili'!

¡Dxíë'-ba' tuba' búrrodo'!

¹⁶ Cate' ni' si' guca lé ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnëguequinë' lé ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lé' lu yöl-la' guti, gulunë' ba nalí queë'.

¹⁸ Que lé ni na' ca' bila'rúajë' bönni' yöjxi'gala'gaquië' Jesús, tu' bila'yönnë' ca naca yöl-la' huáca ni benë' Lë'.

¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guiljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios.

²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yué' lahuë', ta'nnë':

—Bönni', rë'ënitü' ilé'etu'-në' Jesús.

²² Guyijë' Felipe na', en yöjödxe' ca' Andrés. Ní'irö Andrés, en Felipe na' gulë' ca' Jesús.

²³ Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá.

²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tëro unödzej.

²⁵ Nu bönni' ruí'i ládxi'dë'ë yöl-la' na'bán queë', unítië' le, tu' gátie' tsaz bönni' na'. Nu bönni' biti' ruí'i ládxë'ë yöl-la' na'bán dë queë' yödzölió ni gun chi'ë le ga idxinrö dza gata' yöl-la' na'bán idú queë'.

²⁶ Channö rë'ëne' nu bönni' gunë' xichina', ral-la' të'ë neda' bönni' na', ate' ga ni' tsöjsó'a' neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Rigúxjö'ë Jesús ca si' ilútië' Lë'

²⁷ Gunnë' ca' Jesús:

—Na'a rö'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lé ni na' bida', para guá' ilena' le ral-la' gaca quia' na'a.

28 Xuza', ben ga ilá' lahui yöl-la' zxön quiu'.

Ní'irö biyön chi'i Nu ruí'í didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

29 Bila'yöni bönachi zían nacuá' ni' chi'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lenë' Lë' didza'.

30 Ní'irö bubi'ë didza' Jesús, rë' légaquië':

—Biyön chi'i ni, calëga para uzi'a xibé neda', pero para uzí'ili' xibé libí'ili'.

31 Chibidxín dza uchi'a usöröë' Dios bönachi yödzölió ni. Na'a chú'unë' Dios tu' xihui' ní'ilö, nu na' rinná be'e bönachi yödzölió ni.

32 Na'a, channö ilútië' bönmi' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

33 Didza' ni bé'ë Jesús naca bé' ca gátië'.

34 Bönachi zían na' të Jesús, ta'nná:

—Netu' biyönitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Li': "Run bayudxi Bönmi' Guljé' Bönachi, ulu'chisë' Lë' xitsá'?" ¿Nuzxi na' Bönmi' Guljé' Bönachi?

35 Ní'irö Jesús rë' légaquië':

—Ia'tú chí'ido'osö sóalena' neda' libí'ili', en naca' bení' queëli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönmi' ridë' ga chul-la niti bití' nözinë' gazxi sa'yéajë'.

36 Tsanni ni zóalena' libí'ili', naca' bení' queëli'. Guli'tséajlë' neda' naca' bení' queëli' para ilé'eli' bení' na' naca idú.

Cate' Jesús budxi bé'ë didza' ni, yöjhuöjë' yöjcachi' lahuë' lógaquië'.

Le run nigui bönachi judío, para cabí ila'yéajlë' Jesús

37 Sal-la' benë' Jesús zían yöl-la' huáca lógaquië', bití' gula'yéajlë'ë Lë'.

38 Caní guca lë na' buzúajë' Isaías lu guichi, bönmi' na' bé'ë didza' uláz queë' Dios, gunné:

Xan, ¿nuzxi caz guyéajlë' didza' bé'ëtu'?

¿Nuzxi caz buluf'inë' Xanru' yöl-la' huáca queë'?

39 Caní guca, bití' guca ila'yéajlë'ë Jesús. Guca ca na' gunné' ca' Isaías:

40 Dios benë' ga gula'chul-la gula'nítië',

ate' guca zidi ládxi'do'gaquië'

para cabí ila'lé'enë' len guiöj lógaquië',

en cabí ila'yéajni'inë' lu icja ládxi'do'gaquië'.

Bití' ulu'huóáquië' quia' para úngaca'-né'.

41 Bé'ë Isaías didza' ni tu' bilé'enë' yöl-la' zxön queë' Cristo, en bé'ë didza' ca naca queë' Lë'.

42 Sal-la' raza caní, gula'yéajlë' bönachi zían Jesús, ga bidxintë gula'yéajlë'ë bal-lë' bönmi' unná bé' Lë', pero tu' tádxinë' yugu' bönmi' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu'dubë' tu'sédë' queë' Dios.

43 Caní gulunë' tu' tunrë' zxön le tun bönachi légaquië' bal ca le runë' Dios légaquië' bal.

Ilún didza' bé'ë Jesús ga irugu quégaca bönachi ilátigaca

44 Bé'ë zidzaj didza' Jesús, rnnë':

—Nu bönni' réajlë'ë neda', calëga neda'sö réajlë'ë, pero réajlë'ë ca' Xuza' nasöl-lë'ë neda'.

⁴⁵ Lëasca' caní, nu bönni' rilé'enë' neda', rilé'enë' ca' Xuza' nasöl-lë'ë neda'.

⁴⁶ Neda' naca' bení', en bida' yödžolió ni, para cabí ulu'gá'anë' ga chul-la yúgu'të bönni' ila'yéajlë'ë neda'.

⁴⁷ Channö riyönnë' nu bönni' xtídza'a, en biti' runë' le bal, calëga neda' ichuga' queë' bönni' na' gátie', tu' bida' ni, calëga para ichuga' quégaca bönnachi yödžolió ni, pero para usölá' bönnachi yödžolió ni.

⁴⁸ Nu bönni' ruzóë' neda' tsölá'aló, en biti' rizí' lu në'ë xtídza'a, chizóa le ichugu queë' bönni' na'. Didza' na' chibë'lëna' libí'ili' naca tu le ichugu queë' bönni' na' dza údxi.

⁴⁹ Caní naca, ruá'a didza', calëga rácasö quia', pero Xuza' nasöl-lë'ë neda' gudxë' neda' le ral-la' innía', enca' ca ral-la' gu'a didza'.

⁵⁰ Nözda' gunná bë'ë Dios caní para gata' yöl-la' na'bán idú quégaca bönnachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesús riguibë' ní'agaquië' bönni' usëda queë'

¹ Ni' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönnachi queë' luyú Egipto. Nözinë' Jesús chibidxín dza queë' gátie', cate' ral-la' uzë'ë yödžolió ni, en huöjë' ga zoë' Xuzë'. Ca na' nadxí'inë' bönnachi queë' nacua' yödžolió ni, na' nadxí'inë' légaquië' ga idxintë gátie' uláz quégaquië'.

² Satanás tu' xihui' chinagú'u yöl-la' Judas Iscariote, zxí'inë' tu bönni' lë' Simón, para udödë' Jesús lu ná'agaca nupa iluti Lë'.

³ Nözinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' iduté yöl-la' unná bë' queë'.

⁴ Que lë ni na', cate' ni' tahuë', guzuínë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë.

⁵ Ní'irö gudë'ë nisa tu lu zxiga' guíë, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

⁶ Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzé tséajni'inu'.

⁸ Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

⁹ Ní'irö Simón Pedro rë' Lë':

—Xan, calégasö ní'a quibu', pero quibu' ca' na'a, en icja'.

¹⁰ Jesús rë' lë':

—Nu nayari, ní'asö run bayudxi tsari, tu' naca cazë' dxi'a iduté', ate' libí'ili' nácali' dxi'a, pero calëga yúgu'tëli'.

¹¹ Gunnë' caní Jesús: “Calëga yúgu'tëli' nácali' dxi'a”, tu' nözinë' núlögaquië' na' udödi Lë'.

¹² Gudödi gudibë' Jesús ní'agaquië', bugué'lë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queë'li'?

¹³ Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'.

¹⁴ Na'a, channö neda' naca' Xanli', en Bönni' Usedi queéli', ate' gudiba' ní'ali', lësca' caní ral-la' gunli' libí'ili', quíbili' ní'a luzá'ali' tuli' ia'tuli'.

¹⁵ Tu le buluí'ida' libí'ili' para gunli' libí'ili' ca na' bena' neda'.

¹⁶ Le nácatè rea' libí'ili': Biti' nayépisètèrè' tu bönni' huen dxin ca xanè', ate' bönni' gubáz bití' nayépisètèrè' ca nu nasöl-la' lè'.

¹⁷ Channö réajni'ili' yúgu'tè lè ni, bica' ba libí'ili' channö gunli' caní.

¹⁸ Didza' ni ruá'a bití' rea' yúgu'téli'. Nöz queézida' nupa gurö caza' neda', pero run bayudxi gaca lè na' nazúaj lu guichi lá'ayi, le rnna: "Nu rágulen neda' tsözxön, nu ni tá'baga' neda'."

¹⁹ Na'a riguúxjö'ida' libí'ili' zí'alö ca gaca, para cate' gaca caní, tséajlè'èli' zoa caza' neda'.

²⁰ Le nácatè rea' libí'ili': Nu bönni' gunè' bal gubáz isöl-la'a neda', neda' ca' gunè' bal, ate' nu bönni' gunè' neda' bal, gunè' ca' bal Xuza', nasöl-lè'è neda'.

Riguúxjö'è Jesús ca gunè' Judas, udödè' Lè'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bè'è didza' ni, buí'innè', ate' yálajdo' gunnè':

—Le nácatè rea' libí'ili': Tu bönni' nútsè'è ladjali' udödè' neda'.

²² Ní'irö bulu'yú lo luzá'agaquiè' tuè' ia'tuè' bönni' usèda queè', en gula'cu'è böniga, ate' ta'naba ládxi'gaquiè' nuzxi que na' gunnè' Jesús caní.

²³ Tuè' bönni' usèda queè' Jesús, bönni' na' Jesús nadxí'inè' lè', zoè' cuita lè'è.

²⁴ Simón Pedro bulá'a buluí'isè' bönni' ni para inábinè' Jesús nuzxi que na' gunnè' caní.

²⁵ Ní'irö bönni' na' zoè' cuita lè'è Jesús rè' Lè':

—Xan, ¿nuzxi na' ru'u didza' que?

²⁶ Bubi'è didza' Jesús, rè' lè':

—Náquiè' bönni' na' gu'a-nè' yöta xtila nabisa.

Ní'irö busubísiè' yöta xtila na', en bè'è queè' Judas Iscariote, zxi'inè' tu bönni' lè' Simón.

²⁷ Gudödi gudahuè' Judas yöta xtila na', guyaza Satanás tu' xihui' icja ládxi'da'ahuè'. Ní'irö Jesús rè' lè':

—Lè na' gunu', yöjentè na'a.

²⁸ Biti' ta'yéajni'inè' ia'zica'rè' bönni' usèda queè' rö'ögaquiè' tahuè' bizx que na' Jesús gudxè' lè' caní.

²⁹ Tu' nu'è Judas buzudi dumí quégaquiè', téquinè' bal-lè' Jesús gudxè' lè': Yöxí' le gáguru' laní, o gunnè': Bè' lati' quégaca bönachi yechí'.

³⁰ Cate' budxi gudahuè' Judas yöta xtila na', en ní' naca chi'i dzö'ölö, la' birúajtè'.

Tu xibá cubi

³¹ Cate' chibirúajè' Judas na', ní'irö gunnè' Jesús:

—Na'a chizóa ilá' lahui yöl-la' zxön quia' neda', Bönni' Guljè' Bönachi, en ilá' lahui ca' yöl-la' zxön queè' Dios.

³² Channö ilá' lahui yöl-la' zxön queè' Dios ní'a quia' neda', Zxi'inè', lësca' Lè cazè' Dios gunè' ga ilá' lahui yöl-la' zxön quia' neda', Zxi'inè', en la' guntè' caní.

³³ Libí'ili', zxi'ina'do', ia'tú chí'isó zóalena' libí'ili'. Uguíjali' neda', ate' ca na' chigúdxigaca'-nē' bōnni' judío, lē'sca' rea' libí'ili' na'a: Ga na' tseja' neda', bití' gaca guídali' rácasō queéli'.

³⁴ Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lē'sca' caní ral-la' idxí'ili' luzá'ali' tuli' ia'tuli'.

³⁵ Channō huadxí'i luzá'ali' tuli' ia'tuli', ilēquibe'e yúgu'tē bōnachi dá'ali' neda'.

Rnnē' Jesús innē' Pedro bití' núnbē'ē Lē'

(Mt. 26:31-35; Mr. 14:27-31; Lc. 22:31-34)

³⁶ Ní'irō Simón Pedro gunábinē' Jesús, rnnē':

—Xan, ¿gazxi caz tseju'?

Bubi'ē didza' Jesús, rnnē':

—Ga na' tseja' neda', bití' gaca sá'lenu' neda' na'a, pero huadzé guídu' ga tseja' neda'.

³⁷ Pedro rē' Lē':

—Xan, ¿bix que bití' gaca sá'lenu' Li' na'a? Chizóa' udōda' yōl-la' na'bán quia', gátia' tu' nadxí'ida' Li'.

³⁸ Bubi'ē didza' Jesús, rē' lē':

—¿Naru' udōdu' yōl-la' na'bán quiu' tu' nadxí'inu' neda'? Le nácatē rea' li', zí'alō ca cōdxiba' bōra, li' tá'bágu'u tsonna luzuí, innó' bití' núnbē'u neda'.

14

Náquiē' Jesús nōza tséajlenru' para idxinru' ga zoē' Dios Xuz

¹ Rnnē' Jesús:

—Bití' cō'li' baniga lu icja lādxi'do'oli'. Guli'tséajlē' Dios, en guli'tséajlē' ca' neda'.

² Lu yu'u lidxē' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsōjpá'a lataj queéli' ga tsōjsóali'.

³ Channō huayéaja', en tsōjpá'a lataj queéli' ga tsōjsóali', huōda' leyúbölō, ate' uchē'a libí'ili' lataj quia', para ga na' tsōjsó'a neda', tsōjsóali' ca' libí'ili'.

⁴ Nōz quézili' ga nī' tseja', en núnbē'ēli' ca' nōza.

⁵ Tomás rē' Lē':

—Xan, bití' nōztu' gazxi na' tseju'. ¿Nacxi caz gaca gúnbē'ētū' nōza?

⁶ Bubi'ē didza' Jesús, rē' lē':

—Neda' naca caza' nōza, en naca' ca' le naca idútē li, en naca' ca' Nu nabánigaca bōnachi. Ní'a quia' néda'sō gaca nu idxín ga zoē' Dios Xuz.

⁷ La'tu' núnbē'ēli' neda', Xuza' ca' núnbē'ēli'-nē'. Na'a, núnbē'ēli'-nē', en chibilé'eli'-nē'.

⁸ Ní'irō Felipe rē' Lē':

—Xan, buluí'i netu' Xuzu', ate' nácatē queētū'.

⁹ Bubi'ē didza' Jesús, rē' lē':

—Felipe, xidzé chiguca zóalena' libí'ili'. ¿Naru' cabí núnbē'ētso' neda'? Nu bōnni' rilé'enē' neda', rilé'enē' ca' Xuza'. ¿Rnnatso': "Buluí'i netu' Xuzu'?"

¹⁰ ¿Naru' cabí réajlē'u zóalen caza'-nē' Xuza', ate' Xuza' zóalen cazē' neda'? Yugu' didza' ni ru'ílenu' libí'ili', calēga rácasō quia' ruá'a didza' nī, pero Xuza' zóalen cazē' neda', Lē' cazē' runē' dxin nī.

¹¹ Guli'tséajlē' neda', zóalen caza'-nē' Xuza', ate' Xuza' zóalen cazē' neda'. Channō cabí gaca gunlí' caní, guli'tséajlē' neda' nī'a quégaca dxin nī runa'.

¹² Le nácatè rea' libí'ili': Yugu' dxin ni runa' neda', lësca' gunë' bönni' na' réajlë'ë neda', atë' le zxöntë'rö ca' gunë' bönni' na' tu' huöja' ga zoë' Dios Xuz.

¹³ Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz.

¹⁴ Bítí'tës bi inábali', en ugunli' dxin La' neda', neda' guna' le.

Jesús isöl-lë'ë Dios Bö' Lá'ayi, para idisóalenë' bönachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili',

¹⁶ atë' neda' gáta'yua' lahuë' Dios Xuz, atë' Lë' isöl-lë'ë queëli' Nu yúbölö Nu gácalen libí'ili', Nu utipa ládxi'li', en sóalenticá'sö libí'ili'. Nu ni naca Dios Bö' Lá'ayi, Nu ruí'i didza' idútë li.

¹⁷ Bítí' gaca ulu'zí' bönachi yödzölió ni xibë' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë' libí'ili', atë' soë' lu icja ládxi'do'oli'.

¹⁸ Bítí' ucá'ana' libí'ili' ca yugu' bi'i uzëbido'. Huöda' udusóalena' libí'ili'.

¹⁹ Ia'tú chí'ido'osö bítí'rö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'.

²⁰ Dza ní'irö cate' Dios Bö' Lá'ayi na' idisóalenë' libí'ili', inöz quézili' zóalen caza'-në' Xuza' Dios, atë' libí'ili' zóalenli' neda', atë' neda' ca' zóalen caza' libí'ili'.

²¹ Nu bönni' rizí' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', atë' neda' idxí'ida'-në' bönni' na', en ulu'í lahua' lahuë'.

²² Judas rë' lë', pero calëga Judas Iscariote, rnnë':

—Xan, çnacxi caz gaca ulu'í lo' lotu' netu', en bití' ulu'í lo' lógaca bönachi yödzölió?

²³ Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, atë' Xuza' Dios idxí'inë' bönni' na', atë' guídatu' idisóalentu'-në' bönni' na' lu icja ládxi'da'ahuë'.

²⁴ Bönni' na' bití' nadxí'inë' neda' bití' runë' ca rnna xtídza'a. Didza' na' biyónili' bë'a neda', calëgasö quia' na', pero naca queë' Dios Xuz nasöl-lë'ë neda'.

²⁵ Rë' caza' libí'ili' yugu' lë ni tsanni ni zóalena' libí'ili',

²⁶ pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë ládxi'li' ca naca yúgu'të didza' na' chigudxa' libí'ili'.

²⁷ 'Rucá'ana' queëli' le cuéqui dxi ládxi'li'. Runna' queëli' yöl-la' rö'ö dxi ládxi' quia'. Yöl-la' rö'ö dxi ládxi' na' runna' queëli' bití' naca ca le tunna queëli' bönachi yödzölió ni. Bítí' ichixi icja ládxi'do'oli', en bití' gadxi idzöbili'.

²⁸ Chibiyónili' ca na' chigudxa' libí'ili': Huöja', atë' huöda' udusóalena' libí'ili'. La' tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayëpisëtë'rë' Dios Xuz ca neda'.

²⁹ Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

³⁰⁻³¹ Bítí'rö güf'ilena' libí'ili' didza' zían, tu' za' tu' xihui', nu rinná be'e bönachi yödzölió ni. Sal-la' bití' bi dë lu në'e bi gun quia' neda', ral-la' gaca caní para ilëquibe'e bönachi yödzölió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chi'ë lubá na'.

² Ugüë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'.

³ Libí'ili' chinácali' dxi'a ni'a que didza' na' chibé'lana' libí'ili'.

⁴ Guli'dá'tica'sö neda', ca na' neda' dá'tica'sa' ca' libí'ili'. Ca naca que ni'a në'e lubá na', bití' gaca bi cuía rácasö que, channö cabí dá'tica'sö lubá na', lësca' caní naca queéli', bití' bi gaca gunli' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alenli' neda', bití' bi gaca gunli'.

⁶ Nu bönni' bití' dá'tica'së' neda', gaca queë' ca raca quégaca ni'a në'e lubá na' bití' nácacaca dxi'a, ta'rú'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí', ate' tséguigaca.

⁷ Channö tá'tica'sili' neda', en gunli' ca rnna xtídza'a, huáca inábali' bi guë'ënilí', ate' neda' guna' lë na' inábali'.

⁸ Gunli' bal Xuza' Dios cate' gunli' xichiné', ate' gácali' ca ni'a në'e lubá na' ta'bía, en caní gaca bë' nácali' idú bönni' ta'dë'ë neda'.

⁹ Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'.

¹⁰ Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza lãdxë'ë Lë', Bönni' na' nadxí'inë' neda'.

¹¹ 'Yugu' didza' ni rea' libí'ili' para udzëjaleni' tsözxön neda', en gaca idú ca na' udzëjali'.

¹² Lë ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'.

¹³ Bití' gaca idxí'irönë' nu bönni' luzë'ë ca nu bönni' udödë' yöl-la' na' bán queë', gátie' para gácalenë' yugu' böchi' luzë'ë tu' nadxí'inë' légaquië'.

¹⁴ Libí'ili' nácali' böchi' luzá'a channö gunli' ca na' chigudxa' libí'ili' gunli'.

¹⁵ Bítí'rö innía' queéli' nácali' huen dxin quia', tu' cabí nözinë' bönni' huen dxin naca gunë' xanë'. Neda' chigunnía' queéli' nácali' böchi' luzá'a, tu' chibena' ga nözili' yúgu'të le chigudxë' Xuza' neda' guna'.

¹⁶ Calëga libí'ili' guröli' neda', pero neda' gurö caza' libí'ili', en buzóa' libí'ili' para tsëajli' bi tsöjenli', ca na' tun ni'a në'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunnë' queéli' yúgu'të le inábali' Lë', en ugunli' dxin La' neda'.

¹⁷ Lë ni naca le rea' libí'ili' gunli': Guli'dxí'i luzá'ali' tuli' ia'tuli'.

Bönachi yödzüliö tu'zóa tsölá'alö Jesús, en nupa dá'gaca Lë'

¹⁸ Gunnë' ca' Jesús:

—Channö bönachi yödzüliö ni tu'zóa libí'ili' tsölá'alö, nözili' chibulu'zöë' neda' tsölá'alö zí'alö ca tu'zöë' libí'ili' tsölá'alö na'.

¹⁹ La'tu' nácali' tuz len bönachi yödzüliö ni, huala'dxí'i bönachi yödzüliö ni libí'ili' ca na' ta'dxí'i luzë'eguequi, pero tu'zóa bönachi yödzüliö ni libí'ili'

tsölá'aló tu' cabí nácali' tuz len léguequi, tu' guró caza' neda' libí'ili', en guléaja' libí'ili' ladaj bönachi yödžölió ni.

²⁰ Gulí'tsójné didza' na' chigudxa' libí'ili', gunnía': Biti' nayépisètèrè' nu bönni' huen dxin ca xané'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacua' nupa tun ca rnna xtídza'a, ilún ca' ca rnna xtídza'li' libí'ili'.

²¹ Yúgu'tè lè ni ilún bönachi queéli' tu' dá'ali' neda', tu' cabí núnbè'gaca Dios Xuz nasól-lè'è neda'.

²² 'La'tu' cabí bida', en la'tu' cabí bē'lēna' légaquiē' didza', biti' ila'báguē'è dul-la', pero na'a tu' bida' ni, biti' bi gaca ila'nnē' que dul-la' nabága'gaquiē' le ubéaj légaquiē' dxi'a.

²³ Nu bönni' ruzóē' neda' tsölá'aló, ruzóē' ca' Xuza' Dios tsölá'aló.

²⁴ La'tu' cabí bēna' yugu' yöl-la' huáca ga nacué', yugu' le cuntū nu ben ca gulaca, biti' ila'báguē'è dul-la'. Na'a, bila'lé'enē' yugu' lē na' bēna', ate' tu'zóē' neda' tsölá'aló, en tu'zóē' ca' Xuza' tsölá'aló.

²⁵ Caní raca, para gaca ca rnna xtídzē'è Dios, le nazí' lu ná'agaquiē', le rnna: Tu'zóē' neda' tsölá'aló, en biti' zoa bizx que.

²⁶ 'Cate' idxinē' Dios Bō' Lá'ayi, Bönni' ru'è didza' idútē li, en gácalenē' libí'ili', utipē' ládxi'li'. Isól-la'a Bönni' na' queéli' uláz queē' Dios Xuz, ate' gunē' ba nalí quia' neda'.

²⁷ Libí'ili' ca' gunli' ba nalí quia', tu' zóalen cázali' neda' tsözxón dza ni'te.

16

¹ Gunnē' ca' Jesús:

—Yugu' didza' ni chigudxa' libí'ili', para cabí gaca chopá ládxi'li'.

² Yugu' bönni' judío ulu'béajē' libí'ili' tsaz ga tu'dubē' tu'sédē' queē' Dios, ate' idxín dza cate' nu bönni' gútiē' libí'ili' guéquinē' dxin queē' Dios runē'.

³ Caní ilunē', tu' cabí núnbè'gaquiē' Dios Xuz, en cabí núnbè'gaquiē' neda'.

⁴ Rea' libí'ili' yugu' didza' ni, para cate' idxín dza na', tsójnéli' didza' ni chigudxi caza' libí'ili'.

Le gunē' Dios Bō' Lá'ayi

Gunnē' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'.

⁵ Na'a huója', tsójsóalēna'-nē' Dios Xuz, nasól-lē'è neda'. Biti' inábili' neda' nituli' libí'ili', biti' innali': ¿Gazxi tseju'?

⁶ Na'a, tu' rea' libí'ili' yugu' didza' ni, risēbi ládxi'li'.

⁷ Neda' rea' libí'ili' le naca idútē li. Gácarō dxi'a queéli' huója', tu' channö cabí huója', biti' idisóalēnē' Dios Bō' Lá'ayi libí'ili', Bönni' na' gácalenē' libí'ili', en utipē' ládxi'li', pero channö huója', isól-la'a-nē', na' idisóalēnē' libí'ili'.

⁸ Cate' guidē' Lē', gunē' ga iléquibe'e bönachi yödžölió ni nabága'gaca dul-la', en biti' núnbè'gaca le naca tsahui', ate' ichúguiē' Dios quéguequi ilátigaca.

⁹ Nabága'gaquiē' dul-la' tu' cabí ta'yéajlē'è neda'.

¹⁰ Biti' núnbè'gaquiē' le naca tsahui' tu' ilútiē' neda', ate' huója' ga zoē' Dios Xuz, Bönni' na' náquiē' tsahui', ate' bítirō ila'lé'enē' neda'.

¹¹ Ichúguiē' Dios quégaquiē' ilátiē' tu' chiguchúguiē' que tu' xihui' nu rinná be'e bönachi yödžölió ni.

¹² 'Ia'zica' zían didza' rē'ēnda' gú'ílēna' libí'ili', pero biti' gaca tséajni'ili' na'a.

¹³ Cate' guidë' Dios Bö' Lá'ayi, Bönni' na' ru'ë didza' idütë li, Lë' usedinë' libí'ili' yúgu'të le naca idütë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ralla' gaca.

¹⁴ Lë' gunë' neda' bal, tu' si'ë le nequi quia', en gunë' ga inözili' le.

¹⁵ Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

Yöl-la' risëbi ladxí' queëli' huóaca yöl-la' rudzeja

¹⁶ Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huója' ga zoë' Dios Xuz.

¹⁷ Ní'irö bönni' usëda queë' gulë' luzá'agaquië' tuë' ia'túë', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huója' ga zoë' Dios Xuz."

¹⁸ Ní'irö gula'nnë':

—¿Bizxi caz rë'ëni inná didza' ni, gunné': "Ia'tú chí'ido'osö"? Biti' réajni'itu' didza' ni ru'ë.

¹⁹ Réquibe'enë' Jesús të'ënnë' ila'nábinë' Lë', ate' rë' légaquië':

—¿Naru' rinábítsö luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'?

²⁰ Le nácatë rea' libí'ili': Códxili', en isëbi ladxí'li', pero bönachi yödzölió ni ulu'dzeja cate' iluti neda'. Ní'irö sal-la' isëbi ladxí'li', yöl-la' risëbi ladxí' queëli' huóaca yöl-la' rudzeja cate' ulé'eli' neda'.

²¹ Tu nigula cate' chizóa gáljabi' bí'ido' queënu, riguí' rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bíti'rö röjnenu lë na' butságanu, tu' rudzéjanu tu' chigúlajbi' tubi' bi'i bönni'do' yödzölió ni.

²² Lësca' caní raca queëli', risëbi ladxí'li' na'a, pero huóda' uduyúa' libí'ili', ate' ní'irö udzeja ladxí'li', ate' bití' séqui'në' nu bönni' ugüë' yöl-la' rudzeja queëli' na'.

²³ 'Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunné' queëli'.

²⁴ Ga ridxintë na'a dza bití' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queëli'.

Ridéli'në' Jesucristo lu le raca yödzölió ni

²⁵ Gunnë' ca' Jesús:

—Yugu' lë na' chibë'lëna' libí'ili' didza' bucúdzua' didza'. Huadxín dza cate' bíti'rö gü'ílena' libí'ili' didza' le rucúdzua' didza', pero yálajdo' gü'ílena' libí'ili' didza' ca naca queë' Dios Xuz.

²⁶⁻²⁷ Dza na' inábili'-në' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queëli', tu' nadxí'inë' Lë cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios.

²⁸ Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huója' ga zoë' Dios Xuz.

²⁹ Ní'irö yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bíti'rö rucúdzua' didza'.

³⁰ Na'a réquibe'etu' nöz quézínu' Li' yúgu'tè, en bití' run bayudxi nu bi inabi yudxi Li', tu' riguíxjoi'ínu' netu' le si' inábatu'. Que lè ni na' réajlè'ètu' birúaju' ga zoè' Dios.

³¹ Bubi'è didza' Jesús, rë' légaquiè':

—¿Naru' réajlè'tsali' neda' na'a?

³² Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero bití' soa' tuza', tu' zóalen cazè' Dios Xuz neda'.

³³ Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queéli' le usaca' zi' libí'ili', pero buli'tipa ládxi'li'. Neda' chibidéli'da' lu le raca yödzölió ni.

17

Jesús rinábinè' Dios gácalenè' nupa dá'gaca Lè'

¹ Cate' budxi bè'è Jesús yugu' didza' ni, guchisa lahuè', ruyúé' yehua' yubaló, ate' rnnè':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'.

² Ben caní tu' chinudödu' lu na'a yöl-la' unná bè' para inná bé'eda' yúgu'tè bönachi, en gu'a yöl-la' na'bán idú quégaca yúgu'tè nupa na' chibennu' quia'.

³ Lè ni naca yöl-la' na'bán idú na', tu' núnbè'gaquiè' Li', nacu' la's dui Dios idú, en tu' núnbè'gaquiè' ca' neda', Jesucristo, ate' Li' nasöl-lu'u neda'.

⁴ 'Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a.

⁵ Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

⁶ 'Chibulu'a lahui le nacu' Li' lógaquiè' bönmi' ni bennu' quia', nupa na' guró casu' Li' ladaj bönachi yödzölió. Guléquinè' bönmi' ni quiu', ate' bénnagacu'-nè' quia', ate' tunè' ca rnna xtídz'u.

⁷ Na'a nözguequinè' yúgu'tè lè na' bennu' quia' zá'gaca lu no'o Li',

⁸ tu' chibudöda' lu ná'agaquiè' didza' na' budödu' Li' lu na'a neda', ate' légaquiè' nazi' lu ná'agaquiè' le, en téquibe'enè' birúaja' ga zu' Li', ate' ta'yéajlè'è Li' nasöl-lu'u neda'.

⁹ 'Neda' ráta'yua' Lo' gácalenu' légaquiè'. Ráta'yua' Lo', calèga gácalenu' yúgu'tè bönachi yödzölió, pero gácalengacu'-nè' bönmi' ni chibénnagacu'-nè' quia', tu' néquiguequinè' quiu'.

¹⁰ Yúgu'tè nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'í lahui yöl-la' zxön quia'.

¹¹ 'Na'a, bití'rö ugá'ana' yödzölió ni, pero yugu' bönmi' ni ulu'gá'anè' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz.

¹² Cate' ni' guzóalena' légaquiè' yödzölió ni, ben chí'igaca'-nè', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-nè', ate' nitué' bití' bunitia'-nè', pero tuzè' bönmi' na' náquiè' ca zxfí'ini tu' xihui', en narugu queè' gátiè' tsaz. Caní raca ca nazúaj lu guichi lá'ayi.

13 'Na'a udusóalena' Li', ate' tsanni ni zoa' yödzülió ni, ruá'a yugu' didza' ni para gaca idú yöl-la' rudzeja quégaquié' ca na' raca quia' neda' yöl-la' rudzeja.

14 Neda' chibudöda' lu ná'agaquié' xtídz'u, ate' bönachi yödzülió ni tu'zóa légaquié' tsólá'aló tu' cabí nácagaquié' tuz len léguequi, ca na' naca quia' neda', bití' naca' tuz len bönachi yödzülió ni.

15 Ráta'yua' Lo', caléga cúagacu'-nē' yödzülió ni, pero gun chí'igacu'-nē', para cabí ila'dzunē' lu na' tu' xihui'.

16 Bití' nácagaquié' tuz len bönachi yödzülió ni ca na' naca quia' neda', bití' naca' tuz len bönachi yödzülió.

17 Guléaj quez quiu' légaquié', ugunu' dxin le naca idútē li. Le naca idútē li na' naca xtídz'u.

18 Ca na' benú' Li', gusól-lu'u neda' ladaj bönachi yödzülió ni, lēasca' caní runa' neda', risól-la'gaca'-nē' ladaj bönachi yödzülió.

19 Tu' nadxí'igacada'-nē' rudödi cuina' quiu', para ulu'rúajē' ca' légaquié' quez quiu' tu' nazí' lu ná'agaquié' le naca idútē li.

20 'Ráta'yua' Lo', caléga quégacasē' bönni' ni, pero lēasca' quégaquié' bönni' ní' ila'yéajlē'ē neda' ní'a que didza' ilu'ē bönni' ni.

21 Ráta'yua' Lo' gunu' ga ilácagaquié' tuz yúgu'tē', en ilácagaquié' ca' tuz len rē'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquié' para ila'yéajlē' ia'zíca'rö bönachi yödzülió ni, Li' caz gusól-lu'u neda'.

22 Yöl-la' zxön na' bennu' quia', neda' bē'a ca' quégaquié', para ilácagaquié' tuz, ca na' nácaru' tuz rē'u.

23 Li' nacu' tuz len neda', ate' neda' naca' tuz len légaquié', para gaca idú ca nácagaquié' tuz, en caní iléquibe'e ia'zíca'rö bönachi yödzülió ni, Li' caz gusól-lu'u neda', ate' nadxí'igacanu'-nē' ca na' nadxí'ínu' neda'.

24 'Xúza'do', rē'ēnda' ila'cuá'lenē' neda' bönni' ni bēnnagacu'-nē' quia' ga na' tsöjsóa', para ila'lé'enē' yöl-la' zxön na' bennu' quia' dza ni'te cate' sí' gunu' yödzülió tu' nadxí'ínu' neda'.

25 Xuza' tsahui', bönachi yödzülió ni bití' núnbē'gaca Li', pero neda' nunbē' caza' Li', ate' yugu' bönni' ni chinöziguequinē' Li' caz gusól-lu'u neda'.

26 Bena' ga nöziguequinē' le nacu' Li', en gunra' ca' ga ila'nözinē' lē ni para ca na' nadxí'ínu' Li' neda', lēasca' caní ila'dxí'i luzá'agaquié', ate' gaca caza' tuz len légaquié'.

18

Ta'zönē' Jesús

(Mt. 26:47-56; Mr. 14:43-50; Lc. 22:47-53)

1 Cate' budxi bē'ē Jesús yugu' didza' ni, birúajē' ní', ate' sa'yéajlenē' yugu' bönni' usēda queē'. Gudödē' ia'tsólá'a yegu Cedrón, en bidxinē' ga ní' nacuá' yaga olivo ca', ate' lataj ni guyázalenē' yugu' bönni' usēda queē'.

2 Lēasca' Judas, bönni' na' udödē' Jesús, núnbē'ē la' yēla na', tu' butubē' Jesús yugu' bönni' usēda queē' ní' zían luzuí.

3 Ní'irö guchē'ē Judas tu cō' bönni' röjáquié' gudil-la, en yugu' bönni' ní'a ná'agaquié' bixúz unná bē', en ní'a ná'agaquié' yugu' bönni' yudo' fariseo, ate' yöjáquié' ga ní' zoē' Jesús, nuá'agaquié' yugu' guí' yöri, en yugu' le tu'dí'inē'.

⁴ Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguúljalí'?

⁵ Bulu'bi'ë didza', të' Lë':

—Jesús, bönni' Nazaret, riguúljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'.

⁶ Cate' Jesús gudxë' légaquië': “Neda' caz”, ní'irö bulu'bíguë'ë cusi zxanlö, en gula'dzö'ë lu yu.

⁷ Jesús gunábinë' légaquië' leyúbölö, rnnë':

—¿Nuzxi riguúljalí'?

Të' Lë':

—Jesús, bönni' Nazaret, riguúljatu'-në'.

⁸ Ní'irö bubí'ë didza' Jesús, rnnë':

—Chigúdxá' libí'ili': Neda' caz. Channö riguúljalí' neda', guli'gúí'-gáquië' lataj tsöjhuöjgaquië' bönni' ni.

⁹ Caní gunné' Jesús para idxín didza' na' bë'ë, gunné': “Nupa ni bennu' quia', nitüë' bití' bunítia'-në'.”

¹⁰ Ní'irö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'.

¹¹ Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rójáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'ë Lë'.

¹³ Ní'irö gula'chë'ë Lë' zí'alö lahuë' Anás, tu' náquië' xto' zxi'inë' Caifás, bönni' náquië' bixúz lo iz na'.

¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátië' tuzë' bönni', en calëga iníti idütë yödzo quégaquië'.

Rnnë' Pedro: “Bití' núnbë'a-në' Jesús”

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'tüë' bönni' usëda queë' Jesús yójáquië' cúdzu'lë' Lë', söjnógaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'.

¹⁶ Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bë'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a.

¹⁷ Ní'irö nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' lí' bönni' ni'?

Bubí'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquiagaquië' guí', ate' zuíguequinë' ra' guí' na', en tu'tsë'e cuíngaqüë'. Lësa' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irö gunabi yúdxinë' bixúz lo Jesús para inözinë' nupxi dá'gaca Lë', en naxi naca le rusedinë' Jesús bönachi.

²⁰ Bubi'ë didza' Jesús, rë' lë':

—Lahui' lo bé'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sedë' queë' Dios, enca' chila yudo', ga ni' tu'dubë' yúgu'të bönni' judío, en bití' bí'didza' bé'a bagáchi'sö.

²¹ ¿Bizx que rinabi yúdxinu' neda'? Gunabi yudxi nupa ni' bila'yöni didza' bé'lëna' léguequi. Nözguequi quézinë' bönni' na' didza' na' bé'lëna' légaquië'.

²² Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

²³ Bubi'ë didza' Jesús, rë' lë':

—Channö bití' gunniá' dxi'a, gudixjö' bízxilö didza' bë'a bití' naca dxi'a, en channö guca dxi'a didza' bë'a, ¿bizx que na' gudápu'u neda'?

²⁴ Ní'irö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Bití' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuinë' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

²⁷ Leyúbölö gudá'baguië' Pedro, ate' la' gurödxitëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ní'irö gula'ché'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' bití' gula'yázië' yugu' bönni' judío yúlahui' na', tu' téquinë' ila'báguë'ë xigua' channö ila'yázië' ni', le gun ga bití' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto.

²⁹ Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

³⁰ Bulu'bi'ë didza', të' lë':

—La'tu' cabí nu'ë bönni' ni dö', bití' udöditu'-në' lo'.

³¹ Ní'irö Pilato rë' légaquië', rnnë':

—Libí'i cázali' guli'ché'ë, en buli'chi'a buli'sörö Lë' ca rinná bë' xibá queë'li'.

Yugu' bönni' judío të' lë', ta'nnë':

—Bití' dé lu na'tu' nu gútitu'.

³² Caní guca para idxín xtídzë'ë Jesús, le bë'ë naca ral-la' gátie'.

33 Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

34 Bubi'ë didza' Jesús, rë' lë':

—¿Naru' rácasö quiu' rno' caní, o gulé bönachi li' caní ca naca quia'?

35 Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

36 Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

37 Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zë náagaca didza' ruá'a.

38 Pilato rë' Lë':

—¿Bizxi na' le naca idútë li?

Ta'chúquië' queë' Jesús gátië'

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzöliida' nu'ë bönni' ni.

39 Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënili' usana'-në' queëli' Bönni' Rinná Bé'enë' Bönachi Judío?

40 Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

1 Ní'irö Pilato guchë' Jesús, en benë' ga gula'guinë' yugu' bönni' röjáquië' gudil-la Lë'.

2 Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gacüë' Lë' tu lari' tunna xiná chul-la ca naca le tácuë' bönni' ta'nná bë'ë.

3 Ní'irö gula'bíguë'ë lahuë' Jesús, en të' Lë':

—¿Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

4 Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' biti' bi rudzöliida' le naca dö' nu'ë bönni' ni.

5 Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

6 Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¿Budë'ë lë'e yaga cruz! ¿Budë'ë lë'e yaga cruz!

Pilato rë' légaquië':

—Libí'i cázali' guli'chě'ě, en guli'tsöjdě'ě lě'e yaga cruz. Neda' biti' bi dö' budzölıda' nu'ě bönni' ni.

⁷ Ní'irö bönni' judío na' tē' lē':

—Dē queētu' tu xibá, ate' rinná bē' xibá queētu' na' ral-la' gátie' bönni' ni tu' gunnē' náquiē' Zxí'inē' Dios.

⁸ Cate' biyönnē' Pilato didza' ni, gúdxirönē'.

⁹ Leyúbölö buáziē' yúlahui' na', en rē' Jesús:

—¿Gázxité bönni' Li'?

Biti' bi didza' bubí'ě Jesús.

¹⁰ Ní'irö Pilato rē' Lē':

—¿Naru' cabí ubí'tso' didza', quíxjöi'inu' neda'? ¿Naru' cabí nözinu' dē lu na'a udá'a Li' lē'e yaga cruz, en dē lu na'a usana' Li'?

¹¹ Bubi'ě didza' Jesús, rē' lē':

—Biti' bi dē lu no'o gunu' quia' la'tu' cabí nudödē' Dios yöl-la' unná bē' na' lu no'o. Que lē' ni na', bönni' na' budödē' neda' lu no'o nabága'rē' xíguia' ca li'.

¹² La' ní'isö rizóa ribö'ě Pilato usanē' Jesús, pero gulu'ě zidzaj didza' bönni' judío unná bē', ta'nnē':

—Channö usanu'-nē' bönni' ni, biti' ridzagu'-nē' dxi'a César, bönni' rinná bé'enē' idútē yödzölıó. Nu bönni' run cuinē' bönni' rinná bē'ě, ridá'báguē'ě César na'.

¹³ Cate' biyönnē' Pilato didza' ni, gunná bé'enē' nupa diguá'gaca Jesús, ate' gurö'ě xilatjē' ga ruchi'a rusöröē', lataj na' nazí'i le Lō'a Ga Zxóagaca Guió'jta'a, en ca naca didza' hebreo nazí'i le Gabata.

¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxē' yugu' bönni' judío unná bē' na', rnnē':

—Ni zoē' bönni' rinná bé'enē' libí'ili'.

¹⁵ Gulu'ě zidzaj didza', ta'nnē':

—¡Bétiē'! ¡Bétiē'! ¡Budē'ě lē'e yaga cruz!

Pilato rē' légaquiē':

—¿Rinábitseli' neda' udá'a-nē' lē'e yaga cruz bönni' rinná bé'enē' libí'ili'?

Bulu'bi'ě didza' bixúz unná bē', ta'nnē':

—Cúnturö nu zoa rinná be'e netu'. Tuzē' César rinná bé'enē' netu'.

¹⁶ Que lē' ni na' Pilato budödē' Jesús lu ná'agaquiē', para tsöjdá'agaquiē' Lē' lē'e yaga cruz. Ní'irö gula'guélē'ě Jesús, en gula'chě'ě Lē' ní'ilö.

Tu' dē'ě Jesús lē'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajē' Jesús ni', nu'ě yaga cruz queē', sa'yéajē' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota.

¹⁸ Bulu'dē'ě Jesús lē'e yaga cruz ni', ate' bulu'dá'lenē' Lē' tsözxön lē'egaca yaga cruz ia'chopē' bönni'. Tsölá'a huéaj ta'dē'ě, ate' Jesús dē'ě gatsaj láhui'lö chopē' bönni' na'.

¹⁹ Gusól-lē'ě Pilato tu bönni' nu'ě le buzúajē' lu guichi le buzóē' lē'e yaga cruz icjlē' Jesús, le rna caní: "Jesús, Bönni' Nazaret, Bönni' Rinná Bé'enē' Bönni' Judío."

²⁰ Bulu'labē' zían bönni' judío didza' ni, tu' zoa ga na' bulu'dē'ě Jesús lē'e yaga cruz gála'sö ra' yödzö, ate' didza' na' nuzúajē' len didza' hebreo, en len didza' griego, en len didza' latín.

²¹ Yugu' bixúz unná bē' quégaquiē' bönni' judío tē' Pilato, ta'nnē':

—Biti' uzúaju', "Bönni' Rinná Bé'enē' Bönni' Judío." Buzúaj caní: "Bönni' ni gunnē': Inná bé'eda' bönni' judío."

22 Bubi'ë didza' Pilato, rë légaquië':

—Le chinuzúaja', tsaz chinuzúaja'.

23 Cate' yugu' bönni' na' rōjáquië' gudil-la budxi bulu'dë'ë Jesús lë'e yaga cruz, gula'guélë'ë lari' gúcuë'. Gula'béajë' tápalö, tu cō' huéaj guta' que queégaquië'. Gula'guélë'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba.

24 Ní'irö yugu' bönni' na' rōjáquië' gudil-la gulë luzá'agaquië' tuë' ia'túë', ta'nnë':

—Biti' ichúguru' le, pero dxí'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísië' que queégaquië' lari' nacuá', en que lari' quia' bulu'yüë' le naca bë'.

Caní gulunë' bönni' na' rōjáquië' gudil-la.

25 Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz.

26 Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxí'ínu'.

27 Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

28 Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

29 Dë' ni' tu zxiga' yudzu nupi zi. Ní'irö yugu' bönni' na' rōjáquië' gudil-la bulu'guijë' nupi zi na' tu le bululu rizxupi nisa, ate' bulu'zóë' le tu lahui gui, en bulu'dë'ë le ru'ë Jesús para xupë'.

30 Budxi gu'ë Jesús nupi zi na', gunné':

—Chinácatë.

Ní'irö buzötaj icjë'. Burúajtë bö' naca cazë', gútië'.

Tu bönni' reajë' gudil-la runë'ë yaga tuchi' cuita lë'ë Jesús

31 Ní'irö, tu' naca dza si' idxín Laní Pascua na', en tu' cabí rala' ulu'gá'ana nupa nátigaca lë'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë' ni na' yugu' bönni' judío gulá'tayüë' lahuë' Pilato guíë' bönni' rōjáquië' gudil-la tsöjtítsjagaquië' xiguíchjagaquië' bönni' dá'gaquië' lë'egaca yaga cruz, en ulu'zötjë' légaquië' lë'egaca yaga cruz na'.

32 Que lë' ni na' gula'biguë'ë bönni' rōjáquië' gudil-la, ate' gula'guítsjë' xiguíchjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz.

33 Cate' bila'dxinë' ga na' dë'ë Jesús, en bila'lë'enë' chinátië', biti' gula'guítsjë' xiguíchjë'.

34 Ní'irö tuë' bönni' na' reajë' gudil-la bunë'ë yaga tuchi' cuita lë'ë Jesús, ate' la' birúajtë rön, en nisa.

35 Neda', Juan, bilé'edá' lë' ni, en runa' ba nalí que, ate' le runa' ba nalí naca iduté' li. Nöz quezida' ruá'a didza' iduté' li, para tséajlë'ëli' ca' libí'ili' ca naca queë' Jesús.

³⁶ Gulaca yugu' lë ni para budxín le nazúaj lu guichi lá'ayi, le rnna: "Biti' gatsaj nitú dxita yu'è."

³⁷ Ia'tú le nazúaj ca' lu guichi rnna caní: "Ulu'yúé' bönni' na' bulu'né'è lë' yaga tuchi'."

Tu'cáché'è Jesús

(Mt. 27:57-61; Mr. 15:42-47; Lc. 23:50-56)

³⁸ Gudödi guca yúgu'të lë ni, guyijë' José, bönni' yödzö Arimatea, bönni' dë'è Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'è lë' lataj u'è Jesús. Pilato bë'è lë' lataj. Ní'irö bidxinë' José ga na' dë'è Jesús lë'e yaga cruz, ate' bu'è Lë'.

³⁹ Lësca' bidxinë' Nicodemo ni', bönni' na' guyijë' zí'alö yöjyúé' Jesús chi'i dzö'ölö, nu'è tu le nutsí'i nöri silá' que mirra, en tu le rilá' zxixi, le naca ca tu gayuá' guíë.

⁴⁰ Ní'irö José, en Nicodemo na' gula'guélë'è Jesús, en bulu'chölinë' Lë' yugu' lári'do', ate' gula'gu'è láhuilö lë na' nutsí'i nöri silá' que mirra, en le rilá' zxixi. Gulunë' ca nalëbiguequinë' tunë' bönni' judío cate' tu'cáché'è tu bönni' nati.

⁴¹ Gala' ga na' bulu'dë'è Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guió, yeru ba na' cuntu nu ta'gü'inë'.

⁴² Lu yeru ba na' gula'gu'è Jesús tu' dë gála'sö yeru ba na', en tu' naca dza tu'p'é'è bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiójta' a na' busayaj ga nu riyaza yeru ba na'.

² Ní'irö böajnu carelö ga zoë' Simón Pedro, dzáguíë' lë' ia'túé' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'è Lë'.

³ Ní'irö bila'rúajë' Pedro, en ia'túé' bönni' usëda na', söjáquië' ra' yeru ba na'.

⁴ Tsözxön ta'xíti'ë iropë', pero ia'túé' bönni' usëda na' guxíti'rë' carelö ca Pedro, ate' zí'alö lë' bidxinë' ra' yeru ba na'.

⁵ Biyéchuë', en buyúé' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'.

⁶ Ní'irö bidxinë' Simón Pedro cúdzu'lë' ia'túé' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'.

⁷ Lësca' bilé'enë' lári'do' na' gula'xóë' icjë' Jesús, biti' dëlen ia'zícá'rö lári'do' na', pero tsölá'alö nudubi quez.

⁸ Ní'irö guyázië' ca' ia'túé' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë'è didza' bë'è Jesús.

⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti.

¹⁰ Ní'irö iropë' bönni' usëda na' yöjhuójgaquië' lidxigaquië'.

Rulu'i lahuë' Jesús lonu María Magdalena

(Mr. 16:9-11)

11 Bugá'ananu María ní'ilo ra' yeru ba na', ribödxinu. Tsanni ní' ribödxinu, biyéchunu, buyunu lu yeru ba na'.

12 Bilé'enu chopë' gubáz lá'ayi queë' Dios ní', nácugaquië' lari' chiguichi. Rõ'õgaquië' ní', tuë' ícjalö ba na', en ia'tuë' xiní'alö ba na' ga ní' gula'gu'ë Jesús.

13 Yugu' gubáz lá'ayi na' tē' lēnu, ta'nnē':

—Nigúlado', ¿bizx que ribödxu'?

Rēnu légaquië':

—Tu' bulu'ú'ë Xana', en bití' nõzda' gazxi gula'gu'ë Lē'.

14 Cate' budxi gunnánu caní, buécjanu, en bilé'enu-nē' Jesús, zoë' ní', pero bití' réquibe'enu Jesús na'.

15 Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lē' bönni' rapa chi'ë latja na', rēnu Lē':

—Bönni', channö li' bu'u-nē', gudíxjöi'i neda' gazxi gulú'u-nē', ate' neda' u'a-nē'.

16 Ní'irö Jesús gudxë'-nu:

—María.

Ní'irö buécjanu, en lu didza' hebreo rēnu Lē':

—Raboni.

Didza' ni rnna: Bönni' Usedi quia'.

17 Jesús rē'ë-nu:

—Bití' canu' neda', tu' cabí ruhuëpinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnē' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

18 Ní'irö guyéajnu María Magdalena na', yöjtíxjöi'ínu yugu' bönni' usëda queë' Jesús chibilé'enu-nē' Xanru', en ca naca didza' na' gudxë'-nu.

Rulu'i lahuë' Jesús lógaquië' bönni' usëda queë'

(Mt. 28:16-20; Mr. 16:14-18; Lc. 24:36-49)

19 Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxiné' bönni' judío unná bē'. Ní'irö buluí'i lahuë' Jesús gatsaj láhui'lö ga na' nacu'ë, en rē' légaquië':

—Gulí'zóa dxi ládxi'li'.

20 Cate' budxi gudxë' légaquië' didza' ni, buluí'inē' légaquië' nē'ë, en cuita lē'ë. Ní'irö tu'dzéjanē' yugu' bönni' usëda na' tu' tu'lé'enē' Xanru'.

21 Ní'irö Jesús rē' légaquië' leyúbölö, rnnē':

—Gulí'zóa dxi ládxi'li'. Ca benē' Xuza', gusól-lē'ë neda', lē'sca' caní risöl-la'a libí'ili' tsöjenli' xichina'.

22 Cate' budxi gunné' caní, bulubē' lógaquië', en rē' légaquië':

—Gulí'sí Dios Bó' Lá'ayi.

23 Núti'tēs nu uniti loli', nu na' ben dul-la', chiyú'u yöl-la' runiti lo que, ate' núti'tēs nu bití' uniti loli' le, ugá'ana dul-la' que nu na' nun dul-la'.

Biti' réajlë'ë Tomás

24 Tomás bití' zóalenē' légaquië' cate' Jesús buduyüë' légaquië'. Náquië' Tomás tuë' bönni' chínnuë' ní', en tu'ë ca' lē' Bönni' Bilidi'.

25 Gudödi ní' ia'zíca'rē' bönni' usëda na' gulē' Tomás, ta'nnē':

—Chibilé'etu'-nē' Xanru'.

Tomás rē' légaquië':

—Channö cabí ilé'eda' në'ë ga gunné' bididaj, en unë'a xibón na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', bití' ca' tséajlë'a.

²⁶ Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacué, buluf'i lahuë' Jesús gatsaj láhuilö ga na' nacué, en rë' légaquië':

—Gulí'zóa dxi ládxi'li'.

²⁷ Ní'irö Jesús rë' Tomás na':

—Bunë' xibón no'o ni, en buyú na'a ni. Bunë' no'o cuita lë'a ni, en bítí'rö gaca chopá ládxi'u, pero guyéajlë' neda'.

²⁸ Ní'irö bubí'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' bití' ila'lé'eni neda'.

Le rë'ëni gun didza' nazúaj lu guichi ni

³⁰ Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni.

³¹ Yugu' lë' ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

21

Rulu'í lahuë' Jesús lógaquië' gadxë' bönni' usëda queë'

¹ Gudödi guca lë' ni, leyúbölö buluf'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluf'i lahuë' lógaquië'.

² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzo Caná que luyú Galilea, en chopë' bönni' zxi'inë' Zebedeo, en ia' chopë' ca' bönni' usëda queë' Jesús.

³ Simón Pedro rë' légaquië':

—Tseaja' tsöjxóna'-ba' böla.

Të' lë' ia'zíca'rë', ta'nnë':

—Guntu' li' tsözzön.

Ní'irö yójáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'.

⁴ Cate' chizá' rení', yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'.

⁵ Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

⁶ Ní'irö Jesús rë' légaquië':

—Gulí'chíaj yöxaj böla queëli' tsólá'a ibëla barco, ate' söngacali'-ba'.

Ní'irö gula'chiljë' le, ate' bítí'rö guca ulu'béajë' le, tu' naguíraba' böla lë'e yöxaj böla na'.

⁷ Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagüë' le zí'alö, ate' guyázië' lu nisa.

⁸ Bila'dxinë' ia'zica'rë' bönni' usëda na', tu'së'ë barco na', suná'ayöjgaquië' yöxaj ga na' dzó'öba' böla, tu' cabi naca zi'tu' ga dë luyú bidxi. Nácatë ca tu gayuá' löga' ní'aru'.

⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'.

¹⁰ Jesús rë' légaquië':

—Guli'diguá'a-ba' ni böla na' si' guzxöngacali'-ba'.

¹¹ Gurenë' Pedro lë'e barco na', ate' gú'uyöjë' yöxaj na' zaca' luyú bidxi, nalíró-ba' böla zxön, idú tu gayuá' yu' chí'inu-unba'. Sal-la' nácagacaba' böla zián, biti' biröza' yöxaj na'.

¹² Ní'irö Jesús rë' légaquië':

—Guli'dá gáguli'.

Biti' burúguinë' nitüë' bönni' usëda queë' na' inábinë' Lë', innë': “¿Nuzxi Li?” Nözguequi quézinë' náquië' Xanru'.

¹³ Ní'irö gubígui'ë Jesús, en gudélé'ë yöta na', enca' böla na', ate' bë'ë quégaquië'.

¹⁴ Lë ni naca le bunny luzuí buluf'i lahuë' Jesús lögaquië' bönni' usëda queë' gudödi bubanë' lu yöl-la' guti.

Jesús ru'ilenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, xzí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

¹⁶ Jesús rë' lë' le buropi luzuí, rnnë':

—Simón, xzí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

¹⁷ Jesús rë' lë' le bunny luzuí:

—Simón, xzí'inë' Jonás, ¿raza ládxa'u neda'?

Buí'innë' Pedro tu' le chibunny luzuí rinabi yúdxinë' lë', gunné': “¿Raza ládxa'u neda'?” Bubi'ë didza' Pedro, rë' Lë':

—Xan, yúgu'të nöz quézinu' Li'. Nözínu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

¹⁸ Le nácate' rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'ö, ate' nu yúbölö ugacu li' lari', en iché' li' ga ni' biti' guë'ënnu' tseaju'.

¹⁹ Yugu' didza' ni bë'ë Jesús naca bë' naca gátië' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

Ru'ë didza' Jesús ca gaca queë' bönni' usëda na' nadxí'inë'

²⁰ Buécjë' Pedro, en bilé'enë' söjnhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: “Xan, ¿nuzxi na' udödi Li'?”

21 Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

22 Jesús rë' lë':

—Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

23 Guzé didza' ni ga nacu'ë böchi'ru' ta'yéajlë'ë Cristo. Téquinë' biti' gátië' bönni' usëda na'. Jesús biti' gudxë' lë' biti' gátië', pero caní gunnë': "Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga."

24 Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nözili' naca idútë li le runa' ba nalí.

25 Zíánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxí lu nĕ'ĕ Dios, isöl-lĕ'ĕ Dios Bö' Lá'ayi

¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ'

² ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguie' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' guró cazĕ'.

³ Gudödi gudí'i guxzáquĕ'ĕ Jesús, gútiĕ'. Ní'irö bubanĕ', en buluí'i lahuĕ' lógaquie' gubáz queĕ' na'. Buluí'inĕ' légaquie' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluí'i lahuĕ' lógaquie' idú ca choá' dza, en bĕ'lenĕ' légaquie' didza' ca rinná bĕ'ĕ Dios.

⁴ Cate' ni' nacu'ĕ tsözxön, gunná bé'enĕ' légaquie' cabí ulu'zĕ'ĕ Jerusalén. Jesús gudxĕ' légaquie', rnnĕ':

—Guli'cöz ni' le guzxí lu nĕ'ĕ Xuza' isöl-lĕ'ĕ queĕ'li' ca na' chibusiyön quezida' libí'ili'.

⁵ Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕ'li' le rulu'i yöl-la' ridila nisa ni, idisóalenĕ' Dios Bö' Lá'ayi libí'ili'.

Ruhuĕpĕ' Jesús yehua' yubá

⁶ Ní'irö yugu' bönni' ta'yéajlĕ'ĕ Jesús, nudúbigaquie' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölö dza ni zóaru' na'a?

⁷ Jesús gudxĕ' légaquie':

—Bití' nequi queĕ'li' inözili' bizxi dza o bizxi dzö' gunĕ' Dios Xuz le nuzöĕ' lu na' cazĕ'.

⁸ Sí'ili' yöl-la' huáca cate' guídĕ' Dios Bö' Lá'ayi idisóalenĕ' libí'ili'. Ní'irö gunli' ba nalí quia' neda' lu yödzö Jerusalén, en idú luyú Judea, en luyú Samaria, en ga idxintĕli' idútĕ yödzölió.

⁹ Cate' budxi bĕ'lenĕ' légaquie' didza' ni, tsanni ni' tu'yusĕ' ca' Lĕ', la' buĕpitĕ' xitsá' ga rö'ö tu böaj le bucache' Lĕ', ate' bití'rö bila'lé'enĕ' Lĕ'.

¹⁰ Tsanni ni' tu'yúĕ' lúzxibalö cate' ni' buĕpĕ' Jesús, bulu'luí'i lógaquie' chopĕ' gubáz lá'ayi ga na' nacu'ĕ, nácuagaquie' lari' chiguíchido'os.

¹¹ Chopĕ' ni' gulĕ' légaquie', ta'nnĕ':

—Bönni' Galilea, ¿bizx que ruyuli' lúzxibalö? Lĕ' cazĕ' Jesús ni si' guzĕ'ĕ ga zóali', buĕpĕ' yehua' yubá, lĕ'sca' caní huödĕ' leyúbölö ca na' chibilé'eli-nĕ' söhuöjĕ' yehua' yubá.

Ta'böĕ' Matías para tsáziĕ' xilatjĕ' Judas

¹² Ní'irö gula'zĕ'ĕ ga na' rö'ö guí'ado' na' nazí'i le Guí'a Yaga Olivo, ate' yöjhuöjgaquie' Jerusalén. Guí'ado' ni' dĕ' gála'sö ga dĕ' Jerusalén, tsca nazí'gaquie' lataj ta'zĕ'ĕ dza lá'ayi quégaquie'.

¹³ Cate' bulu'dxinĕ' yödzö ni', gula'benĕ' ga naca buropi cuía lu yu'u, ga ni' ta'cu'ĕ Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxf'inĕ' Alfeo, en Simón, bönni' na' ruí'i ládxĕ'ĕ ladzĕ', en Judas, böchĕ'ĕ Jacobo.

14 Yúgu'të bönni' ni tu'lidzë' Dios tsözxón, ate' yugu' böché'ë Jesús, en María, xinë'ë Jesús, en ia'zica'rönu nigula ca' núnqaquië' légaquië' tsözxón.

15 La' dza ná'asö guzuinë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'.

16 Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zón Jesús.

17 Judas na' gubábalenë' rë'u, en bënlenë' rë'u tsözxón dxin ni.

18 Gula'zínë' tu la' yëla lazzaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë.

19 Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön.

20 Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',

en bití' idzöli nu soa yu'u na'.

Rnna ca':

Nu yúbölö tsaza xilatjë'.

21-22 'Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilé' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

23 Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo.

24 Ní'irö bulu'lidzë' Dios, ta'nnë':

—Xantu' Dios, nunbë' cazu' icja láchí'do'gaca yúgu'të bönachi. Bulu'í netu' nulë' chopë' ni chigurö cazu' Li'

25 para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítie' xilatjë' tu' benë' dul-la', ate' guyijë' xilataj cazë' lataj chul-la.

26 Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

2

Dios Bö' Lá'ayi ridisóalenë' légaquië'

1 Cate' chibidxín dza Pentecostés, nudúbigaquië' tsözxón yúgu'të bönni' ta'yéajlë'ë Cristo.

2 Tsárido'os biyön bö le birúaj lúzxiba, le biyön ca riyön cate' recja bö budunu', ate' biyön idütë lu yu'u ga na' röö'ogaquië'.

3 Bulu'lu'í lahui yugu' bululu guí'do' lu bö'ös lógaquië', ate' gula'guísi que queëgaquië'. Bidisóalengaca tu tuë'.

4 Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzo Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzo iduté yödzoilió ni.

⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo.

⁷ Gula'ná' badxë' yúgu'të', en bulu'bánninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'?

⁸ ¿Nacxi caz naca riyöniru' tu'ë xtídza'ru' ca naca didza' ru'iru' tu turu'?

⁹ Rë'u ni nácaru' bönni' zían yödzo, bönni' narúajgaquië'

luyú Partia, en luyú Media, en luyú Elam,

en luyú Mesopotamia, en luyú Judea, en luyú Capadocia,

en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,

en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzo Roma ni. Bal-lë' nácagaquië' bönni' judío, en ia'bal-lë' nazí lu ná'agaquië' le ta'yéajlë'ë bönni' judío Dios.

¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyöniru' tu'ë didza' ru'iru' que queëru', ate' ta'guíxjö'ë yugu' le zxon benë' Dios, le tun ga rubániru'.

¹² Caní guca, bulu'bánninë yúgu'të', en gula'bö'ë böniga. Gulë luzá'agaquië' tuë' ia'tué', ta'nnë':

—¿Bizxi caz lë ni?

¹³ Bulu'titjë' bal-lë', ta'nnë':

—¡Ta'zúdxinë'!

Libán benë' Pedro lógaca bönachi zían

¹⁴ Ní'irö Pedro guzuílenë' ia'chinéajë' gubáz na' nasöl-lë'ë Cristo, ate' gusi lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacua'ali' yödzo Jerusalén! ¡Lë ni ral-la' inözili'! ¡Buli'zé nágali' le guía' libí'ili'!

¹⁵ Netu' ni bití' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní.

¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsétëgaca.

Isól-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, iluí'ibi' didza' uláz quia' neda'.

Yugu' bí'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

¹⁸ Cate' idxín dza ní' quisia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

¹⁹ Ulu'a lahui lúzxiba xitsá' le ilún ga ulu'bani bönachi,

ate' yödzoilió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ní' chibulu'ë Dios.

Gaca dza ní' le catu caz rilé'eru'.

²¹ Ulu' lágaca yúgu'të nupa ní' ulu'lidza Lë' Xanru',

lu yöl-la' réajlë' quéguequi Lë'.

22 'Buli'zë nágali' lë ni guía' libí'ili', bönachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu' yöl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinóz quézili'.

23 Lësca' caní, Dios bë'ë lataj nu budödi Jesús lu ná'ali'. Caní guca, ca na' chigunná ládxe'ë Dios gunë', en ca naca le chibucözë' dza ni'te. Libí'i cázali' guzxónli'-në' Jesús, en bëtili'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz.

24 Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'.

25 Ca naca lë ni, bë'ë didza' David uláz queë' Dios ca naca queë' Jesús, gunnë':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda', para cabí gaca nu bi gun quía'.

26 Que lë ni na' budzeja ládxa'a, ate' lu yöl-la' rudzeja quía' bil-la'.

Que lë ni na' guna' löza Lë' cate' idxín dza gátia'.

27 Xantu' Dios, nözda' biti' ucá'anú' neda' lataj chul-la ga nacué' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Li'.

28 Buzéajni'inu' neda' ca ral-la' guna' para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

29 Na'a, libí'ili', böcha'a. Naca bë' gútië' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxintë na'a dza.

30 David na' bë'ë didza' uláz queë' Dios, en gunözinë' benë' tsutsu Dios didza' le guzxí' lu në'ë queë', gunë' ga galjé' Cristo ladaj di'a dza queë' si' zá'gaca, ate' Cristo na' inná bë'ë xilatjé' David na'.

31 Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacué' nupa nátigaca, en biti' guniti le naca cazë'.

32 Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que.

33 Caní guca, len yöl-la' huáca queë', Dios buchisë' Lë' xitsá' ga ni' nácatërë' zxön. Na'a, Cristo chigusól-lë'ë Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyönili'.

34 Biti' buëpë' David na' yehua' yubá, pero lë cazë' David na' gunnë':

Xanru' Dios gudxë' Xana':

Gurö'i cuita lë'a ibëla ga naca lo

35 cate' gunra' ga ulu'zëchu zxíbigaca nupa ta'dá'baga' Li' lo' Li'.

36 Na'a, bönachi Israel, ral-la' inözili' le nácatë. Dios benë' ga náquië' Lë cazë' Jesús ni Xanru', en Bönni' Rusölá, bönni' na' budá'ali'-në' lë'e yaga cruz.

37 Cate' yugu' bönni' ni' bila'yönnë' lë ni, gula'bö'ë böniga, ate' gulë' Pedro, en ia'zica'rë' bönni' gubáz queë' Cristo, ta'nnë':

—Bóchi'ru', ¿nacxi gúntsatu'?

38 Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isöl-lë'ë Dios.

³⁹ Queëli' nequi le guzxi' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zían didza' benë' ba nalí Pedro, le guchizië' icja nágagaquië', gunnë':

—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zi' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz.

⁴² Gulunë' yúgu'të idútë le bulu'sédinë' gubáz nasöl-lë'ë Cristo légaquië'. Guláquië' tuz tuë' len ia'túë', en gulahuë' tsözxön le rusá' ládxi'ru' ca gútië' Jesús, ate' gulunë' tsözxön, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi.

⁴⁴ Yúgu'të nupa na' ta'yéajlë' Cristo gulaca tuz, ate' bulu'un tuz yúgu'të le dë quéguequi.

⁴⁵ Cate' bila'lé'enë' ta'yadzaj nupa nútsa'gaca ladjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj.

⁴⁶ Bulu'dubë' tsözxön chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ládxi'gaquië'.

⁴⁷ Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuóáquië' tu bönni' biti' raca së'ë

¹ Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuó.

² Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí' le Ra' Yu'u Lachi, para inábinë' nu bi unódzjasó queë' ladaj nupa ni' ta'yaza lö'a yudo'.

³ Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquië' bi ulu'nódzjasë' queë'.

⁴ Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵ Ní'irö bönni' na' buzëda' náguië' légaquië' tu' runë' löza bi ulu'nódzjasë' queë'.

⁶ Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ní'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudélë'ë Pedro në'ë ibëla bönni' huë' na', en buchisé' lë', ate' la' böácate' ni'ë, en buguitaj bëchaj ni'ë bönni' na'.

⁸ Ní'irö guzuínë' bönni' na', ate' guxíti'ë, en guzë'ë. Guyázalenë' tsözxön Pedro, en Juan, lö'a yudo', rizë'e ni'ë, en rixíti'ë, en rigu'ë Dios yöl-la' ba.

⁹ Yúgu'të bönachi nacuá' ni' ta'lé'e lë' rizë'e ni'ë, en rigu'ë Dios yöl-la' ba.

10 Caní guca, guládxinë, en bulu'báñinë ca naca lë na' guca, tu' bulu'únbë'ë lë, náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bí unödztasö queë'.

Didza' bë'ë Pedro chila yudo'

11 Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'.

12 Cate' bilé'enë' Pedro lë ni, gudxë' bönachi na':

—Libi'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' netu'sö buntu'-në' bönni' ni, en bentu' ga rizë'e ni'ë len yöl-la' huáca queëztu', o ni'a que le reaj ládxi'tu'-në' Dios?

13 Naca lë ni le benë' Dios. Náquië' Dios quegaquië' xuz gudödi queëru' Abraham, en Isaac, en Jacob. Lë cazë' bëntërë' bal Jesús, Zxí'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'.

14 Buzóali' tsólá'alö Bönni' Tshui', en Lá'ayi, ate' gunábili'-në' Pilato usanë' queëli' tu bönni' rútië' bönachi.

15 Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que.

16 Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

17 Na'a, böcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'.

18 Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo.

19 Que lë ni na', buli'bí'i ládxi'li', en buli'huóaca queë' Dios, para ugüë' dul-la' nabága'li', en gunë' ga huóaca ládxi'li'.

20 Ní'irö isól-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'.

21 Na'a, run bayudxi ugá'anë' yehua' yubá ni' cate' idxinrö dza uduhuénë' tshui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te.

22 Lësca' caní Moisés gudxë' xuz xtó'oru', gunné': "Xanru' Dios isól-lë'ë queëli' tu bönni' galjë' ládjtáca dí'a dza queëli'. Gáquië' bönni' gu'ë didza' uláz queë' Dios. Isól-lë'ë Lë' queëli' ca na' gusól-lë'ë neda'. Run bayudxi uzë' nágali'-në' ca naca yúgu'të le guíë' libí'ili'.

23 Yúgu'të nupa biti' ulu'zë nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

24 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'.

25 Libí'ili' nácali' zxi'ini xi'sóagaquië' bönni' gulu'ë didza' uláz queë' Dios, ate' nequi queëli' didza' rucá'ana tshui', le bënlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú' ilaca bica' ba yúgu'të bönachi yödžöliö."

26 Cate' Dios busubanë' Zxi'inë' lu yöl-la' guti, gusól-lë'ë Lë' zí'alö queëli' para gunë' ga gácali' bica' ba, en ucá'anali' le cabí naca dxí'a runli'.

4

Ta'dxinë Pedro, en Juan lógaquië' bönni' yudo' tu'chi'a tu'söröë'

¹ Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë.

² Gula'lenë' bönni' ni tu' tu'sédinë' Pedro, en Juan, bönachi, en tē' léguequi ulu'bán nupa chinátigaca tu' bubanë' Jesús.

³ Ní'irö gula'zönë' Pedro, en Juan, ate' gula'gu'ë légaquië' lidxi guié ga idxinrö dza yúbölö tu' chiridzö' dza na'.

⁴ Zián nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo ná'cagaquië' idú chi-un gáyu'ë.

⁵ Dza buropi ni', yugu' bönni' unná bé', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén.

⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'.

⁷ Ní'irö duchë'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bé' dë lu ná'ali' runli' lë ni? ¿Nuzxi budödi lu ná'ali' yöl-la' unná bé' ni?

⁸ Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula.

⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en naxci guca, böáquië' bönni' ni?

¹⁰ Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni lolí', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti.

¹¹ Dios bé'ë didza' ca naca queë' Jesús ni, cate' ni' gunné': "Libí'ili', bönni' rucua'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö."

¹² Cúnturö nu zoa nu gaca usölá bönachi, tu' cabí zoa yödzölió ni ia'túë' bönni' nuzöë' Dios, nu gaca usölá rë'u.

¹³ Cate' bila'lé'enë' ná'cagaquië' rugu ladxi' Pedro, en Juan, en guléquibe'enë' biti' nazédagaquië' que yudo', en ná'cagaquië' bönni' cá'asö, bulu'báininë', ate' yöjnéguequinë' Pedro, en Juan na', gula'cuá'lenë' Jesús.

¹⁴ Lësca' bila'lé'enë' bönni' na' böáquië', zuinë' lógaquië', ate' biti' guca bi ila'nnë' quégaquië'.

¹⁵ Ní'irö gula'nná bé'enë' nupa ulu'béaj légaquië' lö'alö yu'u ga na' nudúbigaquië', ate' gulún xtidzë'ë la' légacasë'.

¹⁶ Gula'nnë':

—¿Naxci gúntsaru' quégaquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'të bönachi nacua' Jerusalén lë ni. Biti' gaca tá'baga'ru' le.

¹⁷ Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí ilu'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenrë' bönachi didza', en para cabí ulu'sédinë' légaquië' ca naca queë' Jesús.

¹⁹ Ní'irö bulu'bi'ë didza' Pedro, en Juan. Gulé' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza' lí' libí'ili' ca xtídzë'ë Dios.

²⁰ ¡Biti' gaca soa dxitu'! ¡Run bayudxi güí'itu' didza' que le bilé'etu', en le biyönitu'!

²¹ Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sané' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca.

²² Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sané' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zëajni'inë' bönachi judío.

²⁴ Cate' bila'yönnë' lë ni, bulu'lídzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúxiba! ¡Benu' luyú! ¡Benu' nísado'! ¡Benu' yúgu'të le nacua' tu tu lataj na'!

²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunnë':

¡Bízx que tun dzatsa bönachi, en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún dzatsë', ate' guláquië' tuz bönni' unná bë'.

Gula'dá'báguë'ë Xanru' Dios, enca' Cristo, bönni' gurö cazë' Lë'.

²⁷ 'Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxí'ínu' lá'ayi, Bönni' na' buzú' queëtu'.

²⁸ Gulunë' yúgu'të le bucözu' zí'atëlö, en guzxí' lu no'o, ate' guca ca na' benu' tsutsu xtídz'u ca ral-la' gaca.

²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para güí'itu' xtídz'u, netu' bönni' huen dxin quiu'.

³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'ínu' lá'ayi, netu'. ¡Ca' gaca!

³¹ Cate' budxi bulu'lídzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

Tu'ünë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunnë' nu bönni' nútsë'ë ládjagaquië' nequi queëzë' le dë queë', pero bulu'ünë' tuz le dë quégaquië'.

³³ Len yöl-la' huáca zxön gula'guíxjö'ë gubáz na' nasöl-lë'ë Xanru' Jesús ca bubanë' Lë', ate' le buzá' ládxi'ë Dios quégaquië' gúcalen yúgu'të'.

³⁴ Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxi'gaquië', gulúti'ë le, ate' dumí que na' yöjuá'gaquië',

³⁵ en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guísië' le que queégaca nupa bi biyadzaj quéguequi.

³⁶ Zoë' José ni', bönni' bulu'zóë' gubáz na' nasöl-lë'ë Cristo ia'tú lë' Bernabé, le rna na didza' xidza', Bönni' Ruhue' Tsáhuë'ë. Nabábalenë' zxi'ini xi'sóë' Leví, en guljë' luyú Chipre.

³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'.

² Ananías na' bucachi' lanë' late' dumí que yu na', ate' nözínu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsa nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizi' yé'enu' Dios Bö' Lá'ayi, ate' bucachi' lanu' late' dumí que xiyú' na'?

⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bönachi.

⁵⁻⁶ Cate' biyönnë' Ananías didza' ni, gudzö'ë, en gütitë'. Ní'irö gula'bíga'tëbi' bi'i ra'bán, ate' bulu'chölibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en biti' nözínu lë na' guca queë' bönni' queënu.

⁸ Ní'irö Pedro gudxë'-nu:

—Gudíxjöi'i neda'. ¿Naru' guzxi'ili' tsa nisö xiyuli' na'?

Gunnánu:

—Ön, tsa nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídza'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gütitënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queënu.

¹¹ Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

¹² Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zXön lógaca bönachi lu yödzö. Yúgu'të' bulu'dubë' tsözxön ga naca chila yudo' nazí'i le Chila Queë' Salomón.

¹³ Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal.

¹⁴ Ní'irö ia'bal-la bönachi zían ca' gula'yéajlë' Cristo, bönni', en nigula.

¹⁵ Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca.

16 Lësca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'guíi ta'zaca' tu' yú'ugaca bö' xihui' léguequi, ate' bulu'huöaca yúgu'téguequi.

Bönni' yudo' ta'bia ládxi'gaquië' bönni' gubáz nasöl-lë'ë Cristo

17 Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro.

18 Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guié.

19 Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guié na', en bubéajë' légaquië'.

20 Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quíxjö'i'ili' légaquië' ca naca yöl-la' na'bán idú ni, en ca gaca ila'déli'në' le.

21 Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'sö bulu'dubë' bixúz lo, en nupa naca'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guié para tsöjxí'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guié na'.

22 Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guié na', ate' ní'irö bulu'huöajë' tsöjtíxjö'gaquië' ca'.

23 Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guié, ate' nacuá' nupa tun chi'i ra' lidxi guié na', pero cate' gusalajtu', cuntú nu yöjxáca'tu' lu yu'u na'.

24 Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca.

25 Ní'irö bidxinë' tu bönni' ni', en gudíxjö'i'inë' légaquië', rnnë':

—Buli'yútsöca'. Yugu' bönni' na' gulú'ugacali-në' lidxi guié nacu'ë chila yudo' tu'sédinë' bönachi.

26 Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ládxí' bönachi nacuá' ni' légaquië' guiöj.

27 Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

28 —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idütë yödzö Jerusalén, en rë'ënili' usubága'li' netu' xíguia' tu' nözi yöl-la' guti queë' bönni' na'.

29 Ní'irö bulu'bi'ë didza' Pedro, en ia'zica'rë' gubáz na' nasöl-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídzá'gaca bönachi.

30 Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'.

31 Jesús ni, Dios buzöa cazë' Lë' ga nayëpisëtë'rë' cuita lë'ë ibëla, para gáquië' Bönni' Lo, en Bönni' Rusölä, en gunë' ga ulu'bf'i ládxi'gaca bönachi Israel, para gaca uniti lahuë' dul-la' nabága'gaquië'.

³² Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risöl-lë'ë Dios quégaca nupa tun ca rnna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'.

³⁴ Ní'irö guzuinë' tu bönni' yudo' ruchi'a rusöröë' lógaquië', lë Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo ló'alö tu chí'ido'.

³⁵ Ní'irö gudxë' bönni' yudo' tu'chi'a tu'söröë' na', gunné':

—Libi'ili', bönni' Israel, buli'yutëz queëli' ca naca le rë'ënilí' gunlí' quégaquië' bönni' ni.

³⁶ Ral-la' tsöjnëli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayëpisëtërë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni yöjtá'gaca lë', ate' gunítisö ca' yúgu'të le benë' bönni' na'.

³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guízxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni yöjtá'gaca lë'.

³⁸ Que lë ni na' rea' libí'ili': Guli'sán-gaquië' bönni' ni, en biti' bi gunlí' quégaquië'. Channö naca quégacasö bönachi lë ni ta'nnë' o lë ni tunë', initi caz,

³⁹ pero channö naca queë' Dios, biti' gaca usunítili' le. ¡Buli'yú cuinlí' cabí tíl-lalenlí'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'.

⁴¹ Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu dzéjanë' tu' bë'ë Dios légaquië' lataj gula'guí'i gula'záquë'ë tu' dá'gaquië' Jesús.

⁴² Yugu' dza bulu'séditiqui'sinë' bönachi, en gulunë' libán queë' Jesu-cristo lu chila yudo', en gapa naca lu yu'u lídxigaca bönachi.

6

Ta'böë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntu nu ruí'i le ilágunu nigula uzëbi quégaquië' bönni' ni' tu'ë didza' griego.

² Ní'irö idxínnutë' bönni' gubáz na' nasöl-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Biti' naca dxí'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágu'gaca bönachi.

³ Que lë ni na', böchi' luzá'atu', guli'cö gadxë' bönni' ládjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'.

⁴ Netu' ni ulídatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ládxi'gaquië' didza' ni, ate' gula'böë' Esteban, tu bönni' réajlë'ë Cristo idú ládxië'ë, en zóalenë' Dios Bö' Lá'ayi lë'. Lësca'

gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzo Antioquía, bönni' zí'alö butsé'ë ca runë' para tseaj ládxë'ë Dios ca tunë' yugu' bönni' judío.

⁶ Ní'irö bulu'sunë' bönni' na' gula'böë' lógaquië' gubáz na' nasöl-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

⁷ Guzëro xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzo, zóalen yöl-la' huáca queë' Dios lë' le buzá' ládxë'ë queë'.

⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sédë' queë' Dios, nazí'i le Yu'u Quégaquië' Bönni' Nadzángaqië'. Bönni' narúajgaquië' yödzo Cirene, en yödzo Alejandría, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'.

¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'.

¹¹ Ní'irö gula'guíxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zì'ë queë' Moisés, en queë' Dios."

¹² Caní guca, bönni' ni gula'gu'ë xilá ládxí'gaca bönachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'.

¹³ Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zì'ë que yudo' lá'ayi ni, en que xibá queë' Dios.

¹⁴ Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalëbiru' runru', yugu' lë na' gunná bé'enë' Moisés rë'u.

¹⁵ Ní'irö bönni' yudo' tu'chi'a tu'söröë', en yúgu'të nupa rögaca ni bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunnë' uláz queë'

¹ Ní'irö bixúz lo gunábinë' Esteban na', rnnë':

—¿Naru' nácatë caní?

² Bubi'ë didza' Esteban, rnnë':

—Libi'ili', bönni' gula, en libí'ili', böcha'a. Buli'zë nágali' le guía' libí'ili'. Dios, Bönni' nayépisëtëré', buluf'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzo Harán.

³ Dios gudxë' lë': "Birúaj ladzu', en bulá'alén dí'a dza quiu', ate' guyéaj luyú ni' uluí'ida' lí'."

⁴ Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzo Harán. Lu yödzo ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni zóaru' na'a.

⁵ Dios biti' bë'ë lë' lataj guequi queë' luyú ni. Calëga láti'sö bunödzjë' queë' ga soë' luyú ni, pero guzxí' lu në'ë Dios unödzjë' queë' luyú ni,

ate' tōdi gátiē' Abraham guequi luyú ni quégaca zxi'ini xi'sóē', sal-la' biti' nacuí'nibi' bi'i queē'.

⁶ Lēsa' caní Dios gudxē' Abraham: "Tsójáquiē' zxi'ini xi'sú' lu xiyúgaca bōnachi izá'a, ate' ni' ilácagaquiē' ca bōnachi zi'tu'. Ilunē' bōnni' luyú ni' ga ilácagaquiē' zxi'ini xi'sú' bōnni' nadó'ogaquiē'. Ulu'saca' zi'ē légaquiē' idú ca tapa gayuá' iz."

⁷ Lēsa' Dios gudxē' lē': "Neda' uzötja' bōnachi luyú ni', ga ni' ilácagaquiē' zxi'ini xi'sú' bōnni' nadó'ogaquiē', ate' tōdi ni' ulu'rúajē' ni', ate' ilunē' xichina' luyú ni'."

⁸ Dios bēnlenē' Abraham tu didza' rucá'ana tsahui', en gunná bé'enē' lē' ichúguiē' lu xipéla'gaquiē' bōnni' biguiú' nacué' lidxē' tu le gaca bē' nazí' lu ná'agaquiē' didza' na' rucá'ana tsahui'. Gudōdi ni' gúquiē' Abraham xúzibi' bi'i Isaac, en cate' chigúquibi' xunu' gubidza, guchúguiē' lu xipéla'bi' lē na' naca bē'. Isaac na', lēsa' caní benē' queēbi' bi'i Jacob, zxi'inē', en caní benē' ca' Jacob quégaca idxinnutēbi' bi'i bōnni' queē', nupa ni' gulaca xuz xtó'ogaca idxinnu cō' bōnachi Israel.

⁹ Yugu' xuz xtó'oru' na', lu yöl-la' ruzxé'e quégaquiē', gulúti'ē-bi' bi'i José, bōchi'gaquiē', lu ná'agaquiē' bōnni' ni' gulúti'gaquiē'-bi' luyú Egipto. Dios gúzalenē'-bi' bi'i José na'

¹⁰ en busölē'-bi' lu le gulaca queēbi'. Dios bē'ē-bi' yöl-la' réajni'i, le ben ga guyaza ládxē'ē-bi' Faraón, bōnni' rinná bé'enē' bōnachi Egipto, ate' Faraón na' budodē' lu ná'abi' bi'i José yöl-la' unná bē' para gunná bé'ebi' bōnachi luyú Egipto, en yúgu'tē bōnachi nacuí' lidxē' Faraón na'.

¹¹ Ní'irō gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'tē bōnachi dza ni'. Biti' bidzöli le ilahuē' xuz xtó'oru'.

¹² Cate' biyönnē' Jacob dē zxa' xtila luyú Egipto, gúsöl-lē'ē yugu' zxi'inē', bōnni' ni' nácaquiē' xuz xtó'oru', luyú ni'. Caní guca le zí'alō luzuí yōjáquiē' ni'.

¹³ Cate' le buropi luzuí yōjáquiē' luyú Egipto, benē' José ga bulu'únbē'ē bōchē'ē lē'. Caní guca, gunōzinē' Faraón nupa náca'gaca di'a dza queē' José.

¹⁴ Ní'irō gúsöl-lē'ē José didza', en benē' ga bidxinē' Jacob, xuzē', luyú Egipto, ate' dzágagaca di'a dza queē' lē'. Gulaca idú tsónnalalaj yu' chinu bōnachi.

¹⁵ Caní guca, bidxinē' Jacob luyú Egipto, ga ni' gútiē' lē', ate' gulátiē' ca' xuz xtó'oru' luyú ni' cate' bizá'a dza que quéēgaquiē'.

¹⁶ Cate' gulátiē' tu tu xuz xtó'oru', zxi'ini xi'sóagaquiē' yōjuá'agaquiē' légaquiē' luyú Siquem, ate' ni' bulu'cáché'ē légaquiē' yeru ba lu zxan bulóaj na' gú'uē' Abraham lu ná'agaca zxi'inē' Hemor, bōnni' Siquem na'.

¹⁷ Gudōdi zían iz, cate' bidxín dza ral-la' gaca le guzxi' lu nē'ē Dios, lē na' benē' tsutsu xtídzē'ē gunē' queē' Abraham, gula'yán bōnachi yugu' cō' Israel, ate' gulaca bōnachi zían cate' ni' gula'cuá' luyú Egipto.

¹⁸ Ní'irō guyáziē' bōnni' yúbölō gunná bē'ē luyú Egipto na', en catu caz biyönnē' ca naca le benē' José, gúcalenē' bōnachi Egipto.

¹⁹ Bōnni' unná bē' na' bi'ē dō' quégaca bōnachi uládz queēru'. Busaca' zi'ē yugu' xuz xtó'oru' na', en benē' ga bulu'sanē'-bi' bi'i bōnni' huē'enido' que quégaquiē', para iláti'bi'.

²⁰ La' dza ní'sō gúljabí' ca' bí'ido' Moisés, ate' Dios guyaza ládxē'ē-bi'. Xuz xiná'abi' bulu'sculē'-bi' lídxigaquiē' idú ca tsonna beo'.

21 Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula xzí'inë' Faraón ga ni' bulu'cá'anë'-bi', ate' yójxí'inu-bi', en buscúlunu-bi' ca bi'i que cázanu.

22 Caní guca, bizédabi' bi'i Moisés yúgu'të le táquië' bönni' Egipto, en gúcatërobi' zxón ca naca didza' bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel.

24 Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'rö gúcalenbi'-në' bönni' uládz queëbi' na', en bë'tibi'-në' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'.

25 Gúquibi' Moisés huala'yéajni'inë' bönni' böchi'bi' gunë' Dios ga usölábi' lë cázabi' légaquië', pero légaquië' biti' gula'yéajni'inë'.

26 Ia'tú dza ca' yójxáca'bi' ia' chopë' bönni' Israel, ta'dil-lë', ate' gú'unibi' cuéqui dxibi' légaquië', en gúdxibi' légaquië': "Libí'ili, böchi'li' naca. ¿Bizx que ruá'ali' luzá'ali' dö'?"

27 Ní'rö bönni' na' ru'ë dö' que luzë'ë budxíguë'ë-bi' bi'i Moisés, gunnë': "¿Núzxitë buzóa li' para inná bé'enu' netu', en uchi'a usöröu' le runtu'?"

28 ¿Naru' rë'ënitsenu' gútiu' ca' neda' ca benu' néaje, bë'tiu'-në' bönni' Egipto na'?"

29 Cate' Moisés biyönibi' didza' ni, buzxúnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsga ná'alenbi'-nu nigula lu yödzo ni', ate' gúl'jagacabi' chópabi' bi'i bönni' queë'.

30 'Cate' chigudödi choá' iz zoë' ni', bulufi' lahuë' tu gubáz lá'ayi queë' Dios ga zoë' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'le le Sinaí.

31 Cate' Moisés bilé'enë' guí' na', bubájinë', ate' gubígui'ë gala' para ilé'enë' dxi'a, ate' biyönnë' chi'ë Xanru'.

32 Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'rö lu yöl-la' radxi queë', guxzíxidë'ë Moisés, en bití'rö burúguinë' uyüë'.

33 Xanru' gudxë' lë': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni.

34 Le nácate' chibilé'eda' le ta'guí'i ta'zaca' bönachi quia' nacua' luyú Egipto, en chibiyönda' ta'bödxi yeche'. Bötja, zoa' ni para usölá' légaquië'. Gudá na'a, isöl-la'a li' luyú Egipto."

35 'Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxitë buzóa li' para inná bé'enu' netu', en uchi'a usöröu' le runtu'?" Dios gusöl-lë'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate' bulufi' lahuë' lu yaga yötsi'do' régui ga na' zoë'.

36 Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'le Nísado' Xiná. Caní benë' lógaquië' idú ca choá' iz lu lataj cá'asö.

37 Lë cazë' Moisés na' gudxë' bönachi Israel ni', gunnë': "Xanru' Dios isöl-lë'ë queëli' tu bönni' galjë' ladaj di'a dza queëli', ate' gáquië' bönni' gu'ë didza' uláz queë' Dios. Isöl-lë'ë lë' queëli' ca na' gusöl-lë'ë neda'. Lë cazë' run bayudxi uzë nágali'-në'."

³⁸ Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bé'len lë' didza' lu gu'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'í didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca zxí'ini xi'sóagaquië' ga ridxintë queëru' rë'u.

³⁹ 'Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulë'ënnë' tsöjhuöjgaquië' luyú Egipto.

⁴⁰ Cate' ni' zoë' Moisés na' lu gu'a Sinaí na', légaquië' gulë' Aarón, böchë'ë Moisés na', gula'nnë': "Rë'ënitü' gunu' yugu' dios queëtu', tu budó' guië, para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto."

⁴¹ Ní'irö gulunë' tu budó' oro le naca ca tu bëdxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'.

⁴² Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni' bëtigacali'-ba', en buzégui'gacali'-ba', lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda', pero biá'ali' le nequi que Moloc, budó' guiöj queëli'. Biá'ali' ca' tu le naca ca bölaj lúzxiba nazí'i le Refán, lë na' buzóali' ca dios queëli'.

Yugu' budó' guiöj budó' yaga ni, la' libí'isili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli', en ichë'a libí'ili' zí'tu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu gu'a ni'.

⁴⁵ Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'güë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David.

⁴⁶ Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob.

⁴⁷ Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios.

⁴⁸ Caní benë' sal-la' bití' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a, ate' yödzólió naca xilibi ni'a.

Rnnë' Xanru': "¿Naru' gúntsali' tu yu'u ga soa'?"

¿Naru' zóatsö tu lataj ga ral-la' uzí' ládxa'a?"

⁵⁰ ¿Naru' cabí len na'a caza' bena' yúgu'të lë ni?"

51 Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágalí'. Nazidi icja ládxi'do'oli' ca raca quegaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'.

52 Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca'gulútië' bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni' gulútië' Lë'.

53 Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rna.

Tútië' Esteban

54 Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quegaquië' lë' gulagu zxéatica' láyë'ë.

55 Ní'irö buyüë' Esteban na' lúxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuinë' cuita lë'ë ibëla Dios ga nayëpisëtërë'.

56 Ní'irö gunné':

—Buli'yútsöca'. Rilé'eda' nayalaj lúxiba, ate' zuinë' Bönni' Guljë' Bönachi cuita lë'ë ibëla Dios.

57 Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxí'ë zidzaj, en tsözxön gula'bía di'ë Esteban na'.

58 Bulu'béajë' lë' ní'lö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguíë' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj.

59 Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

60 Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

8

Saulo ribía ládxi'ë bönachi queë' Cristo

1-3 Saulo benë' tsözxön yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yöjcháchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxi'ë bönachi queë' Cristo. Guyázië' gapa naca lu yu'u quegaquië', ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

4 Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a.

5 Ní'irö Felipe, tu bönni' dzáguíë' nupa na' gulásilasi, guyijë' luyú Samaria, ate' benë' libán ni' ca naca queë' Cristo.

⁶ Bulu'dubë' yugu' bönni' ni', ate' idú ládxi'gaquië' bulu'zé nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'.

⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bödxí'a zidzaj, ate' bulu'huóaca zían nupa te'e huë' nacú'uni bin, en nupa biti' guca sá'gaca.

⁸ Caní guca, bulu'dzeja bönachi yödzö ni'.

⁹ Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guzxí' yé'enë' bönachi Samaria na', gunné' lë cazë' náquië' bönni' nayëpisëtërë'.

¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxon queë' Dios."

¹¹ Caní guca, gulunë' lë' bal, tu' xidzé nazi' yé'enë' légaquië' len yöl-la' gudzá' unë ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula.

¹³ Ní'irö guyéajlë'ë ca' Simón na', en bidilë' nisa, ate' gudá'entica'së' tsözxön Felipe na'. Cate' bilé'enë' yugu' yöl-la' huáca zxon, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasöl-lë'ë Cristo nacu'ë Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'.

¹⁵ Cate' Pedro, en Juan na' bila'dxinë' ni', bulu'lidzë' Dios uláz quegaca bönachi ni' ta'yéajlë' Cristo para idisóalenë' Dios Bö' Lá'ayi léguequi.

¹⁶ Ga bidxintë dza na', biti' ridxíninë' Dios Bö' Lá'ayi quegaquië'. Nadílagacasë' nisa para ilácagaquië' tuz len Xanru' Jesús.

¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quizzjë' légaquië' dumí,

¹⁹ ate' rë' légaquië':

—Benna ca' yöl-la' huáca ni quia', para cate' ixóa na'a núti'tës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios.

²¹ Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios.

²² Bubi'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá ládxi'u.

²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubi'ë didza' Simón na', rë' légaquië':

—Buli'lidzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzaquië' bönni' Samaria, ate' gudödi ni' yöjhuójgaquië' Jerusalén.

Felipe, en tu bönni' Etiopía

26 Ní'irö tu gubáz lá'ayi queë' Xanru' bë'lenë Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxë'ë Dios.

28 Na'a, söhuóje' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios.

29 Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

30 Cate' chigubíguë' Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

31 Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntú nu zoa uzéajni'i neda'?

Ní'irö gúta'yue' lahuë' Felipe cuenë', en cö'lenë' lë' tsözxön lu carreta na'.

32 Lë na' nazúaj lu guichi rulabë', rna caní:

Ca bö'cu' zxíla'do',

gula'ché'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

33 Bulu'cá'anë' Lë' cá'asö,
en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

34 Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

35 Ní'irö la' didza' nisó buguélë'ë Felipe, en busiyönnë' lë' didza' dxi'a ca naca queë' Jesús.

36 Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ní dë nisa. ¿Naru' huácatsö idila' nisa?

37 Felipe gudxë' lë':

—Channö réajlë'u idú ládxu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

38 Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilé' bönni' huödx na' nisa.

39 Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bítí'rö bilé'enë' lë'. Ní'irö buguélë'ë xinözë', söhuóje' rudzéjanë'.

40 Cate' chiréquibe'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

9

Saulo ruhuöáquië' queë' Cristo

1 Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo,

2 en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzo Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzo Jerusalén.

3 Tsanni ni' yú'ugaquië' nöza Saulo, en nupa nacua'len lë', söjáquië', en cate' chizóa ila'dxinë' Damasco, tsárido'os buzeni'da' tu bení' za' lúzhiba, le buzeni' ga ni' söjáquië'.

4 Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládzu'u neda'?

5 Saulo gunábinë' Lë', gunnë':

—¿Nuzxi lí, Xan?

Lë' gunnë':

—Neda' Jesús, Nu ribía ládzu'u. Run zi' cuinu', ridá bagu'u neda'. Raca quiu' ca na' raca queëba' bëdxi, run zi' cuinba' richégu'ba' yaga tuchi' túndë'ë-ba' zi'.

6 Ní'irö Saulo guzxízidë'ë, gúdxinë', en gunnë':

—Xan, ¿bizxi rë'ënu' guna'?

Xanru' gudxë' lë':

—Guyasa, en guyáz lu yödzo, ate' ni' isöl-la'a quiu' nu guíë li' le ral-la' gunu'.

7 Guládxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lë'enë'.

8 Ní'irö böasë' Saulo luyú, en cate' guxá' guiöj lahuë', biti' ca' rilë'enë'. Que lë ni na' gula'guélé'ë në'ë, en gula'ché'ë lë' Damasco.

9 Guzöé' ni' tsonna dza nachul-la lahuë', en biti' bi gü'i' gudahuë'.

10 Zoë' ca' Ananías, bönni' réajlë'ë Cristo, yödzo Damasco, ate' Xanru' buluf'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubi'ë didza', gunnë':

—Ni zoa', Xan.

11 Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

12 Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóálaj guiöj lahuë'.

13 Ní'irö bubi'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacua' Jerusalén.

14 Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

15 Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel.

16 Uluf'ida' lë' le zían le qui'i sáquë'ë uláz quia' neda', gunë' xichina'.

17 Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí' lahui la' nöza ga ni' zo'o, gusöl-lë'ë neda' para huóalaj guiöj lo', en idisóalenë' Dios Bö' Lá'ayi li'.

18 La' ní'sö gula'guínnaj le naca ca xilácuba' böla lu guiöj lahuë', ate' la' böáljatë' guiöj lahuë'. Ní'irö guyasë' Saulo, en bidilë' nisa.

19 Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

Runë' libán Saulo lu yödzö Damasco

20 La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sedë' queë' Dios, rnnë':

—Jesús náquië' Zxi'ini cazë' Dios.

21 Bulu'bánninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítie' nupa nacua' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

22 Bidiparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

Rulë' Saulo lu ná'agaquië' bönni' judío

23 Cate' chigudödi zían dza, gulún xtídza'gaquië' bönni' judío nacu'ë ni' ilútië' Saulo.

24 Rëla, en të dza gula'bö' nísie' yugu' bönni' judío ga nu ridödi lu zö'ö run chí'i yödzö na' para ilútië' lë', pero gúquibe'enë' Saulo le të'ënnë' ilunë' queë'.

25 Ní'irö yugu' bönni' ta'yéajlë'ë Cristo gula'guélë'ë Saulo chí'i dzö'ölö, ate' gula'gu'ë lë' tu lu ga'böra zxön naga' du, en bulu'zötjë' lë' ní'ilö lu zö'ö run chí'i yödzö na'.

Rudxinë' Saulo Jerusalén

26 Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo.

27 Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilë'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús.

28 Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön.

29 Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'.

30 Cate' guléquibe'enë' böchi'ru' ta'yéajlë'ë Cristo lë ni, gula'ché'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

31 Ní'irö guca tsahui' quégaca yúgu'të cö' bönachi queë' Cristo, nacua' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

Pedro ruínë' tu bönni' lë' Eneas

³² Ia'tú le guca, cate' Pedro yöjyúë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzo Lida.

³³ Yöjxáquië' tu bönni' ni' lë' Eneas, chiguca xunu' iz dë' ré'enë', nacú'unië' bin.

³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'.

³⁵ Yúgu'të nupa nacuá' yödzo Lida, en yödzo Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzo Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le náca gaca dxi'a le tácalen bönachi yechi'.

³⁷ Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía.

³⁸ Tu' dë yödzo Lida gála'sö ga na' dë yödzo Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queëtu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'luf'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu.

⁴⁰ Ní'irö Pedro bubéajë' ní'ilö yúgu'të nupa nacuá' ni', ate' buzóa zxi'bë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guíoj lonu Dorcas. Cate' bilé'enu-në' Pedro, la' guyástënu, gurö'önu.

⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu.

⁴² Ca guca lë ni guzë didza' idú lu yödzo Jope, ate' gula'yéajlë' bönachi zían Xanru' Jesús.

⁴³ Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyú'ë bönni' röjáquië' gudil-la, naz'i lágaquië' Bönni' Italia Röjáquië' Gudil-la.

² Cornelio na' reaj lãdxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxón. Runödzejë' Cornelio dumí zían le rácalen bönachi yechi', en rulídzatica'së' Dios.

³ Tu dza idú ridödi xihuó bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rnoo', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'.

⁵ Na'a, gusöl-la' yugu' bönni' tsöjáquië' yödzo Jope tsöjıldzagaquië' bönni' na' lë' Simón, zoa ia'tú lë' Pedro.

⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzé'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la' reaj ládxë'ë Dios, en dzáguië' bönachi nacuá' lidxë' Cornelio.

⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödzo Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'sö gurenë' Pedro ícjo'olö yu'u para ulidzë' Dios, ni' naca idú huagubidza.

¹⁰ La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal.

¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a.

¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xíligacaba'.

¹³ Ní'irö biyönnë' chi'i nu rë lë':

—Pedro, guyasa. Bëti-gacaba', en gudagu.

¹⁴ Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, ate' ní'irö la' buëpitë' lari' zxön na' lúzxiba.

¹⁷ Tsanni ni' rö'ë böniga Pedro, rizá' ládxë'ë bizxi sa'yéaj lë' na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'.

¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro.

¹⁹ Tsanni ni' rizá' ládxë'ë Pedro ca naca lë' na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' li'.

²⁰ Guyaschi na'a, en bötaj zcan yu'u. Biti' gaca chopa ládxu'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bötjë' Pedro zcan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' ruguílajli'. ¿Bizxi huen zá'ali' ni?

²² Bulu'bi'ë didza', të' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxë' lë' isöl-lë'ë nu udulídza li' guídu' lidxë' para yönnë' didza' gu'u.

²³ Ní'irō Pedro gulu'ë légaquië' lu yu'u, en bē'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'.

²⁵ Cate' guyazië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxë'ë lë' ca runru' queë' Dios caz.

²⁶ Pedro buchisé' lë', en gudxë' lë':

—Guyasa. Lësca' bönachi yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'.

²⁸ Ní'irō Pedro gudxë' légaquië', rnnë':

—Libí'ili' nöz quézili' ca rinná bē' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios buluí'inë' neda' biti' ral-la' inní'a queë' nitúë' bönni' náquië' cá'asö o biti' náquië' dxi'a.

²⁹ Que lë' ni na' cate' bulídzali' neda', la' bídatea', en biti' guca chopá ládxa'a. Rinaba' na'a, ¿bizx que na' bulídzali' neda'?

³⁰ Ní'irō bubi'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', dului'i lobi' neda'.

³¹ Caní gúdxibi' neda': “Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'.

³² Na'a, isól-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a.”

³³ Caní guca, la' gusól-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzë' náguatu' le inná bé'enë' Dios li' innó'.

Didza' bē'ë Pedro lidxë' Cornelio

³⁴ Ní'irō gusí lahuë' Pedro ru'ë didza', rnnë':

—Le nácate' réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u.

³⁵ Dios raza ládxë'ë bönachi idütë yödzölió, nupa na' tadxi Lë', en tun le naca dxi'a.

³⁶ Gusól-lë'ë Dios xtídzë'ë ga nacuá' bönachi Israel, en gusól-lë'ë nu ben libán que didza' dxi'a, le run ga raza dxi'a quégaca bönachi, lë' na' bidxín queëru' lu nē'ë Jesucristo. Lë' cazë' náquië' Xanru' yúgu'tëru'.

³⁷ Libí'ili' nöz quézili' lë' na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa.

³⁸ Nözili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guí' gula'zaca' lu na' tu' xihui'. Caní benë', tu' guzóalenë' Dios Lë'.

³⁹ Na'a, netu' runtu' ba nalí que yúgu'të lë' na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz.

40 Ní'irö Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'.

41 Biti' buluí'i lahuë' lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nalí queë' Jesús, ate' gü'i gudágulentu' Lë' tsözxön gudödi bubanë' lu yöl-la' guti.

42 Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca.

43 Lë'sca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

44 Ni' ruí'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'.

45 Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' bití' nácagaca judío.

46 Caní gulunë' tu' bila'yönnë' tu'ë bönni' zítu' na' didza' yúbölö, en tunë' Dios zxön.

47 Ní'irö bë'ë didza' Pedro, gunnë':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

48 Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analënë' légaquië' ca chopa tsonna dza.

11

Didza' bë'ë Pedro lógaca bönachi queë' Cristo nacué' Jerusalén

1 Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' bití' nácagaquië' judío gula'zí' lu ná'agaquië' xtídzë'ë Dios.

2 Cate' budxinë' Pedro Jerusalén, böchi'ru' judío gula'díl-lalenë' lë' didza'.

3 Gulë' Pedro:

—¿Bizx que yöjtsú'ulenu' bönni' bití' nácagaquië' judío, en gudágulenu' légaquië' tsözxön?

4 Ní'irö gusí lahuë' Pedro rusiyönnë' légaquië' idútë lë na' guca, rnnë':

5 —Guzóa' lu yödzo Jope, en cate' ni' rulidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'.

6 Cate' ni' ruyúa' le para ilé'eda' le dxía láhuilö, bilé'egacada'-ba' böa' guixí' nacué' tapa ní'agacaba', yugu' böa' guixí' sínía', en böa' tá'ayöj lé'egacaba' lu yu, en böa' zoa xiligacaba'.

7 Biyönda' chi'i nu gudxi neda': "Pedro, guyasa. Bëti-ba', en gudagu."

8 Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxí'a."

9 Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxí'a, bití' innó' bití' naca dxí'a."

10 Tsonna luzuí guca caní, ate' ní'irö idútë lë na' bilé'eda' la' buëpitë lúzxiba.

¹¹ La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzo Cesarea, nasöl-lë'ë légaquië' tu bönni' lë' Cornelio. Sududiljagaquië' neda'.

¹² Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyastu' lidxë' tu bönni' zoë' ni'.

¹³ Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isöl-la'gacu'-në' bönni' tsöjáquië' yödzo Jope, tsöjlídzagaquië' Simón, zoa ia' tú lë' Pedro.

¹⁴ Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'."

¹⁵ Cate' ni' gusí lahua' ru'ílëna' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö.

¹⁶ Ní'irö yöjneda' didza' na' bë'ë Xanru', gunné': "Le nácatë Juan buquilé' bönachi nisa lu nisa, pero libí'ili', gaca queéli' le rulu'isö yöl-la' ridíla nisa na', idisóalenë' Dios Bö' Lá'ayi libí'ili'."

¹⁷ Que lë ni na', channö Dios gusöl-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, çnúzxitë neda' inná bé'eda'-në' Dios?

¹⁸ Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' bití' nácagaquië' judío, tu'bí'i ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquia ta'yéajlë'ë Cristo

¹⁹ Cate' ni' yugu' bönni' judío bití' ta'yéajlë'ë gulútië' Esteban, en gula'bia ládxi'gaquië' ia' zíca'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzo luyú Fenicia, en luyú Chipre, en lu yödzo Antioquia. Gulunë' libán ni' que xtídzë'ë Dios, pero lógacasö bönachi judío.

²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquia, gulu'ílenë' ca' didza' yugu' bönni' izá'a. Gulunë' libán lógaquië' que didza' dxí'a ca naca queë' Xanru' Jesús.

²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²² Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquia na'.

²³ Cate' Bernabé na' bidxinë' Antioquia, bilé'enë' le ruzá' ládxë'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'.

²⁴ Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ní'a que libán benë' Bernabé na', bönachi zían lu yödzo na' gula'yéajlë' Xanru'.

²⁵ Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' lë', buchë'ë lë' Antioquia.

²⁶ Idú ca tu iz gula'cu'ë ni', tunë' tsözxön bönachi queë' Cristo, en tu'sëdinë' bönachi zían. Lu yödzo Antioquia na', gusí lo gula'zí' lágagaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yöjáquië' Antioquia bal-lë' bönni' tu'ë didza' uláz queë' Dios.

28 Guzuínë' Agabo, bönni' dzáguie' yugu' bönni' na', en uláz queë' Dios Bõ' Lá'ayi buzéajni'inë' légaquie', gunné':

—Si' gaca gubín idütë yödzölió.

Guca gubín na' cate' ni' rinná bë'ë Claudio, lu yödzö Roma.

29 Ní'irö gula'zì' lu ná'agaquie' bönni' ta'yéajlë'ë Cristo nacu'ë Antioquia, ila'söl-lë'ë tsca le dësö que queëgaquie', le gácalen böchi'ru' nacu'ë luyú Judea.

30 Caní gulunë', ate' lë na' bulu'nödzjë', gula'gu'ë lu ná'agaquie' Bernabé, en Saulo para ilu'ë le lógaquie' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guié

1 Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zì'ë légaquie'.

2 Gunná bé'enë' bönni' gulútië' Jacobo, böchë'ë Juan. Gulu'ë lë' guié tuchi'.

3 Cate' gúquibe'enë' Herodes gula'yaza ládxi'gaquie' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que.

4 Gudödi gula'zönë' Pedro, gula'gu'ë lë' lidxi guié, en bulu'dödë' lë' lu ná'agaquie' tapa cõ' bönni' rójáquie' gudil-la, nacu'ë tapë' tu huéaj cõ' na', para uyúgaquie' lë'. Yu'u ládxi'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto.

5 Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guié

6 Cate' si' idxín dza yu'u ládxi'ë Herodes ubéajë' Pedro lidxi guié na', la' dzö' ní'sö dë' rásie' Pedro, ate' nacu'ë chopë' bönni' rójáquie' gudil-la cuita lë'ë Pedro na', en núga'gaquie' lë' chopa du guié. Gula'cu'ë ia'bal-lë' bönni' rójáquie' gudil-la tapa chi'ë ga nu riyaza lidxi guié na'.

7 Tsálido'os buluf'i lahuë' tu gubáz lá'ayi queë' Xanru'ni', ate' buzení'da' bení lidxi guié. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guié na' naga' ni'a në'ë Pedro.

8 Gubáz lá'ayi na' gudxë' lë', gunné':

—Béga' lë'u, en gudá xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdz'u, en gudá len neda'.

9 Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'.

10 Cate' chigula'dödë' ga nacu'ë bönni' zì'alö, en bönni' buropi cõ', bönni' na' rójáquie' gudil-la tapa chi'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nōza que yödzö. Ga nu riyaza na', rācasō que gualaj. Cate' bila'rúajë' ni', gula'zë'ë ga ridzaga ia'turö nōza, ate' ni' gubáz lá'ayi na' la' bulá'alentë' Pedro.

11 Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusöl-lë'ë Xanru' gubáz lá'ayi queë', en busöilë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

¹² Tsanni ni' yu'ë nöza Pedro, rizá' láchë'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zián ta'yéajlë' Cristo, en tu'lidza Dios.

¹³ Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'.

¹⁴ Cate' bünbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtíxjö'ibi' nupa nacuá' ni', rnnabi'.

—Zoë' Pedro ra' yu'u.

¹⁵ Ní'irö gulë' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'.

¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guíë. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' reni' dza na', bönni' röjáquië' gudil-la gula'bö'ë böniga nacxi guca, bití'rö yu'ë Pedro lidxi guíë.

¹⁹ Ní'irö gusöl-lë'ë Herodes nupa tsöjxí'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

²⁰ Dza ní'isö rilenë' Herodes bönachi yödzö Tiro, en yödzö Sidón. Zí'alö bönachi lu xiyúë' Herodes na' gula'söl-la' le biyadzaj quégaca bönachi lu xiyú'gaca yödzö Tiro, en Sidón na', pero tu' rilenë' Herodes légaquië', bití'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'.

²¹ Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'.

²² Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

²³ La' ná'asö la' bë'të' gubáz lá'ayi queë' Xanru' lë' tu' buzi'ë lë cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

²⁴ Ní'irö guca libán que xtídze'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquië' Bernabé, en Saulo libán

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zé'ë ni', yöjhu'öjgaquië' yödzö Antioquía. Gula'chë'ë-bi' ca' bi'i Juan, zoa ia'tú labi' Marcos.

13

1 Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galilea).

2 Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'bëaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

3 Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

4 Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre.

5 Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sédë' queë' Dios. Nachë'gaquië'-bi' bi'i Juan para gunbi' légaquië' tu zxön.

6 Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë' yë'ë, en rnnë' ru'ë didza' uláz queë' Dios.

7 Bönni' ni dzáquië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'enë' yönnë' xtídzë'ë Dios.

8 Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzaz'gaca bönachi izá'a ga na'.

9 Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na'

10 en rë' lë':

—Li', bönni' rizí' yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxí'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'?

11 Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'.

12 Cate' bilé'enë' bönni' unná bë' na' lë' na' guca, bubánninë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³ Ní'irō buzé'ë Pablo lu yōdzō Pafos na' len yugu' bōnni' dzágagaquié' lē', nacu'ë tu lē'e barco, ate' bila'dxiné' yōdzō Perge luyú Panfilia. Lu yōdzō na' bi'i Juan bulá'alēnbi' légaquié', en bōajbi' Jerusalén.

¹⁴ Gudōdi ni' bulu'zē'ë Perge na', en yōjáquié' yōdzō Antioquía luyú Pisidia. Lu yōdzō na', cate' ni' naca dza lá'ayi quégaquié' bōnni' judío, gula'yázié' lu yu'u ga tu'dubē' tu'sedē' queé' Dios, ate' lu yu'u na' gula'bō'ë.

¹⁵ Ní'irō tu bōnni' zoé' ni' bulabē' guichi ga nazúaj xibá queé' Dios, enca' le nazúaj lu guichi ca gula'nné' bōnni' gulu'ë didza' uláz queé' Dios. Gudōdi ni' yugu' bōnni' unná bē' que yu'u na' gula'sól-lē'ë nu yōjōdx Saulo, en Bernabé, gunné':

—Libi'ili', bōchi'tu'. Channō nuá'ali' bi innali' le uzéajni'i netu', guli'nné'.

¹⁶ Ní'irō guzuinē' Pablo, en guchisa nē'ë para ila'cu'ë dxisō, gunné':

—Buli'zē' nágali' le guía' libi'ili', bōnni' Israel, en libi'ili', núlōli' rádxili'-nē' Dios.

¹⁷ Xanru' Dios, Nu ta'yéaj lādxi'gaca bōnachi Israel, gurō cazē' xuz xtó'oru', en bené' ga gula'yándē'ë cate' ni' nácagaquié' bōnni' zí'tu' luyú Egipto. Len yōl-la' huáca zxōn queé' bubéajē' légaquié' luyú ni'.

¹⁸ Idú choá' iz Dios biá' gulēnē' quégaquié' cate' ni' gula'dē' idú luyú bidxi lu lataj cá'asō.

¹⁹ Cate' budxi busunítiē' gadxi cō' yōdzō gula'cuá' luyú Canaán, bunōdzjē' xiyúgaca bōnachi ni' quégaquié' xuz xtó'oru'.

²⁰ Gudōdi ni', le guca idú ca tapa gayuá' yu' chi-un iz, Dios bucu'ë yugu' bōnni' bulu'chi'a bulu'sörōē' légaquié' ga bidxintē zoé' Samuel, bōnni' bē'ë didza' uláz queé' Dios.

²¹ Ní'irō gula'nábinē' Dios uzōé' tu bōnni' unná bē' quégaquié'. Dios gurōē' Saúl, xzí'inē' Cis, bōnni' nababē' di'a dza queé' Benjamín. Idú ca choá' iz gunná bē'enē' Saúl na' légaquié'.

²² Gudōdi ni' Dios gudúē' Saúl na', ate' buzōē' David quégaquié' para inná bē'ë. Dios bené' ba nalí queé' David ni, gunné': “Nōzda' runē' David, xzí'inē' Isaí, le raza lādxa'a, en gunē' yúgu'tē le rē'ēnda' neda'.”

²³ Ladaj xzí'ini xi'sóē' David na' bené' Dios ga guljē' Jesús para gáquié' bōnni' usölē' bōnachi Israel, ca na' guzxi' lu nē'ë Dios zí'atēlō gunē'.

²⁴ Zí'alō cate' si' ilá' lahuē' Jesús, benē' Juan libán lógaca yúgu'tē bōnachi Israel para ulu'bí'i lādxi'gaca, en ila'dila nisa.

²⁵ Cate' ni' chizóa údxi gunē' libán Juan na', gunné': “¿Nuzxi réquili' naca' neda'? Biti' naca' Cristo, bōnni' na' ral-la' guidē'. ¡Na'a, buli'yútsóca'! Chizōé' idxinē' bōnni' na' ga zoa' ni, ate' neda' biti' naca' lesaca' ilecja' xiráchuē' nudē'ë.”

²⁶ Libi'ili', bōcha'a, yugu' xzí'ini xi'sóē' Abraham, en núlōli' zóali' ni, en rádxili'-nē' Dios. Dios caz gusól-lē'ë queéli' didza' ni para uláli'.

²⁷ Nupa nacué' Jerusalén, en bōnni' ta'nná bē'enē' légaquié' biti' bulu'únbē'ë Jesús, en biti' gula'yéajni'inē' le nazúaj lu guichi le gula'nné' yugu' bōnni' gulu'ë didza' uláz queé' Dios, sal-la' tu'laba cazē' yugu' didza' ni yugu' dza lá'ayi. Lu yōl-la' cabí réajni'i quégaquié' gulunē' ga budxín ca rna didza' ni cate' ni' gula'chúguié' queé' Jesús gátiē'.

²⁸ Sal-la' biti' budzōli le nabáguē'ë Jesús gátiē', gula'nábinē' Pilato inná bē'enē' bōnni' ilútiē' Lē'.

²⁹ Cate' budxi gulunē' queé' yúgu'tē le nazúaj lu guichi ca ral-la' gaca queé', bulu'zōtjē' Lē' lē'e yaga cruz, en bulu'cáché'ë Lē' yeru ba.

³⁰ Ní'irō Dios busubanē' Lē' lu yōl-la' guti!

31 Zián dza buluí'i lahuë' Jesús lógaca nupa yójacalen Lë' tsözxón cate' ni' buzé'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

32 Caní naca, lësca' netu' ni rusiyöntu' libí'ili' didza' dxi'a ca naca lë na' guzxi' lu në'ë Dios gunë' quégaquië' xuz xtó'oru'.

33 Lë na' guzxi' lu në'ë Dios quégaquië', Lë cazë' benë' ga budxín queëru', nácaru' zxi'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Zxi'ina'. Neda' buzóa caza' Li'."

34 Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunnë' caní: "Gunna' quiu' le nácagaca bica' ba guzxi' lu na'a lahuë' David."

35 Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'."

36 Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'.

37 Na'a, ca naca queë' Jesús na', Dios busubanë' Lë', ate' biti' guniti le naca cazë' lu yeru ba.

38 Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni.

39 Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés.

40 Guli'gún chí'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

41 Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu uluí'i libí'ili' le rulu'i dxin na', biti' ca' tséajlë'ëli'.

42 Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sëdinë' légaquië' ca naca lë ni cate' idxín ia'tú dza lá'ayi quégaquië'.

43 Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxón Pablo, en Bernabé. Chopë' ni gulu'ílenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' lóza le ruzá' ládxi'ë Dios quégaquië'.

44 Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzo na' para ila'yönnë' xtídzë'ë Dios.

45 Ní'irö bulu'zxe'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le.

46 Ní'irö lu yöl-la' rugu ládxi' quégaquië' Pablo, en Bernabé, gulë' yugu' bönni' judío na', ta'nnë':

—En bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönachi izá'a.

⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bē'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a, en gacu' Nu usölá bönachi idútë yödzülió.

⁴⁸ Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú.

⁴⁹ Caní guca, guzë xtídzë'ë Xanru', ate' bila'yöni bönachi yúgu'të yödzü nacuá' luyú ni'.

⁵⁰ Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzü ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilo lu xiyúgaquië'.

⁵¹ Ní'irö Pablo, en Bernabé bulu'quínnajë' yu bëchtö da' la' lábagaquië' le rulu'í nagá'ana xíguia' nabága'gaca bönachi lu yödzü na', ate' yójáquië' lu yödzü Iconio.

⁵² Bulu'dzéjanë' bönni' yödzü Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzü Iconio

¹ Cate' bila'dxinë' Pablo, en Bernabé yödzü Iconio, gula'yu'ë tsözxön lu yu'u ga tu'dubë' bönni' judío, en tu'sédë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo.

² Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo.

³ Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxí' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ládxi'ë Dios quégaca bönachi, tu' bē'ë légaquië' lataj gulunë' yugu' le taca bē', en le tun ga tu'bani bönachi.

⁴ Ní'irö bönachi lu yödzü na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo.

⁵ Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasöl-lë'ë Cristo, en ulu'ladxë' légaquië' guiöj.

⁶ Cate' téquibe'enë' Pablo, en Bernabé lë ni, bulu'zxúnnajë' ni', yójáquië' yödzü Lистра, en Derbe luyú Licaonia, ate' gula'dödë' yúgu'të yödzüdo' idú gásibi'ilo ni',

⁷ gapa ni' gulunë' libán que didza' dxi'a ca naca queë' Cristo.

Tu'ladxë' Pablo guiöj lu yödzü Lистра

⁸ Zoë' tu bönni' lu yödzü Lистра biti' raca së'ë. Rő'ösë' ni' tu' cabí rizë'ë cate' ni' guljë', en catu caz guzë'e ni'ë.

⁹ Bönni' ni ruzë náguie' didza' ru'ë Pablo. Pablo buyüë' lë', en gúquibe'enë' réajlë'ë Cristo para huóáquië'.

¹⁰ Ní'irö Pablo bē'ë zidzaj didza', en rë' lë':

—Guzuí.

La' guxítitè' bõnni' na', en guzë'e ni'ë.

11 Cate' yugu' bõnni' Lистра bila' lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bõnni' Licaonia na', ta'nnë':

—¡Yugu' dios bõnni' ni! ¡Nuhuõ'tjagaquië' ga zóaru', en tu'luf'i cúngaquië' ca nácagaquië' bõnni'!

12 Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia' tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'.

13 Zoa yudo' que Júpiter ga ni' nacu'ë, cuita nõza ga ni' ta'yaza bõnachi lu yõdzõ na'. La' bidxintë' bixúz que Júpiter na', nachë'ë-ba' yugu' bëdxi, en nu'ë ca' yugu' bregui' yõj, ate' dzágagaca bõnachi zían lë'. Gul'ënnë' ilútië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'.

14 Cate' Bernabé, en Pablo, gubáz na' nasól-lë'ë Cristo, guléquibe'enë' lë ni, gula'chözë' lari' nácugaquië'. Tu'huf'ininë' tu' tunë' bõnni' ni le cabí ral-la' ilunë', ate' gula'xítitë', en yõjcu'ë gatsaj láhui'lõ bõnachi zían na', en gulu'ë zidzaj didza', të' légaquië':

15 —¡Libí'ili' bõnachi! ¿Bizx que runli' caní? Lësca' bõnni' ca libí'ili' nácatu', en riguíxjõ'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzxiba, en yõdzõlió, en nísado', en yúgu'të le nacua' tu tu lataj na'.

16 Yugu' iz chigula'dõdi, gulún yúgu'të bõnachi ca rnnasõ que queëguequi, ate' Dios biti' buzáguë'ë xinõzguequi,

17 pero benë' ga gulaca le tun ba nali' queë', yugu' le nácagaca dxi'a benë' quégaquië'. Risól-lë'ë queëru' nisa guiõj, en runë' ga ta'yán le rázaru'. Ruzõlaj rudzé'enë' ré'u, en runë' ga rudzeja ládxi'ru'.

18 Sal-la' Bernabé, en Pablo gulé' légaquië' caní, cánnisõ bila'déli'në' bulu'záguë'ë xinõzguequi bõnachi zían na', para cabí ilútië'-ba' bëdxi na' lógaquië'.

19 Ní'irõ bal-lë' bõnni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yól-lë'ë bõnachi zían na'. Ní'irõ yúgu'të' bulu'ladxë' Pablo guiõj, en gulá'ayõjë' lë' ní'ilõ ra' yõdzõ na', tu' téquinë' chinátie'.

20 Ní'irõ bulu'dubë' yugu' bõnni' ta'yéajlë'ë Cristo idú gásibi'ilõ ga dë' Pablo. Guyasë' lë', en buázië' lu yõdzõ na'. Cate' za' rení' ia'tú dza, burúajlenë' Bernabé, yõjáquië' yõdzõ Derbe.

21 Lu yõdzõ ni' gulunë' libán que didza' dxi'a ca naca queë' Jesucristo, ate' bõnachi zían ni' gula'yéajlë' Cristo. Gudõdi ni' yõjhuõjgaquië' Lистра, en Iconio, en Antioquía.

22 Cate' gula'dõdë' Bernabé, en Pablo yugu' yõdzõ na', bulu'tipë' ládxi'gaquië' bõnni' ni' ta'yéajlë'ë Cristo, en bulu'së'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulé' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

23 Bulu'cu'ë yugu' bõnni' gula ilún chi'ë bõnachi queë' Cristo tu cõ' huéaj bõnachi ni' queë' Cristo. Cate' chiguluf'ilenë' Dios didza', en gulunë' gubasa, ní'irõ gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquía luyú Siria

24 Ní'irõ Pablo, en Bernabé gula'dõdë' luyú Pisidia, ate' bila'dxinë' luyú Panflia.

²⁵ Budxi gulunë libán que xtídzë'ë Cristo lu yödzö Perge, yöjáquië' yödzö Atalia.

²⁶ Bulu'zë'ë ni', ate' gula'benë' tu lë'e barco, en bulu'dxinë' yödzö Antioquia, ga na' nacu'ë bönni' queë' Cristo, bönni' na' gula'söl-lë'ë légaquië' tsöjéngaqië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'.

²⁷ Cate' ni' bulu'dxinë' Antioquia, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'.

²⁸ Pablo, en Bernabé bulu'gá'analënë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzö Jerusalén

¹ Ní'irö bal-lë' bönni' narúajgaquië' luyú Judea bila'dxinë' yödzö Antioquia, ate' bulu'sëdinë' böchi'ru', bönni' izá'a ni', ta'nnë':

—Channö cabí irugu lu xipëla'li' ca nalëbitu' runtu' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjajúquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ilenë' légaquië' didza' ca naca lë ni raca, tu'sëdinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquia bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'.

⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bë' xibá queë' Moisés.

⁶ Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca.

⁷ Gudödi gulu'ë zían didza', guzuínë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios guró cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo.

⁸ Dios, Nu nunbë' caz le yu'u icja ládxi'do'gaca bönachi, buzóë' le naca bë' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'.

⁹ Biti' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo.

¹⁰ Na'a, ¿bixx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le.

11 Rë'u ni, réajlë'ëru' nuláru' ni'a que le buzá' ládxe'ë Xanru' Jesús queëru', en ca na' nuláru' rë'u, ulu'lë' ca' légaquië'.

12 Cate' budxi bé'ë Pedro didza' ni, yúgu'të' gula'cu'ë dxisö, ate' bulu'zë nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bé', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a.

13 Cate' Bernabé, en Pablo budxi gulu'ë didza' ni, bubí'ë didza' Jacobo, gunnë':

—Libí'ili', böcha'a. Buli'zë nágali' le guía' libí'ili'.

14 Simón Pedro chigudíxjô'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi nútsa'gaca ládjagaquië'.

15 Ca naca lë ni röjlözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

16 Dza tödi lë ni huöda', en uchisa' Nu inná bé', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bé'ë David

17 para ulu'guilaj ia'zíca'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

18 Caní rnnë' Xanru',

Nu na' dza ni'te ben ga naca bé' yúgu'të lë ni.

19 'Que lë ni na' runi neda' bití' ral-la' gun níguiru' bönachi izá'a, nupa tu'huöáca queë' Dios.

20 Ral-la' uzúajru' lu guichi quégaquië' ulu'cá'anë' yugu' le bití' ral-la' ilahuë', le nadödi lógaca budó' guió' budó' yaga, en cabí ilunë' le ruá' dö', en cabí ilahuë' xipëla'gacaba' böa' guixi' bití' narúaj-gácaba' rön, en cabí ilahuë' xichönba' bítí'tës böa' guixi'.

21 Dza ni'te nacuá' yúgu'të yödzö nupa tun libán lu yu'u gapa tu'dubë' bönni' judío, en tu'sédë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

22 Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chí'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'söl-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'.

23 Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasöl-lë'ë Cristo, en bönni' gula tun chí'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia.

24 Biyönitu' ca tun bal-la bönachi bila'ruáj ga zóatu', nupa na' bití' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bé'ë irugu lu xipëla'li', en gunli' ca rinná bé' xibá queë' Moisés.

25 Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'.

²⁶ Chiyöjáquië' Bernabé, en Pablo gapa guzóa bönadxi ilátië' tu' nadxi'iguequinë' Xanru' Jesucristo.

²⁷ Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni.

²⁸ Dios Bò' Lá'ayi buluf'inë' netu' le raza ládxë'ë, en lësca' caní raza ládxi'tu' netu', bití' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

²⁹ Bití' gáguli' le nadödi lógaca budó' guiöj budó' yaga.

Bití' gáguli' rön.

Bití' gáguli' xipëla'gacaba' böa' guixi' bití' narúaj-gácaba' rön.

Bití' gunli' le ruá' dö'.

Channö gun chí'i cuinli' para gunli' ca rnna yugu' lë ni, gunli' dxi'a."

³⁰ Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachi queë' Cristo nacua' ni', ate' gula'gu'ë guichi na' lu ná'agaquië'.

³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë tsahui' légaquië'.

³² Tu' nácagaquië' Judas, en Silas bönni' tu'ë didza' uláz queë' Dios bulu'huë tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'.

³³ Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacu'ë bönni' gula'sól-lë'ë légaquië'.

³⁴ Guyaza ládxë'ë Silas bugá'anë' Antioquía.

³⁵ Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgaru'-në' böchi'ru' nacu'ë yúgu'të yödzö gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unnë' Bernabé ila'chë'ë-bi' bi'i Juan Marcos, tséajlenbi' légaquië',

³⁸ pero bití' guyaza ládxë'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bití'rö yöjénlenbi' légaquië' dxin queë' Xanru'.

³⁹ Bití' guca tuz xtídzä'gaquië' Bernabé, en Pablo ga bidxintë bulu'lá'alenë' tuë' ia'tué'. Bernabé guchë'ë-bi' bi'i Marcos, ate' gula'benë' tu lë'e barco, yöjáquië' luyú Chipre.

⁴⁰ Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'.

⁴¹ Gula'dödë' yugu' yödzö luyú Siria, en Cilicia, ate' bulu'tipë' ládxi'gaca bönachi queë' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xzí'ininu tu nigula judío réajlë'ënu Cristo, pero xúzibi' bití' náquië' judío.

² Yugu' bóchiru' nacu'ë Listra, en Iconio tunë' ba nalí queëbi', ta'nnë' runbi' le naca dxi'a.

³ Gú'unnë' Pablo tséajlenbi' bi'i ni lë', ate' gudélé'ë-bi', en guchúguië' lu xipëla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzö ni', tu' nöziguequinë' yúgu'të' xúzibi' biti' náquië' judío.

⁴ Cate' Pablo, en nupa dzágagaca lë' gula'dödë' gapa nacua' yödzö ni', tu tu yödzö na' bulu'dödë' lu ná'agaquië' yugu' bóchiru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni' lu ná'agaquië' para ilunë' ca rinná bë' xibá na'.

⁵ Caní guca, bönachi yúgu'të' cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla bëchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia.

⁷ Cate' bila'dxinë' luyú Misia, gulë'ënnë' tsójáquië' luyú Bitinia, pero Dios Bö' Lá'ayi, Nu risól-lë'ë Jesús queëru', biti' bë'ë légaquië' lataj.

⁸ Ní'irö gula'dödë' gala' ga dë Misia, ate' yójáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yösóalena'-në' Pablo.

⁹ Lu yödzö ni' Dios buluí'inë' Pablo tu le bilé'enë' lu yëla bëchigal. Tu bönni' Macedonia buluí'i lahuë' lë', zuinë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'."

¹⁰ Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudödítu' lírá ga bidxintu' yödzö Samotracia, ate' gudödi ia'tú dza bidxintu' yödzö Neápolis.

¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsólá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quégaquië'. Lu yödzö nisö guzóatu' nababa dza.

¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'.

¹⁴ Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë.

¹⁵ Ní'irö bidílanu lënu nisa, ate' gula'dila ca' nisa bönachi nacua' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zí'dë'ë dumí yugu' bönni' xanbi'.

¹⁷ Bi'i nigula ni' sudunóbi'-në' Pablo, en netu', ru'í'ibi' zidzaj didza', rnnabi':

—¡Yugu' bönni' ni tunë' xichinë' Dios nayëpisëtërë'! ¡Tu'siyönnë' libí'ili' naca gaca uláli'!

¹⁸ Caní benbi' zían dza. Cate' bíti'rö guyaza ládxe'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinnë' yá'abi, en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yë'ëyi.

²⁰ Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzö ni.

²¹ Tu'sëdinë' le cabí ral-la' si' lu ná'aru', en biti' ral-la' gunru', tu' nabábaru' Roma.

²² Ní'rö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guinë' légaquië' gubá'ayi.

²³ Gudödi gula'guindë'ë légaquië', gula'gu'ë légaquië' lidxi guié. Gula'nná bé'enë' bönni' rusayjë' lidxi guié na' gun chí'idë'ë légaquië'.

²⁴ Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guié na', en gulu'ë ní'agaquië' yeru yaga ta'zön ní'agaquië'.

²⁵ Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guié na'.

²⁶ Ní'irö tsárido'os gudödi budó' zxu' bach. Caní guca ga bidxintë guxzizi xilibi zö'ö lidxi guié na', ate' la' gula'yálatë yúgu'të gapa nu riyaza, ate' bulu'huédxí ca' yugu' du guié nága'gaca bönni' nadzúngaquië' ni'.

²⁷ Bubanë' bönni' na' rusayjë' lidxi guié. Cate' bilé'enë' nayáljagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'.

²⁸ Ní'irö Pablo zidzaj bulidzë' lë', gunné':

—¡Biti' bi gúni cuinu', tu' zóatu' ni yúgu'tëtu'!

²⁹ Ní'irö bönni' na' gunabë' guí', ate' gudá'atë' lu yu'u lidxi guié na'. Guxzíidë'ë lu yöl-la' radxi, ate' biyéchuë' xiní'agaquië' Pablo, en Silas.

³⁰ Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

³¹ Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

³² Gulu'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacua' lidxë'.

³³ La' ná'asö, ni' naca chí'i dzö'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'díla ca' nisa yúgu'të bönachi nacua' lidxë'.

³⁴ Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

³⁵ Cate' za' rení' dza na', yugu' bönni' yúlahui' gula'söl-lë'ë ni'a ná'agaquië', ate' gulë' bönni' na' rusayjë' lidxi guié:

—Busán-gáquië' bönni' na'.

³⁶ Ní'irö bönni' na' rusayjè' lidxi guié gudíxjöi'inè' Pablo didza' ni, gunnè':

—Gula'söl-lè'è bönni' yúlahui' didza' usana' libí'ili'. Na'a, guli'rúaj, en buli'huőaj dxí'ado' ga rizóali'.

³⁷ Ní'irö birúajè' Pablo, en gudxè' yugu' ni'a ná'agaquiè' bönni' yúlahui' na', gunnè':

—Chigula'guiné' netu' lógaca bönachi sal-la' biti' narúguini queétu' ca rinná bè' xibá, en gula'gu'è netu' lidxi guié, ate' netu' ni nabábatu' Roma. ¿Naru' tu'santsè' netu' bagáchi'sö? ¡Biti' ca' gaca! ¡lídigarè' légaquiè' udusángaquiè' netu'!

³⁸ Yöjhuőjgaquiè' ni'a ná'agaquiè' bönni' yúlahui' na', en bulu'siyönnè' yugu' bönni' yúlahui' didza' ni, ate' légaquiè' guládxinè' cate' bila'yönnè' nabábagasakiè' Pablo, en Silas Roma.

³⁹ Cate' bila'dxinè' lidxi guié ni', guláta'yue' lógaquiè' Pablo, en Silas cabí ulu'subáguè'è légaquiè' xíguia'. Ní'irö gula'béajè' légaquiè' lidxi guié na', en guláta'yue' lógaquiè' ulu'rúajè' yödzö na'.

⁴⁰ Ní'irö bila'rúajè' Pablo, en Silas lidxi guié na', ate' gula'yáziè' lídxinu Lidia. Cate' chibila'lé'enè' böchi'ru' nacu'è ni', bulu'chíziè' didza' icja ná'agaquiè', en la' bulu'zá'atè' ni'.

17

Yugu' bönachi Tesalónica tunè' dzatsa

¹ Gula'dödè' Pablo, en Silas lu yödzö Anfípolis, en lu yödzö Apolonia, ate' bila'dxinè' lu yödzö Tesalónica, ga ni' zoa tu yu'u ga tu'dubè' bönni' judío, en tu'sèdè' queè' Dios.

² Bugá'anè' Pablo ni' idú galaj dza, ate' ca run cazè', guyijè' ga zoa yu'u na' cate' naca dza lá'ayi quégaquiè' bönni' judío, ate' bè'lenè' légaquiè' didza'.

³ Buchila lá'anè', en buluí'inè' légaquiè' rusèdi le nazúaj lu guichi lá'ayi run bayudxi qui'i sáquè'è Cristo, Bönni' na' tunè' löza bönni' judío udusölè' légaquiè', ate' tödi gátiè' ubanè' lu yöl-la' guti. Ní'irö Pablo gudxè' légaquiè':

—¡Caní guca queè' bönni' na' lè' Jesús, runa' libán queè' ga ni zóali'! ¡Bönni' ni náquiè' Cristo!

⁴ Ní'irö bal-lè' gula'yéajlè'è Cristo, ate' gulunè' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquiè' Dios, gula'yéajlè'è Cristo. Lësca' zían nigula lo gula'yéajlè'ènu Cristo.

⁵ Ní'irö yugu' bönni' judío biti' ta'yéajlè'è, lu yöl-la' ruzxé'e quégaquiè' Pablo, bulu'tubè' yugu' bönni' biti' náca'gaquiè' tsahui', bönni' ta'dasè' ca'. Cate' chibulu'túbè' bönachi zían, gulunè' ga gulún dzatsa idú lu yödzö na', ate' bayudxi gula'yáziè' lidxè' Jasón para ulu'béajè' Pablo, en Silas lógaca bönachi na' tun dzatsa.

⁶ Cate' biti' bulu'dzölinè' Pablo, en Silas, gula'béajè' Jasón, en ia'zica'rè' böchi'ru' nacu'è ni', ate' gula'ché'è légaquiè' lógaquiè' bönni' yúlahui'. Gulu'è zidzaj didza', ta'nnè':

—Yugu' bönni' na' nutsá'gaquiè' bönachi iduté yödzölió chibila'dxinè' ca' ni.

⁷ Jasón ni gulu'è légaquiè' lidxè'. Yúgu'tè bönni' ni ta'dá'baguè'è xibá queè' César, bönni' rinná bé'enè' rè'u, ta'nnè': “Zoè' ia'tué' bönni' rinná bè'è, lè' Jesús.”

⁸ Cate' bila'yönnë' yugu' bönni' lu yödzo, en yugu' bönni' yúlalui' na' lë ni, gula'bö'ë böniga.

⁹ Ní'irö, gudödi gula'zi'ë bönni' yúlalui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquië'.

Le gulunë' Pablo, en Silas lu yödzo Berea

¹⁰ Ní'irö yugu' böchi'ru' ni' la' gula'sól-la'të' Pablo, en Silas, ni' naca chi'i dzö'ölö, ate' söjáquië' yödzo Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sedë' queë' Dios.

¹¹ Gulácarë' tsahui' bönni' ni ca bönni' nacu'ë Tesalónica, tu' gula'zì' lu ná'agaquië' xtídzë'ë Xanru' idú láchxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquiube'enë' channö nácate' lë na' rnnë' Pablo.

¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo.

¹³ Ní'irö cate' guléquiube'enë' bönni' judío nacu'ë Tesalónica, lësca' riguixjö'ë Pablo xtídzë'ë Dios lu yödzo Berea, yöjáquië' ni', en gulunë' ca' ni' ga gulún dzatsa bönachi zían.

¹⁴ Ní'irö yugu' böchi'ru' ni' la' gula'sól-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzo Berea.

¹⁵ Yugu' bönni' Berea na' gula'ché'ë Pablo lu yödzo Atenas. Ní'irö la' yöjhuöjgacaté' lu yödzo Berea, tu'ú'ë xtídzë'ë Pablo, para ilë' Silas, en bi'i Timoteo, tsójacaté' ga ni' zoë' Pablo.

Le benë' Pablo lu yödzo Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzo Atenas, ruhu'ini láchxë'ë tu' rilé'enë' ta'yéaj láchxi'gaca yúgu'të bönachi yödzo na' yugu' budó' guiöj budó' yaga.

¹⁷ Que lë ni na' bé'lenë' bönni' judío, en bönni' ta'yéaj láchxi'gaquië' Dios didza' ga naca lu yu'u ga tu'dubë' tu'sedë' queë' Dios. Yugu' dza bé'lenë' nupa ta'dá lu yë'ëyi didza' ca naca xtídzë'ë Cristo.

¹⁸ Bal-lë' bönni' dá'gaquië' le tu'sédinë' bönni' epicúreo, en le tu'sédinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi rë'ënitzenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán.

¹⁹ Ní'irö gula'guélë'ë në'ë Pablo, en gula'ché'ë lë' lu gu'á ga tu'dubë' tu'ë didza', nazí'i le Areópago, ta'nnë':

—¿Naru' huácatsö yönitü' didza' cubi ni rusiyömmu' netu'?

²⁰ Rusiyömmu' netu' le tun ga rubánitu'. Ré'ënitü' inözitu' bizxi rna didza' ni ru'u.

²¹ Biti'rö ta'yaza láchxi'gaquië' ilunë' bönni' Atenas na', en bönni' izá'a nacu'ë ni', pero ila'yónisinë', en iluí'së' didza' tu le cubi.

²² Ní'irö guzuiné' Pablo gatsaj láchxi'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj láchxi'da'ali' yugu' dios queë'li'.

²³ Cate' gudöda' lu yödzo, en buyúgaca' yugu' le reaj láchxi'li', yöjxáca'a ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj láchxi'li'-në' sal-la' biti' núnbë'ëli'-në', Dios ni runa' libán queë' loli'.

24 '¡Dios ni benë' yödzülió, en yúgu'të le nacua' yödzülió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi!

25 Biti' bi riyadzaj queë' le gaca ulu'nödzej bönachi, tu' runödzej' Lë cazë' quégaca yúgu'të bönachi yöl-la' na'bán, en yúgu'të le riquíniru'.

26 'Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzülió, en bulu'e dza ila'cuá', en gapa ral-la' ila'cuá'.

27 Dios bucu'ë légaquië' para ulu'guiljë' Lë, channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'.

28 Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili, nupa bulu'zúaj le do' rúl-lali', le ta'nná: "Di'a dza queë' Dios nácaru'."

29 Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiój budó' yaga, o tu le néquini oro, o plata, o guiój, le núngaca bönachi ca naca tu le ta'guínnajsö ícjaguequi.

30 Dios budödë' cá'asö yugu' le gulunë' lu yöl-la' biti' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idütë yödzülió ulu'bí'i ládxi'gaca.

31 Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

32 Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yöniguetu' ia'tú lë ni ru'u didza' que.

33 Ní'irö burúajë' Pablo gatsaj láchui'lö ga na' nacu'ë, söhuöjë'.

34 Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzü Corinto

1 Gudödi guca lë ni, buzë'ë Pablo yödzü Atenas na', ate' guyijë' yödzü Corinto.

2 Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzü Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzü Roma. Guyijë' Pablo ga nacu'ë Aquilo, en Priscila na'

3 tu' naca tuz dxin tunë' Aquilo, en Pablo. Bugá'analenë' légaquië', ate' tsözxön gulunë' dxin, tunë' yugu' yu'u guídido'.

4 Cate' nácacaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bé'lenë' légaquië' didza'. Gú'unnë' ulu'ínë' yugu' bönni' judío, en yugu' bönni' izá'a nacu'ë ni', naca idütë li le riguíxjö'ë ca naca queë' Jesucristo.

5 Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë zi'ë que, ní'irö Pablo gudxibë' lari' nácuë' para uluí'inë' légaquië' bití'rö nabáguë'ë lë' ni'a queégaquië', ate' gudxë' légaquië':

—La' cuínsili' nabága'li' xíguia' que yöl-la' guti queëli', calëga neda' nabága'a le. Na'a, uyija' ga nacuá' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sédë' queë' Dios.

⁸ Crispo, bönni' lo que yu'u ga na' tu'dubë' tu'sédë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacuá' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa.

⁹ Ní'irö Lë cazë' Xanru' gudxë' Pablo lu yëla bëchigal, gunné':

—Bití' gádxinu', en bití' su' dxisö, quíxjö'u xtídzá'a,

¹⁰ tu' zóalen caza' neda' li', ate' cuntú nu uzapa' në'e li' para guá' dö' quiu', tu' néquiquequi quia' bönachi zían lu yödzö ni.

¹¹ Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusörö'ë Galión na'.

¹³ Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídzá'li' ca ral-la' guna',

¹⁵ pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' libí'isili', tu' cabí rë'ënda' neda' gaca' nu uchi'a usörö yugu' le caní.

¹⁶ Ní'irö Galión bulágui'ë légaquië' lu yu'u yúlahui'.

¹⁷ Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sédë' queë' Dios, ate' gula'guínë' lë' lö'a yúlahui', pero bití' bë' l ádxë'ë Galión lë na' raza.

¹⁸ Pablo bugá'anë' lu yödzö na' zían dza, ate' gudödi busiyönnë' böchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo.

¹⁹ Cate' bila'dxinë' yödzö Éfeso, Pablo bulá'alënë' légaquië' ni'. Guyázië' lu yu'u ga tu'dubë' bönni' judío, en tu'sédë' queë' Dios, ate' bë'lenë' nupa nacuá' ni' didza'.

²⁰ Yugu' bönni' ni' gulá'tayüë' lahuë' Pablo ugá'analenë' légaquië' ia'lati' xidzé, pero lë' bití' gu'unnë'.

²¹ Bë'lenë' légaquië' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ënnë' Dios.

Ní'irö gurenë' Pablo tu lë'e barco, en buzë'ë Éfeso na'.

Ridxinë' Pablo Antioquia, ate' risí lahuë' röjenë' libán le bunni luzuí

22 Gudödi bidxinë' Pablo yödzo Cesarea, gurenë' guyijë' Jerusalén, ga ni yöjyüë' bönachi queë' Cristo, ate' ní'irö buzé'ë ni', en guyijë' Antioquia.

23 Gudödi zoë' ni' nababa dza, buzé'ë ni', sa'yéajë' tu tu yödzo luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzo Éfeso

24 Tu dza ni' bidxinë' Apolos, tu bönni' judío lu yödzo Éfeso. Guljë' bönni' ni lu yödzo Alejandria, en nabé'ede'enë' ru'ë didza', en nazédadë'ë le nazúaj lu guichi lá'ayi.

25 Chinazédë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan.

26 Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sédë' queë' Dios. Cate' Priscila, en Aquilo bila'yönnë' didza' ru'ë Apolos na', gula'ché'ë lë' quez, en bulu'zéajni'irönë' lë' xibá queë' Dios.

27 Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégaquië'.

28 Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzo Éfeso

1 Tsanni ni' zoë' Apolos lu yödzo Corinto, gudödë' Pablo gapa nacua' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

2 Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo? Gulé' lë':

—Biti' nayónitu' channö zoë' Dios Bö' Lá'ayi.

3 Ní'irö Pablo gunábinë' légaquië', rnnë':

—¿Nacxi guca le bidí'ali' nisa?

Ta'nnë':

—Ca buquílë' Juan bönachi nisa.

4 Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'télë' ca lë', ate' Bönni' ni naquië' Jesús, Lë' Cristo.

5 Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús.

6 Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios.

7 Guláquië' bönni' ni idú chínnuë'.

8 Guzóë' Pablo idú ca tsonna beo' ni', ate' guyazië' lu yu'u ga tu'dubë' bönni' judío, en tu'sédë' queë' Dios, ate' lu yöl-la' rugu ladxi' benë' libán

lógaquië'. Bě'leně' légaquië' didza', en gú'unně' ulu'íně' légaquië' nácatě le riguixjō'ě ca rinná bē'ě Dios.

⁹ Ní'irō bizídi icja lādxi'do'gaquië' bal-lě', en bití' gula'yéajlě'ě Cristo, ate' gula'nně' zí'ě que xtídzě'ě Xanru' ga nacua' bōnachi zían na'. Ní'irō Pablo bulá'aleně' légaquië', ate' bubéajě' quez nupa ta'yéajlě' Cristo. Bě'leně' bōnachi ni ta'yéajlě' Cristo didza' yugu' dza ga na' tu'dubě' lu yu'u ga rusédině' Tiranno bōnachi.

¹⁰ Caní béntica'sé' Pablo idú ca chopá iz, ate' caní guca, bila'yōni yúgu'tě bōnachi didza' ca naca queë' Xanru' Jesús, bōnachi nacua'ě yugu' yōdzō luyú Asia, bōnachi judío, en bōnachi izá'a.

¹¹ Dios beně' yugu' yōl-la' huáca zxōn lu nē'ě Pablo.

¹² Caní guca, bal-lě' bōnni' gula'zì'ě yugu' lári'do' bégue'ě icjě' Pablo, en yugu' lari'tsolá'a bugalě' lě'ě, ate' yōjuá'gaquië' léguequi gapa nacua' nupa te'ě, ate' bulu'huoáquië' ca naca yōdzōhuě' que queëgaquië', en bulu'rúaj bō' xihui' yú'ugaca bōnachi na'.

¹³ Ní'irō bal-lě' bōnni' judío udá dzaga tu'béajě' bō' xihui' gulě'enně' ulu'guně' dxin Lě' Xanru' Jesús para ulu'béajě' yugu' bō' xihui' yú'ugaca bōnachi, ta'nně':

—Ní'a que Lě' Jesús, Nu na' runě' libán que Pablo, rinná bé'etu' libí'ili' urúajli'.

¹⁴ Caní guluně' gadxi bōnni' zxí'ině' Esceva, tu bōnni' judío náquië' bōnni' lo lādjagaquië' bixúz unná bē'.

¹⁵ Bubí' didza' bō' xihui' na', gunná:

—Núnbē'a-ně' Jesús, en núnbe'eda' bōnni' lě' Pablo, pero libí'ili', ¿núzxitě libí'ili'?

¹⁶ Ní'irō guxítí'ě bōnni' na' yu'u lě' bō' xihui', yōjeně' légaquië' zì', en bucul-lě' yúgu'tě, tu' guzxéqui'rōně' ca légaquië'. Caní guca, xiguídigacasé', en huě'gacatězě' bulu'zxúnnajě' gadxě' bōnni' na' lu yu'u ni'.

¹⁷ Guzé didza' ca guca lě' ni, ate' bila'yōni yúgu'tě nupa nacua' lu yōdzō Éfeso, bōnachi judío, en bōnachi izá'a, ate' yúgu'tě' guládxině' Dios. Que lě' ni na' guluně' zxōn Lě' Xanru' Jesús.

¹⁸ Lěsca' bila' dxině' zían bōnni' ta'yéajlě'ě Cristo, en gula'xóalěpě' dul-la' nabága'gaquië', en gula'guixjō'ě le chiguluně'.

¹⁹ Lěsca' caní guluně' zían bōnni', zí'alō guluně' yōl-la' udzá'. Du-juá'agaquië' yugu' guichi udzá' quégaquië', ate' bulu'zégui'ě léguequi lógaca yúgu'tě bōnachi. Bulu'labě' tsca nazáca'gaca guichi na', le guca idú chi un mīl dumí plata.

²⁰ Caní guca, guzěda' xtídzě'ě Xanru', en bidéli'da' bōnachi zían. Idú lādxi'gaquië' gula'yéajlě'ě Cristo.

²¹ Gudōdi gulaca lě' ni, beně' queë' Pablo tsejě' Jerusalén, pero zí'alō ralla' tōdě' yugu' yōdzō luyú Macedonia, en luyú Acaya, ate' gunně':

—Tōdi tseja' Jerusalén, run bayudxi tseja' ca' Roma.

²² Ní'irō gusól-lě'ě-bi' chópabi' bi'í bōnni' tácalenbi' lě', légcabi' Timoteo, en Erasto, luyú Macedonia, pero bugá'aně' lě' nababa dza luyú Asia na'.

Tu'tsatsa bōnachi lu yōdzō Éfeso

²³ Bulu'tsatsa bōnachi Éfeso dza ni', ate' gula'dá'baguě'ě xtídzě'ě Xanru'.

²⁴ Beně' Demetrio, bōnni' gubědxi guíě plata ga bulu'tsatsě'. Run cazě' yugu' lidxi budó' guíōj budó' yaga néquiquequini plata que dios quégaquië', lěnu Diana. Gula'zì'ě bōnni' tuně' dxin ni dumí bach.

25 Butubë' Demetrio na' ia'z'íca'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'.

26 Ril'éli', en riyónili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': “Yúgu le núngaca bönachi biti' nácagaca dios.”

27 Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi idútë luyú Asia, enca' idútë yödzölió.

28 Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, dios queëru' rë'u, bönachi Éfeso.

29 Caní guca, bulu'tsatsa bönachi idútë lu yödzö na', ate' guláquië' tuz, en carelö yójáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'.

30 Cate' gú'unnë' Pablo tsazië' ga nacua' bönachi zían na', biti' ca' gulu'ë lë' lataj bönni' ta'yéajlë'ë Cristo.

31 Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'sól-lë'ë queë' nupa guláta'yu lahuë' biti' tsazië' lö'a yúlahui' na'.

32 Ga ni' tu'tsatsë', en ta'bödxi'ë, tu le ta'nnë' bal-lë', en ia'tú le ta'nnë' ia'z'íca'rë', tu' rö'ögacasë' baröli bönni' zían na' tu'tsatsë', en lá'tu'biqui' yúgu'tëgaquië' biti' nözguequinë' bizx que na' nudúbigaquië' ni'.

33 Ní'irö yugu' bönni' judío gula'béajë' Alejandro ladaj bönachi zían na', ate' bulu'dxíguë'ë lë' lógaca bönachi zían na'. Bulu'e Alejandro na' len në'ë para ila'bö' dxisö, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi.

34 Cate' guléquië'benë' náquië' judío, yúgu'të' gulu'ë tsözxön zidzaj didza' idú ca chopa hora, ta'nnë':

—¡Nácatërönu zxön Diana, dios queëru' rë'u bönachi Éfeso!

35 Ní'irö bönni' uzúaj que yúlahui' benë' ga gula'bö' dxisö bönachi zían na', gunné':

—Bönni' Éfeso, nözigaca yúgu'të bönachi zoa yudo' queënu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba.

36 Cuntu nu gaca tá'baga' lë ni. Que lë ni na' run bayudxi sóali' dxisö, en biti' bi gúntëzili'.

37 Naché'gacali'-në' bönni' ni, en biti' ta'banë' le dzö'ö yudo', en biti' ta'nnë' xihuë'ë queënu dios queéli'.

38 Que lë ni na', channö zoa didza' bizxaj quégaquië' Demetrio, en yugu' bönni' gubëdxi guíë plata nacua'lenë' lë', len núti'tës bönni', dë lataj ga nu uzë nagui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tuë' ia'tué'.

39 Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'.

40 Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

⁴¹ Cate' budxi bë'ë didza' ni, busöl-lë'ë bönachi zián na' nudúbigaca ni' tsöhuöjgaca lídxiguequi.

20

Sa'yéajë' Pablo luyú Macedonia, en luyú Grecia

¹ Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchizië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia.

² Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya.

³ Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bó' nísie' bönni' judío lë' para ila'zönë' lë'. Que lë ni na' buguélé'ë nöza söhuöjë' luyú Macedonia, ate' bidxinë' yödzö Filipos.

⁴ Sópater, xzí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxón lë'.

⁵ Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'.

⁶ Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

Le benë' Pablo lu yödzö Troas

⁷ Dza risí lo le gadxi dza bulu'dübë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusédinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë' gudödi guluhuëla.

⁸ Ga ni' nudúbigaquië' naca lu yu'u xitsá', ate' nacuá' zián le ta'gú'u bení' ga na'.

⁹ Zóabi' bi'i Eutico ni', rő'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rő'öbi' rásibi' bi'i na' naca ga bunni' cuía lu yu'u, ate' rásisibi' ca' gubixitëbi', böxjabi' ga bidxintëbi' zcan yu'u. Nátitëbi' bulu'lisë'-bi'.

¹⁰ Bötjë' Pablo zcan yu'u na', ate' yöjxóë' läbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

¹¹ Cate' chibubenë' Pablo xitsá', gudélé'ë yöta xtila, gudahuë'. Ní'irö Pablo bë'lenë' légaquië' didza' ga bidxintë zila balö. Gudödi ni' burúajë' ni'.

¹² Bi'i bönni' ra'bán na' gubíxibi', bulu'chë'ë-bi' nabanbi', en bulu'zí' zxöndë'ë.

Ca guca bidxintu' Mileto

¹³ Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzö Asón para tsöjtságatu'-në' Pablo ni', para gaca ca na' chibén xtíza'tu', tu' gú'unnë' Pablo tsejë' ni' së'esi ni'ë.

¹⁴ Cate' chibudzágatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mítilene.

15 Buzá' barco ni', ate' dza buropi bidxintu' tódi li ga zoa luyú bidxi nazí'i le Quío, ate' ia'tú dza ca' gudóditu' tódi li ga dë yódzö Samos, en bidxintu' yódzö Trogilio ga ni' guzóatu' tu chi'i. Ia'tú dza ca' bidxintu' yódzö Mileto.

16 Caní bentu' tu' chibenë' queë' Pablo tódisë' yódzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

Didza' bë'ë Pablo lu yódzö Mileto

17 Cate' ni' zoë' Pablo lu yódzö Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso.

18 Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia.

19 Yugu' dza bena' xichinë' Xanru' lu yöl-la' nōxaj ladxi', ga bidxintë gurōdxa' ni'a queëli', ate' zían le guca quia' le guzxí' bë' neda' ni'a que le ruá' dō' gulunë' quia' bönachi judío biti' ta'yéajlë' Cristo.

20 Béntica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lúdxili'.

21 Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo.

22 Na'a, Dios Bö' Lá'ayi chinunë' quia' tseja' Jerusalén, en biti' nōzda' bizxi gaca quia' ni'.

23 Yúgu'të yódzö ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guíë bönni' judío biti' ta'yéajlë', en ulu'saca' zi'ë neda'.

24 Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxe'ë Dios queéru'. Caní guna' len yöl-la' rudzeja.

25 Na'a, yúgu'tëli' na' chibena' libán loli' ca rinná bë'ë Dios, nōzda' bítrō ulé'eli' neda'.

26 Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'.

27 Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios.

28 Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'.

29 Chinōzda', tōdi uzá'a ga zóali', ila'yaza nupa ilë'ëni ulu'suniti bönachi queë' Cristo ga zóali', ilunë' ca tunba' bö'cu' gu'a sínia', tu'sunitiba' yugu' bö'cu' zxila'.

30 Ila'ruájë' bönni' nútsa'gaquië' ládjali', ate' ilu'ë didza' biti' nácatë para ulu'béajë' quégacase' nupa ta'yéajlë' Cristo nútsa'gaca ládjali'.

31 Que lë ni na', guli'sóa ban ladxi', en guli'tsōjnë' ca bena' neda' idú ca tsonna iz, rëla, en tē dza buchízia' icja nágali' tu tuli' ga bidxintë gurōdxa' queëli'.

32 Na'a, böchi' luzá'ado', rigu'a libí'ili' lu nē'ë Dios. Rinábida' Lë' uzá' ládxe'ë queëli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsōzxön yugu' bönni' rō queë'.

³³ Catu caz guzë ládxa'a le nequi quégaquië' böchi' luzá'a. Biti' guzë ládxa'a dumí, o lari' quégaquië'.

³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'.

³⁵ Ca naca yúgu'të le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunnë: "Uzí'irö xibé nu bi runödzej ca nu bi rizi'."

³⁶ Cate' budxi bë'ë Pablo didza' ni, buzóa zxibë', ate' benë' tsözxön yúgu'të', bulu'lidzë' Dios.

³⁷ Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'.

³⁸ Caní gulunë' tu' bulu'huí'innë' ni'a que didza' na' bë'ë Pablo, gunnë: "Bíti'rö ulé'eli' neda'." Yójacalenë' tsözxön lë' ga na' gurenë' lu barco.

21

Sa'yéajë' Pablo Jerusalén

¹ Gudödi bulá'alentu' légaquië', guyú'utë nōza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzo Pátara.

² Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nōza.

³ Gudöditu' ga nalá' Chipre, le guta' tsólá'a yögöla, ate' guyéajtu' luyú Siria, ga ni' guyaza barco na' lu yödzo Tiro, tu' ral-la' tsöjca'ana yua' ni' le dzö'ö lë'e barco na'.

⁴ Lu yödzo Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén.

⁵ Cate' chibizá'a dza na', burúajtu' ni', ate' gula'zá'lenë' netu' tsözxön yúgu'të' len nigula que queégaquië', en yugu' bi'i quégaquië', ga bidxintë'tu' ní'ilö ra' yödzo na'. Ra' nísado' ni' buzóa zxibitu', en bulidztu'në' Dios.

⁶ Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

⁷ Buzá'atë barco na' lu yödzo Tiro, ate' ga yöjsé bidxín lu yödzo Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza.

⁸ Cate' za' rení' ia'tú dza, burúajë' Pablo ni', ate' dzágatu'-në' netu' guyéajtu' yödzo Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítsë'ë gadxë' bönni' ni' bulu'cu'ë dza ni'te para ilácalenë' bönachi queë' Cristo.

⁹ Nacuá'abi' tapa bi'i nigula ra'bán queë' Felipe na', tuí'ibi' didza' uláz queë' Dios.

¹⁰ Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea.

¹¹ Bönni' ni buduyüë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunnë':

—Caní rnnë' Dios Bö' Lá'ayi: "Caní ilunë' bönni' judío nacu'ë Jerusalén. Ilúguie' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a."

12 Cate' biyõnitu' didza' ni, gúta'yutu' lahuë' Pablo, netu', en nupa nacua' ni', para cabí tsejë' Jerusalén.

13 Bubi'ë didza' Pablo, gunnë':

—¿Bizxi ni runli', ribõdxili', en rusuhuí'inili' neda'? Neda' chizóa caza' sina', calégasó ilúguie' neda', pero gátia' ca' lu yõdzó Jerusalén ni'a queë' Xanru' Jesús.

14 Tu' cabí guzxequi'tu'-në' didza', bíti'rõ bi gúdxitu'-në', ate' gunnatu':

—Gaca ca raza ládxë'ë Xanru'.

15 Cate' chigula'dõdi dza na', bupa'atu' queëtu', ate' guyéajtu' Jerusalén.

16 Gula'zá'lenë' netu' bal-lë' bõnni' ta'yéajlë'ë Cristo, nacu'ë Cesarea, ate' dzáguie' Mnasón, tu bõnni' Chipre, légaquie'. Réajlë'ë Cristo dza ni'te, ate' ral-la' tsõjgá'anatu' lidxë' bõnni' ni.

Pablo röjyüë' Jacobo

17 Cate' bidxintu' Jerusalén, len yõl-la' rudzeja quégaquie' böchi'ru' ni' ta'yéajlë'ë Cristo gulunë' netu' bal.

18 Dza buropi na' Pablo guyázalenë' netu' lu yu'u, yõjyutu'-në' Jacobo, ate' nudúbigaquie' ni' yúgu'të bõnni' gula tapa chi'ë bõnachi queë' Cristo nacu'ë Jerusalén.

19 Cate' Pablo chibugapë' légaquie' Dios, busiyõnnë' légaquie' yúgu'të le benë' Dios lu në'ë lë' ga nacua' bõnachi izá'a.

20 Cate' bila'yõnnë' lë ni, gula'gu'ë Dios yõl-la' ba. Ní'irõ gulë' Pablo:

—Nöz quézinu', böchi'tu', cate' xõ zían gáyu'ë bõnni' judío ta'yéajlë'ë Cristo, ate' yúgu'të' túndë'ë bal xibá queë' Moisés.

21 Chibila'yõnnë' yugu' le tu'í didza' bõnachi le ta'nnë quiu', ta'nná rigú'u yõl-lu'u yúgu'të bõnni' judío nútsa'gaquie' ladaj bõnachi izá'a, para ulu'cá'anë' le gunná bë'ë Moisés, en rinná bé'enu' légaquie' bití' ila'chúguie' lu xpéla'gacabi' bi'i bõnni'do' quégaquie', en bití' ilunë' bal yugu' le nalëbiru' runru' rë'u, bõnachi judío.

22 ¿Nacxi caz gunru' na'a? Ulu'rúaj bõnachi zían cate' ila'yõni chibidxínu' ni.

23 Na'a, ben lë ni rëtu' li'. Nacuá'lenë' netu' ni tapë' bõnni', chinazí' lu ná'agaquie' lahuë' Dios tu le ilunë'.

24 Guchë'ë yugu' bõnni' ni, en ben légaquie' tsõzxõn gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusõ ícjagaquie'. Ní'irõ ila'nõzinë' yúgu'të bõnni' judío bití' nácatë lë na' ta'nnë' quiu', pero lësca' li' runu' le naca dxi'a, en runu' ca rinná bë' xibá queë' Moisés.

25 Ca naca quégaca bõnachi izá'a, nupa ni' chita'yéajlë' Cristo, chibén xtídzá'tu', en buzúajtu' lu guichi ca ral-la' ilunë'. Bití' run bayudxi ilún chi'ë yugu' lë ni tunë' bõnni' judío, pero tuz:

Bití' ilahuë' le ta'gú'u bõnachi lógaca budó' guiõj budó' yaga.

Bití' ilahuë' rön.

Bití' ilahuë' xipéla'gacaba' böa' guixi' bití' narúaj-gácaba' rön.

Bití' ilunë' le ruá' dö'.

Ta'zõnë' Pablo lö'a yudo'

26 Ní'irõ Pablo guchë'ë queë' tapë' bõnni' na', ate' dza buropi ni' ben dxi'a cuinë' tsõzxõn len légaquie' ca naca que yudo'. Ní'irõ guyázië' lö'a yudo', para gaca bë' bizxi dza údxi ilunë' le tu'ún dxi'a cuíngaquie', dza ni' ral-la' tsõjuá'agaquie' le ila'gu'ë lahuë' Dios que quégaquie'.

²⁷ Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' ló'a yudo'. Gulunë' ga gulún dzatsa bönachi zián, ate' gula'zönë' Pablo.

²⁸ Gulu'ë zidzaj didza', ta'nnë':

—¡Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

²⁹ Caní gula'nnë' tu' bila'lé'enë' Pablo zí'aló lu yödzö dzáguie' Tróximo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'të bönachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' ló'a yudo', ate' la' bulu'sáyjatë' ga nu riyaza ló'a yudo' na'.

³¹ Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' rójáquië' gudil-la. Biyönnë' tun dzatsa yúgu'të bönachi Jerusalén.

³² Bönni' lo ni la' butúbitë' bönni' rójáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' rójáquië' gudil-la, en bönni' na' rójáquië' gudil-la, bulu'sané' ta'guinë' Pablo.

³³ Ní'irö gubíguie' bönni' lo na', en guzxönë' Pablo, ate' gunná bé'enë' bönni' rójáquië' gudil-la ilúguie' lë' len chopá du guie'. Gudódi ni' gunábinë' bönachi zián ni', rnnë':

—¿Nuzxi caz bönni' ni, en bizxi benë'?

³⁴ Ta'bódxí'a bönachi zián na', que queëgaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' rójáquië' gudil-la ila'ché'ë Pablo lu yu'u zxön ga nagá'anagaquië' bönni' na' rójáquië' gudil-la.

³⁵ Cate' bila'dxinë' ga naca ni'yëpi' que yu'u zxön na', bönni' na' rójáquië' gudil-la gulu'ínë' Pablo, tu' dxíadi'igaca bönachi zián légaquië',

³⁶ en zá'gaca cúdzulögaquië', ta'bódxí'a, ta'nná:

—Gulí'gútië'.

Didza' bé'ë Pablo uláz queë' lógaca bönachi

³⁷ Cate' ni' gula'sí lógachië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' rójáquië' gudil-la, gunné':

—¿Naru' gunnu' neda' lataj guía' lí' tu didza'?

Bönni' lo na' gudxë' Pablo:

—¿Rácatso' didza' griego?

³⁸ ¿Naru' calëga lí' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bé'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zián ni'. Cate' chigula'cu'ë dxisö, Pablo bé'lenë' légaquië' didza' lu didza' hebreo.

22

¹ Caní gunné' Pablo:

—Libí'ili', bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzo Tarso luyú Cilicia, pero guzxöna' lu yödzo ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a.

⁴ Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxöngaca'-në', en gulú'ugaca'-në' lidxi guié', yugu' bönni', en nigula.

⁵ Lésca' huáca ilunë' ba nalí yugu' bixúz unná bë', en yugu' bönni' gula tu'zëajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzo Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

Rigu'xjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúzxiba, le buzení' ga na' sa'yéaja'.

⁷ La' yöjta'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?"

⁸ Ní'irö gunábida' lë', gunniá': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u."

⁹ Nupa ni' gula'cuá'len neda' bila'lë'e caz bení' na', en guladxi, pero biti' bila'yöni chi'i Nu na' bulidza neda'.

¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'."

¹¹ Tu' cabirö rilé'eda' tu' budí'i yösa bení' na' guyépida' lahua', que lë ni na' yugu' bönni' dzágagaquië' neda' gula'guélé'ë na'a, ate' gula'ché'ë neda' ga bidxíntea' Damasco.

¹² Zoë' Ananías ni', tu bönni' runë' iduté ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal.

¹³ Bidxinë' Ananías na' ga zoa', en gudxë' neda': "Saulo, böcha'a, huóalaj guiöj lo'." La' ní'isö böóalaj guiöj lahua', ate' bilé'eda' lë'.

¹⁴ Lë' gudxë' neda': "Dios quégaquië' xuz xtó'oru', dza ni'te gurö cazë' li' para inózinu' le rë'ëni quézinë' Lë', en ilé'enu'-në' Bönni' Tshui', Lë' cazë' Zxi'inë', en yönnu' le guié' Lë' cazë' li'.

¹⁵ Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyönninu'.

¹⁶ Na'a, ¿bizx que ridzenu'? ¡Guyasa, en bidila nisa! Bulidzë' Xanru' para ünë' li' dxi'a, en ugüë' dul-la' nabágu'u."

Cristo gusöl-lë'ë Pablo para gunë' libán lógaca bönachi izá'a

¹⁷ Gunnë' ca' Pablo:

—Gudódi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla béchigal.

¹⁸ Bilé'eda'-në' Xanru', ate' gudxë' neda': "¡Guyéaj carelô! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!"

¹⁹ Neda' gudxa'-në': "Xan, nõzgaca quëzinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío queë' Dios. Gudina' nupa ni' ta'yéajlë' Li', en gulub'ugaca'-në' lidxi guië'.

²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guiöj."

²¹ Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

Pablo ru'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bí'ti'rö ral-la' soë' ibanë'!

²³ Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös,

²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácate, para ila'nözinë' bizx que na' ta'bödxi'ë bönni' judío caní queë' Pablo.

²⁵ Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë' lataj quínili' neda'? Nababa' Roma, ate' cuntu nu buchi'a busóró neda' channö nabága'a xíguia'.

²⁶ Cate' bönni' na' biyönnë' lë' ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

²⁷ Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë' ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunózinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söröë'

³⁰ Dza buropi ni', gú'unnë' bönni' lo na' inózinë' gazxi ga rë' bizxi na' yugu' bönni' judío tu'zëguië' Pablo didza'. Gunná bë'ë bulu'sedxë' du guië' na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzöë' lë' lógaquië'.

23

¹ Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë' na'a riböza' dxí'ado'. Caní naca, biti' zoa le ruxósa ládxi'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë.

³ Pablo gudxë' lë':

—Lëzca' caní Dios ubi'ë quiu', li', rulu'isö tsahui' cuinu'. ¿Naru' röö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacuá' ni' tē Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'e bönachi uládz quiu'”, pero neda' bití' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxí'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila' rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžë'ë la' légacasë'.

⁸ Caní gulunë' tu' ta'nnë' bönni' saduceo na' bití' ulu'bán nupa chinátigaca, en bití' nacu'ë gubáz lá'ayi, en bití' nacuá' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë ni.

⁹ Que lë ni na' gula'bödxi'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídžë'ë, ta'nnë':

—Rusáca'tu' queëtu' bití' bi dö' nu'ë bönni' ni. Channö tu bö' naca caz bönachi bë'len lë' didza', o channö tu gubáz lá'ayi queë' Dios bë'lenë' lë' didza', bití' ral-la' tá'baga'ru'-në' Dios.

¹⁰ Cate' chita'dil-lada' dídžë'ë bönni' judío na', gúdxinë' bönni' lo na' rinná bé'enë' bönni' rójáquië' gudil-la, tu' réquinë' ulu'zxuzxaj ulu'quínnajë' Pablo. Ní'irö gunná bé'enë' bönni' rójáquië' gudil-la tsöjléajgaquië' Pablo ladaj bönni' judío na', en ulu'chë'ë lë' lu yu'u' zxön ga na' nagá'anagaquië' bönni' na' rójáquië' gudil-la.

¹¹ Cate' chinaca chi'i dzö'ölö la' dza ná'asö, buluí'i lahuë' Xanru' ga zoë' Pablo, en gudxë' lë':

—Butipa ládxi'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödžö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' bití' ca' ilë'aj ilahuë' ga idxinrö chigulútië' Pablo.

¹³ Nayanrö ca choá'gaquië' bönni' na' gulún tsutsu xtídza'gaquië' caní.

¹⁴ Yójáquië' bönni' ni ga nacu'ë yugu' bixúz unná bë', en bönni' gula tu'zėjni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Bití' guí'aj gágutu' ga gútirötu'-në' Pablo.

¹⁵ Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' rójáquië' gudil-la idichë'ë Pablo cuxö para idxinë' ga nudúbili', innalí' rë'ënili' inábili'-në' Pablo tu' didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

¹⁶ Biyönibi' bi'i bönni' queënu nigula zanë' Pablo ca na' ila'bõ' nísie' Pablo, ate' guyéajbi', en guyú'ubi' yu'u zxon na', ate' yõtíxjöi'ibi'-në' Pablo.

¹⁷ Pablo bulidzë' tuë' bönni' nacu'ë lu në'ë bönni' rójáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irõ bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guié, neda', en gúta'yuë' lahua' idigu'a-bi' bi'i ni lo', tu' ré'ëni'bi' gú'ílenbi' li' didza'.

¹⁹ Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxõ, para idxinë' lógaquië' bönni' yudo' tu'chi'a tu'sörõë'. Ilë' li' té'ënnë' ila'nábinë' lë' tu didza' gate ga rë',

²¹ pero biti' tséajlë'u le ila'nnë' tu' nadödi choá'gaquië' ila'bõ' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channõ cabi ilútië' lë'. Biti' bi ilë'aj ilahuë' ga idxinrõ ilútië' lë'. Chizóagaquië' ta'bözë' si' lu no'o gunu' le ila'nábinë' li'.

²² Ní'irõ bönni' lo na' rinná bé'enë' bönni' rójáquië' gudil-la gunná bé'enë'-bi' cuntu nu guiëbi' lë' na' chigúdxibi' lë', ate' ní'irõ busöl-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

²³ Ní'irõ bönni' lo na' bulidzë' chopë' bönni' nacu'ë tu gáyu'ë bönni' rójáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rójáquië' gudil-la ta'zë'e ná'agaquië', en tsónnalalaj yu' chië' bönni' rójáquië' gudil-la dxíagaquië' böa', en chopa gáyu'ë bönni' rójáquië' gudil-la ilu'ë yaga tuchi' para tsójáquië' yödzo Cesarea idú ridödi xtsö'.

²⁴ Lësca' gunná bé'enë' légaquië' ulu'cözë'-ba' tu böa' cuië'-ba' Pablo, ate' ila'chë'ë lë' dxí'ado', cabi bi gaca queë', para idxinë' lahuë' Félix, bönni' lo rinná bë'ë uláz que Roma.

²⁵ Gusöl-lë'ë ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

²⁷ 'Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rójáquië' gudil-la, en busölá'-në' lu ná'agaquië' judío na'.

²⁸ Gú'unida' inözda' bizxi benë', lë' na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'sörõë' légaquië'.

²⁹ Cate' buédxí didza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guié.

³⁰ Ní'irõ cate' bidxín nu gudíxjöi'i neda' ta'bõ' nísie' yugu' bönni' judío lë', la' gusöl-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápaqaquië' lë'. ¡Dios gun tsáhuë'ë li'!”

³¹ Ní'irö bönni' na' röjáquië' gudil-la gula'guélé'ë Pablo, en gulunë' ca na' chigunná bé'enë' légaquië', ate' gula'ché'ë lé' yödzo Antípatris, ni' naca chi'i dzö'ölö.

³² Cate' za' reni' ia'tú dza bönni' röjáquië' gudil-la ta'zë'e ní'agaquië' yöjhuöjgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo.

³³ Cate' bönni' na' röjáquië' gudil-la naché'gaquië' Pablo bila'dxinë' Cesarea, bulu'nödzejë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'.

³⁴ Gudödi bulabë' bönni' unná bë' guichi na', gunábinë' Pablo gazxi bönni' lé'. Cate' gúquibe'enë' nababë' luyú Cilicia,

³⁵ gudxë' lé':

—Yönida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lé' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

24

Pablo ru'ë didza' uláz queë' lahuë' Félix

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lé' bal-lé' bönni' gula tu'zéajni'inë', en Tértulo, tu bönni' nazé'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo.

² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lé' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tshahi' netu', ate' lu yöl-la' réajni'i quiu' rinná bé'enu' dxi'a bönachi uládz queëtu'.

³ Yúgu'të lé' ni ruzí'tica'stu' xibé gátitës, ate' idú ládxi'tu' rétu' li': "Xclenu'."

⁴ Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guiétu' li'.

⁵ Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë iduté yödzülió, en náquië' bönni' lo quégaquië' bönni' dá'gaquië' bönni' Nazaret na'.

⁶ Lësca' gú'unnë' gun dí'tjanë' yudo' queëtu'. Que lé' ni na' guzxöntu'-në', en gú'unitu' uchi'a usörötu' lé' ca naca xibá queëtu'.

⁷ Ní'irö Lisias, bönni' lo rinná bé'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'.

⁸ Ní'irö gunná bé'enë' Lisias na' ídigaca nupa tu'zegui lé' didza' lo' li'. Na'a, li' caz, cate' rinabi yúdxinu'-në' Pablo ní, huáca inözinu' gate ga rë' yúgu'të lé' ni ruzéguitu' lé' didza'.

⁹ Lësca' caní gula'nnë' yugu' bönni' judío ni', gula'nnë' naca caz caní.

¹⁰ Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lé' bubi'ë didza', gunné':

—Idú ládxa'a quíxjö'a ca naca le runa', tu' chinaca zían iz ruchi'a rusöröu' le raca quégaca bönachi ladztu'.

¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios.

¹² Biti' yöjxáca'gaquië' neda' nu ridíl-lalena' didza', en biti' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sedë' queë' Dios, en cabí lu yödzo.

¹³ Biti' ca' gaca ulu'béaj lië' yugu' lë ni tu'zéguië' neda' didza'.

¹⁴ Lë ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sédinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios.

¹⁵ Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi biti' nácagaca tsahui'.

¹⁶ Que lë ni na' ru'í ládxi'tica'sa' cabí ibága'a le gun ga uxós ládxi'da'ahua' neda' lahuë' Dios o lógaca bönachi.

¹⁷ 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigu'a lahuë' Dios.

¹⁸ Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zián, en cabí nuna' ga ulu'tsatsa bönachi.

¹⁹ Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápaqaquië' neda' didza'.

²⁰ Ila'nnaatsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröë' légaquië'.

²¹ Tuz cate' ni' zoa' lógaquië', bë'a zidzaj didza', gunná'a: "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxí'ado' chinözinë' ca naca que lë na' rusédinë' Pablo, buzë láchui'së' ca' didza' bizxaj ni, gunné':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yónida' ca naca didza' bizxaj queëli'.

²³ Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo.

²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

²⁶ Lësca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zián luzuí bulidzë' Pablo, en bë'lenë' lë' didza'.

²⁷ Cate' bizá'a chopa iz guyazië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guié.

25

Ridxinë' Pablo lahuë' Festo, bönni' unná bë'

¹ Bidxinë' Festo yödzö Cesarea para tsazië' xilatjë', gáquië' bönni' unná bë' ulaz que Roma. Cate' bizá'a tsonna dza buzë'ë yödzö na', sa'yéajë' Jerusalén.

² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo

³ bi uzá' ládxë'ë quégaquië', isól-lë'ë nupa tsöjxí'gaca Pablo, para udxinë' Jerusalén. Gulë'ënnë' ila'bö' nísíë' lë' la' nöza para ilútië' lë'.

⁴ Bubi'ë didza' Festo, gudxë' légaquië':

—Lu yödzo Cesarea nadzunë' Pablo, ate' ral-la' tseja' ni' cuxó huidzaj nisö.

⁵ Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bé'enë' nupa tsöjxí'gaca Pablo.

⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'.

⁸ Ní'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo guné' le ila'yaza ládxí'gaquië' bönni' judío, ate' bubí'ë didza', gudxë' Pablo:

—¿Ré'ënu' so'o Jerusalén, ga na' soa nu uchi'a usörö li' ca nácagaca lë ni ta'nnë' quiu'?

¹⁰ Bubi'ë didza' Pablo, gudxë' lë':

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usörö'u neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni.

¹¹ La'tu' nuna' tu le ruá' dö', o bítí'tës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntú caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a uró quia'.

¹² Cate' Festo chibé'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

¹³ Gudödi chopa tsonna dza, bidxinë' Agripa, bönni' rinná bë'ë lu yödzo Cesarea, dzáganu Berenice lë', duyúgaquië' Festo.

¹⁴ Cate' chigula'cu'ë ni' zían dza, Festo bulu'ínë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guié'.

¹⁵ Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'.

¹⁶ Neda' bubí'a didza', gudxa' légaquië' biti' nalébiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nnë' queë'.

¹⁷ Que lë ni na', cate' bila'dxinë' légaquië' ni, biti' ca' gudzedá', pero cate' guzá' gyeani' ia'tú dza gurö'a ga ruchi'a rusöröa', ate' gunná bé'eda' nupa yöjxí'gaca bönni' ni.

¹⁸ Cate' gula'cu'ë ni bönni' na' tu'zéguië' lë' didza', biti' bi gula'nnë' queë' ca busaca' quia' ila'nnë'.

¹⁹ Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö.

²⁰ Tu' buchíxida' ca nácacaga lë ni, gunábida'-në' Pablo channö rë'ënë' tsejë' Jerusalén, ga ni' soa nu uchi'a usörö lë' ca nácacaga lë ni.

²¹ Ní'irö cate' gunabë' Pablo tsejë' lahuë' Augusto César para uchi'a usöröë' lë' ni, gunná bé'eda' bönni' röjáquië' gudil-la ilún chí'igarë' lë' cate' gála'rö dza isól-la'a-në' lahuë' César.

²² Ní'irö Agripa gudxë' Festo na':

—Lëzca' neda' rë'ënda' yónida' le innë' bönni' na'.

Festo gudxë' lë':

—Cuxó yönnu' le innë'.

²³ Cate' za' rení' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sól-lë'ë nupa tsöjxí'gaca Pablo.

²⁴ Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, të' neda' ral-la' gátië'.

²⁵ Runi neda' biti' bi benë' le nabáguë'ë xíguia' gátië', pero tu' gunabë' lë cazë' tsejë' ga uchi'a usöröë' Augusto César lë', que lë ni na' chinuna' quia' isól-la'a-në' lahuë' Augusto.

²⁶ Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu në'ë César, xana', que lë ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni.

²⁷ Réquida' biti' naca dxi'a isól-la'a-në' nu bönni' náguë'ë ni' channö cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusi lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'.

³ Raza ládxi'ra' tu' núnbë'u yúgu'të le nalëbiguequinë' tunë' bönni' judío, enca' yugu' lë ni ridíl-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacuá' bönachi uládz quia', enca' lu yödzö Jerusalén.

⁵ Nözguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tuí'i ládxi'gacarë' ila'yéaj ládxi'gaquië' Dios ca tunë' ia'zica'rë' bönni' judío.

⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxí' lu në'ë lógaquië' xuz xtó'otu'.

⁷ Tunë' löza yugu' bönni' idxinnu có' di'a dza queëtu' ila'déli'në' lë na' guzxí' lu në'ë Dios. Que lë ni na' ta'yéaj ládxi'gaquië' Dios, en tunë'

xichinë' rëla, en të dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bë', Agripa.

⁸ Na'a, ¿naru' réquitseli' libí'ili' bití' naca le tséajlë'ëru', usubanë' Dios bönni' nati?

Pablo gudxía ládxe'ë bönachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret.

¹⁰ Caní bena' lu yödzö Jerusalén. Gulu'a zían bönachi ta'yéajlë' Jesús lidxi guië, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' bönachi ni', bënlena' légaquië' tuz didza'.

¹¹ Zían luzuí busaca' zi'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládxa'a légaquië' ga bidxintë' guyija' gapa nacuá' yödzö zítu' para tsöjxöngaca'-në'.

Rigúxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'.

¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení lúzxiba le buzení'rö ca gubidza. Buzení' ga na' zoa', en ga nacuá' nupa söjácálen neda'.

¹⁴ Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bízx que ribía ládxi'u neda'? Run zí' cuinu', ridá'bagu'u neda'. Raca quiu' ca raca queéba' bëdxi, run zí' cuinba', richégu'ba' yaga tuchi' le túndë'ë-ba' zí'."

¹⁵ Ní'irö gudxa'-në': "¿Nuzxi lí, Xan?" Xanru' gudxë' neda': "Neda' ni Jesús, Nu na' ribía ládxi'u."

¹⁶ Na'a, guyasa, en guzuí, tu' buluí'i lahua' lí' na'a, para uzóa' lí' gunu' xichina', en gunu' ba nalí que lë ni chibilé'enu', enca' quégaca le uluí'ida' lí', uluí'i lahua' ga zu'.

¹⁷ Usöla' lí' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a lí' na'a.

¹⁸ Risöl-la'a lí' ga na' nacu'ë para gunu' ga ulu'huóalaj guiöj lógaquië', en ulu'huóáquië' queë' Dios, en ulu'cá'anë' le naca chul-la' que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le buluí'inë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluí'inë' Dios, zoë' yehua' yubá, neda'.

²⁰ Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zítu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca.

²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'.

²² Ní'irö gúcalenë Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbölö, pero ca gula'nnasé' z'f'alö bönni' gulu'ë didza' uláz queë' Dios, enca' ca gunné' Moisés ca ral-la' gaca.

²³ Gula'nnë': "Qui'i sáque'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'.

²⁶ Lë cazë' Agripa, bönni' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca.

²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero caléga gága'li' du guié ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rölengaca légaquië'.

³¹ Cate' bila' rúajë' quez, gulu'i xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en caléga tsázië' lidxi guié.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzö Roma

¹ Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la.

² Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguie' netu'.

³ Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' rójáquië' gudil-la, lu yöl-la' dxi'i ladxí' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'.

⁴ Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'.

⁵ Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu' yödzo nababa luyú Licía.

⁶ Bönni' na' rinná bé'enë bönni' röjáquië' gudil-la, en nachë'ë netu', yöjxáquië' tu barco ni' narúaj yödzo Alejandría que luyú Egipto, barco na' zeaj luyú Italia ga rö' yödzo Roma. Gulu'ë netu' lë'e barco na'.

⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzo Salmón luyú Creta na'.

⁸ Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzo Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië',

¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

¹¹ Bönni' na', rinná bé'enë bönni' röjáquië' gudil-la, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné' Pablo.

¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco na' gulún tuz xtídza'gaquië' ulu'zë'ë ni', channö huáca ila'dxinë' ga ta'dxín barco lu yödzo Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca të'ënnë', ate' bulu'lisë' guié' zi' naga' du guié' le ruzóa dxisö barco, ate' gudödi barco na' gala' ra' luyú bidxi na' nazí'i le Creta.

¹⁴ Ia'tú chí'isö ca', guyecja tu bö' budunu' za' lotu', nazí'i le Euroclidón.

¹⁵ Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bë'ëtu' lataj bö' na' buzéaj barco na' ga rë'ëni.

¹⁶ Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'.

¹⁷ Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxia nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bë'ëtu' lataj bö' na' recja buzéaj barco.

¹⁸ Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'.

¹⁹ Dza bunny, len na' cuintu' gurú'unatu' le tun dxin que barco na' lu nísado'.

²⁰ Cate' chiguca zían dza bití' rilé'etu' gubidza, en nitú böläj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

21 Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzë nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni.

22 Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni.

23 Caní gaca tu' budulu'í' lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'.

24 Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'të bönachi nacuá'len li' lë'e barco ni."

25 Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'.

26 Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

27 Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxí' yëla guléquinë' bönni' tunë' dxin lu barco na' chizóa idxín barco gala' tu luyú bidxi.

28 Gula'ru'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'látido', gula'ru'unë' du na' leyúbölö, en gula'nözinë' chinaca chinu ösa.

29 Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula'ru'unë' lu nísado' tapa guié zi'i nága'gaca du guié le tu'zóa dxisö barco lu nisa. Lu yöl-la' ruúbi ruguí'isö ládxi'do'gaquië' gula'bözë' tsení'.

30 Ní'irö gulë'ënnë' bönni' tunë' dxin lu barco ulu'zixúnajë' lë'e barco na'. Bulu'zötjë' bárcodo' na' dë lahui barco zxon na' lu nísado'. Gulunë' ca té'ënnë' ilu'ë ia'lati' zi'tu' guié zi'i na' naga' du guié le ruzóa dxisö barco na', le zoa saca' tsölá'a láhuilö.

31 Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

32 Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

33 Cate' chizá' rení', Pablo gúta'yüë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.

34 Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

35 Cate' Pablo budxi bë'ë didza' ni, gudélé'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzxuzxjë' yöta xtila na', en gusí lahuë' rahuë'.

36 Ní'irö bila'dipa ládxi'gaquië' yúgu'të', en gulahuë'.

37 Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'.

38 Gudödi gulahuë', en bulu'huöljanë', ní'irö gula'ru'unë' zxoá' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lé'enë' ga röjro' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'.

⁴⁰ Ní'irö bulu'sedxë' yugu' du guié nága' gaca yugu' guié zi' tu' zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxi' barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusi lo ridödi barco saca' ga röjro' nísado' gatsaj láhui'lö luyú bidxi na'.

⁴¹ Cate' bidxin barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Biti'rö guca bi utá le, ate' tsölá'a cüdzi'lö barco na', gusi lo riguitsaj nísado' na' le, len yöl-la' rizá' que.

⁴² Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabi' ila'zxúnnajë', ila'zxöë' lu nisa na'.

⁴³ Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabi' ilunë' ca na' të'ënnë'. Ní'irö gunná bé'enë' bönni' taca ila'zxöë' lu nisa, zí'alö légaquië' ila'yázië' lu nisa para ila'dxinë' luyú bidxi.

⁴⁴ Gunná bé'enë' ca' yugu' bönni' nagá'anagaquië' ila'zxöë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canisö bila'dxinë' luyú bidxi na'.

28

Le benë' Pablo luyú bidxi nazi' i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazi' i le Malta.

² Bönni' xidza' nacu'ë luyú bidxi na' lu yöl-la' dxi' i ladxi' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga.

³ Ní'irö Pablo gúchë'ë tu tsölén huága zxisi bídxido', en cate' gulu'ë le lu guí, birúajba' tuba' bëla sínia' lë'e huágado', rizxúnnajba' böchila que guí na', ate' yöjtí'iniba' yen në'ë Pablo.

⁴ Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'túë':

—Le nácatë bönni' ni náquië' nu ruti bönnachi. Sal-la' bulë' lu nísado', dios queëru' lë' Tsahui' biti' ru'ë lë' lataj soë' ibanë'.

⁵ Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí, ate' lë' biti' bi guca queë'.

⁶ Bönni' xidza' nacu'ë ni' tu'yúë' Pablo, bátacalö cö'ë gui, o tsö'ötë' gátie'. Ní'irö cate' chigudzé ta'bözë', en bila'lé'enë' biti' bi raca queë', ia'tú le guléquinë', ate' gula'nnë' naca cazë' tu dios.

⁷ Lataj ní'sö dë xiyüë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi' i ladxi' queë' gulu'ë netu' lidxë' idú tsonna dza.

⁸ Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyüë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'.

⁹ Tu' benë' Pablo lë ni, lësca' bila'dxin nupa te'e ga zoë', nacuá' luyú bidxi ni', en bulu'huóáquië'.

¹⁰ Yugu' bönni' ni gulunë' netu' bal, en zían le gulunë' queëtu'. Cate' chizóa uzá'atu' luyú ni', bulu'nödzjé' yugu' le naquínitu' queëtu'.

Ridxinë' Pablo lu yödzo Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzo Alejandría, le bugá'ana luyú bidxi na' yugu' beo' ziaga. Barco ni dá'gaca tsólá'a láhuilö budó' yaga léguequi Cástor, en Pólux, dios bilidi' quégaca bönachi Alejandría na'.

¹² Buzá'a barco na' ga ni', ate' bidxín yödzo Siracusa, ga ni' bugá'anatu' tsonna dza.

¹³ Buzá'atu' ni', ate' gudöditu' tsólá'alö luyú ni', en bidxintu' yödzo Regio. Cate' za' reni' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxintëtu' yödzo Puteoli luyú Italia.

¹⁴ Lu yödzo na' yöjxáca'tu' yugu' böchi'ru' ta'yéajlë'ë Cristo, ate' guláta'yüé' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizë'e ní'atu'.

¹⁵ Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixi'gala'gaquië' netu'. Bila'dxinë' tu yödzoödo' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxe'ë, en gudxe' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyúé' lë'.

Runë' Pablo libán lu yödzo Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxe' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guié.

¹⁸ Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulë'quibe'enë' biti' nabá'ga'a xíguia' gátia'.

¹⁹ Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'.

²⁰ Que lë ni na' bulidza' libí'ili' para ilé'eda' libí'ili', en gü'ílëna' libí'ili' didza', tu' ná'ga'a du guié ni tu' runa' löza le runru' löza rë'u, bönachi Israel, gácatë lë na' guzxí' lu në'ë Dios gata' queëru'.

²¹ Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'.

²² Na'a, rë'ënitü' yönitu' xtídzü'u, lë na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

²³ Caní guca, bulu'dxié' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië',

en buchila lá'anë' le rinná bë'ë Dios. Gú'unnë' uluí'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

²⁴ Bal-lë' gula'zí lu ná'agaquië' didza' bë'ë Pablo, pero ia'bal-lë' bití' ca' gula'yéajlë'ë.

²⁵ Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

²⁶ Guyéaj lógaca bönachi ni', yöjödxi légaquië':

Yöni nágali', pero bití' tséajni'ili'.

Uyuli' iná'ali', pero bití' ilé'eli'.

²⁷ Yugu' bönni' ni chinazidi icja ládxi'do'gaquië', en bití' bi riyaza icja nágagaquië'.

Gulunë' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilë'ëni ulu'huóaca queë' Dios

para gaca una' léguequi.

²⁸ Na'a, ral-la' inözili' lë ni. Dios risöl-lë'ë netu' lógaca bönachi izá'a para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'.

³¹ Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntu nu buzaga' xinözë'. ¡Ca' naca!

DIDZA' GUSÖL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios.

³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David,

⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti.

⁵ Ni'a que le benë' Jesucristo ruzi'iru' xibé le ruzá' lãdxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi iduté yödzölió Lë', en ilún ca rnna xtídzë'ë.

⁶ Bitsa'li' libí'ili' lãdjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' lãdxë'ë queëru', en le ribequi dxi lãdxi'ru'.

Rë'ënë' Pablo tsöjyúë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi iduté yödzölió ca réajlë'ëli' Jesucristo.

⁹ Idú lãdxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'-në', en rinábida'-në' gaca tsahui' queëli'.

¹⁰ Rinábitica'sida' Dios, channö naca le rë'ënë' Lë', gunnë' neda' lataj uduyúa' libí'ili'.

¹¹ Caní rinábida'-në' tu' raca lãdxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu.

¹² Lë na' rë'ënda' naca utipa lãdxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', rë'ënda' inözili' lë ni. Zián luzuí bë' lãdxa'a guída' ga zóali', pero ga ridxintë na'a biti' runni quia'. Rë'ënda' guída' ga zóali' para guna' ga uzí'ili' xibé libán na' runa', ca na' tu'z'í xibé ia'bal-la bönachi yödzölió ni.

¹⁴ Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni'i, en quégaca bönachi cabí ta'yéajni'i.

¹⁵ Que lë ni na', tsa gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

16 Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'ënë' Dios ila'yönnë' bönni' judío le, ate' tōdi na' ila'yōni ca' bōnachi izá'a.

17 Didza' dxi'a ni rulu'í rē'u gunë' Dios ga huóácaru' tsahui', channō uyéajlë'ëru' Lë', en biti' gaca chopá ládxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága'gaca bōnachi

18 Dios, Nu zoa yehua' yubá, bulu'e lahui biti' rilé'enë' dxi'a yúgu'të le ruá' dö', en le cabí naca tsahui' tun bōnachi. Gunë' xíguia' yugu' bönni' na', lu yöl-la' biti' naca tsahui' quégaquië' ta'dá'baguë'ë le naca idútë li.

19 Caní gaca quégaquië' tu' nalá' lahui lógaca yúgu'të bōnachi le naca bē' zoa cazë' Dios, tu' bulu'í quézínë' Dios lë ni ga na' nacu'ë.

20 Dza ni'te cate' si' guta' yödzülió, ga ridxintë na'a dza, yugu' le nunë' Dios náacagaca bē' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', biti' gaca ila'nnë' biti' nabága'gaquië' xíguia'.

21 Cate' ni' gulúnbë'ë Dios, biti' gula'yéaj ládxi'gaquië' Lë' ca ral-la' tseaj ládxi'ru'-në' Dios, en biti' gulë' Lë': "Xclenu'." Que lë ni na', cá'asō böáca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'.

22 Sal-la' guléquinë' ta'yéajni'inë' yenni', bulu'huóáquië' bönni' biti' bi nözguequinë'

23 tu' bulu'cá'anë' yöl-la' bení queë' Dios Nu zóatica'sō, ate' gula'yéaj ládxi'gaquië' budó' guióy budó' yaga, budó' na' náacagaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayóy lë'ëba' lu yu ni.

24 Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'tuë'.

25 Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sō queë' yöl-la' ba. ¡Ca' gaca!

26 Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'.

27 Lëscá' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'tuë', en gulunë' le tun ga nu rutuí', tu' gula'cuá'lenë' la' luzá'a bönni'gacasë'. Que lë ni na' gula'guf'i gula'záquië' lu xipéla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

28 Tu' cabí gulë'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

29 Túntica'së' yúgu'të le cabí naca tsahui', en yugu' le naca stu'. Tunë' le ruá' dö', en tu'huídí'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'. Tutië' luzá'agaquië', en ta'díl-lalenë' luzá'agaquië'.

Ta'zì yé'enè' bönachi, en zi'tè nácagaquiè' xihui'.

Ta'nné' que luzá'agaquiè'.

³⁰ Ta'nné' le cabí nácate' que luzá'agaquiè'.

Biti' ta'lé'enè' Dios dxi'a, en nácagaquiè' bönni' bizxaj.

Tun cuíngaquiè' lo, en tun ba zxön cuíngaquiè'.

Ta'güiljè' le ruá' dö' ilunè', en ta'dá'baguè'è xuz xiná'agaquiè'.

³¹ Nácagaquiè' bönni' bitì' ta'yéajni'inè', en tun dítjagaquiè' xtídza'gaquiè'.

Biti' nácagaquiè' dxi'i ladxi' ca ral-la' ilácagaquiè'.

Biti' tu'niti lahuè' luzá'agaquiè'.

Biti' tu'huechi' ládxi'gaquiè' luzá'agaquiè'.

³² Nözguequi quézinè' le nuzóè' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinè' lè ni, calégasó caní tunè', pero ta'yaza ládxi'gaquiè' nupa tun ca' caní.

2

Naca tsahui' ichúquiè' Dios quégaca bönachi gátigaca

¹ Que lè ni na', bitì' gaca ubéaj tsahui' cuinu', núti'tès nu nacu', richugu bè'u luzó'o. Cate' richugu bè'u luzó'o, rusubaga' cuinu' xíguia', tu' richugu bè'u luzó'o, en lësca' runu' li'.

² Nöz quéziru' ca ruchi'a rusöröè' Dios. Naca idútè li ca ruchi'a rusöröè' nupa tun le ruá' dö'.

³ Li' richugu bè'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröè' Dios?

⁴ ¿Naru' rucá'angatso' cá'asö yöl-la' dxi'i ladxi' idú queè' Dios, en yöl-la' riböza zxön ladxi' queè', en ca runè', ridzenè' para lenè' li'? ¿Naru' cabí nöz quézinu' ruzá' ládxe'è Dios quiu' yöl-la' dxi'i ladxi' queè' para gunè' ga ubí'i ládxi'u'?

⁵ Lu yöl-la' ládxi'do' zidi quiu' bitì' rubí'i ládxi'u'. Que lè ni na' rusubaga' cuinu' xíguia' gunè' Dios li' cate' uchi'a usöröè' bönachi, ate' gaca bè' naca ca ral-la' gunè' Dios cate' ichúquiè' quégaca bönachi ilátigaca.

⁶ La' dza ní'isö ubí'i cazè' Dios que queè' bönni' tsa naca le gulunè' tu tuè'.

⁷ Ünödzejè' yöl-la' na'bán idú quégaca nupa túntica'sö le naca dxi'a, tu' tu'i ládxi'gaquiè' ulu'zi'è xibè' Dios, en ulu'rúajè' dxi'a lahuè' Lè', en ila'cuá'tica'sè'.

⁸ Lu yöl-la' rilé queè', Dios gunè' xíguia' nupa ta'dá'baga', en bitì' té'èni ilún ca rnna le naca idútè li, pero tun ca rnna le cabí naca tsahui'.

⁹ Ila'gu'i ila'záquiè', en huí'inida' ládxe'è yúgu'tè bönni' tunè' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a.

¹⁰ Dios gunè' ga ilácagaquiè' bica' ba, en gunè' légaquiè' bal, en gu'è le cuéqui dxi ládxi'gaquiè' yúgu'tè bönni' tunè' le naca tsahui'. Ga risí lo gunè' caní quégaca bönachi judío, en gunè' ca' caní quégaca bönachi izá'a.

¹¹ Caní uchi'a usöröè' Dios bönachi, ate' Lè' bitì' runè' bal le ta'nnasö bönachi.

¹² Yúgu'tè bönni' na' bitì' bila'yönnè' le rinná bè' xibá queè' Dios, en gulunè' dul-la', lësca' ilátiè', sal-la' bitì' téquibe'enè' gula'dá'baguè'è le rinná bè' xibá na', ate' yúgu'tè bönni' bila'yönnè' le rinná bè' xibá queè' Dios, en gulunè' dul-la', Lè' uchi'a usöröè' légaquiè' ca naca le rinná bè' xibá na'.

13 Caní gaca, tu' cabí nácaqauië' tsahui' lahuë' Dios yugu' bönni' ta'yönisë' xibá queë', pero ulu' huóaca tsahui' lahuë' Lë' yugu' bönni' tunë' ca rna xibá queë'.

14 Bönni' na' biti' nácaqauië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'.

15 Nupa ni tu'lu'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'.

16 Caní ubi'ë' Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

17 Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios,

18 nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatëro dxi'a.

19 Réquili' gaca ulu'i'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca.

20 Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li.

21 Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'?

22 Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió'j budó' yaga. ¿Naru' ribántsali' le dzö'ö lu yudo' quégeuqui'?

23 Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguítjsali' xibá le gunná bë'ë Lë'?

24 Nazúaj lu guichi lá'ayi ca runli', rna: Ni'a que le runli' libí'ili' nupa biti' náca'gaca judío ta'nnë' zi' queë' Dios.

25 Le nácatë ruzi'u xibé lë na' narugu lu xipélu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguítjsu' xibá le gunná bë'ë Lë', nuhuóacu' ca tu bönni' biti' néquinë' queë' Dios.

26 Que lë ni na', channö zoë' tu bönni' biti' narugu lu xipélë'ë lë na' naca bë' nu nazí' xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipéla' cazë'.

27 Bönni' na' biti' narugu lu xipélë'ë lë na' naca bë' nu nazí'i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipéla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'.

28 Biti' náquië' idú bönni' judío tu bönni' nácasë' caní lu yöl-la' bönáchisö queë', atë' biti' naca idú lë na' naca bë' le narúgusö lu xipélë'ë nu bönni'.

29 Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipélë'ë nu bönni' le naca bë' nu nazí'i xibá

queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, bití' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë?

² Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'.

³ Bal-lë' bití' ta'yéajlë'ë Dios. ¿Naru' réquitsenu' bití' gunë' Dios ca rnna xtídzë'ë tu' cabí ta'yéajlë'ë Lë'?

⁴ ¡Bití' ca' gaca! Ral-la' guéquibe' eru' rúntica'së' Dios ca rnna didza' bë'ë, sal-la' ta'zì' yë' yúgu'të bönachi. Ca naca queë' nazúaj lu guichi lá'ayi le rnna:

Gaca bë' nacu' tsahui' ni'a que didza' ru'u,
en uruju' tsahui' channö nu uchi'a usörö Li'.

⁵ Cate' runru' le ruá' dö', Dios rnnë' bití' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' bití' ral-la' gunë' rë'u xíguia'."

⁶ ¡Bití' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzólió ni'?

⁷ Cate' nu rizí' yë', Dios rnnë' bití' ruí' didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'zì' yë'ë légaquië' run ga gaca queë' Dios yöl-la' ba, ate' bití' ral-la' ichúguië' quégaquië', cabí innë' nácaquië' bönni' dul-la'.

⁸ ¿Naru' huannásaru': "Guá'aru' dö' para gaca le naca dxi'a"? Nupa na' ta'nnë' zì' queëru' ta'nná rusédiru' caní, ate' tsahui' naca ichúguië' Dios quéguequi.

Yúgu'tëru' nabága'ru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'zícá'rö bönachi? ¡Bití' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'!

¹⁰ Nazúaj lu guichi lá'ayi le rnna:
Cuntu nu zoa naca tsahui', cuntu nu caz.

¹¹ Cuntu nu réajni'ì.

Cuntu nu riguila'j Dios.

¹² Yúgu'të' ta'dë' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' náca'gaca ca yeru ba nayál'jagaca.

Len yöl-la' rinnësö quégaquië' ta'zì' yë'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

¹⁴ Len yugu' didza' tu'ë, tu'didza' yúdxinë' bönachi,
en ta'nnë' zì'ë quégaca bönachi na'.

¹⁵ Nacu'ë sina' tútigaquië' bönachi.

¹⁶ Gátitës ga ta'dödë' tu'sunítie', en tu'saca' zì'ë luzá'agaquië'.

¹⁷ Bití' ta'zéqui'në' ila'bözë' dxi'ado'.

¹⁸ Bití' ca' tádxinë' Dios.

19 Nöziru' yúgu'tè didza' ni bē'ē Dios, rē' yugu' bōnni' na' dē lu ná'agaquiē' xibá queē'. Que lē ni na' cuntu nu gaca inná bití' nabaga' dul-la', ate' yúgu'tè bōnachi idútē yōdzōlió, uchi'a usórōē' Dios queéqueui.

20 Tufi lādxi'gaquiē' yugu' bōnni' judío ilunē' yugu' le rinná bē' xibá queē' Dios para ulu'huóáquiē' tsahui', pero cuntu nu huóáca tsahui' caní, tu' nuzóē' Dios xibá queē' para guéquibe'eru' nabága'ru' dul-la'.

Uláru' tu' réajlë'ëru' Jesucristo

21 Na'a, chibuluf'i lahui ca gaca huóácaru' tsahui' lahuē' Dios. Bití' gaca huóácaru' tsahui' tu' runru' ca rinná bē' xibá queē' Dios, sal-la' lu xibá queē' na', en lu guichi lá'ayi ga nazúajgaca le gula'nnē' bōnni' gulu'ē didza' uláz queē' Dios, ruí' didza' ca gaca huóácaru' tsahui'.

22 Dios caz runē' ga huóácaru' tsahui' tu' réajlë'ëru' Jesucristo, ate' gunē' ga ulu'huóáca tsahui' yúgu'tè nupa ila'yéajlë' Lē'. Tuz ca nácagaca yúgu'tè bōnachi

23 tu' núnagaquiē' yúgu'tè dul-la', en bití' ca' nácagaquiē' tsahui' ca na' náquiē' Dios idú tsahui'.

24 Dios ruzá lādxi'ē queëru', en nunsē' rē'u tsahui' tu' böá'uē' Jesucristo rē'u.

25 Dios budödē' Jesucristo uláz queëru'. Lē' bulaljē' xichönē', le rigúa dul-la', lē na' uzí'ru' xibé channō uyéajlë'ëru' Lē'. Caní benē' Dios para gaca bē' náquiē' tsahui' Lē' sal-la' lu yöl-la' riböza zxön lādxi' queē' budödisé' cá'asö yugu' dul-la' benru' dza ni'te.

26 Caní benē' Dios, buluf'i cuinē' tsahui' dza ni zóaru' na'a, ate' rugá'anē' tsahui' sal-la' rugúē' dul-la' nabága'gaca bōnachi, runē' ga tu'huóáca tsahui' nupa ta'yéajlë' Cristo.

27 ¿Naru' huácatsö gun ba zxön cuinru' ca naca queëru'? ¡Bití' ca' gácaru'! ¿Bizx que na'? Naca tu' nuláru', calëga tu' runru' ca rinná bē' xibá queē' Dios, pero tu' réajlë'ësiru' Jesucristo.

28 Na'a, rusáca'ru' queëru' nuhuóáquiē' tsahui' tu bōnni' tu' réajlë'ë Jesucristo, en calëga tu' runē' ca rinná bē' xibá queē' Dios.

29 Ca naca Dios, ¿náquiē' Dios queégacasö bōnachi judío? ¿Naru' cabí náquiē' ca' Dios queégaca bōnachi izá'a? Ön, náquiē' ca' Dios queégaca bōnachi izá'a na'

30 tu' zoa Tuz Nu naca Dios. Dios ni gunē' ga ulu'huóáquiē' tsahui' yugu' bōnni' judío tu' ta'yéajlë'ë Jesucristo, yugu' bōnni' na' narugu lu xipéla'gaquiē' lē na' naca bē' nu nequi queē' Dios, en lësca' caní gunē' ga ulu'huóáquiē' tsahui' yugu' bōnni' zí'tu' tu' ta'yéajlë'ë Jesucristo, en bití' narugu lu xipéla'gaquiē' lē na' naca bē'.

31 Na'a, channō nuláru' tu' réajlë'ësiru' Jesucristo, ¿ba nagá'ana cá'asö xibá queē' Dios? ¡Bití' ca' naca ca', pero nagá'anarö tsutsu xibá queē' na'!

4

Le benē' Abraham rusedi rē'u

1 ¿Bizxi caz innaru' na'a? ¿Bizxi bidéli'nē' Abraham, xuz xtó'otu' netu', nácatu' judío?

2 La'tu' böáquiē' tsahui' Abraham tu' zoa le ben cazē' lē', gunna gun ba zxön cuinē', pero calëga lahuē' Dios.

3 Ca naca lē ni nazúaj lu guichi lá'ayi, le rna: "Abraham guyéajlë'ë Dios, ate' que lē ni na' Dios benē' ga böáquiē' tsahui' lahuē' Lē'."

⁴ Channö zoa nu bönni' runë' xichinru', le riguızxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'.

⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóaca tsahui' bönachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'.

⁶ Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'.

⁷ Caní gunnë' David:

¡Bica' ba bönni' na' Dios runiti lahuë' le biti' naca tsahui' nunë', en rugúë' yugu' dul-la' nabáguë'è!

⁸ ¡Bica' ba bönni' na', Dios biti' rsubáguë'è lë' xíguia' tu' nōzi dul-la' benë' bönni' na'!

⁹ ¿Naru' nácagacsë' bica' ba bönni' narugu lu xipëla'gaquië' lë na' naca bë', o nácagaca ca' caní nupa na' cabí narugu lë na' lu xipëla'gaquië'? Chigunná cázaru' bóáquië' Abraham tsahui' lahuë' Dios tu' guyéajlë'ë Lë'.

¹⁰ ¿Bátaxi bóáquië' tsahui' caní Abraham? ¿Naru' guca cate' ni' chinarugu lu xipëlë'ë lë na' naca bë', o guca zí'aló? Biti' guca cate' chinarugu lu xipëlë'ë, pero zí'aló guca.

¹¹ Abraham guyéajlë'ë Dios cate' ni' biti' narúguni lu xipëlë'ë lë na' naca bë'. Gudödi na' gurugu lu xipëlë'ë lë na' naca bë', le rulu'isö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipëla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'.

¹² Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipëla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipëlë'ë lë na'.

Le guxzí' lu në'ë Dios gata' queëru' tu' réajlë'ëru' Lë'

¹³ Guxzí' lu në'ë Dios bi unödzjë' queë' Abraham, en quégaca xzí'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuóácagaquië' tsahui' lahuë' Lë' tu' ta'yéajlë'ë Lë'.

¹⁴ La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guxzí' lu në'ë Dios.

¹⁵ Rulu'i xibá queë' Dios ré'u nabága'ru' xíguia', le run ga ichúguie' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

¹⁶ Que lë ni na' uzí'iru' xibë le guxzí' lu në'ë Dios tu' réajlë'ëru' Lë', para gaca bë' naca tu le ruzá' ládxi'ë queëru'. Caní naca, para gaca bë'da' gata' quéguequi yúgu'të xzí'ini xi'sóë' Abraham lë na' guxzí' lu në'ë Dios, calégasö quégaquië' bönni' na' dë lu náagaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' ré'u, réajlë'ëru'-në' Dios.

¹⁷ Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idütë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsa chizóa caz nu na' biti' zuíni.

18 Caní naca tu' gudxë' Dios Abraham na': "Ziántëro ila'cuá' zxi'ini xi'sú'." Abraham guyéajlë'ë Dios, en benë' löza lë na' guzxi' lu në'ë Dios, sal-la' bití' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió.

19 Bití' guca Abraham chopa ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx.

20 Bití' guca chopa ládxë'ë, en bití' gúquië', tu' caréajlë' ca naca le guzxi' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba.

21 Idú ládxë'ë benë' löza Dios, napë' yöl-la' huáca gunë' idútë lë na' guzxi' lu në'ë.

22 Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

23 Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham,

24 pero para uzi'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti.

25 Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

1 Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'.

2 Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxi'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios.

3 Calégasö caní rudzéjaru', pero rudzéjaru' ca' cate' riguí' rizáca'ru', tu' chinöziru' le riguí' rizáca'ru' rusedi rë'u cózaru' zxön ladxi'.

4 Cate' ribözaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u.

5 Cate' runru' löza Lë', bití' ca' raca chopa ládxi'ru'. Caní naca, tu' nuhuölej nudzë' icja ládxi'do'oru' yöl-la' nadxi' queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

6 Cate' ni' bití' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'.

7 Cuntu nu guë'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxi'a.

8 Dios rulu'inë' rë'u ca nadxi'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'.

9 Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca.

10 Cate' ni' bití' rilé'ëru'-në' Dios dxi'a, gútië' Zxi'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'.

11 Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödžölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'.

¹³ Zí'atëlö ga bidxintë xibá queë' Dios, gulún bönachi yödžölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' queégaquië'.

¹⁴ Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Náca'gaca yúgu'të bönachi tuz len Adán tu' náca'gaca xzí'ini xí'sóë'. Lë ni rulu'í rë'u ca ilaca tuz len Cristo yúgu'të nupa ila'yéajlë' Lë'.

¹⁵ Le rúnna'së' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxë'ë queëru' Dios, en le rúnna'së' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo.

¹⁶ Le rúnna'së' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios queé'gaca yúgu'të bönachi gátigaca. Le rúnna'së' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían.

¹⁷ Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

¹⁸ Dios guchúguië' queé'gaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú queégaquië'.

¹⁹ Bulu'huóáca huen dul-la' bönachi zían tu' cabí benë' tuzë' bönni' ca rna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rna xtídzë'ë Dios.

²⁰ Guyú'u xibá queë' Dios yödžölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntërö naca le buzá' ládxë'ë Dios queé'gaca bönachi.

²¹ Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-në' Jesu-cristo

¹ ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxë'ë Dios queëru'?

² ¿Biti' gun cázaru' ca'! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'?

³ ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'í rë'u chigudödiru' lu yöl-la' guti tsözxón len Lë'.

⁴ Ca na' guca, gútilenru'-në' Cristo tsözxón, lësca' caní bigáchi'lenru'-në' tsözxón niu' yeru ba cate' ni' bidílaru' nisa. Ca na' busubanë' Dios Cristo

lu yöl-la' guti len yöl-la' huáca zxon queë', lès caní ca' rë'u nubánlenru'-në' Jesús tsözxön para gácaru' bönachi idütë cubi queë'.

⁵ Channö nunru' Cristo tsözxön, gütiru' ca na' gütie' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'.

⁶ Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u.

⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabágaru' dul-la' na', ate' bíti'rö yú'uru' lu na' dul-la'.

⁸ Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön,

⁹ tu' chinöziru' bubanë' Cristo lu yöl-la' guti, en bíti'rö gátie'. Que lë ni na' bíti'rö bi gaca gun yöl-la' guti na' queë' Lë'.

¹⁰ Ca na' guca, gütie' Lë', tu luzuísö gütie' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios.

¹¹ Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', bití' güi'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizé ládxi'li' le ruá' dö', lu le naca cázali'.

¹³ Bití' udödi cuinli' lu dul-la', bití' gunli' le ruá' dö', pero guli' dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a.

¹⁴ Bití' güi'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxi'ë queëru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxi'ë Dios rë'u? ¡Bití' ca' gunru' caní!

¹⁶ Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóácali' tsahui'.

¹⁷ Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná be' xibá na' budödi cuinli' lu në'e.

¹⁸ Tu' chinulali' lu na' dul-la', nuhuóácali' ca yugu' bönni' nadó'ogaca lu na' le naca dxi'a.

¹⁹ (Ruí'ílëna' libí'ili' didza' ca tuí' didza' bönachi, tu' cabí réajni'ili' idütë lu yöl-la' bönachi queëli'.) Zí'alö budödi cuinli' len idütë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idütë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'.

²¹ Na'a, ¿naru' buzí'itsali' xibé lë na' benli' zí'aló? Na'a lë na' benli' run ga rutuí'ili', en run ga nu gati tsaz.

²² Na'a chinulali' lu na' dul-la', en nácali' ca yugu' bönni' nadó'ogaca queé' Dios, en ruzí'ili' xibé le run ga nácali' bönachi narúajgaca quez queé' Dios, en le run ga dë queéli' yöl-la' na'bán idú.

²³ Lazxaj nu run dul-la' naca yöl-la' guti, pero le rúnнасë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesu-cristo.

7

Le rucudzu' didza' yöl-la' nutsaga na'

¹ Böcha'ado', núlöli' núnbë'ëli' xibá queé' Dios. Nöz quezili' rinná be'e xibá na' nu bönni' tsanni ni zoé' nabanë'.

² Naca queéli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoé' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'.

³ Caní naca, tsanni ni zoé' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queéli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queé' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios.

⁵ Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzë ládxi'ru' le ruá' dö', le gulún dxin lu idütë le naca cázaru' para ilún ga gátiru'.

⁶ Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'aló. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queé' Dios ga runa' dul-la'? ¡Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", biti' gunözda' naca dul-la' yöl-la' rizë ladxí' le dë que luzá'a.

⁸ Cate' bidxín quia' xibá na', guca bë' le naca dul-la' na' run dxin lu idütë le naca', ate' ben ga gúquibe'eda' rizë ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'.

⁹ Dza ni'te, zí'atëlö ga bidxín quia' xibá queé' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'.

¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'.

¹¹ Guca bë' nazí yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queé' Dios, ate' lá'ayi, en tsahui', en dxi'a naca le gunná bë'ë.

13 ¿Naru' bentsö lë na' naca dxi'a ga bidxín quia' yöl-la' guti? ¡Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

14 Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que.

15 Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'.

16 Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'.

17 Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'.

18 Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a.

19 Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'.

20 Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

21 Caní naca le raca queëru' yúgu'tëru'. Cate' ré'ëni ru' gunru' le naca dxi'a, dzaga rë'u le run ga runru' le ruá' dö'.

22 Lu icja ládxi'da'ahua' raza ládxa'a xibá queë' Dios

23 pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

24 ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'?

25 ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

1 Que lë ni na', bíti'rö bi xíguia' nabága'gaquië' yugu' bönni' néquiquequinë' queë' Jesucristo, bönni' na' bíti'rö tunë' ca ré'ëni yöl-la' bönáchisö quégaquië', pero ca ré'ënë' Dios Bö' Lá'ayi tunë'.

2 Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti.

3 Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusól-lë'ë Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'.

4 Caní benë' para gaca gunru' idútë le naca tsahui' le rinná bë' xibá queë', nulöru' na' bíti'rö runru' ca ré'ëni yöl-la' bönáchisö queëru', pero ca ré'ënë' Dios Bö' Lá'ayi runru'.

⁵ Bönni' tunë' ca rë'ëni yöl-la' bönáchisö queégaquië', tu'i ládxi'gaquië' le naca que yöl-la' bönáchisö queégaquië', pero bönni' tunë' ca rë'ënë' Dios Bö' Lá'ayi, tu'i ládxi'gaquië' le naca queë' Dios Bö' Lá'ayi.

⁶ Channö rufi ládxi'siru' le naca que yöl-la' bönáchisö queëru', tsaz gátiru', pero channö rufi ládxi'ru' le naca queë' Dios Bö' Lá'ayi, chidé yöl-la' na'bán idú queëru', en ribözaru' dxi ládxi'.

⁷ Núti'tës nu rufi ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní.

⁸ Que lë ni na', bönni' na' tunë' ca rë'ëni yöl-la' bönáchisö queégaquië' biti' gaca ilunë' le raza ládxi'ë' Dios.

⁹ Na'a, bití'rö runli' ca rë'ëni yöl-la' bönáchisö queëli', pero runli' ca rë'ënë' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risöl-lë'ë Cristo queëru', biti' néquinë' queë' Cristo.

¹⁰ Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'.

¹¹ Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹² Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'.

¹³ Channö runli' ca rë'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

¹⁴ Yúgu'të nupa tun ca rë'ënë' Dios Bö' Lá'ayi nácagaca zxi'inë' Dios.

¹⁵ Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzöbili', pero chinunë' ga nácali' zxi'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad.

¹⁶ Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxi'inë' Dios.

¹⁷ Channö chinácaru' zxi'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí' rizáca'lenru'-në' tsözxön Cristo para uzí'iru' xibé tsözxön len Cristo yöl-la' xön queë' Dios.

¹⁸ Runi neda', yugu' lë ni riguí' rizáca'ru' na'a naca tu le cuídi'do'os tsca naca yöl-la' xön na' gata' queëru' dza si' za'.

¹⁹ Ta'böza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' nácagaquië' zxi'ini cazë'.

²⁰ Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë',

²¹ ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yöl-la' rusölá le nazáca'da' na' ulu'zi'ë xibé yugu' zxi'inë' Dios.

²² Nöziru' ta'guí' ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nigula chizóa sóabi' bí'ido' queënu.

²³ Riguí' rizáca'a, calëgasö yödzülió ni, pero riguí' rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'í' rë'u ca

ral-la' gaca cázaru'. Riguí' rizáca'ru' tsanni ni ribózaru' dza ni' ulu'ë lahui Dios nácaru' idú zxi'iné', dza ni' úné' ca' idúté le naca cázaru'.

²⁴ Tu' runru' löza lë ni, nuláru' rë'u, pero channö gaca ilé'ëru' lë na' runru' löza, bití' naca tu le ribózaru'. Bití' ribózaru' le chirilé'ëru'.

²⁵ Na'a, channö runru' löza tu le cabí gaca ilé'ëru', lu yöl-la' ribóza zxon ladxi' ribózaru' le.

²⁶ Lëzca' caní rácalenë' Dios Bö' Lá'ayi rë'u cate' rudú ládxi'ru', tu' cabí nöziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxe'ë, tsca cabí gaca nu inná.

²⁷ Dios ruyúé' le yu'u icja ládxi'do'gaca bönachi, en nözinë' le rë'ënë' innë' Dios Bö' Lá'ayi na', ate' Lë', ca rë'ëni quézinë' Dios, rudödë' xtídza'gaca nupa néquiguequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

²⁸ Nöziru' tu'zi'ë xibé bönni' yúgu'të le raca quégaquië', bönni' na' nadxi'iguequinë' Dios, ate' bulidzë' Dios légaquië' ca nuzóa cazë' gunë'.

²⁹ Yugu' bönni' na' gurö cazë' queë' Dios zí'atëlö, buzóë' ca' quégaquië' zí'atëlö ilácagaquië' ca naca cazë' Zxi'inë', para gáquië' Zxi'inë' lo ladaj zían böchë'ë.

³⁰ Nupa na' buzóë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxon queë'.

³¹ ¿Bizxi caz innaru' na'a ca nácgaca lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'.

³² Dios, idú ládxe'ë bennë' queëru' Zxi'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsózxön len Zxi'inë' yúgu'të le dë?

³³ ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'!

³⁴ ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuíta lë'ë ibëla Dios ga nácatërë' zxon, ate' rnnë' dxi'a uláz queëru' lahuë' Dios!

³⁵ Sal-la' bi raca queëru', nöz quéziru' nadxi'inë' Cristo rë'u. Nöziru' nadxi'inë' rë'u:

sal-la' riguí' rizáca'ru', o sal-la' risëbi ládxi'ru',

o sal-la' ta'bía ládxi'gaca bönachi rë'u,

o sal-la' ridunru', o sal-la' riyadzaj le gácuru',

o sal-la' zoa bönadxi queëru', o sal-la' ilútië' bönni' rë'u.

³⁶ Ca nácgaca lë ni nazúaj lu guichi lá'ayi, rnna:

Tu' néquitu' quiu' Li', túntica'sö bönachi ga gátitu'.

Nácatu' ca yugu' bö'cu' zxila',

nadödígacaba' lu na' nu guti légacaba'.

³⁷ Na'a, tu' zóalen rë'u Nu na' nadxi'i rë'u, nácatërö löza idéli'ru' lu le raca queëru'.

³⁸⁻³⁹ Que lë ni na' runi neda':

Bití' bi sequí' gun ga bíti'rö idxí'inë' Dios rë'u.

Nadxi'inë' rë'u tu' néquiru' queë' Xanru' Jesucristo.

Bití' sequí' gun caní yöl-la' guti o yöl-la' na'bán,

o yugu' gubáz lá'ayi o nupa ta'nná bë',

o yugu' yöl-la' huáca que tu' xihui',
 o bíti'tës bi zoa o bíti'tës bi si' za',
 o tu le dë xitsá'alö o tu le dë cadxí'ilö,
 o bíti'tës bi nunë' Dios.

9

Dios gurö cazë' queë' bönachi Israel

¹ Ruá'a didza' idútë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¡Biti' rizí' yë'a!

² Ruhuí'inide'eda', en risëbitica'sö ládxa'a

³ tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'ëni quézida' ubéaj ládxe'ë Dios neda', en ulá'alena' Cristo.

⁴ Yugu' bönni' uládz quia' na' nácagaquië' xzí'ini xi'sóë' Israel, ate' Dios bë'ë légaquië' lataj ilácagaquië' xzí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' bönachi.

⁵ Nácagaquië' xzí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quegaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¡Rácatica'sö queë' yöl-la' ba! ¡Ca' gaca!

⁶ Sal-la' yúgu'të bönni' uládz quia' biti' nazi' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të xzí'ini xi'sóë' Israel nácagaquië' idú bönachi Israel, nupa néquiguequi queë' Dios.

⁷ Sal-la' gúljagaquië' zían xzí'ini xi'sóë' Abraham, biti' guláquië' yúgu'të idú xzí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' xzí'ini xi'sóë' Isaac ilaca idú xzí'ini xi'sú'."

⁸ Caní naca, nupa nácagaca xzí'inë' tu bönni' néquinë' queë' Dios, calëga yúgu'të nácagaquië' xzí'inë' Dios. Lësca' caní, nácagaca idú xzí'ini xi'sóë' Abraham núpasö na' náljagaca ni'a que lë na' guzxi' lu në'ë Dios.

⁹ Lë na' guzxi' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

¹⁰ Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu',

¹¹⁻¹³ cate' ni' si' iláljabi', en biti' bi núnigacabi' le naca dxí'a o le ruá' dö', Dios gudxë-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esau." Caní guca, bugá'ana tsutsu le buzöë' tsaz Dios ca naca lë na' chigurö cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¡Biti' ca' runë' caní!

¹⁵ Dios gudxë' Moisés, gunné': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a."

¹⁶ Que lë ni na', biti' raca caní ni'a que le té'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi.

17 Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bē'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzölió le naca' neda'."

18 Caní naca, Dios ruhuéchi' ládxë'è nu ré'èni quézinë', en lësca' caní runë' zidzaj icja ládxi'da'ahuë' nu bönni' ré'èné' gunë' zidzaj icja ládxi'da'ahuë' bönni' na', ca na' benë' queë' Faraón na'.

19 Na'a guiéli' neda': "Channö caní naca, ¿bizx que rusubáguë'è Dios bönachi xíguia'?' ¿Nuzxi caz gaca tá'baga' le ré'èni quézinë' Dios gunë'?"

20 ¿Biti' ca' naca caní! ¿Nuzxi caz li' rnníó' que Dios? ¿Naru' huácatsö tu yusu' néquini yu guíë bönni' huen rö'ö, inná: "¿Bizx que benu' neda' caní?"

21 ¿Naru' cabí dë lu në'è bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

22 Ré'èni quézinë' Dios ulu'è lahui ca gunë' xíguia' nu ruá' dö' en gunë' ga gaca bē' yöl-la' huáca queë', pero lu yöl-la' riböza zxön ladxi' queë' biá' gulënë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítië' légaquië'.

23 Caní runë' Dios para gaca bē' nácatë' lesaca' yöl-la' ruzá' ladxi' queë', lë na' rulu'è lahui lógaca nupa na' ruhuéchi' ládxë'è, bönni' na' buzóë' quégaquië' zí'atëlö ulu'zi'è xibé yöl-la' zxön queë'.

24 Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a.

25 Ca naca lë ni nazúaj lu guichi lá'ayi ca na' bē'è didza' Oseas uláz queë' Dios, gunné':

Nupa biti' náca gaca bönachi quia',
gu'a láguequi: Bönachi quia',
ate' nupa na' biti' bidxí'ida',
gu'a láguequi: Nupa nadxí'ida'.

26 La' ná'asö ga gunnía' quéguequi:
"Biti' nácali' bönachi quia'",
si' láguequi: "Yugu' zxi'inë' Dios ban."

27 Na'a, ca naca quégaca zxi'ini xi'sóë' Israel, Isaías gunné':
Sal-la' ila'yanë' zxi'ini xi'sóë' Israel,
en iláquië' tsa naca yuzxi tu ra' yegu zxön,
ulu'lë' nabábasë'.

28 Xanru' Dios la' guntë' ga gaca idútë
lë na' ichúguië' quégaca bönachi yödzölió ni.

29 Lësca' caní Isaías bē'è didza' zí'atëlö, gunné':

Dios, Xanru' unná bē' idú,
la'tu' cabí bucá'anë' queëru' yugu' zxi'ini xi'sóaru',
ugá'anaru' ca yödzö Sodoma, en yödzö Gomorra,
yugu' yödzö na' busunítië' Dios.

Bönachi Israel, en didza' dxí'a

30 ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuóácagaquië' tsahui' lahuë' Dios, en biti' gulunë' bayudxi ulu'huóáquië' tsahui' lahuë' Dios, pero nuhuóácagaquië' tsahui' tu' ta'yéajlë'è Dios.

31 Na'a, sal-la' gulunë' bayudxi yugu' bönni' Israel ilunë' ca rinná bē' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bē' xibá na'.

³² ¿Bizx que na' guca caní? Caní guca, tu' cabí gulunë caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchëgu'gaquië' lu lë na' nazí'i le: Guiöj Ga Nu Røjchegu'.

³³ Ca naca lë ni nazúaj lu guichi lá'ayi, rnna:
 ¡Buli'yú! Uzóa'-në' yödzö Sión bönni' na'
 gáquië' ca tu guiöj ga nu tsøjchegu',
 guiöj na' gun ga nu ichixi inigui.
 Nu tséajlë' Lë', biti' ca' utuí'i nu na'.

10

¹ Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'.

² Runa' ba nalí quégaquië', idú ládxi'gaquië' tu'í ládxi'gaquië' Dios, pero calëga len yöl-la' réajni' idú.

³ Biti' nözguequinë' ca runë' Dios, runse' ga nácaru' tsahui', pero té'ënnë' ilún cuíngaquië' tsahui' rácasö quégaquië', en biti' ta'cu'ë nöxaj ladxi' lahuë' Dios para gaca gunë' légaquië' tsahui'.

⁴ Budxi benë' Cristo le rë'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

⁵ Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní."

⁶ Na'a, ca naca que nu huóaca tsahui' tu' réajlë' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo,

⁷ en biti' innó': "¿Nuzxi caz huötaj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti.

⁸ Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë ni naca didza' que le réajlë'ëru' Dios runtu' libán que, rnnatu':

⁹ "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'."

¹⁰ Lu icja ládxi'do'oru' réajlë'ëru' Jesús para gácaru' tsahui', ate' len didza' ru'iru', rulu'iru' lahuí le náquië' Jesucristo para uláru'.

¹¹ Nazúaj lu guichi lá'ayi le rnna: "Biti' ca' ulu'tuí'i yúgu'të nupa ta'yéajlë' Lë'."

¹² Dios, la' tuz ca ru'í ládxi'ë yugu' bönni' judío, enca' yugu' bönni' idútë yödzólió, tu' Lë cazë' Xanru' náquië' Xángaqië' yúgu'të', en nápadë'ë bi unödzejë' quégaca yúgu'të nupa tu'lidza Lë'.

¹³ Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'."

¹⁴ ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntú nu zoa nu gun libán lógaquië'?

¹⁵ ¿Nacxi caz gaca ilunë' libán channö cuntú nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' rójëngaqië' libán que le ribequi dxi ládxi'ru', en tunë' libán que didza' dxi'a."

16 Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?"

17 Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

18 Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídza'guequi.

19 Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli,

tu' idxí'ida' bönachi biti' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

20 Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa biti' gula'guílaj neda'.

Bulu'i lahua' lógaquië' bönni' biti' bí gula'nábinë' neda'.

21 Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi biti' túngaca ca rnna xtídza'a, en ta'dá'bagá' neda'."

11

Nupa nulágaca ladaj bönachi Israel

1 Na'a rnnía': ¿Naru' nusán në'ë Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xí'sóë' Abraham, en nababa' di'a dza queë' Benjamín, xzí'ini cazë' Israel na'.

2 Dios biti' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné':

3 "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'."

4 Na'a, ¿bizxi didza' ubi'ë Dios? Caní gunné': "Nun chí'igaca caza'-në' quia' tsónnalalaj yu' chi gáyü'ë bönni' biti' tu'zechu xzí'bigaquië' lo budó' guióaj na' nazí'i le Baal."

5 Lësca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxe'ë caní quégaquië'.

6 Channó naca le ruzá' ládxe'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxe'ë queëru' Dios bíti'rö gaca tu le ruzá' ládxe'ë queëru'.

7 ¿Bizxi caz innaru' na'a? Lë na' gula'guílje' bönni' Israel, biti' bila'déli'në', pero chibila'déli' le nupa ni' gurö cazë' queë' Dios, ate' ia'zica'rë' na', Dios benë' zidi icja ládxi'do'gaquië'.

8 Ca naca lë ni nazúaj lu guichi lá'ayi, rnna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a.

9 Ca naca lë ni bë'ë ca' David didza', gunné':

Yugu' laní quégaquië' ulu'huóaca le ila'zón légaquië',
en ca tu yalaj ga ila'rölinë'.

Ilaca ca' le ilún ga ila'chíxinë',
 en ca tu le uzí' lëbi légaquië'.

¹⁰ Ila'chul-la guióǵ lógaquië', para cabí ila'lé'enë'.
 Ila'yechu tsaz cúdzu'gaquië' tu' ilu'ë yua'.

Ca gaca ulu'lágaca bönachi biti' nácagaca judío

¹¹ Na'a rnníá': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Biti' ca' guca ca! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa biti' nácagaca judío para gunë' ga ulu'zxé'enë' yugu' bönni' judío léguequi.

¹² Le gulunë' bönni' judío, gula'chíxinë', ben ga bidxín quégaca bönachi yödzólió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' nácagaca judío tu' gula'nítië' yugu' bönni' judío, zxöntëro gaca le gata' quéguequi cate' yugu' bönni' judío na' ulu'huóáquië' queë' Dios.

¹³ Na'a rea' libí'ili' biti' nácali' judío, rnníá': Tu' naca' gubáz nasöl-lë'ë Dios lógaca nupa biti' nácagaca judío, runa' zxön lë na' dë lu na'a

¹⁴ para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'.

¹⁵ Channö bulu'huóáca bönachi nacua' idú yödzólió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huóázië' xilátjagaca cazë' na'. Gaca ca raca cate' tu'bangaca nupa chinátigaca.

¹⁶ Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

¹⁷ Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'.

¹⁸ Que lë ni na', biti' gun ba zxön cuinli', biti' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

¹⁹ Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca."

²⁰ Nácaté didza' ru'u, pero gula'rúguië' tu' cabí gula'yéajlë'ë, ate' yójtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios.

²¹ Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' li'?

²² Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácaté rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'.

²³ Lësca' caní gaca quégagaquië' channö cabí ulu'gá'anë' lu yöl-la' cabí réajlë' quégagaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö.

²⁴ Nacu' li' ca tu ni'a në'e gurugu lu yaga olivo guí'a, en yójtó'o yaga olivo dxi'a ga cuntu nu udá' tu ni'a në'e yaga guí'a. Yénni'tëro huáca

quégaquië', nácagaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

²⁵ Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queéli'. Bulu'huöaca bal-la bönachi Israel zidi ladxi', ate' caní iláquië' ga idxinrö dza chinayá zgaca yúgu'të bönachi biti' nácagaca judío ga rinná bë'ë Dios, nupa na' ral-la' ulu'lágaca.

²⁶ Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusölá,

en ugúa le ruá' dö' nabága'gaca zxí'ini xi'sóë' Jacob.

²⁷ Lë ni naca didza' dzaga gúnlena' légaquië'

cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' gurö cazë' queë' xuz xtó'ogaquië'.

²⁹ Tsaz runödzjë' Dios le runödzjë', en tsaz rulidzë' bönachi.

³⁰ Ca na' naca queéli', zí'atëlö biti' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'.

³¹ Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a.

³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzöë' Dios gunë', en biti' gaca nu inözi yugu' le runë' Dios.

³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'?

³⁵ ¿Nuzxi caz bi bunödzaj queë' Dios para gun bayudxi bi ubi'ë Dios que?

³⁶ Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatica'sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios.

² Bítirö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a ré'ënë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi'íjali', tsca naca yöl-la' réajlë' queéli' Dios le bennë' que queéli'.

⁴ Ca na' naca tuz idütë le naca cázaru', sal-la' zían le nagudi' dzágalenru', en caléga tuz dxin tun yúgu'të le zían na' nagudi' dzágalenru',

⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tscá naca le buzá' lãdxë'ë que queëru'.

Bönni' na' Dios bunödzejë' queë' gu'ë didza' uláz queë', tscá réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë', dxi'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxi'ado' ral-la' usédinë' bönachi.

⁸ Bönni' na' Dios bunödzejë' queë' uzéajni'inë' bönachi, dxi'ado' ral-la' uzéajni'inë' légaquië'.

Bönni' bi unödzejë' que nu yúbölö, idú lãdxë'ë ral-la' unödzejë'.

Bönni' rinná bé'enë' bönachi, idú lãdxë'ë ral-la' gunë' caní.

Bönni' rácalenë' luzë'ë,

len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú lãdxi'li'.

Buli' cá'ana le ruá' dö'.

Guli' güi' lãdxi'li' gunli' le naca dxi'a.

¹⁰ Guli' dxi'i-guéquinë' luzá'ali'

ca nadxi'igueli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'tipatica'sö lãdxi'li', en bití' gácali' xöhuëdi.

Guli'gún xichinë' Xanru' idú lãdxi'li'.

¹² Buli'dzeja tu' zoa le runli' löza.

Guli'cöz zxön ladxi' cate' bi riguí'i rizáca'li'.

Buli'lídzatica'së' Dios.

¹³ Buli'nödzej quegaca bönachi queë' Cristo

tscá nayádzaguequinë'.

Guli'güi' lataj ga ila'cuá' nupa ta'dxín queëli'.

¹⁴ Guli'nábinë' Dios gunë' dxi'a

quegaca nupa ta'bía lãdxi'gaca libí'ili'.

Guli'naba gaca dxi'a quégaquië',

en bití' udxíali' légaquië' dö'.

¹⁵ Buli'dzéjalen nupa tu'dzeja.

Guli'cödxílen nupa ta'bödxí.

¹⁶ Guli'gaca tuz len luzá'ali'.

Bití' gun ba zxön cuinli',

pero guli'gún tsözxön yugu' bönni' nöxaj ladxi'.

Bití' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

bití' guá'ali' dö' que nu ruá' dö' queëli'.

Guli'gún dxi'a quégaca yúgu'të bönachi.

¹⁸ Channö huáca, tscá séqui'li', guli'cöz dxi'a

len yúgu'të bönachi.

¹⁹ Böchi' luzá'ado', bití' uzí' lëbili' bönachi la' libí'isili', pero guli'güi' lataj ubi'ë Dios quégaca bönachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios.

²⁰ Lësca' caní rna:

Channö zoë' nu bönni' bití' ridzáguië' lí' dxi'a,
en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

²¹ Bití' gu'u lataj inná be'e le ruá' dö' lí',

pero gunná be'e le ruá' dö' na',

ugunu' dxin le naca dxi'a.

13

¹ Yúgu'tëli' ral-la' gunlí' ca ta'nnë' bönni' yúlahui'. Dios caz budödë' lu ná'agaquië' yöl-la' unná bë' nápagaquië', en nucu'ë xilátjagaquië' bönni' ni dë lu ná'agaquië' yöl-la' unná bë'.

² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xigua'.

³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga bití' ulu'zenë' lí' bach, ben le naca dxi'a, ate' uruju' dxi'a lógaquië'.

⁴ Náquië' bönni' yúlahui' ni'a në'ë Dios para gácalenë' lí', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xigua' nu ruá' dö'.

⁵ Que lë ni na' run bayudxi gunlí' ca rnnë' bönni' na' dë lu në'ë, calégasö tu' budödë' Dios lu në'ë gunë' libí'ili' xigua', pero lësca' para soa dxi ládxi'do'oli' lahuë' Dios.

⁶ Que lë ni na' ca' riguízaj lázali' que yúlahui', tu' nácalaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷ Guli'guízaj yúgu'të bönachi le rál-la'li' quégaquië'. Guli'guízaj lázali' lu na' nu ral-la' quízaj lázali'. Guli'guízaj dumí nu ral-la' quízajali'. Guli'gadxi nu ral-la' gádxili', en guli'gún bal nu ral-la' gunlí' bal.

⁸ Cuntu nu bi ral-la' gál-la'li' que, pero tuz ral-la' idxfí'ili' luzá'ali', tu' chibén idú ca rinná bë' xibá queë' Dios nu nadxí'i luzë'e.

⁹ Caní ta'nná bë' xibá na':

Bití' gunu' dul-la' le riguitsaj xibá que yöl-la' nutsaga na'.

Bití' gútiu' bönachi.

Bití' cuanu'.

Bití' innío' que luzó'o le cabí nácatë.

Bití' së ládxi'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rna didza' rna caní:

Bídxí'i luzó'o ca nadxí'i cuinu'.

¹⁰ Nu na' nadxí'i luzë'e bití' bi run que luzë'e le ruá' dö'. Caní naca, nu na' nadxí'i luzë'e run idú ca rinná bë' xibá queë' Dios.

¹¹ Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo.

¹² Ga zóaru' na'a naca ca chí'i dzó'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chí'i lë' lu gudil-la, ral-la' taru' lu bení' queë' Dios, le gun chí'i rë'u lu na' tu' xihui'.

¹³ Para gunru' caní ral-la' gunru' dxi'a ca ral-la' gun nu ridá lahui' dza. Biti' ral-la' súdxiru', en cabí gágulë'ëru'. Biti' ral-la' gunru' le ruá' dö', en calëga le gun ditaj rë'u. Biti' ral-la' tíl-lalenru' luzá'aru', en cabí uzxé'ëru' luzá'aru'.
¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en bití' güf'i ládxi'li' gunli' le rizé ládxi'li' lu yöl-la' bönáchisö queëli'.

14

Biti' ral-la' si' quídza'ru' böchi' luzá'aru'

¹ Guli'güí' lataj nu réajlë' Cristo gun libí'ili' tsözxön sal-la' bití' naca idú ca réajlë' nu na' Lë'. Biti' tíl-lalenli' nu na' ca nácagaca le runi nu na' huáca nu gun.

² Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabi naca idú ca ta'yéajlë'ë Cristo, tágusë' le raza ruzóaru'.

³ Na'a, bönni' na' rahuë' yúgu'të bití' ral-la' uzóë' tsölá'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' si' quídze'ë bönni' na' rahuë' yúgu'të, tu' nazí' lu në'ë Dios iropé' bönni' na' ta'yéajlë'ë Cristo.

⁴ ¿Nuzxi caz lí', rizi' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'.

⁶ Bönni' na' runë' bal tu dza, runë' le bal para tseaj ládxe'ë Xanru', ate' bönni' na' bití' runë' bal dza na', para tseaj ládxe'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxe'ë Xanru', en rë'ë Dios: "Xclenu", ate' bönni' na' bití' rahuë' yúgu'të, bití' rahuë' le para tseaj ládxe'ë Xanru', en rë'ë ca' Dios: "Xclenu'."

⁷ Bití' zoë' nabanë' queëzë' nitúë' bönni' nabábalenë' rë'u, en bití' ratië' queëzë' nitúë' bönni'.

⁸ Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'.

⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a lí', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u.

¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxíbigaca yúgu'të bönachi lahua' neda'. Ila'guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníguinë' böchi' luzá'aru'

¹³ Que lë ni na', bití'rö ral-la' ichugu bé'ëru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'.

14 Nöz quézida' biti' bi dē le ráguru' le gaca gun ga bítirō nácaru' tsahui' lahuē' Dios, ate' rōjlóz lē ni didza' bē'ē Xanru' Jesús. Channō réquinē' tu bōnni' zoa bi gaca gun ga bítirō náquiē' tsahui' lahuē' Dios, queē' bōnni' nī, caní naca.

15 Channō rusuhui'innu' bōchi' luzó'o, tu' ragu' le runi lē' biti' ral-la' gáguru', biti' runu' ca ral-la' gun nu nadx'i bōchi' luzé'e. Biti' bi ral-la' gagu' le gun ga gaca chopa ládxe'ē bōnni' na', gútiē' Cristo uláz queē'.

16 Que lē ni na', biti' bi gunli' le gun ga ila'nnē xihui' bōnachi que le rusáca'li' queēli' naca tsahui'.

17 Cate' rinná bé'enē' Dios rē'u, biti' ru'í ládxi'ru' le gu'aj gáguru', pero ru'í ládxi'ru' gácaru' tsahui', en sóaru' dxi ladxí, en udzējaru', yugu' le gaca gunru' tu' zóalenē' Dios Bō' Lá'ayi rē'u.

18 Núti'tēs nu run xichinē' Cristo ca nácagaca lē ni, run le raza ládxe'ē Dios, ate' urúaj dxi'a lógaca bōnachi.

19 Que lē ni na' ral-la' gunru' le ilún ga gata' le ribequi dxi ládxi'ru' len yúgu'tē bōnachi, en le ilún tsutsu turu' ia'turu' ca réajlē'ēru' Cristo.

20 Biti' bi ral-la' gagu' le gun ga gaca chopa ladxí' nu na' nuzóē' Dios. Nácatē lē na' ta'nná bōnachi: "Yúgu'tē dē lataj gáguru'", pero gunru' le ruá'dō' channō gunru' ga ichixi iníguinē' luzá'aru' tu' nōzi lē na' ráguru'.

21 Gácarō dxi'a cabí gagu' bēla', en cabí gu'ju' xisi uva nal-la, en biti' bi gunu' le gun ga ichixi iníguinē' bōchi' luzó'o, o le gun ga gaca chopa ládxe'ē, o le gun ga huōaj ládxe'ē ca réajlē'ē Cristo.

22 Channō réajlē'u dē lataj bi gunu', ral-la' gunu' le lahuē' Dios ga zu' tuzu'. Bica' ba bōnni' na' biti' ruxōsa ládxi'da'ahuē' lē' tu' nōzi lē na' runi lē' dē lataj gunē',

23 pero bōnni' na' raza chopa ládxe'ē tu' nōzi le rahuē', nabáguē'ē xíguia', tu' runē' le cabí runi lē' dē lataj gunē'. Naca dul-la' yúgu'tē le runru', le cabí runi rē'u dē lataj gunru'.

15

Ral-la' gunru' le raza ládxe'ē bōchi' luzá'aru'

1 Que lē ni na', channō nácaru' tsutsu ca réajlē'ēru' Cristo, ral-la' guá' ilenru' nupa na' nagul-la ládxi'gaca ca ta'yéajlē' Cristo. Biti' ral-la' gunru' le raza ládxi'ru' la' cuínsiru'.

2 Yúgu'tēru' ral-la' gunru' le raza ládxe'ē bōchi' luzá'aru' para gaca dxi'a queē', en idipa ládxe'ē ca réajlē'ē Cristo.

3 Caní ral-la' gunru', tu' cabí benē' Cristo le guyaza ládxe'ē la' cuinsē', pero guca queē' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'í nupa gula'nnē xihui' quiu' Li', Dios."

4 Yúgu'tē le bulu'zúajē' lu guichi lá'ayi dza ni'te, bulu'zúajē' lu guichi para usēdi rē'u. Lē na' nazúaj lu guichi lá'ayi run ga ribōzaru' zxōn ladxí, en ruhuē' tsahui' rē'u. Que lē ni na' zoa le runru' lōza.

5 Rinábida'-nē' Dios, Nu run ga ribōzaru' zxōn ladxí, en Nu ruhuē' tsahui' rē'u, gunē' ga gunli' tuz ca rusáca'li' queēli', para gácali' ca na' rē'ēnē' Jesucristo.

6 Caní ral-la' gunli' para gácali' tuz, cú'uli'-nē' tsōzxōn yōl-la' ba Dios, Xuzē' Xanru' Jesucristo.

7 Que lē ni na', para gaca yōl-la' ba queē' Dios, guli'sí' lu ná'ali' tuli' ia'tuli' ca na' Cristo guzxi' lu nē'ē ca' rē'u.

⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxi' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa biti' nácgaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'
lógaca bönachi idútë yödzülió,
en gul-la' quiu' yöl-la' ba.

¹⁰ Ga yúbölö nazúaj lu guichi lá'ayi le rnna:
Libí'ili', bönachi idútë yödzülió,
buli'dzéjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:
Guli'cu'ë Xanru' yöl-la' ba,
yúgu'téli' biti' nácali' judío.
Guli'tséaj ladxi' Lë',
yúgu'téli' zóali' idútë yödzülió.

¹² Lë'sca' caní buzúajë' Isaías lu guichi le rnna:
Ilá' lahui Nu nababa di'a dza queë' Isaí.
Gaca lo Nu na' para inná be'e nupa biti' nácgaca judío.
Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinöz quézida' rúntica'sili' le naca dxi'a, en dëda' yöl-la' réajni'i queëli' para gaca uzéajni'ili' luzá'ali'.

¹⁵ Na'a naca' rugu ladxi', ruzúaja' queëli' lu guichi ni, böcha'a, en rusá'a ládxi'li' tu' zoa le buzá' ládxë'ë Dios quia' neda'.

¹⁶ Que lë ni na' runa' xichinë' Jesucristo lógaca bönachi biti' nácgaca judío, en runa' libán que didza' dxi'a queë' Dios, para gaca ugu'a bönachi biti' nácgaca judío lu në'ë Dios, nupa na' guró cazë' Dios Bö' Lá'ayi queë' Lë'. Ilácgacquië' ca tu le rigú'uru' lu në'ë Dios, le raza ládxë'ë Lë'.

¹⁷ Na'a, tu' rúnlena' tsözxön Jesucristo dxin, dë lu na'a tsaza ládxa'a ca naca le nuna' lu xichinë' Dios.

¹⁸ Lë'sca' rurúguida' innía' ca naca lë na' benë' Cristo lu na'a neda', benë' ga tun bönachi biti' nácgaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'.

¹⁹ Lu na'a neda' bugunë' dxin ca' le nácgaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusi' lahua' runa' libán lu yödzo Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo.

²⁰ Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélé'ë lahui dxin zxön chinunë' bönni' yúbölö.

²¹ Ca bena' neda' naca ca na' nazúaj lu guichi lá'ayi le rnna:
Ila'lé'e nupa nacua' ga cuntu nu ben libán queë' Lë',
en ila'yéajni'i nupa catu caz bila'yöni ca naca queë'.

Rě'ëně' Pablo tsejě' yödžö Roma

²² Que lě ni na', sal-la' zían luzuí gú'unida' guída' ga zóali', biti' guca guída'.

²³ Na'a, chibudxi bena' dxin quia' yugu' lataj ni, en chirě'ěnda' zían iz guída' ga zóali'.

²⁴ Que lě ni na', cate' tseja' luyú España, tōda' ga zóali' libí'ili', tu' runa' löza uduyúa' libí'ili', en udžéjalenda' libí'ili'. Tōdi ni' huáca ugú'uli' neda' nōza.

²⁵ Na'a ral-la' tseja' Jerusalén, tsōju'a tu le gácalen nupa ni' néquiquequi queě' Cristo.

²⁶ Caní guna', le gula'yaza ládxi'gaquiě' bōnni' nacu'ě luyú Macedonia, en luyú Acaya, bulu'tubě' bi tu'nōdzjě' quéguequi bōnachi yechi' dzágagaca bōnachi queě' Cristo, nacu'ě Jerusalén.

²⁷ Gula'yaza ládxi'gaquiě' bōnni' biti' nácagaquiě' judío guluně' lě ni. Le nácatě naca tu le rál-la'gaquiě' quégaca bōnachi judío ni'. Channō bōnni' biti' nácagaquiě' judío tu'zi'ě xibé le nácagaca queě' Dios ni'a que le núngaca bōnachi judío, lěsca' ral-la' ilácaleně' bōnachi judío na', ulu'guně' dxin le dě quégagaquiě'.

²⁸ Que lě ni na', cate' údxi udōda' lu ná'agaca bōnachi judío lě na' bulu'nōdzjě' bōnni' ni, ní'irō tōda' ga zóali' libí'ili' cate' tseja' luyú España.

²⁹ Cate' guída' ga zóali', runa' löza idxílnena' yúgu'tě le ruzi'iru' xibé ni'a que didza' dxi'a queě' Cristo.

³⁰ Ni'a queě' Xanru' Jesucristo, en ni'a que yöl-la' nadxí'i ruchíziě' Dios Bō' Lá'ayi icja ládxi'do'oru', ráta'yua' loli', bōcha'ado', ulídzali'-ně' Dios tsōzxön len neda', inábili'-ně' gácaleně' neda'.

³¹ Guli'nabi-ně' Dios guně' ga ulá' neda' lu ná'agaquiě' bōnni' biti' ta'yéajlě'ě nacu'ě luyú Judea, en guně' ga ila'yaza ládxi'gaquiě' ila'zi'ě lě na' tsōju'a lu ná'agaquiě' bōnni' nácagaquiě' queě' Cristo, nacu'ě Jerusalén.

³² Guli'nabi-ně' ca', channō naca ca rě'ěně' Dios, gunně' neda' lataj idxina' queěli' len yöl-la' rudzeja quia', para uzi' ládxi'lena' libí'ili'.

³³ Na'a rinábida'-ně' Dios, Nu run ga zoa dxi ládxi'ru', sóaleně' yúgu'těli'. ¡Ca' gaca!

16

Tu'gapa Dios luzě'eguequi bōnachi queě' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queě' Dios dzáganu bōnachi queě' Cristo nacua' yödžö Cencrea.

² Uláz queě' Xanru' guli'sí' lu ná'ali'-nu nigula na', ca ral-la' ilún bōnachi queě' Cristo. Guli'gácalen lěnu, unōdzjali' queěnu bítí'těs bi riquínnu. Lě cázanu gúcalennu bōnachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsōzxön dxin queě' Jesucristo.

⁴ Chopě' ni gula'dödě' ga guzóa bōnadxi ilátiě' para guluně' ga cabí gátia' neda', ate' rea' légaquiě': "Xclenli'", en calégasō neda', pero lěsca' yúgu'tě bōchi' luzá'aru' nabábagaquiě' gapa nacua' bōnachi queě' Cristo bítí' nácagaca judío, tě'ě légaquiě': "Xclenli'."

⁵ Guli'gapa Dios bōnachi queě' Cristo tu'dubě' lu yu'u lídxiagaquiě' Priscila, en Aquilo na'. Guli'gapa Dios Epeneto, bōnni' na' nadxí'ida'. Bōnni' ni guyéajlě'ě Cristo zí'atělō ca yúgu'tě bōnachi luyú Acaya.

⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'.

⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'aló ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'.

⁹ Guli'gapa Dios Urbano, bönni' na' bénlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'.

¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacua' lidxë' Aristóbulo.

¹¹ Guli'gapa Dios Herodión, bönni' uládz quia'. Guli'gapa Dios nupa nacua' lidxë' Narciso, en ta'yéajlë'ë Xanru'.

¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu.

¹³ Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'.

¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacua'lenë' légaquië'.

¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacua'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacua' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sëdinë' le cabí röjlöz le nazédali'. Guli'cuíta ga nacua' bönachi caní

¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxaj ladxí', tu'gunë' dxin didza' nöxaj ladxí', en didza' tséajlë'ëru' le cabí nácatë.

¹⁹ Rizë didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, ré'ënda' gácali' sina' gunli' le naca dxí'a, en calëga gunli' le ruá' dö'.

²⁰ Dios, Nu run ga zóaru' dxi ladxí', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza.

²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rna xtídzë'ë.

²⁷ ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácatërö caz! ¡Ca' gaca!

DIDZA' ZÍ'ALÖ GUSÖL-LĒ'Ē PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni quëzinë' Dios bulidzë' neda', Pablo, para gaca' gubáz queë' Jesucristo. Bóchi'ru' Sóstenes runë' neda' tsözxón.

² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxón len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'.

³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'-në' Dios: "Xclenu'" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo.

⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të.

⁶ Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo.

⁷ Que lë ni na', biti' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo.

⁸ Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo.

⁹ Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi libí'ili'.

¹¹ Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'.

¹² Lë ni rnní'a': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo.

¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'alsali' nisa para gácali' tuz len neda'?

¹⁴ Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo.

¹⁵ Que lë ni na' biti' gaca innali' bidí'alsali' nisa para gácali' tuz len neda'.

¹⁶ Lësca' buquila' nisa Estéfanos, en nupa nacua' lidxë'. Biti' røjnedá' channö buquila' nisa nu yúbölö.

¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

18 Nupa náragaca chul-la niti téquiquequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusöla rë'u.

19 Caní naca, tu' nazúaj lu guichi lá'ayi le rnna:

Guna' ga huöaca nítisö yöl-la' rácada'
quégaca nupa taca yenni'.

Tsölá'alö ucá'ana' yöl-la' réajni'i
quégaca nupa ta'yéajni'i yenni'.

20 ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzölió ni.

21 Dios, lu yöl-la' réajni'i queë', bití' bë'ë lataj ilünbe'e bönachi yödzölió ni Lë' ni'a que yöl-la' rácada' quégaquië'. Dios guyaza láchë'ë busölë' nupa ta'yéajlë' Lë' ni'a que libán na' runru', sal-la' téquiquequi bönachi cá'asö naca.

22 Té'ennë' yugu' bönni' judío ila'lé'enë' yöl-la' huáca náragaca bë', atë' bönni' zí'tu' ta'guiljé' yöl-la' réajni'i.

23 Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, atë' ia'zica'rö bönachi téquiquequi cá'asö naca.

24 Bönni' na' bulidzë' Dios légaquië', sal-la' nácaquië' bönni' judío o bönni' zí'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios.

25 Téquiquequi bönachi yödzölió ni le benë' Dios naca bë' bití' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiquequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi.

26 Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Bití' gula'cu'ë ladjali' zían bönni' ta'yéajni'inë' lu yöl-la' bönáchisö quégaquië', en bití' gula'cu'ë ladjali' zían bönni' unná bë', en calëga zían bönni' nácaquië' lo.

27 Téquiquequi bönachi yödzölió ni yugu' bönni' na' guröë' Dios bití' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca.

28 Lësca' caní, téquiquequi bönachi yödzölió ni nupa na' guröë' Dios náragaca cá'asö, en bití' bi náragaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni.

29 Que lë ni na', cuntú nu gaca gun ba zxön cuini lahuë' Dios.

30 Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóacaru' tshahü', en néquiru' quez queë' Dios, en nuláru'.

31 Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

2

Libán runru' queë' Cristo, ca gudë'ë lë'e yaga cruz

¹ Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'.

² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz.

³ Guzóalena' libí'ili' lu yöl-la' ricuidi' quia', ate' lu yöl-la' radxi quia' guzxízida'a.

⁴ Bë'lëna' libí'ili' didza', en bena' libán que xtídzë'ë Dios, calëga ca tuí'i didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idütë li didza' bë'a.

⁵ Caní bena' para gaca tséajlë'ëli' Dios, calëga tu' biyönili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzülió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz.

⁷ Ruí'itu' didza' que yöl-la' rácada' nagachi', lë na' runödzejë' Dios, tu' bigachi' yöl-la' rácada' na' buzöë' Dios dza ni'te para uzí'iru' xibë.

⁸ Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dë'ë Xanru' nayëpisëtë'rë' lë'e yaga cruz.

⁹ Naca ca na' nazúaj lu guichi lá'ayi le rnna:

Chinupë'ë Dios le ulu'zí' xibë nupa nadxí'iguequi Lë',

yugu' le cuntú nu ble'e, en biti' biyöni,

en biti' gula'zá' ládxi'gaca bönachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹ ¿Naru' gaca inözinë' nu bönni' le yu'u icja ládxi'da'ahuë' ia'túë' bönni'? Tuz bö' naca cazë' bönni' na' nözi lë na'. Lësca' caní, cuntú nu nözi le yu'u icja ládxi'da'ahuë' Dios. Tuzë' Dios Bö' Lá'ayi nözënë' lë ni.

¹² Rë'u ni, biti' nazí lu ná'aru' tu bö' ridasö yödzülió ni, pero nazí lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxi'ë'ë Dios queëru'.

¹³ Yugu' lë na' buzá' ládxi'ë'ë Dios queëru' ruí'iru' didza' que, calëga len didza' tu'sédinë' bönachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

¹⁴ Tu bönni' biti' zóalenë' Dios Bö' Lá'ayi lë' biti' rizí lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni.

¹⁵ Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'.

¹⁶ Nazúaj lu guichi lá'ayi le rnna:

¿Nuzxi caz nözi le rizá' ládxi'ë' Xanru'?

¿Nuzxi caz gaca uzéajni'i Lë'?

Le rizá' ládxi'ë' Cristo yu'u icja ládxi'do'oru' rë'u.

3

Nácaru' huen dxin tsözxön len Dios

¹ Que læ ni na', böchi' luzá'ado', biti' guca güf'ilena' libí'ili' didza' ca ru'ílana'-në' didza' tu bönni' nudödi cuinë' lu në'ë Dios Bö' Lá'ayi, pero bë'lana' libí'ili' didza' ca ru'ílana' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i huë'ëni. Biti' nácali' tsutsu ca réajlë'ëli'-në' Cristo.

² Busévida' libí'ili' le cabí naca böniga, læ na' guca ca nidxi' güf'ili'. Biti' busévida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a.

³ Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzólió ni.

⁴ Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'.

⁶ Dxin bentu' lu icja láchxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxön xisedo' na' nadúz icja láchxi'do'oli'.

⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizzön xisedo' na'.

⁸ Tuz ca nácaqaquië' bönni' razë', en bönni' rigu'ë nisa. Dios ubi'ë que queëgaquië' tsca naca dxin runë' tu tuë'.

⁹ Nácatu' huen dxin tsözxön len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios.

¹⁰ Ca naca le buzá' láchxë'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'.

¹¹ Dios chigulu'ë tu xilibi zö'ö le naca Lë cazë' Jesucristo, ate' cuntu nu gaca cu'u ia'tú xilibi zö'ö caní.

¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö.

¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi.

¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'.

¹⁵ Channö tsegui dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios queë', pero ulá cazë' læ', ate' gaca queë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja láchxi'do'oli'?

¹⁷ Channö nu usuniti yudo' queë' Dios, Dios usunítië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ládjali' rácada' ca tácada' bönachi yödzölió ni, ral-la' huóaca nu na' ca tu bönni' biti' bi nözinë', para gata' que yöl-la' rácada' le naca idú.

¹⁹ Nu bönni' napzë' yöl-la' rácada' que yödzölió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi."

²⁰ Lësca' caní rnna: "Xanru' nözinë' nítisö naca le ta'bequi ícjagaca bönachi tácada'."

²¹ Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të.

²² Néquiguequi queëli':

Pablo, en Apolos, en Cefas,
en yödzölió ni,
en yöl-la' na'bán, en yöl-la' guti,
en dza ni zóaru' na'a, en dza si' za'.
Yúgu'të nequi queëli',

²³ ate' libí'ili' néquili' queë' Cristo,
ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

¹ Que lë ni na', ral-la' guëquili' nácatu' netu' huen dxin queë' Cristo, en nazí' lu na'tu' le nagachi' queë' Dios.

² Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'.

³ Biti' bi ruí'i ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'.

⁴ Biti' ruxös ládxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchi'a rusöröë' neda'.

⁵ Que lë ni na', biti' ral-la' uchi'a usöröli' nu bönni' zí'alö ca idxín dza que. Guli' cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'tué'.

⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queëli'? ¿Naru' réquitseli' rinná bë'ëli', sal-la' biti' rinná bë'ëtu' netu'? Ní'a queë' Xanru' Dios rë'ënda' inná bë'ëli' para gaca inná bë'lentu' libí'ili' tsözxön.

⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégaquië' bönni' chinarugu quégaquië' ilátië' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë'ë gubáz lá'ayi queë' Dios.

¹⁰ Tu' rë'ënitú' guntu' xichinë' Cristo, ruí'itu' bönachi lataj téquiguequi nácatu' bönni' biti' bi nözquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',
pero téquiquequi bönachi nacuídi'tu' netu'.
Tu'zóa bönachi netu' tsólá'alö,
pero tun libí'ili' bal.

¹¹ Ga ridxintë na'a dza, riduntu', en ribídxitu' nisa.
Biti' dë lari' gácutu'.

Tun bönachi netu' zi', en biti' zoa lídxitu'.

¹² Rusaca' zi' cuintu', la' nétu'sö runtu' dxin.

Tu'lidza bönachi netu' zi',
pero netu' rinábatu' le gácalen léguequi.

Ta'bía ládxi'gaca bönachi netu',

pero ruá' rilentu' le.

¹³ Ta'nnë' queëtu',

pero lu yöl-la' nöxaj ladxi' ru'ilentu' légaquië' didza'.

Ga ridxintë na'a dza nácatu' ca bëbu que yödzülió ni,
en ca tu le ta'rú'una yúgu'të bönachi.

¹⁴ Ruzúaja' queéli' caní lu guichi, calëga tu' rë'ënda' guna' ga utuí'ili',
pero rë'ënda' uzéajni'ida' libí'ili', runa' ca runë' tu bönni' ruzéajni'inë'
yugu' xzí'ini cazë' tu' nadxí'inë' légacabi'.

¹⁵ Sal-la' gaca zían gáyu'ë bönni' ila'cuá'alén libí'ili', en ulu'sédinë' libí'ili'
ca naca queë' Cristo, tuz nu zoa naca ca xúzili', nu na' ben ga néquili' queë'
Cristo. Lu yöl-la' na'bán cubi le náпали' tu' dzágali' Cristo, neda' caz naca'
ca xúzili' tu' busiyönda' libí'ili' didza' dxi'a.

¹⁶ Que lë ni na', ráta'yua' loli' gü'i ládxi'li' gunli' ca runa' neda'.

¹⁷ Que lë ni na' ca' risöl-la'a-bi' bi'i Timoteo ga zóali'. Tu' rúnlenbi'
neda' dxin queë' Xanru' nácabi' ca xzí'ini caza', en nácabi' idú ladxi', ate'
nadxí'ida'-bi'. Gunbi' Timoteo ga tsöjnéli' yugu' xibá rusédida' tu' néquida'
queë' Cristo, yugu' le rusédida' yúgu'të lataj lógaca yúgu'të cö' bönachi queë'
Cristo.

¹⁸ Bál-lali' run ba zxön cuinli' tu' réquili' bíti'rö udxina' ga zóali'.

¹⁹ Na'a, la' udxíntea' ga zóali' channö Xanru' gunné' neda' lataj. Ní'irö
guéquibe'eda', calëgasö didza' tu'ë bönni' tun ba zxön cúngaquië', pero
guéquibe'eda' channö zóalen yöl-la' huáca queë' Dios légaquië'.

²⁰ Channö nazi' lu ná'ali' rinná bé'enë' Dios libí'ili', biti' naca bë' naca
caní tu' rnnásili' ca'. Naca bë' naca caní channö zóalen libí'ili' yöl-la' huáca
queë' Dios.

²¹ ¿Bízxilö rë'ënili'? ¿Naru' rë'ënili' udxina' ga zóali' len gubá'ayi, para
guna' libí'ili' zi', o len yöl-la' nadxí'i, en lu yöl-la' nöxaj ladxi'?

5

Pablo ruchi'a rusö'öë' tuë' bönni' runë' le ruá' dö'

¹ Rizë didza' zóalenë' libí'ili' tuë' bönni' runë' le ruá' dö', tu' zóalenë'
nigula queë' xuzë'. Le ruá' dö' caní biti' ca' tun bönachi biti' núnbë'gaca
Dios.

² Libí'ili' run ba zxön cuinli', pero ral-la' huí'inili', en ubéajli' nu na' run
dul-la' na' ga zóali'.

³ Sal-la' biti' zóalena' libí'ili' lu idútë le naca', le nácatë zóalena' libí'ili' lu
bö' naca caza'. Ca chizóalen caza' libí'ili' chibuchí'a busöröa' nu na' run
dul-la' na'.

⁴ Cate' udúbili' queë' Xanru' Jesucristo guna' libí'ili' tsözxön lu bö' naca
caza'. Ní'irö, len yöl-la' huáca queë' Xanru' Jesús

⁵ buli'dödë' bönni' na' lu na' Satanás tu' xihui' para initi idütë le naca cazë', pero ulá bö' naca cazë' dza ni' huödë' Xanru'.

⁶ Biti' naca dxi'a gun ba zxon cuinli' ca naca le runli'. ¿Naru' cabí nözili' didza' na' rna: "Cua zído'os que yöta xtila gun ga chazxaj idütë' cúa nazí'i le"?

⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila bití' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo.

⁸ Que lë ni na' ral-la' gunru' laní na', calëga zóalen rë'u cúa zi gulás na' le ruluí' le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' ruluí' le naca idú dxi'a, en le naca idütë li.

⁹ Cate' buzúaja' queëli' lu guichi zí'alö, gudxi caza' libí'ili' bití' gunli' tsözxön bönni' tunë' le ruá' dö'.

¹⁰ Gudxa' libí'ili' caní, calëga para ucuítali' tsaz ga nacua' bönachi yödzólió ni, nupa tun le ruá' dö', en ga nacua' bönachi ta'zë ládxi'gaca le dë que luzë'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guiöj budó' yaga. Para gunli' caní gun bayudxi irúajli' yödzólió ni.

¹¹ Le rë'ëni inná didza' na' buzúaja' queëli' zí'alö naca para cabí gunli' tu zxon tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Bití' ca' gágulenli' tsözxön tuë' bönni' caní.

¹²⁻¹³ Bití' nequi quia' neda' uchi'a usöröa' nupa bití' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cüë' ga zóali' bönni' xihui' na'.

6

Bití' ral-la' ichë'ëru' böchi' luzá'aru' lógaca bönachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa bití' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'.

² ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzólió? Channö libí'i cázali' uchi'a usöröli' bönachi yödzólió, ¿naru' cabí nápalí' yöl-la' réajni'i uchi'a usöröli' didza' bizxaj caní?

³ ¿Naru' cabí nözili' ral-la' uchi'a usöröru' yugu' gubáz lá'ayi? Rüntëro bayudxi uchi'a usöröru' le taca yödzólió ga ni zóaru' na'a.

⁴ Na'a, channö raca tu le run bayudxi nu uchi'a usörö, lë na' raca yödzólió ni, ¿bizx que rucua'ali' nupa ulu'chi'a ulu'sörö le, nupa na' bití' bi dë lu në'eguequi ládjagaca bönachi queë' Cristo?

⁵ Rnniá' caní para guna' ga utu'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'?

⁶ ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi bití' ta'yéajlë' Cristo légaquië'?

⁷ Le nácatë richixi riníguili' tu' ridil-la dídza'li'. ¿Bizx que bití' guá' ilenli' nu ruá' dö' queëli'? ¿Bizx que bití' guá' ilenli' nu rucáchi'lan le dë queëli'?

⁸ Libí'ili' ruá'ali' dö', en rucachi' lanli', ate' runli' caní quegaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nözili' biti' ila'yaza bönachi biti' nácagaca tsahui' ga rinná bë'ë Dios? ¡Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':

Cuntu nu reaj ladxí' budó' guiöj budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzë'e bönni'së',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinné xihui',
en cuntu nu rucáchi'lan.

Biti' ca' tsaz nu run caní ga rinná bë'ë Dios.

¹¹ Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bó' Lá'ayi queë' Dios runë' ga raca caní.

Idütë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácate didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'.

¹³ Ta'nná ca' bönachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácate didza' ni, pero idxín dza usunítië' Dios la' huagu, enca' lë'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzi'ë xibë Xanru', ate' Xanru' náquië' para uzi' xibë' idütë le naca cázaru'.

¹⁴ Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

¹⁵ ¿Naru' cabí nözili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¡Biti' ca' ral-la' gunli' caní!

¹⁶ ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'."

¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'.

¹⁹ ¿Naru' cabí nözili' idütë le naca cázali' naca yudo' queë' Dios Bó' Lá'ayi? Dios caz nuchizë' Dios Bó' Lá'ayi na' libí'ili', ate' Lë' zoë' icja ladxí'do'oli'. Que lë ni na' biti' nequi queëzili' idütë le naca cázali'. Na'a, nequi queë' Dios.

²⁰ Dios gú'uë' libí'ili' len tu le zxön le gudixzjë'. Guli'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiquequi queë' Dios idütë le naca cázali', enca' bö' naca cázali'.

7

Rusëdinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula.

2 Tu' tunda' bönachi le ruá' dö' ga ni' zóali', yúgu'tè bönni' nabábagaquiè' libí'ili' ral-la' ila'cuá'lenè'-nu nigula que queégaquiè', ate' yúgu'tè nigula ral-la' ila'cuá'lennu-nè' bönni' que queégacanu.

3 Bönni' na' zóanu nigula queè' ral-la' gunè' queènu nigula queè' ca naca yöl-la' run que yöl-la' nutsaga na', en la' lébisó ral-la' gunnu nigula len bönni' queènu.

4 Biti' dè lu ná'asönu nigula le naca cázanu, pero bönni' queènu dè lu nè'è ca' le. Lësca' caní, bití' dè lu ná'asè' bönni' le naca cazè', pero nigula queè' dè lu ná'anu ca' le.

5 Biti' ral-la' ila'dá'baguè'è luzá'agaquiè' bönni', en nigula na', nutsaga ná'agaquiè'. Huácasö ca' channö ilunè' tuz didza' bití' ila'dzáguiè' tu chí'sö para gaca ulu'lidzè' Dios idú ládxi'gaquiè'. Tödi na', bönni' na' ral-la' sóalenè'-nu nigula queè' leyúbölö, para cabí sequi' Satanás tu' xihui' gun ga tsázagaquiè' nöza dul-la' tu' cabí gaca ila'nná be'e cuíngaquiè'.

6 Lè ni rea' libí'ili' naca tu le runnè' Xanru' libí'ili' lataj. Biti' naca le gunná bè'è.

7 Runi neda' gácarö dxi'a ulu'gá'anè' tuz yúgu'tè bönni', ca na' zoa' tuza' neda'. Tu tuè' bönni' rizi'è tscá le runödzejè' Dios queè' gunè'. Tuè' rizi'è tu le runödzejè', ate' ia'túè' rizi'è ia'tú le runödzejè'.

8 Na'a, rea' nupa zóagaca tuz, enca' yugu' nigula uzèbi, gácarö dxi'a queguequi ulu'gá'ana tuz ca na' zoa' tuz neda'.

9 Channö cabí gaca ila'nná be'e cuíngaquiè', huáca ulu'tsaga ná'agaquiè', tu' gácarö dxi'a ulu'tsaga ná'agaquiè', en cabí ila'zé ládxi'gaquiè' le ruá' dö'.

10 Rinná bé'eda' nupa chinutsaga nè'eguequi, en calèga néda'sö runa' xibá ni, pero Lè cazè' Xanru' runè' le, rnnè': "Biti' ulá'alennu tu nigula bönni' queènu."

11 Channö nu nigula ulá'alennu-nè' bönni' queènu, ral-la' ugá'ananu túzinu, o huöacanu tuz len bönni' queènu na'. Lësca' caní tu bönni' bití' ral-la' ucá'anè'-nu nigula queè'.

12 Na'a, néda'sö rea' ia'zíca'rö bönachi, en calèga rnnè' Xanru' caní, rnnía': Channö zoè' nu böchi' luzá'aru' réajlè'è Cristo, ate' nigula queè' bití' réajlè'ènu Xanru', en channö ré'èninu ugá'analennu lè', bití' ral-la' ulá'alenè'-nu.

13 Lësca' caní rnnía': Channö zóanu nu nigula zanru' réajlè'ènu Cristo, ate' bönni' queènu bití' réajlè'è Xanru', en channö ré'ènnè' ugá'analennu-nu, bití' ral-la' ulá'alennu lè'.

14 ¡Caní ral-la' ilunè'! Bönni' cabí réajlè'è na', Dios rilé'enè' lè' ca tu bönni' néquinè' quez queè' tu' náquiè' tuz len nigula queè' réajlè'ènu Cristo, ate' nigula caní, bití' réajlè'ènu, Dios rilé'enè'-nu ca tu nigula néquinu quez queè' tu' nácanu tuz len bönni' queènu náquiè' böchi' luzá'aru' réajlè'è Cristo. La'tu' cabí naca caní, ilácabi' zxi'inigaquiè' ca yugu' bi'i lan lahuè' Dios. Na'a, nácacabi' quez queè' Dios.

15 Nu bönni' o nigula nu cabí réajlè' Cristo, channö ré'èni ulá'alen nu na' nutsaga ná'alen, huáca ca'. Biti' run bayudxi ugá'analen nu na' böchi' luzá'aru' o zanru' nu réajlè' Cristo, tu' bulidzè' Dios rè'u para cözaru' tsáhuí'do'.

16 ¡Caní ral-la' gaca! Nadxi ca' li', nigula, huáca gunu' ga ulè' bönni' quiu', ate' nadxi ca' li', bönni', huáca gunu' ga ulanu nigula quiu'.

17 Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guéquiru' queë'. Rusëdida' yúgu'të cö' bönachi queë' Cristo xibá ni.

18 Channö Dios bulidzë' nu bönni' narugu lu xipëlë'ë le naca bë' néquinë' queë' Dios, ral-la' ugá'anë' caní, zoa lu xipëlë'ë lë na' naca bë'. Lësca' caní, channö Dios bulidzë' nu bönni' biti' narugu lu xipëlë'ë lë na' naca bë', biti' ral-la' ichúguië' lë na' lu xipëlë'ë.

19 Biti' bi nazaca' lë na' narugu lu xipëlë'ë tu bönni', en channö biti' narugu lu xipëlë'ë bönni' lë na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios.

20 Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'.

21 Channö bulidzë' li' cate' ni' nacu' bönni' nadó'o, biti' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé' lataj na' gata' quiu' iruju'.

22 Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo.

23 Zxöntërö le gudizxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi.

24 Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

25 Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë Xanru' neda'.

26 Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a.

27 Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu.

28 Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'alenbi'-në' bönni', biti' gunbi' dul-la', pero ila'guf'i ila'zaca' nupa nutsaga ná'agaca yödzölió ni, ate' rë'ënda' guna' ga uláli' lu yöl-la' riguf'i rizaca' na'.

29 Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' ilu' ládxi'gaquië' Dios, ca runë' nu bönni' biti' nutsaga ná'alënë' nigula.

30 Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nōxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que.

31 Nupa tu'gún dxin le dë yödzölió ni ral-la' ilaca ca nu biti' ru'f'i ladxí' le dë yödzölió ni, tu' udödi quégaca le rilé'eru' yödzölió ni.

32 Rë'ënda' biti' ubi ugu'f'ili'. Tu bönni' biti' zóanu nigula queë' ru'f'i ládxi'ë le nequi queë' Xanru', naca gunë' le raza ládxi'ë Xanru'.

33 Tu bönni' nutsaga ná'lenë'-nu tu nigula ru'f'i ládxi'ë le raca yödzölió, naca gunë' le raza ládxi'nu nigula queë'.

34 Lësca' caní raca queënu tu nigula nutsaga ná'lennu-në' bönni', en queënu nigula na' zóanu túzínu. Nigula na' zóanu túzínu ru'f'i ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ru'f'i ládxi'nu le raca yödzölió ni, naca gunnu le raza ládxi'ë bönni' queënu.

³⁵ Yugu' lë ni rea' libí'ili' para uzí'ili' xibé lë ni, en calëga para uzága'a xinó'zili'. Ré'ënda' gunli' le ral-la' gunli', para gunli' xichiné' Xanru' idú ládxi'li'.

³⁶ Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queë'bi', en ré'ënde'ebi' utsaga ná'alenbi'-në' bönni', huáca utsaga ná'alenbi'-në'. ¡Biti' gunbi' dul-la'!

³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'.

³⁸ Caní naca, nu ru'í lataj bi'i que utsaga ná'alenbi'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabanë' bönni' queënu. Channö gátië' bönni' queënu, gata' lu ná'anu utsaga ná'lennu-në' nu bönni' ré'ëninu, channö réajlë'ë Xanru' bönni' na'.

⁴⁰ Runi neda' gácarönu bica' ba channö ugá'ananu túzínu, en réquida' Bó Lá'ayi queë' Dios runë' neda' tzaxxón.

8

Le ta'gú'u bönachi lógaca budó' guiöj budó' yaga

¹ Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxön cuinru', pero yöl-la' nadxí'i queëru' luzá'aru' run ga rácalenru' luzá'aru'.

² Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë',

³ pero nu bönni' nadxí'inë' Dios, Dios caz zóalenë' bönni' na'.

⁴ Na'a, ca naca que le ré'aj ráguru', lë na' gula'gú'u bönachi lógaca budó' guiöj budó' yaga, nõziru' biti' bi nazáca'gaca budó' guiöj budó' yaga na' yödzölió ni, en cúnturö nu zoa naca Dios.

⁵ Sal-la' nacua' le téquiguequi bönachi nácgaca dios, le nacua' lúzxi'ba, en le nacua' luyú, ate' zían le tu'lidza bönachi, en tu'í lágaca: dios, enca': xan,

⁶ pero queëru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'aló gula'yéaj ládxi'gaca budó' guiöj budó' yaga, ga ridxintë na'a dza tē'aj tahuë' le gula'gú'u bönachi lógaca budó' guiöj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága gaquië' xíguia' channö tahuë' lë na'.

⁸ Biti' gun le guí'aj gáguru' ga gunë' Dios rë'u bal. Channö gáguru' le, biti' gácaröru' dxi'a, en channö cabí gáguru' le, biti' gácaröru' cá'asö.

⁹ Dë lu ná'ali' guí'aj gáguli' bíti'tës. Guli'gún chi'i cuinli' para cabí gunli' ga ila'chixi na'ligui nupa biti' naca idú ca ta'yéajlë' Cristo.

¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guiöj budó' yaga, en guí'aj gagu' le

gula'gú'u bönachi lo budó' guiöj budó' yaga na', ate' channö nu böchi' luzó'o biti' naca idú ládxë'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiöj budó' yaga na'.

¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o biti' naca idú ládxë'ë. ¿Naru' guntso' caní queë' böchi' luzó'o, ni'a que nu na' gútië' Cristo?

¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxë'ë, en gunu' ca' dul-la' le ruzóa Cristo tsölá'alö.

¹³ Que lë ni na', channö le gu'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasöl-lë'ë Cristo

¹ ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'?

² Nadxi ca' téquiquequi ia'zica'rö bönachi biti' naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

³⁻⁴ Nacuá' nupa ta'zì' quidza' neda'. Caní rubi'a didza', rea' légaquië': Dë lu na'a inaba' le gu'aj gahua' tu' runa' dxin ni.

⁵ Lësca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zica'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro.

⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'?

⁷ ¿Nuzxi caz bönni' rejë' gudil-la, ate' riguijzjë' la' cuinsë'? ¿Nuzxi caz bönni' rudë'ë tu la' yëla que lubá uva, en biti' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en biti' rejë' nidxi' quégacaba'?

⁸ Biti' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés.

⁹ Lu xibá queë' Moisés nazúaj lu guichi le rnna: Biti' cu'u du rúa'aba' bëdxi cate' rulíbiba' zxoá' xtila. Bë'ë Dios didza' ni, calëgasö tu' rufi ládxë'ë-ba' bëdxi,

¹⁰ pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'libiba' bëdxi zxoá' xtila, iropë' na' ral-la' ilunë' löza ila'zi'ë que le rulá luyú na'.

¹¹ Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' biti' ral-la' uzí'itu' xibé tu le do' dë queë'li' ca na' ruzi'ë xibé bönni' guz gú'una le rulapë'?

¹² Ia'zica'rö bönachi tu'zéajni'inë' libí'ili' tu'zi'ë xibé le dë queë'li'. ¿Naru' cabí rála'tërö uzí'itu' xibé netu' le dë queë'li'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo.

¹³ Nöz quézili' ca raca quégaca nupa tun dxin que yudo', tu'zì' xibé gun que yudo'. Lësca' caní nupa ta'gú'u rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'.

¹⁴ Lësca' caní nuzóë Xanru' ca ral-la' gaca quégaquië' bönni' tunë' libán que didza' dxi'a. Nupa tu'zì' xibé libán na' tunë' ral-la' ulu'gagu légaquië'.

¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Guë'ënitëra' gátia' ca gu'a lataj nu innë runa' libán na' tu' nazxja'.

¹⁶ Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a.

¹⁷ La'tu' runa' libán tu' rë'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'.

¹⁸ ¿Bizxi lazxja' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca ziánrö ca' bönachi.

²⁰ Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'.

²¹ Cate' runa' libán lógaca bönachi izá'a, nupa biti' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo.

²² Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca nácgaca yúgu'të bönachi para gaca guna' ga ulu'lágaca bal-la bönachi na'.

²³ Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinöz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queéli'.

²⁵ Yúgu'të bönni', cate' tu'pá'a cúngaquië' para gaca ila'yázië' lu huitaj, ta'nná be'e cúngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uzí'tica'siru' xibé.

²⁶ Que lë ni na', naca' neda' ca tu bönni' idú ládxe'ë rixíti'ë. Naca' ca' ca tu bönni', idú ládxe'ë ridil-lë'. Biti' rucudxa' lu bö'ös.

²⁷ Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

10

Biti' ral-la' tseaj ládxi'ru' budó' guiöj budó' yaga

¹ Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zzul-la tu böaj yúgu'të'. Lësca' caní, gula'dödë' yúgu'të' gatsaj lähui'lö nísado'.

² Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés.

³ Lësca' caní, gulahuë' yúgu'të' yöta xtildo' na' bunödzejë' Dios Bö' Lá'ayi quégaquië'.

⁴ Gulë'ajë' yúgu'të' nisa na' bunödzejë' Dios Bö' Lá'ayi quégaquië', tu' gulë'ajë' nisa birúaj lë'e guiöj na' bulu'e lahui Dios Bö' Lá'ayi, guiöj na' gula'bánnë' légaquië'. Ca guca guiöj na' naca cazë' Cristo, nabániru' Lë'.

⁵ Sal-la' guca caní, bití' guyaza ládxë'ë Dios yúgu'të'. Que lë ni na' gulatië' lu lataj cá'asö.

⁶ Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zé ládxi'gaquië' légaquië'.

⁷ Bití' ral-la' tseaj ládxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'."

⁸ Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulatië' idú ca tsonna-uruá' milë'.

⁹ Bití' ral-la' si' bë'ëru' Xanru', ca na' gula'zì' bë'ë Lë' bal-lë' légaquië', ate' gulatië' tu' guláguya'aba' bëla sínia' légaquië'.

¹⁰ Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítie' légaquië'.

¹¹ Yúgu'të lë ni le gulaca quégaquië' xuz xtó'otu', tu'zëajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yódzölió ni.

¹² Que lë ni na', nu réqui chinal-la, ral-la' gun chi'i cuini, para cabí ichixi inigui.

¹³ Ca naca le ta'zì' bë' libí'ili' raca ca' quéguequi yúgu'të bönnachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenlí, pero cate' bi si' bë' libí'ili', uluí'inë' libí'ili' naca gaca irúajli' lu na' tu' xihui', para gaca guá' ilenlí.

¹⁴ Que lë ni na', böchi' luzá'ado', bití' tseaj ládxi'li' budó' guiöj budó' yaga.

¹⁵ Ruí'ilena' libí'ili' didza' ca ruí'ilena' didza' nupa ta'yéajni'i. Bulí'chi'a bulí'sörö didza' ni gu'a.

¹⁶ Cate' inábiru'-në' Dios gun lá'ayë' le rë'ajru' cate' rusubanru' ca gútië' Cristo, lë na' rë'ajru' ruluí'í nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzjaru', en ráguru', ruluí'í dzágaru'-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'.

¹⁷ Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönnachi.

¹⁸ Bulí'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' ruluí'í dzágagaquië' Dios.

¹⁹ ¿Bizxi rnna didza' ni ruá'a? Bití' rnnía' napa budó' guiöj budó' yaga yöl-la' huáca, en le ta'gú'u bönnachi lógaca budó' guiöj budó' yaga na' bití' napa yöl-la' huáca.

²⁰ Caní rnnía': Lë na' ta'gú'u bönnachi bití' núnbë'gaquië' Dios lógaca budó' guiöj budó' yaga, ta'gú'u lógaca bö' xihui', en calëga lahuë' Dios. Rë'ënda' bití' idzágalí' yugu' bö' xihui'.

²¹ Biti' gaca guí'jali' le rulu'í nácaru' tuz len Xanru', enca' lè na' ulu'í nácali' tuz len yugu' bō' xihui'. Biti' gaca gáguli' le rulu'í dzágaru'-nè' Xanru', enca' le ulu'í dzágali' yugu' bō' xihui'.

²² ¿Naru' gúntsaru' ga uzxé'enè' Xanru'? ¿Naru' réquitseli' nápatëroli' yöl-la' huáca ca napè' Lè'?

Le dè lu ná'aru' gunru', en ca ral-la' idxí'igacru'-nè' böchi' luzá'aru'

²³ Naca idütè li didza' na' rna: "Yúgu'tè dè lu ná'aru' gunru'." Na'a, neda' rnní'a: Calèga yúgu'tè ral-la' gunru'. Yúgu'tè dè lu ná'aru' gunru', pero calèga yúgu'tè gun ga gácarō idú ca réajlè'èru' Cristo.

²⁴ Ral-la' gú'i ládxi'ru' gunru' le gun ga gaca dxi'a quégaquiè' böchi' luzá'aru', en calégasō le gun ga gaca dxi'a que la' cuínsiru'.

²⁵ Bítí'tès bi tuti' bönachi lu yé'èyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'.

²⁶ Nazúaj lu guichi le rna: "Queè' Xanru' nequi yödžölió ni, enca' yúgu'tè le dè yödžölió ni."

²⁷ Channō ulidzè' tu bönni' bití' réajlè'è Dios libí'ili' para guídali' lidxè', ate' guè'ènilí' tséajli', guli'gagu yúgu'tè le cu'è loli', en bití' bi inábali' que, para cabí cuéqui böniga ládxi'do'oli'.

²⁸ Channō nútí'tès nu guíe libí'ili': "Lè ni gula'gu'è lo budó' guiój budó' yaga", bití' gáguli' lè na' para gaca dxi'a que nu na' gudíxjöi'i caní libí'ili', en para cabí cuéqui böniga ládxi'da'ahuè'.

²⁹ Rnní'a: Para cabí cuéqui böniga ládxi'da'ahuè' bönni' na' gudíxjöi'inè' caní libí'ili', en calèga para cabí cuéqui böniga ládxi'do'oli' libí'í cázali'.

Nadxi ca' nu inábini neda', inná: "¿Bizx que ral-la' uzó'a' tsólá'aló le dè lu na'a guna' tu' ribequi böniga ládxi'da'ahuè' bönni' yúbölö?"

³⁰ Huáca inná ca' nu na': "Channō guí'a-nè' Dios: Xclenu', ni'a que lè na' rahua', ¿bizx que nu uzegui neda' didza' ni'a que lè na' rahua'?"

³¹ Channō bi gáguli' o bi guí'jali', o bítí'tès bi gunlí', guli'gún yúgu'tè para gaca queè' Dios yöl-la' ba.

³² Bití' bi gunlí' le gun ga ila'chixi ila'nigui bönachi judío, en bití' gunlí' le gun ga ila'chixi ila'nigui bönachi bití' nácagaca judío, en bití' gunlí' le gun ga ila'chixi ila'nigui bönachi queè' Dios.

³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'tè bönachi, en bití' ruí'i ládxa'a guna' le uzi'a xibé la' néda'sō, pero le ulu'zí' xibé ia'zíca'rō bönachi para ulu'lágaca.

11

¹ Guli'gún ca runa' neda', ca na' neda' ca' runa' ca benè' Cristo.

Le tunnu nigula lógaca bönachi queè' Cristo

² Runa' libí'ili' zxön, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'.

³ Na'a, ré'ènda' tséajni'ili' rinná bé'enè' Cristo yúgu'tè bönni', ate' bönni' rinná bé'enè'-nu nigula, ate' Dios rinná bé'enè' Zxi'inè', Bönni' na' náquiè' Cristo.

⁴ Channō tu bönni' rulidzè' Dios, o ru'è didza' uláz queè' Dios, en dxía icjè' xilu'è, rucá'anè' Cristo cá'asō.

⁵ Na'a, channō tu nigula rulídzanu Dios, o ruí'ínu didza' uláz queè' Dios, en bití' bi xzoa' ícjanu, rucá'ananu bönni' queènu cá'asō, en naca queènu ca naca queènu tu nigula narugu guitsa' ícjanu.

6 Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bí íxóa ícjanu.

7 Tu bönni' biti' bi ral-la' udxía icjè' cate' ridxinè' lahuè' Dios, tu' náquiè' ca naca cazè' Dios, ate' lè na' náquiè' bönni' rulu'í' lahui yöl-la' zxön queè' Dios, pero le nácanu nigula na' rulu'í' lahui yöl-la' zxön queè' bönni' queènu.

8 Cate' benè' Dios bönachi, biti' bubéajè' bönni' na' lu nigula. Nigula na', lu bönni' na' bubéajè'-nu.

9 Lësca' caní, biti' benè' Dios bönni' para uzí'inu xibè' nigula, pero benè' nigula para uzi'è xibánu bönni'.

10 Que lè ni na', nigula na' ral-la' íxóa ícjanu le rulu'í' zoa nu rinná be'e lènu tu' tu'yúè' gubáz lá'ayi queè' Dios rè'u.

11 Na'a, lahuè' Xanru', tu bönni' riquinnè'-nu nigula queè', ate' nigula na' riquíninu-nè' bönni' queènu.

12 Ca na' benè' Dios, bubéajè'-nu nigula lu bönni', lësca' caní na'a, yúgu'tè bönni' náljlengaquiè'-nu nigula, ate' yúgu'tè rirúaj lu nè'è Dios.

13 Bulí'chi'a buli'sörö la' libí'isili'. ¿Naru' ral-la' ulídzanu-nè' Dios tu nigula biti' bi zxoa ícjanu?

14 ¿Naru' cabí rusèdi libí'ili' yöl-la' nácatè quégaca bönachi, ral-la' utuí'inè' bönni' na' ru'è lataj itunna guitsa' icjè'?

15 Na'a, channö natúnna guitsa' ícjanu tu nigula, naca yöl-la' lachi queènu, tu' bè'è Dios queènu guitsa' ícjanu para usubín ícjanu.

16 Channö zoa nu guè'èni tá'baga' didza' ni, canisö nazí' lu na'tu' runtu', en lëbisö tun yugu' cö' bönachi queè' Dios.

Bönachi Corinto tu' cá'ana cá'asö le rë'aj ráguru' para usubanru' ca gútiè' Xanru'

17 Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxí'a queéli' cate' rudúbili' queè' Cristo, pero run ga raca queéli' le cabí naca dxí'a.

18 Risí lahua' ruzéajni'ida' libí'ili' lè ni ta'guíxjö'i' bönachi neda', ta'nná: "Cate' rudúbili' queè' Cristo, narúajli' choplö", ate' réajlè'a nadxi ca' naca caní.

19 Run bayudxi ila'cuá'alen libí'ili' nupa tu'sedi le cabí nácatè para ilaca bè' nupa nácgaca idú bönachi queè' Cristo.

20 Que lè ni na', cate' rudúbili', lè na' ráguli' tsözxön biti' naca le rë'aj ráguru' para usubanru' ca gútiè' Xanru'.

21 Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxön, ate' que lè ni na' ridunli' bál-lali', ate' ia'bál-lali' rë'aj ráguli' ga ridxintè rizúdxili'.

22 ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queè' Dios cá'asö, en runli' ga tu'tuí'i nupa biti' bi dè quéguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lè ni runli'.

Le rë'aj ráguru' para usubanru' ca gútiè' Xanru'

23 Xanru' caz budödè' lu na'a lè na' busédida' libí'ili', ca na' benè' Xanru' Jesús yèla ní' cate' nu budódi Lè' lu ná'agaquiè' bönni' gulútiè' Lè'. Gudélé'è yöta xtila,

²⁴ en cate' budxi gudxë' Dios: "Xclenu'", buzxuzxjë' le, en gunnë': "Guli'gagu. Lë ni naca xipëla'a le nayuzxaj uláz queëli'. Guli'gún caní, para usubanli' ca gaca quia' neda'."

²⁵ Lëasca' caní, gudödi gulahuë', gudélë'ë tu xzíga'do', en gunnë': "Le yudzu xzíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'."

²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu xzíga'do' caní, uluí'ili' lahui ca gütië' Xanru'.

Ca ral-la' gunru' cate' guí'aj gáguru' para usubanru' ca gütië' Xanru'

²⁷ Que lë ni na', nútí'tës nu gagu yöta xtila ni o guí'aj que le yudzu xzíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö.

²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu xzíga'do' ni.

²⁹ Nútí'tës nu rë'aj ragu lë ni, en biti' run le bal tu' cabí réquibe'e ruluí'i le guca queë' Xanru', rusbaga' cuini dul-la' ni'a que lë na' rë'aj ragu.

³⁰ Que lë ni na' te'e zían nupa dzágagaca libí'ili', en ta'cuídí, ate' zianguequi chinátigaca.

³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u.

³² Channö gun bayudxi uchi'a usöröë' Xanru' rë'u, usaca' zí'ë rë'u, para cabí irugu queëru' cate' ichúguië' quéguequi bönachi yödzöliö ilátigaca.

³³ Que lë ni na', böchi' luzá'ado', cate' udúbili' para guí'aj gáguli' para usubanli' ca gütië' Xanru', guli'cöza luzá'ali'.

³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bë'ëli' lataj gula'ché' bönachi libí'ili' ga yúbölö. Guyéaj ládxi'li' budó' guiöj budó' yaga, le cabí ta'nnë.

³ Que lë ni na', ruzéajni'ida' libí'ili' caní, rnnía': Ladaj yúgu'të nupa tuí'i didza' uláz queë' Bö' Lá'ayi queë' Dios, cunttu nu gaca innë xihui' queë' Jesús, en nitüë' gaca innë': "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'.

⁵ Lëasca' caní, nadzá'gaca tu tu dxin rigü'ë Xanru' lu ná'aru', pero tuzë' náquië' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'.

⁷ Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'.

8 Dios Bö' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'tué' bönni', Lë cazë' Bö' Lá'ayi runödzejë' queë' yöl-la' huáca ru'ë didza' lu yöl-la' réajni'i.

9 Lësca' caní, Lë cazë' Dios Bö' Lá'ayi na' runödzejë' queë' ia'tué' bönni' yöl-la' réajlë' Cristo bi gunë', ate' ia'tué' bönni' runödzejë' queë' yöl-la' huáca ruúnë' nupa te'e.

10 Ia'tué' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lë' lataj ru'ë didza' uláz queë' Dios, ate' ia'tué' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'tué' bönni' yöl-la' huáca ru'ë didza' yúbölö le cabí nazëdë', ate' queë' ia'tué' bönni' yöl-la' huáca rudödë' didza' yúbölö na' biti' nazëdë'.

11 Yúgu'të lë ni runë' Lë cazë' Dios Bö' Lá'ayi, tu' runödzejë' que tu tu bönachi tsca rë'ëni quézinë'.

Yúgu'tëru' nácaru' ca tuz bönachi

12 Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaca tuz idütë le naca cázaru', lësca' caní naca queë' Cristo.

13 Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzejä cazë' Bö' Lá'ayi.

14 Na'a, lu idütë le naca cázaru', zían le nagudi' dzágalenru', en calëga tuz.

15 La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'.

16 La'tu' huáca gü'i didza' nágaru', huanná: "Tu' cabí naca' guiöj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'.

17 La'tu' naca guiöj loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e zxína'ru'?

18 Na'a, Dios nucu'ë yúgu'të le nagudi' dzágalenru' ca gú'uni quézinë' Lë'.

19 La'tu' naca tuz le nagudi' dzágalenru', bítirö soa idú ca naca cázaru'.

20 Na'a, ca nácaru', zían le nagudi' dzágalenru', pero tuz le nácaru'.

21 Que lë ni na', guiöj loru' biti' gaca guië ná'aru', inná: "Biti' riquinda' li'." Lësca' caní, ícjaru' biti' gaca guië ní'aru', inná: "Biti' riquinda' libí'ili'."

22 Na'a, yugu' le nagudi' dzágalenru', lë na' réquiru' nácacacarö cuídí'sö, lë ni naquíniröru'.

23 Lësca' caní, yugu' le nagudi' dzágalenru', le réquiru' nácacacarö cá'asö, lë ni rugácuröru' dxí'a, en yugu' le réquiru' biti' ral-la' ilá' lahui, rugácuröru' ca' dxí'a.

24 Biti' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö.

25 Caní benë', ate' biti' narúajgaca choplö le nagudi' dzágalenru', tu' tun chí'i luzë'eguequi tu ia'tú.

26 Channö gaca zí' tu le néquiniru', ilaca zí' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí' xibé tsözxön le.

²⁷ Na'a, libí'i cázali' dzágali' idútë le naca cazë' Cristo, ate' tu tuli' nácali' ca yugu' le nagudi' dzágalenë'.

²⁸ Lësa' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'lú'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

²⁹ Calëga yúgu'të' nácaagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

³¹ Guli'güi' ládxi'li' cu'ë Dios lu ná'ali' yugu' yöl-la' huáca na' nácacagarö lesaca'. Na'a, ulu'ida' libí'ili' tu le nácarö lesaca' ca yúgu'të' lë ni.

13

Yöl-la' nadxí'i

¹ Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucódxiru' o guíë rutíl-laru' luzë'e.

² Sal-la' nazí' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, biti' bi nazáca'a.

³ Sal-la' quísia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

⁴ Nu bönni' nadxí'inë' luzë'ë, ribözë' zxön ladxí'.

Náquië dxi'i ladxí', en biti' ruzxë'enë' luzë'ë.

Nadxí'inë' luzë'ë idú ladxë'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilëtenë', en biti' röjnenë' dö' gulu'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxí'.

⁸ Bíti'rö tódi que yöl-la' nadxí'i. Huadödi que le dë lu ná'agaca bönachi iluí' didza' uláz queë' Dios. Huadxín dza cate' bíti'rö gata' lu ná'agaca bönachi iluí' didza' yúbölö le cabí nazédagaca, ate' huadödi que yöl-la' réajni'i quéguequi bönachi.

⁹ Láti'do'os réajni'iru' na'a, en láti'do'os ca' ru'iru' didza' uláz queë' Dios.

¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu guië dxílido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'.

¹³ Na'a, nacua'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacua' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxí'ili' luzá'ali', en guli'güü' ládxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca gü'ili' didza' uláz queë' Dios.

² Nu ru'í' didza' yúbölö le cabí nazëda, calëga bönachi ru'ilen didza' nu na'. Dios caz ru'ilen didza' nu na', tu' cuntú nu zoa réajni'i didza' ru'í' nu na'. Dios Bö' Lá'ayi ru'ë nu na' lataj ru'í' didza' ca nácacaca le nagachi' queë' Dios.

³ Nu na' ru'í' didza' uláz queë' Dios, ru'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi.

⁴ Nu na' ru'í' didza' yúbölö le cabí nazëda run tsutsu la' cuinsi, pero nu ru'í' didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a gü'ili' didza' yúbölö le cabí nazëdali' yúgu'tëli', pero le naca lo, rë'ënda' gü'ili' didza' uláz queë' Dios. Ruzí'iröru' xibé nu ru'í' didza' uláz queë' Dios ca ruzí'iru' xibé nu ru'í' didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo.

⁶ Que lë ni na', böchi' luzá'ado', cate' guída' ga zóali', channö gü'ilena' libí'ili' didza' yúbölö le cabí nazëda', bití' bi uzí'ili' xibé. Uzí'sili' xibé didza' na' gü'ilena' libí'ili' le nulu'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucödxi'ru', o ca naca guitarra. Channö cabí tul-la ca ral-la' ilún, ¿nacxi' caz gúnbë'ëru' bízxilö le gut-la na', lë na' rul-la gui na', o guitarra na'?

⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi' caz upá' cuini para tseaj lu gudil-la na'?

⁹ Lësca' caní raca queëli'. Channö len lúdxí'li' gü'ili' didza' le cabí taca bönachi, bití' ca' ila'yéajni'i didza' gü'ili'. Caní gaca, nítisö gü'ili' didza'.

¹⁰ Le nácatë nacua' zían didza' yúbölö tu'í zían cö' bönachi izá'a lu yödzölió ni, ate' nacua' bönachi ta'yéajni'i tu tu didza' na'.

¹¹ Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'.

¹² Lësca' caní naca queëli'. Ru'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güü' ládxi'li' sí'ili' le ilún ga ilácarö tsutsu bönachi queë' Cristo.

13 Que lë ni na' ca', nu ruí'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le rë'ëni inná didza' na' ruí'i nu na'.

14 Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a.

15 ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba.

16 Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?

17 Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé nu na' riyöni.

18 Rea'-në' Dios: "Xclenu'", tu' ruí'ira' didza' yúbölö le cabí nazëda' ca yúgu'tëli'.

19 Lógaca bönachi queë' Dios guë'ënitëröda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntu nu gaca tséajni'i. Gaca usédida' ia'zíca'rö bönachi tuzi channö ila'yéajni'i didza' gu'a.

20 Böchi' luzá'ado', bití' gácali' ca bí'ido' ca naca le rizá' ládxi'li'. Gulí'gaca ca bí'ido' para cabí gunlí' le ruá' dö', pero gulí'gaca bönni' chinácagaca ca naca le rizá' ládxi'li'.

21 Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílina' bönachi ni didza'. Sal-la' guna' caní, bití' ulu'zë nágagaca xtídza'a." ¡Caní rnnë' Xanru'!

22 Caní naca, Dios ru'ë rë'u lataj ruí'iru' didza' yúbölö le cabí nazëdaru' para gaca tu le naca bë' lógaca bönachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ruí'iru' didza' uláz queë' Lë' le ulu'zí' xibé nupa ta'yéajlë' Cristo, en calëga bönachi na' bití' ta'yéajlë'.

23 Que lë ni na', cate' udúbili' tsözxön, yúgu'tëli' na' néquili' queë' Cristo, channö gü'íli' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa bití' ta'yéajlë' Cristo, ¿naru' cabí ila'nná: "Nachixi ícjali"?

24 Na'a, channö yúgu'tëli' gü'íli' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'i didza' gü'íli' yúgu'tëli'.

25 Guéquibe'e ca naca le rizá' ladxí' nu na', lë na' bigachi', ate' uzóa zxibi nu na', en tseaj ladxí' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

26 Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguië' libí'ili' tu salmo, ate' rusédinë' ia'tué' tu xibá, ate' ia'tué' riguíxjöi'inë' libí'ili' tu le buluí'inë' Dios lë', ate' ia'tué' ru'ë didza' yúbölö le cabí nazëdë', ate' ia'tué' rudödë' didza' yúbölö na' le cabí nazëdë'. Yúgu'të le gunlí' ral-la' gaca le ulu'zí' xibé nupa tu'dubi queë' Cristo.

27 Cate' nacua' ni' nupa tuí'i didza' yúbölö le cabí nazëdagaca, bití' ral-la' gü'íli' didza' caní zíanró ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'tué', pero run bayudxi soa nu udödi didza' yúbölö na' le bití' nazëdali'.

28 Channö cuntu nu zoa nu gaca udödi didza' yúbölö na' le cabí nazédali', nu na' ruí'i didza' yúbölö le cabí nazëda ral-la' soa dxisö ga na' nudúbili', ate' huáca gü'ilen Dios didza' na' lu icja ládxi'da'ahui.

29 Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'.

30 Channö Dios ulu'inë' tu bönni' rö'ë ni' le rë'ëni inná xtídzë'ë, ral-la' soa dxisö nu na' ruí'i didza'.

31 Yúgu'tëli' huáca gü'ili' didza' uláz queë' Dios tu tuli' para izédali' yúgu'tëli', en idipa ládxi'li' ca' yúgu'tëli'.

32 Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö.

33 Calëga Dios nu run ga rutsátsaru', tu' rë'ënë' Lë' gácaru' ba'a ladxi', ca na' runë' ga nacua' yúgu'të cö' bönachi queë' Cristo.

34 Ral-la' ila'cuá'anu dxisö nigula queëli' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anu nòxaj ca na' rinná bë' xibá queë' Dios.

35 Channö të'ëninu ila'yéajni'ínu ia'lati', ral-la' ila'nábinu bönni' que queëgacanu cate' ni' nacu'ë lédxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

36 ¿Naru' réquitseli' bunödzejë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queëzili' libí'ili'?

37 Channö nu bönni' nùtsë'ë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queëli' lu guichi ni.

38 Na'a, channö cabí ruí'i ládxe'ë didza' ni, bití' güf'i ládxi'li'-në' bönni' na'.

39 Que lë ni na', böchi' luzá'ado', guli' güf' ládxi'li' gü'ili' didza' uláz queë' Dios, en bití' inná bé'eli' nu ruí'i didza' yúbölö le cabí nazëda.

40 Ral-la' gunru' yúgu'të ca sa'yéaj, en lu yöl-la' ba'a ladxi'.

15

Bubanë' Cristo lu yöl-la' guti

1 Na'a, böchi' luzá'ado', riguixjöi'ida' libí'ili' ca naca didza' dxi'a na' bena' libán que ga zóali', lë na' guzxi' lu ná'ali', ate' run ga nácarö idú ca réajlë'ëli' Cristo.

2 Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

3 Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'.

4 Rnna ca': "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'.

5 Gudödi ni' buluí'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'.

6 Ní'irö buluí'i lahuë' lógaquië' zianró ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxön. La'tu'biqui' yúgu'të böchi'ru' ni nacu'ë nabángaquië' na'a, sal-la' bal-lë' chinátigaquië'.

7 Ní'irö Jacobo bilé'enë' Lë', en gudödi ni' buluí'i lahuë' lógaquië' yúgu'të bönni' gubáz queë'.

⁸ Ga yöjsetë buluí'i lahuë' ca' lahua' neda'. Ca guca lë ni, naca' ca tu bí'ido' gúljabí' cate' chigudödi dza ral-la' gáljabí'.

⁹ Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' sí' la' gubáz queë', tu' gudxía ládxa'a bönachi queë' Dios.

¹⁰ Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichinë' ca ia'zíca'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin.

¹¹ Na'a, channö bena' libán neda' o channö gulunë' libán ia'zíca'rë' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, çnacxi caz naca, rnnali' bál-lali': "Bití' ulu'bán nupa chinátigaca"?

¹³ La'tu' cabí ulu'bán nupa chinátigaca, bití' bubanë' Cristo,

¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queë'li' Lë'.

¹⁵ Ia'stú, la'tu' cabí bubanë' Cristo, rizi' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo.

¹⁶ La'tu' cabí ulu'bán nupa chinátigaca, bití' bubanë' Cristo,

¹⁷ en la'tu' cabí bubanë' Cristo, nítisö naca yöl-la' réajlë' queë'li' Lë', ate' nagá'anagaca dul-la' nabága'li'.

¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'.

¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti.

²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca.

²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo.

²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'.

²⁴ Ní'irö idxín dza údxi cate' ugüë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz.

²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'.

²⁶ Le ridá'baga' Lë' le usunítie' ga údxi naca yöl-la' guti.

²⁷ Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rnná: "Budödë' yúgu'të lu në'ë para inná bé'enë' le." Na'a, naca bë' bití' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'.

²⁸ Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

29 Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

30 Zoa bönadxi queëtu' gátitu' yúgu'tè dza. ¿Bizx que ru'itu' lataj gaca caní channö cabí ubanru' lu yöl-la' guti?

31 Yúgu'tè dza zoa bönadxi gátia'. Riguíxjö'ida' libí'ili' lè ni, böchi' luzá'ado', tu' raza ládxa'a le bena'. Caní naca tu' bena' ga réajlè'èli' Xanru' Jesucristo.

32 Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxö huidzaj."

33 Biti' güi'ili' lataj nu si' ye'e libí'ili'. Channö si' lu ná'ali' láti'do'os le cabí nácatè, idútèli' huóacali' chul-la niti.

34 Buli'bí'i ládxi'li', en biti' gunli' dul-la' tu' cabí núnbè'èli'-nè' Dios bál-lali' libí'ili'. Rnnía' caní para guna' ga utu'ili'.

Ca ilaca nupa ulu'bán lu yöl-la' guti

35 Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácagaca cazè' cate' ulu'dxinè'?"

36 Li', bönni' biti' bi nõzinè'. Lè na' rázu' luyú biti' ilén channö cabí initi.

37 Lè na' rázu' luyú naca tu xisédo'os, nadxi ca' que zxo'a' xtila o que ia'tú guixi' cuando'. Lè na' rázu' biti' naca guixi' cuando' na' ral-la' ilén.

38 Dios runè' ga gaca guixi' cuando' ca nun cazè' que. Ca naca tu tu xisédo' na' runè' ga gaca guixi' cuando' que.

39 Lësca' caní, biti' naca lëbisö bëla' que queëgacaba' yúgu'tèba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguinni, en ia'tú ca naca bëla' quégacaba' böla.

40 Lësca' caní nadzá' idú ca nácagaca caz nupa nacuá' yehua' yubá ca naca idú ca nácagaca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca yöl-la' lachi quégaca nupa nacuá' luyú ni.

41 Zoa tu yöl-la' lachi que gubidza, en ia'tú que beo', en ia'tú quéguequi bölj lúzxiba. Yöl-la' lachi que tu bölj lúzxiba nadzá' ca naca yöl-la' lachi que ia'tú bölj lúzxiba.

42 Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz.

43 Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la.

44 Cate' rigachi' lu yeru ba naca tu bëla' que yödzülió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzülió ni, en ia'tú ca gaca le idzaga bö' naca cázaru'.

45 Nazúaj lu guichi lá'ayi le rnna: "Bönni' na' gusí lahuè' zoè' luyú ni, lè' Adán, Dios benè' lè' bönni' ban", pero Bönni' na' guyáziè' xilatjè' Adán, Lè' Cristo, Dios benè' ga náquiè' Bö' nabániru'.

46 Biti' blè'è zí'alö Bönni' na' náquiè' Bö'. Bla' zí'alö nu na' naca bönáchisö, ate' ní'irö blè'è Bönni' na' náquiè' Bö'.

47 Bönni' ni' blè'è zí'alö, gúquinè' yu. Bönni' na' blè'è burópilö, Nu na' naca Xanru', birúajè' yehua' yubá.

⁴⁸ Nupa nacua' luyú ni náca gaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá.

⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huóequiru' ca néquinë' Nu na' birúaj yehua' yubá.

⁵⁰ Caní rë'ëni inná lë ni rea' libí'ili', böchi' luzá'ado', rnníá': Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz.

⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'.

⁵² Tsárido'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'.

⁵³ Lë na' nácaru' le riniti ral-la' huóaca le soa tsaz, ate' le néquiniru', lë na' ral-la' gati, huóaca tu le catu caz gati.

⁵⁴ Cate' lë na' riniti chinuhuóaca le soa tsaz, enca' lë na' ral-la' gati chinuhuóaca le catu caz gati, ní'irö idxín lë na' nazúaj lu guichi lá'ayi, le rna:

Nadúa tsaz yöl-la' guti.

Chibidélinë' Cristo.

⁵⁵ Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios.

⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' biti' runli' nítisö xichinë' Xanru'.

16

Yugu' bönachi Corinto tu'nödzej queégaquië' böchi'gaca ta'yádzjanë'

¹ Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacua' luyú Galacia.

² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queëli'. Guli'gún chi'i le, para cabí gun bayudxi bi utúbil' cate' idxina' ga zóali'.

³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzejali'.

⁴ Channö ral-la' tseja' ca' neda', tsöjácalenë' neda'.

Le rë'ënë' gunë' Pablo

⁵ Guída' ga zóali' cate' údxi töda' yugu' yödzo luyú Macedonia, tu' run bayudxi töda' yugu' yödzo na'.

⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácaleni' neda', ugú'uli' neda' nöza gátitës ga ral-la' tseja'.

⁷ Cate' guída' uduyúa' libí'ili' biti' rë'ënda' tödisa' ni'. Runa' löza sóalena' libí'ili' xidzé, channö gunnë' Xanru' neda' lataj.

⁸ Ugá'ana' ni lu yödzo Éfeso ga idxinrö dza Pentecostés

⁹ tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi ugu'ibi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'.

¹¹ Que lë ni na', cuntu nu ral-la' uzóa lëbi' tsólá'alö. Guli'gácalen-bi', ugu'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyüë' libí'ili' tsözxön len yugu' böchi'ru', pero bití' rë'në' tsejë' na'a. Guídë' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxi'li'.

¹⁴ Len yöl-la' nadxí'i guli'gún bítí'tës bi gunli'.

¹⁵ Na'a, böchi' luzá'ado', chinöz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacúa' luyú Acaya. Bulu'dödi cuíngaquië' para ilunë' xichíngaca bönachi queë' Dios.

¹⁶ Ráta'yua' lolí', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'.

¹⁷ Rudzëjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queë'li'.

¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'.

²⁰ Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu bití' nadxí'i Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxi'ë queë'li'.

²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzo Corinto, enca' yúgu'tëli' néquili' quez queë' Dios luyú Acaya ga na' nababa Corinto.

² Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le gudí'i guzxáquë'ë Pablo

³ ¡Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhuí'tica'sö rë'u!

⁴ Dios ruhué tsáhuë'ë rë'u cate' raca bíti'tës bi raca queëru', para gaca huë tsáhuí'ru' ca' nupa bi raca quéguequi. Ruhué tsáhuí'ru' légaquië' ca na' Dios ruhué tsáhuë'ë rë'u.

⁵ Tsa ta'yán le riguí'i rizáca'ru', ca na' gudí'i guzxáquë'ë Cristo, lësca' caní ta'yán le tu'hué tsáhuí' rë'u, tu' nácaru' tuz len Cristo.

⁶ Que lë ni na', channö bi riguí'i rizáca'tu', raca caní queëtu' para gaca huë tsáhuí'tu' libí'ili', en guntu' ga uláli'. Channö Dios ruhué tsáhuë'ë netu', raca caní para gaca huë tsáhuí'tu' libí'ili', ate' lu yöl-la' riböza zxön ladxi' queëli', gaca guá' ilenli' yugu' le quí'i sáca'li', ca na' raca ca' queëtu'.

⁷ Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibë tsözxön len netu' le ruhué tsáhuë'ë Dios rë'u.

⁸ Ré'ënitü' inözili', böchi' luzá'ado', ca naca le zían le gulaca queëtu' luyú Asia. Gudödité' bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'.

⁹ Gúquitu' guca queëtu' ca raca quégaquië' bönni' chinarugu quégaquië' ilátië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca.

¹⁰ Dios busölë' netu' lu lë na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö

¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zían, uzá' ládxë'ë queëtu', ate' ilá'nná: "Xclenë' Dios" ni'a queëtu'.

Rigúxjö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bö' naca caztu' rulu'i netu', len yöl-la' ba'a ladxi' queëtu', en idú ládxi'tu' runtu' bi runtu' yödzülió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni' queëztu' bentu' caní.

¹³ Ruzájásötu' queëli' lu guichi le gaca ulábali', en le gaca tséajni'ili'. Raca ládxa'a tséajni'ili' idú

¹⁴ lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

¹⁵⁻¹⁶ Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili'

xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'.

¹⁷ ¿Naru' réquitseli' guzxi' yë'a tu' butsó'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bé'ësa' ca' didza' cate' gunnía': "Caní guna'?"

¹⁸ Ni'a queë' Xanru' Dios, Nu run idútë ca rnna xtídzë'ë, biti' bé'ësa' ca' didza' cate' bé'lëna' libí'ili' xtídzë'ë Dios.

¹⁹ Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, biti' ru'isë' ca' didza'. Lë' ru'ë didza' idútë li.

²⁰ Cristo caz runë' ga naca idútë löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba.

²¹ Dios caz runë' ga runtu' löza tsözxón len libí'ili' néquiru' queë' Cristo, en budödë' lu na'tu' dxin queë' runtu'.

²² Bennë' queëru' le naca bë' néquiru' queë', tu' guchízië' icja ládxi'do'oru' Dios Bô' Lá'ayi, Nu naca queëru' le run ga naca löza yúgu'të le gunnë' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'.

²⁴ Biti' rë'ënitü' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Rë'ënitü' guntu' le gun ga udzeja ládxi'li'.

2

¹ Que lë ni na' bë' ládxa'a cabí guídatea' queëli' zí'alö, para cabí guna' ga huí'inili'.

² Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'?

³ Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'.

⁴ Cate' ni' buzúaja' queëli' lu guichi lë na', gusëbide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxi'

⁵ Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnnía': "Huaca innaru'", para cabí tödi bë' ichugu bë'a queë' bönni' na'.

⁶ Tscati' gaz xíguia' chibenli' látu'biqui' yúgu'tëli' queë' bönni' na'.

⁷ Na'a, ral-la' uniti loli' bönni' na', en utípali' ládxe'ë, para cabí tödi bë' huí'ininë', en para cabí gaca tsaz chopa ládxe'ë.

⁸ Que lë ni na' ráta'yua' loli' gunli' le gaca bë' nadxí'ili'-në' idú ládxi'li'.

⁹ Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica'sili' ca rnna xtídzá'a.

¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé.

¹¹ Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le rë'ëni gun queëru'.

Gurö'ë böniga Pablo lu yödzo Troas

¹² Cate' bidxina' lu yödzo Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'.

¹³ Sal-la' guca caní, gurö'a böniga tu' cabí yöjxáca'a-bi' bi'i böchi'ru' Tito ni'. Que lë ni na' buzá'alena' bönachi ni', ate' guyija' luyú Macedonia.

Idéli'ru' tu' zóalenë' Cristo rë'u

¹⁴ ¿Xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusólá queëru'. Dios rugunë' dxin rë'u para rulu'ë lahui ca gaca ilúnb'e bönachi Cristo. Le nácaru' naca ca tu le rilá' zxixi, le riguisi gátí'tës.

¹⁵ Nácaru' ca tu nóri rilá' zxixi, le ruzégui'ë Cristo lahuë' Dios, en le riguisië lógaca nupa nulágaca, en nupa nanítigaca.

¹⁶ Lógaca nupa na' nanítigaca nácaru' ca tu le rilá' siguti le naca bë' ilátie'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní?

¹⁷ Biti' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'o. Tu' nasöl-lë'ë Dios netu', idú ládxi'tu' ruí'itu' didza' lahuë' Lë' tu' nácatu' tuz len Cristo.

3

Ca naca didza' le ruún rë'u tuz len Dios

¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'itu' libí'ili' tu guichi le rulu'í' le nácatu'? ¿Naru' ral-la' inábitu' libí'ili' gúnnali' queëtu' tu guichi caní, ca na' tun bal-la bönachi?

² Libí'i cázali' nácali' ca tu guichi le rulu'í' le nácatu', le nazúaj lu icja ládxi'do'otu', ate' yúgu'të bönachi gaca ulu'laba le, en tséajni'iguequi le.

³ Le nácali' nalá' lahui ca tu guichi nuzúajë' Cristo, le gusöl-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiöjta'a, pero lu icja ládxi'do'oli' nuzúajë'.

⁴ Ruí'itu' caní didza' tu' ruzxöni ládxi'tu'-në' Dios tu' zóalenë' Cristo rë'u.

⁵ Biti' réquitu' bi gaca guntu' rácasö queëtu', pero Dios runnë' queëtu' yöl-la' huáca bi guntu'.

⁶ Dios caz bennë' queëtu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusëdinë' Dios Bö' Lá'ayi rë'u. Xibá na' nazúaj lu guichisö richugu queëru' gátiru', pero Dios Bö' Lá'ayi nabániru'.

⁷ Yugu' xibá queë' nazúajgaca lu guichi, Dios buzúajë' yugu' lu guiöjta'a, ate' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyëpitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca,

⁸ zxöntëro naca yöl-la' bení' na' dzaga yugu' le runë' Dios Bö' Lá'ayi.

⁹ Yöjtsaga yöl-la' bení' lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácatu' tsahui' bönachi.

¹⁰ Tu' nácatëro lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi.

¹¹ Channö guzóa yöl-la' bení' que lë na' guzóa tu chí'ido'osö, zxöntëro naca yöl-la' bení' que lë ni sóatica'sö.

¹² Tu' zoa lë ni runru' löza, ruí'itu' didza' lu yöl-la' rugu ládxi'.

¹³ Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti.

¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca uguë' tuzë' Cristo.

¹⁵ Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiöj lógaquië' le run ga nachul-la nanítigaquië'.

¹⁶ Cate' nu ruhuóaca queë' Xanru', rigúa lë na' run ga nachul-la naniti nu na'.

¹⁷ Cate' ni rnnatu': "Xanru'", ru'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán.

¹⁸ Yúgu'tëru' rë'u biti' bi nusayaj loru'. Nácaru' ca tu guié dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queëru' yöl-la' bení' queë'.

4

¹ Dios buéchi' ládxë'ë netu', en budödë' lu na'tu' dxin ni runtu'. Que lë ni na' biti' raca chopa ládxi'tu'.

² Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí' yé'etu', en biti' rutsá'atu' xtídzë'ë Dios. Tu' ru'itu' didza' que le naca idútë li, ru'í' ládxi'tu' guntu' le iléquibe'e yúgu'të bönachi naca dxi'a lahuë' Dios.

³ Channö zoa nu biti' réajni'ini didza' dxi'a runtu' ba nalí que, nácagacasö nupa nachul-la nanítigaca biti' ta'yéajni'i le.

⁴ Biti' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz.

⁵ Biti' runtu' libán que la' cuínsitu', pero runtu' libán queë' Jesucristo, en rigúxjö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús.

⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

⁷ Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zi' bönachi netu', pero biti' rudú ládxi'tu'.

Rö'ötu' böniga, pero biti' raca chopa ládxi'tu'.

⁹ Ta'bía ladxí' bönachi netu', pero biti' rubéaj ládxë'ë Dios netu'.

Ta'zé'ede'e netu' yu, pero biti' tu'suniti netu'.

¹⁰ Lu idú le naca caztu' rátitica'stu' tsözxön len Jesús,

na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti.

¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queëli'.

¹³ Nazúaj lu guichi lá'ayi le rnna: "Guyéajlè'a Dios, ate' que lè ni na' bè'a didza'." Lè'sca' caní raca queètu', réajlè'ètu' Dios, en que lè ni na' ruí'itu' didza'.

¹⁴ Nöztu' ca gunè' Dios, Nu busubán Xanru' Jesús, usubanè' ca' netu' tsözxön len Jesús, en usudxinè' netu' tsözxön len libí'ili' lahuè' Lè'.

¹⁵ Raca caní yúgu'tè lè ni para gaca bi uzí'ili' xibé. Channö ila'deli' zianró ca' bönachi le ruzá' ládxè'è Dios queèru', ila'nnè': "Xclenè' Dios", ate' gaca yöl-la' ba queè' Dios.

¹⁶ Que lè ni na', bití' raca chopa ládxi'tu'. Sal-la' riniti idú le naca caztu', yúgu'tè dza rucubè' Dios le nácatu' lu icja ládxi'do'otu'.

¹⁷ Le cúidi'sö riguí' rizáca'ru' ni tu chí'ido'osö run ga gata' queèru' le uzí'da'aru' xibé le sóatica'sö, en le nácatèrö lesaca' ca gaca gúnbè'èru'.

¹⁸ Bití' ruí' ládxi'ru' le rilé'èru' luyú ni, pero le bití' gaca ilé'èru' ruí' ládxi'ru'. Lè na' rilé'èru', tu chí'ido'osö zoa, pero le cabí gaca ilé'èru' sóatica'sö.

5

¹ Nöziru' cate' initi idútè le naca cázaru', le naca ca tu yu'u lári'do' yödzólió ni, Dios chinupè'è tu le cubi queèru', le naca ca tu yu'u le zoa tsaz ni' yehua' yubá, lè na' nun cazè' Lè'.

² Que lè ni na' rinnè ládxi'ru' tu' rë'èniru' tsú'uru' le cubi ni', lè na' naca ca tu lídxi'ru' ni' yehua' yubá.

³ Tsú'uru' le cubi ni' ca na' rácuru' tu lari', para cabí sóaru' ga bití' zoa idútè le naca cázaru'.

⁴ Tsanni ni zóaru' lu idútè le naca cázaru', le naca ca tu yu'u lári'do', rinnè ládxi'ru' lu yöl-la' risèbi ladxi' queèru'. Bití' runru' caní tu' rë'èniru' ucá'anaru' idútè le naca cázaru', pero rë'èniru' tsú'uru' tsaz le cubi ni'. Caní gaca, ucá'anaru' idútè le naca cázaru' le riniti, ate' tsú'uru' lu yöl-la' na'bán idú.

⁵ Dios chinupè'è yúgu'tè lè ni queèru', ate' guchíziè' rë'u Dios Bö' Lá'ayi, Nu naca queèru' le naca bè' naca löza sí'iru' lè na' nupè'è queèru'.

⁶ Que lè ni na' nadipa ládxi'ru'. Tsanni ni yú'uru' lu le naca cázaru', nöziru' zóaru' zítu' ga zoa lidxè' Xanru'.

⁷ Runru' ca runru' tu' réajlè'èru'-nè' Dios, en calèga tu' zoa bi rilé'èru'.

⁸ Tu' runru' löza lè ni, rë'èniru' ucá'anaru' le naca cázaru' ni para tsöjsóalenru'-nè' Xanru'.

⁹ Que lè ni na' ruí' ládxi'ru' gunru' le raza ládxè'è Xanru', channö ugá'anaru' lu idútè le naca cázaru' ni, o channö tsöjsóalenru'-nè' Xanru' ni'.

¹⁰ Caní runru' tu' run bayudxi idxinru' yúgu'tèru' lahuè' Cristo ga ni' rë'è ruchi'a rusöröè'. Ní'irö ubi'è que queèru' tscá naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruún rë'u tuz len Dios

¹¹ Que lè ni na', tu' rádxitu'-nè' Dios, ruí' ládxi'tu' uzéajni'itu' bönachi. Nözinè' Dios ca naca le yu'u icja ládxi'do'otu', ate' ruzxöni ládxa'a nözilí' dxi'a ca' libí'ili' lè na' yu'u icja ládxi'do'otu'.

¹² Bití' rubéaj cuintu' dxi'a loli'. Rë'ènitú' gata' lataj queéli' gunlí' netu' bal, para gaca ubí'ili' didza', bi guiéli' yugu' bönni' tun ba zxön cuíngaquiè' ca na' tu'luf'isö lahui cuíngaquiè', en calèga ca nácaagaquiè' lu icja ládxi'do'gaquiè'.

13 Channö nachixi ícjatú, naca para gaca yöl-la' ba queë' Dios, en channö cabí nachixi ícjatú, naca para gaca bi uzí'ili' xibé.

14 Run bayudxi bi guntu' tu' nadxí'iné' Cristo rë'u, tu' chinöziru' tuz Nu guti uláz quegaca yúgu'të bönachi, en que lë ni na' naca quegaca yúgu'të bönachi tsca nátilengaca Lë' tsözxón.

15 Lë' gútië' uláz quegaca yúgu'të bönachi para cabirö ilunë' bönni' nabángaquië' le nequi quegacasë', pero le nequi que Nu na' guti uláz quegaquië', en bubán lu yöl-la' guti.

16 Que lë ni na', bítirö gúnbë'ëtu' bönachi tsca naca le nalá'gaca láhui'lö, en sal-la' canísö bënbe'ëtu'-në' Cristo, bití' núnbe'ëtu'-në' caní na'a.

17 Channö nuhuóaca nútí'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

18 Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'.

19 Libán runtu' rna caní: "Dios guzóalenë' Cristo, en benë' ga gaca ulu'huóaca bönachi yödzölió ni tuz len Lë', en bití' röjnenë' dul-la' gula'bagá'." Budödë' lu na'tu' didza' dxi'a ni, ca gaca ulu'huóaca bönachi tuz len Dios.

20 Na'a, nácatu' gubáz queë' Cristo, en raca na'a ca Dios caz ráta'yüë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóaca tuz len Dios.

21 Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

1 Tu' runtu' dxin tsözxón len Dios, ráta'yutu' loli', rnnatu': Bití' udödili' cá'asö le ruzá' ládxë'ë Dios queéli'.

2 Nazúaj lu guichi lá'ayi ca gunné' Dios le rna:

Tu dza buzá' ládxa'a quiu', biyönda' lí,
ate' dza bena' ga gaca uló, gúcalena' lí.

¡Buli'yútsöca'! ¡Na'a naca dza ruzá' ládxë'ë queëru'! ¡Na'a naca dza gaca uláru'!

3 Bití' rë'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'.

4 Ni'a que bítí'tës bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxon ladxi' ruá' rilentu' yugu' le riguí' rizáca'tu', en yugu' le riyadzaj queëtu', en yugu' le tun ga rö'ötu' böniga.

5 Caní bentu' sal-la' gula'zé'ede'e bönachi netu' yu, en gula'gu'ë netu' lidxi guié, en gula'bía di'i netu'. Gudödi bë' bentu' dxin, en bití' guta' lataj queëtu' gásitu' o bi gágutu'.

6 Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni',
en tu' riböztu' zxon ladxi', en tu' nácatu' dxi'i ladxi',
en tu' zóalenë' Dios Bö' Lá'ayi netu',
en tu' naca idú ca nadxí'itu' luzá'atu'.

7 Ruí'itu' didza' idütë' lí, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chí'i netu' lu gudil-la na'.

8 Nacuá' nupa tun netu' bal, enca' nupa tu'zóa netu' tsólá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizí' yé'etu', ruí'itu' didza' idúté li.

⁹ Sal-la' nacuá' bönachi bití' núnbē'gaquiē' netu',
nacuá' ca' nupa núnbē'gaca netu'.

Ridatu' ga zoa bönadxi gátitu', pero ni zóatu' nabantu'.

Tunē' netu' xíguia', pero bití' tutiē' netu'.

¹⁰ Tu'suhuí'ini netu', pero rudzējatica'stu'.

Nácatu' bönni' yechi', pero runtu' ga rata' yöl-la' tsahui' idú quegaca
bönachi zían.

Sal-la' bití' bí' dē queētu', nequi queētu' yúgu'tē le dē.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto.
Buluí'itu' libí'ili' ca ruí'i ládxi'da'tu' libí'ili'.

¹² Channó cabí nácaru' tuz bití' naca tu' cabí ruí'i ládxi'tu' libí'ili', pero
libí'i cázali' bití' ruí'i ládxi'li' netu'.

¹³ Na'a, ruí'ilena' libí'ili' didza' ca runē' tu bönni' ruí'ilenē'-bí' zxi'inē'
didza', rnniá': Bulí'bí' queētu' ca rúnlentu' libí'ili'. Gulí'gúf' ladxí' netu'.

Nácaru' ca tu yudo' ga yu'ē Dios ban

¹⁴ Bití' gácali' tuz len bönachi bití' ta'yéajlě'.

¿Nacxi gácatsō ilaca tuz le naca tsahui', en le cabí naca tsahui'?

¿Nacxi gácatsō ilaca tuz le naca chul-la, en le naca bení'?

¹⁵ ¿Nacxi gácatsō ilácagaquiē' tuz Cristo, en Satanás, tu' xihui'?

¿Nacxi gácatsō ilácagaquiē' tuz tu bönni' réajlě'ē Cristo, en tu bönni' bití'
réajlě'è?

¹⁶ ¿Nacxi gácatsō ilaca tuz yudo' queē' Dios, en budó' guióǵ budó' yaga?

Libí'i cázali' nácali' ca tu yudo' ga yu'ē Dios ban. Ca naca lē ni, Dios caz
gunné':

Sóalena' légaquiē', en tálena' légaquiē'.

Gaca' Dios quégaquiē', ate' légaquiē' iláquiē' bönachi quia'.

¹⁷ Que lē ni na', gunné' ca' caní:

Gulí'rúaj ládjagaquiē', en bulí'lá'alēn légaquiē'.

Rnnē' Xanru': "Bití' gútsa'li' le ruá' dō', ate' sí' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxi'ina', bönni', en nigula."

Caní rnnē' Xanru', Nu napa caz idúté yöl-la' huáca.

7

¹ Böchi' luzá'ado', néquiguequi queēru' yugu' lē ni guzxi' lu nē'ē Dios.
Que lē ni na' ral-la' un cuinru' dxi'a, en ubéajru' yúgu'tē le rucá'ana cá'asō
idúté le naca cázaru', en bö' naca cázaru'. Lu yöl-la' radxi queēru' Dios ral-
la' guéquiru' quez queē' Lē'.

Ca bulu'bí' i ládxi'gaca nupa ta'yéajlě' Cristo

² Gulí'sí' lu ná'ali' netu'.

Cuntu nu biá'atu' dō' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

³ Ruá'a caní didza', calēga para usubága'a libí'ili' xíguia', pero naca ca
na' chigunní'a' zí'alō, rnniá': Zoa' sina' ibánlena' libí'ili' o gátilena' libí'ili'
tu' ruí'i ládxa'a libí'ili'.

⁴ Ruzxónida' ládxa'a libí'ili', en rúnda'a libí'ili' zxon. Sal-la' zían le riguí'i
rizáca'tu', nadípada' ládxa'a, en rudzējade'e ládxa'a.

⁵ Cate' bidxintu' luyú Macedonia, ga ridxintē' na'a dza, bití' rata'
queētu' lataj uzí ládxi'tu', pero zían le taca queētu'. Ta'díl-lalen bönachi
netu', ate' lu icja ládxi'do'otu' yú'ugaca le tun ga rádxitu'.

6 Ní'irö Dios, Nu rutipa ladxi' nu chizóa gaca chopa ladxi', butipë' ládxi'tu' cate' budxinbi' bi'i Tito ga guzóatu'.

7 Biti' gúcasö tu' budxinbi' queétu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' rë'ënide'eli' ulé'eli' neda', en ca na' ruhuí'inili' ni'a que lë na' guca ni', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

8 Sal-la' le buzúaja' queéli' lu guichi zí'alö ben ga buí'inili', biti' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu chí'ido',

9 pero na'a rudzédaja', calëga tu' buí'inili', pero tu' ben yöl-la' ruhuí'ini queéli' na' ga bubí'i ládxi'li'. Dios bugunë' dxin yöl-la' ruhuí'ini queéli', para cabí'ichixi iníguili' ni'a que le bentu' netu'.

10 Yöl-la' ruhuí'ini na' rugunë' dxin Dios run ga nu ubí'i ladxi' para ulá nu na', ate' que lë ni na' biti' ral-la' huí'iniru' que. Yöl-la' ruhuí'ini le naca que yödzölió ni run ga ilátigaca bönachi.

11 Buli'yútsöca' ca bugunë' Dios dxin yöl-la' ruhuí'ini queéli' na'. Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que lë na' guca.

12 Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guzaca', pero para gaca bë' lahuë' Dios le nácatë ruí'i ládxi'li' netu'.

13 ¡Lë ni butipa ládxi'tu'! Calëgasö bidipa ládxi'tu', pero rudzédaje'e ládxi'tu' tu' rudzëjabi' bi'i Tito ni'a que le benli' libí'ili', tu' butípali' ládxi'bi'.

14 Bena' libí'ili' zxonlobi' Tito, ate' biti' benli' ga utuí'ida'. Bë'lentica'stu' libí'ili' didza' idútë li, ate' lësca' caní naca idútë li didza' bë'lentu'-bi' Tito cate' bentu' libí'ili' bal.

15 Zeaj rácarö idú ca nadxí'ibi' bi'i Tito libí'ili' cate' røjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxi' queéli'.

16 Rudzédaje'eda' tu' gaca uzxöni ládxa'a libí'ili' idú ládxa'a.

8

Ca ral-la' unödzaj nu réajlë' Cristo le dë que

1 Na'a, böchi' luzá'ado', rë'ënitü' quíxjöi'itu' libí'ili' ca naca le buzá' ládxe'ë Dios quégaca yugu' có' bönachi queë' Cristo luyú Macedonia.

2 Sal-la' yenni' gula'guí'i gula'záquië' lu yugu' le guzxi' bë' légaquië', bulu'dzédaje'enë', en idú ládxi'gaquië' bulu'nödzjadë'ë sal-la' nácaquië' bönachi yechi'.

3 Neda' runa' ba nalí' quégaquië', idú ládxi'gaquië' bulu'nödzjadë'ë tsca gula'zéqui'në', en bulu'nödzjarë' tsca gula'zéqui'në'.

4 Gula'nábide'enë' netu', en guláta'yudë'ë lotu' gú'itu' légaquië' lataj tsözxön len netu' ilácalenë' böchi'ru' ta'yéajlë'ë Cristo.

5 Gulunrë' ca guqui ícjavu' ilunë'. Bulu'dödi cúngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios.

⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxi' queéli', ca na' gusí lobi' benbi' zí'aló.

⁷ Nácali' lo ca naca yúgu'të le runli',

ca réajlë'ëli' Cristo,

en ca réajni'ili',

en ca ruzéajni'ili' bönachi,

en ca ruí'i ládxi'li' luzá'ali',

enca' ca nadxí'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unódzjali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nódzaj idú ládxi'gaca, para guna' ga gunli' le gaca bë' naca idú ca nadxí'ili' luzá'ali'.

⁹ Nöz quézili' le buzá' ládxe'ë Xanru' Jesucristo queëru'.

Bilé'enë' yöl-la' tsahui'

pero para gácalenë' libí'ili'

böáquië' yechi'

para gata' queéli' yöl-la' tsahui',

tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunódzjali', pero lësca' ca gú'unili' unódzjali'.

¹¹ Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunódzjali'. Buli'nódzaj na'a tsca séqui'li'.

¹² Channö ré'ënili' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

¹³ Biti' ré'ënda' guna' ga unódzjali' le gácalen ia'zica'rö bönachi ga idxintë yadzaj queéli'.

¹⁴ Ré'ënda' gaca tuz ca dë queéli', en quégaquië'. Na'a dëda' queéli' le gaca unódzjali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nódzjé' queéli' para caní gaca tuz ca dë queéli', en quégaquië' yúgu'tëli'.

¹⁵ Lësca' caní nazúaj lu guichi lá'ayi le rnna: "Nu na' butúbida', bití' bugá'ana que, ate' nu na' butubi láti'do'os, bití' biyadzaj que."

Ca runbi' bi'i Tito, enca' nupa dzágagaca lëbi'

¹⁶ ¡Xclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'!

¹⁷ Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rásasö queëbi' gú'unibi' tsöyubi' libí'ili'.

¹⁸ Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a.

¹⁹ Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runódzjali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo.

²⁰ Caní gaca, gunë' netu' tsözxön para cuntu nu bi gaca innë queëtu', ca rúnlentú' dumí na' runódzjada'ali', le gácalen bönachi yechi'.

²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

22 Risól-la'tu'-në' ca' ia'tué' böchi'ru' tsözxön len légaquië', ate' zían luzuí guzxi' bë'ëtu' lë', ate' naca bë' rë'ënë' gácalenë' rë'u idú ládxë'ë. Ia'stú, tu' ruzxöni ládxë'ë libí'ili', rë'ënitërönë' ca' gácalenë' rë'u lu dxin ni.

23 Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë' böchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo.

24 Guli'gún ga gaca bë' nadxí'ili' légaquië' para iléquite'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchi'ru'

1 Ca naca le runödzejali' quégaquië' böchi'ru' ta'yéajlë'ë Cristo, biti' run bayudxi uzúaja' queéli' lu guichi ni.

2 Chinözda' ca rë'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjö'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'ili' ládxí'li' gunli' lë ni, bidipa ládxí'gaca lá'tu'biqui' yúgu'të bönachi ni ta'yéajlë' Cristo.

3 Na'a, risól-la'a yugu' böchi'ru' ni queéli' para gaca bë' naca idútë li didza' ruí'itu' ca naca queéli', ate' naca ca na' chigunnia' queéli', chizóa gunli' lë na' gácalen yugu' luzá'aru'.

4 Channö ila'zá'alén bal-la bönachi Macedonia ta'yéajlë' Cristo neda' tsözxön, ate' gaca bë' biti' zuíni gunli' lë na', ní'irö utuí'itu' tu' buzxöni ládxí'tu' libí'ili', ate' libí'i cázali' ca' ral-la' utuí'ili'.

5 Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unödzejali'. Caní gaca, údxí utúbili' dumí na' zí'alö ca idxina', ate' gaca bë' runödzejali' tu' rë'ëni cázali', en calëga tu' rinná bé'etu' libí'ili' bi unödzejali'.

6 Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

7 Tu tuli' ral-la' unödzejali' tsa na' chinuzóali' icja ládxí'do'oli', en calëga lu yöl-la' ruhu'ini queéli' o tu' run bayudxi, tu' nadxí'inë' Dios nu runödzejali' idú ladxi'.

8 Dios gaca gúnnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que.

9 Lësca' caní nazúaj lu guichi lá'ayi le rnna:

Idú ládxë'ë bunödzejë' quégaca bönachi yechi'.

Naca bë'tica'sö yöl-la' dxi'i ladxi' queë'.

10 Dios, Nu runna queëru' bi gaz uzóaru', enca' bi guí'aj gáguru', gunnë' ca' queéli' bi unödzejali', le naca ca lë na' nu raza ruzóa, en gunë' ca' ga ila'yán le ilápali' le nácagaca yugu' le dxi'a runli'.

11 Dios gunë' ga gáta'da' queéli' yöl-la' tsahui' para gaca unödzejada'ali'. Caní gaca, yugu' le unödzejali', lë na' quísitu' uláz queéli', gun ga ila'nná bönachi zían: "Xclenë' Dios."

12 Lë na' runödzejali' le gácalen yugu' böchi'ru', calëgasö gü'i quégaquië' le ta'yádzjanë', pero gun ga ila'nnë': "Xclenë' Dios."

13 Cate' gunli' caní, ila'gu'ë Dios yöl-la' ba tu' gaca bë' runli' ca rna didza' dxi'a queë' Cristo ca na' rnnali' runli'. Ila'gu'ë Lë' yöl-la' ba ca', tu' nácali' dxi'i ladxi', runödzejali' queégaquië', enca' quegaca ia'zica'rö bönachi.

14 Ulu'lidzë' Dios, en ila'nábinë' Lë' gácalenë' libí'ili' tu' nadxi'iguequinë' libí'ili' ni'a que le buzá' ládxi'dë'ë Dios queëli'.

15 ¡Xclenë' Dios, bennë' tu le nácada' lesaca' queëli'!

10

Yöl-la' unná bë' dë lu në'ë Pablo

1 Ta'nná bönachi naca' nöxaj ladxi' cate' zóalena' libí'ili', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' loli'

2 cabí gunli' ga gun bayudxi gaca' rugu ladxi' len libí'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' bönáchisö queëtu'.

3 Le nácatë nácatu' bönachi, pero calëga rácasö queëtu' runtu' xichinë' Dios.

4 Yugu' le rudí'initu' lu gudil-la, bití' nácagaca ca le tu'dí'ini bönachi yödžöli' ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

5 Rusunítitu' yugu' didza' bití' nácate' le tu'zxöni ládxi'gaca bönachi, en yúgu'të le tun ga tun ba zxön cuínguequi, en le tun ga cabí ilunbë' Dios. Runtu' ga gaca ila'nná bé'enë' yúgu'të le ta'zá' ládxi'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnnë' Cristo.

6 Tödi gunli' le gaca bë' naca idú ca runli' ca rna xtídzë'ë Cristo, sóatu' sina' guntu' xíguia' yúgu'të nupa ni' ta'dá'bagu' xtídzë'ë.

7 Ruyuli' le nalá' láchuisö. Channö réquinë' nu bönni' dzáguie' libí'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo.

8 Bití' ca' rutuí'ida' sal-la' gudödi bë' ben ba zxön cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'.

9 Bití' ré'ënda' guéquili' ré'ënda' gun gádxida' libí'ili' ni'a que le ruzúaja' queëli' lu guichi ni.

10 Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zi'ë rë'u, en ralë' didza', pero cate' zóalënë' rë'u runë' nöxaj ladxi', en didza' gúlado' ru'ë."

11 Nu na' ru'í' caní didza' ral-la' guéquibe'e lë ni: Ca na' nácatu' cate' bi ruzúajtu' queëli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

12 Le nácatë bití' nácatu' rugu ladxi' para innatu' nácatu' lëbi ca nácagaca nupa ni' tun ba zxön cuínguequi. Nácagaca nupa ni' yugu' bönni' bití' bi nözguequinë'. Lu le ta'za'sö ládxi'gaquië' tu'zöé' ca ral-la' ilaca bönachi, en tu'chi'a tu'söröë' la' légacasë' tscá naca lë na' ta'za'sö ládxi'gaquië'.

13 Netu' bití' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'.

14 Channö budödë' Dios lu na'tu' dxin guntu' ga zóali', bití' ca' gudödi bë'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'.

15 Biti' run ba zxön cuintu' ca naca dxin núngaca ia'zica'rö bönachi, pero ca nacasö dxin na' budödë' Dios lu na'tu'. Runtu' löza gácarö idú ca réajlé'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'.

16 Ní'irö gaca guntu' libán que didza' dxi'a ga nacua' yödzo dzö'ö zí'tu'rö ga zóali'. Caní gaca, biti' gun bayudxi gun ba zxön cuintu' ni'a que dxin núngaca ia'zica'rö bönachi, lë na' budödë' Dios lu në'eguequi.

17 Nazúaj lu guichi lá'ayi le rnna:

Nu ré'ëni bi gun zxön,

le ben cazë' Xanru' ral-la' gun zxön.

18 Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

11

Ca nácaqaquië' Pablo, en bönni' tun cuíngaquië' gubáz queë' Cristo

1 Ré'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá ládxi'li' quia'.

2 Ruí' ládxa'a libí'ili' ca na' Dios caz ruí' ládxi'ë libí'ili', tu' nácali' ca nácabi' tubi' bi' ní' nigula ra'bando', naca idú ládxi'bi', rusudxina'-bi' lahuë' Cristo para utsaga ná'alenbi' Lë cazë'.

3 Rádxida' idxin queëli' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queënu Eva, nigula queë' Adán, cate' guzxi' ye'e Satanás tu' xihui' lënu lu yöl-la' sina' que.

4 Caní rnnía' tu' idú ládxi'li' ruí'ili' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca náca gaca Bö' Lá'ayi na', en didza' dxi'a na' guzxi' lu ná'ali' lu na'tu' netu'.

5 Réquida' biti' nácara' cuídi'sö ca nácaqaquië' bönni' ni' nácatërögaquië' lo, ate' réquili' nácaqaquië' gubáz queë' Cristo.

6 Nadxi' ca' naca' cuídi'sö ca ruá'a didza', pero biti' naca' cuídi'sö ca naca yöl-la' réajni' napa'. Zían luzuí, en zían ca bulu'itu' libí'ili' ca naca yöl-la' réajni' napatu'.

7 Nadxi' ca' biti' naca dxi'a tu le bena', biti' bi buquizzja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön.

8 Buguna' dxin le nequi quëguequi ia'zica'rö cö' bönachi queë' Cristo, tu' guzxi'a dumí bulu'nödzejë' légaquië' quia' para guca bena' dxin ga zóali' libí'ili'.

9 Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'.

10 Ní'a que le naca idútë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya.

11 ¿Naru' réquitseli' rnnía' caní tu' cabí nadxí'ida' libí'ili'? Nözinë' Dios nadxí'ida' libí'ili'.

12 Gúntica'sa' ca runa' na'a, para cabí gata' quëgaquië' lataj ilún ba zxön cuíngaquië' bönni' ni' ta'nnasë' nácaqaquië' gubáz queë' Cristo, en ta'nnë' tunë' xichinë' Lë' ca runtu' netu'.

13 Biti' ca' nácaqaquië' gubáz nasöl-lë'ë Cristo. Ta'zí' yë'ë ca naca dxin tunë', en tun cuíngacasë' gubáz queë' Cristo.

14 Biti' ral-la' ubániru' ca tunë' bönni' na'. Lësca' Satanás caz, tu' xihui', ruluí'i cuini ca tu gubáz lá'ayi queë' Dios, ridë' lu beni'.

15 Que lë ni na' biti' ral-la' ubániru' channö yugu' huen dxin que tu' xihui' na' tu'luf'i cuíngaquië' ca nupa tun xichini Nu na' naca tsahui'. Udxí quegaquië' ca sa'yéaj le tunë'.

Yugu' le gudí'i guzxáquë'ë Pablo

16 Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'.

17 Didza' ni ruá'a biti' naca le rinná bè'ë Xanru', pero ruá'a didza' ca tu bönni' nachixi icjë', run ba zxön cuina'.

18 Nacu'ë zían bönni' tun ba zxön cuíngaquië' ca nácagaca le tunë' lu yöl-la' bönáchisö quegaquië'. Que lë ni na', neda' ca' gun ba zxön cuina'.

19 Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi ícjagaquië'.

20 Ruí'ili' ca' lataj nu gun libí'ili' bönni' nadó'ogaca, o nu cúa le dë queëli', o nu inná be'e libí'ili', o nu ucá'ana libí'ili' cá'asó, o nu capa' rú'ali'.

21 Rutuí'ida' rnnía' lë ni: Biti' bentu' caní queëli' tu' gudödi bè' gúcatu' nōxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

22 ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxi'ini xi'sóë' Abraham?

Lësca' naca' neda'.

23 ¿Naru' nácagaquië' huen dxin queë' Cristo?

Lësca' nácátëra' neda'.

(Na'a ruá'a didza' ca tu bönni' nachixi icjë' cate' rnnía' caní.)

Béntëra' dxin ca gulunë' légaquië'.

Guyu'a lidxi guíë zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quegaquië'.

Guzóa bönadxi gátia' zíanrö luzuí ca guzóa quegaquië'.

24 Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

25 Tsonna luzuí gula'guínë' neda' gubá'ayi.

Tu luzuí bulu'ladxë' neda' guiöj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

26 Zían luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zi'tu',

en gapa guzóa bönadxi quia' lu yödö,

en gapa guzóa bönadxi quia' lu lataj cá'asó,

en gapa guzóa bönadxi quia' lu nísado',

en gapa guzóa bönadxi quia' lu ná'agaquië' bönni' ta'zì yë'ë, ta'nnë' nácagaquië' böchi'ru' ta'yéajlë'ë Cristo.

27 Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari' gácuu'.

28 Ia'stú, yúgu'të dza ruúbi ruguí'ida' tu' ruí'ida' ládxa'a yúgu'të cö bönachi queë' Cristo.

29 Cate' nu ricuídi', neda' ca' ricuídi'da'. Cate' nu run ga ichixi iníguinë' tu böchi'ru', rileda' nu run caní.

30 Channö run bayudxi gun ba zxön cuina', gun ba zxön cuina' ca naca le nácatë bë' ricuídi'da'.

31 ¡Dios, Xuzë' Xanru' Jesucristo, gácatica'sö queë' yöl-la' ba! ¡Lë' nözinë' ruá'a didza' idútë li!

32 Cate' ni' guzóa' lu yödzö Damasco, bönni' ni' guta' lu në'ë uláz queë' bönni' rinná bë'ë, lë' Aretas, bucu'ë yugu' bönni' gula'bö' nísie' para ila'zönë' neda',

33 pero yugu' böchi'ru' ni' bulu'dödë' neda' tu ga ra'a bení' que yu'u, yu'a tu ga böra zxön, en bulu'zötjë' neda' ní'lö lu zö'ö run chi'i yödzö na'. Caní guca, bulá' lu ná'agaquie' bönni' ni' gula'bö' nísie' neda'.

12

Yugu' le buluí'inë' Dios Pablo

1 Le nácatë biti' ral-la' gun ba zxön cuina'. Sal-la' caní naca, na'a gu'a didza' ca nácatë le buluí'inë' Xanru' neda', en le buzéajni'inë' neda'.

2 Núnbë'a-në' tu bönni' réajlë'ë Cristo, chiguca chidá' iz zoa nu guchë' lë' yehua' yubá. Biti' nözda' channö guyijë' ni' lu idútë le naca cazë', o lu bö' naca cazë'. Tuzë' Dios nözinë'.

3 Nözda' guyázië' lataj lachi queë' Dios, nazí'i le paraíso. Biti' nözda' channö guyijë' ni' lu idútë le naca cazë', o cabí. Tuzë' Dios nözinë'.

4 Tsanni ni' zoë' ga na', biyönnë' le tun ga nu rubani, yugu' le biti' dë' lataj nu gü'i didza' que.

5 Bönni' ni huáca guna' lë' zxön, pero biti' gun ba zxön cuina'. Tuz gun ba zxön cuina' tu' ricuídi'da'.

6 La'tu' guë'ënida' gun ba zxön cuina', biti' gaca' bönni' biti' bi nözinë', channö innía' le naca idútë li. Na'a, biti' gun ba zxön cuina' tu' cabí ré'ënda' nu gunrö neda' bal tsca le bilé'e bena' neda', o tsca naca didza' biyöni bë'a neda'.

7 Ní'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios buzöë' tu huë' lu xipéla' a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'.

8 Tsonna luzuí gúta'yua' lahuë' Xanru', en gunábida' Lë' ugüë' xihuë'a na'.

9 Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuídi'nu'." Que lë' ni na', rudzëjade'eda' tu' ricuídi'da'. Tu' raca caní quia', rácalentëro yöl-la' huáca queë' Cristo neda'.

10 Que lë' ni na', tu' nadxí'ida'-në' Cristo, rudzëjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatëro caza' yöl-la' huáca queë' Lë'.

Pablo ruí'i ládxe'ë bönachi queë' Cristo nacuá' Corinto

¹¹ Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí'li cázali' benli' bayudxi bena' caní. Libí'li' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácaquië' bönni' ni' nácada'gaquië' lo, ta'nnë' nácaquië' gubáz queë' Cristo.

¹² Yugu' le bena' lu yöl-la' riböza zxon ladxi' quia' ga ni' zóali' náca-gaca bë' naca' gubáz queë' Cristo. Bilé'eli' yugu' le bena', le náca-gaca bë', en le tun ga nu rubani, en yugu' yöl-la' huáca zxon que yehua' yubá.

¹³ Tuz le cabí bena' ga zóali' le bena' ga nacua' ia'zica'rö cö' bönachi queë' Cristo. Biti' busaca' zi'a libí'li' bi gúnnali' le guf'aj gahua'. Buli'niti lo neda' tu' cabí bena' caní queë'li'.

¹⁴ Chizóa guída' ga zóali' le bunny luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queë'li'. Yugu' bi'i huë'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxi'inigaquië'.

¹⁵ Idú ládxa'a utóa' yúgu'të le dë quia', en udödi cuina' ni'a queë'li' para gaca bi uzí'ili' xibé, sal-la' réquida' cate' nadxi'iröda' libí'li', zeaj ruhuéchi' yöl-la' nadxi'i queë'li' neda'.

¹⁶ Nöz quézili' biti' busaca' zi'a libí'li'. Na'a, bál-lali' innali' guca' sina', ate' len didza' biti' nácatë buzi'a xibali'.

¹⁷ ¿Naru' réquitseli' guzxi' yé'eda' libí'li' cate' gusöl-la'a yugu' gubáz quia' ga zóali'?

¹⁸ Gúta'yua' lobi' bi'i Tito tséajbi' ga zóali', ate' gusöl-la'a-në' böchi'ru' na' tsözxön len lébi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lébisö ca runtu' bi'i Tito, en neda', enca' la' lébisö didza' bë'ëtu'?

¹⁹ ¿Naru' réquitseli' rubéaj cuintu' dxi'a loli' libí'li'? Lahuë' Dios ruí'tu' didza' uláz queë' Cristo, böchi' luzá'ado', ate' yúgu'të le runtu' náca-gaca para gácarö idú yöl-la' réajlë' queë'li' Cristo.

²⁰ Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'li' gaca'. Rádxida' ridil-la' dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxon cuinli', en rutsátsali'.

²¹ Cate' guída' ga zóali', channö caní raca queë'li', rádxida' gunë' Dios ga utuí'ida' ca naca queë'li', ate' gun bayudxi cödx'a' ni'a quégaca zían nupa ni' gulún dul-la', en biti' bulu'bí'i ládxi'gaca ca náca-gaca le cabí naca tsahui' gulúngaca, en yugu' le gula'zë ládxi'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

¹ Le bunny luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzë'e didza'."

² Chibuzéajni'ida' nupa gulún dul-la' cate' ni' guzóalena' libí'li' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxi' para til-la' légaquië'.

³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queë'li', pero lu yöl-la' huáca zxon queë' runë' bi runë' queë'li'.

⁴ Le nácatë gudë'ë lë'e yaga cruz ca nu ricuídi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxön len Lë', pero

tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'?

⁶ Runtu' löza chinöz quézili' le nácatë netu' réajlë'ëtu' Cristo.

⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sala' guéquili' richixi riníguitu' netu'.

⁸ Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li.

⁹ Que lë ni na' rudzëjatu' cate' ricuídítu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo.

¹⁰ Que lë ni na' ruzúaja' queëli' lu guichi lë ni tsanni ni zoa' zítu' ga zóali'. Ní'irö cate' guída' ga zóali' bití' gun bayudxi usaca' zí'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxi'li', en calëga para usunítia' libí'ili'.

¹¹ Na'a, böchi' luzá'ado', dipa ládxi'li'.

Guli'güí' ládxi'li' gaca idú ca réajlë'ëli' Cristo.

Guli'güí' ládxi'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribözaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'.

¹³ Yúgu'të böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queëli' yúgu'tëli' le ruzá' ládxi'ë Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bô' Lá'ayi. ¡Ca' gaca!

DIDZA' GUSÖL-LË'Ë PABLO LUYÚ GALACIA

Ruzúajë' Pablo quegaca bönachi luyú Galacia

¹ Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti.

² Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' böchi'ru' ni tu zxön neda'.

³ Rinábida' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

⁴ Jesucristo caz budödi cuinë' lu yöl-la' guti tu' nözi dul-la' nabága'ru' para busölë' ré'u lu le naxihui' raca dza ni zóaru' na'a. Benë' caní tu' naca ca ré'ëni quezinë' Xúziru' Dios.

⁵ ¡Gácatíca'sö queë' Dios yöl-la' ba! ¡Ca' caz!

Tuz naca le rinnë dxi'a queë' Jesucristo

⁶ Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'ë Jesucristo queëru', ate' na'a ré'ënilí' sí'ladxi' ná'ali' tu le rinnë dxi'a izá'a.

⁷ Le nácatë bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsé'ë libí'ili', en té'ënë' ulu'tsé'ë le rinnë dxi'a queë' Cristo.

⁸ Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'.

⁹ Chigunná caza' caní zí'alö, ate' na'a rnní'a' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

¹⁰ ¿Réquitseli' ré'ënda' cü'uli' neda' yöl-la' zxön cate' ru'a caní didza'? ¡Biti' ca! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', bití' gaca' huen dxin queë' Cristo.

Naca böáquië' Pablo bönni' gubáz queë' Cristo

¹¹ Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da' ahuiquequi bönachi.

¹² Cuntu nu bönni' budödë' lu na'a le rinnë dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queë'.

¹³ Chibiyön quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguequi.

¹⁴ Lu le tequi le bach Dios bönni' judío, guyëpisëtëra' neda' ca lá'tu'biqui' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'.

¹⁵ Caní bena' neda', pero tu' náquië' dxi'i ladxi' Dios, gurö cazë' neda' zí'atëlö ca gulja', ate' bulidzë' neda' para guna' xichinë'.

16 Ní'irö, cate' gú'uni quézinë' Dios, benë' ga núnbë'a-në' zxi'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'.

17 Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

18 Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza.

19 Tsanni ni' zoa' ni' bití' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'.

20 Didza' ni ruzúaja' queéli' lu guichi nácatë. Ni'a queë' Dios bití' ca' rizí' yë'a.

21 Gudödi ni' guyija', gudöda' yugu' yödz luyú Siria, en luyú Cilicia.

22 Yugu' dza ni' bití' núnbë'gaquië' neda' böchi'ru' tu'dubë' queë' Cristo gapa naca luyú Judea.

23 Gula'nözisinë' lë na' gúla'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'."

24 Caní guca, gula'gu'ë yöl-la' ba Dios tu' nözda' neda'.

2

Bönni' gubáz queë' Cristo guzxi' lu ná'agaquië' Pablo

1 Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'.

2 Guyija' ni', en bë'lëna' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibëna', enca' dxin ni runa' na'a.

3 Sal-la' nácabi' Tito, bi'i luzá'a, bi'i griego, bití' gulunë' bönni' ni ga irugu lu xpëla'bi' lë na' naca bë' bönachi queë' Dios ca tun cazë' bönni' judío.

4 Le nácatë gula'cuá' bal-la bönachi ni', nupa ni' ta'z'í' yë', ta'ná nácagaca böchi'ru', ate' gulé'ëni ilún ga irugu lu xpëla'bi' Tito lë na' naca bë'. Yugu' bönni' ni núngaquië' tu zxön rë'u pero tu'yusë' ca runru' para iléquiibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ënë' ilunë' ga huóacaru' leyúbölö huen dxin tsaz lu xibá na'.

5 Bití' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

6 Yugu' bönni' ni' réquiru' yu'u lu ná'agaquië' dxin queë' Cristo bití' bi gula'nná be'e neda' le naca cubi, pero bití' ru'i ládxa'a ca nácagaquië'. Dios bití' ruchí'a rusöröë' rë'u ca tu'chi'a tu'sörö bönachi rë'u.

7 Bití' bi gula'nná be'e neda' tu' guléquiibe'enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío.

8 Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

9 Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquiibe'enë' Dios nudödë' lu na'a dxin ni. Que lë ni

na' guzxi' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío.

¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'tica'sö ládxa'a runa'.

Ca guca cate' Pablo gudíl-lalenë' Pedro lu yödzo Antiquía

¹¹ Cate' bidxinë' Pedro lu yödzo Antioquia, gudíl-lalena' lë' didza' tu' lë cazë' guchíxinë' ca benë'.

¹² Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bítirö gudágulenë' tsözxön bönachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés.

¹³ Ní'irö ia'zica'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'.

¹⁴ Cate' bilé'eda' bití' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bizx queë' rë'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en calëga bönachi izá'a, nupa cabí núnbë'gaca Dios.

¹⁶ Nöz quéziru' cuntu nu huöáca tsahui' lahuë' Dios tu' run nu na' tsca rinná bë' xibá queë' Moisés, pero huöáca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huöácaru' tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huöáca tsahui' lahuë' Dios tu' run tsca rinná bë' xibá queë' Moisés.

¹⁷ 'Na'a, réquiru' nuhuöácaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca nácagaca bönachi izá'a, ¿innátsaru' runë' Cristo ga runru' dul-la'? ¡Bití' caz!

¹⁸ Channö ruí'i ládxa'a uchisa' le chibuquinja', lë ni naca bë' riguitsja' xibá le gunná bë'ë Dios.

¹⁹ Tu' cabí guca uzóa' didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rë'ënë' Dios.

²⁰ Naca quia' ca chigútilena' tsözxön Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' zxi'inë' Dios, Bönni' na' bidxi'inë' neda', en budödi cuinë' lu yöl-la' guti uláz quia' neda'.

²¹ Bití' rë'ënda' uzóa' tsólá'alö le ruzá' ládxe'ë queëru' Dios. Channö huáca huöáquië' tsahui' tu bönni' lahuë' Dios tu' runë' tsca rinná bë' xibá queë' Moisés, ní'irö nítisö gútië' Cristo."

3

Le rinná bë' xibá queë' Moisés, en le reja ládxi'ru' Cristo

1 Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nēbi para cabirō uzóali' didza' le nácatē? Gate ga rē' bulu'itu' libí'ili' le sa'yéaj ca gútiē' Jesucristo lē'e yaga cruz.

2 Gudíxjōi'i neda' lē ni. ¿Bidisóalenē' libí'ili' Dios Bō' lá'ayi tu' benli' ca rinná bē' xibá queē' Moisés o tu' guyija ládxi'li' le rinnē dxi'a biyōnili'?

3 ¿Nacxi guca nácali' tu' canöz caní? Gusí loli' nácali' bōnachi queē' Dios tu' zóalenē' libí'ili' Dios Bō' lá'ayi. ¿Réquitseli' huáca udxi gunli' ga guéquili' queē' Dios rácasö queēli'?

4 ¿Guca nítisö guca queēli' yúgu'tē lē na' guxzaca' gudí'ili'? ¡Biti' ca' guca caní!

5 Cate' Dios risöl-lē'e queēli' Dios Bō' lá'ayi, en ru'ē libí'ili' lataj gunli' yugu' yöl-la' huáca que yehua' yubá, ¿runē' caní tu' runli' ca rinná bē' xibá queē' Moisés o tu' reja ládxi'li' le rinnē dxi'a na' biyōnili'?

6 Lu guichi lá'ayi rnna: Abraham guyija ládxi'ē Dios, ate' Dios gunnē' náquiē' bönni' tsahui' tu' guyija ládxi'ē Lē'.

7 Que lē ni na' ral-la' inözili', nupa na' ta'yija ladxi' Dios nácagaca idú zxi'ini xi'sóē' Abraham.

8 Lu guichi lá'ayi ruí' didza' zí'atēlō ca gunē' Dios, innē' nácagaquiē' tsahui' bönni' izá'a ila'yija ládxi'ē Lē'. Que lē ni na' Dios gudíxjōi'inē' Abraham zí'atēlō ca naca le rinnē dxi'a, gunnē': "Lu nē'ē Zxi'ini xi'sú' guna' ga gaca dxi'a quégaca bōnachi idutē yōdzólió."

9 Caní naca, Abraham guyija ládxi'ē Dios, ate' Dios benē' ga guca dxi'a queē'. Lēs caní ca' na'a, Dios runē' ga raca dxi'a quégaca yúgu'tē nupa ta'yija ladxi' Lē'.

10 Nupa na' tu'zxōni ladxi' ulu'huóaca tsahui' tu' túngaca ca rinná bē' xibá queē' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'tē nupa na' cabí túngaca idutē ca rinná bē' xibá na' nabága'gaca xíguia'."

11 Na'a, naca bē' cuntu nu huóaca tsahui' lahuē' Dios tu' run nu na' le rinná bē' xibá na', tu' zoa lu guichi lá'ayi le rnna: "Nu na' nuhuóaca tsahui' lahuē' Dios soa ibán tu' reja ladxi' Lē'."

12 Ca na' nuhuóaca tsahui' lahuē' Dios nu na' reja ladxi' Cristo nadzá' ca naca que nu na' ruzxōni ladxi' nuhuóaca tsahui' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní."

13 Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga."

14 Caní guca queē' Cristo para gaca gunē' Dios ca na' guxzí' lu nē'ē queē' Abraham, gunē' ga gaca dxi'a quégaca bōnachi izá'a lu nē'ē Jesucristo, en para gaca gunē' ga idisóalenē' Dios Bō' lá'ayi rē'u channō uyija ládxi'ru' Lē', ca na' guxzí' lu nē'ē Dios gunē'.

Le rinná bē' xibá queē' Moisés, en le guxzí' lu nē'ē Dios gunē' queēru'

15 Na'a, böchi' zána'do', uzúaja' queēli' tu le rucudzu' didza', tu le raca queēru'. Cate' chopa bönni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'.

16 Dios guxzí' lu nē'ē bi gunē' queē' Abraham, en que zxi'ini xi'sóē'. Ga zoa lu guichi lē ni, bití' rnna: "Quégaca zxi'ini xi'sú'", le ruí' didza' que

zián bönachi, pero rnna: “Que xzí’ini xi’sú.” Lë ni ruí’i didza’ que tuz bönni’, Lë’ Cristo.

¹⁷ Lë ni na’ le rë’ënda’ innía’: Dios benë’ tuz didza’ len Abraham, en guzxi’ lu në’ë gunë’ ca na’ gunnë’. Le nazúaj lu xibá queë’ Dios, le benë’ Dios tapa gayuá’ yu’ chi-uruá’ iz gudödi ni’ cate’ gudxë’ caní Abraham, bití’ gaca ugúa lë na’ guzxi’ lu në’ë Dios gunë’, en cabí gaca usulu le.

¹⁸ Na’a, channö ral-la’ gunru’ ca rinná bë’ xibá na’ para sí’iru’ le guzxi’ lu në’ë Dios gunsë’, bíti’rö naca tu le guzxi’ lu ná’asë’ gunë’. Dios runsë’ caní tu’ caní guzxi’ lu në’ë bi gunë’ queë’ Abraham.

¹⁹ Channö caní naca, ¿bixx queë’ gunná bë’ë Dios xibá na’ nazúajgaca lu didza’ queë’? Dios gunná bë’ë caní para gaca bë’ xíguia’ nabága’ru’, pero gúcasö caní ga bidxintë dza na’ bilá’ lahuë’ xzí’ini xi’sóë’ Abraham na’, Bönni’ na’ guzxi’ lu në’ë Dios gunë’ queë’ lë na’. Yugu’ le gunná bë’ë Dios lu xibá queë’, gusól-lë’ë yödzölió ni lu ná’agaquië’ gubáz lá’ayi queë’, ate’ Moisés budödë’ didza’ ca nácgaca xibá na’.

²⁰ Bití’ naquín nu udödi didza’ cate’ naca tuz nu run tuz didza’, ate’ Dios, tuz náquië’.

Bixx queë’ gunná bë’ë Dios le zóagaca lu xibá queë’

²¹ Le nazúajgaca lu xibá queë’ Dios, ¿ta’ dá’gaca lë na’ guzxi’ lu në’ë Dios gunë’? ¡Bití’ ca’! La’tu’ gunná bë’ë Dios tu xibá le gaca gun ga sóaru’ ibanru’ tsaz, ní’rö huáca huóácaru’ tsahui’ lahuë’ Dios channö gunru’ ca na’ rinná bë’ xibá na’.

²² Tsca naca lë na’ nazúaj lu guichi lá’ayi, yúgu’tëru’ nabága’ru’ dul-la’. Caní naca para gaca sí’iru’ lë na’ guzxi’ lu në’ë Dios gata’ queëru’ cate’ tseja ládxi’ru’ Jesucristo.

²³ Zí’atëlö ga bidxín dza gaca tseja ládxi’ru’ Cristo, le rnna xibá na’ gunná be’e rë’u, ca na’ zoa le rinná be’e tu bönni’ yu’ë lidxi guíë. Caní guca ga bidxintë dza bilá’ lahui gaca huóácaru’ tsahui’ channö uyija ládxi’ru’ Lë’.

²⁴ Caní naca, le nazúaj lu xibá queë’ Dios gunná be’e rë’u, lë na’ busedi rë’u ca tu bönni’ usedi ga bidxintë dza bilá’ lahuë’ Jesucristo, para gaca huóácaru’ tsahui’ lahuë’ Dios channö uyija ládxi’ru’ Lë’.

²⁵ Na’a, tu’ bidxín dza gaca huóácaru’ tsahui’ channö uyija ládxi’ru’ Cristo, bíti’rö inná be’e rë’u lë na’ busedi rë’u.

²⁶ Yúgu’tëli’ nácali’ bi’i queë’ cazë’ Dios tu reja ládxi’li’-në’ Jesucristo, en chinácali’ tuz len Lë’.

²⁷ Yúgu’të nupa nadílagaca nisa para huóácgaca tuz len Jesucristo, nuhuóácgaca ca náquië’ Lë’ cazë’.

²⁸ Bíti’rö narúaj choplö bönni’ judío, en bönni’ izá’a, en cabí narúaj choplö bönni’ náquië’ tsaz huen dxin, en bönni’ nazán, en cabí narúaj choplö bönni’, en nigula, tu’ cate’ böácali’ tuz len Jesucristo, yúgu’tëli’ böácali’ ca’ tuz len luzá’ali’ tuli’ ia’tuli’.

²⁹ Na’a, channö néquili’ queë’ Cristo, nácali’ ca’ xzí’ini xi’sóë’ Abraham, ate’ nazí’ili’ lë na’ guzxi’ lu në’ë Dios gunnë’ queë’ Abraham.

4

¹ Lë ni le rë’ënda’ innía’: Tsanni ni ribözabi’ tu bi’i bönni’do’ sí’ibi’ bi ral-la’ gunnë’ xúzibi’ queëbi’, ni’ nácabí bí’ido’, en bití’ nayépisëtëröbi’ ca raca que tu nu naca tsaz huen dxin, sal-la’ le nácatë nequi queëbi’ yúgu’të.

² Tsanni ni’ nácabí bí’ido’, nacuá’ nupa tun chi’i lëbi’, en tu’gún dxin le nequi queëbi’ ga idxintë dza chinuzöë’ xúzibi’ queëbi’.

³ Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzölió ni.

⁴ Cate' bizá'a dza, Dios gusöl-lë'ë xzí'ini cazë' ni. Gúquië' xzí'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'.

⁵ Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

⁶ Para gaca bë' chinácali' bi'i queë' cazë', Dios guchizë' Dios Bö' lá'ayi ládxi'do'oli', ate' Lë' cazë' rulidzë' Dios uláz queëli', rnnë': "Xuza'."

⁷ Caní naca, chinácali' bi'i queë' Dios, en bití'rö nácali' ca yugu' bönni' tsaz nácaquië' huen dxin. Na'a, tu' nácali' bi'i queë' cazë' Dios, Lë' cazë' nazí' ládxi' në'ë guequi queëli' le nequi queë' tu' nácali' tuz len Cristo.

Pablo ru'i ládxe'ë bönni' Galacia ta'yija ládxe'ë Cristo

⁸ Cate' ni' bití' núnbë'ëli'-në' Dios, gúcali' ca yugu' bönni', tsaz nácaquië' huen dxin, en benli' dxin quégaca budó' néquini. Bití' ca' náca gaca budó' na' Dios.

⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë' rë'ënili' ubí'ili' yugu' lu xibá cané na' cabí nu uzí' xibé? ¿Rë'ënili' huóácali' huen dxin tsaz, en gunli' ca rinná bë' xibá na'?

¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz.

¹¹ Rádxida' bi gaca queëli'. ¿Naru' nuhuóaca nítisö dxin bena' para gúnbë'ëli' le nácatë'?

¹² Ráta'yua' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Bití' bi le cabí naca dxi'a benli' quia' neda'.

¹³ Chinöz quézili' bizx queë' na' gusí lahua' runa' libán loli' que le rinnë dxi'a. Bena' libán ni' tu' güf'ida'.

¹⁴ Bití' bucá'anali' neda' cané, en cabí buzóali' neda' tsólá'alö sal-la' bigútili' ca guca yödzöhuë' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz.

¹⁵ Budzéjalë'ëli' dza ni'. ¿Bizxi guca queëli' tu' cabirö raca caní? Lë' ni gaca inná' ca guca queëli': La'tu' huáca gunli', bubéajli' guiöj lo quézili', le gúnna' quia'.

¹⁶ Na'a, ¿réquili' nuhuóaca' tu nu riléde'e libí'ili' tu' gudxa' libí'ili' le nácatë'?

¹⁷ Bönni' ni' tu'tsë'ë libí'ili' tu'i ládxe'ë libí'ili', pero calëga para gaca dxi'a queëli'. Té'ënë' ilunë' ga ucá'anali' netu' para güf'i ládxi'li' légaquië'.

¹⁸ Na'a, naca dxi'a zoa nu ruí' ládxi' libí'ili', pero tuz channö naca para gaca dxi'a queëli'. Caní ruí'tica'sö ládxa'a libí'ili', en calëgasö cate' ni' zóalena' libí'ili'.

¹⁹ Libí'ili', xzí'ina'do'. Ca na' raca queënu nigula chizóa sóabi' bí'ido' queënu, riguí' rizáca'nu, lës caní riguí' rizáca'a neda' ni'a queëli' leyúbölö ga idxinrö dza gácali' idú ca náquië' Cristo.

²⁰ Nácaru' la' zóalena' libí'ili' na'a para gaca güf'ilena' libí'ili' didza' nadzá'alö, tu' ruúbi' riguí'ilë'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' rë'ënili' uzóa cuinli' lu xibá queë' Moisés, guli' ná'tsóca' didza' ni gu'a. ¿Catu caz buzë' nágali' le rnna xibá na'?

²² Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabi' zxfí'ininu tu nigula tsaz nácanu huen dxin, ate' ia'tubi' gúcabi' zxfí'ininu nigula nazannu.

²³ Zxfí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'tè bí'ido', pero zxfí'ininu nigula nazannu na' gúlajbi' tu' guzxi' lu në'ë Dios gunë' ga gálajbi'.

²⁴ Lë ni naca ca tu le rucudzu' didza'. Ca guca quegacanu chópanu nigula ni sa'yéaj ca naca chopa didza' Dios bénlenë' bönachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácagaca ca zxfí'ininu Agar, en nácagaca ca huen dxin tsaz lu xibá na'.

²⁵ Le gúcaneu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxön len nupa nacua' lu yödzö na'.

²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzö ni'.

²⁷ Nazúaj lu guichi lá'ayi le rnna:

Budzeja, nigula huödx, cabí nacua' zxfí'inu'.

Lu yöl-la' rudzeja quiu' gurödxí'a, sal-la' catu caz guca quiu' le riguí'i rizáca'nu nigula chizóa sóabi' bí'ido' queënu.

Budzeja tu' sal-la' nusán në'eguequi bönachi li',

gunë' Dios ga ila'yántërö zxfí'inu'

ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabi' Isaac, zxfí'inë' Abraham. Nácaru' ca yugu' zxfí'ini xi'sóë' Abraham, guzxi' lu në'ë Dios gata' queë'.

²⁹ Dza ni', bi'i na' gúlajbi' ca tálajbi' yúgu'tè bí'ido', gudxía ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bía no bönachi yödzölió ni rë'u.

³⁰ ¿Bizxi' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxön len zxfí'ininu, tu' biti' gaca zxfí'ininu nigula na' sí'ibi' tsözxön zxfí'ininu nigula nazannu le guzxi' lu në'ë Dios guequi queëbi' zxfí'ininu nigula nazannu na'."

³¹ Caní naca, böchi' zána'do'. Biti' nácaru' ca nácabi' zxfí'ininu nigula na', tsaz gúcaneu huen dxin, pero nácaru' ca zxfí'ininu nigula nazannu na'.

5

Guli'gún chi'i cuinli', ugá'anali' lu yöl-la' nazán

¹ Chinazanru' tu' busanë' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zë nágali' neda'. Neda', Pablo, rea' libí'ili', channö ru'ili' lataj nu ichugu lu xpëla'li' ca rinná bë' xibá na', biti' ca' uzí'ili' xibé le benë' Cristo.

³ Leyúbölö rë'ënda' guí'a nútí'tës bönni' ru'ë lataj nu ichugu lu xpëlë'ë caní, run bayudxi gunë' idutë ca le rinná bë' xibá queë' Moisés.

⁴ Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenni'-në' Cristo. Chibusán ná'ali' le ruzá' ládxe'ë Dios queëru'.

⁵ Rë'u ni ruzxöni ládxi'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo.

6 Channö nácaru' tuz len Jesucristo, bití' bi run channö narugu lu xpéla'ru' ca rinná bē' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

7 Dxf'ado' guca ca gusí loli' runlí' dza ní'. ¿Nuzxi ben ga bucá'anali' le nácatē'?

8 Bití' benē' Dios, Bōnni' rulidzē' libí'ili', ga benlí' caní.

9 Bití' gal-la ládxi'li' lē na' rRNA: "Látí'sō cúa zi que yōta xtila ruhuōázx idutē cúa ga nayú'u cúa zi na'."

10 Tu' nácaru' tuz len Xanru', runa' löza ca naca queēli', sa' ládxi'li' tuz ca rizá' ládxa'a neda', ate' Dios gun zi'ē bōnni' na' rutsē'ē libí'ili', núti'tēs nu naca bōnni' na'.

11 Ca naca quia' neda', böchi' zána'do', nacuá' nupa ta'nná rusédida' bōnachi ral-la' irugu lu xpéla'guequi ca rinná bē' xibá queē' Moisés. Channö runa' caní, ¿bizx queē' ta'bía nahuē' bōnni' judío neda'? La'tu' rusédida' caní, cuntu nu ilé neda' tu' runa' libán ca gútiē' Cristo lē'e yaga cruz.

12 Ca naca que nupa ní' tu'tsá' libí'ili', tē'ēni irugu lu xpéla'li' lē na', nácōru la' ila'chugu tsaz cúnguequi.

13 Ca naca queēli', böchi' zána'do', Dios bulidzē' libí'ili' para gácali' bōnachi nazángaca. Bití' ugunlí' dxin yōl-la' nazán na' para gunlí' ca rizēsō ládxi'li', pero para gunlí' dxin que luzá'ali', tuli' ia'tuli', tu' nadxf'ili' luzá'ali'.

14 Yúgu'tē le rinná bē' xibá queē' Dios rusudxín nu na' run ca rinná bē' xibá na' rRNA: "Ral-la' idxí'inu' luzó'o ca nadxf'i cuinu'."

15 Channö rizí' quídza'li' luzá'ali' tuli' ia'tuli', runlí' ca tunba' bōa' gu'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yōl-la' bōnáchisō queēru', en le runru' len yōl-la' huáca queē' Dios Bō' lá'ayi

16 Lē ni na' rea' libí'ili': Guli'güi' latja inná bé'enē' libí'ili' Dios Bō' lá'ayi, ate' ní'irō bití'rō gunlí' ca rizēsō ládxi'ili' lu yōl-la' bōnáchisō queēli'.

17 Yugu' le rizē ládxi'ru gunru' lu yōl-la' bōnáchisō queēru' bití' rōjlōz le rē'ēnē' Dios Bō' lá'ayi gunru', ate' lē na' rē'ēnē' Dios Bō' lá'ayi bití' rōjlōz le rē'ēniru' gunru' lu yōl-la' bōnáchisō queēru'. Chopa ni, bití' rōjlōzgaca, en que lē ni na' bití' gaca gunlí' ca rē'ēni quézili'.

18 Channö ruí'ili' lataj inná bé'enē' Dios Bō' lá'ayi libí'ili', bití'rō inná be'e xibá queē' Moisés libí'ili'.

19 Naca bē' le tun bōnachi lu yōl-la' bōnáchisō quéguequi.

Tun dul-la' le riguitsaj xibá que yōl-la' nutsaga na', enca' dul-la' le lē'ē.

Tun yugu' le naxihui', en yugu' le catsahui'.

20 Téquiguequi le bach budó' néquiniguequi.

Tun yōl-la' gudzá'.

Tu'dí'i luzē'eguequi, en ta'díl-lalen léguequi.

Tu'zxé'e luzē'eguequi, en ta'lé nupa na', en tu'huídi'.

Ta'rúaj choplō, en tu'béaj tsólá'alō nupa dá'gaca léguequi.

21 Ta'zē ladxi' le dē que luzē'eguequi, en ta'guilaj xíguia'.

Ta'zudxi, en tagu lē'e.

Tu'dōdi bē' ca túnguequi.

Le zían le caní túnguequi. Neda' ruxōsa' ládxi'li' na'a para cabí gunlí' caní ca na' buxōsa' ládxi'li' zí'alō, rRNA: Nupa túngaca caní bití' ca' ila'deli' ila'yú'u ga na' rinná bē'ē Dios.

22 Channö zóalen Dios Bö' lá'ayi rë'u runru' caní:

Nadxi'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribózaru' zxön ládxi'.

Ruí'i ládxi'ru' luzá'aru'.

Nácaru' dxi'i ládxi'.

Rusudxinru' xtídzá'ru'.

23 Nácaru' nöxaj ládxi'.

Rinná be'e cuinru'.

Biti' ca' gunná bē'ē Moisés rë'u para cabí gunru' yugu' le caní.

24 Nupa néquiquequi queē' Cristo bítirō tun ca tē'ēni quez, en cabí tun le ta'zēsō ládxi' lu yöl-la' bönáchisō quéguequi.

25 Dios Bö' lá'ayi runnē' yöl-la' na'bán queēru'. Lē' cazē' ral-la' inná bé'enē' rë'u ca naca yúgu'tē le runru'.

26 Biti' ral-la' gun ba zxön cuinru', en cabí utsá'aru' luzá'aru', en cabí uzzé'aru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

1 Na'a, böchi' zána'do', channö ilé'eli' runē' dul-la' tu bönni' böchi'li', nuli' zóalenē' Dios Bö' lá'ayi libí'ili', ral-la' gunli' ga ubí'i ládxe'ē bönni' na', pero run bayudxi gunli' caní lu yöl-la' nöxaj ládxi' queéli', en uyú cuinli' tsate' cu'u tu' xihuí' libí'ili' nöza dul-la'.

2 Gulí'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enē' Cristo rë'u.

3 Channö zoa nu réqui chinadeli' yöl-la' nayēpisē, en bití' bi nadeli' nu na', nu ni na' rizi' ye'e la' cuinsi.

4 Tuhuéaj tuhuéajē' bönni' ral-la' uchi'a usöröē' que le runē'. Ní'irō channö urúajē' dxi'a, huáca gun ba zxön cuinē' ní'a que le chinunē', en bití' gun bayudxi uyüē' ca núngaca ia'zícá'rō bönachi channö ba benrē' dxi'a o cabí.

5 Tuhuéaj tuhuéajē' bönni' ral-la' gu'ē le nusubáguē'ē Dios lē'.

6 Channö zoa nu rusedi libí'ili' ca naca le rinnē dxi'a, ral-la' unödzejali' nu na' rusedi libí'ili' lati' que yúgu'tē le do' dē queéli'.

7 Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'.

8 Channö le rázali' naca yugu' le runli' ca rizēsō ládxi'li' lu yöl-la' bönáchisō queéli', le ulápali' gaca yöl-la' guti. Channö le rázali' naca yugu' le runli' ca raza ládxe'ē Dios Bö' Lá'ayi, ulápali' le gunnē' Dios Bö' lá'ayi queéli', le naca yöl-la' na'bán idú.

9 Caní naca, bití' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'.

10 Que lē' ni na', bátati'tēs gata' queēru' lataj, ral-la' gunru' le naca dxi'a quégaca yúgu'tē bönachi, en le naca lo, ral-la' gunru' caní quégaca böchi' zanru' ta'yija ládxi' Cristo.

Le buzúajē' Pablo lu guichi ga ruúdx

11 Buli'yú cate' bach didza' ni ruzúaja' lu guichi len na' cuina'.

12 Nupa na' tē'ēni ilún ga íruga iruga lu xpéla'li' ca rinná bē' xibá queē' Moisés, túngaca caní para ulu'rúaj dxi'a lógaca bönachi, en cabí bi ilún quéguequi tu' túngaca libán ca gútiē' Cristo lē'e yaga cruz.

13 Yugu' bönni' na' ta'zí' lu ná'agaquië' le narugu lu xpéla'gaquië' ca rinná' bē' xibá' queë' Moisés, biti' tu'zóë' didza' idutē' ca rna xibá' na'. Tē'ēnē' ilunē' ga irugu lu xpéla'li' para gaca ilún' ba zxon' cúngaquië' tu' ta'nná' bē'ēnē' libí'ili' para irugu lu xpéla'li' caní.

14 Ca naca quia' neda', cú'usa' yöl-la' ba le benē' Xanru' Jesucristo cate' gútiē' lē'e yaga cruz. Tu' nözi le benē' Cristo lē'e yaga cruz, yugu' le dē' yödžölió' ni naca quia' ca tu le chinati, biti' ruí'i ládxa'a le, ate' neda' naca' quégaca bönachi yödžölió' ni ca tu bönni' nati, biti' tuí'i ladxí' neda'.

15 Channö nácaru' tuz len Jesucristo, biti' bi run channö narugu lu xpéla'ru' ca rinná' bē' xibá' na' o channö cabí' narugu lu xpéla'ru' caní. Le run bayudxi naca gácaru' bönachi cubi niu' lē'e ládxi'do'oru'.

16 Yúgu'tē' bönni' na' tunē' ca rinná' bē' xibá' runa' ni, en yúgu'tē' bönni' na' néquiguequinē' queë' Dios, rinábida'-nē' Dios gunē' ga soa dxi ládxi'do'gaquië', en huéchi' ládxi'ē' légaquië'.

17 Na'a zē' lo, cuntu nu bönni' ral-la' utsē'ē' neda', tu' nácgaca bē' butsóa zóagaca lu xpéla'a naca' huen dxin queë' Xanru' Jesús.

18 Na'a, böchi' zána'do', rinábida'-nē' Xanru' Jesucristo uzá' ládxi'ē' queēli' yúgu'tēli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quezinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo.

² Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Le naca queë' Dios Bö' Lá'ayi rata' queëru'

³ ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'.

⁴ Zí'atëlö ca benë' Dios yödzülió ni, guró cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'.

⁵ Dios bucözë' zí'atëlö si' lu në'ë rë'u ca zxi'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quezinë' gunë'.

⁶ ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Zxi'inë', Nu na' nadxi'inë'!

⁷ ¡Cristo bö'á'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntëro naca le buzá' ládxë'ë Dios queëru',

⁸ lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë'

⁹ benë' Dios le bucözë' queëru', ate' buluí'inë' rë'u lë na' bigachi', le buzóa cazë' zí'atëlö usudxinë' lu në'ë Cristo!

¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzülió ni.

¹¹ Tu' nácaru' tuz len Cristo, Dios guró cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quezinë' Dios, Nu run yúgu'të ca rë'ëni quezinë' Lë'.

¹² Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxöni ládxi'ru'-në' Cristo zí'atëlö ca ia'zica'rö bönachi.

¹³ Lë'sca' caní guca queëli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queëli' le naca bë' nácali' queë', tu' guchizië' icja ládxi'do'oli' Dios Bö' Lá'ayi, Nu na' guzxi' lu në'ë Dios isöl-lë'ë queëru'.

¹⁴ Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

Pablo rinábinë' Dios gunnë' queëru' yöl-la' réajni'i

¹⁵ Que lë ni na', cate' biyönda' ca réajlë'ëli'-në' Xanru' Jesús, en ca nadxi'ili' yúgu'të bönachi queë' Dios, ga ridxintë na'a dza

¹⁶ biti' ca' rusana' rea'-në' Dios: "Xclenu'", ca naca queëli'. Røjneda' libí'ili' cate' rulidza'-në' Dios.

17 Rinábida'-në' Dios queë' Xanru' Jesucristo, Dios na' náquië' Xúziru' nayëpisëtë'rë', rinábida'-në' isól-lë'ë Dios Bó' Lá'ayi queéli', Bó' na' runna yól-la' réajni'i queëru', en rulu'i rë'u ca naca cazë' Dios, para gaca idú ca núnbë'ëru'-në'.

18 Rinábida'-në' Dios uzéajni'inë' libí'ili' lu icja ládxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibé, en para inözili' ca naca yól-la' tsahui' que yehua' yubá, le guequi quegaca nupa néquiquequi queë' Dios,

19 enca' para inözili' cate' zxon naca yól-la' huáca queë', le rácalen rë'u ni réajlë'ëru' Lë'. Yól-la' huáca zxon ni naca la' lëbisö na' bulu'e lahui Dios

20 cate' ni' busubanë' Cristo lu yól-la' guti, en benë' ga gurö'ë cuita lë'ë Lë cazë' ga nayëpisëtë'rë' ni' yehua' yubá.

21 Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yól-la' huáca, en nupa ni' nácacaca xan. Cristo nayëpisëtë'rë' ca yúgu'të nupa nadéli'gaca yól-la' unná bë' yödzölió ni, en lu yödzölió si' za'.

22 Dios budödë' lu në'ë Cristo yúgu'të le dë para inná bé'enë' le, en buzöë' Lë' quegaca bönachi queë' para gáquië' Xanru' lu yúgu'të le nequi queëru'.

23 Yugu' bönachi queë' Cristo nácacaca ca idütë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxí'inë' Dios rë'u

1 Dios chibennë' yól-la' na' bán idú queéli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'.

2 Dza ni' benli' lëbisö ca tun bönachi biti' nácacaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa biti' túngaca ca rna xtídzë'ë Dios.

3 Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yól-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' queguequi ia'zica'ró bönachi.

4-5 Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yól-la' guti tsözxön len Cristo tu' buéchi' ládxi'ë rë'u, en bidxi'ide'enë' rë'u. Nuláli' tu' zoa le buzá' ládxi'ë Dios queéli'.

6 Dios busubanë' rë'u tsözxön len Cristo para gunë' ga cö'öru' tsözxön len Lë' ga ni' rinná bë'ë yehua' yubá.

7 Caní benë' Dios, en bulu'inë' bönachi si' zá'gaca ca naca yól-la' tsahui' que le buzá' ládxi'ë queëru', tu' budödë' Jesucristo ni'a queëru', le naca bë' ca nadxí'ide'enë' rë'u.

8 Nuláli' tu' zoa le buzá' ládxi'ë Dios queéli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios.

9 Cuntu nu gaca gun ba zxon cuini tu' nulá, tu' cabí nulá nu na' tu' nacuá' le naca dxi'a nun nu na'.

10 Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácacaca dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

11 Guli'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipëla'gaquië' le naca bë'

dá'gaquië' Dios, en nazí' lágaquië' bönni' narugu lu xipéla'gaquië', ta'nnë' nácali' libí'ili' bönni' bití' narugu lu xipéla'gaquië'.

¹² Dza ni' nubíga'li' ga zoë' Cristo. Gúcali' bönni' zì'tu' lógaca bönachi Israel, en bití' buzí'ili' xibé didza' benë' tsutsu Dios, en guzxi' lu në'ë bi gata' quégaca bönachi queë'. Guzóali' yödzólió ni, bití' zoa le runlí' löza, en bití' núnbë'ënili'-në' Dios.

¹³ ¡Na'a, nácali' tuz len Jesucristo! ¡Zí'atëlö nubíga'li' libí'ili' zì'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'!

¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zì'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxon.

¹⁵ Lë ni benë' Cristo cate' gútië' uláz queëru', en gudüë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopa cö' bönachi na', bunë' tuz bönachi cubi, nupa nátagaca tuz len Lë cazë'. Caní benë', en gulequi dxíë' yöl-la' rilé na'.

¹⁶ Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

¹⁷ Caní guca, bulu'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zì'tu' ga zoë' Dios, enca' bönachi judío nacua' gála'sö.

¹⁸ Na'a, ni'a que le benë' Cristo, gaca íbíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a.

¹⁹ Que lë ni na', libí'ili', bönachi izá'a, bíti'rö nácali' ca bönachi zì'tu' zóali' tu luyú bití' nequi queéli', pero nabábalenli' bönachi queë' Dios. ¡Chínacali' ca bí'i queë' cazë' Dios!

²⁰ Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiöj lo que xilibi zö'ö na'.

²¹ Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacua' tu'lapa yugu' guiöj que, para gaca tu yudo' lá'ayi le naca tuz len Xanru'.

²² Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi guié tu' runa' libán queë' Jesucristo para uzí'ili' xibë', libí'ili', bönachi izá'a.

² Réquida' chinóz quézili' ca benë' Dios, budödë' lu na'a dxin runa' para uzí'ili' xibé le ruzá' ládxi'ë queëru'.

³ Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queéli' lu guichi.

⁴ Cate' ulábalí' lë ni, gúnbë'ëli' le réajni'ida' ca naca le bigachi' ca naca queë' Cristo.

⁵ Dza ni'te cuntu nu buzéajni'iné' Dios ca naca le bigachi' na', pero na'a, lu në'è Dios Bö' Lá'ayi, chibulu'è lahui Dios ca naca, tu' buluí'iné' yugu' bönni' gubáz lá'ayi queë', en yugu' bönni' tu'è didza' uláz queë'.

⁶ Caní rnaa lè na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huóáquië' ca tuz bönachi, en ulu'zi'è xibé tsözxön len légaquië' le guzxf' lu në'è Dios unödzejë' quégaquië' tu' dá'gaquië' Jesucristo."

⁷ Dios buzá' ládxe'è quia' le benné' quia'. Lu yöl-la' huáca zxön queë' bené' neda' huen libán que didza' dxi'a queë'.

⁸ Nacra' cá'asö ca yúgu'tè bönachi queë' Dios, pero Lè' buzá' ládxe'è quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'.

⁹ Dios budödë' lu na'a guna' ga iléquibe'e yúgu'tè bönachi ca naca le buzóa cazë' Dios dza ni'te, lè na' naca tu le bigachi' queë' Dios, Nu ben yúgu'tè le rilé'eru'.

¹⁰ Caní guca, para iléquibe'e yúgu'tè nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácacaga bönachi queë' Cristo.

¹¹ Dios bené' lè ni, busudxiné' lè na' buzóa cazë' dza ni'te, le bené' lu në'è Xanru' Jesucristo.

¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lè'.

¹³ Que lè ni na' ráta'yua' loli' biti' gaca chopa ládxi'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibé.

Ca naca yöl-la' nadxí'i queë' Cristo

¹⁴ ¡Que lè ni na', ruzechu zxiba' lahuë' Xuzë' Xanru' Jesucristo!

¹⁵ Ca lè', nazí'i ca' lágaca yúgu'tè bönachi queë', nupa nacua' yehua' yubá, en nupa nacua' yödzölió ni.

¹⁶ Rinábida'-në' Xúziru' Dios, lu yöl-la' zxön queë', le nazáca'da', gunnë' queéli' yöl-la' huáca queë' Dios Bö' Lá'ayi, en gunë' ga gálali' lu icja ládxi'do'oli'.

¹⁷ Rinábida'-në' Cristo soë' icja ládxi'do'oli' tu' réajlë'ëli' Lè'. Rinábida'-në' gunë' ga soáli' tsaz lu yöl-la' nadxí'i queë', en biti' tséaj bö' icja ládxi'do'oli' ca nadxí'ili'-në',

¹⁸ para gaca tséajni'ili' tsözxön len yúgu'tè bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxi'ilö, en xitsá'alö.

¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para soalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntëro ca gaca inábaru' o ca gaca sa' ládxi'ru', ugunë' dxin yöl-la' huáca queë' lu icja ládxi'do'oru'!

²¹ ¡Gácatuca'sö queë' Dios yöl-la' ba lógaca bönachi queë' Cristo, en lahuë' Lè cazë' Jesucristo, na'a dza, en yúgu'tè dza zá'gaca! ¡Ca' gaca!

4

Dios Bö' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guë ni tu' runa' libán queë' Cristo, rinábida' libí'ili' gunli' idú ca ral-la' ilün nupa bulidzë' Dios para ilequi queë', ca na' bulidzë' ca' libí'ili'.

² Guli'gaca nõxaj ladxi', en dxi'i ladxi'. Guli'cöz zxõn ladxi'. Guli'güf' ladxi' luzá'ali' tuli' ia'tuli' lu yõl-la' nadxi'i queëli'.

³ Guli'güf' ladxi' gácativa'sili' tuz ca na' chinunë' Dios Bõ' Lá'ayi libí'ili', gunli' caní lu yõl-la' ribõza tsáhui'do' queëli' le rutsaga libí'ili'.

⁴ Tuz naca idútë le naca cazë' Cristo le nadzágaru' rë'u.

Tuzë' náquië' Dios Bõ' Lá'ayi dzáguië' rë'u.

Tuz naca le runru' lõza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Ribõza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yõl-la' huáca queë' Dios tsca naca le bennë' Cristo que queëru'.

⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bõnachi gula'dzúngaca.

Gudásië' quégaca bõnachi le runõdzjasë' quégaquië'.

⁹ ¿Bizxi rë'ëni inná lë na' rnna: buëpë'? Rusëdi rë'u bõtjë' zí'alõ, en bidxinë' yõdzõliõ cadxi'ilõ ni.

¹⁰ Nu na' bõtaj naca Bõnni' na' buëpë' xitsá'tëro' ni' yehua' yubá para budzë'ë yúgu'të len le naca cazë' Lë'.

¹¹ Cristo caz bennë' que queëru' yugu' yõl-la' huáca queë':

Bë' lataj bal-lë' bõnni' iláquië' gubáz queë'.

Benë' ga tu'ë didza' uláz queë' Dios ia'bal-lë' bõnni'.

Gusõl-lë'ë ia'bal-lë' tsõjéngaquië' libán que didza' dxi'a.

Bucu'ë ia'bal-lë' para ilún chi'ë bõnachi queë'.

Bucu'ë ia'bal-lë' para ulu'sëdinë' bõnachi queë'.

¹² Cristo caz bupë'ë bõnachi queë' caní para gaca ilún xichinë', para ilún ga ilaca idú nupa nácgaca ca idútë le naca cazë' Lë'.

¹³ Caní gaca ga idxintë dza huõácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huõácaru' idú ca náquië' Lë' cazë' Cristo.

¹⁴ Bítirõ gácaru' ca yugu' bí'ido', ca nácgaca nupa na' tu'tsa'të ca túngaca, en nácgaca ca tu le nachë' lu yegu, o ca tu le røjchë' bítitës bõ' recja, tu' ta'zí' lu në'eguequi bítitës didza' nu rusëdi léguequi, nu na' rizí' ye'e léguequi len yõl-la' sina' que, en run ga ta'chixi ta'nigui.

¹⁵ Na'a, rë'u ni, tu' nadxi'iru' luzá'aru', ral-la' gü'iru' didza' le naca idútë li para gaca huõácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u.

¹⁶ Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsõzxõn ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxõn, en raca idú, ca na' zeaj rácarõ idú ca nadxi'iru' luzá'aru'.

Yõl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnnía': Bítirõ gunlí' ca tun nupa bítirõ núnbë'gaquië' Dios, nupa na' tun ca ta'za'sõ ládxi'guequi,

18 en nachul-la nanítigaca icja ládxi'do'guequi. Tu' cabí nõzguequinè' le nácatè, en nazídigaquiè', bití' nazi'gaquiè' yõl-la' na'bán na' runnè' Dios queëru'.

19 Bití' ca' tu'tuí'inè'. Nudödi cuíngaquiè' lu le ruá' dö'. Idú ládxi'gaquiè' tunè' yúgu'tè le cabí naca tsahuí'.

20 Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunlí' ca tun bönachi caní.

21 Le naca idútè li biyõnili' ca naca queë' Cristo, en le nácali' queë' tu'sédinè' libí'ili' le naca idútè li na' zóalen Jesús.

22 Guli'nna be'e yõl-la' bönáchisõ queéli' le gúcali' z'íalõ, læ na' riniti ni'a que yõl-la' rizé ladxí' queéli' le ruá' dö' le guzxi' ye'e libí'ili'.

23 Ral-la' huóacali' cubi lu icja ládxi'do'oli', en lu bö' naca cázali'.

24 Ral-la' sí'ili' yõl-la' bönachi cubi le nunè' Dios ca naca cazè' Lè', le ruluí' i cuini ni'a que le naca dxi'a, en le naca tsahuí' runlí', en run ga gaca gunlí' caní.

25 Que læ ni na', bíti'rõ si' yé'eli'. Yúgu'tèru' ral-la' gú'ilenru' luzá'aru' didza' le nácatè, tu' dzágaru' yúgu'tèru' idútè le naca cazè' Cristo.

26 Channõ hualéli', bití' ral-la' gunlí' dul-la'. Bití' ilelí' xidzé.

27 Bití' bi gunlí' le gú'í' lataj tu' xihuí' ucúl-la libí'ili'.

28 Nu bõnni' ribanè' ral-la' usanè' yõl-la' gubán queë', en tsáziè' huen dxin para gata' queë' bi unödzejè' quégaca nupa ta'yadzaj.

29 Bití' gú'ili' didza' xihuí', pero guli'gú' didza' dxi'a, yugu' le ilácalen nu yõni, en ilún ga gaca dxi'a que nu na'.

30 Bití' usuhuí'inili' Dios Bö' Lá'ayi, tu' naca bè' néquili' queë' Dios tu' zóalenè' Dios Bö' Lá'ayi libí'ili', ate' ídxín dza údxi usölè' libí'ili' lu dul-la'.

31 Guli'cúa ladaj libí'ili'
yõl-la' ruzxè'e, en yõl-la' ridzá'a,
en yõl-la' rilé, en yõl-la' ridil-la didza',
en yõl-la' rutsaga yudxi,
en yúgu'tè yõl-la' bití' rilé'e luzá'ali' dxi'a.

32 Ral-la' gácali' dxi'i ladxí',
en huéchi' ládxi'li' luzá'ali' tuli' ia'tuli',
en uniti loli' luzá'ali' tuli' ia'tuli',
ca na' benè' Dios, buniti lahuè' libí'ili' tu' nácali' tuz len Cristo.

5

Ca ral-la' ilaca nupa nácatagaca ca bi'i queë cazè' Dios

1 Tu' nácali' ca bi'i queë cazè' Dios, ate' nadxí'inè' libí'ili', guli'gú' ladxí' gácali' ca náquiè' Lè'.

2 Ca naca yúgu'tè le runlí':

Ral-la' idxi'ili' luzá'ali' ca na' benè' Cristo.
Bidxi'inè' rè'u, en budödi cuinè' lu yõl-la' guti uláz queëru'.
Ben cuinè' ca böa' bédxido' rútiru'-ba' lahuè' Dios tu' nõzi dul-la' nabága'ru'.

Gúquiè' ca' ca tu le rilá' zxixi le raza ládxi'è Dios le rigú'uru' lu bucugu lá'ayi queë'.

3 Tu' nácali' queë' Dios,
bití' ca' gunlí' le ruá' dö',
en bití' gunlí' le cabí ral-la' gunlí',
en bití' uhuídi'li'.

Ní'irò cuntu nu gaca bi inné queéli'.

⁴ Biti' gü'ili' didza' xihui',
o didza' canöz, o didza' cá'asö,
yugu' le cabí ral-la' gunli',

pero nácarö dxi'a guiéli'-në' Dios: "Xclenu'."

⁵ Chinöz quézili' nitüë' bönni' runë' le ruá' dö' biti' ca' tsázië' ga rinná bë'ë
Cristo tsözxön len Dios, o nu bönni' runë' le cabí ral-la' gunë', o nu bönni'
ruhuídi'në'. Nu na' ruhuidi' naca ca nu reaj ladxi' budó' guiöj budó' yaga.

⁶ Biti' gü'ili' lataj nu si' ye'e libí'ili' len didza' biti' nácatë. Tu' nözi dul-la'
caní Dios gunë' xíguia' nupa biti' túngaca ca rnna xtídzë'ë.

⁷ Biti' ca' gunli' tuz bönachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu'
nácali' tuz len Xanru'. Guli'gaca ca bönachi ta'dá lu bení',

⁹ tu' run bení' na' ga gácaru' dxi'i ladxi', en ga gü'iru' didza' le naca idütë
li, en ga gácaru' tsahui'.

¹⁰ Guli'güí' ladxi' inözili' le raza ládxë'ë Xanru'.

¹¹ Biti' gútsa'li' nupa tun le ruá' dö', lë na' tunë' ga naca chul-la que dul-
la', pero buli'béaj ga liná' yugu' lë na' tunë'.

¹² Utu'iru' gü'iru' didza' ca naca le tun bönachi na' bagáchi'sö.

¹³ Cate' bi ubéajru' ga liná', gaca bë' yúgu'të tsca nácgaca, tu' gun le naca
bení' ga gaca bë' yúgu'të.

¹⁴ Que lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero
guli'gaca bönachi ta'yéajni'.

¹⁶ Guli'sí' xibë' lataj dë queéli' tu' chizóaru' dza biti' raca dxi'a queëru'.

¹⁷ Biti' gácali' bönni' biti' bi nözguequinë'. Guli'güí' ladxi' tséajni'ili' le
rë'enë' Xanru' gunli'.

¹⁸ Biti' súdxili', tu' gun yöl-la' rizudxi ga nítili' tsaz.

Guli'güí'ida' lataj inná bé'enë' Dios Bö' Lá'ayi libí'ili'.

¹⁹ Guli'güí'ilen luzá'ali' didza' tuli' ia'tuli',

ugunli' dxin yugu' le rul-la lëgaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládxi'do'oru'.

Idú ládxi'ru' ral-la' gúl-laru' queë',

le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,

en guli'guiëtica'së' Xúziru' Dios: "Xclenu'" ca naca yúgu'të.

Ca ral-la' gunru' quégaca di'a dza queëru'

²¹ Guli'gún ca rnna xtídza' luzá'ali' tuli' ia'tuli' para caní gunli'-në' Dios
zxön.

²² Libí'ili', yugu' nigula, guli'gún ca rnna xtídza'gaquië' bönni' que
queéli', ca na' ral-la' gunli' ca rnna xtídzë'ë Xanru'.

²³ Caní ral-la' gunli', tu' rinná bé'enë' bönni' nigula queë' ca na' runë'
Cristo, rinná bé'enë' bönachi queë'. Cristo náquië' ca' Nu rusölá bönachi
queë', nupa na' dzágagaca le naca cazë' Lë'.

24 Ca na' tun bönachi queë' Cristo ca rna xtídzë'ë, lësca' caní ral-la' ilunnu nigula ca rna xtídzagaquië' bönni' que queëgacanu ca naca yúgu'të le raca.

25 Libí'ili', yugu' bönni', ral-la' idxí'ili'-nu nigula que queëli' ca na' Cristo nadxí'inë' bönachi queë', en budödi cuinë', gútië' uláz quégaquië'.

26 Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë.

27 Gútië' uláz quégaquië' para gaca usudxinë' légaquië' lahuë' Dios, nácaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntunu gaca bi inné quégaquië'.

28 Ral-la' idxí'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'.

29 Cuntu nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë',

30 nupa dzágagaca idütë le naca cazë'.

¡Rë'u ni dzágaru' le naca cazë' Lë'!

¡Néquiniru' xipëlë'ë, en dxita queë'!

31 Lësca' caní nazúaj lu guíchi lá'ayi le rna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz."

32 Lë na' nazúaj lu guíchi ni ruluí'i lahui tu le naca idütë li, ate' neda' réquida' ruí'i didza' ca' ca naca queë' Cristo, en quégaca bönachi queë' na'.

33 Lësca' ruí'i didza' ca naca queëli'. Yúgu'tëli' libí'ili', bönni', ral-la' idxí'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queëgacanu.

6

1 Libí'ili', yugu' bí'ido', ral-la' gunli' ca rna xtídzagaquië' xuz xiná'ali' para caní gunli' ca rna xtídzë'ë Xanru'. Ral-la' gunli' le naca tsahui'.

2 Xibá zí'alö na' benë' Dios le nachë' tu le guzxi' lu në'ë gunë', naca lë na' rna: "Ben bal xuz xinó'o,

3 ate' gaca dxi'a quiu', ate' xidzé su' ibanu' yödzülió ni."

4 Libí'ili', yugu' xuz, biti' gun leli' zxi'nili', pero buli'xön légacabi', en guli'sína' légacabi', en buli'sëdi légacabi' ca raza ládxë'ë Xanru'.

5 Libí'ili', núlöli' nácali' bönni' nadó'ogaca, guli'gún ca rna xtídzagaquië' xanli' luyú ni idú ládxí'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo.

6 Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxí'li' guli'gún xichíngaquië' ca raza ládxë'ë Dios, ca na' ral-la' gunli' xichinë' Cristo.

7 Idú ládxí'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi.

8 Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

9 Libí'ili', nacuá' queëli' bönni' nadó'ogaca, guli'gún dxi'a caní quégaca huen dxin queëli' na', en biti' uzéli' ba nadx légaquië'. Guli'tsöjné ca naca queëli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' biti' rutsë'ë ca runë' que que bönachi.

Dios runnë' queëru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'.

¹¹ Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' gué'ëni si' bë' tu' xihui' libí'ili'.

¹² Biti' ridíl-lalenru' bönachi néquiquequi bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'.

¹³ Que lë ni na':

Guli'sí' yúgu'të le runnë' queëru' Dios le tun chi'i rë'u, para cate' idxín queëru' dza ni' ilaca le náca'gaca xihui', gaca guá' ilenli', en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li, le gaca queëli' ca tu guídi guga' lé'ëli'.

Guli'gaca tsahui' tu' gun chi'i libí'ili' le naca tsahui' ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a le ribequi dxi icja ládxi'do'oru' lahuë' Dios, ca na' ruzóa cuinë' sina', en ridë'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queëli' Cristo gaca queëli' ca tu le naca tsutsu uzëli' loli', para cabí gál-la' yugu' le usán tu' xihui' libí'ili', le náca'gaca ca yaga túchi'do' zoa guí' láhuilö'guequi.

¹⁷ Yöl-la' rusölá gaca queëli' ca tu lu'u guié le gun chi'i ícjali'.

Xtídzë'ë Dios gaca queëli' ca tu guié tuchi'

le runnë' Dios Bö' Lá'ayi queëru', para utíl-lalenru' le naca xihui'.

¹⁸ Guli'gún yúgu'të lë ni,

en buli'lidzë' Dios inábili'-në' gácalenë' libí'ili'.

Buli'lidzatica'së' Dios zóalenë' Dios Bö' Lá'ayi libí'ili'.

Para gunli' caní ral-la' usubán ládxi'li' en cabí huőaj ládxi'li', inábili'-në' Dios gácalenë' nupa néquiquequi queë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxí' cate' guna' libán para uzéajni'ida' bönachi ca naca le bigachi' que didza' dxi'a.

²⁰ Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guié ni. Buli'lidzë' Dios channö, inábili'-në' gunë' ga gaca' rugu ladxí' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, böchi'ru' na' nadxí'iru'-në', en runë' xichinë' Xanru' idú ládxe'ë, quíxjöi'inë' libí'ili' idú ca raca quia', en ca runa' neda' ni.

²² Que lë ni na', isöl-la'a-në' queëli', ate' uluí'inë' libí'ili' ca raca queëtu', ate' caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queëli' yöl-la' nadxí'i le dzaga yöl-la' réajlë' queëli' Cristo, yúgu'tëli' na' néquili' queë'.

²⁴ Le ruzá' ladxë'ë Dios queëru' gaca queëli', yúgu'tëli' na' nadxí'ili'-në'
Xanru' Jesucristo, naca idú yöl-la' nadxí'i queëli' Lë'. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo.

² Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládxi'do'oli'.

Pablo rinábinë' Dios bi gunë' quegaca bönachi ta'yéajlë' Cristo

³ Rea'-në' Dios: "Xclenu'", cate' rizá' ládxa'a queëli'.

⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a

⁵ tu' röjneda' ca bënlenli' neda' tsözxón dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na'a dza.

⁶ Dios gusí lahuë' runë' tu le naca dxi'a lu icja ládxi'do'oli'. Ruzxóni ládxa'a Lë' gúntica'së' caní ga idxintë dza huödë' Jesucristo.

⁷ Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxón len neda' le ruzá' ládxë'ë Dios queëru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz.

⁸ Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u.

⁹ Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú

¹⁰ para gaca cöli' le nácatëro dxi'a. Channö gaca caní queëli', gácali' idú dxi'a, ate' cuntu nu gaca bi innë queëli' dza ni' huödë' Cristo.

¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxon queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', ré'ënda' inözili' lë ni: Yúgu'të le guca quia' gulácalen neda' para guzxëqui'röda' bena' libán que didza' dxi'a.

¹³ Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nözguequinë' yu'a lidxi guié ni tu' runa' xichinë' Cristo.

¹⁴ Tu' yu'a neda' lidxi guié ni ben ga látu'biqui' yúgu'të böchi'ru' nácaqacarë' rugu ladxi', ate' tu'zxoní ládxi'gaquië' Xanru', en bití'rö tádxinë' tunë' libán que xtídzë'ë Dios.

¹⁵ Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'.

¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxon cuíngaquië', en calëga idú ládxi'gaquië'. Té'ënnë' ulu'saca' zi'ë neda' tsanni ni yu'a lidxi guié.

¹⁷ Yugu' bönni' idú ládxi'gaquië' na', lu yöl-la' nadxí'i quégaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a.

¹⁸ Bití' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzëjaröda'

¹⁹ tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risól-lë'ë Jesucristo queëru'.

²⁰ Caní rë'ënda', en ruzxöni ládxa'a-në' Dios, gunë' ga biti' utuí'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatica'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'.

²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé.

²² Channö huáca guna' dxin le gácalen didza' dxi'a queë' Cristo channö sóasa' ibana', biti' nözda' bízxilö ral-la' cöa'.

²³ Naca böniga cöa'. Rë'ënda' gátitea' para tsöjsóalentea'-në' Cristo, tu' gácatëro dxi'a quia',

²⁴ pero runrö bayudxi sóasa' ibana' para séqui'da' gácalena' libí'ili'.

²⁵ Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzéjaröli' tu' réajlë'ëli' Lë'.

²⁶ Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

²⁷ Guli'güi'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayönida' nácali' tsutsu, en nácali' tuz, runli' tsözxön dxin que le réajlë'ëru' le za' queëru' ni'a que didza' dxi'a.

²⁸ Biti' güi'ili' nupa biti' ta'lé'e libí'ili' dxi'a lataj ilún gadxi libí'ili'. Lë ni uluf'i légaquië' ila'nítië', pero uláli' libí'ili', le gaca bë' rácalenë' Dios caz libí'ili'.

²⁹ Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí' rizáca'li' cate' runli' xichinë'.

³⁰ Na'a, gaca gunli' neda' tsözxön güi' ládxi'ru' gunru' libán que didza' dxi'a. Bilé'e queézili' ca gudí' guzxáca' cate' bena' caní zí'alö, ate' riyönili' ca riguí' rizáca'a ca' na'a.

2

Gúquië' Cristo nöxaj ladxi', ate' bidéli'në' yöl-la' zxön

¹ Cristo runë' ga rutipa ládxi'li',
en lu yöl-la' nadxí'i queë' ruhuéchi' ládxi'ë libí'ili',
en runë' ga nácali' tuz len Dios Bö' Lá'ayi,
en ga nadxí'ili' luzá'ali',
en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lëbisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'.

³ Ca naca le runli', biti' bi ral-la' gunli' lu yöl-la' rudul-li' queéli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'.

⁴ Guli'güi' ladxi' gaca dxi'a ca' que luzá'ali', en caléga queézili'.

⁵ Ral-la' gácali' nöxaj ladxi' ca na' gúquië' Jesucristo nöxaj ladxi'.

⁶ Lë' naca cazë' lëbisö ca náquië' Dios caz, pero biti' gúquinë' ral-la' gunë' bayudxi ugá'anë' lëbisö ca na' náquië' Dios.

⁷ Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachí, en gúquië' idú bönachí.

⁸ Cate' ni' náquië' bönni', gúquië' nōxaj ladxi', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'.

⁹ Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatëro lo ca yúgu'të lágaca bōnachi.

¹⁰ Caní benë' Dios para cate' ila'yōni ca na' lë' Jesús, ulu'zechu zxíbigaca yúgu'të nupa nacuá' yehua' yubá, en lu yōdzōlió, en lu lataj chul-la.

¹¹ Yúgu'të' ila'guíxjō'ë yálajdo' Jesucristo náquië' Xanru' para gaca yōl-la' ba queë' Xúziru' Dios.

Ral-la' gácaru' ca tu le ta'gú'u bení' yōdzōlió ni

¹² Que lë ni na', böchi' luzá'ado', ca na' benli' ca rnna xtídz'a'a cate' ni' zóalena' libí'ili', runrō bayudxi gunli' ca rnna xtídz'a'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usólë' libí'ili'. Guli'gún caní lu yōl-la' radxi queëli' Lë', en lu yōl-la' rixxizi.

¹³ Lë cazë' Dios runë' dxin lu icja ládxi'do'oli'. Runë' ga rë'ënili' gunli' le raza ládxië'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en biti' bi innëli' que, en biti' til-la dídz'a'li'.

¹⁵ Caní ral-la' gunli', para cabí gaca nu bi innë queëli', pero caní gácali' ca xzí'ini cazë' Dios, nácali' idú dxi'a yōdzōlió ga ni zóali' ladaj bōnachi biti' nácagaca tsahui', en nucá'anagaca Dios. Libí'ili' rigú'uli' bení' ládjagaquië' ca na' ta'gú'u bení' bōlaj lúzxiba cate' ni naca chul-la,

¹⁶ cate' ruí'ili' lógaquië' didza' ibániguequinë'. Channō caní gunli', huáca udzëjade'eda' ni'a que le naca cázali' dza huödë' Cristo, tu' inözda' biti' guca nítisō guzōa bōnadxi gátia', en calëga nítisō bena' dxin.

¹⁷ Yōl-la' réajlë' queëli' Cristo naca tu le raza ládxië'ë Dios. Sal-la' gun bayudxi gátia' para gaca idú yōl-la' réajlë' queëli' Lë', udzëjada', en uzí'lena' xibë tsōzxōn yúgu'tëli'.

¹⁸ Lësc'a' caní ral-la' udzëjali' libí'ili', en uzí'lenli' tsōzxōn neda' xibë.

Ca tunbi' bi'i Timoteo, en bi'i Epafrodito

¹⁹ Channō caní rë'ënë' Xanru' Jesús, runa' löza isōl-la'tea'-bi' bi'i Timoteo ga zóali', ate' ní'irō udzëjada' cate' huödabi' ududíxjōi'ibi' neda' catëze raca queëli'.

²⁰ Túzibi' lëbi' rizá' ládxi'bi' ca na' rizá' ládxa'a neda', en ruí'ida' ládxi'bi' libí'ili'.

²¹ Yúgu'të bönni' ia'zíca'rō, le naca quegacasë' tuí' ládxi'gaquië'. Biti' tuí' ládxi'gaquië' xichinë' Cristo.

²² Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsōzxōn dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsōzxōn xúzibi' dxin.

²³ Isōl-la'a-bi' bi'i Timoteo ga zóali' cate' inözda' nacxi gaca quia' ni

²⁴ sal-la' ruzxōni ládxa'a-në' Xanru' gunë' ga uduyútea' libí'ili'.

²⁵ Lësc'a' réquida' run bayudxi isōl-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsōzxōn dxin queë' Cristo, ate' gudíl-lalentu' tu' xihui'. Libí'í cázali' gusōl-la'li'-bi' ga zoa' para gácalenbi' neda'.

²⁶ Lë cázabi' rë'ëni' uduyúbi' libí'ili', en ruí'ida' ládxi'bi' libí'ili' tu' biyōnili' ben bayá' queëbi'.

²⁷ Le nácatë gúf'ibi', en guqui gátibi', pero buéchi' ládxië'ë-bi' Dios, en calëgasō lëbi', pero buéchi' ládxië'ë ca' neda', para cabí isëbirō ládxa'a ca na' risëbi ládxa'a na'a.

28 Que lë ni na', gú'uniröda' isöl-la'a-bi' queéli' para gaca udzėjali' leyúbölö cate' ulé'eli'-bi', en bítirö isëbi ládxa'a neda'.

29 Guli'sí' lu ná'alí' lëbi' lu yöl-la' rudzeja queéli', tu' nácabi' bi'i böchi'ru' réajlë'ëbi' Cristo. Guli'gún bal yúgu'të bönachi nácagaca ca nácabi' lëbi',

30 tu' guzóa bönadxi queëbi' gátibi' tu' benbi' xichinë' Cristo, en tu' gúcalenbi' neda' uláz queéli'.

3

Le naca idú tsahui'

1 ¡Na'a, böchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queéli' leyúbölö lë na' buzúaja' queéli' zí'alö, tu' gácalen lë ni libí'ili'.

2 Guli'gún chi'i cuinli' lógaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipéla'gaquië' bönni' le naca bë' nazí' lu ná'gaquië' xtídzë'ë Dios.

3 Rë'u nadéli'ru' lë na' naca idútë li, le naca bë' nazí' lu ná'aru' le runnë' queëru' Dios. Tu' réajlë'ëru' Dios, zóalenë' Dios Bö' Lá'ayi rë'u, atë' rudzëjaru' tu' nácaru' tuz len Jesucristo. Biti' ca' ruzxöni ládxi'ru' tu le runru' rácasö queëru'.

4 La'tu' ruzxöni ládxi'ru' lë ni, lësca' neda' chinadéli'da' bi' uzxöni ládxa'a. Channö zoë' nu bönni' réquinë' ulé' tu' nacuá' le nunë', neda' nadéli'röda' ca bönni' na'.

5 Gurugu lu xipéla'a lë na' naca bë' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xzí'ini xi'sóë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

6 Bë'da' ládxa'a xibá na' ga bidxintë gudxía ládxa'a bönachi queë' Cristo.

Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca innë quia'.

7 Na'a, yúgu'të lë na' bena' zxön zí'alö, nuzóa' tsölá'alö tu' néquida' queë' Cristo.

8 Calëgasö yugu' lë na', pero nuzóa' ca' tsölá'alö yúgu'të le dë, para gaca gúnbe'eda'-në' Xanru' Jesucristo, le nácaterö lesaca' ca yúgu'të lë na'. Para gúnbe'eda' Lë' gurú'una' ní'lö yúgu'të, en réquida' naca ca bëbu, para uzi'a xibë' Cristo,

9 en para gaca' tuz len Lë'. Nuhuóaca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'.

10 Rë'ënisida' gúnbë'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, atë' guna' Lë' tsözxön, qui'i saca'a ca na' gudí'i guzzáquë'ë Lë', en soa' sina' gátia' ca gútië' Lë',

11 tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

12 Biti' rnnía' chinadéli'da' yúgu'të lë ni gunnë' quia', en bití' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'.

13 Böchi' luzá'ado', bití' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', atë' runa' bayudxi idéli'da' le za'.

¹⁴ Runa' ca runë' tu bönni' rixíti'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'.

¹⁶ Na'a, ca naca lë na' bidéli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibuluf'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'.

¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxi quia', rnnía': Le tunë' zían bönni' run ga nácaquie' ca nupa biti' ta'lé'e Cristo dxi'a, tu' tu'zöé' tsólá'alö le ben cazë' Lë' lé'e yaga cruz.

¹⁹ Yugu' bönni' tunë' caní, tsójáquie' lu guí' gabila, tu' naca le ta'zësö ládxi'gaquie' dios quégaquie', ate' tun ba zxon cuíngaquie' ni'a que lë na' ral-la' gun ga ulu'tuí'inë'. Tuí'i ládxi'së le dë yödzölió ni,

²⁰ pero rë'u ni ruí'i ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusólá rë'u, urúajë' yehua' yubá na'.

²¹ Lë' utsé'ë idútë le naca cazaru', le riniti caz, en gunë' ga huóaca ca naca idútë le naca cazë' Lë', le sóatica'sö. Caní gunë' len yöl-la' huáca zxon queë' le ugunë' dxin para inná bé'enë' yúgu'të.

4

Ral-la' udzéalentica'siru'-në' Xanru'

¹ Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en ré'ënda' uduyúa' libí'ili'. Runli' ga rudzëjada', en nácali' ca tu le ruzi'a xibé.

² Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiquequi queë' Xanru'.

³ Na'a, böcha'a idú, ré'ënda' gácalenu' irópanu ni, tu' gulúnlenmu neda' dxin, cate' bentu' libán que didza' dxi'a. Lë'sca' bulu'dzáguie' Clemente, en ia'zica'rë' luzá'a na' netu'. Chinazúajgaca lágaquie' yehua' yubá ga na' nazúajgaca lágaca nupa chinadéli'gaca yöl-la' na' bán idú.

⁴ ¡Buli'dzéalentica'sö-në' Xanru'!

Leyúbölö, rnnía': ¡Buli'dzeja!

⁵ ¡Guli'gaca dxi'i ladxí' len yúgu'të bönachi!

¡Chizóa huödë' Xanru'!

⁶ Biti' ubi ugu'ili', pero guli'nabi-në' Dios le riquínili', en guli'guie': "Xclenu'" ca naca yúgu'të lë na' rinábali'.

⁷ Dios gunë' ga gaca queéli' le cuéqui dxi icja ládxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le náca'gaca dxi'a

⁸ Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idútë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxi' lu ná'ali' tsca na' bë'lëna' libí'ili' didza', en tsca na' bëna' ga ni' zóali'. Dios, Nu runna queëru' le ribequi dxi icja ládxi'do'oru' sóalenë' libí'ili'.

Le tsahui' gulunë' yugu' bönni' Filípos queë' Pablo

¹⁰ Rudzéjalenda'-në' Xanru' tu' ruí'i ládxi'li' neda' leyúbölö. Biti' rnnía' gul-la ládxi'li' neda', pero bití' guta' queéli' lataj gácalenli' neda' zí'alö.

¹¹ Lësca' caní, bití' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'.

¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nöljada' o nabila riduna', en sal-la' dëda' quia' o zoa bi riyadzaj quia'.

¹³ Yúgu'të huazéqui'da' tu' rutipë' Cristo ládxa'a.

¹⁴ Benlí' dxi'a cate' ni' gúcalenli' neda', en butípali' ládxa'a cate' gudí'i guzácá'a.

¹⁵ Libí'ili', bönni' Filípos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacué' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzejali', tu' guzxi' lu ná'ali' libán bena' neda'.

¹⁶ Tsanni ni' guzóa' yödzö Tesalónica, tu chopa luzuí gusöl-la'li' quia' le bunödzejali' cate' ni' biyadzaj quia'.

¹⁷ Bití' ruí'i ládxa'a bi si'a, pero rë'ënda' gáta'rö queéli' le uzí'ili' xibé yehua' yubá.

¹⁸ Rea' libí'ili': Chiguzxi'a yúgu'të lë na' gusöl-la'li' quia', ate' gudödité bë' tsca le biyádzjada'. Ben ga naca caní lë na' gusöl-la'li' lu ná'abi' bi'i Epafrodito. Lë na' bunödzejali' naca ca tu le rilá' zixixi le ridxintë lahuë' Dios, en ca tu le rigú'uru' lahuë' Dios le raza ládxe'ë.

¹⁹ Dios gunnë' queéli' yúgu'të le riyadzaj queéli', tsca naca yöl-la' tsahui' röö yehua' yubá, tu' nácali' tuz len Jesucristo.

²⁰ ¡Gácatíca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu' gapa Dios luz'ëguequi

²¹ Uláz quia' neda', guli'gapa Dios nupa ni' néquiguequi queë' Dios tu' nacagaca tuz len Jesucristo. Tu'gapë' Dios libí'ili' böchi' luzá'aru' núngaquië' neda' tsözxön ni.

²² Lësca' yúgu'të nupa ni' néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacué' lidxë' bönni' rinná bë'ë idú luyú Roma tu'gapë' Dios libí'ili'.

²³ Rinábida'-në' Xanru' Jesucristo uzá' ládxe'ë queéli' yúgu'tëli'. ¡Ca' gaca!

DIDZA' GUSÖL-LË'Ë PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'.

² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxí'do'oli'.

Pablo rulidzë' Dios, en rë' Lë': "Xclenu"

³ Rëtica'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli'

⁴ tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios.

⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a.

⁶ Didza' dxi'a na' bidxín queëli' ca ridxín ca' idútë yödzülió. Run dxin, en raca libán que, idútë yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bënbe'ëli' idútë le ruzá' ládxë'ë queëru' Dios.

⁷ Epafra, bönni' nadxí'iru'-në', busëdinë' libí'ili' lë ni. Lë' rúnlenë' netu' tsözxón dxin, en rácalenë' libí'ili'. Náquië' huen dxin idú queë' Cristo.

⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbe'ëli' idú le rë'ëni quezinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u.

¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núnbe'ëli'-në' Dios.

¹¹ Rinábitu'-në' utipë' ládxí'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxi', en udzeja ládxí'li'.

¹² Lu yöl-la' rudzeja queëli' guli'gufé' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxón nupa néquiguequi quez queë'.

¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'.

¹⁴ Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gútië' Cristo uláz queëru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios.

¹⁶ Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nápagaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la'

huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'.

¹⁷ Cristo zoa cazë' zí'alò ca yúgu'të le dë, ate' yúgu'të nacuá'tica'sò ni'a queë' Lë'.

¹⁸ Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alò Lë' bubanë' tsaz lu yöl-la' guti para tsëpisëtë'rë' ca yúgu'të le dë.

¹⁹ Caní guca, tu' guyaza ládxë'ë Dios Xuz sóalen Cristo idütë' le naca cazë' Lë'.

²⁰ Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichónë' cate' gútië' lë'e yaga cruz.

²¹ Libí'ili', zí'atëlò nulá'alenli'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxí'do'oli' ni'a que dö' biá'ali', pero na'a chibunë' libí'ili' tuz len Lë'.

²² Caní guca, tu' budödi cuinë' Cristo, en gútië' uláz queë'li' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntunú bi gaca innë' queë'li'.

²³ Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoá ga rë' xilibi zö'ö que, en biti' tseaj bö' ládxí'do'oli' ca runli' löza didza' dxi'a biyönili', lë na' raca libán que idütë' yödzülió le benë' Dios zxan lúzxiba. Dios buzöë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzëjada' na'a ca naca le riguí'i rizáca'a para gácalena' libí'ili', en ruúdxí rizá'a lu idütë' le naca' le riguí'i rizáca'lena' tsözxön Cristo uláz que idú le naca cazë' Lë', le naca bönachi queë'.

²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios.

²⁶ Ruzéajni'ida' bönachi le nagachi', lë na' bigachi' dza ni'te, ate' cuntunú benbë' le, pero na'a Dios chibululú'inë' bönachi néquiguequi quez queë' ca naca que.

²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rruna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' ládxí'gaca yúgu'të bönachi, ate' rusëditu' léguequi idütë' yöl-la' réajni'i, para gaca usudxintu' yúgu'të bönachi lahuë' Dios, naca idú ládxí'gaca tu' nácagaca tuz len Jesucristo.

²⁹ Para gaca caní runa' dxin, en ruí'i ládxa'a údxí guna' lë ni, rugúna' dxin yöl-la' huáca idú na' runnë' Cristo quia'.

2

¹ Rë'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödzü Laodicea, en le gácalen ca' yúgu'të nupa biti' ila'lé'eni neda'.

² Runa' caní para ila'dipa ládxí'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queë'ru'. Caní raca para ilúnbë'ë le bigachi' queë' Dios Xuz, lë na' naca cazë' Cristo.

³ Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i.

⁴ Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë.

⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

⁶ Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguie' Lë' libí'ili'.

⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazëdali'. Guli'guëtica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí güi'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácgaca idútë li, ca naca le ta'lëbi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi,

¹⁰ ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'.

¹¹ Narugu lu xipëla'gaquië' bönni' judío le rulu'i dá'gaquië' Dios, pero libí'ili', tu' dzágali' Cristo, zóalen libí'ili' le rulu'i néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'güë' tu guídido', pero libí'ili', nadúa idútë yöl-la' bönachi queëli' le bënlenli' dul-la'. Caní naca queëli' tu' benli' tsözxön Cristo cate' gútië' lë'e yaga cruz.

¹² Cate' bidíalali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti.

¹³ Zí'atëlö gúcali' ca nupa chinátigaca tu' nözi dul-la' gubága'li', en bití' guzóalen libí'ili' le rulu'i néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'.

¹⁴ Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugúë' lë na' nabága'ru', en budë'ë le lë'e yaga cruz ca tu le nabáguë'ë Cristo.

¹⁵ Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le nácgaca bö' xihui' na', en bugúë' idutë le guta' lu në'eguequi.

Ral-la' güi'í ládxi'ru' le naca que yehua' yubá

¹⁶ Que lë ni na', bití' güi'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' si' ruzë, o tu' cabí runli' zxön yugu' dza lá'ayi quégaca bönachi.

¹⁷ Yúgu'të lë ni naca ca tu bixín que le ral-la' gaca, ate' le rulu'i yúgu'të lë ni náquië' Cristo caz.

¹⁸ Bití' güi'ili' lataj nu gun ga unítli' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzö'ösö ícjagaquië' lu yöl-la' bönáchisö quégaquië'.

¹⁹ Nu run caní bití' da' Cristo. Náquië' Xanru', en ruzóë' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le

zeaj lu dxita lu bin, ate' rixxön idütë le naca cazë' ca rë'ënë' Dios uxönë' le.

²⁰ Libí'ili' chinátlenli'-në' Cristo para cabirö ila'nná be'e xibá que yödzölió libí'ili'. ¿Bizx que runli' tsca ni nácali' que yödzölió, en runli' ca ta'nná bé' xibá que?

²¹ Caní ta'nná yugu' xibá que yödzölió ni:

Biti' quítjanu' lë ni.

Biti' gagu' lë na'.

Biti' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácgaca le ta'nná bé' bönachi, en yugu' xibá nazí' lu në'eguequi.

²³ Le nácatë, yugu' xibá ni, téqui bönachi nápagaca yöl-la' réajni'i. Tun ga tu'lu'i cuínguequi ca bönachi yudo', en ga tu'lu'i cuínguequi nõxaj ladxi', en ga tu'saca' zí'gaca idütë le zeaj naca caz, pero xibá ni bití' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisó queëru'.

3

¹ Na'a, channö nubánlenli'-në' Cristo, guli'güf' ladxi' le nácgaca que yehua' yubá ga ni' rë'ë Cristo cuita lë'ë ibëla Dios, ga náquië' lo.

² Guli'sá' ladxi' le taca xitsá'aló, en calëga le taca luyú ni.

³ Naca queéli' tsca chinátli', ate' yöl-la' na'bán queéli' rapa chi'ë Cristo ga ni' zoa cazë' Dios.

⁴ Cristo nabánili' libí'ili'. Cate' uluí'i lahuë' Lë', ní'irö uluí'i loli' ca' libí'ili' tsözxön len Lë' lu bení' queë'.

Yöl-la' na'bán gula, en yöl-la' na'bán cubi

⁵ Que lë ni na', guli'gún ga ila'niti le nacua'len libí'ili' que yödzölió ni:

Yugu' le ruá' dö', en le nácgaca xihuí',

en yugu' le rizé ládxi'li' le ruá' dö',

en yugu' le rizé ládxi'li' le naca xihuí',

en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guió' budó' yaga, tu' cabí reaj ladxi' Dios nu ruhuidi'.

⁶ Tun bönachi yugu' le caní, ate' gunë' Dios xíguia' yúgu'të nupa bití' túngaca ca rnna xtídzë'ë.

⁷ Yugu' dul-la' caní benli' ca' libí'ili' cate' ni' nadó'dili' lu në'eguequi.

⁸ Na'a, bíti'rö gunli' yugu' lë ni:

Bíti'rö idzá'ali', en bíti'rö leli'.

Bíti'rö nu gunli' zi', en bíti'rö innë xihuí'li'.

Bíti'rö innali' le ruá' dö'.

⁹ Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'aló, en yugu' le benli' zí'aló.

¹⁰ Chinácali' bönachi cubi, ate' tu tu dza ricúbili', ruhuóácaröli' ca naca Nu na' bun libí'ili', para gúnbë'ëli' Lë' idú ca náquië' Lë'.

¹¹ Tu' chidzágaru'-në' Cristo:

Bíti'rö nácaru' bönni' zi'tu', en bönni' judío.

Bíti'rö nácaru' bönni' narugu lu xipéla'gaquië' le naca bé' nu da' Dios, en bönni' bití' narugu lu xipéla'gaquië' lë na' naca bé'.

Bíti'rö nácaru' bönni' ta'yéajni'inë', en bönni' bití' ta'yéajni'inë'.

Bíti'rö nácaru' bönni' nadó'ogaquië', en bönni' bití' nadó'ogaquië'.

Na'a, Cristo náquië' yúgu'të le nácgaca lesaca', en dzáguie' yúgu'tëru'.

¹² Dios nadxí'iné' libí'ili', en guröë' libí'ili' para guéquili' quez queë'. Que lè ni na', ral-la':
Güf'i ládxi'li' luzá'ali', en gácali' dxi'i ladxi',
en nöxaj ladxi', en cuidi' ladxi',
en cözali' zxon ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'.

¹⁴ Le nazáca'tërö ca yúgu'tè lè ni, ral-la' idxi'ili' yúgu'tè bönachi, tu' naca yöl-la' nadxí'i le run ga nácaru' tuz, en ga nácaru' idú.

¹⁵ Guli'güi' lataj le ribequi dxi icja ládxi'do'oru' inná bë' lu icja ládxi'do'oli', lè na' runnë' Dios queëru'. Que lè ni na' bulidzë' libí'ili', para gácali' tuz lu idütë le naca cazë' Cristo. Guli'gué' Dios: "Xclenu'."

¹⁶ Guli'sí' lu ná'ali' xtídzë' Cristo le gaca queëli' tu yöl-la' tsahui' zxon. Tu' zóalen libí'ili' yöl-la' réajni'i queë' Dios, buli'sedi, en buli'zéjni'i luzá'ali' tuli' ia'tuli'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-në' Dios: "Xclenu'."

¹⁷ Yúgu'tè le runli', le naca didza' ruí'ili' o le naca dxin runli', guli'gún yúgu'tè lu Lë' Xanru' Jesús, en guiéli'-në' Dios Xuz: "Xclenu'", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'alenli' bönni' queëli',
guli'gún ca rnna xtídzá'gaquië' bönni' que queëli'
ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'alenli' nigula queëli',
guli'dxi'i nigula que queëli',
en biti' uzéli' bach légacanu.

²⁰ Libí'ili', bi'i ra'bán,
guli'gún ca rnna yúgu'tè xtídzá'gaquië' xuz xiná'ali'.
Lè ni raza ládxi'li' Xanru'.

²¹ Libí'ili', núlöli' nácali' xúzgaca bí'ido',
biti' tódi bë' usína'li' zxf'inili',
para cabi huöaj ládxi'gacabi'.

²² Libí'ili', núlöli' nácali' bönni' nadó'ogaquië',
guli'gún ca rnna yúgu'tè xtídzá'gaquië' xanli' luyú ni.
Calégasö gunli' caní cate' tu'yúë' libí'ili'
ca na' tun nupa té'ëni ilún ga ila'yaza ládxi'gaca bönachi,
pero idú ládxi'li' guli'gún xichíngaqië'

ca ral-la' ilún nupa tadxí Dios.
²³ Ca naca yúgu'tè le runli', guli'gún idú ládxi'li',
gaca ca runli' xichinë' Xanru',
en calégasö ca runli' xichíngaca bönachi.

²⁴ Chinöz quézili' ubi'ë Xanru' queëli',
gunné' queëli' le chinupë'ë Dios quégaca nupa nácgaca zxf'ini cazë'.
Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabi utsë'ë Dios ca ral-la' ubi'ë que queégaca bönachi.

4

¹ Libí'ili', núlöli' nácali' xángaca bönachi,
guli'gún le naca tsahui', en le naca dxi'a

ca rugunli' dxin yugu' bönni' huen dxin queéli'.

Guli'tsöjné zoa ca' Xanli' yehua' yubá.

² Libí'ili', yúgu'téli',

buli'lídzatica'së' Dios.

Buli'subán ládxi'li' ulídzali'-në' Dios,

en guli'guié': "Xclenu'."

³ La' ná'asö cate' rulídzali'-në' Dios, guli'nabi-në' ca' gácalenë' netu', en gunnë' netu' lataj quíxjö'ötu' xtídzë'ë Xanru', para gaca uzéajni'itu' bönachi le bigachi' ca naca queë' Cristo. Tu' runa' caní nadzuna' lidxi guié' ni.

⁴ Guli'nabi-në' ca' Dios, gunnë' neda' lataj usalaj lá'ana' le bigachi' na' ca ral-la' guna'.

⁵ Lu yöl-la' réajni'i queéli', guli'gún le runli' lógaca nupa biti' ta'yéajlé' Cristo. Guli'gunda' dxin yugu' dza uzá' ládxië'ë Dios queéli', gunli' xich-inë'.

⁶ Ral-la' güf'ili' didza' ca raza ládxië'ë Dios, en ca ral-la' gun nupa néquiquequi queë'. Ral-la' inözili' ca' naca ral-la' ubí'ili' didza', bi guié'li' tu tu bönachi.

Yugu' bönachi queë' Cristo tu'gapa Dios luzë'eguequi

⁷ Tíquico quíxjö'i'inë' libí'ili' le raca quia' ni. Náquië' böchi'ru' nadxí'iru'-në'. Náquië' ca' huen dxin idú queë' Xanru', en rúnlenë' neda' tsözxön dxin queë' Xanru'.

⁸ Que lë' ni na' risöl-la'a-në' ga zóali', para uzéajni'inë' libí'ili' le raca quia', en utipë' ládxi'li'.

⁹ Onésimo, böchi'ru' na' nabábalenë' libí'ili' sa'yéajlenë' lë' tsözxön. Náquië' ca' böchi'ru' nadxí'iru'-në', en réajlé'ë Xanru'. Chopë' ni ulu'siyönnë' libí'ili' yúgu'të le raca ni.

¹⁰ Aristarco, bönni' na' yú'ulenë' neda' tsözxön lidxi guié' rugapë' Dios libí'ili'. Bi'i Marcos, bi'i bönni' queënu nigula zanë' Bernabé rugápabi' Dios ca' libí'ili'. Chigudxa' libí'ili' bi'gunli' queëbi' bi'i Marcos na'. Channö huídabi' ga zóali', guli'gún-bi' bal.

¹¹ Bönni' ni lë' Jesús, en zoa ia'tú lë' Justo lësca' rugapë' Dios libí'ili'. Nacuá' zían bönachi judío ta'yéajlé' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxön len neda', en tu'huí' zxöndë'ë neda'.

¹² Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxië'ë rulídzë' Dios, en ráta'yutica'së' lahuë' gácalenë' libí'ili' para gácali' idú ládxi', en sóali' ca' sina' gunli' yúgu'të le ré'ëni quézinë' Dios.

¹³ Runa' ba nalí queë' Epafras na', ru'í'ida' ládxië'ë libí'ili' enca' nupa nacua' yödzö Laodicea, en nupa nacua' yödzö Hierápolis.

¹⁴ Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

¹⁵ Guli'gapa Dios böchi'ru' nacu'ë Laodicea, enca' Ninfas, en bönachi queë' Cristo nacua' lídxinu Ninfas na'.

¹⁶ Cate' údxi ulábalí' guichi ni ga ni' zóali', guli'gún ga ulu'laba le bönachi queë' Cristo nacua' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'.

¹⁷ Guli'guié' Arquipo: "Bë' ládxi'u gunu' dxin na' budödë' Xanru' lu no'o."

¹⁸Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guíë ni. Rinábida'-në' Dios uzá' ládxë'ë queëli' le naca dxi'a. ¡Ca' gaca!

DIDZA' ZÍ'ALÖ GUSÖL-LË'È PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi' do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu'" cate' røjnetu' ca naca queëli' yúgu'tëli'. Røjnética'stu' libí'ili', bi rinábitu'-në' Dios ni'a queëli' cate' rulidztu'-në'.

³ Røjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatica'sili' tsutsu tu' runli' löza Xanru' Jesucristo.

⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'.

⁵ Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzëjali' tu' zóalenë' Dios Bö' Lá'ayi libí'ili'.

⁷ Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya.

⁸ Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, biti' bi run bayudxi innatu',

⁹ tu' ta'guixjö' la' léguequisö bönachi ni' queëtu' ca benli' netu' bal, en ca na' butsá' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios.

¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'.

² Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'.

³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queëli', en biti' guzxí' yé'etu' libí'ili'.

⁴ Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö rufí'tu' didza'.

⁵ Nöz quézili' catu caz bë'lentu' libí'ili' didza' le gun zxön libí'ili', en bití' guléaj tsahui' cuintu' ca run nu bi rizé ladxi' le dë queéli'. Nöz quézinë' Dios naca caní.

⁶ Bití' gudíljatu' yöl-la' ba le naca que yödzülió ni, lë na' cú'uli' libí'ili' netu', en caléga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasöl-lë'ë Cristo

⁷ guzóalentu' libí'ili' dxi'i ládxi'do', en bentu' ca runnu xiná'agacabi' bi'i hué'ërido', run chí'ínu légaçabi' dxi'i ládxi'do'.

⁸ Caní guca, bidxí'ide'etu' libí'ili', ga bidxintë gú'unitu' udöditu' lu ná'ali', calégasö didza' dxi'a queë' Dios, pero lá'tu'biçui' udödi caztu' yöl-la' na'bán queëtu', tu' nadxí'ide'etu' libí'ili'.

⁹ Röjneli', böçhi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudálatu' libí'ili' idú ca raza ládxe'ë Dios, en idú dxí'ado', en ca na' cuntu nu gaca bi innë que.

¹¹ Lësa' caní nözili' ca bentu' ca runë' tu bönni' quégacabi' xzi'inë', guchízatu' icja nágali', en butípatu' ládxi'li' tu tuli'.

¹² Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu beni' queë'.

¹³ Que lë ni na' ca', rëtica'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyönili' bë'ëtu' didza', caléga ca xtídza' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo.

¹⁴ Böçhi' luzá'atu', raca queéli' ca raca quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzáca'da'ali' lu ná'agaca bönachi uládz queéli', lëbisö ca na' gula'guí'i gula'záquië' légaquië' lu ná'agaca bönachi uládz quégaquië', nupa ni' náçagaca bönni' judío.

¹⁵ Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Bití' tunë' le raza ládxe'ë Dios, tu' cabí ta'lé'enë' dxi'a yúgu'të bönachi izá'a.

¹⁶ Tu'záguë'ë ca' xinöztu', para cabí guntu' libán lógaca bönachi izá'a na' bití' nabábagaca légaquië', tu' ru'í'entu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégaquië'.

Pablo rë'ënë' tsöjyüë' böçhi'ru' nacu'ë Tesalónica

¹⁷ Na'a, böçhi' luzá'atu', ruhu'fínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ru'í' ládxi'rötu' ulé'etu' loli', tu' rizëda' ládxi'tu' guntu' caní.

¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihui', buzaga' xinöztu'.

¹⁹ ¿Bizxi caz naca le run ga runtu' löza, o le run ga rudzéjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'?

²⁰ Libí'i cázali' náçali' le run ga nácatu' bica' ba, en le run ga rudzéjatu'.

3

¹ Que lë ni na', cate' bítirö guca guá' ilentu', ben xtídza'tu' ugá'anatu' chópatu' lu yödzo Atenas,

² ate' gusöl-la'tu'-bi' bi'i böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxón libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo,

³ para cabí soa nu gaca chopa ladxi' ni'a que le tu'saca' zi' bönachi ni netu'. Nöz quézili' zóaru' yödzo'lió ni para guá' ilenru' le caní.

⁴ Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'.

⁵ Que lë ni na', cate' bítirö guca guá' ilena', gusöl-la'a-bi' bi'i Timoteo ga zóali', para ududíxjöi'libi' neda' ca naca queëli' ca réajlë'ëli'-në' Cristo, en channö cabí gulú'u tu' xihui' libí'ili' nōza dul-la', nu na' rigú'u bönachi nōza dul-la', en channö cabí böáca nítisö dxin na' bentu' ga zóali'.

⁶ Cate' buzá'abi' bi'i Timoteo ga zóali', en budxinbi' ga zóatu', busiyönbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queëli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'.

⁷ Que lë ni na', böchi' luzá'atu', cate' ni' gudí'i guzxacá'tu' yúgu'të lë ni, en zían le guca queëtu', bidxín didza' queëtu' le buí'i zxon netu' cate' biyönitu' ca réajlë'ëli'-në' Cristo.

⁸ Na'a, nuhuóaca ládxi'tu' tu' riyönitu' rō'öli' tsutsu ca réajlë'ëli'-në' Xanru'.

⁹ ¿Nacxi caz gaca guíëtu'-në' Dios: "Xclenu'" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'?

¹⁰ Bayudxi rulidztu'-në' Dios, en rinábitu'-në' rëla, en tē dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

¹¹ Na'a rinábitu'-në' Xúziru' Dios, enca' Xanru' Jesucristo, cu'ë netu' nōza ga idxintu' ga zóali'.

¹² Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'.

¹³ Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxe'ë Dios

¹ Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

² Chinöz quézili' yugu' le gunná bé'etu' libí'ili' uláz queë' Xanru' Jesús.

³ Le rë'ënë' Dios naca gácali' idú dxi'a, en bítirö gunli' le cabí naca tsahui',

⁴ en inözili' tu tuli' nacxi ral-la' sóaleni'-nu nigula que queëli' idú ca sa'yéaj le naca lá'ayi, en gunli' légacanu bal.

⁵ Biti' ral-la' sóalenti'-nu nigula queéli' lu yöl-la' rizě ladxi' le ruá' dō', ca na' tun bōnachi biti' nabábagaca Dios, en biti' núnbē'gaca Dios.

⁶ Ca nácgaca lē ni, cuntu nu ral-la' tōdi bē', en cabí si' ye'e böchi' luzě'e bagáchi'sō, tu' ichúguiē' Lē cazē' Xanru' quégaca yúgu'tē nupa tun le caní, gunē' ca na' chigúdxitu' libí'ili', en bentu' ba nalí que lolí'.

⁷ Dios bulidzē' rē'u, calēga para gunru' le ruá' dō', pero para gácaru' idú dxi'a.

⁸ Caní naca, nu ruzóa tsólá'alō lē ni, calēga bōnáchisō ruzóa tsólá'alō, pero Dios caz ruzóa tsólá'alō, tu' gusól-lē'ē Lē cazē' Dios Bō' Lá'ayi queēru', Nu ruí' caní didza'.

⁹ Biti' run bayudxi uzúaja' queéli' lu guichi ca ral-la' idxí'igacali'-nē' böchi' luzá'ali', tu' chinazédali' la' libí'isili' lu nē'ē Dios idxí'ili' luzá'ali' tuli' ia'tuli'.

¹⁰ Le nácatē nadxí'igacali'-nē' yúgu'tē böchi' luzá'aru' nacu'ē luyú Macedonia. Na'a, ráta'yutu' lolí', böchi' luzá'atu', para idxí'igacarōli'-nē' ca' yúgu'tē böchi' luzá'ali'.

¹¹ Ráta'yutu' lolí' ca', gūf'i ládxi'li' cōzali' dxí'ado', en gunli' yugu' le dē lu ná'asili', en gunli' dxin len na'a cuinli' ca na' chigunná bé'etu' libí'ili'.

¹² Gunná bé'etu' libí'ili' caní para gaca gunli' le naca dxí'ado' lógaca nupa biti' nabábagaca libí'ili', en caní gaca, biti' bi yadzaj queéli'.

Ca gaca cate' huödē' Xanru' Jesucristo

¹³ Lēscá', böchi' luzá'atu', rē'ēnitu' inózili' ca raca quégaca nupa chinátigaca, para cabí huí'inili' ca tun ia'zica'rō bōnachi biti' zoa le tun löza.

¹⁴ Channō réajlě'ēru' gútiē' Jesús, en bubanē', lēscá' caní ral-la' uzxōni ládxi'ru'-nē' Dios gunē' ga huōdalengaca tsōzxon Jesús nupa ni' chigulati, en gula'yéajlě' Lē'.

¹⁵ Que lē ni na' riguǎjōi'itu' libí'ili' xtídzē'ē Xanru' le rnna caní: "Rē'u ni zóaru' nabanru', en ugá'anaru' ga idxinrō dza huödē' Xanru' Jesucristo, biti' tsōjtságaru'-nē' Cristo zí'alō ca nupa chigulati."

¹⁶ Caní gaca, tu' huötjē' Lē cazē' Xanru', en irúajē' yehua' yubá, ate' yōn chi'ē, len yöl-la' unná bē' ulidzē', ate' yōn ca' chi'ē gubáz lá'ayi lo, ate' yōn ca' luzu ucōdxē' Dios, ate' ulu'bán nupa na' chigulati, en gula'yéajlě' Cristo.

¹⁷ Ní'irō rē'u ni zóaru' nabanru', en nagá'anaru' luyú ni, uchisē' rē'u tsōzxon len léguequi lu böaj lúzxiba para tsōjtságaru'-nē' Xanru' lu bö'ös. Caní gaca, sóalenticá'siru'-nē' Xanru'.

¹⁸ Que lē ni na', guli'huí' zxon luzá'ali' tuli' ia'tuli' ca nácgaca didza' ni.

5

¹ Na'a, ca naca dza na', o rēla na' cate' ilaca lē ni, biti' run bayudxi uzúaja' queéli' lu guichi, böchi' luzá'atu'.

² Libí'ili' chinōz quézili' dxi'a ca gaca dza cate' huödē' Xanru'. Idxinē' tsárido'os ca ridxinē' gubán chi'i dzō'ölō.

³ Cate' ila'nná bōnachi: "Raca dxi'a queēru', en biti' bi gaca queēru'", ní'irō la' idxintē le usuniti léguequi, lē na' idxín quéguequi ca na' ridxín le riguí' rizáca'nu nigula na' chizóa sóabi' bí'ido' queēnu, ate' cuntu nu nutsa' ladaj bōnachi yōdzolió ni nu ulá cate' gaca lē na' gaca dza na'.

⁴ Na'a, böchi' luzá'atu', biti' zóali' chul-la niti, en que lē ni na' biti' idxín dza ni' queéli' bagáchi'sō ca ridxinē' bōnni' gubán.

5 Yúgu'tèli' nácali' bönachi que bení', en que lahui' dza. Biti' nácaru' bönachi que chi'i dzõ'ölö, en calëga que le naca chul-la.

6 Que lë ni na', biti' ral-la' tõi yëla loru' ca raca quegaca nupa bití' nabábagaca rë'u, pero ral-la' usubán ládxi'ru', en cõzaru' ba'a ládxi'do'.

7 Nupa tasi, chi'i dzõ'ölö tasi, en nupa ta'zudxi, chi'i dzõ'ölö ca' ta'zudxi.

8 Na'a, rë'u ni, nácaru' que lahui' dza, en ral-la' cõzaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chi'i ícjaru'.

9 Caní naca, tu' nuzóë' Dios rë'u ni, calëga para idxinru' ga ichúguié' queëru', pero para uláru' tu' ruzxõni ládxi'ru'-në' Xanru' Jesucristo,

10 tu' gútië' Jesús uláz queëru' para sóaru' ibanru' tsõzxõn len Lë' cate' huödë', sal-la' chinátiru' o sóaru' ibanru' dza ni'.

11 Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzë'ë ta'yéajlë'ë Cristo

12 Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'.

13 Ráta'yutu' loli' ca', gunli' légaquië' bal lu yöl-la' nadxí'i queëli', tu' tunë' dxin na'. Guli'cõza dxi'ado' tuli' len ia'tuli'.

14 Lësca' caní richízatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípali' ládxi'gaca nupa tu'huõaj ládxi'guequi, en gácalenli' nupa bití' naca tsutsu ca ta'yéajlë' Cristo, en gácali' nõxaj ladxí' lógaca yúgu'të bönachi.

15 Guli'gún chi'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'güf' ládxi'li' gúntica'sili' le naca dxi'a que luzá'ali' tuli' ia'tuli', en quegaca yúgu'të bönachi.

16 Buli'dzéjatica'sö,

17 en buli'lídzatica'së' Dios,

18 en guli'guié' Lë': "Xclenu."

Caní ral-la' gunli' ni'a que yúgu'të le raca queëli', tu' nácgaca lë ni le rë'ënë' Dios gunli' tu' nácali' queë' Jesucristo.

19 Biti' uzóa dxili' le rulídzatica'së' Dios Bö' Lá'ayi libí'ili'.

20 Biti' uzóali' tsólá'alõ xtídzë'ë bönni' ru'ë didza' uláz queë' Dios.

21 Guli'sí' bë' yúgu'të, en guli'sí' lu ná'ali' le naca dxi'a.

22 Biti' bi gútsa'li' le ruá' dö'.

23 Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntu nu gaca bi innë queëli' dza ni' huödë' Xanru' Jesucristo.

24 Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu në'ë Dios

25 Böchi' luzá'atu', buli'lidzë' Dios, en inábili'-në' gácalenë' netu'.

26 Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queëli'.

27 Ni'a queë' Xanru' Dios ruchi'a libí'ili' ulábalí' guichi ni lógaca yúgu'të böchi' luzá'aru' nabábagaqië' Cristo.

28 Rinábida'-në' Xanru' Jesucristo uzá' ládxi'ë' queëli' le nácgaca dxi'a queë'. ¡Ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'.

² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guíëtica'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxi'ili' luzá'ali' tuli' ia'tuli' zeaj rácarö idú.

⁴ Que lë ni na', len yöl-la' rudzeja riguixjö'ötu' ca naca queëli' lógaca bönachi queë' Dios ni, tu' ribözali' zxön ladxi', en réajlë'ëli' Dios sal-la' ta'biada' ládxi'gaca bönachi libí'ili', en riguí'rizáca'da'ali', pero ruá' rilenli' yúgu'të.

⁵ Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj riguí'rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí'ila'zaca' nupa na'.

⁷ Ia'stú, libí'ili' riguí'rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'.

⁸ Ilá' lahuë' Cristo dza ni' ca tu guí' zxön cate' ni' gunë' zi' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo.

⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'.

¹⁰ Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí' ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni.

¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu',

² para cabí gü'ili' lataj nu gun chixi libí'ili' ca nácgaca le guzxi' lu ná'ali'. Biti' cuéqui böniga icja ládxi'do'oli' ni'a que bi ta'nné' bönni' ta'zif' yë'ë, ta'nné' zóalenë' Dios Bö' Lá'ayi légaquië', o ni'a que bi didza' tu'fi bönachi, o ni'a que bi nazúaj tu lu guichi ta'nné' netu' gusöl-la'tu', le rnna: "Chigudödi dza huödë' Xanru'."

³ Biti' ca' gü'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila.

⁴ Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'?

⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'.

⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'.

⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunitië' lë' len le tsëpi yösa bení' que dza huödë'.

⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi.

¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'zif' lu né'éguequi idú ládxi'guequi le naca idútë li, para ulu'láguëqui.

¹¹ Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguëqui para ila'yéajlë' le cabí nácatë.

¹² Caní gaca para ila'baga' xíguia' yúgu'të nupa bití' gula'yéajlë' le naca idútë li, pero gula'yaza ládxi'gaca le cabí naca tsahui'.

Nupa gurö cazë' Dios para ulu'láguë

¹³ Böchi' luzá'atu', libí'ili' na' nadxí'inë' Xanru' libí'ili', ral-la' guítica'stu'në' Dios: "Xclenu" ni'a que le naca queëli', tu' chigurö cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li.

¹⁴ Para gaca caní queëli', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'. Caní gaca ni'a que didza' dxi'a runtu' libán que.

¹⁵ Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bé'entu' libí'ili', en buzúajtu' queëli' lu guichi.

¹⁶⁻¹⁷ Rinábitu'në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhuí' zxöntica'sö rë'u, en le naca dxi'a runru' löza, yugu' lë na' buzá' ládxië'ë Dios queëru'.

3

Le ral-la' inábiru'në' Dios

¹ Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'.

² Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios.

³ Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'.

⁴ Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'.

⁵ Rinábitu'-në' Xanru' usë'ë ládxi'li' para idxí'ili'-në' Dios, en cözali' zxön ladxí' ca na' benë' Cristo.

Ca run bayudxi gunru' dxin

⁶ Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'.

⁷ Nöz quezili' ral-la' gunli' ca runtu' netu'. Biti' gudásitu' ca' netu' ga ni' zóali'.

⁸ Biti' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'.

⁹ Caní bentu' para gácatu' loli' ca tu le rulu'í'i libí'ili' ca ral-la' gunli', sal-la' dë lu na'tu' inábatu' bi gunli' queëtu'.

¹⁰ Lëasca' cate' ni' guzóalentu' libí'ili', buchí'atu' libí'ili' caní, le rnna: "Channö cabí ré'ënë' nu bönni' gunë' dxin, biti' gü'í'ili' le gahuë'."

¹¹ Canísö rnnatu' tu' riyönitu' nútsa'gaquië' ládjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nne'.

¹² Ni'a queë' Xanru' Jesucristo ruchí'atu' yugu' bönni' tunë' caní, en richízatu' icja ná'agaquië' ilunë' dxin lu yöl-la' riböza dxí'ado', para gaca ilahuë' le nequi quégacasë'.

¹³ Na'a, böchi' luzá'atu', biti' soa dxili', gúntica'sili' le naca dxi'a.

¹⁴ Channö nútí'tës bönni' biti' gunë' ca rnna xtídza'tu', le ruzúajtu' lu guichi ni, guli'gún ga gaca bë'ë bönni' na', en biti' gunli' tsözxön lë' para utuf'inë'.

¹⁵ Biti' ral-la' ilé'eli'-në' ca tu bönni' biti' rilé'enë' libí'ili' dxi'a, pero guli'sá' ládxe'ë ca böchi' cázali'.

Pablo rigu'ë lu në'ë Dios yugu' böchi'ru' nacu'ë Tesalónica

¹⁶ Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxi'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risól-la'a. Canísö ruzúaja' lu guichi.

¹⁸ ¡Le ruzá' ládxe'ë Xanru' Jesucristo queëru' gaca queëli' yúgu'tëli'! ¡Ca' gaca!

DIDZA' ZÍ'ALÖ GUSÖL-LÈ'È PABLO QUEËBI BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lè'è Jesucristo. Caní naca' tu' caní gunná bè'è Dios, Nu rusölá rë'u, enca' tu' gunná bè'è caní Xanru' Jesucristo, Nu na' runru' löza.

² Rugapa' Dios li', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'è quiu', en huéchi' ládxë'è li', en gunë' ga soa dxi icja ládxi'do'.

Pablo rusë'è ládxi'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lè' bönni' ni' cabí ulu'sédinë' tu xibá yúbölö,

⁴ en cabí ilunë' zxön yugu' didza' ridasö, en lágaca ziántërö cö' xuz xtó'ogaca bönachi, yugu' le tun ga tu'i ládxi'gaca bönachi le náca'gaca nítisö. Yugu' le caní bití' tun tsutsu bönachi queë' Dios ca naca le ta'yéajlë' Lë'.

⁵ Le ré'ëni gun lë ni rea' li', naca para ila'dxi'i bönachi luzë'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlë' Dios.

⁶ Ca náca'gaca lë ni, bití' bulu'rúajë' bal-lè' bönni' dxi'a, pero gula'guélë'è tu nöza yúbölö, en tunë' bal yugu' le bití' nácatë.

⁷ Té'ënnë' ulu'sédinë' bönachi ca naca le rinná bë' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

⁸ Rë'u nöziru' naca dxi'a xibá gunná bë'è Dios, channö nu rugún le dxin ca ral-la' gun.

⁹ Lë ni nöziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bë' xibá na'.

Nupa bití' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

¹⁰ Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtí'dza'guequi, ta'nná le cabí nácatë.

Nupa ta'dá'baga yugu' xibá tsahui'.

¹¹ Nöziru' naca caní tu' bidxín queëru' didza' dxi'a buzá' ládxë'è Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu" tu' buéchi' ládxë'è lë'

¹² Rea'në' Xanru' Jesucristo, Nu rutipa ládxa'a, "Xclenu" tu' buzõni ládxe'ë neda', en buzóe' neda' guna' xichinë'.

¹³ Caní benë' sal-la' zí'aló neda' gunné' zi'a queë', en gudxía ládxa'a bönachi queë', en zían le bi'a dõ' queguequi, pero Cristo buéchi' ládxe'ë neda', tu' bena' caní lu yöl-la' bití' réajni'í quia' cate' ni' bití' réajlë'ënida' Lë'.

¹⁴ Na'a, zxöntëro naca le buzá' ládxe'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' idütë li lë ni, en le naca lesaca' ila'zí' lu ná'agaca yúgu'të bönachi, le rnna: Lë cazë' Jesucristo bidë' yödzölió ni para busölë' bönachi dul-la', ate' busölë' neda' sal-la' ná'cara' bönni' dul-la' ca yúgu'të bönachi.

¹⁶ Que lë ni na' buéchi' ládxe'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxí' idú queë', para gaca' tu le rulu'í lógaca nupa ila'yéajlë' Lë', en gata' queguequi yöl-la' na'bán idú.

¹⁷ Na'a rnnía: ¡Yöl-la' ba Dios, Nu rinná' bë'tica'sö, Nu catu caz údxi que, en Nu bití' gaca ilé'ëru', la's dui Dios Nu nözi caz yúgu'të! ¡Queë' Lë' gácatuca'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxfí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxe'ë rejë' gudil-la, en para uzi'u xibé yugu' le gula'guíxjö' zí'aló nupa ni' gulu'í didza' uláz queë' Dios ca gaca quiu'.

¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsölá'aló le réajlë'ëru' Cristo.

²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zi'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja ná'agaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunné' bi riquíniru', en ca ral-la' guiëru'-në': "Xclenu'." Yugu' lë ni ral-la' gunru' uláz queguequi yúgu'të bönachi.

² Lësca' caní ral-la' gunru' uláz quegaca nupa ta'nná bë', en quegaca yúgu'të nupa ná'cagaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxí' queëru'.

³ Lë ni naca dxi'a, en le raza ládxe'ë Dios, Nu rusölá rë'u.

⁴ Dios caz rë'ënë' ulu'lágaca yúgu'të bönachi, en rë'ënë' ilünbë'e le naca idütë li.

⁵ Tuzë' ná'quië' Dios, en tuzë' bönni' ruünë' dzaga Dios, en bönachi. Nu ni naca Jesucristo, Nu gulaj bönachi.

⁶ Lë cazë' budödi cuinë' lu yöl-la' guti, le benë' tu' nözi dul-la' nabága'gaca yúgu'të bönachi. Dios benë' ba nalí queë' cate' bidxín dza queë' gütië'.

⁷ Ca naca lë ni, Dios buzóe' neda' para guna' libán que, en gaca' gubáz nasöl-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idütë li. Rilítëda', en bití' ca' rizí' yë'a.

⁸ Na'a, rě'enda' ulu'lidzě' bōnni' Dios, en iláta'yuě' lahuě' gátitēs, nácagaquiě' idú dxi'a, en cabí ila'leně' luzá'agaquiě', en cabí ila'dil-la dídza'gaquiě'.

⁹ Lěsca' caní, rě'enda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nōxaj ladxi', en le naca idú ladxi', en calěga le tu'pá'asinu icja lógacanu len oro, en yugu' bugá, en lari' nazáca'da'.

¹⁰ Yugu' le dxi'a tunnu ulu'lu'i lahui le nácagacanu ca na' run le tácanu le naca ba'a. Caní ral-la' ilunnu nigula núnbě'gacanu Dios.

¹¹ Ral-la' ila'cuá'anu yugu' nigula dxisō cate' nu rusedi légacanu, en ila'cuá'anu nōxaj.

¹² Biti' runna' yugu' nigula lataj ulu'sédinu, en calěga ila'nná bé'enu yugu' bōnni'. Ral-la' ila'cuá'anu dxisō ga nudúbigaca bōnachi queě' Cristo.

¹³ Caní ral-la' gaca, tu' buzóě' Dios zí'alō Adán, ate' gudōdi na' buzóě'-nu Eva.

¹⁴ Adán na', bití' guzxi' ye'e tu' xihui' lě', pero nigula queě', guzxi' ye'e lěnu. Caní guca, gudítsjanu xibá queě' Dios,

¹⁵ pero ulanu nu nigula ruzóanu-bi' bf'ido' channō gúntica'sinu ca röjlöz le réajlě'ěru' Dios, en yöl-la' nadxi'i, en channō gácanu idú dxi'a, en idú ladxi'.

3

Ca ral-la' ilácagaquiě' bōnni' tapa chi'ě bōnachi queě' Cristo

¹ Didza' idútě li lě ni rnna: Channō ru'í ládxi'ě nu bōnni' gáquiě' nu gapa chi'i bōnachi queě' Cristo, dxin dxi'a rizě ládxi'ě.

² Nu bōnni' rapa chi'ě bōnachi queě' Cristo run bayudxi gáquiě': Tu bōnni' cuntu nu gaca bi inně queě'.

Zoa túzinu nigula queě'.

Ral-la' gáquiě' ban ladxi', en idú ladxi', en nōxaj ladxi'.

Ral-la' gu'ě ga ila'cu'ě bōchi'ru' ta'dxině lidxi'ě.

Ral-la' gáquiě' bōnni' nazéqui'de'eně' usédině' bōnachi.

³ Biti' gáquiě' bōnni' re'jě', en calěga bōnni' sínia'.

Biti' gáquiě' bōnni' rizě ládxi'sě' si'ě dumí.

Ral-la' gáquiě' bōnni' dxi'i ladxi', en zxön ladxi'.

Biti' gáquiě' bōnni' ruhuídi'ně'.

⁴ Ral-la' gáquiě' bōnni' rinná bé'eně' dxi'a bōnachi nacua' lidxi'ě.

Ral-la' ilunbi' xzí'ině' ca rnna xtídzě'ě lu yöl-la' run bal xúzgacabi'.

⁵ ¿Naru' huácatsō tu bōnni' gapa chi'ě bōnachi queě' Dios channō cabí raca inná bé'eně' dxi'a bōnachi nacua' lidxi'ě?

⁶ Biti' ral-la' gáquiě' tu bōnni' si' gusí lahuě' tē'ě Cristo, para cabí tōdi bē' gun ba zxön cuině', en bití' gaca queě' ca na' guca que tu' xihui', nu ben ba zxön cuini, ate' Dios guchúguiě' que tsōjgána lataj chul-la.

⁷ Lěsca' ral-la' gáquiě' bōnni' ta'nná dxi'a queě' nupa cabí nabábagaca bōnachi queě' Cristo, para cabí soa nu uzóa lě' tsólá'alō, en para cabí idzuně' lu yalaj que tu' xihui'.

Ca ral-la' iláquiě' bōnni' tácaleně' bōnachi queě' Cristo

⁸ Lěsca' caní ral-la' iláquiě' bōnni' tácaleně' bōnachi queě' Cristo:

Ral-la' iláquiě' bōnni' idú ládxi'gaquiě'.

Biti' iláquiě' bōnni' tu'rixě' didza'.

Biti' iláquiě' bōnni' té'ajě'.

Biti' iláquiě' bōnni' ta'zě ládxi'sě' dumí.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

¹⁰ Yugu' bönni' ni ral-la' si' bé'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë' queëgaquië'.

¹¹ Lësca' caní, nigula que queëgaquië' ral-la' ila'cuá'anu idú ládxi'gacanu, en cabí ilácanu unnë' que luzé'e. Ral-la' ilácanu zxön ladxí', en ilácanu li ladxí' lu yúgu'të le tunnu.

¹² Yugu' bönni' ilácalenë' bönachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a zxi'inigaquië', enca' bönachi ulidxi que queëgaquië'.

¹³ Run bayudxi gaca caní, tu' ta'déli'në' lataj ga ilún bal bönachi xtídza'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxí' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'.

¹⁵ Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacua' lidxë' Dios, nupa nácacaga bönachi queë' Dios ban, en nácacaga tsutsu, en ta'guíxjö' dxi'a le naca idútë li. Nácacaga ca yugu' ya'zxön, en le nunída'gaca zö'ö, le nácacaga tsutsu, en ta'zön yu'u.

¹⁶ Le nácatë, zxöntëro naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayëpisëtëre'.

4

Nupa ulu'huöaj ládxi'gaca ca naca le réajlë'ëru'-në' Cristo

¹ Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huöaj ládxi'gaquië' ca naca le réajlë'ëru' Cristo. Ulu'zé nágagaquië' xtídza'gaca bönachi nacua'len bö' ta'zí' yë' léguequi, ate' ulu'zé nágagaquië' yugu' xibá queëguequi bö' xihui'.

² Ulu'zé nágagaquië' xtídza'gaca bönachi tu'lú'isö tsahui' cuínguequi. Yugu' bönachi na' tufí' didza' le cabí nácatë, en chinazidi ládxi'do'guequi, para cabí uxösa léguequi.

³ Caní naca, tu' záguë'ë xinözguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en té' Dios: "Xclenu'" cate' tahuë' le.

⁴ Dxi'a naca yúgu'të le benë' Dios, en bití' bi ral-la' uzóaru' tsölá'alö channö ráguru' le, en rëru'-në' Dios: "Xclenu'."

⁵ Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bé' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u.

⁷ Gurú'una yugu' didza' ridasö que yödzülió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca ré'ënë' Dios.

⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca ré'ënë' Dios. Cate' runru' caní, lë ni run ga runru' löza sóaru' ibanru' yödzülió ni, enca' sóaru' ibanru' dza zá'gaca, tödi uzá'aru' yödzülió ni.

⁹ Didza' idütë'li lë ni, en le naca lesaca' ila'zí' lu ná'agaca yúgu'të bönachi.

¹⁰ Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zí' xibé le benë' nupa na' ta'yéajlë' Lë'.

¹¹ Gunná be'e, en busedi bönachi ilún yugu' lë ni.

¹² Cuntu nu ral-la' uzóla li' tsölá'aló tu' nacu' bi'i ra'bán, pero ral-la' gunu' le ulu'i nupa ta'yéajlë' Dios ral-la' ilún ca runu' li'. Caní ulu'ínu' légaquië': Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bé'tica'sö ladxí' ulabu' guichi lá'ayi lógaca bönachi nacua' ga ni' zu'. Guchiza icja ná'gagaquië' lë ni, en busedi légaquië'.

¹⁴ Biti' udödu' cá'asö le buzá' ládxë'ë Dios quiu', lë na' bennë' quiu' ca na' gula'nná nupa ni' gulu'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

¹⁵ Béntica'sö yugu' lë ni. Bé'tica'sö ládxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo.

¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

5

Ca ral-la' gunbi' Timoteo ni'a quégaca bönachi queë' Cristo

¹ Biti' uzenu' bach yugu' bönni' gula, pero guchiza icja ná'gagaquië' didza', tsca ná'cagaquië' xuz cazu'.

Guchiza icja ná'gagacabi' bi'i bönni' ra'bán didza', tsca ná'cagacabi' bi'i böchi' cazu'.

² Guchiza icja ná'gagacanu nigula gula didza', tsca ná'cagacanu xiná' cazu'.

Guchiza icja ná'gagacabi' bi'i nigula ra'bán didza', tsca ná'cagacabi' bi'i zan cazu', ca na' röjlöz le naca idú dxi'a.

³ Ben bal yugu' nigula ba guti bönni' que queë'gacanu, ná'cagacanu túzinu.

⁴ Channö zóanu tu nigula caní nacua'abi' bi'i queënu o xzí'ini xi'sóanu, ral-la' ila'zédabi' ilunbi' ca ré'ënë' Dios, para ilácalenbi' zí'aló bönachi nacua' lídxigacabi', en ulu'bí'ibi' quégaquië' xuz xiná'agacabi'. Lë ni naca dxi'a, en le raza ládxë'ë Dios.

⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatica'sinu lahuë' Dios, en rulídzanu Lë' ni'a quégaca bönachi queë',

⁶ pero nigula túzinu na' runnu ca naca le rizé ládxí'nu nácanu ca tu nigula chinátinu cate' ni zóanu nabannu.

⁷ Lësca' caní, gunná be'e bönachi nacua' ga ni' zu', para ilún ca sa'yéaj yugu' lë ni, para ilaca bönachi cuntu nu gaca bi innë' qué'guequi'.

8 Channö zoa nu bönni' cabí rugahuë' yugu' di'a dza queë', en le nácáro lo, channö cabí rugahuë' bönachi nacúa' lidxë', chigudá'baguë'ë le réajlë'ëru' Cristo, en nácaré' xihui' ca nu cabí réajlë' Dios.

9 Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queënu para sóalennu-në' ia túë' bönni'.

10 Run bayudxi soa nu gun ba nalí queënu ca nácagaca le dxi'a runnu. Gácalenli'-nu channö buscúlunu-bi' yugu' bí'ido', en channö ruí'ínu ga ila'cuá' böchi'ru' zá'gaquië' yödzö zí'tu', en channö ruí'ínu le ilë'aj ilágugaca bönachi queë' Dios, en channö rácalennu nupa ta'guí'i ta'zaca', en channö rúntica'sinu yúgu'të le naca dxi'a.

11 Yugu' nigula túzinu bití' yu'igacanu tsónnalalaj iz, bití' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö.

12 Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö.

13 Lësca'ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unnë que luzë'e, en tsöjgútsa'gacanu ga yúbölö, en ila'nnanu le cabí nácaté.

14 Que lë ni na', rë'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlanu-bi' yugu' bí'ido', en ila'nná bé'ënu bi'i nacúa'abi' yu'u que queëgacanu, para cabí iluí'ínu nu ridá'baga' rë'u lataj bi innë queëru', rë'u na' réajlë'ëru' Cristo.

15 Caní ral-la' gaca, tu' chibulu'bíga'nu bál-lagacacnu, ate' tunnu ca rë'ëni Satanás tu' xihui'.

16 Channö nútí'tës bönni' o nigula nu réajlë' Cristo, nacúa'anu nigula túzinu lídxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

17 Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bé'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi.

18 Nazúaj lu guichi lá'ayi le rnna: "Bití' cu'u du ruá'aba' bëdxi na' rulíbiba' xzoa' xtila." Rnna ca': "Náquië' lesaca' nu bönni' huen dxin si'ë lazxjë'."

19 Bití' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channö cabí nacúa' chopá tsonna nupa tun ba nalí que le benë'.

20 Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios.

21 Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en bití' gunu' bal tuzë' bönni'.

22 Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

23 Bítí'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

24 Yugu' dul-la' quéguequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios léguequi, ate' tódi ni' ila'lá' lahui dul-la' nabága'gaca ia'zica'rö bönachi.

25 Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

1 Yúgu'të bönni' nadó'ogaca ral-la' ilúndë'ë bal xángaquië', para cabí gaca nu innë' zi' que La lá'ayi queë' Dios, en que xibá queë'.

2 Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asö légaquië' tu' nácagaquië' böchi'guequi. Ral-la' ilunrö dxi'a xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacuá' ni', en guchiza le icja nágagaquië'.

Le reaj ládxi'ru'-në' Dios le ruzí'iru' xibé

3 Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios,

4 bönni' ni run ba zxön cuinë', en biti' bi nözinë'. Didza' biti' naca dxi'a rizë ládxe'ë ca nácagaca didza' böniga, en didza' bizxaj, yugu' le tun ga tu'zx'e bönachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nnë' zi' bönachi que luzë'eguequi, en ta'zá' ládxi'gaca que luzë'eguequi le cabí nácatë.

5 Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu në'eguequi le naca idútë li. Téquini huáca ila'z'í' dumí zían channö ilúngaca tsözxön nupa ta'yéaj ládxi'gaca Dios. Gucuíta ga nacuá' bönachi caní.

6 Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-në' Dios.

7 Biti' bi nuá'aru' cate' ridxinru' yödzülió, en lësca' caní, biti' bi uá'aru' cate' uzá'aru' yödzülió ni.

8 Que lë ni na', channö dësö queëru' le gáguru', en le gácuru', ral-la' udzéjaru'.

9 Yugu' bönni' tē'ennë' gata' quégaquië' yöl-la' tsahui', gaca quégaquië' le si' bē' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zë ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz.

10 Tu' ta'zë ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zi' légaquië'.

Nu run dxin queë' Cristo naca ca tu bönni' rejë' gudil-la

11 Na'a, bönni' queë' Dios, gucuíta ga raca le caní. Bë'tica'sö ládxi'u gunu' le naca tsahui', en le rë'ënë' Dios. Guyéajlë'tica'së' Cristo, en bidxí'i yugu' luzó'o.

Bë' ladxi' gacu' zxön ladxi', en nöxaj ladxi'.

12 Ca runë' tu bönni' idú ládxe'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u.

13-14 Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' li' gun ch'i'u yugu' lë na' gunná bé'enë' Cristo

rë'u. Ral-la' gacu' idú tsahui', en bití' bi gunu' le güí'i lataj nu bi innë quiu', ga idxintë dza ni' uluí'i lahuë' Xanru' Jesucristo.

¹⁵ Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

¹⁶ ¡Tuzë' Lë' zóatica'së'!

¡Zoë' lu bení' ga bití' gaca nu idxín rácasö que!

¡Catu caz nu bilé'e Lë', en bití' gaca nu ilé'e Lë'!

¡Queë' Lë' gácatíca'sö le run Lë' bal, en yöl-la' unná bë'!

¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaquië', en para cabí ulu'zxöni ládxi'gaquië' yöl-la' tsahui' na' bití' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé!

¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en iluí'i ládxi'gaquië' léguequi.

¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Bócha'ado' Timoteo, ben chí'i le nadödi lu no'o. Gucuíta ga nacua', nupa tuí'i didza' cá'asö, en yugu' didza' bití' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun.

²¹ Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlé'ëru' Cristo.

Rinábida'-në' Dios uzá' ládxe'ë quiu' le nácagaca dxi'a queë'.

¡Ca' gaca!

DIDZA' BUROPI GUSÖL-LÈ'È PABLO QUEËBI BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lè'è Cristo. Caní naca' tu' rë'ënë' Dios gaca' caní, para caní gaca le guzxi' lu në'ë, gunnë' queëru' yöl-la' na'bán idú, le ruzá' ládxe'ë Jesucristo queëru'.

² Rugapa' Dios li', böcha'ado' Timoteo. Nacu' ca zxi'ini caza' tu' benru' tu zxön xichinë' Cristo, ate' nadxi'ida' li'. Rinábida'-në' Xúziru' Dios, enca' Xanru' Jesucristo, uzá' ládxe'ë quiu', en huéchi' ládxe'ë li', en gunë' ga cõ dxi icja ládxi'do'o.

Timoteo ral-la' gunbi' ba nalí queë' Jesucristo

³ Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládxa'a ca na' gulunë' xuz xtá'ahua'.

⁴ Cate' røjneda' ca na' gurödxu', rizé ládxa'a ulé'eda' li', para gaca udzédada' idú ládxa'a.

⁵ Rea'-në' Dios: "Xclenu'" tu' zoa le run ga røjneda' ca réajlë'u Cristo idú ládxi'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alö ca li', ate' runa' löza, lësca' caní réajlë'u Lë' na'a.

⁶ Tu' naca caní, rusá'a ládxi'u para usabanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios.

⁷ Bö' na' bennë' Dios queëru' bití' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'.

⁸ Que lë ni na', bití' utuí'inu' gunu' ba nalí queë' Xanru', en bití' utuí'inu' ca raca quia' neda' ni, nadzuna' lidxi guié tu' runa' xichinë', pero ben tsözxön nupa ta'guí' ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní.

⁹ Dios caz busölë' rë'u, en bulidzë' rë'u para gácaru' idú dxi'a. Bití' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' ládxe'ë caní queëru'. Dza ni'te buzöë' caní queëru' zí'atëlö ca guta' yödzölió ni, tu' néquiru' queë' Jesucristo.

¹⁰ Na'a, chibulu'í lahui le ruzá' ládxe'ë Dios queëru', tu' buluí'í lahuë' Jesucristo Nu rusölá rë'u. Bugúë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

¹¹ Cristo buzöë' neda' para guna' libán que didza' dxi'a na', en para gaca' gubáz queë' para usédigacada' bönachi izá'a.

¹² Que lë ni na' rigu'í rizáca'a ca' yugu' le raca quia' ni, pero bití' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chi'ë le budöda' lu në'ë ga idxintë dza ni' huödë'.

¹³ Didza' dxi'a na' biyömmu' bena' libán que ral-la' gaca quiu' tu le rulu'í ca ral-la' usédinu' bönachi ca réajlë'ëru' Jesucristo, en ca nadxi'iru' Lë'.

¹⁴ Ben chí'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

15 Chinóz quézinu' ca na' gulunë' zian bönni' ta'yéajlëë Cristo nacu'ë luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni.

16-17 Rinábida'-në' Xanru' Dios huéchi' ládxe'ë bönnachi nacuá' lidxë' Onesíforo, tu' butipë' ládxa'a bönni' ni zían luzuí. Cate' bidxinë' Roma, idú ládxe'ë buguiljë' neda', ate' budzölinë' neda'. Biti' butuí'inë' ni'a quia' neda' tu' nadzuna' lidxi guié ni, nága'a du guié.

18 Rinábida'-në' Xanru' huéchi' ládxe'ë lë' dza ni' idxinë' lahuë' Dios. Chinóz quézinu' ca na' gúcalenë' bönni' ni rë'u, cate' ni' guzóaru' yödzo Éfeso.

2

Ral-la' gácabi' Timoteo ca tu bönni' idú ládxe'ë rejë' gudil-la

1 Na'a, xzí'ina'do', butipa ládxe'u ca naca le ruzá' ládxe'ë Jesucristo quiu'.

2 Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönnachi.

3 Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxe'ë rejë' gudil-la.

4 Nu bönni' rejë' gudil-la, bití' ca' gútsë'ë yugu' le tun bönnachi yödölió ni, para tsaza ládxe'ë bönni' na' nuzóë' lë' gáquië' bönni' queë' rejë' gudil-la.

5 Lësca' caní, nu nutsa' lu huitaj, bití' bi idelí' channö cabí run ca ral-la' gun.

6 Nu bönni' gúz gú'una runë' dxin, zí'aló lë' uzi'ë xibé lë na' razë'.

7 Busá' ládxe'u lë ni rea' li', ate' Xanru' caz gunë' ga tséajni'inu' yúgu'të.

8 Yöjnë ca guca queë' Jesucristo. Guljë', en gúquië' xzí'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que.

9 Tu' runa' libán que didza' dxi'a, riguí' rizáca'a le raca quia', ga ridxintë nága'a lidxi guié ni, ca raca queë' tu bönni' huía' dö', pero bití' ca' nága'të xtídzë'ë Dios.

10 Que lë ni na' ruá' riléna' yúgu'të lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönnachi na' para ila'cuá' lu bení' idú queë'.

11 Catëz naca lë ni rna:

Channö nátilenru' Lë', sóalenru'-në' ca' ibanru'.

12 Channö guá' ilenru' le quí'í sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

13 Sal-la' bití' runru' ca rnnaru', Lë' rúntica'së' ca rnnë'.

Lë' bití' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

14 Busá' ládxi'gaca nupa nacuá' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácagaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi.

15 Bë'tica'sö ládxe'u urúaju' dxi'a lahuë' Dios para gacu' ca tu bönni' huen dxin bití' rutuí'inë' ca naca dxin nunë'. Dxi'ado' ral-la' ugunu' dxin didza' iduté li.

16 Na'a, gucuíta ga nacuá' nupa tu'í didza' bití' nazaca', en didza' cá'asö, tu' tun didza' caní ga ilunrë' le cabí rë'ënë' Dios.

17 Ila'zé didza' tu'ë ca rixxõn huë' nudzu' le ridúdu' rilá. Himeneo, en Fileto nabábagaquië' nupa tu'i didza' caní.

18 Iropë' ni gula'chixi gula'níguinë' ca naca le naca idútë li, tu' ta'nnë' chigudódi dza ral-la' ulu'bán nupa chinátigaca, ate' gula'béquië' baróli bal-la bõnachi ga ridxintë bítirõ ta'yéajlë' Cristo.

19 Le benë' tsutsu Dios zóatica'sõ, en dë tu le naca bë', le rnna: "Núnbë'ë Dios nupa néquiquequi queë'." Rnna ca': "Guli'cuíta ga raca le ruá' dõ', yúgu'tëli' libí'ili' néquili' queë' Cristo."

20 Tu lu yu'u zxõn yú'ugaca le néquini, calëgasõ oro, en plata, pero lësca' le néquini yaga, en yu. Bal-la tu'gún bõnachi léguequi dxin ga liná', ate' ia'bal-la tu'gún léguequi dxin ga bití' naca liná'.

21 Para gácaru' ca naca lë na' tu'gún bõnachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dõ'. Channõ gunru' caní, gácaru' lesaca' gunru' yúgu'të dxin dxi'a.

22 Gurú'una le tun ga nu së ladxi' le ruá' dõ' ca raca quégaquië' bõnni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu'luzó'o, en le run ga ribõzu' dxi'ado'. Ca nácagaca lë ni, ben tsözxõn nupa tu'lidza Xanru', naca idú dxi'a icja ládxi'do'guequi.

23 Na'a, gurú'una yugu' didza' cá'asõ, en didza' bití' nazaca', tu' chinõz quézinu' tun didza' caní ga ta'dil-la didza' bõnachi.

24 Bõnni' huen dxin queë' Xanru' bití' ral-la' tíl-lalenë' bõnachi didza', pero ral-la' gáquië' nõxaj ladxi' lógaca yúgu'të bõnachi. Ral-la' gaca usédinë' bõnachi, en gáquië' ca' zxõn ladxi'.

25 Lu yöl-la' nõxaj ladxi' ral-la' uzéajni'inë' nupa ta'dá'baga' le runë' libán que. Channõ gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilunbë'ë le naca idútë li.

26 Caní ulu'lë' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca ré'ënë' Dios.

3

Ca ilaca bõnachi dza tsõjsétëgaca

1 Lësca' ral-la' inõzinu' lë ni: Dza tsõjsétëgaca ilaca dza ila'gu'i ila'zaca' bõnachi.

2 Yugu' dza ni' ila'cu'ë bõnni' ilácagaquië' caní:

Ila'dxí'i la' cuíngacasë', en ulu'huídi'në'.

Ilún ba zxõn cuíngaquië', en ulu'lú'i cuíngaquië' zxõn.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bõnni' cabí ta'yaza ládxi'gaquië'.

Bití' ilunë' ca ré'ënë' Dios.

3 Bití' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Bití' ila'nná be'e cuíngaquië'.

Ilácagaquië' bõnni' dza'a.

Bití' ila'lë'enë' dxi'a le naca dxi'a.

4 Ilácagaquië' hueti luzë'e, en bití' ila'dzáquië' dxi'a.

Ulu'lú'i cuíngaquië' ca bõnni' nayépisëgaquië'.

Ila'dxí'inë' le ila'yázasõ ládxi'gaquië', en calëga Dios.

5 Ulu'lú'i cuíngaquië' ca bõnni' núnbë'gaquië' Dios.

Ila'dá'baguë'ë le ruzá' ládxë'ë Dios queëru'.

Gucuíta ga nacuá' bönachi caní.

⁶ Lësca' caní, lu yöl-la' banísa quégaquië' ila'yazë' gapa naca lu yu'u, en ila'zì' yé'enë' yugu' nigula bitì' bì nõzguequinu para ila'zì' lu ná'agacanu le ulu'sédinë'. Ila'bága'nu nigula na' dul-la' zían, en ilu'í ládxi'gacanu yugu' le ila'zësö ládxi'gacanu le cabí nazaca'.

⁷ Ila'yönitica'sinu nigula ni didza' ilún libán que bönachi, pero bitì' ca' ila'déli'nu ila'yéajni'ininu le naca idútë li.

⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo.

⁹ Bitì' ila'déli'rönë', pero gaca bè' nácagaquië' bönni' bitì' bì nõzguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönachi, en ca runa'. Nözinu' ca' le ruf'í ládxa'a guna', en ca réajlë'a Cristo, en ca naca' nõxaj ladxi', en ca nadx'í'ida' luzá'a, en ca riböza' zxon ladxi'.

¹¹ Nözinu' ca' yugu' le gula'bía ládxi'gaca bönachi neda', en yugu' le gudí'i guzáca'a, le gulaca quia' lu yödzo Antioquia, en lu yödzo Iconio, enca' lu yödzo Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'.

¹² Yúgu'të nupa té'ëni ilaca idú dxi'a tu' néquiquequi queë' Jesucristo, lësca' ila'gu'í ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zì' yë'ë ilácarë' xihui'. Ila'zì' yé'enë' bönachi, ate' ila'zì' ye'e bönachi ca' légaquië'.

¹⁴ Na'a, ben chi'i yugu' le buzëdu', en le guzxi' lu no'o, tu' nunbë' casu' nupa bulu'sedi li'.

¹⁵ Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo.

¹⁶ Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nõza, en usedi rë'u para gácaru' tsahui'.

¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o bitì' raca dxi'a. Lu yöl-la' zxon ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'.

³ Caní ral-la' gunu' tu' idxín dza cate' bitì' ulu'zë' nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'.

⁴ Ulu'cá'anë' le naca idútë li, en ila'zì' lu ná'agaquië' yugu' didza' ridasö.

⁵ Na'a, ral-la' gacu' zxon ladxi' lu yugu'te le runu'. Biá' gulén le ulu'saca' li' zi'. Ben libán que didza' dxi'a. Idú ladxu'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín.

⁷ Ca runë' tu bönni' idú ladxë'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo.

⁸ Ia'stú, naca löza quia' idéli'da' le ral-la' ila'zi' nupa nácgaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunnë' le, pero lësca' gunnë' le quégaca yugu'te nupa ta'dxi'i Lë', en idú ladxí'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxi' guídateo' ga ni zoa'

¹⁰ tu' guléaj ladxë'ë Demas neda', tu' nadxi'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'.

¹¹ Tuzë' Lucas zóalenë' neda'. Guchë'ë-bi' bi'i Marcos para guídalenbi' li' tsözxön, tu' nácabi' gúnlenbi' neda' tsözxön xichinë' Cristo.

¹² Gusöl-la'a-bi' bi'i Tíquico lu yödzö Éfeso.

¹³ Cate' guídu', biá' quia' lari' guitsa' na' buca'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiquequini guídi.

¹⁴ Alejandro, bönni' gubëdxi guíë, zían le bi'ë dö' quia'. Lë cazë' Xanru' ubi'ë queë' ca nácgaca le benë' bönni' ni quia'.

¹⁵ Ben chi' cuinu' queë' bönni' ni, tu' ridá'bagá'dë'ë didza' runru' libán que.

¹⁶ Cate' le zí'alö luzuí bidxina' lógaquië' bönni' yúlahui', cuntu nu gúcalen neda', pero bulu'béaj ladxí'gaca yugu'te bönachi neda'. Biti' ré'enda' uzí' lëbë' Dios légaquië'.

¹⁷ Guzóalenë' Xanru' neda', en butipë' ladxá'a para údxi guna' libán que xtídzë'ë para ila'yöni yugu'te bönachi izá'a le. Caní guca, busölë' Xanru' neda', ate' guca quia' tsca burúaja' lu ruá'aba' bëdxi guixi'.

¹⁸ Lë cazë' Xanru' usölë' neda' lu yugu'te le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatíca'sö queë' yölla' ba yugu'te dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacua' lidxë' Onesíforo.

²⁰ Bugá'anë' Erasto lu yödzö Corinto, ate' buca'ana'-në' Trófimo luyú Mileto tu' ré'enë'.

²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yugu'te böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ladxë'ë Dios quiu'! ¡Ca' gaca!

DIDZA' GUSÖL-LË'Ë PABLO QUEËBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lë'ë Jesu-cristo. Gusöl-lë'ë neda' para guna' ga ila'yéajlë' bönachi chigurö cazë' Dios, para ulu'únbë' le naca idütë li ca ral-la' gun nu nunbë' Dios.

² Caní naca' tu' runa' löza uzi'a xibé yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusi' lo rata' yúgu'të le dë, ate' run cazë' Lë' le nazí' lu në'ë gunë'.

³ Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busölá rë'u, neda'.

⁴ Rugapa' Dios li', böcha'ado' Tito. Nacu' idú xzí'ini caza' tu' naca lëbisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá lãdxë'ë quiu', en huéchi' lãdxë'ë li', en gunë' ga soa dxi icja lãdxi'do'o.

Dxin queë' Cristo runbi' bi'i Tito luyú Creta

⁵ Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacua' tu tu yödzö ni', ca na' chigunná bé'eda' li' gunu'.

⁶ Nu bönni' gula rapa chi'ë bönachi queë' Cristo ral-la' gáquië': Bönni' cuntu nu bi gaca innë queë'.

Zoa túzinu nigula queë'.

Yugu' xzí'inë' ral-la' ila'yéajlë'ëbi' Cristo.

Biti' soa nu gaca innë quégacabi' ta'dá dzágasibi' ca',

o ta'dá'baga' bi' xuz xiná'agacabi'.

⁷ Nu bönni' rapa chi'ë bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribíxjanë',

o bönni' rizé lãdxi'së' dumí.

⁸ Ral-la' gu'ë ga ila'cu'ë böchi'ru' ta'dxinë' lidxë'.

Ral-la' së lãdxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

⁹ Ral-la' gun chi'ë didza' idütë li ca chinazëdë',

para gaca ichízië' icja náagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

¹⁰ Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío.

¹¹ Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

¹² Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunnë': "Ta'zí' yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ë xöhuëdi."

¹³ Didza' ni benë' ba nali' quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo,

¹⁴ en para cabí ulu'zë' nágagaquië' yugu' didza' ridasö quégaquië' bönni' judío, en bití ilunë' ca ta'nná bë' bönachi nucá'anagaca le naca idútë li.

¹⁵ Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en bití ta'yéajlë', bití bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca.

¹⁶ Ta'nnë' núnbë'gaquië' Dios, pero le túngaquië' bití röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en bití ca' gaca ilunë' le naca dxi'a.

2

Xibá dxi'a le ral-la' usëdiru'

¹ Na'a, ral-la' gu'u didza' le röjlöz xibá dxi'a.

² Busedi yugu' bönni' gula:

Bití ral-la' ilé'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxön ladxi'.

³ Busedi yugu' nigula gula:

Ilunnu le raza ládxië'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi'

para ila'dxi'inu bönni' que queëgacanu, enca' xzí'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queëgacanu.

Ral-la' cabí bi ilunnu le gü'i lataj nu innë zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

⁷ Ral-la' gúntica'su' le naca dxi'a,

ulu'inu' bönachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi innë que.

Caní gunu' ga utuí'inë' bönni' ridá'baguë'ë,

en bití gaca bi innë' queëli' runli' le ruá' dō'.

⁹ Busedi böchiru' ni' ta'yéajlë'ë Cristo, en nadó'ogaquië':

Ral-la' ila'cu'ë nōxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Bití ral-la' tá'baga'gaquië' le ta'nná bë'ë.

¹⁰ Bití bi ulu'cáchi'lanë'.

Ral-la' ulu'lui' cuíngaquië' tsahui' ca naca yúgu'të le tunë'.

Caní ulu'i lo naca dxi'a xibá queë' Dios, Nu busölá rë'u.

¹¹ Cristo, bönni' na' buzá' ládxië'ë Dios queëru' chibulu'i lahuë' lógaca yúgu'të bönachi para ulu'lágaca.

¹² Lë' rusédinë' rë'u ucá'anaru' le cabí raza ládxië'ë Dios, en cabí së ládxi'ru' le naca que yödžolió ni, pero cōzaru' zxön ladxi', en gácaru' tsahui' dza ni zóaru' na'a, en gunru' ca rë'ëni quézinë' Dios.

¹³ Ral-la' cõzaru' le runru' lõza le gun ga gácaru' bica' ba, læ na' gaca dza ni' cate' ulu'í lahuë' Jesucristo lu bení' idú queë'. Náquië' Dios zxõn, Nu rusõlá rë'u.

¹⁴ Lë cazë' budõdi cuinë' uláz queëru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bõnachi queë', en gü'í ládxi'ru' gunru' le naca dxi'a.

¹⁵ Yugu' læ ni bë' didza', en guchiza icja nágagaca bõnachi ni', ate' len yõl-la' unná bë' gudil-la léguequi. Béntica'sõ caní, para cabí si' lataj nu ucá'ana cá'asõ xtídz'u.

3

Le ral-la' ilún bõnachi ta'yéajlë' Cristo

¹ Busá' ládxi'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlalui', para ilunë' ca rnna xtídz'a'gaquië'. Ral-la' ila'cu'ë sina' ilunë' le naca dxi'a.

² Biti' bi le ruá' dö' ral-la' ila'nnë' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nõxaj ladxí', en idú ladxí' lógaca yúgu'të bõnachi.

³ Lëscá' rë'u, zí'alõ gúcaru' yugu' bönni' biti' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'eru' luzá'aru'. Biti' bila'lé'e bõnachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'.

⁴ Ní'irõ bulu'e lahui Dios, Nu rusõlá rë'u. Naca bë' náquië' idú dxi'a, en nadxi'inë' yúgu'të bõnachi,

⁵ tu' busõlë' rë'u, calëga tu' zoa bi le naca dxi'a benru' rë'u, pero tu' buéchi' ládxi'ë rë'u. Bunë' rë'u dxi'a, en benë' ga nácaru' bõnachi cubi. Dios Bö' Lá'ayi rucubë' rë'u.

⁶ Dios gusõl-lë'ë Dios Bö' Lá'ayi queëru' tu' néquiru' queë' Jesucristo, Nu rusõlá rë'u.

⁷ Buzá' ládxi'ë queëru', en bunë' rë'u tsahui' para gata' yõl-la' na'bán idú queëru', le runru' lõza gunnë' queëru'.

⁸ Didza' idútë li læ ni nuzúaja' lu guichi. Rë'ënda' usédide'enu' yugu' bönni' ni' yugu' læ ni para ilu'í ládxi'gaquië' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zí' lu ná'agaca yúgu'të bõnachi.

⁹ Na'a, biti' gu'u lataj nu gü'í didza' le cabí nazaca', o nu gü'í ladxí' ca nácagaca lágaca zióntërõ cõ' xuz xtó'ogaca bõnachi, o nu tsõjgutsa' yugu' didza' nõxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

¹⁰ Channõ zoa nu bönni' ni', rubéajë' choplõ bõnachi queë' Cristo, tõi usó' ládxi'ë tu ia'tú luzuí, bubéajë' bönni' na'.

¹¹ Nõz quézinu' chibõáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que læ na' runë'.

Le buzúajë' Pablo lu guichi le gunbi' bi' i Tito

¹² Cate' isõl-la'a-në' Artema o Tíquico ga zu', bë' ladxí' guídu' ga ni zoa' lu yõdzõ Nicópolis, tu' chinuna' quia' ugá'ana' ni yugu' beo' ziaga.

¹³ Zenas, bönni' na' rudödë' didza' ca rinná bë' bõnachi yúlalui', enca' Apolos, ila'dxinë' ga ni' zóali'. Bugú'u légaquië' nõza lu yõl-la' rácalen, para cabí bi yadzaj quégaquië'.

¹⁴Busedi yugu' böchi' luzá' aru' ilúntica'së' le naca dxi'a, en bi ulu'nödzejë' quégaca nupa bi riyadzaj quéguequi, para gaca bë' caní le nácagaquië' queë' Cristo.

Pablo rugapë' Dios bönachi queë' Cristo

¹⁵Yúgu'të nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ladxë'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'.

² Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxu'.

³ Rinábida'-në' Xúziru' Dios, enca' Xanru' Jesucristo, uzá' lãdxë'ë queë'li', en gunë' ga soa dxi icja lãdxi'do'oli'.

Ca runë' Filemón tu' réajlë'ë Cristo

⁴ Rëtica'sa'-në' Dios queëru' "Xclenu'", en röjnética'sida' li' cate' rulidza'-në'.

⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'.

⁶ Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zì' xibé nupa nacuá' ni' yúgu'të le naca dxi'a, le ruzá' lãdxë'ë Jesucristo queëru'.

⁷ Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huóaca lãdxi'gaca bönachi ta'yëajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu',

⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo.

¹⁰ Ráta'yua' lo' uláz queë'bi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

¹¹ Bi'i ni, zí'alö biti' gúcabi' lesaca' quiu', pero na'a nácabi' lesaca' quiu' li', enca' quia' neda'.

¹² Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'.

¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a,

¹⁴ pero biti' bi' rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rë'ëni quëzinu' ca'.

¹⁵ Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'.

¹⁶ Na'a, bíti'rö gácabi' quiu' ca tu bi'i nadó'o, pero gácabi' quiu' ca bi'i böchi'cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasö ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal.

¹⁸ Channö bi' xíguia' benbi' quiu' o channö bi' rál-la'bi' quiu', gunnátëz neda' ral-la'a.

¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quizzja' bi rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú.

²⁰ Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huöáca ládxa'a.

²¹ Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'.

²² Lësca' rinaba' lo' upó'o quia' ga soa' lu yu'u lidxu', tu' runa'löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' nĩ'a quia' neda'.

Pablo ruzúajë' lu guichi le rugapa Dios Filemón

²³ Epafra, bönni' yú'ulenë' neda' tsözxön lidxi guié ni tu' runë' xichinë' Jesucristo, rugapë' Dios li'.

²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

²⁵ Rinábida'-në' Xanru' Jesucristo uzá' ládxe'ë' queéli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bë'lenë' rë'u didza' lu ru'ë Zxí'ini cazë'

¹ Zián luzuí, en zían ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'.

² Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzülió ni.

³ Zxí'inë' na' náquië' ca tu le rulu'í lahui yöl-la' zxön queë' Dios, en ca náquië' Zxí'inë' rulu'í lahui idú le náquië' Dios caz. Run cazë' ga nacuá'tica'só yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

Zxí'inë' Dios nayëpisëtërë' ca yugu' gubáz lá'ayi

⁴ Zxí'inë' Dios nayëpisëtërë' ca yugu' gubáz lá'ayi queë' Dios, tu nácatërö lo le lë', lë na' Dios gulu'ë Lë' tu náquië' Zxí'ini cazë', ca lágaquië' gubáz lá'ayi queë' na'.

⁵ Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë':

Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

⁶ Lësca' caní, cate' Dios buzóë' Bi'i que cazë' lu yödzülió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácaquië' gubáz lá'ayi queë', rnna:

Lë' runë' ga nácaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaquië' ca guí'.

⁸ Na'a, ca naca cazë' Zxí'inë', rnnë':

Ga rö'u rinná bë'u, inná bë'tica'su', Dios.

Tsahui' naca ca rinná bë'u.

⁹ Nadxí'inu' le naca tsahui', en calëga le ruá' dö'.

Que lë ni na' Dios budödë' lu no'o yöl-la' unná bë', en benë' ga ruzí'tëru' Li' xibé yöl-la' unná bë' ca le tu'zí'i xibé luzó'o.

¹⁰ Lësca' caní rnnë':

Li', Xan, cate' gusí lo, benu' yödzülió,

ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itëbigaca ca ritëbi lari',

¹² en ca lari' utubu' léguequi, en utsó'o léguequi,

pero Li', catu caz utsá' cuinu'

en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxí'inë', gunnë':

Gurö'ö cuita lë'a ibëla

cate' gunra' ga ulu'zëchu zxíbigaca lo'

nupa bití' ta'lé'e Li' dxi'a.

¹⁴ Yúgu'të gubáz lá'ayi queë' Dios nácaquië' bö' huen dxin queë' Dios, ate' nasól-lë'ë légaquië' para ilácalenë' nupa ni nulágaca.

2

Biti' ral-la' ucá'anaru' cá'asö yöl-la' rusölá

¹ Que læ ni na', ral-la' gü'i lãdxi'röru' le chibiyöniru', para cabí gaca chopã lãdxi'ru'.

² Guca bẽ naca idütẽ li didza' na', le bidxín dza ni'te lu ná'agaquiẽ gubáz lá'ayi queẽ Dios, ate' yúgu'tẽ nupa gula'dödi bẽ' ca rnna didza' na', en biti' gulún ca rnna, Dios benẽ' léguequi xíguia' ca na' röjlöz le gulúngaca.

³ Lẽsca' caní biti' ca' uláru' rẽ'u lu xíguia' na' channö ucá'anaru' cá'asö yöl-la' rusölá ni, le benẽ' Lẽ cazẽ' Xanru' libán que zí'alö, ate' nupa bila'yöni Lẽ' bulu'lu'i rẽ'u naca idütẽ li.

⁴ Lẽsca' caní Dios caz benẽ' tsözxön légaquiẽ' ba nalí, tu' benẽ' le nácgaca bẽ', en le tun ga rubániru', en yugu' yöl-la' huáca zxön. Gudisiẽ' ca' yugu' le runödzjẽ' Dios Bõ' Lá'ayi quégaquiẽ' tsca gú'uni quézinẽ' Dios.

Dios benẽ' ga böáquiẽ' Jesús idú ca nácaru' rẽ'u

⁵ Dios biti' budödẽ' yödzölió si' za' lu ná'agaquiẽ' gubáz lá'ayi que yehua' yubá queẽ', læ na' ru'iru' didza' que.

⁶ Na'a, ca naca læ ni, nazúaj lu guichi lá'ayi didza' bẽ' nu run ba nalí le rnna:

Dios, rubánide'eda' tu' ru'i lãdxu'u bönachi.

Rubánide'eda' tu' rácalenu' léguequi.

⁷ Ia'látisö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxön, en yöl-la' run bal, en budödu' yúgu'tẽ le benu' Li' lu nẽ'eguequi.

⁸ Yúgu'tẽ budödu' lu nẽ'eguequi para ila'nná be'e le.

Nazúaj lu guichi lá'ayi læ na' rnna: "Budödu' lu nẽ'eguequi yúgu'tẽ." Biti' bi bucá'anẽ' le cabí budödẽ' lu nẽ'eguequi, pero ga ridxintẽ na'a dza, biti' rilé'eru' yu'u lu nẽ'eguequi yúgu'tẽ.

⁹ Réquibe'eru' le guca queẽ' Jesús. Tu chí'sö, Dios benẽ' ga böáquiẽ' ia'látisö cuidi' ca yugu' gubáz lá'ayi que yehua' yubá queẽ'. Guljẽ' bönachi para gútiẽ', ate' gudí'i guzáquẽ'ẽ Jesús lu yöl-la' guti uláz quégaca yúgu'tẽ bönachi, tu' buzá' lãdxẽ'ẽ Dios queeru' caní. Tu' benẽ' Jesús caní, Dios benẽ' ga rata' queeru' yöl-la' zxön, en yöl-la' run bal.

¹⁰ Dios benẽ' yúgu'tẽ le rilé'eru', en runẽ' ga nacua'tica'sö. Dios benẽ' ca ral-la' gunẽ' cate' benẽ' ga naca bẽ' náquiẽ' Cristo idú tsahui' ni'a que le gudí'i guzáquẽ'ẽ. Caní benẽ' Dios queẽ' Cristo, Nu bideli' yöl-la' rusölá para gaca ichẽ'ẽ bönachi zian yehua' yubá queẽ'.

¹¹ Cristo ruúnẽ' tsahui' bönachi para ilequi quez queẽ' Dios. Tuzẽ' náquiẽ' Xúzguequi nupa na' ruúnẽ' Cristo tsahui', en Xuz cazẽ'. Que læ ni na', biti' ca' rutuí'inẽ' Zxí'inẽ' Dios cate' rnnẽ' nácgáquiẽ' böchi' luzẽ'ẽ.

¹² Ca naca læ ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',

gul-la' yöl-la' ba quiu'.

¹³ Lẽsca' caní rnnẽ':

Uzxöni lãdxa'a-nẽ' Dios.

Ga yúbóló nazúaj le rnnẽ':

¡Buli'yútsöca' neda', en yugu' zxi'inẽ', nupa na' Dios bennẽ' quia'!

¹⁴ Que lè ni na', tu' néquiguequinè' bèla' en rön yugu' xzí'inè' na', lèsca' caní Cristo ben cuinë' ca nácagaquiè'. Guljè' bèla' en rön. Caní guljè' para guca gútiè', en caní guca busanítie' yöl-la' huáca unná bè' que tu' xihui', nu na' dè lu nè'e guti bönachi.

¹⁵ Caní benè' Cristo para guca busanè' yúgu'tè nupa gulaca ca bönni' nadó'ogaquiè' tsanni ni nacuá' nabángaca, tu' guladxi yöl-la' guti.

¹⁶ Naca bè' bití' benè' caní para gácalenè' yugu' gubáz lá'ayi que yehua' yubá queè' Dios, pero para gúcalenè' yugu' xzí'ini xí'sóè' Abraham.

¹⁷ Que lè ni na', ben bayudxi böáquiè' Cristo idú ca nácagaquiè' böchi' luzè'è na', para gáquiè' lahuè' Dios tu bixúz lo, tu bixúzi runè' ca rnnè', en ruhuéchi' ládxè'è bönachi, enca' para gunè' le gun ga gata' lu nè'è ugüè' dul-la' nabága'gaca bönachi.

¹⁸ Na'a, tu' gudí'i guz xáquè'è Lè cazè' Cristo, ate' guz xí' bè' tu' xihui' Lè', que lè ni na' napè' yöl-la' huáca gácalenè' nupa ni, rizí' bè' tu' xihui' léguequi.

3

Jesús nayëpisëtèrè' ca Moisés

¹ Que lè ni na', böchi' luzá'ado', libí'ili' na' nácali' quez queè' Dios tu' bulidzè' Dios libí'ili', buli'yú dxi'a ca náquiè' Jesucristo. Náquiè' gubáz nasöl-lè'è Dios, enca' bixúz lo que le nazi' lu ná'aru'.

² Jesús ni runè' ca rnna xtídzè'è Dios, Nu na' buzóa Lè' xilatjè', ca na' benè' ca' Moisés, benè' ca rnna xtídzè'è Dios lógaca yúgu'tè bönachi queè' Dios.

³ Nayëpisëtèrè' Jesús ca Moisés, para gaca queè' yöl-la' ba, ca na' nácárè' lo bönni' nequi queè' tu yu'u ca naca huen dxin zoè' lu yu'u na'.

⁴ Yúgu'tè yu'u, zoa nu ben le, pero Dios náquiè' Nu ben yúgu'tè le rilé'eru'.

⁵ Le nácátè Moisés benè' ca rnna xtídzè'è Dios lógaca bönachi queè' Dios, pero gúquiè' ca tu bönni' huen dxin, ate' benè' ba nalí que didza' ral-la' gu'è Dios,

⁶ pero Cristo runè' ca rnna xtídzè'è Dios, en náquiè' Xzí'ini cazè', ate' nacuá' lu nè'è bönachi queè' Dios. Rè'u ni, nácaru' bönachi na' queè' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzè'jalenru' lè na' runru' löza.

Dè lataj ga ulu'zí' ládxi'gaca bönachi queè' Dios

⁷ Que lè ni na', nazúaj lu guichi ca rnnè' Dios Bö' Lá'ayi le rnna: Na'a, channö riyónili' didza' ru'è Dios,

⁸ bití' gácali' zidi lu icja ládxi'do'oli' ca na' gulaca nupa ni' gula'dá'baga' Dios cate' ni' gula'zí' bè' Lè' lu lataj cá'asö.

⁹ Gula'zí' bè'è xuz xtó'oli' neda' ni' sal-la' bila'lé'enè' le bena' idú ca choá' iz.

¹⁰ Que lè ni na' guléda' bönachi dza ni', en gunnía':

“Ta'chíxítica'sinë' ca ta'zá' ládxi'gaquiè'.

Bití' té'ènnè' ila'nözinè' le ré'ènda' ilunè'.”

¹¹ Que lè ni na' guléda' légaquiè', en bena' tsutsu xtídzá'a, gunnía':

“Bití' ila'yázié' ga ulu'zí' ládxi'gaquiè' tsözxon len neda'.”

¹² Gulí'gún chí'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlè'è, en para cabí usanli'-nè' Dios ban.

13 Na'a, buli'zėjani'i tuli' ia'tuli' yúgu'tě dza, tsanni ni naca dza ni zóaru' na'a, para cabí sí' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'.

14 Yúgu'těru' gunru' tsözxón Cristo channö gácaru' tsutsu ga idxinrö dza údxi, ca na' gusi lo ridipa ládxi'ru'.

15 Caní ral-la' gunru' tsanni ni rnna:

Na'a, channö riyónili' chi'ě Dios,
biti' gácali' zidi lu icja ládxi'do'oli',
ca na' gulaca nupa ni' gula'dá'baga' Dios.

16 ¿Nupxi na' bila'yöni xtídzě'ě Dios, en gula'dá'baga' Lě'? Gulún caní yúgu'tě nupa ni' bubéajě' Moisés léguequi luyú Egipto.

17 ¿Nupxi na' guléně' Dios idú ca choá' iz? Gulaca nupa ni' gulún dul-la', ate' gupati lu lataj cá'asó.

18 ¿Nupxi ni' beně' tsutsu xtídzě'ě Dios, gunné' biti' ila'yaza ga ulu'zí' ládxi'guequi tsözxón len Lě'? Gulaca nupa ni' biti' gulún ca rnna xtídzě'ě Dios.

19 Na'a, réquibe'eru' biti' guca ila'yáziě' tu' cabí gula'yéajlě'ě Dios.

4

1 Na'a, tsanni ni nagá'ana le guzxi' lu ně'ě Dios queěru' para gaca tsú'uru' lataj queě' ga uzí' ládxi'ru', ral-la' gádxiru' para cabí unítiru' lataj tsú'uru' ni'.

2 Biyónru' rě'u didza' dxi'a ca na' bila'yönně' légaquiě', pero légaquiě' biti' bulu'zí'ě xibé didza' na' bila'yönně', tu' cabí gula'yéajlě'ě Dios cate' bila'yönně' le.

3 Rě'u ni réajlě'ěru' Dios, en tsú'uru' lataj queě' ga uzí' ládxi'ru'. Raca ca na' gunné' Dios:

Que lě ni na' guléda' légaquiě'

en bena' tsutsu xtídza'a, gunnía':

Biti' tsú'ugaquiě' ga ulu'zí' ládxi'leně' neda'.

Dě lataj tsú'uru' rě'u ga uzí' ládxi'lenru'-ně' Dios, sal-la' budxi beně' Dios xichiné' dza ni'te cate' ni' beně' yödzölió ni, en chiruzí' ládxi'ě.

4 Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ě Dios dza igadxi yugu' lu dxin beně'."

5 Ga yúbölö rnna: "Biti' tsú'ugaquiě' ga ulu'zí' ládxi'leně' neda'."

6 Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzě'ě Dios. Que lě ni na', ral-la' tsú'ugaca bönachi yúbölö ni'.

7 Que lě ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bě'ě didza' Dios lu ru'ě David, ca na' nazúaj lu guichi lá'ayi le rnna:

Na'a dza, channö riyónili' didza' ru'ě Dios,

biti' gácali' zidi lu icja ládxi'do'oli'.

8 La'tu' beně' Josué ga bulu'zí' ládxi'gaquiě' cate' gula'yu'ě lu xiyúgaquiě', biti' bě'ě Dios didza' gudödi ni' que ia'turö dza cate' nu uzí' ládxi'len Lě'.

9 Que lě ni na', nagá'ana quégaca bönachi queě' Dios lataj ila'déli'ně' ga ulu'zí' ládxi'gaquiě'.

10 Nupa tsú'ugaca ga ulu'zí' ládxi'lengaca Dios, ulu'zí' ládxi'gaquiě' lu dxin tuně', ca na' buzí' ládxi'ě Dios yugu' lu dxin beně' Lě'.

¹¹ Que lè ni na', ral-la' gü'i láchxi'ru' tsú'uru' ga ni' uzí' láchxi'lenru'-nè' Dios. Biti' ral-la' tá'baga'ru' xtídzè'è ca na' gulún nupa ni' bití' gula'yéajlè' Dios, en bití' gula'yu'è ni'.

¹² Xtídzè'è Dios naca ban caz, en napa caz yöl-la' huáca. Richúgurö ga rë' ca guié tuchi' natuchi' iropa ruf'i. Richugu ridxín ga ta'dzaga bö' naca cázaru', en le zoa lu icja láchxi'do'oru', enca' rōxaj ga ridxintè lu dxita lu bin. Run ga naca bē' le ribequi ícjaru', en le rizá' láchxi'ru'.

¹³ Biti' bi gaca ucáchi'ru' ga bití' gaca ilé'enè' Dios le. Yúgu'tè le nun cazè' Dios nalá' lahui, en narúaj ga liná' lahuè' Dios. Lahuè' Lè' run bayudxi quíxjö'öru' le nunru'.

Jesús náquiè' bixúz lo, Nu nácatèrö zxön

¹⁴ Zoa queëru' tu bixúz lo, nácatèrè' zxön, Nu na' gudödi ni' yehua' yubá, Jesús, Zxí'inè' Dios. Que lè ni na' ral-la' ugá'anaru' tsutsu ca naca le nazi' lu ná'aru'.

¹⁵ Zoa queëru' tu bixúz lo, Nu gaca huéchi' láchxi' rë'u ca nácgaca le raca queëru', tu' guzxi' bē' tu' xihui' Lè cazè' idútè ca na' rizí' bē' tu' xihui' na' rë'u, pero bití' bi dul-la' benè' Lè'.

¹⁶ Que lè ni na', idú láchxi'ru' ral-la' ibíga'ru' gala' ga rō'è rinná bē'è Dios, Bönni' ruzá' láchxè'è queëru', en inábaru' lahuè' huéchi' láchxè'è rë'u, en uzá' láchxè'è queëru', para gácalenè' rë'u cate' bi raca queëru'.

5

¹ Dios ribö cazè' nútí'tès bixúz lo ladaj bönachi, en ruzóè' lè' para gunè' yugu' le runè' lahuè' Dios uláz quégaca bönachi, en cu'è lahuè' Dios yugu' le tu'nödzej bönachi, en yugu' böa' bédxi tútigaquiè'-ba' lu bucugu lá'ayi tu' nözi dul-la' nabága'gaquiè'.

² Bixúz lo na', tu' raca queè' lébisö ca raca quégaca bönachi, gaca gáquiè' zxön láchxi' len nupa nácgaca yugu' bönni' canóz, en nupa ta'chixi ta'nigui.

³ Que lè ni na', tu' náquiè' bixúz lo na' bönáchisö, ral-la' cu'è lahuè' Dios böa' bédxi na' tútigaquiè'-ba' lu bucugu lá'ayi ni'a que dul-la' nabaga' cazè', ca na' runè' ca' ni'a que dul-la' nabága'gaca bönachi.

⁴ Cuntu nu gaca gun cuini bixúz lo, pero Dios rulidzè' nu ral-la' gaca bixúz lo, ca na' bulidzè' Aarón.

⁵ Lësca' caní guca queè' Cristo. Biti' ben cuinè' bixúz lo, pero Dios buzóè' Lè' ca bixúz lo. Ca naca lè ni, Dios gudxè' Lè':

Li' nacu' Zxí'ina'.

Buzóa' Li' na'a.

⁶ Lësca' caní gudxè' Lè' le nazúaj ga yúbölö, gunné':

Li' nácatíca'su' bixúz,

ca na' gúquiè' Melquisedec bixúz.

⁷ Cristo, cate' ni' zoa cazè' yödzölió ni, bulidzè' Dios, en gúta'yuè' lahuè'. Gurödxí'è, en gurödxè' lahuè' Dios, Bönni' guca usölè' Lè' lu yöl-la' guti, ate' Dios biyönnè' Lè' tu' gúdxinè' Lè' idú láchxè'è.

⁸ Sal-la' gúquiè' Zxí'inè' Dios, bizédè' gunè' ca rnna xtídzè'è Dios tu' gulaca queè' yugu' le gudí' guzáquè'è.

⁹ Cate' chigúquiè' Cristo idú ca ral-la' gáquiè' tu bixúz lo, Dios benè' Lè' Bönni' rusölè' tsaz yúgu'tè nupa tun ca rnna xtídzè'è.

¹⁰ Ní'irö Dios buzóè' Lè' para gáquiè' bixúz lo ca na' gúquiè' Melquisedec na' bixúz lo.

Zoa bönadxi queëru' huöaj lãdxi'ru', en tá'baga'ru'-në' Cristo

¹¹ Ca naca lë ni, zían le ral-la' güi'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'.

¹² Chigudödi dza ral-la' gaca usédili' bönachi xtídzë'ë Dios, tu' chibiyönili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en calëga la' huagu tsutsu.

¹³ Yúgu'të bönni' naquíniguequinë' nu usedi légaquië' lë na' biti' naca böniga, nácaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'.

¹⁴ La' huagu tsutsu tu'zì' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

6

¹ Que lë ni na', biti' ral-la' usédatica'siru' yugu' xibá buzédaru' cate' si' gusi' lo riyöniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i lãdxi'ru',

en ca bití'rö gunru' le ruá' dö',

en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i lãdxi'gaca leyúbölö nupa tu'huöaj lãdxi', en ta'dá'baga' Dios? Channö bidxín quéguequi beni' queë' Dios, en bulu'zì' xibé le runödzejé' Dios zoë' yehua' yubá, en gulaca tuz len Dios Bô' Lá'ayi, en channö bulu'zì' xibé didza' dxi'a queë' Dios en yöl-la' huáca que dza si' za', en channö ní'rö tu'huöaj lãdxi', en ta'dá'baga' Dios, biti' ca' gaca nu gun ga ulu'bí'i lãdxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahui' lógaca bönachi.

⁷ Nupa tun caní náca gaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzej le tu'zì' xibé nupa tá'ana yu na', raza lãdxë'ë Dios le,

⁸ pero channö ruzóasö yu na' lubá yötsi', en bësigá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le náca gacarö dxi'a, le tu'zì' xibé nupa nulágaca.

¹⁰ Dios náquië' tsahui', en biti' gal-la lãdxë'ë dxin tsahui' benli', en yugu' le benli' tu' nadxí'ili' Lë'. Gúcalenli' nupa néquiquequi quez queë' Dios, en runli' xichínguequi.

¹¹ Na'a, ré'ënitü' güi'i lãdxi'li' luzá'ali' tu ia'tuli', en gunli' caní ga idxinrö dza údxi, para gata' idú queëli' lë na' runli' löza.

¹² Ré'ënitü' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxon lãdxi', para idéli'li' yugu' le guzxi' lu në'ë Dios gunnë' queëru'.

¹³ Caní gaca, tu' benë' tsutsu Dios xtídzë'ë cate' guzxi' lu në'ë bi gunnë' queë' Abraham. Tu' cabi zoa nu nácáro lo ca Dios, que lë ni na' buzetaj cuinë', cate' ni' benë' tsutsu xtídzë'ë.

¹⁴ Caní gunnë' Dios: "Le nácate guna' ga gaca dxi'a quiu', en guna' ga ila'yánda'abi' xzí'ini xí'sú'."

¹⁵ Gulözë' Abraham zxön ladxi', ate' bidéli'në' le guzxi' lu në'ë Dios gunnë' queë'.

¹⁶ Cate' tu bönni' runë' tsutsu xtídzë'ë, ruzõtjë' nu nácaterö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë.

¹⁷ Que lë ni na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' ulu'ínë' nupa ulu'zí' xibé le guzxi' lu në'ë unödzejë' quéguequi, nácada' löza, en tsaz naca le nuzóa lahuë' gunë'.

¹⁸ Le guzxi' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, biti' gaca si' yë'ë Dios. Caní benë' Dios para gácada' löza queëru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' sí'iru'.

¹⁹ Lë na' runru' löza ruzóatica'sö tsutsu icja ládxi'do'oru', en naca ca tu du guié ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rō'ō yehua' yubá.

²⁰ Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisëtëre'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham.

² Abraham bë'ë queë' tu cō' tu' chi cō' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza: "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza: "Bönni' Unná Bë' Ribequi Dxíë'."

³ Biti' zoa lu guichi le rnna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Xzí'inë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cō' tu' chi cō' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la.

⁵ Lu xibá queë' Moisés, Dios rinná bé'enë' yugu' xzí'ini xí'sóë' Leví, nupa nácagaca bixúz, ila'zi'ë tu cō' tu' chi cō' que le ta'zí' bönachi Israel, sal-la' nácagaca di'a dza quégaquië', tu' nácagaquië' yúgu'të' xzí'ini xí'sóë' Abraham.

⁶ Melquisedec na' biti' náquië' di'a dza quégaquië', pero guzxi'ë tu cō' tu' chi cō' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lë'sca' Melquisedec na' gunábinë' Dios gun lá'ayë' Abraham,

⁷ ate' cantu nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídi'rö.

8 Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi ná'agaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'.

9 Na'a, huáca innaru' queë' Leví, en quégaca zxi'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guíxjè' tu cö' tu' chi cö' cate' ni' Melquisedec na' guzxi'è tu cö' tu' chi cö' lu në'è Abraham, xuz gula gudödi quégaquië'.

10 Caní naca, tu' huáca innaru' Abraham ni' nu'è lë'è Leví, en yugu' zxi'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

11 Ta'zí' bönachi Israel xibá gunná bë'è Moisés lu ná'agaca bixúz, nupa ná'agaca zxi'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'tué' bixúz ca gúquië' Melquisedec, en calëga ca gúquië' Aarón.

12 Channö rutsë'è Dios ca ral-la' gáquië' bixúz, run bayudxi utsë'è ca' ca naca xibá queë'.

13 Xanru', Nu na' nazúaj lu guichi ca naca queë' yugu' lë ni, nababë' ia'turö cö' zxi'ini xi'sóë' Israel ca le nababë' Leví na', ate' que cö' zxi'ini xi'sóë' ga nababë' Xanru', cunt nu guca bixúz lahuë' Dios.

14 Naca caní tu' naca bë' guljè' Xanru' lu cö' di'a dza queë' Judá, ate' Moisés biti' bë'è didza' queë' Judá na' cate' bë'è didza' quégaca nupa ral-la' ilaca bixúz.

15 Nácatërö bë' lë ni ni'a que le raca na'a. Ca na' gúquië' Melquisedec bixúz, chibuluí'i lahuë' ia'turë' bixúz, Jesús.

16 Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi.

17 Nazúaj lu guichi lá'ayi le run ba nalí queë' le rnna:

Tsaz nacu' bixúz

ca na' gúquië' Melquisedec bixúz.

18 Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun.

19 Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

20 Cate' benë' Dios ga náquië' Jesús bixúz, benë' tsutsu xtídzë'è.

21 Dios biti' benë' tsutsu xtídzë'è cate' bucu'è bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'è, gunné':

Bena' tsutsu xtídzá'a neda', Xanu', gunniá':

"Biti' utsá'a ca guna'.

Tsaz nacu' bixúz

ca na' gúquië' Melquisedec bixúz."

22 Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö.

23 Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulátië',

24 pero tu' zóatica'së' Jesús, tsaz náquië' bixúz, en biti' gaca nu huóaza xilatjè' para gaca bixúz.

25 Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxön bönachi dul-la', pero nayëpisetëre' ca yúgu'të le nacua' ni' yehua' yubá.

²⁷ Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichön cazë' tu' nözi dul-la' nabága'gaca yúgu'të bönachi.

²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxin xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'.

² Lë' runë' dxin ca Bixúz Lo lu lataj nácaterö lá'ayi, le naca yudo' le naca idútë, lë na' buchisé' Xanru', en calëga bönachi.

³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichóngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios.

⁴ La'tu' zoë' luyú ni, biti' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés.

⁵ Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxid'ë Dios Moisés cate' si' uchisé' yú'udo' na' néquini guídi, gunné': "Buyútsöca', ben yúgu'të idú ca naca lë na' buluí'ida' li' lu gu'a ni'."

⁶ Na'a, Bixúz Lo queëru' ni runë' dxin que le nácaterö lesaca', ate' ni'a que le benë' Lë' zoa tu didza' rucá'ana tsahui' queëru' le nácaterö lesaca', en le ruí'idi didza' que le nácaterö lesaca' guzxí' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'aló idútë yöl-la' huáca, biti' ben bayudxi soa didza' buropi ni rucá'ana tsahui'.

⁸ Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na', lë na' bénlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

¹⁰ Que lë ni na', caní gaca didza' ucá'ana tsahui' gúnlena' bönachi Israel

tödi yugu' dza ni', rnnë' Xanru'. Uchízia' icja ládxi'do'gaquië' xibá quia'

en uzúaja' le lu icja ládxi'do'gaquië'.

Ní'irö gaca' Dios quégaquië'

ate' légaquië' iláquië' bönachi quia'.

¹¹ Biti' gun bayudxi nu usedi luzë'e, inná:

Bénbë'ë Xanru', tu' ilúnbë'ë yúgu'të' neda',
ga isí lo nu naca cá'asö, ga idxintë nu naca lo.

¹² Huéchi' ládxa'a légaquië',

en uniti lahua' le cabí naca tsahui' gulunë',

en bíti'rö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na' guzóa zí'alö, ate' chizóa idúa lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni.

² Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios.

³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi,

⁴ ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxi'ga'do' na' néquini oro, le nadzá'yöta xtildo' na' nazí'i le maná, enca' xuyaga queë' Aarón, lë na' bubö' ni'a në'e, enca' yugu' guiöj blaga na', nazúaj láhuilöguequi didza' rucá'ana tsahui'.

⁵⁻⁶ Lahui guí'ina na' gula'cuá' chopa gubáz lá'ayi néquiquequini oro, légaca querubín que lataj ga bulu'í lahuë' Dios, ate' bulu'zxióa xiliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na' a idütë ca nácgaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios.

⁷ Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'.

⁸ Cani ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö.

⁹ Yugu' lë ni naca tu le rulu'isö que le raca na'a dza. Yugu' le gula'gu'ë lahuë' Dios, en rön quégacaba' böa' bëdxi na' gulútië'-ba' lahuë' Dios bití' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní.

¹⁰ Yugu' lë ni bulu'í lahui quégacasö le gulë'aj gulahuë', en ca ral-la' ila'guíbi cúngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzöë' Dios quégaquië' ga bidxintë dza ral-la' utsë'ë yúgu'të.

¹¹ Na'a, chibudulu'í lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë'

nácarö lo, en nácarö idú, en bití' néquini lu ni'a lu ná'agaca bönachi, en bití' naca que luyú ni.

¹² Na'a, chiguyázië' Cristo lu lataj lá'ayi na', calëga len xichöngacaba' bëdxido', en xichöngacaba' chivo, pero len rön queë cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz.

¹³ Le nácatë xichöngacaba' bëdxi, en chivo, en dö queëba' bëdxido' bulu'zëgui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'.

¹⁴ Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

¹⁵ Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégaquië' bönni' bulidzë', le zóatica'sö.

¹⁶ Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'.

¹⁷ Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', bití' ca' gaca ilunë' ca rnna didza' na'.

¹⁸ Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti.

¹⁹ Cate' ni' gudíxjoi'inë' Moisés bönachi ni' ca nácgaca yúgu'të xibá queë' Dios, gudélë'ë rön quégacaba' bëdxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi.

²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna."

²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios.

²² Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, bití' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'ísö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichöngacaba' böa' bëdxido' caní.

²⁴ Bití' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'ísö ca naca le naca idú, pero guyázië' yehua' yubá caz para gaca uluf'i lahuë' na'a lahuë' Dios uláz queëru'.

²⁵ Bixúz lo zoë' luyú ni razië' lataj nácatërö lá'ayi tu tu iz len rön quégacaba' böa' bëdxi, pero bití' run bayudxi tsázië' Cristo zían luzuí para udödi cuinë' lahuë' Dios.

²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödžolió ga ridxintë na'a dza, pero na'a cate' naca dza údxi, tsaz buluí'i lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'.

27 Ca na' run bayudxi ilátigaca bönachi tu luzuísö ate' tōdi ni' uchi'a usöröë' Dios léguequi,

28 lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, uluí'i lahuë' le buropi luzuí, calëga para ugúë' dul-la', pero para usölë' tsaz nupa ta'bōza Lë'.

10

1 Xibá na' gunná bë'ë Moisés guca tu le ruluí'isö ca zeaj naca le tsahui' si' zá'gaca, en biti' guca idú ca nácgaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bëdxido', lë na' gula'gú'utica'së' lahuë' Dios yugu' iz.

2 La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquiibe'enë' bönni' guca caní quégaquië' nabága'gaquië' dul-la' channö chibulu'huóáquië' idú tsahui'.

3 Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'.

4 Caní guca, tu' cabí guca xichõngacaba' bëdxi, en chivo ugúa dul-la'.

5 Que lë ni na', cate' bidxinë' Cristo yödžolió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bëdxi lo' pero benu' ga naca' bönáchisö.

6 Biti' raza ládxi'u nu uzegui'-ba' böa' bëdxi lo', o nu cu'u xichõngacaba' lo' tu' nözi dul-la'.

7 Ní'irö gunná': Ni zoa' para guna' ca ré'ënu' Li', Dios.

Naca ca na' nazúaj lu guichi lá'ayi ca gaca quia'.

8 Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bëdxi lahuë'." Didza' ni ruluí'i ré'u bítirö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní.

9 Gudödi ni' rnna: "Ni zoa' para guna' ca ré'ënu' Li', Dios." Didza' ni ruluí'i ré'u rugúë' Dios lë na' gula'gu'ë lahuë' zí'alö, en ruzöë' xilataj le gulu'ë Zxi'ini cazë' lahuë'.

10 Na'a, Dios ruünë' ré'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

11 Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichõngacaba' böa' bëdxi, yugu' le cabí gaca ulu'gúa dul-la'.

12 Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios.

13 Ribözë' ni' dza gunë' Dios ga ulu'zechu zxi'bigaca lahuë' nupa biti' ta'lé'e Lë' dxi'a.

14 Ní'a que tuz le gulu'ë lahuë' Dios, tsaz benë' ga nácgaca idú tsahui' nupa na' bunë' dxi'a, en bubéajë' léguequi quez queë' Dios.

15 Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

16 Caní gaca didza' ucá'ana tsahui' gúnlena' légaquië' tōdi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

17 Gudödi na' gunné':
Bítirö tsöjnedá' dul-la' nabága'gaquië'

en dö' biá'gaquië'.

¹⁸ Que læ ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo.

²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queëru' tu' budödë' idütë le naca cazë'.

²¹ Jesús náquië' queëru' tu bixúz nayëpisëtërë', en rinná bé'enë' bönachi queë' Dios.

²² Que læ ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idütë le naca cázaru' len le naca tu nisa nácatërö idú.

²³ Ral-la' gácaru' tsutsu, en cabí gaca chopa ládxi'ru' ca naca le runru' löza que le nazí' lu ná'aru', le guzxi' lu në'ë Dios gunnë' queëru', ate' Lë' runë' ca rnnë'.

²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'.

²⁵ Bal-la' bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilë'ëru' chizóa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idütë li, bití ca' nagá'ana bi gaca cú'uru' lahuë' Dios le ugúa dul-la'.

²⁷ Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, læ na' uzéguítica'sö nupa ta'dá'baga' Dios.

²⁸ Cate' nu bönni' buzóë' xibá queë' Moisés tsölá'alö, gulútië' læ' channö chopa tsonna bönachi gulún ba nalí que le benë', ate' cuntu nu buéchi' ladxí' bönni' na'.

²⁹ Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxí' queëru' le riquíniru'.

³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' læbi. Neda' ubi'a quégaca bönachi, rnnë' Xanru'." Lë'sca' caní gunnë': "Xanru' uchi'a usöröë' bönachi queë'."

³¹ Ral-la' gadxi idzöbi nu ral-la' si' xíguia' lu në'ë Dios ban.

³² Guli'tsöjné yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zí'ë libí'ili'.

³³ Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxön ca' nupa gula'guí'i gula'zaca' caní.

³⁴ Caní guca, tu' buéchi' ládxi'li' nupa nadzúngaca lidxi' guíë', en lu yöl-la' rudzeja queëli' biá' gulenli' nupa gula'béaj lídxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá.

³⁵ Na'a, bití' ucá'anali' læ na' runli' löza, le nachë' tu le zxön ubi'ë Dios queëli'.

³⁶ Run bayudxi cözali' zxön ladxi', para cate' chibenli' ca rë'enë' Dios, sí'ili' le guzxí' lu në'ë gunnë' queëli', ca na' nazúaj lu guichi lá'ayi, ca gunnë' Dios le rnna:

³⁷ Ia'tú chí'ido'osö idxinë' Bönni' na' ral-la' guídë'.

Biti' ca' tsenë'.

³⁸ Ní'irö nu naca tsahui' lahua' neda',

ulá nu na' tu' réajlë' neda'.

Channö huőaj ladxi', en tá'baga' neda',

bíti'rö tsaz ládxa'a nu na'.

³⁹ Na'a, rë'u ni, bití' nácaru' ca nupa tu'huőaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölä.

11

Ca naca yöl-la' réajlë' queëru' Dios

¹ Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'.

² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

³ Tu' réajlë'ëru' Dios, réquibe'ëru' benë' Lë' yödzölió ni len didza' bë'ësë'. Lë'sca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴ Tu' guyéajlë'ë Abel Dios, gulu'ë rön queëba' böa' bëdxido' lahuë' Dios, tu le nácatëro lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en bití' ca' gútië', ate' bítí'rö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxe'ë Dios."

⁶ Na'a, channö cabí réajlë'ëru' Dios, bití' gaca gunru' le raza ládxe'ë Lë', ate' para íbígá'ru' gala' ga zoë' Dios, run bayudxi tséajlë'ëru' zoa cazë' Lë', en rubí'ë que nu ru'í' ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'í le Arca, ate' lë'e barco na' bulu'lá bönachi dí'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' sí'ë ca tu le guequi tsaz queë', ate' birúajë' ladzë' sal-la' bití' nözinë' gazxi na' ral-la' tsejë'.

⁹ Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxí' lu në'ë unödzjë' queë'. Guzóë' lu yu'u guídido', en lëbisö ca gulunë' Isaac, en Jacob, zxí'ini xi'sóë' Abraham, nupa ni' guzxí' lu në'ë Dios unödzjë' quéguequi lë na' guzxí' lu në'ë unödzjë' queë' Abraham.

¹⁰ Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

¹¹ Lë'sca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'í bönni'do'

sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxí' lu në'ë queënu.

¹² Que lë ni na', sal-la' chibigúladë'ë Abraham, gula'cuá'abi' zíántërobí' zxi'ini xi'sóë'. Gula'cuá'abi' tsca rö'öba' bölaj lúxriba, en tsca rö'ö yuzxi tu ra' nisa zxon, cunttu nu gaca ulaba légcabi'.

¹³ Yúgu'të bönni' ni gulatië', en bití' gula'zi'ë lë na' guzxí' lu në'ë Dios unödzjë' quégaquië', pero gula'yéajlë'ë Dios, ate' zi'tu' zí'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödölió ni.

¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzaqaquië'.

¹⁵ La'tu' gula'zá' ládxi'gaquië' caní que luyú ga ni' bila'rúajë', le nácatë ulu'dzölinë' nacxi huöajgaquië' ni',

¹⁶ pero gula'zá' ládxi'gaquië' que luyú na' nácarö dxi'a, le rö' yehua' yubá. Que lë ni na' bití' rutuí'në' Dios cate' ta'nnë' náquië' Dios quégaquië', tu' chinupë'ë tu yödö quégaquië'.

¹⁷ Tu' guyéajlë'ë Abraham Dios, cate' guzxí' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxí' lu në'ë Dios unödzjë' queë'.

¹⁸ Caní benë' sal-la' gudxë' Dios lë', gunnë': "Lu ná'abi' bi'i Isaac quiu' ichísagaca'-bi' zxi'ini xi'sú'."

¹⁹ Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë'-bi' lu yöl-la' guti sal-la' bití' guti cázabi'.

²⁰ Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'z'í'ibi' xibé dza si' za'.

²¹ Tu' guyéajlë'ë Jacob Dios, cate' ni' chizóa gátie' gunábinë' Dios gun lá'ayë'-bi' tu tubi' zxi'inë' José, ate' guyéaj ládxi'ë' Dios, ni' nayéchuë' lu xiyaga queë'.

²² Tu' guyéajlë'ë José Dios, cate' ni' chizóa gátie', bë'ë didza' que dza na' ila'rúajë' zxi'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

²³ Tu' gula'yéajlë'ë Dios, cate' gúljabi' bí'ido Moisés, xuz xiná'abi' bulu'cáché'ë'-bi' idú ca tsonna beo', tu' bila'lé'enë' nácabi' bi'i bönni'do' na' lachi, en bití' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'.

²⁴ Tu' guyéajlë'ëbi' Moisés Dios, cate' guzxönbi', bí'ti'rö bë'ëbi' lataj nu uzóa lëbi' bi'i bönni' queënu nigula zxi'inë' Faraón, bönni' na' rinná bé'enë' bönachi Egipto.

²⁵ Caní benbi' tu' gúquibi' nácarö dxi'a nu usaca' zi' lëbi' tsözxön len bönachi queë' Dios ca uz'í'ibi' xibé tu chí'isö yugu' le tu'z'í' xibé nupa tun dul-la'.

²⁶ Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë' Dios queëbi'.

²⁷ Gudödi ni', tu' guyéajlë'ë Moisés Dios, birúajë' luyú Egipto, en bití' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulënë' ca run nu rilé'e Dios, Nu na' bití' gaca ilé'eru'.

28 Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxigaquië', para cabí guti xzí'ínigaquië' nu na' ral-la' usuniti yugu' bi'i bönni' zí'alö quégaca bönachi Egipto.

29 Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gul'é'ënnë' ila'dödë' ca' bönni' Egipto ni', gula'yëpinë' nisa, en gulátigaquië' lu Nisa Xiná na'.

30 Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chi'i yödzö na'.

31 Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

32 ¿Bíxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

33 Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në'

le guzxi' lu në'ë Dios unödzjë' quégaquië'.

Bulu'sayjë' ruá'agacaba' bëdxi guixi'.

34 Bulu'lë' yugu' lu guí' zxön.

Bila'rúajë' lu ná'agaca nupa gul'é'ëni iluti légaquië' len guíë tuchi'.

Dios bunë' légaquië' tsutsu cate' ni' gula'cuídi'në'.

Bulu'huóáquië' ca' tsutsu lu gudil-la.

Bulu'láguie' bönni' guizxi yu rójáquië' gudil-la quégaquië' bönni' zí'tu'.

35 Yugu' nigula dza ni' bulu'zí'ínu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátie' lu ná'agaquië' bönni' ni' bulu'saca' zì'ë légaquië', en tu' cabí gul'é'ënnë' ulu'cá'anë' Dios, biti' gula'zì'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö.

36 Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë.

37 Bulu'ladxi' bönachi bal-lë' guiöj, en gula'chözë' ia'bal-lë'. Gula'zì'ë bë'ë légaquië', en gulútigaca zíàngaquië' len guíë tuchi'. Gula'dödë' ná'alö ní'ilö, nácugaquië' guídi xzágacaba' bö'cu' xzila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö'.

38 Caní guláquië' bönni' na', ate' biti' gulaca bönachi yödzölió ni lesaca' ulu'zì' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' xzan bulóaj, en yugu' yeru luyú.

39 Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zì'ë luyú ni le guzxi' lu në'ë Dios unödzjë' quégaquië'.

40 Caní guca, tu' nupë'ë Dios ni'a queëru' tu le nácáro dxi'a para cate' únë' légaquië' idú dxi'a, rë'u ni gunru' légaquië' tsözxön.

12

Ral-la' uyuru'-në' Cristo

1 Que lë ni na', lësca' rë'u, tu' nacua' idú gásibi'ilö ga ni zóaru' zíántërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zì'i nuá'aru', enca' yúgu'të dul-la' nazöngaca rë'u, ate'

lu yöl-la' riböza zxön ladxi' queëru', ral-la' gunru' xichinë' Dios, le naca tsca xíti'ru' lu huitaj le zoa loru'.

² Ral-la' uyuru-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí' guzxaqué'ë lë'e yaga cruz, en biá' gulénë' yöl-la' rutuf'i que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná' bë'ë.

³ Buli'yúë' Jesús, ca na' gudí' guzxaqué'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopá ládxi'li'.

⁴ Ga ridxintë na'a dza, bití' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'.

⁵ Nadxi ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' zxí'ini cazë', ca na' nazúaj lu guichi le rnnë':

Zxi'ina', bití' uzú' tsölá'aló le gunë' Xanru',

cate' usëdi uzéajni'inë' li',

en bití' huöaj ládxi'u cate' uní'inë' li'.

⁶ Xanru' runí'inë' nu nadxi'inë',

en rusëdi ruzéajni'inë' yúgu'të nupa ta'zí' lu në'ë ilaca zxí'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' zxí'ini cazë'. Bití' ca' zóabi' tubí' bí'ido' bití' uní'inë'-bi' xúzibi'.

⁸ Na'a, channö cabí runí'inë' Dios libí'ili' ca na' runë' quégaca yúgu'të zxí'ini cazë', ní'irö nácali' ca yugu' bí'i lan, en bití' nácali' idú zxí'inë' Dios.

⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnrröru' ca rnna xtídzë'ë Xúziru' zoë' yehua' yubá para sóaru' ibanru' tsaz.

¹⁰ Yugu' xuz xiná'aru', tu chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'.

¹¹ Le nácatë bití' nalá' lahui na'a le uzí'iru' xibé que le runí'inë' rë'u, pero run ga ruhuí'iniru'. Channö gü'iru' lataj usëdi rë'u le runí'inë' rë'u, gun ga cózaru' dxí'ado', en ga gácaru' tsahui'.

Soa bönadxi queëru' channö cabí uzë nágaru' chi'ë Dios

¹² Que lë ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxi'li' para gunli' le naca dxi'a.

¹³ Guli'sóa nöza tsahui', para cabí gunli' ga ucá'ana nu ricuidi' ladxi' nöza na', pero guli'gún ga huöáca ladxi' nu na'.

¹⁴ Guli'güi' ládxi'li' cözalenli' dxi'a yúgu'të bönachi, en gácali' tsahui' lahuë' Dios, tu' channö cabí gunli' caní, bití' gaca ilé'eli'-në' Xanru'.

¹⁵ Guli'gún chí'i cuinli' para cabí soa nu ucá'ana le ruzá' ládxi'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'.

¹⁶ Guli'gún chí'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxí'inë' Isáac. Esaú na' bëti'ë le ral-la' gata' lu në'ë tu' náquië' bí'i bönni' huaca queë' xuzë' para guzxi'ë tu le do' gudahuë'.

¹⁷ Chinöz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxi'ë xuzë' lë', pero bití' guta' lataj ubí'i ládxi'ë Esaú na' sal-la' gudilaj ládxi'ë le len yöl-la' ribödxi queë'.

18 Ca raca queé'li' biti' naca ca guca quégaquié' bönni' Israel. Légaquié' gula'bigué'ë gala' ga zoa tu gu'a le gaca nu can, ate' guyegui gu'a ni', en böaca chul-la lahui' dza tu' gurö'ö böaj gasaj, en guyéjcada' bö'.

19 Bila'yönné' ta'bödxí lúzuba' böa', enca' chi'ë Dios Nu bē' didza'. Cate' bila'yönné' lē ni, guláta'yué' lahué' Moisés para cabirö gü'ilené' Dios légaquié' didza'.

20 Caní guluné' tu' cabí guca guá' iléngaquié' lē na' gunná bé'ené' Dios légaquié', gunné': "Channö tsöjlíbibá' tuba' böa' guíxi'do'os gu'a ni, ral-la' ulu'ládxé'ë-ba' guiöj, o ulu'dödé'-ba' yaga tuchi'."

21 Lē na' bila'lé'ené' ben gádxida' légaquié', ate' Moisés gunné': "Radxi ridzöbida', en ríxxízida'a."

22 Na'a, libí'ili' ral-la' gádxitëöli' tu' ribíga'li' gala' tu lu gu'a nazí'i le Siön, en ga zoa yödzö queé' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queé' Dios.

23 Ribíga'li' gala' ga ni' nudúbigaca xzí'ini cazé' Dios lahué' Lē', nupa na' nazúajgaca láguequi lu guichi ni' yehua' yubá, enca' ga zoé' Dios Nu ruchi'a rusöröe' yágu'té' bönachi, en ga na' nacuá' yugu' bö' gulaca cazé' yugu' bönni' tsahui', tu' buné' Dios légaquié' tsahui'.

24 Ribíga'li' ca' ga zoé' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queé' le run ga runiti lahué' Dios rē'u, rön na' run le nácarö dxi'a ca le ben xichöné' Abel, lē na' ben ga guchúguié' Dios queé'bi' bi'i böché'ë.

25 Que lē ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu na' bulidza légaquié' luyú ni. Nácatëró löza biti' ca' uláru' rē'u channö tá'baga'ru' Nu na' rulidza rē'u, zoé' yehua' yubá.

26 Dza ni' guzxizi luyú ni tu' biyön chi'ë Dios, pero na'a chiguzxí' lu në'ë, gunné': "Ia'tú luzuísö, en calégasö luyú uxízia', pero lúzxiba ca' uxízia'."

27 Cate' ni' rnné': "Ia'tú luzuísö", lē ni ruluí'i rē'u ral-la' udúa yugu' le gaca ila'zxízi, lē na' rö'ö yödzölió ni, ate' ulu'gá'ana le cabí gaca ila'zxízi, lē na' rö' yehua' yubá.

28 Que lē ni na', tu' ral-la' idéli'ru' tu lataj ga inná bē'ëru', le cabí izxizi, ral-la' guiëru'-nē' Dios: "Xclenu'", ate' lu yöl-la' ba'a ladxi', en lu yöl-la' radxi Lē' tseaj ládxí'ru' Lē' ca na' raza ládxé'ë Lē',

29 tu' náquié' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ládxé'ë Dios

1 Ral-la' idxí'ítica'sili' luzá'ali' tuli' ia'tuli'.

2 Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queé' Dios, sal-la' biti' guléquibe'e nácaquié' gubáz lá'ayi.

3 Guli'tsöjné nupa nadzúngaca lídxí guíë tsca nunli' légaquié' tsözxön, nadzunli' ca' lídxí guíë. Guli'gü' ládxí'li' yugu' bönni' ta'bía ládxí'gaca bönachi légaquié', tsca libí'ili' riguí'i rizáca'lenli' légaquié' tsözxön.

4 Ral-la' gunli' bal yöl-la' nutsaga na', ate' tu tué' bönni' ral-la' sóalené'-nu nigula queé' lu yöl-la' ba'a ladxi' queé', tu' ichúguié' Dios quégaca nupa tun le ruá' dó', en nupa ta'guítsaj xibá que yöl-la' nutsaga na'.

5 Biti' bi uhuí'di'li', pero guli'tsaza ládxí'li' tsca le dē queé'li' na'a, tu' chigunné' Dios: "Catu caz ucá'ana' li', en biti' ca' ubéaj ládxá'a li'."

⁶ Caní naca, huáca innaru' idú ládxi'ru' lë na' rnna:
Xanru' náquië' Nu rácalen neda'.

Biti' ca' gáxdida' bi gun bönachi quia'.

⁷ Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtidzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸ Lëbisö ca náquië' Jesucristo, néaje, en na'a, en cá'tica'sö.

⁹ Biti' güi'ili' lataj yugu' xibá ízá'a, en xibá nadzá' ichë'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxe'ë Dios queëli', en calëga ca nácgaca xibá que le rë'aj ráguru', lë na' bití' ulu'zí' xibé nupa tu'í ládxi'gaca léguequi.

¹⁰ Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö.

¹¹ Bixúz lo que yu'u lá'ayi na' gulu'ë xichöngacaba' böa' bëdxi lu lataj idú lá'ayi tu' nözi dul-la', pero bulu'zéguië' bëla' cá'asö quégacaba' ga naca ní'lö ra' yödzo.

¹² Lëasca' caní gudí' guz xáquë'ë Jesús ní'lö ra' yödzo para bunë' bönachi dxi'a len rön queë cazë'.

¹³ Tsöjtá'aru'-në' Jesús, sal-la' ila'béaj bönachi rë'u lu yödzo, en sí'iru' tsözxön len Lë' lë na' bulu'lidza ditaj bönachi Lë'.

¹⁴ Biti' zoa tu yödzo queëru' yödzülió ni le soa tsaz, pero riguíljaru' lë na' sí' za'.

¹⁵ Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu" ni'a que le náquië' Lë'.

¹⁶ Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxe'ë Lë'.

¹⁷ Guli'gún ca rnna xtidza'gaquië' böchi'ru' tu'yúë' libí'ili', en guli'güf' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uzí'ili' xibé dxin na' ilunë' lu yöl-la' risëbi ladxi' quégaquië'.

¹⁸ Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ru'í ládxi'tu' gúntica'situ' le naca dxi'a.

¹⁹ Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' ládxe'ë queëru' le gácalen rë'u

²⁰ Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz,

²¹ rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'enë' Lë', ate' gunë' queëli' le raza ládxe'ë Lë', tu' néquili' queë' Jesucristo. ¡Queë' Cristo gácatica'sö yöl-la' ba! ¡Ca' gaca!

²² Ráta'yua' loli', böchi' luzá'ado', gü'í ládxi'li' didza' ni ruzéajni' libí'ili', tu' naca láti'do'os lë ni ruzúaja' queëli'.

²³ Ral-la' inözili' chiburúajbi' bi'i Timoteo, bi'i böchi'ru'do', lidxi guié, ate' channö idxíntëbi' ga zoa' ni, gunbi' neda' tsözxön uduyútu' libí'ili'.

²⁴ Buli'gapa Dios böchi'ru' tu'yüë' libí'ili', enca' yúgu'të bönachi rō queë'
Dios. Tu'gapa Dios libí'ili' bönachi ta'yéajlé' Cristo nacué' luyú Italia.

²⁵ ¡Dios uzá' lãdxë'ë queëli' yúgu'tëli'! ¡Ca' gaca!

LE BUZÚAJĚ' LU GUICH SANTIAGO

Santiago rugapë' Dios bönni' judío ta'dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesu-cristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

Yöl-la' réajni' i le runnë' Dios queëru'

² Böchi' luzá'ado', cate' gaca bi gaca queëli' le si' bë' libí'ili', ral-la' udzéjali' idú ládxi'li'

³ tu' nöz quézili', cate' bi raca queëli' le rizí' bë' libí'ili' ca réajlë'ëli' Cristo, lë ni rusedí libí'ili' cözali' zxon ladxi'.

⁴ Gulí'güí' ládxi'li' gaca idú yöl-la' zxon ladxi' queëli', para údxi gácali' bönni' ta'yéajni'inë', en biti' bi yadzaj queëli' ca nácgaca lë ni.

⁵ Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni' que, tu' runödzjë' yödxi yana' quégaca yúgu'të bönachi, en biti' ca' réqui quézinë' gunnë' queëru'.

⁶ Na'a, nu bi rinabi-në' Dios, run bayudxi tséajlë' Lë', en cabí gaca chopa ladxi'. Nu raca chopa ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö.

⁷ Nu naca caní biti' ral-la' gun löza si' bi unödzjë' Xanru'.

⁸ Bönni' na' reaj bö' ládxi'da'ahuë' biti' ridzölinë' nácalö gunë'.

⁹ Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzéjanë' tu' chinadéli'në' tu lataj lo lahuë' Dios.

¹⁰ Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bítí'rö ruzxöni ládxi'ë lë na' dë queë'. Nu ruzxöni ladxi' yöl-la' tsahui' que, gaca que nu na' ca raca que xiyija guíxi'do', la' ridöditë que.

¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxitë guixi' na', en riguínna'j xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítie' tsanni ni runë' dxin riguiljë' yöl-la' tsahui' na'.

Le ta'zí' bë' rë'u

¹² Bica' ba bönni' böchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzjë' quégaca nupa nadxi'iguequi Lë'.

¹³ Cate' bi raca queëru' le run ga guë'ëniru' gunru' le ruá' dö', biti' ral-la' innaru': "Dios rizí' bë'ë rë'u len le naca xihui'." Dios biti' rizí' bë'ë nu bönni' len le cabí naca dxi'a.

¹⁴ Na'a, channö nu bi raca que le rizí' bë' le len le cabí naca dxi'a, naca tu' rizë' ladxi' le ruá' dö', ate' lë ni ben ga gú'uni gun le ruá' dö'.

¹⁵ Lë na' rizë' ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

¹⁶ Böchi' luzá'ado', biti' si' ye'e la' cuínsili'.

¹⁷ Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'ruáj ga zoë' Xúziru' Dios, Nu ben yugu' le ta'yëpi

yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnmatica'së' queéru' le naca tsahui'.

¹⁸ Ca ré'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' gurö cazë' Dios.

Le reaj ládxi'ru'-në' Dios le naca li ladxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yönili', pero biti' ral-la' innëtëzili', en biti' ilëtëzili'.

²⁰ Nu na' riletëz biti' run le naca tsahui' lahuë' Dios.

²¹ Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

²² Na'a, guli'gún ca rnna didza' ni, en cabí yönisili', tu' channö yönisili' didza' ni, si' yé'eli' la' cuínsili'.

²³ Nu riyönisö didza' ni, en biti' run ca rnna, nu ni naca ca tu bönni' ruyúë' lahuë' tu lu guië dxili,

²⁴ tu' ruyú cuinë', en söhuöjë', ate' la' ral-latë ládxe'ë ca rinë'ë.

²⁵ Na'a, nu bönni' biti' ral-la ládxe'ë le riyönnë', pero ru'í ládxe'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

²⁶ Channö nu bönni' ladaj libí'ili' réquinë' naca dxi'a ca reaj ládxe'ë Dios, pero biti' rapa chi'ë lúdxë'ë para cabí innësë' ca', bönni' ni rizí' yé'enë' la' cuínsë', ate' biti' raza ládxe'ë Dios ca reaj ládxe'ë bönni' na' Lë'.

²⁷ Le reaj ládxi'ru'-në' Dios, le naca idú, en le naca dxi'a, naca gácalenru' yugu' bi'i uzëbido', enca' yugu' nigula nagá'ananu túzinu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

2

Tuz ca ral-la' gunru' bönachi bal

¹ Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi.

² Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö,

³ channö gunli' bal bönni' na' nácuë' lari' nazáca'da', en guiëli'-në': "Gurö'ölen ré'u ga ni naca dxi'a", pero guiëli' bönni' yéchi'do' na': "Ná'asö guzúf", o guiëli'-në': "Gurö'i lu yu ni."

⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusörö luzë'e, biti' naca dxi'a ca rizá' ládxi'li'.

⁵ Böchi' luzá'ado', buli'zë nágali' lë ni. Dios gurö cazë' yugu' bönni', sal-la' téquiguequi bönachi yödzölió ni nácaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lë na' guzxi' lu në'ë Dios unödzejë' quégaca nupa ta'dxi'i Lë'.

⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zí'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'.

⁷ Yugu' bönni' na' dë yöl-la' tsahui' quégaquië' ta'nnë zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

⁸ Runli' dxi'a channö runli' idú ca rinná bë' xibá lo, le nazúaj lu guichi, en rRNA caní: "Ral-la' idxi'ínu' luzó'o ca nadxi'i cuinu'."

⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítsjali' xibá na'.

¹⁰ Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idütë le rinná bë' xibá na'.

¹¹ Lë' cazë' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idütë xibá queë' Dios.

¹² Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'.

¹³ Nupa cabí tu'huechi' ládxi'gaca luzé'eguequi, uchi'a usöröë' Dios léguequi, ate' cuntú nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', biti' bi uzi'ë xibé tu bönni' channö innasë': "Réajlë'a Cristo", pero biti' runë' le naca tsahui'. Biti' gaca ulé' bönni' na' channö innasë' réajlë'ë Cristo.

¹⁵ Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en calëga le ilahuë',

¹⁶ ate' channö tu nu dzaga libí'ili' guiësö légaquië': "Böaj lídxili' tsáhui'do'. Chibölaj budzé'eli'", pero channö cabí unödzej quégaquië' lë na' ta'yádzjanë', biti' ca' gúcalen légaquië'.

¹⁷ Lësca' caní raca que nu bönni' rnnasë' réajlë'ë Cristo. Channö cabí runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

¹⁸ Nadxi ca' guië' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'í'ida' li' réajlë'a Cristo ni'a que le naca tsahui' runa'."

¹⁹ Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'.

²⁰ Li', bönni' biti' bi nözinë'. Ral-la' inözi quézínu' channö zoa nu rnnasö réajlë' Cristo, pero biti' run le naca tsahui', biti' naca lesaca' yöl-la' réajlë' Lë' que nu na'.

²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' biti' buzégui'ë-bi'.

²² Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'.

²³ Caní guca lë na' nazúaj lu guichi lá'ayi le rRNA: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë: "Luzé'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calëgasö tu' réajlë'ë Dios.

²⁵ Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxí'a tu' zoa tu le tsahui' bennu, læ na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yøjhuøjgaquië' nöza yúbölö.

²⁶ Ca na' raca que idütë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, biti' naca lesaca'.

3

Yugu' le rnna lúdxí'ru'

¹ Böchi' luzá'ado', biti' guntëz zían cuinli' bönni' tu'sédinë' bönachi, tu' chinöz quezili' zí'tërö uchi'a usöröë' Dios rë'u, núlöru' rusédiru' bönachi.

² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'.

³ Cate' rigú'uru' guié ruá'agacaba' böa' para gunru' ga ilunba' ca rë'ëniru', gaca inná bé'eru' légacaba' lu idütë le tunba'.

⁴ Buli'yú ca' ca raca quéguequi barco. Sal-la' zxöntëro naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxí'i barco para tseaj gátitës ga gué'ënnë' bönni' rusë'ë le.

⁵ Lësca' caní naca lúdxí'ru'. Sal-la' cuídi'do'os naca, zióntëro le rnna lúdxí'ru' na'. Buli'yútsöca' ca run guí. Sal-la' guí'do'os ribíbiru', tu guí'a sibi huayégui.

⁶ Lësca' lúdxí'ru' na' naca ca tu guí. Yúgu'të le ruá' dö' raca yödzölió ni rnna lúdxí'ru', en tu' dzaga lúdxí'ru' na' idütë le naca cázaru', que læ ni na' run ga raca xihui' idütë le nácaru'. Le rnna lúdxí'ru' ribequi guí, le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí le nabequi' tu' xihui'.

⁷ Yúgu'tëba' böa' guixi' ta'daba' luyú, en yugu' böa' zoa xiligacaba', en yugu' böa' tá'ayógi læ'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönachi luyú ni légacaba',

⁸ pero cuntun bönni' gaca inná bé'enë' lúdxë'ë, tu' rnna lúdxí'ru' le ruá' dö', en biti' gaca nu uzaga' xinözi. Zióntëro le rnna lúdxí'ru' le naca ca tu le nachë' yöl-la' guti.

⁹ Len la' lúdxí'ru' ná'asö rulidza tsáhui'ru'-në' Dios Xuz, en rulidza dí'tjaru' ca' yugu' bönni', ate' benë' Dios légaquië' ca naca cazë' Lë'.

¹⁰ Caní naca, len la' ruá'asiru' na' rulidza tsáhui'ru' bönachi, en rulidza dí'tjaru' bönachi. Böchi' luzá'ado', biti' ral-la' gaca caní.

¹¹ Biti' ca' ta'lén nisa siziá', en nisa zöna' la' tuzi ga ta'lén.

¹² Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zöna', en nisa siziá'.

Yöl-la' réajni' le naca idú

¹³ Channö zoë' tu bönni' ladjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'.

¹⁴ Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, biti' ral-la' gun ba zxön cuinli' ca naca yöl-la' réajni'i queéli'. Nu run caní rizí' yë', en ridá'baga' le naca idütë li.

¹⁵ Yöl-la' réajni'i caní biti' naca le runödzjë' Dios, pero que yödzölió ni naca, enca' quégaca bönachi yödzölió ni, en que tu' xihui'.

¹⁶ Yugu' bönni' tu'zxé'ené' luzá'agaquié', en té'ënné' ila'gú'u bönachi légaquié' yöl-la' ba, lësca' ta'dil-la dídze'ë, en tuné' yúgu'té le ruá' dö'.

¹⁷ Yugu' bönni' nápaqaquié' yöl-la' réajni'i na' runödzejé' Dios: Tuné' le naca idú tsahui', en ta'bözé' dxí'ado'.

Nácagaquié' zxön ladxi', en nöxaj ladxi'.

Tu'huechi' ládxi'gaquié' bönachi,

en tuné' le naca dxi'a.

Tuz ca tu'chi'a tu'söröë' luzá'agaquié',

en biti' ta'béaj bë'ë luzá'agaquié'.

¹⁸ Nupa tuí'i ládxi'gaca ila'bequi dxi le raza, ta'böza dxí'ado', para gaca ca' dxi'a idúté le zeaj naca caz.

4

Nupa tun zxön le nacua' yödzölió

¹ ¿Bizx que na' ridíl-lali', en raza didza' bizxaj queéli'? Raca caní queéli' tu' rizé ládxi'li' zían le rizé ládxi'li' tu tuli', en que lë ni na' ridíl-lalenli' luzá'ali'.

² Zían le ruhuídi'li', en tu' cabí rizí'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribó'öli', en ridíl-lali'. Biti' rata' queéli' le ré'ënili', tu' cabí rinábili'-në' Dios lë na'.

³ Sal-la' zoa bi rinábali', biti' bi rizí'ili', tu' cabí naca dxi'a ca rinábali', tu' ré'ënili' lë na' rinábali' para ugunli' le dxin ca raza ládxi'sili'.

⁴ Libí'ili', bönachi nusanli'-në' Dios, ¿naru' cabí nözili' channö runli' zxön le nacua' yödzölió ni, chinuhuóácali' ca nu biti' rilé'e Dios dxi'a? Núti'tës nu ré'ëni gun zxön le nacua' yödzölió ni, nuhuóáca ca nu biti' rilé'e Dios dxi'a.

⁵ Biti' rnnasö ca' le nazúaj lu guichi lá'ayi le rnna: "Dios risöl-lë'ë Dios Bö' Lá'ayi queëru', Nu zóalen ré'u, ate' Lë' nadxí'inë' ré'u, en rudúli'në' ré'u channö rusanru'-në'."

⁶ Na'a, zxóntërö le ruzá' ládxe'ë Dios queëru', tu' nazúaj lu guichi lá'ayi le rnna: "Dios ruzáguë'ë xinözguequi nupa tun ba zxön cuínguequi, pero ruzá' ládxe'ë quégaca nupa nácagaca nöxaj ladxi'."

⁷ Que lë ni na', guli'sóa nöxaj ladxi' lahuë' Dios. Guli'nná be'e tu' xihui', ate' uzxunnaj ga zóali'.

⁸ Guli'güf' ládxi'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reaj bö' ládxi'do'oli', en chopa le nadxí'ili', guli'gún dxi'a icja ládxi'do'oli'.

⁹ Guli'sëbi ládxi'li', en buli'huí'ini, en guli'cödxí. Na'a ruzxídxili, pero ral-la' cödxili'. Rudzéjali', pero ral-la' huí'inili'.

¹⁰ Guli'gaca nöxaj ladxi' lahuë' Xanru', ate' Lë' guné' ga tsëpisëli'.

Biti' ral-la' ichugu bë'ëru' le run luzá'aru'

¹¹ Böchi' luzá'ado', biti' innëli' que luzá'ali' tuli' ia'tuli'. Nu bönni' rinné' que böchi' luzé'ë, en rilaga yudxé' le runé', bönni' ni rinné' que xibá queë' Dios, en ruchi'a rusöröë' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröë' le, en biti' runu' ca rinná bë' xibá na'.

¹² Na'a, tuzé' náquié' Dios, Nu ben xibá na', en náquié' ca' Nu ruchi'a rusöröë' le runru'. Lë cazé' gaca usölé' bönachi o usunítié' bönachi na'. Na'a, ¿núzxité run cuinu', rilaga yudxu' luzó'o?

Biti' gaca gunru' löza le gaca cuxö huidzaj

¹³ Na'a, buli'zě nágali', núlöli' rnnali': "Cuxö huidzaj tséajtu' yödzo ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queé'tu'."

¹⁴ Biti' nözili' bizxi gaca cuxö huidzaj. ¿Nacxi caz naca queé'ru', tsca zóaru' yödzölió ni? Nácaru' ca böchila le nalá' tu chí'ido'osö, en la' rinítitë.

¹⁵ Que lë ni na', caní ral-la' innali': "Channö guë'ennë' Xanru', sóaru' ibanru', en tu ia'tú le gunru'."

¹⁶ Na'a, libí'ili', lu yöl-la' run ba zxön queéli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'.

¹⁷ Channö nöziru' le naca dxi'a le ral-la' gunru', en bití' gunru' lë na', runru' dul-la'.

5

Santiago rus'ë ládxi' gaquië' bönni' dë yöl-la' tsahui' quégaquië'

¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'.

² Chinaca ditaj yöl-la' tsahui' queéli', ate' chinutógacaba' le ráculi' böljado' que.

³ Chinaca que dumí oro, en dumí plata queéli' ca naca que guíë nazön yöni que, ate' yöni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chiröjsétëgaca.

⁴ ¡Buli'yútsöca! Yugu' bönni' huen dxin gula'lapë' yöla queéli' chita'naba yúdxinë' lázxjagaquië', tu' cabí riguízjanili' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë rinná bé'enë' ni'a në'ë guizxi yu.

⁵ Benli' ga buné'eli', en güi' gudágutica'sili' le rnnasö queéli' lu yödzölió ni. Buxön cuinli', pero chizóa idxín dza údxi queéli'. Gaca queéli' ca raca queë'ba' bëdxi renni', chibú'u dza gútiru'-ba'.

⁶ Richúguli' quégaquië' bönni' tsahui', en rútili' légaquië', ate' légaquië' bití' ta'dá'baguë'ë libí'ili' cate' rútili' légaquië'.

Cözaru' zxön ládxi', en ulídzaru'-në' Dios

⁷ Na'a, böchi' luzá'ado', guli'cöza zxön ládxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ládxi' ribözë' guiöjsiu', en guiöj cusu lin, ate' tódi ni' ulapë', en utübë' yöz zían.

⁸ Lësca' caní, libí'ili' na' réajlë'ëli' Cristo, guli'cöza zxön ládxi', en buli'tipa ládxi'li', tu' chizá' gala' dza huödë' Xanru'.

⁹ Böchi' luzá'ado', bití' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'!

¹⁰ Böchi' luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácaquië' ca tu le ruluí' rë'u ca ral-la' quí'í sáca'ru', en cözaru' zxön ládxi'.

¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí' gula'zaca'. Chibiyönili' ca benë' Job. Gulözë' zxön ládxi' sal-la' gudí' guzácá'dë'ë, ate' nözili' ca' ca benë' Xanru' queë' ga búdxitë. Ruhuéchi'da' ládxië'ë Xanru' rë'u, en ruí'í ládxië'ë rë'u.

¹² Böchi' luzá'ado', le nácatërö lo naca lë ni rea' libí'ili': ¡Biti' uzötjali' Nu zoa yehua' yubá, en bití' uzötjali' le nacua' luyú ni, en bití' uzötjali' bítí'tës bi run tsutsu xtídza'li! Cate' innali' "Ön" ral-la' innásili' "Ön." Cate' innali'

“Biti” ral-la’ innásili’ “Biti.” Caní ral-la’ gunli’, para cabí ibága’li’ xíguia’ lahué’ Dios.

¹³ Channö riguí’i rizáca’ nu dzaga libí’ili’, ral-la’ ulidza Dios nu na’. Channö zoa nu rudzeja, ral-la’ gul-la’ yöl-la’ ba nu na’.

¹⁴ Channö re’e nu dzaga libí’ili’, ral-la’ ulidza bönni’ gula tapa chi’ë bönachi queë’ Cristo, para ulu’lidzë’ Dios, en ila’nábinë’ Lë’ únë’ bönni’ huë’ na’. Ral-la’ ila’gu’ë lë’ le za, en ulu’gunë’ dxin Lë’ Xanru’.

¹⁵ Cate’ ulu’lidzë’ Dios, en ta’yéajlë’ë gunë’ Cristo ga huöáquië’ bönni’ huë’ na’, ní’rö gunë’ Xanru’ ga huöása uzóë’, en channö benë’ dul-la’ bönni’ huë’ na’, Xanru’ uniti lahuë’ lë’.

¹⁶ Que lë ni na’, guli’xóalëpi dul-la’ nabága’li’ tuli’ ia’tuli’, en guli’naba que luzá’ali’ tuli’ ia’tuli’ lahué’ Dios para únë’ libí’ili’, para urúaj yödzöhuë’ na’ ré’eli’. Le rulidzë’ tu bönni’ tsahui’ Dios, le runë’ idú ládxë’ë, nácada’ lesaca’.

¹⁷ Elías, bönni’ ni’ bë’ë didza’ uláz queë’ Dios, gúquië’ tu bönni’ yödzölió ca nácaru’ rë’u, pero cate’ bulidzë’ Dios, en gunábinë’ Lë’ para cabí galaj guió, idú tsonna iz yu’ xopa beo’ biti’ gulaj guió, luyú ni.

¹⁸ Gudödi ni’ bulidzë’ Dios leyúbölö, ate’ böálaj guió, ate’ bunödzej le gulazë’ yugu’ bönni’ dza ni’.

¹⁹ Böchi’ luzá’ado’, lë ni ral-la’ inözili’. Channö nunbë’ nu bönni’ dzáguië’ libí’ili’ le naca idútë li, en richixi riníguinë’, ate’ zoa nu gun ga ubí’i ládxë’ë bönni’ na’ richixi riníguinë’,

²⁰ nu na’ gun ga ubí’i ládxë’ë bönni’ dul-la’ na’ gudë’ ga yúbölö, usölë’ bönni’ dul-la’ na’ lu yöl-la’ guti, en gunë’ ga uniti lahuë’ Dios dul-la’ zían nabáguë’ë bönni’ na’. ¡Ca’ gaca!

DÍDZA'DO' ZÍ'ALÖ BUZÚAJË' PEDRO

Pedro rugapë' Dios nupa ta'dá' Cristo

¹ Neda', Pedro, naca' gubáz nasöl-lë'ë Jesucristo. Ruzúaja' queëli' lu guichi ni, libí'ili' násilasili' zi'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia.

² Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bö' Lá'ayi, en gunli' ca rnna xtídzë'ë Cristo, en gácali' idú tshui' ni'a que xichönë' Cristo. Rinábida'-në' Dios uzá' láchxë'ë queëli', en gunë' ga soa dxi icja láchxi'do'oli'.

Le rúntica'siru' löza

³ ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza,

⁴ en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödzej' quegaca bönachi queë', biti' initi, en biti' itëbi, en biti' igula.

⁵ Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

⁶ Que lë ni na' rudzëjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bë' libí'ili'.

⁷ Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizí' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queëli' Cristo, le nácáro lesaca' ca oro, gaca queëli' yöl-la' zxön, en yöl-la' run bal dza ni' uluí' lahuë' Jesucristo.

⁸ Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rilé'eli'-në' na'a, ate' rudzëjali'. Yöl-la' rudzeja zxön queëli' le cabí gaca quíxjö'öru' tscá naca, naca idútë' li.

⁹ Caní naca, tu' ridéli'li' yöl-la' rusölá que bö' naca cázali', le rata' queëli' tu' réajlë'ëli'-në' Cristo.

¹⁰ Dza ni'te yugu' bönni' gulu'ë didza' uláz queë' Dios bulu'sëdë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' láchxë'ë Dios queëru'.

¹¹ Bö' Lá'ayi dzáguie' Cristo buzéajni'inë' zí'atëlö bönni' na' gulu'ë didza' uláz queë' Dios, en buluí'inë' légaquie' ca ral-la' quí'i sáque'ë Cristo, enca' ca gaca queë' yöl-la' zxön tödi na'. Que lë ni na' gulu'í' láchxi'gaquie' ila'nózinë' bátaxi gaca lë ni, en nuzxi na' gaca que lë na' buluí'inë' Bö' dzáguie' Cristo légaquie'.

¹² Dios buluí'inë' bönni' na' gulu'ë didza' uláz queë' biti' naca tu le ila'lé'enë' légaquie', pero rë'u ni rilé'ëru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquie', Nu na' risöl-lë'ë Dios zoë' yehua' yubá queëru', ate' të'ënnë' gubáz lá'ayi queë' Dios ila'nózinë' ca naca lë na' gulu'ë didza' que dza ni'te.

Dios rulidzë' rë'u para gácaru' lá'ayi

¹³ Que lë ni na', guli'sóa ban ladxí', en guli'cózatica'sö bá'ado'. Idú ladxí'li' buli'zxöni ladxí'li' lë na' uzá' ladxë'ë queëli' Dios dza ni' ulu'i lahuë' Jesucristo.

¹⁴ Guli'gún ca rnna xtídzë'ë Dios, en biti' gü'ili' lataj yugu' le rizë ladxí'li' ila'chë' libí'ili' ga yúbölö, ca na' benli' dza ni' biti' núnbë'ënili'-në' Dios.

¹⁵ Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulidzë' libí'ili' para guéquili' queë'.

¹⁶ Lësca' caní nazúaj lu guichi lá'ayi, ca na' gunnë' Dios le rnna: "Guli'gaca lá'ayi, tu' naca' neda' lá'ayi."

¹⁷ Rëli'-në': "Xuztu'" cate' rulídzali'-në' Dios, ate' Lë', lëbisö ca ruchi'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'.

¹⁸ Dios busölë' libí'ili' lu lë na' gúcali' dza ni' cate' benli' ca nácacaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata,

¹⁹ pero len xichönë' Jesucristo le nácatërö lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'.

²⁰ Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulu'i lahuë' para uzí'ili' xibë'.

²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ladxí'li' Lë'.

²² Na'a, chinún cuinli' dxi'a tu' runli' ca rnna le naca idútë li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú ladxí'li' ral-la' idxí'ili' luzá'ali' tuli' ia'tuli'.

²³ Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljaleni' xtídzë'ë Dios, le naca ban, en le zóatica'sö.

²⁴ Caní naca, tu' nazúaj lu guichi lá'ayi le rnna: Yúgu'të bönachi nácacaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queëli' lu didza' dxi'a.

2

¹ Que lë ni na', guli'cá'ana yúgu'të le ruá' dö'. Bítirö si' yë'ëli', en biti' ubéaj dxi'a cuinli' lógaca bönachi. Bítirö uxzé'ëli', en biti' innëli' que luzá'ali'.

² Ral-la' së ladxí'li' le naca queë' Dios Bö' Lá'ayi para gálali' ca na' tunbi' bi'i huë'ënido', ta'zë ladxí'bi' nidxi'. Caní ral-la' gunli' ga idxinrö dza uláli',

³ channö réquibe'ëli' náquië' Xanru' dxi'i ladxí'.

Cristo náquië' ca tu guiöj naca ban

⁴ Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö.

⁵ Lësca' caní, libí'ili' nácali' ca yugu' guiöj nabángaca. Guli'gü' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixüz néquiquequinë' quez queë' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queëli' lahuë' Dios, lë na' raza ladxë'ë Dios.

⁶ Que lë ni na' nazúaj ca' lu guichi lá'ayi le rnna:
Rigu'a lu zö'ö yödzo Sión tu guiöj lo squin zö'ö,
le gurö caza' neda', en naca lesaca'.
Nu réajlë' Lë', biti' ichixi inigui.

⁷ Naca guiöj ni queëli' libí'ili' na' réajlë'ëli' Cristo tu le nazáca'da', pero
quégaca nupa biti' ta'yéajlë' Cristo, naca ca na' nazúaj lu guichi lá'ayi le
rnna:
Guiöj na' bulu'zöë' bönni' tu'cu'ë zö'ö tsölá'alö,
tu' guléquinë' naca cá'asö,
guiöj ni chinaca guiöj lo squin zö'ö.

⁸ Lësca' caní nazúaj lu guichi lá'ayi le rnna:
Guiöj ni gun ga tsöjchégu'gaca bönachi,
en gun ga tsöjtsö'ögaca.

Le nácatë yöjchégu'gaquië' bönni' biti' ta'yéajlë'ë Cristo, tu' gula'chíxinë'
cate' bulu'zöë' xtídzë'ë Dios tsölá'alö. Dios bucu'ë légaquië' para ilunë'
caní.

Nupa néquiquequi quez queë' Dios

⁹ Libí'ili' nácali' bönnachi gurö cazë' Dios. Yúgu'tëli' nácali' bixúz queë'
Bönni' Unná Bë' Lá'ayi. Nácali' ca tu yödzo nequi quez queë' Dios. Nácali'
bönnachi que cazë' Dios. Caní nácali' para gaca gunli' libán que le zxön
benë' Dios, Bönni' na' bulidzë' libí'ili' para birúajli' ga naca chul-la que
dul-la', en guyázali' lu bení' idú queë'.

¹⁰ Zí'atëlö biti' gúcali' bönnachi queë' Dios,
pero na'a chinácali' bönnachi queë'.
Zí'atëlö cunttu nu buéchi' ladxí' libí'ili',
pero na'a Dios caz ruhuéchi' ládxë'ë libí'ili'.

Zóaru' nabanru' para gunru' ca rë'ënë' Dios

¹¹ Böchi' luzá'ado', nácali' ca bönnachi zi'tu', en ridásili' yödzölió ni. Que lë
ni na', ráta'yua' loli', biti' güf'ili' lataj ila'nná be'e le rizësö ladxí'li' libí'ili',
yugu' le ta'díl-lalen bö' naca cázali'.

¹² Guli'gún le naca dxi'a lógaca bönnachi biti' núnbë'gaquië' Dios. Caní
gaca, channö ulu'zegui libí'ili' didza', en ila'nná tútili' bönnachi, gaca ila'lé'e
bönnachi yugu' le dxi'a runli', ate' dza huödë' Xanru' ila'gu'ë Dios yöl-la' ba
ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni'
na' nucuá'agaca bönnachi légaquië', sal-la' náquië' bönni' rinná bé'enë' iduté
yödzölió, tu' náquië' bönni' lo unná bë',

¹⁴ o channö náquië' bönni' rinná bé'enë' tu yödzo, nu na' nuzóë' bönni'
lo unná bë' na' para gunë' xíguia' nupa tua' dö', en gunë' bal nupa tun le
naca dxi'a.

¹⁵ Caní rë'ënë' Dios gunli' para ila'bö' dxië' yugu' bönni' biti' bi
nözguequinë', en biti' núnbë'gaquië' Lë', cate' ila'lé'enë' le naca dxi'a na'
runli'.

¹⁶ Guli'gaca ca yugu' bönni' nazángaquië', pero biti' ugunli' dxin yöl-la'
nazán queëli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

¹⁷ Guli'gún bal yúgu'të bönnachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' iduté yödzölió.

Le gudí'i guzxaqué'ë Cristo ruzéajni'i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasó gunli' bal yugu' bönni' xanli' na' nácaqaquië' tsahui', en tu'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'.

¹⁹ Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca rë'ënë' Dios, urúajli' tsahui' lahuë' Dios.

²⁰ Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' ribóza zxön ladxi' queéli' guá' ilenli' lë na' gaca queéli'? Channö ribózali' zxön ladxi', en ruá' rilenli' le riguí' rizáca'li', ate' benli' le naca dxi'a, ní'iró urúajli' dxi'a lahuë' Dios.

²¹ Dios bulidzë' libí'ili' para quí'i sáca'li' caní, tu' gudí'i guzxaqué'ë Lë cazë' Cristo uláz queéli', en buzóë' queéli' tu le ruluí' libí'ili' ca ral-la' gunli', para quí'i sáca'li' ca na' gudí'i guzxaqué'ë Lë'.

²² Cristo biti' bi dul-la' benë', en catu caz guzxi' yë'ë.

²³ Cate' bulu'dídza' yúdxinë' Lë',
biti' butsaqui yúdxinë' légaquië'.

Cate' bulu'saca' zi'ë Lë',
biti' buzenë' légaquië' le bach,
pero budödi cuinë' lu në'ë Dios,
Nu na' ruchi'a rusöröë' le runru' ca sa'yéaj.

²⁴ Lë cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huóácaru' rë'u dxi'a.

²⁵ Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queéli' ca tu' bönni' uyú bö'cu' zxila'.

3

Ca ral-la' ilún nupa nutsaga ná'gaca

¹⁻² Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lë'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ruí'ilenli' légaquië' ca naca queë' Cristo.

³ Yöl-la' lachi queéli' biti' naca le zoa láchuisö, tsca rupá'ali' ícjali', en tsca náca'gaca le néquini oro nusí' cuinli', en lari' nazáca'da' náculi'.

⁴ Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios.

⁵ Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que quégacanu.

⁶ Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

⁷ Lësca' caní, libí'ili', bönni', ral-la' güf'i ládxi'li' nigula que queéli'. Guli'gún légacanu bal, calégasó tu' nótá'gacanu ca yöl-la' nál-la' queéli', pero lësca' tu' nadéli'gacanu yöl-la' na'bán na' runnë' Dios queëru', lëbisó

ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-nē' Dios.

Huagu'i huazáca'ru' sal-la' gunru' le naca dxi'a

⁸ Ga ruúdxitē, guli'gaca tuz tuli' len ia'tuli' yúgu'tēli', en guli'güi' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'.

⁹ Biti' ubí'ili', cabí guá'ali' dō' que nu ruá' dō' queēli', en biti' utsaga yúdxili' nu rutsaga yudxi libí'ili', pero caní ubí'ili', inábili'-nē' Dios gunē' ga gaca bica' ba nu na', tu' bulidzē' Dios libí'ili' para gácali' bica' ba.

¹⁰ Caní naca le nazúaj lu guichi lá'ayi le rnna:

Nu bōnmi' rē'ēnē' uzi'ē xibé yöl-la' na'bán queē', en cözē' dxí'ado', ral-la' ucá'anē' didza' xihui', en cabirō si' yē'ē.

¹¹ Ral-la' ucá'anē' le ruá' dō', en gunē' le naca dxi'a.

Ral-la' güi' ládxi'ē cözē' zxön ladxi', en gúntica'sē' caní,

¹² Xanru' rapa chi'ē yugu' bōnmi' tsahui'

en ruzē náguiē' le tu'lidzē' Lē',

pero ruzáguē'ē xinözguequi nupa tua' dō'.

¹³ ¿Nuzxi caz guá' dō' queēli' channō ruí' ládxi'li' gúntica'sili' le naca tsahui'?

¹⁴ Sal-la' quí' i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili'

¹⁵ pero buli'zxöni ládxi'li'-nē' Cristo, en güi'ili' Lē' lataj inná bé'enē' lu icja ládxi'do'oli'. Guli'sóa sina' quíxjöi'ili' yúgu'tē nupa ila' nabi libí'ili' bizx que runli' löza Cristo, en gunli' lē ni lu yöl-la' nōxaj ladxi' queēli', en lu yöl-la' run bal nupa na'.

¹⁶ Guli'gúntica'sō le naca dxi'a lahuē' Dios, en channō nacuá' nupa ta'nnē xihui' que le naca tsahui' runli' tu' réajlē'ēli' Cristo, ní'irō ulu'tuí' i tu' nōzi le ta'nnē queēli'.

¹⁷ Channō quí' i sáca'li', dxí'arō gaca channō naca tu' runli' le naca dxi'a, en calēga tu' ruá'ali' dō', channō Dios rē'ēnē' qui' i sáca'li' caní.

¹⁸ Lē cazē' Cristo gudí' guzjáquē'ē, en gútiē' uláz queēru' para bugúē' dul-la' nabága'ru'. Lē' náquiē' dxi'a, pero gútiē' ni'a queēru', yugu' bōnmi' dul-la'. Caní benē' para bunē' rē'u tuz len Dios. Lu yöl-la' bōnachi queē' gútiē' pero lu bö' naca cazē' ni zoē' nabanē' lu le cubi le naca cazē'.

¹⁹ Lu bö' naca cazē' guyijē' yöjenē' libán lógaca bö' nadzúngaca.

²⁰ Bö' ni gulaca cazē' yugu' bōnmi', dza ni'te gula'dá'baguē'ē xtídzē'ē Dios, dza ni' zoē' Noé, cate' ni' gulözē' Dios lu yöl-la' ribōza zxön ladxi' queē', en biti' busiúdxē' légaquiē', tsanni ni' benē' Noé barco zxön na'. Lē'e barco na' bulu'lá nabábasō bōnachi lu nisa. Gulaca xunu' bōnachi, bōnmi', en nigula.

²¹ Nisa ni' naca tu le ruluí' i ca naca nisa ga na' ridílaru' nisa, le naca bē' nuláru' lu yöl-la' guti tu' bubanē' Jesucristo lu yöl-la' guti. Lē na' ridílaru' nisa biti' naca tu le run dxi'a le nácaru' láhuisō, pero ruluí' ruí' ládxi'ru' gaca dxi'a icja ládxi'do'oru' lahuē' Dios.

²² Jesucristo bubenē' yehua' yubá, ga na' yöjchö'ē cuita lē'ē ibēla Dios, en rinná bé'enē' yugu' gubáz lá'ayi, en nupa ni' ta'nná bē', en nupa nadéli'gaca yöl-la' zxön.

4

Ral-la' ugunru' dxin yöl-la' huáca queē' Dios para gunru' xichinē' Cristo

¹ Que lë ni na', ca na' gudí'i guzxaqué'ë Cristo lu le naca cazë', lësca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahuí' chibucá'ana dul-la'.

² Na'a isí lo, ral-la' gúntica'sili' ca rë'ënë' Dios, en calëga ca rizësö ládxi'li' lu yöl-la' bönachi queéli'.

³ Tsca'ti' gaz le chibenli' chibenli'. Biti'rö gunli' ca na' tun nupa bití' núnbë'gaca Dios. Dza ni'te benli' yugu' le cabí ral-la' gunli'. Guzé ládxi'li' le ruá' dö'. Guzúdxili'. Gudödi bë' gü'i gudáguli', en guyéaj ládxi'li' budó' guió'j budó' yaga, le rigútinë' Dios.

⁴ Na'a, tu'báninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'.

⁵ Légaquië' run bayudxi ulu'luf'i cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca.

⁶ Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' náca'gaca caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládxi'li' para gaca ulídzali'-në' Dios.

⁸ Tu' runtë bayudxi, guli'dxi'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queéli'.

⁹ Guli'güf' lataj ila'cuá' böchi' luzá'ali' lídxili', en bití' innëli' queégaquië'.

¹⁰ Ral-la' ugunli' dxi'ado' dxin yugu' le buzá' ládxe'ë Dios queéli', en gácalenli' luzá'ali' tuli' ia'tuli'.

¹¹ Nu bönni' runë' ba nali, ral-la' gunë' ba nali que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë'! ¡Ca' gaca!

Le ila'guí'i ila'zaca' bönachi ta'yéajlë' Cristo

¹² Böchi' luzá'ado', bití' ubánili' tu' nözi le ta'zí' bë'da' libí'ili'. Bití' naca tu le cabí núnbë'gaca bönachi.

¹³ Guli'dzë'jade'e tu' dë lataj queéli' gunli'-në' tsözxön Cristo lu le riguí'i rizáqué'ë Lë' ni'a que bönachi queë' para gaca udzë'jali' ca' dza na' huödë' Cristo, cate' ilé'eli' yöl-la' zxön queë'.

¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzölió ni tu'dzaga yudxi Lë', pero libí'ili' runli'-në' bal.

¹⁵ Channö riguí'i rizáqué'ë nu bönni' dzáguië' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö.

¹⁶ Na'a, channö núlöli' riguí'i rizáca'li' tu' dá'ali' Cristo, bití' ral-la' utufí'ili', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibidxín dza isí lahuë' Dios uchi'a usöröë' bönachi rö queë'. Channö zí'aló uchi'a usöröë' rë'u, ¿nácxitërö gaca quégaca nupa bití' túngaca ca rna didza' dxi'a queë' Dios?

¹⁸ Channö naca böniga ulu'lágaca nupa tun le naca dxi'a, ¿nácxitërö gaca quégaca nupa ta'dá'baga' Dios, en tun dul-la'?

19 Caní naca, yugu' bönni' ni ta'guí'i ta'zaquë'ë tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácgaca cazë' lu në'ë Dios, tu' ben cazë' Lë' légaquie', en runë' ca rnna xtídzë'ë.

5

Pedro ruzéajni'inë' nupa ta'yéajlë' Cristo

1 Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzáquë'ë Cristo, ate' guna' ca' tsözxön libí'ili', uzí'iru' xibé yöl-la' zxön na' ilá' lahui.

2 Guli'gaca ca bönni' tu'yúë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca rë'ënë' Dios, en calëga tu' run bayudxi queëli', o tu' rizë ládxi'li' dumí. Guli'gún xichinli' tu rë'ënisili',

3 en calëga tu' rë'ënili' inná bé'esili' nupa na' nagu'ë lu ná'ali'. Guli'gú' ládxi'li' gácali' tu le rulu'í' ca ral-la' ilaca nupa na' run chí'ili'.

4 Caní naca, cate' ulu'í' lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

5 Lësca' caní, bi'i cuidí', guli'gún ca ta'nnë' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nōxaj ládxi' queëli', tu' nazúaj lu guichi lá'ayi le rnna:

Dios ruzáguë'ë xinōzguequi nupa tun ba zxön cúnguequi pero rácalenë' nupa nácgaca nōxaj ládxi'.

6 Guli'sóa nōxaj ládxi' lu në'ë Dios, ate' Lë' uchisë' libí'ili' cate' izá'a dza.

7 Guli'cú'u yúgu'të le run ga ruúbi ruguí'ili' lu në'ë Dios, tu' ru'í' ládxi'ë libí'ili'.

8 Guli'gaca ba'a ládxi', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bēdxi guixi' ribōdxi'aba', riguiljba' nu gáguba'.

9 Guli'gaca tsutsu ca réajlë'ëli' Cristo, en guli'zága' xinōza tu' xihui', tu' nōzili' ta'guí'i ta'záquë'ë böchi' luzá'ali' iduté yōdzölió ni ca na' riguí' rizáca'li' libí'ili'.

10 Ní'irö cate' chigudí'i guzáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxi'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' zuz len Jesucristo.

11 ¡Gácatica'sö yöl-la' ba, en yöl-la' unná bē' queë' Lë'! ¡Ca' gaca!

Pedro ruzenë' didza' nupa ta'dá' Cristo

12 Dídza'do' ni ruzúaja' queëli' lu guichi lu në'ë Silvano. Réquida' náquie' böchi'ru' idú ládxi'. Ré'ënda' utipa' ládxi'li', en runa' ba nalí loli', le nácatë lë ni naca le ruzá' ládxi'ë queëru' Dios. ¡Guli'gaca tsutsu tu' ruzí'ili' xibé lë ni!

13 Yugu' bönachi queë' Cristo nacué' Babilonia tu'gapa Dios libí'ili'. Dios gurö cazë' léguequi ca na' guröë libí'ili'. Lësca' bi'i Marcos rugápabi' Dios libí'ili'. Nácabi' ca xzí'ini caza'.

14 Guli'gapa Dios luzá'ali' tuli' ia'tuli', en lu yöl-la' nadxi' queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJĚ' PEDRO

Pedro rugapě' Dios nupa ta'dá' Cristo

¹ Neda', Simón Pedro, naca' huen dxin queě' Jesucristo, en gubáz nasól-lě'ě Lě'. Rugapa' Dios libí'ili', réajlě'ěli'-ně' Jesús. Lěbisō ca nazáca'gaca yōl-la' réajlě' queěli' Lě', en yōl-la' réajlě' queětu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusólá rě'u, tsahui'.

² Rinábida'-ně' Dios guně' ga gata' queěli' idútě le ruzá' lădxě'ě queěru', en guně' ga soa dxi icja lădxi'do'oli' tu' núnbě'ěli'-ně' Dios, enca' Xanru' Jesús.

Le năcagaca nupa ta'yéajlě' Cristo

³ Lu yōl-la' huăca zxon queě', Dios chibenně' queěru' yúgu'tě le riquíniru' para gata' queěru' yōl-la' na'bán idú, en para gácaru' ba'a lădxi', tu' núnbě'ěru' Nu na' bulidza rě'u para gata' queěru' yōl-la' zxon queě', en le naca tsahui' queě'.

⁴ Tu' runě' caní, beně' ga gaca uzí'iru' xibé yugu' le zxon, en le naca tsahui' guzxi' lu ně'ě gunně' queěru', ate' tu' naca caní nuláru' lu le ruá' dō' raca yōdzōliō ni tu' ta'zě lădxi'gaca bōnachi le cabí naca tsahui'. Nuláru' para gácaru' ca náquiě' Lě cazě' Dios.

⁵ Que lě ni na':

Channō réajlě'ěli' Cristo,
guli'gū' lădxi'li' găcali' dxi'i lădxi'.

Channō chinăcali' dxi'i lădxi',
guli'gū' lădxi'li' gata' ca' queěli' yōl-la' răcada'.

⁶ Channō năpali' yōl-la' răcada',
guli'gū' lădxi'li' innă be'e cuinli'.

Channō rinnă be'e cuinli',
guli'cōza zxon lădxi'.

Channō ribōzali' zxon lădxi',
guli'sóa ba'a lădxi'.

⁷ Channō zóali' ba'a lădxi',
guli'dxi'i luzá'ali'.

Channō nădxi'ili' luzá'ali',
guli'dxi'i ca' yúgu'tě bōnachi.

⁸ Channō caní runli', en zeaj rácarō idú ca runli' caní, lě ni gun ga bití' gaca nítisō yōl-la' réajlě' queěli' Lě', ate' tseaj gácarō idú ca núnbě'ěli'-ně' Xanru' Jesucristo.

⁹ Nu bōnni' bití' ruí' lădxě'ě guně' caní, náquiě' ca tu bōnni' nachul-la nanítie', tu' chizá' ral-la lădxě'ě buně' Cristo lě' tsahui', en bugúě' yugu' dul-la' gubăguě'ě zí'atělo.

¹⁰ Que lě ni na', bōchi' luzá'ado', ral-la' gū'itěro lădxi'li' guéquibe'eli' bulidzě' Dios libí'ili', en gurō cazě' libí'ili'. Channō gunli' caní, bití' ca' ichixi iníguili'.

¹¹ Caní gaca, idú lădxě'ě Dios gúnnasě' queěli' lataj tsázali' ga innă bě'tica'sě' Xanru' Jesucristo, Nu rusólá rě'u.

¹² Que lě ni na' gúntica'sa' ga tsōjněli' yugu' lě ni sal-la' chinōz quézili' le, en rugunli' dxin le naca idútě li na' chiguzxi' lu ná'ali'.

13 Runi neda' ral-la' usubana' ládxi'li' ca nácagaca lè ni tsanni ni zoa' nabana'.

14 Ral-la' guna' caní tu' nözda' si' gátia'. Xanru' Jesucristo chigudxi cazè neda' gaca caní quia'.

15 Que lè ni na' ruí'ida' ládxa'a guna' ga tsöjnética'sili' yugu' lè ni tödi gátia'.

Nupa bila'lé'e yöl-la' zxön queë' Cristo

16 Biti' bé'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödè' Xanru' Jesucristo, napè' yöl-la' unná bè' zxön. Netu' bilé'e quézitu' yöl-la' zxön queë'.

17 Bilé'etu' Lè' cate' Xúziru' Díos benè' Lè' bal, en bè'è' Lè' yöl-la' zxön, ate' biyön chi'è Dios, le birúaj lataj bení' queë', cate' gunné': "Bönni' ni náquiè' Zxí'ina'. Nadxí'ida' Lè', en raza ládxa'a Lè'."

18 Netu' biyön quézitu' chi'è na' le birúaj yehua' yubá cate' ni' guzóalentu'-nè' Xanru' lu guí'a lá'ayi na'.

19 Lè na' guca, naca bè'da' zeaj nácaté didza' gulu'è yugu' bönni' uláz queë' Dios, ate' ral-la' güí'i ládxi'li' didza' na', tu' naca ca tu guí' ruzení' tu ga naca chul-la ga idxintè dza uzení' lu icja ládxi'do'oli' Nu na' naca ca bölaj hui sila queëru'.

20 Lè ni runda' bayudxi tséajni'ili': Cuntu nu bönni', rácasö queë' bití' gaca tséajni'inè' didza' bè'è tu bönni' uláz queë' Dios.

21 Yugu' didza' gulu'è yugu' bönni' uláz queë' Dios bití' ca' gulu'è tu' gulé'èni quézinè', pero gulu'è didza' uláz queë' Dios le guchíziè' Dios Bö Lá'ayi icja ládxi'do'gaquiè'.

2

Ca nácagaca nupa tu'sédinè' le cabí nácaté

1 Yugu' bönni' ta'zí' yè'è gula'cuá'lenè' bönachi Israel, en gula'nnè' nácagaquiè' bönni' tu'è didza' uláz queë' Dios. Lësca' caní yugu' bönni' ila'zí' yè'è ila'cuá'lenè' libí'ili', en ulu'sédinè' libí'ili' le cabí nácaté. Lu yöl-la' sina' quégaquiè' ulu'sédinè' libí'ili' xibá quégacasè' le gun ga soa bönadxi queéli' uca'anali' le naca idútè li. Ila'dá'baguè'è ca' Xanru', Nu busölá rè'u. Le ilunè' gun ga usunítiè' Dios légaquiè'.

2 Zianli' libí'ili' gunli' légaquiè' tsözxön lu le ruá' dö' ilunè', ate' tu' gunli' bál-lali' caní ila'nnè xihui' bönachi que didza' dxi'a le naca idútè li.

3 Lu yöl-la' ruhuidi' quégaquiè' ulu'sédinè' libí'ili' le cabí nácaté, para gata' quégaquiè' dumí queéli'. Chinarugu quégaquiè' bönni' ni, ate' naca löza ila'nítiè' tsaz.

4 Dios bití' buniti lahuè' yugu' gubáz lá'ayi queë' na' gulunè' dul-la', pero gurú'unè' légaquiè' lataj chul-la. Nága'gaquiè' du guíé ga naca chul-la na', ga na' ta'bözè' dza usiúdxè' Dios légaquiè'.

5 Lësca' caní, bití' buniti lahuè' bönachi gula'cuá' dza ni'te cate' gusöl-lè'è nisa guiøj le busuniti yödzölió le beti bönachi nácagaca xihui', pero busölè' Noé lu nisa na', bönni' ni' benè' libán que le naca tsahui'. Dios busölè' ca' ia'gadxi di'a dza queë' Noé na' lu nisa.

6 Lësca' caní, Dios guchúguiè' quégaca bönachi gula'cuá' yödzö Sodoma, en yödzö Gomorra. Busunítiè' léguequi lu guí', ate' bulu'huóaca dö. Le guca quéguequi naca tu le ruluí'i le run gadxi nupa tua' dö'.

⁷ Cate' busunítie' yugu' yödzo na', Dios busölë' Lot, tu bönni' tsahui', lu guí' na'. Bu'ínida' ládxë'ë Lot cate' bilé'enë' le xihui' gulún bönachi tuá' dö' na'.

⁸ Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca.

⁹ Caní naca, Xanru' nözinë' usölë' nupa na' tadxí Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' náccagaca tsahui' ga idxinrö dza ichúguië' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë ládxë'ë le ruá' dö', en ta'dá'baguië' yöl-la' unná bë' queë' Xanru'. Náccagaquië' rugu ladxi', en zidi ladxi'. Bití' tádxinë' tu'lidza ditjë' gubáz lá'ayi ta'dë' lu bení'.

¹¹ Gubáz lá'ayi na' nápagatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni náccagaquië' ca böa' guixi', bití' bi ta'yéajni'iba', pero náljagacaba' para nu sön léggacaba', en guti léggacaba'. Ta'nnë xihuë'ë que le cabí ta'yéajni'inë', ate' ila'nítie' tsaz ca raca quéggacaba' böa' guixi' na'.

¹³ Dios ubi'ë quégaquië' le ila'guí' ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Náccagaquië' ca tu huë' nudzu', en tu le run ditaj cate' ni' tahuë' tsözxön len libí'ili', ate' tu'dzéjanë' tu' ta'zi' yé'enë' libí'ili'.

¹⁴ Lu yöl-la' rizë' ladxi' quégaquië' le ruá' dö' tu'yüë'-nu yugu' nigula. Bití' nacu'ë dxisö túngaquië' dul-la'. Túngaquië' ga ta'chixi ta'nigui nupa bití' náccaga tsutsu ca ta'yéajlë' Cristo. Ta'guíljatica'së' yugu' le tu'huídí'në'. Dios chinuchúguië' quégaquië' ilátigaquië'.

¹⁵ Bulu'cá'anë' le naca idütë' li, ate' nachul-la nanítigaquië'. Tunë' ca benë' Balaam, zxi'inë' Beor, bönni' ni' bidxi'inë' dumí, ate' benë' le ruá' dö' tu' nazxjë'.

¹⁶ Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tu'í' didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Náccagaquië' bönni' ni ca tu buduá' chibuí' i nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la.

¹⁸ Caní náccagaquië' tu' tu'ë didza' yugu' le zxön lu yöl-la' bití' bi nözi quégaquië', en tu'gunë' dxin yugu' le ta'zë ládxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa náccagaca chul-la nítí.

¹⁹ Të' bönachi ila'deli' yöl-la' rusölá, pero léggaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxí'do'gaquië'.

²⁰ Channö bulu'lë' lu le cabí naca tsahui' nacuá' yödzülió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga röjsetë ca le gula'báguë'ë zí'alö.

²¹ Dxi'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'.

²² Chibudxín quégaquië' didza' na' rnna: Ruhuécjaba' bö'cu', ruhuöáguba' le si' gúbaba'. Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ru'í ládxa'a usubana' ládxi'li' ca nácagaca lë ni.

² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusólá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë libí'ili'.

³ Ral-la' tsöjnéli' lë ni naca lo. Dza tsöjsétëgaca ulu'lu'í lahuë' bönni' ilunë' le ta'zë ládxe'ë le ruá' dö'.

⁴ Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza."

⁵ Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láchui'lö nisa.

⁶ Len nisa ca' busunítië' Dios yödzölió dza ni'te cate' ni' gusöl-lë'ë nisa guió'j le beti yugu' bönachi dul-la'.

⁷ Lúzxiba, en yödzölió ni le nacua' na'a dza, Dios nucu'ë léguequi ga idxinrö dza usunítië' léguequi lu guí. Caní gaca tu' gunné' caní Dios caz. Uzégu'ë léguequi dza ni' ichúgu'ie' quégaca bönachi biti' nácagaca tsahui' gátigaca.

⁸ Biti' gal-la' ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza.

⁹ Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'í ládxi'gaca yúgu'të bönachi.

¹⁰ Tsálido'os idxín dza huödë' Xanru' ca ridxinë' tu bönni' gubán chí'i dzö'ölö. Lu dza na' huadödi que lúzxiba len tu bö zxön. Ila'niti yúgu'të le nacua' lu guí' zxön. Ila'yegui yödzölió ni, en le nacua' yödzölió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios.

¹² Ral-la' cözali' dza huödë' Xanru', en gü'í ládxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacua' ni lu guí'.

¹³ Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribözali' yugu' lë ni, guli'gü' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë queëli', en cözali' dxí'ado' cate' idxinrö dza ni'.

¹⁵ Ral-la' inözili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queëli' lu guichi, zóalen lë' yöl-la' réajni' na' bë'ë Xanru' queë'.

¹⁶ Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú ládxi'gaquië'. Lësa' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lë ni, böchi' luzá'ado'. Que lë ni na' guli'gún chí'i cuinli', para cabí ila'z'í ye'e bönachi biti' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo.

¹⁸ Guli'güi' ládi'li' gácarö idú ca núnbě'ëli'-ně' Xanru' Jesucristo, Nu rusóla rě'u, ate' ruzí'ili' xibě'. ꞑYól-la' ba Lě' na'a dza, en yúgu'tě dza zá'gaca! ꞑCa' gaca!

DÍDZA'DO' ZÍ'ALÖ BUZÚAJË' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bëë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi.

² Bönni' na' nabánigaca bönachi buluí'lahuë', ate' bilé'etu' Lë'. Runtu' ba nalí queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í'lahuë' ga zóaru'.

³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Xzí'inë' Dios.

⁴ Ruzúajtu' queëli' lu guichi lë ni para gaca udzëjaru' idú ládxi'ru'.

Dios náquië' bení'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la' que dul-la' biti' zóalen Lë'.

⁶ Channö innaru': "Nácaru' tuz len Dios", pero channö runru' le naca chul-la' que dul-la', lë ni naca bë' rizí' yé'ëru', en biti' runru' le naca idütë li.

⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Xzí'inë' Dios ruún rë'u dxi'a, en rugúa yúgu'të dul-la' nabágaru'.

⁸ Channö rna: "Biti' bi dul-la' runru'", rizí' yé'ëru' la' cuínsiru', en biti' nazí' lu ná'aru' le naca idütë li.

⁹ Channö ixóalëpiru' lahuë' Dios dul-la' nabágaru', Lë' runë' ca rnnë', en náquië' tsahui'. Uniti lahuë' dul-la' nabágaru', en únë' rë'u tsahui', ugüë' yúgu'të le ruá' dö' dzaga rë'u.

¹⁰ Channö innaru': "Biti' bi dul-la' nabágaru'", naca ca innaru': "Dios rizí' yé'ë", ate' biti' runru' ca rna xtídzë'ë.

2

Cristo náquië' Nu rudödi xtídzaru' lahuë' Dios

¹ Libí'ili', xzí'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'.

² Naca cazë' Bönni' budödi cuinë', en gútië' para bugüë' dul-la' nabágaru' lahuë' Dios. Calégasö gútië' para bugüë' dul-la' nabágaru' rë'u, pero gútië' ca' para bugüë' dul-la' nabágaru' gaca bönachi idütë yödzölió.

³ Channö runru' ca naca le gunná bé'enë' rë'u, nõziru' chinúnbë'ëru' Lë'.

⁴ Nu rna: "Neda' núnbë'a-në' Dios" pero biti' run ca rinná bë' xibá queë', nu ni rizí' yë', en biti' run le naca idütë li.

⁵ Nu run ca rna xtídzë'ë Dios, le nácatë nadxi'í nu ni Dios ca ral-la' gun. Channö runru' caní, nõziru' néquiru' queë' Dios.

⁶ Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyönili' dza ni'te.

⁸ Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridödi que le naca chul-la que dul-la', ate' bení' idú chiruzení'.

⁹ Nu rnna: "Zoa' lu bení'", pero biti' rilé'e dxi'a böchi' luzë'e, nu ni ni run le naca chul-la que dul-la'.

¹⁰ Nu nadxí'i böchi' luzë'e zoa lu bení', ate' le run ga nu ichixi inigui biti' zóalen nu na'.

¹¹ Le naca chul-la que dul-la' run ga nu biti' rilé'e dxi'a böchi' luzë'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queëli' lu guichi, zxfí'ina'do', tu' chibunít lahuë' Dios dul-la' nabága'li', tu' runë' le guzxi' lu në'ë gunë'.

¹³ Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queëli' lu guichi, zxfí'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Biti' idxí'isili' yödzölió ni, en calëga le dë yödzölió ni. Channö zoa nu nadxí'i yödzölió, biti' nadxí'i Dios Xuz.

¹⁶ Caní naca, tu' naca le tun bönachi yödzölió ni le cabí rë'ënë' Dios Xuz, pero naca le té'ëni bönachi yödzölió ni.

Tunë' le riyaza ladxí' yöl-la' bönáchisö quégaquië'.

Tunë' le ruá' dö' le ridani guiöj lógaquië'.

Tun ba zxon cuíngaquië' ni'a que le dë quégaquië'.

Caní náca gaca le ruá' dö' tunë'.

¹⁷ Huadödi que yödzölió ni, enca' que le ta'zë ladxí'gaca bönachi, pero nu run ca rë'ënë' Dios sóatica'sö.

Nu ruí'i didza' idütë li, en nu rizí' yë'

¹⁸ Zxfí'ina'do', chizóaru' dza údxi, en ca na' chibiyönili' huidë' bönni' ridá'baguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi.

¹⁹ Bila'rúajë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' biti' náca gacaquië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të'.

²¹ Buzúaja' queëli' lu guichi, tu' chinözili' le naca idütë li, en calëga tu' cabí nözili' le. Nözili' ca' biti' ca' rizí' yë' nu nözi le naca idütë li.

²² ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxí'inë' Dios.

23 Núti'tës nu ridá'baga' Dios Zxí'ini, biti' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxí'inë' Dios, lësca' zóalenë' Dios Xuz nu na'.

24 Na'a, guli'gü' lataj le biyönili' dza ni'te ugá'analentica'sö libí'ili'. Channö le biyönili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxí'ini, enca' len Dios Xuz.

25 Le guzxi' lu në'ë Dios naca lë ni: Gunnë' gunnë' yöl-la' na'bán idú queëru'.

26 Chibuzúaja' queëli' lu guichi lë ni ca naca quegaca nupa ta'zì' ye'e libí'ili'.

27 Na'a, zóalenë' Dios Bö' Lá'ayi libí'ili'. Cristo gusól-lë'ë Lë' queëli', ate' Lë' cazë' zóalentic'a'së' libí'ili'. Que lë ni na' biti' riquinili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en biti' rizi' yë'ë. Ca na' chinazëdali', guli'sóalentic'a'së' Cristo.

28 Na'a, zxi'ina'do', guli'sóalentic'a'së' Cristo para cate' ulu'i lahuë' Lë', gácaru' rugu ladxi', en biti' utu'iru' sóaru' lahuë' Lë' cate' huödë'.

29 Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácgaca zxi'inë' Dios.

3

Nupa nácgaca zxi'inë' Dios

1 Buli'yú ca nadxi'ide'enë' Dios Xuz rë'u, benë' ga nazí'i laru' zxi'inë' Dios caz. Que lë ni na' bönachi yödzölió ni biti' ca' núnbe'gaca le nácaru', tu' cabí gulúnbe'e Jesús.

2 Böchi' luzá'ado', na'a chinácaru' zxi'inë' Dios, en biti' naca bé'eni le ral-la' gácaru'. Nöziru' cate' ulu'i lahuë' Jesús, gácaru' ca náquië' Lë', ate' ilë'ru' -në' catëz náquië' Lë'.

3 Núti'tës nu run löza gaca ca náquië' Jesús, ru'i ladxi' nu na' gaca dxi'a ca na' náquië' Jesús dxi'a.

4 Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.

5 Nözili' bulu'i lahuë' Jesús para bugúë' dul-la' nabága'ru', en biti' bi dul-la' runë' Lë'.

6 Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'.

7 Zxi'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'.

8 Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'i lahuë' Zxi'inë' Dios, para usunítië' yugu' le nun tu' xihui'.

9 Núti'tës nu naca zxi'inë' Dios biti' rúntica'sö dul-la', tu' zóalentic'a'sö le guzxi' lu në'ë Dios Xuz nu na'.

10 Caní naca bë' nupa nácgaca zxi'inë' Dios, en nupa nácgaca zxi'ini tu' xihui'. Núti'tës nu biti' run le naca tsahui', en biti' nadxi'i böchi' luzë'e biti' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

11 Lë ni naca didza' biyönili' dza ni'te, le rnna: Ral-la' idxí'iru' luzá'aru' turu' ia'turu'.

12 Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Bõcha'ado', biti' ubánili' channõ cabí ta'lé'e bõnachi yõdzõlió ni libí'ili' dxi'a.

¹⁴ Nõziru' chigudõdiru' lu yõl-la' guti, en chidé yõl-la' na'bán idú queëru' tu' nadxí'iru' yugu' bõchi'ru'. Nu biti' nadxí'i bõchi' luzé'e, chinatí caz nu na'.

¹⁵ Núti'tës nu biti' rilé'e dxi'a bõchi' luzé'e, naca huëti bõnachi nu na', ate' nõzili' nu ruti bõnachi biti' dë yõl-la' na'bán idú que.

¹⁶ Caní núnbë'ëru' yõl-la' nadxí'i le naca idú. Naca ca budödë' Jesús yõl-la' na'bán queë', en gútië' uláz queëru'. Lësca' caní rë'u ral-la' udõdiru' yõl-la' na'bán queëru', para gácalenru' yugu' bõchi'ru'.

¹⁷ Na'a, núti'tës nu dë yõl-la' tsahui' que, lë na' dë yõdzõlió ni, ate' rilé'e bõchi' luzé'e, bi riyadzaj queë', en biti' ruhuéchi' ladxí' lë', bi unõdzaj queë', ¿naru' nadxí'itsõ nu na' Dios?

¹⁸ Libí'ili', zxí'ina'do', ral-la' idxí'iru' luzá'aru', calëga len dídza'sõ o lu yõl-la' rinnësõ queëru', pero idú ladxí'ru', enca' len idútë yõl-la' run queëru' ral-la' idxí'iru' luzá'aru'.

Le runru' lõza lahuë' Dios

¹⁹⁻²⁰ Channõ caní nadxí'iru' yugu' bõchi' luzá'aru', nõziru' néquiru' que Nu na' naca idútë li, ate' lahuë' Dios huáca cõ' dxi icja ladxí'do'oru' channõ ruxõsa ladxí'do'oru' rë'u, tu' rácada'arë' Dios ca ladxí'do'oru', ate' Lë' nõzinë' yúgu'të.

²¹ Bõchi' luzá'ado', channõ cabí ruxõsa ladxí'do'oru' rë'u, dë le runru' lõza lahuë' Dios

²² tu' nõziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ladxë'ë Lë'.

²³ Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bé'enë' rë'u.

²⁴ Zóalen Dios nu run ca rinná bë' xibá queë', ate' Dios caz zóalenë' nu na'. Caní nõziru' dzágatica'së' Lë' rë'u, tu' chigusõl-lë'ë Dios Bõ' Lá'ayi queëru'.

4

Le naca bë' zóalenë' Dios Bõ' Lá'ayi rë'u

¹ Bõchi' luzá'ado', biti' tséajlë'ëli' núti'tës bõnni' rnnë' zóalenë' Dios Bõ' Lá'ayi lë', pero guli'sí' bë' bõnni' na', channõ zóalenë' Dios Bõ' Lá'ayi lë', tu' ta'dë' zían bõnni' ta'zí' yë'ë yõdzõlió ni. Ta'nnë' tu'ë didza' uláz queë' Dios.

² Caní gúnbë'ëli'-në' nu bõnni' zóalenë' Dios Bõ' Lá'ayi lë'. Nequi queë' Dios bõnni' na' rnnë' yálajdo' ca bidë' Jesucristo, Nu gusõl-lë'ë Dios, rnnë' guca cazë' bõnachi.

³ Lësca' caní, biti' nequi queë' Dios nu bõnni' biti' rnnë' yalaj lulu ca bidë' Jesucristo, rnnë' biti' guca cazë' bõnachi. Bõnni' ni néquinë' que nu na' ridá'baga' Cristo, bõnni' na' chibiyõnili' ral-la' guidë', ate' na'a chiridë' yõdzõlió ni.

⁴ Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparõ Nu na' zóalen libí'ili' yõl-la' huáca unná bë' ca nu na' ridá yõdzõlió ni.

⁵ Légaquië' nácagaquië' bõnachi yõdzõlió. Que lë ni na' tu'ë didza' que le naca que yõdzõlió, ate' bõnachi yõdzõlió ni tu'zë nágagaca légaquië'.

6 Néquiru' rë'u queë' Dios. Nu nunbë' Dios ruzë nagui rë'u. Nu biti' nequi queë' Dios biti' ruzë nagui rë'u. Caní núnbë'ëru' nu na' yu'u le Bö ru'i didza' le naca idütë li, enca' nu na' yu'u le tu bö' rizí' yë'.

Náljalén Dios yöl-la' nadxí'i

7 Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' nútí'tës nu nadxí'i luzë'e náljalén ca' Dios, en núnbe'e Dios.

8 Nu biti' nadxí'i luzë'e, biti' núnbe'e Dios, tu' náljalén Dios yöl-la' nadxí'i.

9 Caní bulu'e lahui Dios ca nadxí'inë' rë'u, gusól-lë'ë la's dui Zxí'ini cazë' yödžölió ni, para gata' yöl-la' na'bán idú queëru' ni'a queë' Lë'.

10 Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'ë Zxí'ini cazë' para gútië', en caní bugüë' dul-la' nabága'ru'.

11 Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'.

12 Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'.

13 Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö Lá'ayi rë'u.

14 Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxí'ini cazë' Nu rusöla' bönachi yödžölió.

15 Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

16 Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzë'ë, zóalenë' bönni' na' Dios, ate' Dios zóalenë' lë'.

17 Caní run dxin yöl-la' nadxí'i lu icja ladxí'do'oru', run ga bití'rö rádxiru' dza ichúguië' Dios quegaca bönachi ilátigaca. Ca náquië' Jesús, nácaru' ca' rë'u yödžölió ni.

18 Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ladxí'ru', runë' ga bití' rádxiru'. Nu radxi, riguf'i rizáca'a. Nu na' radxi, bití' nadxí'i Dios idú ladxí'.

19 Rë'u ni nadxí'iru'-në' Dios, tu' zí'alö bidxí'i quezinë' Lë' rë'u.

20 Channö nu inná: "Neda' nadxí'ida'-në' Dios", pero bití' rilé'e dxi'a böchi' luzë'e, nu ni rizí' yë'. Nu bití' nadxí'i böchi' luzë'e nu rilé'e caz, žnacxi caz gaca idxí'i Dios, en catu caz bilé'e Lë'?

21 Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë'e.

5

Ca gaca idéli'ru' lu le raca queëru' yödžölió ni

1 Nútí'tës bönni' réajlë'ë Jesús náquië' Cristo, náquië' zxí'inë' Dios, ate' nútí'tës bönni' nadxí'inë' Dios Nu buzóa lë', ral-la' idxí'inë' ca' luzë'ë nu naca bi'i queë' Dios.

2 Caní réquibe'eru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u.

3 Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u bití' naca böniga.

4 Nútí'tës bönni' náquië' bi'i queë' Dios ridéli'në' lu le raca yödžölió ni. Chibidéli'ru' lu le raca yödžölió tu' réajlë'ëru'-në' Dios.

5 ¿Nuzxi na' rideli' lu le raca yödžölió? Run caní nu réajlë' náquië' Jesús Zxí'inë' Dios.

Dios Bō' Lá'ayi runē' ba nalí queē' Cristo

⁶ Caní blē'ē Jesucristo. Bidē' bidilē' nisa, en bulaljē' xichōnē'. Calēgasō bidilē' nisa, pero lēscā' bulaljē' xichōnē'. Dios Bō' Lá'ayi náquiē' Nu run ba nalí queē', tu' naca idútē li didza' ru'ē Dios Bō' Lá'ayi.

⁷ Tsonna nupa tun ba nalí queē' Jesús yehua' yubá ni', Dios Xuz, en Dios Zxí'ini, lē' ca' Didza', en Dios Bō' Lá'ayi. Yonnē' ni nácagaquiē' tuz.

⁸ Lēscā' caní, tsonna le tun ba nalí queē' luyú ni, ca na' zóalenē' Dios Bō' Lá'ayi Lē', en le bidilē' Jesús nisa, en rōn ni' bulaljē' lē'e yaga cruz, ate' yonna ni, tuz ca ta'nná.

⁹ Channō si' lu ná'aru' le tun ba nalí bōnachi, le runē' ba nalí Dios nácaterō lesaca'. Lē na' benē' ba nalí Dios naca le benē' ba nalí queē' Jesús, gunnē' náquiē' Zxí'ini cazē'.

¹⁰ Nu réajlē' Zxí'inē' Dios, nazí' lu nē'e le nunē' ba nalí Dios. Nu cabí réajlē' Dios, naca ca rna nu na': Dios rizí' yē'ē. Caní naca, tu' cabí guyéajlē' le benē' ba nalí Dios queē' Zxí'inē'.

¹¹ Lē ni naca le benē' ba nalí Dios. Gunnē' chibennē' yōl-la' na'bán idú queēru', ate' Zxí'inē' na' náquiē' Nu nabániru' caní.

¹² Nu bōnni' zóalenē' Zxí'inē' Dios lē', dē yōl-la' na'bán idú queē'. Nu bōnni' bití' zóalenē' Zxí'inē' Dios lē', bití' dē yōl-la' na'bán idú queē'.

Ca nōziru' dē yōl-la' na'bán idú queēru'

¹³ Libí'ili' na' réajlē'ēli'-nē' Zxí'inē' Dios, ruzúaja' queēli' lu guichi lē ni para inōzili' chidē yōl-la' na'bán idú queēli', en para gaca idú ca réajlē'ēli'-nē' Zxí'inē' Dios.

¹⁴ Lē ni naca le ruzxōni ládxi'ru' Lē'. Channō bi inábiru' Lē' ca ré'ēnē' Lē', Lē' riyōnnē' rē'u.

¹⁵ Channō nōziru' riyōnnē' rē'u ca naca bi rinábiru' Lē', nōziru' ca' idelí' quéziru' lē na' rinábaru'.

¹⁶ Channō ilé'eru' bōchi' luzá'aru' runē' dul-la' le cabí nachē' yōl-la' guti, ral-la' inábaru' queē' lahuē' Dios, ate' Lē' unōdzjē' yōl-la' na'bán queē'. Caní rnníā': Ral-la' inábalí' quégaca nupa tun dul-la' le cabí nachē' yōl-la' guti. Dē dul-la' le nachē' yōl-la' guti. Bití' rnníā' inábalí' que nu run dul-la' caní.

¹⁷ Yúgu'tē le cabí naca tsahui' naca dul-la', pero dē dul-la' le cabí nachē' yōl-la' guti.

¹⁸ Nōziru' bití' rúntica'sō dul-la' nu naca zxi'inē' Dios, tu' rapa chi'ē Zxí'ini cazē' Dios nu na', ate' tu' xihui' bití' sequi' bi gun que.

¹⁹ Nōziru' yú'uru' lu nē'ē Dios, ate' yúgu'tē bōnachi tu'í ládxi'gaca le dē yōdzōlió ni yú'ugaca lu na' tu' xihui'.

²⁰ Na'a, nōziru' chibidē' Zxí'inē' Dios, en bennē' yōl-la' réajni' queēru', para gúnbē'ēru' Nu na' naca idútē li. Zóalenru' Nu na' naca idútē li tu' zóalenru'-nē' Jesucristo, Zxí'inē' Dios. Nu ni naca Dios idú, en Nu runna yōl-la' na'bán idú queēru'.

²¹ Zxí'ina'do', guli'gún chi' cuinli' para cabí tseaj ládxi'li' yugu' budó' guiōj budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

¹ Neda', bönni' gula run chí'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxí'ida' libí'ili' tu' núnbě'ëru' le naca idútë li, en calégasö neda', pero lësca' yúgu'të nupa chinúnbě'gaca le naca idútë li ta'dxí'i libí'ili'.

² Nadxí'itu' libí'ili' tu' núnbě'ëru' le naca idútë li, le zóalenticá'sö rë'u.

³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' ládxe'ë queë'li', en huéchi' ládxe'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

⁴ Budzéjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u.

⁵ Na'a, ráta'yua' lo', nigúlado', gunu' ca rinná bé' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'.

⁶ Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

Nupa të'ëni ila'z'i ye'e rë'u

⁷ Lë ni rigúixjöi'ida' libí'ili', tu' chita'dá zían nupa ta'z'i yë' yödzülió ni, nupa na' biti' ta'z'i lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo.

⁸ Guli'gún chí'i cuinli' para cabí initi le nadé'li'li' tu' guzxi' lu na'li' Cristo, pero guli'gúif ládxi'li' idé'li'li' idútë le ral-la' sí'ili' lu në'ë Dios.

⁹ Núti'tës nu riguela' nöza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'.

¹⁰ Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guië'li' le: "Guyú'u len netu'."

¹¹ Nu rë le: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zían ral-la' uzúaja' queë'li' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzéjaru' idú ládxi'ru'.

¹³ Zxi'ininu nigula zxi'lu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bönni' lě' Gayo

¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbě'ëru' le naca idútě li.

² Bõcha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bö' naca cazu'.

³ Rudzėjada' tu' ta'dxině' yugu' bõchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li.

⁴ Biti' bi dě le runrõ ga rudzėjada' ca lě ni, riyõnda' tun nupa nácagaca ca bi'i que caza' ca rna le naca idútě li.

⁵ Bõcha'ado', runu' le naca tsahui', rácalenu' bõchi'ru', en runu' ca' le nácáro lesaca', rácalenu' bõchi'ru' bití' núnbe'enu' légaquiě'.

⁶ Yugu' bõchi'ru' ni tuně' ba nalí quiu' lógaca bönachi queë' Cristo ni, ta'guíxjõ'ě ca na' nadxi'inu' légaquiě'. Runu' le naca dxi'a, rugú'u légaquiě' nõza, en rácalenu' légaquiě' ca na' sa'yéaj gunu' quégaca nupa tun xichiné' Dios, para ulu'ú'ě nõza.

⁷ Légaquiě' bila'rúajě' ni tu' nadxi'igaquiě' Jesús, en bití' bi ta'zi'ě lu ná'agaca bönachi bití' ta'dá' Cristo.

⁸ Que lě ni na' ral-la' gunru' bal bönachi tun caní, para gúnlenru' légaquiě' dxin que le naca idútě li.

Le cabí naca tsahui' runě' Diótrefes

⁹ Chibuzúaja' lu guichi le uzéajni' i bönachi queë' Cristo ni', pero Diótrefes, bönni' ni' raza ládxxě'ě gáquiě' lo ládjagaquiě', bití' runě' netu' bal.

¹⁰ Que lě ni na', channõ huida' ga zóali', usá'a ládxi'li' cate' udúbili' ca nácagaca le runě'. Rizí' quídzě'ě netu', en rnně' queëtu' le cabí nácate. Bití' rixxõn ládxxě'ě tsa lě nisõ, pero lěsca' bití' runě' bal bõchi'ru' ta'dxině' ni', ate' ruzáguě'ě xinõzguequi nupa ni' tě'ěni ilún légaquiě' bal, en rubéajě' nupa na' ladaj bönachi queë' Cristo.

¹¹ Bõcha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbě' Dios.

Le naca tsahui' runě' Demetrio

¹² Yúgu'tě bõchi'ru' tuně' ba nalí queë' Demetrio, ate' naca bě' runě' le naca idútě li. Lěsca' netu' runtu' ba nalí queë', ate' nõzilí' nácate lě ni runtu' ba nalí queë'.

Le rinabě' Juan lahuě' Dios

¹³ Ziánrõ ca' le gú'unida' uzúaja' quiu' lu guichi, pero bití' rě'ěnda' uzúaja' le lu guichisõ.

¹⁴ Na'a, runa' lõza ilé'eteda' li', ate' güi'iru' didza' ruá'a cuinru'.

¹⁵ Rinábida'-ně' Dios guně' ga soa dxi icja ládxi'do'o. Nupa ni ta'dxi'i rě'u tu'gapa Dios li'. Lěsca' li', bugapa Dios tu tu nupa ni' ta'dxi'i rě'u. ¡Ca' gaca!

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

¹ Neda', Judas, tsaz naca' huen dxin queě' Jesucristo, en naca' ca' bōchě'ě Jacobo. Rugapa' Dios libí'ili', nulidzě' Dios Xuz libí'ili', en nadxí'ině' libí'ili', en rapa chí'ě libí'ili' tu' nácali' tuz len Jesucristo.

² Rě'enda' inōzili' ca ruhuéchi'da' lădxě'ě Dios libí'ili', en nadxí'ide'eně' libí'ili', enca' ruzóadě'ě dxi icja lădxi'do'oli'.

Nupa tu'sedi le cabí nácatě

³ Libí'ili', bōchi' luzá'ado', gúcada' lădxa'a uzúaja' queéli' lu guichi ca naca yōl-la' rusólá nadéli'ru', pero run bayudxi uchízia' icja nágalí' para idú lădxi'li' tıl-lalenli' nupa ta'dá'baga' le réajlě'ěru'-ně' Dios, lě na' budōdě' Dios tsaz lu ná'agaca nupa néquiquequi quez queě' para ulu'zě didza' que lógaca yúgu'tě bōnachi.

⁴ Caní run bayudxi guna' tu' bagáchi'sō chigula'yáزالeně' bal-lě' bōnni' rě'u, Dios buzóě' quégaquiě' dza ni'te ichúguiě' quégaquiě' ila'nítiě' tsaz. Biti' ta'yéaj lădxi'gaquiě' Dios bōnni' caní. Tu' zoa le ruzá' lădxě'ě Dios queěru', téquině' huáca iluně' le ruá' dō'. Ta'dá'baguě'ě Xanru' Jesucristo. Tuzě' Lě' rinná bé'eně' rě'u.

⁵ Chinóz quézili' lě ni, pero rě'enda' usá'a lădxi'li' ca beně' Xanru' Dios. Sal-la' busólě' bōnachi Israel cate' bubéajě' léguequi luyú Egipto, gudōdi ni' busunítiě' nupa bitsa'gaca lădjaquequi, en biti' gula'yéajlě' Lě'.

⁶ Lěsca' caní, yugu' gubáz lá'ayi queě' Dios, nupa ni' biti' gulún xichíngaqiě', pero bulu'cá'aně' xilátjagaquiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrō dza usiúdxě' Dios yōdzōlió ni.

⁷ Lěsca' caní guca quégaca yōdzō Sodoma, en yōdzō Gomorra, enca' yugu' yōdzō dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bōnni' yugu' lu yōdzō na'. Bulu'dōdi cuíngaqiě' para guluně' le ruá' dō', en le gula'zěsō lădxi'gaquiě' le tun ga nu rutuí. Ná'a, tu' busaca' zi'ě Dios légaquiě' lu gu' le cabirō ulu, lě na' guca quégaquiě' naca tu le run gadxi yúgu'těru', para cabí gunru' la' lěbisō.

⁸ Sal-la' gulaca lě ni, la' canísō tuně' bōnni' ni, bōnni' rōjácaleně' yěla ta'néně'. Tun dítjaně' idútě le naca cazě'. Ta'dá'baguě'ě le rinná bé'eně' Dios rě'u, en ta'nně' zi'ě quégaca nupa ta'nná bě' yehua' yubá.

⁹ Miguel caz, gubáz lá'ayi lo, cate' gudıl-laleně' tu' xihui' para gaca u'ě idú le naca cazě' Moisés, biti' burúguině' udxíě' dō' tu' xihui' na', pero gudxě' le: "Xanru' uzeně' li' bach."

¹⁰ Yugu' bōnni' ni ta'nně' zi'ě quégaca le runě' Dios, yugu' le biti' ta'yéajni'ině', ate' yugu' le ta'yéajni'ině' rácasō quégaquiě' ca na' tunba'bōa' guixi' biti' ta'yéajni'iba', lě ni tu'guně' dxin, en caní tu'dxía dō' cuíngaqiě'.

¹¹ Bica' bayechi' légaquiě' tu' chiguluně' dul-la' ca na' beně' Caín, ate' lu yōl-la' ruhuidi' quégaquiě' chigula'chixi gula'níguině' ca na' guchixi guníguině' Balaam para si'ě dumí, ate' chinarugu quégaquiě' ilátie' ca na' gútiě' Coré cate' gudá'baguiě' Moisés.

¹² Yugu' bōnni' ni tágułeně' tsōzxōn libí'ili' cate' ráguli' yugu' gúfi' huagu lu yōl-la' nadxí'i queéli'. Tuně' ga ta'chixi ta'nigui nupa dzágagaca libí'ili', tu' tē'aj tagu lizě'. Nácaagaquiě' ca yugu' bōnni' ral-la' ulu'gágugaquiě'-ba'

bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba bití' naché'gaca nisa, ate' ruá' bö' léguequi ná'aló ní'iló. Nácagaquië' ca' ca yugu' yaga chibidxín dza bi ila'bía, pero bití' bi ta'bía. Nácagaquië' ca' ca yugu' yaga chigula'bidxi idú luí, en chinaládzu'gaca.

¹³ Nácagaquië' ca' ca nísado' cate' riyasa ridxía, ate' ribó' bidxina' que, lë na' ruluí' ca naca yöl-la' stu' tunë'. Nácagaquië' ca yugu' böljaj lúzxiba nucá'anagacaba' xinözgacaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' xzí'ni xi'sóë' Adán. Gunnë': "Buli'yútsöca', zë'ë Xanru', ate' dzágagaca Lë' zían gayuá' bönachi néquiguequi quez queë'.

¹⁵ Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zí' gula'nnë' bönni' dul-la' na' queë' Lë'.

¹⁶ Yugu' bönni' caní ta'nnë' queë', en ta'zí' quídzë'ë, en tunë' ca naca le ta'zësó ládxi'gaquië'. Tu'ë didza' lu yöl-la' run ba xön cuíngaqüië', en para ulu'zi'ë xibéguqui, tu'ë didza' le ta'gú'u bönachi yöl-la' xön.

Judas rus'ë ládxi'gaca nupa ta'yéajlë' Cristo

¹⁷ Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te.

¹⁸ Yugu' bönni' na' gulë' libí'ili': "Yugu' dza tsöjsétëgaca ulu'lufí' lógaquië' bönni' ulu'titjé' le naca lá'ayi, en ilunë' ca naca le ta'zësó ládxi'gaquië' le ruá' dö'."

¹⁹ Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en bití' zóalenë' Dios Bö' Lá'ayi légaquië'.

²⁰ Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi.

²¹ Buli'gá'analenë' Dios, Nu nadxí'i rë'u, en guli'cöza dza ni' ulu'í' lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queëru'.

²² Guli'gún ga ila'dipa ládxi'gaca nupa raca chopá ládxi'gaca.

²³ Guli'gún ga ulu'lé', le gaca tsca ubéajli' légaquië' lu guí'. Lu yöl-la' radxi queéli' buli'huéchi' ládxi'li' ia'zica'rö bönachi. Guli'gún chí' cuinli', para cabí gunli' tsözxön légaquië', en cabí gútsa'li' le ruá' dö' tunë'.

Le rigú'uru' Dios yöl-la' xön

²⁴⁻²⁵ Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chí'ë libí'ili', para cabí ichixi iníguilí', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' xön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULU'INĒ' DIOS JUAN Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bē'ē Lē' lataj Dios ulu'finē' yugu' huen dxin queë' ca naca le run bayudxi ilácatē. Jesucristo gusól-lē'ē tuē' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'finē' neda' ca naca lē ni.

² Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtídzē'ē Dios, en que le benē' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zē nágagaca nu na' ulaba xtídzē'ē Dios ni, en ilún ca rnna lē ni nazúaj lu guichi, tu' chizóa gaca.

Juan ruzúajē' le uzéajni'i gadxi cō' bōnachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cō' bōnachi queë' Cristo nacua' luyú Asia. Dios, Bōnni' zoa cazē', en guzóatica'sē', en ral-la' huödē', rinábida'-nē' uzá' ládxi'ē queéli', en gunē' ga cō'ō dxi icja ládxi'do'oli', ate' dzágagaca gadxi bō' Lē' nacua' lahuē' Lē' ga ni' rō'ē rinná bē'ē.

⁵ Dzáguiē' ca' Jesucristo Lē'. Jesús ni runē' ca rnnē', en runē' ba nalí queë' Dios. Zí'alō Lē' bubanē' tsaz lu yōl-la' guti, en rinná bé'enē' bōnni' ta'nná bē'ē yōdzolió ni. Lē' nadxí'inē' rē'u, en gudibē' rē'u, tu' bugúē' dul-la' nabága'ru' len xichōnē' le bulaljē' lē'e yaga cruz, cate' gútiē' uláz queēru'.

⁶ Jesucristo benē' ga rinná bē'ēru', en ga nácaru' yugu' bixúz, para cú'uru'-nē' Dios, Xuzē' Jesús, yōl-la' ba. ¡Yōl-la' ba Lē', en gácatica'sō queë' yōl-la' unná bē'! ¡Ca' gaca!

⁷ ¡Buli'yútsōca'! ¡zē'ē Cristo lu bōaj lúzxiba! ¡ila'lé'e Lē' yúgu'tē bōnachi, enca' nupa ni' gulún Lē' huē', en bétigaca Lē'! ¡ila'bōdxi yechi' yúgu'tē bōnachi yōdzolió ni cate' ila'lé'e Lē'! ¡La'tu' gácatē caní! ¡Ca' gaca!

⁸ Caní rnnē' Lē': "Neda' naca' Bōnni' zoē' zí'alō, enca' Bōnni' rōjsétiē' ca naca le risí lo, en le ruúdxitē." Caní rnnē' Xanru', Bōnni' napa cazē' yōl-la' huáca. ¡Zoa cazē' Lē', en guzóatica'sē', en si' ulē'ē!

Rilé'enē' Juan yōl-la' zxōn queë' Jesucristo

⁹ Neda', Juan, naca' bōchi' luzá'ali', en tsōzxōn riguí'i rizáca'lena' libí'ili', en tsōzxōn len libí'ili' ruzi'a xibé le rinná bē'ē Dios, en nadéli'da' yōl-la' ribōza zxōn ladxí' na' rnnē' Jesucristo queēru'. Nadzuna' tu luyú bidxi ni gatsaj láhui'lō nísado', nazí'i le Patmos. Nadzuna' tu' bena' libán que xtídzē'ē Dios, en tu' bena' ba nalí queë' Jesucristo.

¹⁰ Lu dza lá'ayi queë' Xanru', guzóalenē' Dios Bō' Lá'ayi neda', ate' biyōnda' cúdzula' chi'ē tu bōnni' rulidzē' zidzaj. Biyōn chi'ē ca ribōdxi lúzuba' bōa' bēdxi.

¹¹ Bōnni' ni gudxē' neda': "Neda' naca' Bōnni' zoē' zí'alō, en Bōnni' rōjsétiē' ca naca le risí lo, en le ruúdxitē. Buzúaj lu guichi le riyōnnu', en rilé'enu', ate' gusól-la' le quéguequi gadxi cō' bōnachi quia' nacua' luyú Asia, nupa nacua':

Lu yödzo Éfeso,
 lu yödzo Esmirna,
 lu yödzo Pérgamo,
 lu yödzo Tiatira,
 lu yödzo Sardis,
 lu yödzo Filadelfia,
 lu yödzo Laodicea.”

¹² Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiquequini oro.

¹³ Ladaj gadxi le nuá'gaca guí' na' bilé'eda' tu Bönni' rinë'ë ca tu bönni'. Nácüë' tu lari' tunna le ridxín xini'ë, en luchu'ë nasíë' tu le néquini oro.

¹⁴ Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiøj lahuë' ca guí'.

¹⁵ Rëpi yösa bení' ni'ë ca guíë bronze dxíldo', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön.

¹⁶ Lu në'ë ibëla xzóagacaba' gadxi böljaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'.

¹⁸ Naca' Nu nabán caz. Gútia', ate' na'a zóaticá'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca.

¹⁹ Buzúaj lu guichi lë na' chibilé'enu', en le raca na'a, enca' le ral-la' gaca tödi na'a.

²⁰ Lë ni naca le nagachi' ca naca quégacaba' gadxi böljaj bení' na' bilé'enu' xzóagacaba' lu na'a ibëla, en ca naca gadxi le nuá'gaca guí' le néquiquequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'.”

2

Didza' gusöl-lë'yödzo Éfeso

¹ Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Éfeso. Caní uzúaju' lu guichi: Ru'ë didza' Bönni' na' xzóagacaba' gadxi böljaj bení' lu në'ë ibëla, en ridë' gatsaj láhui'lö gadxi le nuá'gaca guí' na' néquiquequini oro.

² Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxi' bë'ëli' nupa ta'nná nácagaca gubáz quia' però biti' ca' nácagaca, ate' na'a nözili' ta'zì yë'.

³ Ribözali' zxön ladxi', en chigudí'i guxzaca'li' tu' dá'ali' neda', pero biti' gucuidi' ládxi'li'.

⁴ Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö.

⁵ Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xilataj.

⁶ Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj ládxi'gaca budó' guió'j budó' yaga, en tun le ruá' dö', lë na' lësca' bití' rilé'eda' dxi'a.

⁷ Nu riyöni ral-la' uzé nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzö Esmirna

⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz.

⁹ Caní rnní'a': Neda' nöz quézida' le runli', en ca riguí' rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácacaca bönachi judío, pero bití' ca' nácacaca caní. Nupa ni ta'dá' Satanás, tu' xihui'.

¹⁰ Bití' ca' gádxili' le ral-la' quí' sáca'li'. Tu' xihui' na' gun ga idzunli' bál-lali' libí'ili' lidxi' guíë. Caní si' bë' libí'ili', ate' quí' sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queëli'.

¹¹ Nu riyöni ral-la' uzé nagui lë ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, bití' bi gun yöl-la' guti queéquequi, lë na' gaca le buropi luzuí quegaca nupa ila'cuá'tica'sö lu guí' gabila."

Didza' gusöl-lë'ë yödzö Pérgamo

¹² Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíë tuchi' na' natuchi' iropa la'a.

¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Bití' ca' nusanli' ca réajlë'eli' neda'. Bití' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'.

¹⁴ Na'a, dë tu chopá le tu'zegui libí'ili' didza': Nacuá'len libí'ili' bál-la bönachi lu yödzö Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bëdxido' gulútigaquië'-ba' lógaca budó' guió'j budó' yaga, en gulunë' le ruá' dö'.

¹⁵ Lësca' caní nacua'len libí'ili' nupa ni' nazí' lu në'eguequi xibá quegaca bönachi nicolaíta, lë na' bití' rilé'eda' neda' dxi'a.

¹⁶ Que lë ni na', buli'bí'li ládxi'li' na'a. Channö cabí ubí'li ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guíë tuchi'.

¹⁷ Nu riyöni ral-la' uzé nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödzja' ca' tu guió'j chiguíchido' queégaquië', ate' lu guió'j na' nazúaj tu la cubi, cuntú nu nunbë' le, pero núpasö na' ila'zí'li le, ilünbë'e la na'."

Didza' gusöl-lë'ë yödzö Tiatira

18 Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca ca guí', ate' ni'ë nácagaca ca guíë bronze dxílido'.

19 Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ladxí' queëli'. Nözda' nácario idú ca runli' yugu' lë ni ca benli' zí'alö.

20 Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bëdxido' ta'gu'ë légacaba' lógaca budó' guiöj budó' yaga.

21 Neda' bë'a-nu lataj ubí'i ládxi'nu, pero biti' rë'ëninu ucá'ananu le ruá' dö' na' runnu.

22 Que lë ni na' chú'una'-nu tu le gátí'nu ga na' quí'í sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'.

23 Guna' ga ilátibi' zxi'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícaguequi, en le ta'zá' ládxi'gaca bönachi, ate' ubi'a queëli' tsca naca le runli'.

24 Ia'zica'li' zóali' yödzo Tiatira, nülöli' biti' nazí' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'í idú, pero le nácate' naca xtídza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'.

25 Na'a, lë na' chinazí' lu ná'ali', guli'gún chí'i ga idxintë dza huöda'.

26 Bönni' ni' ila'déli'në' lu le raca yödzölió, en ilunë' ca rë'ënda' neda' ga údxitë, neda' guna' ga ila'nná bé'enë' bönachi idútë yödzölió.

27 Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzo, ate' gata' lu ná'agaquië' tu xiyaga guíë, ate' ulu'zxuzxjë' bönachi na' ca nu ruzxuzxaj xziga' yö'öna néquini yu.

28 Gu'a ca' le naca ca bölj hui sila quégaquië'.

29 Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

3

Didza' gusöl-lë'ë yödzo Sardis

1 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Sardis. Caní uzúaju' lu guichi: Ru'ë didza' Bönni' na' nacué'len Lë' gadxi bö' na', ate' zxóagacaba' gadxi böljaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'.

2 Bulí'subán ládxi'li'. Guli'gún tsutsu le nacué'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios.

3 Guli'tsöjné na'a xibá na' biyönili' le guzxi' lu ná'ali'. Guli'gún ca rnna xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en biti' inözili' bizxi dza na' guída' ga zóali'.

4 Nacuá'len bal-la bönachi libí'ili' lu yödzo Sardis, nupa biti' nácagaca xihui'. Ila'dalen nupa ni neda', nácugaca lari' chiguichido'os le ruluí'í nuhuöácagaca idú tsahui', en nácagaca lesaca' gaca caní quéguequi.

⁵ Nupa ila'deli' lu le raca yödzülió ugácuá' léguequi lari' chiguíchido'os, en bití' usúlúa' léguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahué' Xuza' Dios, enca' lógaquié' gubáz lá'ayi queé'.

⁶ Nu riyöni ral-la' uzé nagui lé ni rnné' Dios Bö' Lá'ayi, ru'ilené' yugu' cö' bönachi quia' neda', Cristo, didza'."

Didza' gusöl-lë'ë yödzo Filadelfia

⁷ Gunné' ca': "Lësca' caní buzúaj lu guichi didza' ni isöl-lu'u queé' gubáz quia' zóalené' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquié' lá'ayi, en ru'ë didza' idúté li, en dè lu në'ë xzí'ini guié queé' David, bönni' gunná bē'ë. Bönni' na' ru'ë didza' risálajé' ga nu riyaza, ate' cuntú nu gaca usayaj le, en rusayjé' ga nu riyaza, ate' cuntú nu gaca isalaj le.

⁸ Bönni' ni rnné': Neda' nöz quézida' le runli'. Nözda' nápalí' láti'do'os yöl-la' huáca, pero runli' ca rna xtídza'a, en bití' rutuí'ili' rnnali' néquili' quia'. Que lé ni na' nuzóa' loli' tu ga nu tsaz le nayalaj, ate' cuntú nu gaca usayaj le.

⁹ Bulí'yútsöca', ta'dé' bönni' ni' Satanás, tu' xihui', en ta'zí' yē'ë, ta'nné' nácagaquié' bönachi judío ta'yéaj ládxi'gaca Dios, pero bití' nácagaquié' caní, guna' ga ila'dxiné' loli', en ulu'zechu zxíbigaquié' xini'ali'. Ní'irö iléiquebe'ené' nadxí'ida' libí'ili'.

¹⁰ Tu' benli' ca rna xtídza'a, en gulózali' zxön ladxí', gun chi'a libí'ili' dza na' ila'guí'ila'zaca' yúgu'té bönachi lu yödzülió ni, lé na' gaca para si' bē' léguequi.

¹¹ ¡Si' guída! Que lé ni na' guli'gún chi'i le nápalí', para cabí gaca nu gun ga cabí sí'ili' lé na' ral-la' gunna' queéli'.

¹² Núlöli' ni' idéla'li' lu le raca yödzülió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoé' Dios, en catu caz irúajli' ni'. Udá'a libí'ili' ca lē' Dios quia', enca' ca lē' yödzo queé' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi.

¹³ Nu riyöni ral-la' uzé nagui lé ni rnné' Dios Bö' Lá'ayi, ru'ilené' yugu' cö' bönachi quia' neda', Cristo, didza'."

Didza' gusöl-lë'ë yödzo Laodicea

¹⁴ Gunné' ca': "Lësca' caní buzúaj lu guichi didza' ni isöl-lu'u queé' gubáz quia' zóalené' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoé' tsaz, Bönni' runé' ca rnné', en ru'ë didza' idúté li ca runé' ba nalí, en náquié' ca' Bönni' na' gulén lu në'ë yúgu'té le bené' Dios.

¹⁵ Caní rnné': Neda' nöz quézida' le runli'. Ca runli' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zögui', tu' cabí dá'alí' neda' idú ládxi'li'. Dxi'aró gaca la' gácali' ca nisa ziaga o ca nisa zögui'.

¹⁶ Na'a, tu' nácali' ca nisa nati yúlasö, en bití' nácali' ca nisa ziaga, en bití' nácali' ca nisa zögui', chú'una' libí'ili' ca run nu ruhuébi nisa nati yula na'.

¹⁷ Libí'ili' rnnali' rilé'eli' yöl-la' tsahui' queéli', en raca dxi'a queéli', en bití' bi riyadzaj queéli', pero bití' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö!

¹⁸ Que lé ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la'

gá'uli' ca' lari' chiguichi quia' le gáculi' para igachi' yöl-la' xiguídídó queéli' le run ga nu rutuí'i. Ral-la' gá'uli' ca' quia' le gun ga ulu'huóáca guiój loli' para gaca ilé'eli' le naca quia'.

¹⁹ Neda' ruzeda' bach, en run zí'a yúgu'tè nupa nadxí'ida' channö cabí tun le naca dxi'a. Que lè ni na', buli'bí'i ládxi'li', en guli'gún xichina' idú ládxi'li'.

²⁰ Buli'yútsöca', neda' caz zuína' ga nu riyaza, en rulidza'. Channö nútí'tès nu yöni chi'a, en isalaj quia', tsázia', en gágulena' nu na', ate' nu na' gágulen neda'.

²¹ Núlöli' idéli'li' lu le raca yödzölió, neda' guna' ga cõ'öli' tsözxön len neda' ga na' rö'a rinná bē'a, ca na' benē' ca' Xuza' quia' neda'. Bidéli'da' neda' lu le guca quia', ate' gurõ'lena' Xuza' tsözxön ga na' rö'è rinná bē'è.

²² Nu riyöni, ral-la' uzè nagui lè ni rnnē' Dios Bõ' Lá'ayi, ru'ilenē' didza' yugu' cõ' bönachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lè ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'è bönni' na' biyönda' zí'aló, ate' bulidza zidzaj ca ribödxí lúzuba' bõa' bēdxi. Chi'i ni bulidza neda', gunná: "Gudá xitsá'aló ni, ate' neda' uluí'ida' li' le run bayudxi ilaca tödi ni."

² La' ní'isö guzóalenē' Dios Bõ' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bē', en bilé'eda' ca' Nu na' rö'ö lataj na'.

³ Rēpi yōsa bení Nu na' rö'ö lataj na', ca na' rēpi yōsa bení guiój jaspe, en guiój cornalina, yugu' guiój nazáca'da'. Idú gásibi'iló lataj na' zoa biguita' le naca lachi ca naca guiój esmeralda, le rēpida' yōsa bení'.

⁴ Idú gásibi'iló lataj na' nacuá' ca' ia'tapa uruá' lataj gapa ta'bõ' nupa ta'nná bē', ate' yugu' lataj na' rö'ogaquiē' tapa uru'è bönni' gula, nácugaquiē' lari' chiguíchido'os, en dxíagaca ícjagaquiē' le néquiguequini oro.

⁵ Ta'ruáj yōsa, en guziú' rinné lu lataj lo ga ni' rö'ö Nu na', ate' bõ zxön ru'u. Lahui' lo lataj na' tu'zení gadxi le ta'gú'u bení', le nácagaca gadxi bõ dzágagaca Dios.

⁶ Ca dödilö lahui lataj ni dē tu ca naca tu nísado' le rēpi yōsa bení' ca guiój jara.

Nacuá' tapa nupa nabángaca cuiti lataj na', tsölá'a huéaj, ate' zían guiój lógaca dxíagaca zaca' cúdzi'lóguequi, en láhuilóguequi.

⁷ Tu nu nutsa' ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisíá' ruzuba'.

⁸ Idápatē' nupa ni, nacuá' xopa xíligaca que queēguequi, ate' idá'alóguequi, en lé'elóguequi xíliguequi dxíada'gaca zían guiój lóguequi. Rēla, en te za bití' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulé'!

⁹ Nupa na' nabángaca ta'gú'u yöl-la' ba Nu na' rö'ö rinná bē', en zóatica'sö nabán. Tun bal Nu na', en tē Nu na': "Xclenu'." Bátati'tès tun idapa na' caní,

10 tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné':

11 ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quíu' yöl-la' unná bë' tu' benu' yúgu'të le dël

¡Ca rë'ëni quézinu' nacuá', en gula'sí lo nacuá'!

5

Tu guichi, en Bönni' náquië' Bö'cu' Zxíla'do'

1 Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lë'elö, en láhuilö. Naguela' guichi na' gadxi le nusáyajgaca le.

2 Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

3 Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú.

4 Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le.

5 Ní'irö tuë' bönni' gula ni' gudxë' neda', gunné': "Biti' cödxu'. Bönni' na' náquië' ca bëdxi guixi', en nabábalenë' xzí'ini xí'sóë' Judá, en náquië' ca' xzí'ini xí'sóë' David, chibidéli'në' lu yúgu'të le raca, en séqui'në' uladzu'ë le naguéla'gaca guichi ni, en usálajë' le."

6 Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxië' huë' ca naca que tu bö'cu' zxíla' zoa nu bëti lëba' lahuë' Dios, nacuá' gadxi lúzuba', en gadxi guiöj loba', le tu'luí' ca náca'gaca gadxi bö' na' dzágagaca Dios, nasöl-lë'ë lëguequi idütë yödzölió.

7 Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'.

8 Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaqüië' le rul-la nazí'i le arpa, en nuá'agaquië' ca' yugu' xzíga'do' néquiguequini oro, yugu' le yúdzugaca yalaj, lë na' rulú'i yöl-la' xzí'ini rúlidza Dios quégaca bönachi queë'.

9 Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',

en uládu'u le naguéla'gaca le,

tu' bë'u lataj yugu' bönni' gulútië' Li',

ate' len xichönu' böá'uu' bönachi para ilequi queë' Dios,

nupa náca'gaca bönachi izá'a nacuá' idütë yödzölió,

bönachi tuí'i yúgu'të didza' yúbölö,

en nabábagaca yúgu'të yödzö,

en yúgu'të luyú nacuá' idütë yödzölió.

10 Benu' ga náca'gacüië' bönni' ta'nná bë'ë

en ga náca'gacüië' bixúz queë' Dios queëru'.

Benu' ga ta'nná bë'ë lu yu yödzölió.

11 Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxön len nupa na' nabángaca, enca' yugu' bönni' gula na'.

¹² Tu'ë zidzaj didza' yúgu'të, ta'nnë':
 ¡Bönni' na' náquië' Bö'cu' Zxíla'do' gulútië',
 náquië' lesaca' gata' yöl-la' unná bë' lu në'ë,
 en yöl-la' tsahui', en yöl-la' réajni'i, en yöl-la' huáca!
 ¡Náquië' lesaca' gunru'-në' bal, en tseaj ládxi'ru' Lë',
 en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacua' yugu'lataj na', ta'nná:

¡Yöl-la' ba Nu na' rö'ö lataj lo,
 enca' Bönni' na' náquië' Bö'cu' Zxíla'do'!
 ¡Gúntica'siru'-në' bal
 en cú'utica'siru'-në' yöl-la' ba,
 ate' inná bë'tica'së' Lë'!

¹⁴ Idápatë nupa na' nabángaca ta'nná: "¡Ca' gaca!"

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguela' gaca guichi

¹ Ní'irö bilé'eda'-në' Bönni' náquië' Bö'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chí'i ca guzú' rinnë, gunná: "¡Gudá uyú'!"

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatërö lo para idéli'në' lu gudil-la.

³ Cate' buládzu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú'!"

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsójtúa yöl-la' riböza dxi'a tsahui'do' quégaca bönachi, en gun ga iluti luzë'eguequi. Bulu'nödzjë' queë' tu guié tuchi' zxon.

⁵ Cate' buládzu'ë le bunny le naguela' guichi na', biyönda' nu bunny na' nabán, ate' gunná: "¡Gudá uyú'!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxicóns.

⁶ Biyönda' ruí'i didza' tu chí'i gatsaj láhui'lö tapa na' nabángaca, ate' gunná: "Chopa guié zxoá' xtila len lazxaj que tu dza huen dxin tu' gaca gubín, en xopa guié zxoá' cebada len lazxaj que tu dza huen dxin, pero biti' gunu' ga yadzaj le naca za, en biti' bi' gunu' que xisi uva nal-la."

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: "¡Gudá uyú'!"

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödzölió para guti léguequi len guié tuchi', en len yöl-la' ridún, en len yugu' yödzöhuë', en len yugu' böa' guixi' sínia' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zcan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'.

10 Gulu'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno'! ¿Bátaxi caz uchi'a usöröu' queëtu', en uzí'i lëbu' yugu' bönni' nacu'ë yödölió tu' gulútië netu'?"

11 Bulu'nödzejë' quéguequi yugu' lari' chiguíchido'os ilácuë', en gulë' léguequi: "Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönnachi légaquië' ca' ca na' bëtigaca libí'ili'."

12 Cate' buládzü'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön.

13 Gula'guínnaj böläj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'.

14 Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'.

15 Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' röjáquië' gudil-la, en yugu' bönni' dë lu ná'agaquië', en yúgu'të nupa nadó'ogaca, en yúgu'të nupa bití' nadó'ogaca bulu'cachi' lógaquië' gapa naca zcan bulóaj, en gapa naca lë'e guiöj lu guí'ado'.

16 Gulë' yugu' guí'ado' na', en yugu' lë'e guiöj na': "Guli'dubága' netu', en bulí'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'.

17 Chibidxín dza uluf'i lahui yöl-la' rilé quégaquië', ate' ¿nuzxi caz sequí' guá' ilén le?"

7

Tu gayuá' yu' tapa-un milë' bönni'

1 Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödölió. Tu'záguë'ë xinözgaca idapa bö' recja tsólá'a huéaj luyú, para cabí tsecja bö' luyú yödölió, en para cabí tsecja lu nísado', en para cabí utá yaga.

2 Bilé'eda' ca' ia'tué' gubáz lá'ayi zë'ë rirúajë' ga rilén gubidza. Nu'ë tu le udë'ë nupa náca gaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'.

3 Gudxë' légaquië': "Bití' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

4 Biyönda' tsa náca gacaquië' bönni' da' légaquië' lë na' naca bë'. Náca gacaquië' idú tu gayuá' yu' tapa-un milë' ladaj yúgu'të cö' zxi'ini xi'sóë' Israel.

5 Yugu' bönni' na' da' légaquië' lë na' naca bë' náca gacaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

6 Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

7 Chinnu milë' di'a dza queë' Leví.

Chinnu milë' di'a dza queë' Isacar.

⁸ Chinnu milë' di'a dza queë' Zabolón.
Chinnu milë' di'a dza queë' José.
Chinnu milë' di'a dza queë' Benjamín.

Bönachi guizxi yu nácugaca lari' chiguíchido'os

⁹ Gudödi guca lë ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'të yödzo tu'i didza' yúbölö iduté yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin.

¹⁰ Tu'ë zidzaj didza' yúgu'të', ta'nnë':
¡Yöl-la' rusólá za' lu në'ë Dios queëru', rö'ë lataj lo ni,
en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj ládxi'gaquië' Dios,

¹² ta'nnë':
¡Ca' gaca! ¡Yöl-la' ba Li', Dios queëtu'!
¡Napu' yöl-la' zxön, en yöl-la' réajni'!
¡Rëtu' Li': "Xclenu", en runtu' Li' bal!
¡Napu' yöl-la' unná bë', en yöl-la' huáca!
¡Gácatíca'sö caní quiu', Dios queëtu'!
¡Ca' gaca!

¹³ Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquië'?"

¹⁴ Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'gu'i gula'záca'da'. Gula'guíbë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'.

¹⁵ Que lë ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en tē dza lu yudo' queë'. Nu na' rö'ö lataj lo ni gun chi'i légaquië' tu' zóaléntica'sö légaquië'.

¹⁶ Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá

¹⁷ tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ruf'i yöl-la' na'bán, ate' Dios uzxië' lógaquië' nisa ta'bödxë'."

8

Le igadxi le naguela' guichi

¹ Cate' buládzu'ë le igadxi le naguela' guichi na', gurö'ö dxi yehua' yubá idú gatsaj hora.

² Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi.

³ Ní'irö bidë' ia'túë' gubáz lá'ayi, nu'ë tu zxíga'do' néquini oro, en guzuinë' ra' bucugu yehua' yubá ní'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'.

4 Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rō'ë Dios.

5 Ní'irō gubáz lá'ayi na' bulië' zxi'ga' do' na' len bo' yalaj dxía lu bucugu na', ate' gurú'unë' le luyú. Gunné guziú', ate' bö zidzaj biyón. Guyëpi yösa, en gudódi budó' zxu'.

Tu'cödxë' lúzuba' böa' bëdxi

6 Ní'irō igádxitë' gubáz lá'ayi na' zongaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

7 Bucödxë' gubáz lá'ayi z'älō lúzuba' böa' bëdxi, ate' gurō'ō guiój bögui' yöla sunna, en guí' nutsí' rön, ate' bulu'huöxaj luyú. Guyegui tu cō' tsa tu tsonna cō' le dë luyú ni, ate' guyegui ca' tu cō' tsa tu tsonna cō' yaga. Guyegui ca' yúgu'të guixi' ya'a.

8 Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön.

9 Guti tu cō' tsa tu tsonna cō' le nabángaca dzō'ō lu nisa zxön na', ate' guca ditaj tu cō' tsa tu tsonna cō' le ta'dōdi láchui'lō nisa na'.

10 Bucödxë' gubáz lá'ayi bunni lúzuba' böa' bëdxi, ate' böxaj tu böläj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rō'ō luyú.

11 Böläj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

12 Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cō' tsa tu tsonna cō' böläj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zení' böläj, en beo' ia'láti'do'os ca gatsaj tu gatsaj rëla.

13 Ní'irō buyúa', en biyōnda' ru'ë zidzaj didza' tuë' gubáz lá'ayi ridödë' gatsaj láchui'lō lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tsonné' gubáz lá'ayi na' lúzuba' böa' bëdxi!"

9

1 Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu böläj lúzxiba böxaj luyú, ate' bulu'nōdzjë' nu na' zxi'ini guíë que lataj chul-la.

2 Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'.

3 Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' bönachi ca tunba' xōjnō' dzō'ōba' luyú.

4 Gunná bé'enë' légacaba' biti' ilún dítjaba' guixi' rō'ō luyú, en biti' ilún dítjaba' yugu' le naca ya'a, en calëga yugu' yaga, pero gácasō iládu'ba' bönachi na' biti' da' lë na' naca bë' nu nequi queë' Dios ra' xigágaquië'.

5 Biti' bë'ë légacaba' lataj ilútiba' légaquië', pero ulu'saca' z'í'siba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xōjnō'.

6 Yugu' dza na' ilë'ënë' yugu' bönni' iluti cuíngaquië', pero biti' ila'zëqui'në'. Ilë'ëninë' ilátië', pero ucuíta cuini yöl-la' guti.

7 Nalá'gacaba' böchi'zu na' ca náacagacaba' böa' náacugacaba' le néquiquequini guíë, para tsöjácaba' gudil-la. Dxíagaca ícjagacaba' le náacagaca ca tu le néquini oro. Naca lógacaba' ca naca lógaca bönachi.

8 Naca guitsa' ícjagacaba' ca naca guitsa' ícjanu nigula. Náacagaca láyi'gacaba' ca náacagaca láyi'ba' bédxi guixi'.

9 Náacugaca luchú'ugacaba' le néquini guíë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la.

10 Náacagaca xibángacaba' ca naca xibángacaba' xöjnó', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'.

11 Zoa nu rinná be'e léacacaba', nu na' naca gubáz xihui' que lataj chulla. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

12 Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

13 Bucödxë' gubáz lá'ayi buzxopi lúzuba' böa' bédxi, ate' biyönda' tu chi'i ruí'i didza' gatsaj láhui'lö tapa le náacagaca ca lúzuba' bédxi dá'gaca tapa squin bucugu na' néquini oro, le rö' lahuë' Dios.

14 Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bédxi, en rnna: "Busedxi idápaté' gubáz xihui' na' nága'gaca ra' yegu Eufrates."

15 Ní'irö bulu'sedxë' tapa gubáz xihui' na', chinucözë' Dios léaguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzöliö.

16 Biyönda' tscá náacagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Náacagaquië' idú chopa gayuá' mil milë'.

17 Bilé'egacada'-ba' böa' na' ca tu lu bixín, ate' nupa ta'bía léacacaba' nacu luchú'uguequi le naca guí'do'os, en ya'a ca lúzxiba, en gulaj. Náacagaca ícjagacaba' böa' na' ca ícjaba' bédxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre.

18 Yugu' lë na' ta'rúaj ruá'agacaba' bétigaca tu cö' tsa tu tsonna cö' bönachi nacua' luyú, lë na' náacagaca guí', en dzön, en lë na' ruzégui'da'.

19 Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' náacagaca xibángacaba' ca yugu' bëla zoa ícjagacaba' le tu'dí'iniba'.

20 Ia'zica'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guiöj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca.

21 Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guíchido'

1 Ní'irö bilé'eda'-në' ia'tué' gubáz lá'ayi nál-la, böjtjë' birúajë' yehua' yubá, nacué' böaj lúzxiba, en zoa ca tu biguita' ícjalë'. Rëpi yösa bení lahuë' ca run gubidza, ate' náacagaca ni'ë ca ya'zxön ta'yegui.

2 Zoa lu në'ë tu guíchido' nayaalaj, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi.

³ Ní'irö bē'ë zidzaj didza', ate' biyón chi'ë ca riyón cate' ribödxi'aba' bēdxi guixi', en cate' budxi bē'ë zidzaj didza' na', bila'yöni chí'igaca gadxi guziú'.

⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'í didza' yehua' yubá, rē neda': "Bucáchi'sö didza' ni guluf'í gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nē' zuínē' lu nísado', en luyú bidxi, guchisa nē'ë ibēla zaca' lúzxibalö,

⁶ ate' ben tsutsu xtídzē'ë ní'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bí'tirö tse!

⁷ Cate' ucödxē' gubáz lá'ayi igadxi lúzuba' böa' bēdxi, usudxinē' Dios le nagachi' queē', lē na' buluf'inē' yugu' huen dxin queē', bönni' ni' gulu'ë didza' uláz queē'."

⁸ Ní'irö chí'í na' biyönda' rirúaj yehua' yubá bē'len neda' didza' leyúbölö. Gunná: "Guyéaj, yöjxí' guíchido' naya'aj na' zönē' gubáz lá'ayi na' nulibē' lu nísado', en luyú bidxi."

⁹ Guyija' ga na' zoē' gubáz lá'ayi na', en gunábida'-nē' gunné' guíchido' na' quia'. Gubáz lá'ayi na' gudxē' neda', gunné': "¡Guzxí', gudagu! Lu ru'u gaca zxixi ca naca bidxína'do' queēba' buz, pero lē'u huóaca silá'."

¹⁰ Guzxí'a guíchido' na' zönē', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lē'a.

¹¹ Ní'irö gudxē' neda': "Ral-la' gu'u didza' leyúbölö uláz queē' Dios lógaca zían cō' bōnachi izá'a, en gapa nacua' yúgu'tē yödzö, en gapa tuí'í zían didza' yúbölö, en lógaca zían bönni' unná bē'."

11

Chopē' bönni' tunē' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queē' Dios. Burixi ca' bucugu lá'ayi que, en bulaba nupa nacua' ni' ta'yéaj lādxi'gaca Dios.

² Bucá'ana ca' lö'a que yudo' na' dē ní'ilö, en bití'urixu' le, tu' nadödi lu ná'agaca bōnachi izá'a, ate' ulu'libi ulu'léaj yödzö lá'ayi na' idú ca chopan beo'."

³ Gudxē' ca' neda': "Isól-la'a chopē' bönni' ilunē' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquiē' lari' le naca bödzádzado'."

⁴ Chopē' bönni' ni tunē' ba nalí, nácugaquiē' chopan yaga olivo na' nazúaj lu guichi lá'ayi ca naca quégaquiē', en nácugaquiē' ca' chopan le nuá'gaca guí' na' nacua' lahuē' Dios, Xani yödzölió.

⁵ Channö guē'ëni nu guá' dö' quégaquiē', irúaj guí' ruá'agaquiē' le usuniti nu na' rē'ëni guá' dö' quégaquiē', en guti nu na', enca' nupa ta'dá'baga' légaquiē'.

⁶ Chopē' ni dē lu ná'agaquiē' ulu'záguē'ë xinöza nisa guiöj lúzxiba, para cabí galaj guiöj tsca dza na' ral-la' ilu'ë didza' uláz queē' Dios, ate' dē lu ná'agaquiē' ca' ilunē' ga huóaca nisa rön, en ilunē' ga gatsaj yödzöhuē' yödzölió. Ilunē' caní bálati'tēs luzuí ilé'ënnē'.

⁷ Cate' údxi ilunē' ba nalí, irúajba' böa' sínia' lataj chul-la, en tíl-lalenba' légaquiē', en ucúl-laba' légaquiē', en gútiba' légaquiē'.

⁸ Le gulaca cazë' ila'túlusö ca' la' nöza lu yödzö zxon, ga ni' gudë'ë ca' Xanru' lë'e yaga cruz, en ca rucúdzu'ru' didza', nazí'i le ca' Sodoma, enca' Egipto.

⁹ Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tu'í zían didza' yúbölö, en bönachi yúgu'të luyú, ila'lé'eni le gulaca cazë', en biti' ilu' lataj nu ucache' légaquië' yeru ba.

¹⁰ Ulu'dzëjade'e nupa nacuá' yödzölió tu' gulatië', ate' lu yöl-la' rudzeja quéguequi ila'söl-la' le ulu'nödzaj quégaca luzë'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacuá' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxí gula'dzöbi yúgu'të nupa bila'lé'e légaquië'.

¹² Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'.

¹³ La' ní'isö gudödida' budó' zxu', ate' biguinnaj tu cö'tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönachi. Guladxí gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le rusuniti bönachi, ate' chizóa idxín le bunni le usuniti léguequi.

Rucödxë' gubáz lá'ayi igadxí lúzuba' böa' bëdxi

¹⁵ Bucödxë' gubáz lá'ayi igadxí lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió

nadödigaca lu në'ë Xanru' Dios,

en lu në'ë Cristo.

Lë' inná bë'tica'së'.

¹⁶ Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ladxí'gaquië' Dios.

¹⁷ Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxon quiu',

en risí lo' rinná bë'u!

¹⁸ ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usörou' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácgaca cá'asö, en nupa nácgaca lo!

¡Chibidxín dza usunítu' nupa bulu'suniti yödzölió!

¹⁹ Ní'irö gualaj yudo' queë' Dios rö'ö yehua' yubá, ate' bilá' lahui gu'ína lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunnë' guziú' luyú. Gudödi budó' zxu', en guró'ö guió'j bögui' yöla sunna.

12

Tunu nigula, en tuba' bëla zxön xitsiní'

¹ Ní'irö bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa zzan ní'anu beo'. Dxía ícjanu tu le néquini oro ga dxíagacaba' chinnu böljaj beni'.

² Nigula ni chizóa soa bí'ido' queénu, en ribödxinu tu' rúdia' lé'enu. Riguí'i rizáca'nu ruzóanu bí'ido' queénu.

³ Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'.

⁴ Len xibanba' gú'uyöjba' tu cö' tsa tu tsonna cö' böljaj lúzxiiba, en gurú'unaba' lé'gacaba' luyú. Guzuí'iba' bëla zxön xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bi' bí'ido' queénu na' ca gáljabi' na'.

⁵ Buzóanu-bi' tubi' bi'i bönni'do' ral-la' inná bé'ebi' yúgu'tè yödzo len tu xiyaga guíë. La' bucuítatè'ë-bi' Dios bí'ido' queénu na', en buchisè'-bi' ga ni' zoa cazè' Lè', rø'ë lataj lo ga na' rinná bë'ë.

⁶ Buzxúnnajnu nigula na', zéajnu lu lataj cá'asö, ga ni' chinupè'ë Dios lataj queénu. Ulu'gahuè'-nu ni' idú ca chinnu gayuá' yu' tsónnalalaj dza.

⁷ Gudödi gulaca lè ni, gúcada' gudil-la yehua' yubá. Gubáz lá'ayi lo lè' Miguel, en yugu' gubáz lá'ayi dá'gaquiè' lè' gula'díl-lalenè'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca lèba'

⁸ pero biti' bila'deli' lu gudil-la na'. Que lè ni na' biti'rø bidzöli xilátjagaca yehua' yubá.

⁹ Caní guca, gula' rú'unè'-ba' bëla zxön xitsiní' na' ní'ilö. Nácaba' bëla na' zóaba' dza ni'te, lèba' tu' xihui'. Gula' rú'unè' tu' xihui' yödzo'lió, dzágagaca le gubáz xihui' na' dá'gaca le.

¹⁰ Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunè' Dios, en yöl-la' huáca queé', en le rinná bë'ë, enca' le rinná bë'ë Cristo, tu' chigula' rú'unè' ní'ilö nu na' buzegui yugu' böchi' luzá'aru' didza'. Rèla, en tè dza buzegui légaquiè' didza' lahuè' Dios queéru'.

¹¹ Yugu' böchi' luzá'aru' ni bulu'cul-lè' nu na', tu' bulu'gunè' dxin xichönè' Bönni' na' náquiè' Bö'cu' Zxíla'do' queé' Dios, en tu' bulu'gunè' dxin didza' na' gulunè' ba nali' queé'. Biti' guluí'i ládxi'gaquiè' yöl-la' na'bán quegaquiè', pero gulatiè'.

¹² Que lè ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzo'lió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquite'e ia'tú chí'isö dè lataj que."

¹³ Cate' gú'quite'eba' bëla zxön xitsiní' na' chigula' rú'unè'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queénu.

¹⁴ Ní'irö Dios bë'ë-nu nigula na' chopa xíliba' bisía' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahuè'-nu idú tsonna iz yu' gatsaj.

¹⁵ Bëla zxön xitsiní' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'tè nigula na'.

¹⁶ Ní'irö luyú gúcalen nigula na'. Gualaj luyú na', en gü'i nisa yegu na' gúbaba' bëla zxön xitsiní' na'.

¹⁷ Ní'irō bēla zxōn xitsiní' na' guléde'eba'-nu nigula na', ate' guyéajba' yōjtíl-lalenba' nupa nagá'anagaca queēnu di'a dza queēnu, nupa na' tun ca rnna le gunná bē'ē Dios, en nazi' lu ně'eguequi le nunē' Jesucristo ba nali.

13

Chópaba' bōa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' bōa' sínia' dxíagaca gadxi ícjaba', en chi lúzuba'. Dxiagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxí'a.

² Bōa' sínia' na' bilé'eda'-ba' riná'aba' ca nácaba' tu bēdxito', nacua' ní'aba' ca nácagaca ní'aba' oso, ate' ruá'aba' naca ca naca ruá'aba' bēdxi guixí'. Bēla zxōn xitsiní' na' budōdiba' lu ná'aba' bōa' sínia' ni yōl-la' huáca queēba', enca' xilátjaba' ga rinná bē'ēba', en yōl-la' unná bē' zxōn queēba'.

³ Dxía huē' tu ícjaba' bōa' sínia' na', le naca le guti lēba', pero buniti huē' na', ate' bulu'baní yúgu'tē bōnachi yōdzōlió, en yōjdá'gaca bōa' sínia' na'.

⁴ Gula'yéaj lādxi'gaquiē'-ba' bēla zxōn xitsiní' na', tu' budōdiba' yōl-la' unná bē' queēba' lu ná'aba' bōa' sínia' na'. Gula'yéaj lādxi'gaquiē'-ba' bōa' sínia' na', en gula'nné': "¿Nuzxi caz naca zxōn ca naca zxōn bōa' sínia' na', en nuzxi caz sequí' tíl-len lēba'?"

⁵ Guta' lu ná'aba' bōa' sínia' na' bē'ēba' didza' ba zxōn, en didza' xihui' le rinnēba' queē' Dios. Idú ca chopa-un beo' guta' lu ná'aba' yōl-la' unná bē'.

⁶ Gusí loba' rinnēba' queē' Dios, en rinné xihui'ba' que Lē' Dios, en que lataj lá'ayi queē', en quégaca nupa nacua' yehua' yubá.

⁷ Guta' lu ná'aba' gudíl-lalenba' nupa néquiquequi quez queē' Dios, en bucúl-laba' légaquiē'. Guta' ca' lu ná'aba' gunná bē'ēba' yúgu'tē bōnachi izá'a, bōnachi yúgu'tē yōdzō, en bōnachi tu'i yúgu'tē didza' yúbōlō, en bōnachi idútē yōdzōlió.

⁸ Yúgu'tē bōnachi nacua' yōdzōlió gula'yéaj lādxi'gaca bōa' sínia' na', nupa na' bití' nazúajgaca láguequi lu guichi que yōl-la' na' bán, guichi na' buzúajé' Bōnni' na' náquiē' Bō'cu' Zxíla'do' queē' Dios cate' si' guta' yōdzōlió. Buzóa cazé' Dios gútiē' Bōnni' na' ní'a quégaca bōnachi queē'.

⁹ Channō nu riyōni, ral-la' uzé nagui.

¹⁰ Nupa nucu'ē Dios idzúngaca, ral-la' idzúngaca, ate' nupa nucu'ē Dios para nu guti léguequi len guíē tuchi', len guíē tuchi' ilátigaca. Que lē ni na', ral-la' ila'bōza zxōn ladxí' nupa néquiquequi queē' Dios, en ta'yéajlē' Lē'.

¹¹ Gudōdi na' bilé'eda'-ba' ia'tuba' bōa' sínia' gurenba' birúajba' lu yu. Dxiagaca chopa lúzuba' ca naca lúzuba' bō'cu' zxíla', en ru'íba' didza' ca na' ru'íba' didza' bēla zxōn xitsiní' na'.

¹² Dē lu ná'aba' bōa' sínia' ni yúgu'tē yōl-la' unná bē' queēba' bōa' sínia' bidxinba' zí'alō, cate' dzágaba' lēba'. Runba' bōa' sínia' buropi ni ga ta'yéaj lādxi'gaca yúgu'tē bōnachi nacua' yōdzōlió bōa' sínia' zí'alō na', bōa' na' buniti huē' le guti lēba'.

¹³ Bōa' buropi na' runba' ca' le nácagaca bē' ga ridxintē runba' ga ruhuōxaj guí' le za' lúzxiba, en ruhuōxaj luyú lógaca yúgu'tē bōnachi.

¹⁴ Rizí' yé'eba' bōnachi nacua' yōdzōlió len le nácagaca bē' dē lu ná'aba' runba' loba' bōa' sínia' zí'alō na'. Rinná bē'ēba' bōnachi nacua' yōdzōlió ilunē' tu budó' ca nácaba' bōa' sínia' na' gúcaba' huē' que guíē tuchi', ate' nabanba'.

15 Dē lu ná'aba' runba' ga soa ibán budó' na' naca ca nácaba' bōa' sínia' zí'aló na', en güí'i didza' budó' ni, en gun ga nu guti yúgu'tē nupa bití' ila'yéaj lādxi'gaca le.

16 Benba' ga gudá' yúgu'tē bōnachi tu le naca bē' dá'gaca lēba', nupa nácagaca cá'asō, en nupa nácagaca lo, nupa ta'l'e yōl-la' tshui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibēla o ra' xigágaca bōnachi na'.

17 Cuntu nu gaca bi ga'u o bi guti' channō cabí da' nu na' lē na' naca bē', o channō cabí da' nu na' laba' bōa' sínia' na', o le nabábaba' nuá'aba'.

18 Na'a riquínnu' yōl-la' réajni'i. Nu napa yōl-la' réajni'i ral-la' ulábatēz tsca le nabábaba' nuá'aba' bōa' sínia' na', le naca ca le nababē' tu bōnni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lē' tu gayuá' yu' tapa-un milē' bōnni'

1 Gudōdi ni' buyúa', en bilé'eda'-nē' Bōnni' na' náquiē' Bō'cu' Zxíla'do' zuínē' lu guí'ado' nazí'i le Sión. Nacuá'lenē' Lē' tu gayuá' yu' tapa-un milē' bōnni', da' ra' xigágaquiē' Lē' Bōnni' na' náquiē' Bō'cu' Zxíla'do', enca' Lē' Xuzē'.

2 Ní'irō biyōnda' tu le rigú'u bō yehua' yubá, le rinnē zidzaj ca rinnē tu yegu zxōn, en ca rinnē guziú'. Biyōnda' le riyōn cate' ta'guínniē' lē'e tu le rul-la zē zían du que.

3 Tul-lē' tu le rul-la cubi, nacu'ē ca dōdilō lahui lataj lo ni', enca' ca dōdilō lahui ga na' nacuá' idapa nupa na' nabángaca len yugu' bōnni' gula na'. Cúnturō nu gaca gul-la le rul-la ni, pero légacasē' tu gayuá' yu' tapa-un milē' bōnni' ni, bōnni' na' bōá'uē' Cristo légaquiē' ladaj bōnachi yōdzólió.

4 Nácagaquiē' bōnni' ni idú ladxi'. Bití' gula'cuá'lenē' nigula, tu' nácagaquiē' idú bōnni' ra'bán. Sójácalenē' Bōnni' na' náquiē' Bō'cu' Zxíla'do' gátitēs ga sa'yéajē'. Cristo caz bōá'uē' légaquiē' lād jagaca bōnachi, ate' nácagaca nupa bulu'dōdi cúngaquiē' zí'aló queē' Dios, enca' queē' Bōnni' na' náquiē' Bō'cu' Zxíla'do'.

5 Catu caz gula'zí' yē'ē, ate' cuntu nu gaca bi innē quégaquiē' ga na' nacu'ē ca dōdilō lahui lataj lo ga rō'ē Dios.

Didza' rōjuá'gaquiē' tsonna gubáz lá'ayi

6 Ní'irō bilé'eda' ia'tué' gubáz lá'ayi, ridōdē' lu bō'ōs lúzxiba, en rōju'ē didza' dxi'a zóatica'sō para gunē' libán que lógaca nupa nacuá' yōdzólió, bōnachi idútē luyú, yúgu'tē bōnachi izá'a, en bōnachi tuí'i yúgu'tē didza' izá'a, en bōnachi yúgu'tē yōdzō.

7 Ru'ē zidzaj didza', rnnē': "¡Gulí'gádxí Dios, en guli'cu'ē yōl-la' ba tu' chizóa uchi'a usörōē' bōnachi! ¡Guli'tséaj lādxi'ē Dios, nunē' lúzxiba, en luyú, en nísado', en gapa ralaj nisa!"

8 Ia'tué' gubáz lá'ayi sōjnáhuē' gubáz lá'ayi ni, en rnnē': "¡Chibudxi que yōdzō Babilonia! ¡Chibudxi que yōdzō zxōn na'! Caní guca que, tu' gulún nupa nacuá' ni' ga gula'zí' lu ná'agaquiē' bōnni' yúgu'tē yōdzō ilunē' ca nácagaca le ta'zē lādxi'gaquiē' le ruá' dō'."

9 Ia'tué' gubáz lá'ayi sōjnáhuē' gubáz lá'ayi buropi ni, en ru'ē zidzaj didza', rnnē': "¡Channō nu tseaj ladxi'-ba' bōa' sínia' na', enca' budó' queēba', en güí'i lataj ta' ra' xigué o lu nē'e le naca bē' da' lēba',

¹⁰ gunë' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bõ'cu' Zxíla'do'!

¹¹ Cuéntica'sò dzön que guí' ga ni' quí' saca' nu na'. Rëla, en te dza qui'i saca', ate' catu caz gata' lataj ulu'zì' ládxi'gaca nupa ila'yéaj ládxi'gaca-ba' böa' sínia' na', en budó' queéba'. Biti' ulu'zì' ládxi'gaca nupa ilu'í' lataj ta' laba' léguequi.

¹² Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxì'."

¹³ Ní'irö biyönda' chi'í nu ruí' didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zì' ládxi'gaquië' lu dxin gulunë', en ulu'zì'ë xibé ca sa'yéaj le gulunë'!"

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljé' Bönachi, ate' dxía icjé' tu le néquini oro, ate' zönë' tu gufé tuchi' lu në'ë.

¹⁵ Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu zxoaxtila, tu' chibidxín dza nu uzí' le! ¡Chinabídx do que le dë yödzölió!"

¹⁶ Ní'irö Nu na' rö'ö lu böaj na' bugún dxin guíë tuchi' idütë yödzölió, ate' buzi'ë le rulá' luyú.

¹⁷ Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'.

¹⁸ Birúajë' ia'tuë' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidzë' gubáz lá'ayi zí'aló na' nu'ë guíë tuchi', gunné': "¡Bugún dxin guíë tuchi' quiu', en butubi tu'xóa huéaj le ta'bía lubá uva rö'gaca yödzölió, tu' chiná le ta'bía lubá uva!"

¹⁹ Ní'irö gubáz lá'ayi ni bugunë' dxin guíë tuchi' idütë yödzölió, en butubë' le ta'bía lubá uva rö'gaca luyú, ate' yöjchú'unë' le ta'bía lubá uva na' lu yeru zxón ga izí xisi. Yugu' lë ni rulu'í' ca gunë' Dios, gunë' xíguia' bönachi nacua' yödzölió.

²⁰ Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsca gaca sá'aru' idú chinnu dza.

15

Yugu' gubáz lá'ayi nuá'gaquië' gadxi yödzöhuë'

¹ Bilé'eda' ia'tú le nácada' bë' yehua' yubá, le run ga nu rubani. Bila'ruájë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxi gunë' xíguia' bönachi yödzölió.

² Bilé'eda' ca' tu le naca ca tu nísado' le rëpi yösa bení' ca guiöj jara le nutsí'í guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios quégaquië'.

³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bõ'cu' Zxíla'do'. Ta'nnë':

¡Li', Xantu' Dios, zxöntëro nacu' Li'!

¡Zxóntërö naca yúgu'të le benu',
 le tun ga rubánitu'!
 ¡Li' rinná bé'enu' yugu' yödzö!
 ¡Idú dxí'ado', en idú tsahui' naca ca bi runu'!
 4 ¿Nuzxi caz cabí gadxi Li', Xantu'?'
 ¿Nuzxi caz cabí cu'u Li' yöl-la' ba?
 ¡Tuzu' Li' nacu' lá'ayi!
 ¡Ila'dxín bönachi yúgu'të yödzö,
 en ila'yéaj láchxi'guequi Li'
 tu' ta'lé'e naca tsahui' yúgu'të le runu'!

5 Gudödi guca lë ni, buyúa', en bilé'eda' gualaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'.

6 Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le répi yösa bení', en núga'gaca lúchú'ugaquië' le néquiguequini oro.

7 Ní'irö tu nu nutsa' ladaj idapa nupa na' nabángaca, bë' que queë'gaquië' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'í yöl-la' rilé queë' Dios, Bönni' zoa cazë'.

8 Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

16

Yugu' zxíga'do' yúdzugaca le rulu'í yöl-la' rilé queë' Dios

1 Ní'irö biyönda' chí'i nu ru'í zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzöliö, le yúdzugaca lë na' rulu'í yöl-la' rilé queë' Dios!"

2 Guyijë' gubáz lá'ayi zí'alö, en yöjlanjë' le yudzu zxíga'do' na' zönë' lu yödzöliö. Lë na' yudzu zxíga'do' na' ben ga gutsaj yudzu' ya'a le riláda' idütë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj láchxi'gaca budó' queë'ba'.

3 Ní'irö guyijë' gubáz lá'ayi buropi, en yöjlanjë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

4 Guyijë' gubáz lá'ayi bunny, en yöjlanjë' le yudzu zxíga'do' na' zönë' gapa dë yegu, en gapa rala' nisa, ate' gapa dë nisa na' bulu'huóaca rön.

5 Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tsahui' nacu' tu' richugu' caní quégaca bönachi

6 tu' bulu'laljë' rön quégaca nupa néquiguequi quez quiu', en quégaca nupa gulu'í didza' uláz quiu'! ¡Na'a, Li' runu' ga ilë'ajë' rön, tu' caní ral-la' gaca quégaquië'!"

7 Ní'irö biyönda' ru'í didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idütë li, en tsahui' naca ca richugu' quégaca bönachi!"

8 Guyijë' gubáz lá'ayi budapi na', en yöjlanjë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí que.

⁹ Gula'yégui'da' yúgu'tè bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnè zi'i queè' Dios, Bönni' dè lu nè'è inná bé'enè' yugu' lè ni tu'saca' zi' bönachi.

¹⁰ Guyijè' gubáz lá'ayi guyu' na', en yöjlaljè' le yudzu zxíga'do' zönè' lu xilataj böa' sínia' ga na' rinná bé'èba', ate' gurö'ö chul-la gapa rinná bé'èba'. Ní'irö, tu' gula'guí'i gula'zaca' bönachi, guláguya'a lúdxigaequi,

¹¹ pero biti' bulu'bí'i ládxi'gaca para cabirö ilúngaca le ruá' dö' tunè'. Gula'nnè zi'i queè' Dios zoè' yehua' yubá tu' ta'guí'i ta'zaca', en tu' dxíagaca yudzu' ya'a na'.

¹² Guyijè' gubáz lá'ayi buzxopi na', en yöjlaljè' le yudzu zxíga'do' na' zönè' lu yegu zxön nazí'i le Eufates, ate' gubidxi nisa yegu na' para ibá'a nöza ga ila'dödi nupa ta'nná bé', nupa ila'rúaj zaca' ga rilén gubidza.

¹³ Ní'irö bilé'eda' béla zxön xitsiní' na', en böa' sínia' na', en bönni' ru'è didza' uláz queégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu.

¹⁴ Nácagaca yonna bö' ni bö' que tu' xihui', bö' na' tun le nácagaca bé' le ilún ga ulu'bani bönachi. Yöjaca bö' xihui' na' idú yödzölió, en yöjtúbigaca nupa ta'nná bé', para tsójáquiè' lu gudil-la na' gaca lu dza zxön queè' Dios, Bönni' napa cazè' yöl-la' unná bé'.

¹⁵ Caní rnnè' Dios: "¡Buli'yútsöca'! Guída' tsárido'os ca ridxinè' tu' bönni' gubán. Bica' ba nu zoa ban ladxi', en run chí'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bönachi."

¹⁶ Yugu' bö' xihui' na' bulu'tubi yugu' bönni' ta'nná bé'è, ate' bulu'dubè' tu lataj nazí'i le lu didza' hebreo: Armagedón.

¹⁷ Guyijè' gubáz lá'ayi igadxi na', en yöjlaljè' le yudzu zxíga'do' na' zönè' lu bö'ös, ate' bé' zidzaj didza' tu nu zoa lu lataj lá'ayi zoa yehua' yubá ga dè lataj lo na', rna: "Chinaca."

¹⁸ Ní'irö guyèpi yösa, en gurö'öda' bö, en gunnè guziú'. Gudödida' budó' zxu', le gudödida'rö ca gudödi tsanni ni nacua' bönachi yödzölió.

¹⁹ Birúaj tsonna cö'ölö yödzö zxön na', ate' gula'guínnaj yödzö nacua' yödzölió. Yöjnenè' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queè' benè' xíguia' nupa nacua' ni'.

²⁰ Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guíado'.

²¹ Böxaj ca' guiöj bögui' yöla sunna, le za' lúzxiba, en yöjsóa ícagaca bönachi, ate' nál-li' tu tu guiöj bögui' na' ca tu gayuá' guié, ate' yúgu'tè bönachi gula'nnè xihui' queè' Dios tu' nözi guiöj bögui' na' tu' bulu'sáca'da' zi'i léguequi.

17

Dios richúquiè' queènu nigula udá dzaga

¹ Ní'irö bidxinè' tuè' gubáz lá'ayi ga zoa', nababè' gadxi gubáz lá'ayi na' gula'zönè' gadxi zxíga'do' na' néquiquequini oro. Bé'lenè' neda' didza', gunnè': "Gudá ni, ate' uluí'ida' li' ca gunè' Dios, gunè'-nu xíguia' nigula udá dzaga na', rö'önu lu nísado' zían.

² Gula'cua'len lènu nupa ta'nná bé' luyú yödzölió, en gulún le ruá' dö', ate' gula'zudxi nupa nacua' yödzölió ni, tu' gulunlen lènu le biti' naca dxi'a."

³ Dios Bō Lá'ayi guzóalenē' neda', ate' gubáz lá'ayi na' guchē'ē neda' tu lu lataj cá'asō, ate' bilé'eda'-nu tu nigula ni' dxíanu cúdzu'ba' tuba' bōa' sínia', nácaba' xiná gu'ido'os. Dxiagaca gadxi ícjaba', en chi lúzuba', en dá'gaca ca' lēba' le ta'nnē xihui' queē' Dios.

⁴ Nigula na' dxíanu lēba' nácunu lari' xiná chul-la, en lari' xiná gu'ido'os. Nazí'i biquitaj queēnu le néquiguequini oro, en yugu' guiōj nazaca', en yugu' bugá. Lu ná'anu rō'ō tu xzíga'do' néquini oro, en yudzu le nácagaca xihui', en le ruá' dō' runnu.

⁵ Ra' xigánu dá'gaca ca lēnu, le tu'luí'i tu le nagachi', en ta'nná caní: "Yōdzō Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzō'ō Yōdzōlió."

⁶ Gúquibe'eda' nazúdxinu nigula na' tu' bennu ga gulaj rōn quégaca nupa néquiguequi queē' Dios, en quégaca nupa na' zoa nu bēti léguequi tu' gulún ba nalí queē' Jesús. Cate' bilé'eda'-nu, bubánide'eda'.

⁷ Gudxē' gubáz lá'ayi na' neda', gunnē': "¿Bizx que rubáninu? Uzéajni'ida' lí' lē na' nagachi', le ruluí'i ca naca nigula ni, enca' le ruluí'i ca naca bōa' sínia' na' dxíanu-ba', bōa' na' dxíagaca gadxi ícjaba', en chi lúzuba'.

⁸ Bōa' sínia' na' bilé'enu' guzóaba' zí'alō, pero bití' zóaba' na'a. Bōa' ni chizóa' irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabi nazúajgaca láguequi lu guichi que yōl-la' na'bán, le buzúajē' Dios dza ni'te quez cate' si' gata' yōdzōlió. Cate' ila'lé'eni bōa' sínia' na' guzóaba' zí'atēlō, pero bití' zóaba' na'a, ulu'bani tu' nubanba'.

⁹ Lē ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi gu'ado' gapa rō'ōnu nigula na'.

¹⁰ Lēscá' caní gadxi ícjaba' na' tu'luí'i gadxē' bōnni' ta'nná bē'ē. Gáyue' bōnni' ni chigudōdi quégaquiē'. Tuē' bōnni' ni rinná bē'ē na'a, ate' ia'tué' bití' ridxíninē', pero cate' guídē', inná bē'ē tu chí'ido'osō.

¹¹ Bōa' sínia' na' guzóaba', pero bití' zóaba' na'a, ruluí'i tu bōnni' izxunu', inná bē'ē. Nunē' tsōzχōn bōnni' gadxi na', ate' tōdi ni nítie' tsaz.

¹² Chi lúzuba' na' bilé'enu' tu'luí'i chiē' bōnni' ila'nná bē'ē. Bití' ta'zíninē' yōl-la' unná bē', pero ila'zī'ē yōl-la' unná bē' tu chí'ido'osō, en ila'nná bē'ē tsōzχōn len bōa' sínia' na'.

¹³ Chiē' bōnni' ni, lēbisō nácagaquiē', ate' ulu'dōdē' yōl-la' unná bē' quégaquiē', en le nazí' lu ná'agaquiē' lu ná'aba' bōa' sínia' na'.

¹⁴ Ila'díl-lalenē' Bōnni' na' náquiē' Bō'cu' Zxíla'do', pero Lē' ucul-lē' légaquiē', tu' náquiē' Xángaca yúgu'tē nupa nácagaca xan, en náquiē' Bōnni' rinná bé'enē' yúgu'tē nupa ta'nná bē'. Nupa nacuá' len Lē', bulidzē' Dios léguequi, en gurōē' léguequi, ate' tsaz dá'gaca Lē'."

¹⁵ Gubáz lá'ayi na' gudxē' ca' neda', gunnē': "Yugu' nísado' na' bilé'enu' gapa ni' rō'ōnu nigula udá dzaga na', tu'luí'i bōnachi yugu' yōdzō, en yugu' bōnachi izá'a, en bōnachi tuí'i yugu' didza' yúbölō, en bōnachi yugu' luyú.

¹⁶ Chi lúzuba' bōa' sínia' na' bilé'enu', en tu'luí'i chiē' bōnni', bití' ila'lé'enē'-nu nigula udá dzaga na' dxi'a, ate' ulu'cá'anē'-nu cá'asō, en xiguídisō. Ilahuē' xipēla'nu, en ulu'zégui'ē'-nu len guí'.

¹⁷ Dios uchíziē' icja ládxi'do'gaquiē' chiē' bōnni' na' le gun ga ilunē' ca ré'eni quézinē' Lē', ate' ilácagaquiē' tuz, en ulu'dōdē' yōl-la' unná bē' quégaquiē' lu ná'aba' bōa' sínia' na' para gaca ca rnna xtídzē'ē.

¹⁸ Nigula na' bilé'enu'-nu ruluí'i yōdzō zχōn na' rinná be'e nupa ta'nná bē' yōdzōlió ni."

18

Riguinnaj yödzö Babilonia

¹ Gudödi na' bil'éda'-në' ia'túé' gubáz lá'ayi ruhuötjè' rirúajè' yehua' yubá, en dë lu në'ë yöl-la' unná bë' zxon, ate' guyëpi yösa bení' luyú ni'a que yöl-la' bení' queé' gubáz lá'ayi na'.

² Bë'ë zidzaj didza' gubáz lá'ayi na', gunnë':

¡Chibiguinnaj! ¡Chibiguinnaj Babilonia, yödzö zxon na'!

¡Chibóaca xilataj tu' xihui', en xilátjagaca bö' xihui' tun ditaj bönachi!

¡Yugu' biguinni xitsiní', en yugu' biguinni xihui' tu'zóaba' xilátajgacaba' ni'!

³ Caní guca que yödzö na' ni'a que le gulún bönachi nacua' ni'.

Guluné' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquié' le ruá' dö', ate' guta' yöl-la' tsahui' quégaquié' bönni' to'o tuti' nacu'ë yödzölió tu' guyánda' yugu' le nazaca' gula'zë ladxi' bönachi ni'.

⁴ Ní'irö biyönda' ruí' didza' ia'tú nu zoa yehua' yubá, rnna:

Gulí'ruaj lu yödzö na', libí'ili' néquili' quia' para cabí gunli' dul-la' tsözxón len légaquié', en para cabí quí'í sáca'li' le gaca quégaquié'.

⁵ Nayánda' dul-la' nabága'gaquié',

en chinayasa nadxín caz lúzxiba,

pero Dios röjnené' le ruá' dö' núngaquié'.

⁶ Bulí'bí'í quégaquié' ca na' guluné' queéli'.

Bulí'bí'í quégaquié' chopa cö' tsca le guluné'.

Bulí'bí'í quégaquié' chopa cö' tsca le naca xihui' guluné' queéli'.

⁷ Gulí'gún ga ila'guí'í ila'záquié', en ila'bödxí yéché'ë tsca guca yöl-la' ba, en yöl-la' zxon guluí'í cuíngaquié'.

Ta'zá' ládxi'gaquié', ta'nnë':

Rö'ötu' ni, rinná bë'ëtu'.

Biti' nácatu' uzëbi, en catu caz cödxí yéchi'tu'.

⁸ Que lë ni na', tu dzasö ila'dxín quégaquié' le ila'guí'í ila'záquié',

yöl-la' guti, en yöl-la' ribödxí yechí', en yöl-la' ridún.

Iléguié' lu guí', tu' napa cazë' yöl-la' huáca zxon Xanru' Dios.

Lë cazë' usiúdxé' quégaquié'.

⁹ Ní'irö gunnë': "Ila'bödxí nupa ta'nná bë' luyú yödzölió, en gulún le ruá' dö' tsözxón len légaquié', en bulu'zí' xibé le nequi quégaquié'. Ila'bödxé', en ila'bödxí yéché'ë cate' ila'lé'ené' dzön que yödzö zxon na' régui.

¹⁰ Zi'tu' zí'tu'sö ila'cu'ë tu' iládxiné' ca gaca xíguia' le gaca que yödzö na', ate' ila'nnë': ¡Bica' bayechi' Babilonia, yödzö zxon ni, le gúcada' lo! ¡Tu dzasö guca xíguia' que!"

¹¹ Ní'irö gunnë': "Ila'bödxé' ca' bönni' to'o tuti' nacu'ë yödzölió, en ila'bödxí yéché'ë ni'a que yödzö na' tu' cabirö soa nu ga'u bi ilúti'ë ni'."

¹² Cúnturö nu ga'u ni':

Le néquiguequini oro, en plata,

en yugu' guiöj zaca', en yugu' bugá,

en yugu' lari' nazáca'da', en lari' xiná chul-la,

en lari' dxí'ado', en lari' xiná guí'ido'os,

en yugu' yaga rilá' zixixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guië cobre,
 en le néquiguequini guië,
 en le néquiguequini guiöj jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
 en le rilá' zxixi que mirra, en que yöj olíbano,
 en xisi uva nál-la, en le naca za,
 en yiözja dxí'ado', en zxoá' xtila,
 en yugu' búrrodo', en yugu' bö'cu' zxila',
 en yugu' böa', en yugu' carreta,
 en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilë légaquië', ila'nná:

Nadúagaca le guzë ládxi'li'.
 Chigudödi quégaca yöl-la' tsahui',
 en le náca gaca lachi queëli',
 ate' bíti'rö idzöli' léguequi.

¹⁵ Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zi'tu' zí'tu'sö tu' iládxinë' ca gaca xíguia' le gaca que yödzö na', en ila'bödxí yéché'ë."

¹⁶ Ila'nnë':

¡Bica' bayechi' yödzö ni guca zxön!
 Guca ca tu nígula náccunu lari' nazáca'da',
 en lari' xiná chul-la, en lari' xiná guí'ido'os,
 en nazí'i biquitaj queënu le néquiguequini oro
 en le néquiguequini guiöj zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacué' lë'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zí'tu'sö."

¹⁸ Cate' ila'lé'enë' dzön que yödzö na' régui, ila'bödxë', en ila'nnë':
 "¿Bízxilö yödzö guca zxön ca naca yödzö ni?"

¹⁹ Ní'irö gunné':

Ulu'dxíë' bëchtö ícjagaquië'.
 Ila'bödxë', en ila'bödxí yechë'ë, ila'nnë'.
 ¡Bica' bayechi' yödzö ni guca zxön!
 Yöl-la' tsahui' que yödzö ni ben ga guta' yöl-la' tsahui'
 quégaca yúgu'të nupa náca gaca xan barco lu nísado'.
 Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali' yehua' yubá,
 enca' libí'ili' néquili' queë' Dios,
 libí'ili', bönni' gubáz queë',
 en libí'ili', bönni' ruí'ili' didza' uláz queë'.
 Buli'dzeja, tu' chiguchúguië' Dios que yödzö ni
 ni'a que bi gulún queëli' nupa nacué' lu yödzö ni.

²¹ Ní'irö tuë' gubáz lá'ayi nál-la buchisé' tu guiöj zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,
 tu' iguínaj yödzö na' guca lo,
 ate' bíti'rö nu udzöli le.

²² Bíti'rö nu yöni lu yödzö na' nupa ta'guínni lë'e le rul-la,
 en calëga nupa tu' cödxí gui

en calëga nupa tu'cödxí lúzuba' böa' bëdxi.

Bítirö udzöli bönni' huen dxin ni',
en bítirö yöni bö rigú'u le rutu ni'.

²³ Bítirö uzení nitú guí' lu yödzö na',
en biti' yöni chi'ë bönni' rutsaga në'ë ni',
en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzö ni,
en guzxi' yé'eli' bönachi idútë yödzölió len yöl-la' gudzá' queéli'.

²⁴ Lu yödzö ni gulaj xichöngaquië' bönni' gulu'ë didza' uláz queë' Dios,
en xichöngaca nupa néquiquequi queë' Dios,
enca' xichöngaca yúgu'të bönachi yödzölió,
tu' bëtigaca nupa nacua' yödzö ni léguequi.

19

¹ Gudödi lë ni biyönda' tuí'i zidzaj didza' bönachi zián nacua' yehua'
yubá, ta'nná:

¡Yöl-la' ba Dios! ¡Yöl-la' rusölá runë',
ate' yöl-la' zxon, en yöl-la' unná bë' napë Dios queëru'!

² ¡Naca idútë li, en tsahui' ca rusiúdxë'!
¡Guchúguië' que yödzö na' naca ca tu nigula udá dzaga,
en quégaca bönachi lu yödzö na' ila'niti tsaz!
¡Gulún ditaj bönachi yödzölió tu' nözi le ruá' dö' gulunë'!
¡Dios buzi' lëbë' légaquië'
tu' gulútië' yugu' huen dxin queë'!

³ Leyübölo gula'nnë': "¡Yöl-la' ba Dios! ¡Cuéntica'sö dzön ga régui yödzö na'!"

⁴ Idapa uru'ë bönni' gula ni' bulu'tsaga lógaquië' lu yu tsözxön len idapa
nupa ni' nabángaca, en ta'yéaj ládxi'gaquië' Dios, Bönni' rö'ë lataj lo queë'.
Gula'nnë': "¡Ca' gaca! ¡Yöl-la' ba Dios!"

⁵ Ní'irö biyönda' ruí'i didza' tu nu zoa lataj lo na', rnna:
¡Guli'cu'ë Dios queëru' yöl-la' ba
yúgu'tëli' runli' xichinë', libí'ili' na' rádxili' Lë',
nácali' bönachi cá'asö, en bönachi lo!

Laní que yöl-la' rutsaga na' queë' Bönni' náquië' Bö'cu' Zxíla'do'

⁶ Biyönda' ca' nu ruí'i zidzaj didza', le biyön ca riyön cate' tuí'i didza'
bönachi zián, en biyön ca' ca riyön ga ridödi tu yegu zxon, o ca riyön cate'
rinnë guziú', ate' rnna:

¡Yöl-la' ba Dios tu' risí lahuë' rinná bë'ë!
¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibë',
en cú'uru'-né' yöl-la' ba
tu' chibidxín dza laní que yöl-la' rutsaga na'
queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiquequi queë'!
¡Chinabá'a queëbi' bi'i utsaga ná'alénbi' Lë'!
¡Nácabi' le ruluí'i nupa na' néquiquequi queë'!

⁸ ¡Dios ru'ë-bi' lataj gácubi' lari' nazáca'da'
le naca idú, en rëpi yösa bení'!

Lari' nazáca'da' na' ruluí'i le naca tsahui' núngaca nupa néquiquequi
queë' Dios.

9 Ní'irō gubáz lá'ayi na' gudxë' neda', gunnë': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bō'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios caz'!"

10 Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca' nacu' li', en ca nácaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí' didza' uláz queë' Dios, tuí' didza' le naca idútë li ca naca queë' Jesús.

Bönni' dxíë'-ba' böa' chiguichi

11 Ní'irō bilé'eda' nayalaj lúzxiba, ate' bulu'í loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ru'í' Didza' Le Nácatë. Caní lë' tu' ruchi'a rusöröë' ca naca le naca idútë li, enca' caní tsejë' gudil-la.

12 Rëpi yōsa bení' guiōj lahuë', le náca gaca ca guí', en dxíagaca icjë' zían le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nözinë'.

13 Nácüë' tu lari' në'aj rön, en lë' ca' "Nu Naca Xtídzë'ë Dios."

14 Rōjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácaquië' lari' nazáca'da', le naca chiguíchido'os, en bití' naca bōsaj.

15 Rirúaj ru'ë le naca ca tu guíë tuchi' le gúninë' zì' bōnachi yugu' yōdzō. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'.

16 Nazúaj lu lari' nácüë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Náca gaca Xan."

17 Ní'irō bilé'eda'-në' tuë' gubáz lá'ayi zuinë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxōn queë' Dios!"

18 Gáguli' xipéla' gaca nupa ta'nná bë', en xipéla' gaca nupa ta'nná be'e bönni' rōjáquië' gudil-la, en xipéla' gaca nupa nál-lagaca, en xipéla' gacaba' böa', en xipéla' gaca nupa ta'bía légacaba', en xipéla' gaca yúgu'të bōnachi, nupa bití' nadó'ogaca, en nupa nadó'ogaca, nupa náca gaca cá'asō, en nupa náca gaca lo."

19 Ní'irō bilé'eda'-ba' böa' sínia' na', enca' yugu' bönni' ta'nná bë'ë yōdzōlió, en bönni' rōjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu.

20 Bidzunba' böa' sínia' na', enca' bönni' na' bë'ë didza' uláz queë'ba', bönni' na' benë' yugu' le nácada' bë' loba', en guzxi' yé'enë' nupa ni' guluí' lataj nu uzúaj láhuiguequi lë' na' naca bë' dá' gaca lëba', en gula'yéaj ládxi' gaca budó' queë'ba'. Böa' sínia' na', enca' bönni' na' bë'ë didza' uláz queë'ba', gula' rú'unë' léguequi nabángacasō ca' ga rō'ō guí' zxōn le réguilen lë' na' ruzégui'da'.

21 Bönni' na' dxíë'-ba' böa' chiguích bëtië' yúgu'të nupa na' gudá' gaca léguequi len guíë tuchi' na' rirúaj ru'ë, ate' bulu'huōljaba' yúgu'tëba' böa' na' ta'daba' lúzxiba, tu' guláguba' xipéla' guequi.

20

Chi gayuá' iz

¹ Gudödi læ ni bilé'eda' ruhuötjè' tu gubáz lá'ayi, zè'è yehua' yubá, en zönè' zxi'ini guié que lataj chul-la, ate' nu'è tu du guié yödx.

² Guzxönè'-ba' bëla zxön xitsini' na', nácaba' bëla guzóaba' dza ni'te, bëla na' læba' Tu' Xihui', enca' Satanás, ate' béguè'è-ba', en buca'anè'-ba' caní chi gayuá' iz.

³ Yöjchú'unè'-ba' lataj chul-la, en busayjè' lataj na', ate' budè'è tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixè' yénguequi yugu' bönni' biti' nácagaquiè' tsahui' tu' gulún ba nalí queè' Jesús, en tu' gulún libán que xtídzè'è Dios. Yugu' bönachi ni biti' gula'yéaj ládxi'gaca böa' sínia' na', en budó' queéba', en biti' gulu'i lataj nu uzúaj ra' xigáquequi, o lu nè'eguequi læ na' naca bë' nu da' læba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz,

⁵ pero ia'zica'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö.

⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queè' Dios, enca' queè' Cristo, ate' ila'nná bë'len Lè' chi gayuá' iz na'!

⁷ Cate' izá'a chi gayuá' iz na', ulu'sanè' Satanás ga na' nadzún.

⁸ Urúaj Satanás, en tsöjzxi' ye'e bönachi yugu' yödzö nacuá' idapa la'a yödzöliö. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön.

⁹ Guizxi yusö gula'dödè' idütè luyú, ate' gula'cu'è læ'ajlö lataj ga na' nacuá' bönachi néquiquequi queè' Cristo, le naca yödzö na' nadxi'inè' Dios. Ní'irö benè' Dios ga böxaj guí' le birúaj yehua' yubá, le buzegui' légaquiè'.

¹⁰ Tu' xihui' na' nazí' ye'e légaquiè', yöjchú'unagaquiè' le ga rö'ö guí' zxön que læ na' ruzégui'da', ga na' chizóaba' böa' sínia' na', enca' bönni' na' bë'è didza' uláz queéba'. Ila'guí'i ila'zaca' ni' rëla, en te dza yúgu'tè iz zá'gaca.

Ta'dxín bönachi lahuè' Dios ga rö'è ruchi'a rusöröè'

¹¹ Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröè' lataj na'. Lahui' lo Nu ni gula'nítite yödzöliö, en lúzxiba, ate' bíti'rö budzöli xilátjaguequi.

¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinè' lahuè' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröè' Dios nupa na' chinátigaca tsca naca le nazúaj yugu' lu guichi na', læ na' gulúngaca.

¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröè' Dios tu tu tsca naca le gulúngaca.

¹⁴ Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö.

¹⁵ Nupa biti' nazúajgaca lu guichi quégaca nupa nadéligaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bítirö dë nísado'.

² Neda', Juan, bilé'eda' yödzo lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queëbi' bi'i nigula chizóa utsaga ná'alenbi' tu bönni'.

³ Biyönda' ru'fi didza' nu rnna yehua' yubá: "¡Buli'yútsöca'! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi!"

⁴ Dios uzxië' nisa ribödxí zoa guiöj lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö."

⁵ Ní'irö Nu na' rö'ö lataj lo ni' gunná: "¡Buyútsöca'! ¡Yúgu'të ruúna' cubi!" Gudxi ca' neda': "¡Buzúaj lu guichi lë ni, tu' naca idútë li didza' ni, en naca löza!"

⁶ Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga gu'aj nisa na' runna yöl-la' na'bán!"

⁷ Nupa ila'deli' lu le raca yödzoilió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxi'ini caza',

⁸ pero nupa tadxi, en nupa biti' ta'yéajlë' neda', en nupa náca'gaca xihui', en nupa tuti bönachi, en nupa tun le bití' naca tsahui', en nupa náca'gaca udzá', en nupa ta'yéaj ládxi'gaca budó' guiöj budó' yaga, en yúgu'të nupa ta'z'í yë', chizóa riböza xilátjaguequi lu guí', ga ni' rö'ö guí' zxön que lë na' ruzégui'da', lë na' naca yöl-la' guti le raca burópilö."

Yödzo Jerusalén le naca cubi

⁹ Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxi'ga'do' yúdxugaca gadxi yödzo'huë' yöjsétegaca, bidë' ga zoa'. Gudxë' neda': "¡Gudá ni! ¡Ulu'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

¹⁰ Guzóalenë' Dios Bö' Lá'ayi neda', ate' guchë'ë gubáz lá'ayi na' neda' tu lu guí'a sibi, en bulu'inë' neda' yödzo lá'ayi Jerusalén, ruhuötaj, rirúaj yehua' yubá ga zoë' Dios.

¹¹ Yödzo ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guiöj nazáca'da' ca naca guiöj guí'do'os nazí'i le jaspe. Naca yödzo na' yení'ido' ca naca guiöj jara.

¹² Zoa tu zö'ö zxön, en sibi idú gásibi'ilö yödzo na'. Lë'e zö'ö na' nacua' chinnu gapa nu riyaza. Ra' gapa nu riyaza na' nacu'ë chinnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cö' di'a dza zxi'ini xi'söë' Israel.

¹³ Lë'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsölá'a ga ridödi gubidza beo' ziaga nacua' tsonna gapa nu riyaza, en saca' ga ribia gubidza nacua' ca' tsonna gapa nu riyaza.

14 Zxan zö'ö que yödzo na' nacuá' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxínmute' bönni' gubáz queë' Bönni' na' náquië' Bö'cu' Zxíla'do'.

15 Gubáz lá'ayi na' ru'ilenë' neda' didza' zönë' tu yaga urixi le néquini oro para urixë' tsca naca yödzo na', en tsca náca gaca gapa nu riyaza, en tsca naca zö'ö que.

16 Yödzo na', lédi'i náca gaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzo na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que.

17 Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lë na' rurixinë' gubáz lá'ayi na'.

18 Zö'ö na' néquini guiöj jaspe, ate' yödzo na' néquini órotëz, le naca yení'ido' ca naca guiöj jara.

19 Yugu' xilibi zö'ö que yödzo na' nazi'gaca biquitaj guiöj nazáca'da'gaca.

Xilibi zö'ö zí'alö néquini guiöj jaspe.

Le buropi néquini guiöj zafiro.

Le bunny néquini guiöj ágata.

Le budapi néquini guiöj esmeralda.

20 Le guyu' néquini guiöj ónice.

Le buzxopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxí néquini guiöj crisoprasa.

Le idxinéaj néquini guiöj jacinto.

Le idxinnu néquini guiöj amatista.

21 Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nōza lo que yödzo na' néquini órotëz, le naca yení'ido' ca naca guiöj jara.

22 Biti' bilé'eda' tu yudo' lu yödzo na', tu' náquië' Xanru' Dios yudo' que, napa cazë' idútë yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzo na'.

23 Biti' run bayudxi tsení'gaca gubidza, en beo' lu yödzo na', tu' uzení' yöl-la' bení' queë' Dios lu yödzo na', ate' lësca' Bönni' náquië' Bö'cu' Zxíla'do' náquië' le uzení' ni'.

24 Bönachi yugu' yödzo, nupa nulágaca, ila'dá lu bení' que yödzo na', ate' yugu' bönni' ta'nná bë'ë yödzo lío idiguá'agaquië' yöl-la' tsahui' queégaquië' lu yödzo na'.

25 Catu caz tsáyajgaca gapa nu riyaza lu yödzo na' lahui' dza, ate' lataj na' catu caz gaca rëla.

26 Bönachi yugu' yödzo idiguá'agaquië' ni' le náca gaca lesaca', en yöl-la' tsahui' queéqueqi.

27 Tu le ruá' dö' biti' ca' tsaza ni', en calëga tu le naca xihui', en calëga nu rizí' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22

¹ Ní'irō gubáz lá'ayi na' buluí'inē' neda' tu yegu yení'ido', le naca nisa yegu le runna yöl-la' na'bán. Rēpi yōsa bení' yegu na' ca rēpi yōsa bení' guiój jara. Rirúaj yegu na' lu lataj lo ga rō'ē Dios, en ga rō'ē ca' Bōnni' náquiē' Bō'cu' Zxíla'do'.

² Rizá' yegu ni gatsaj láhui'lō nōza lo que yōdzō na'. Tsólá'a huéaj ra' yegu na' rō'ō tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō.

³ Biti' soa ni' nitú le dxía dō'. Soa lu yōdzō na' lataj lo ga rō'ē Dios, enca' ga rō'ē Bōnni' náquiē' Bō'cu' Zxíla'do', ate' yugu' huen dxin queē' ila'yéaj lādxi'gaquiē' Lē'.

⁴ Ila'lē'enē' lahuē' Lē', ate' le nazí'i Lē' nazúaj ra' xigágaquiē'.

⁵ Biti' gaca rēla ni', ate' nupa nacuá' ni' bití' ila'quínna tu le cu'u bení', en calēga bení' que gubidza, tu' gáquiē' Xanru' Dios bení' quégaquiē'. Nupa nacuá' ni' ila'nná bē'tica'sō.

Chizóa huōdē' Cristo

⁶ Ní'irō gubáz lá'ayi na' gudxē' neda', gunnē': "Didza' ni naca idútē li, en naca lōza. Xanru' Dios, Nu ruchiza Bō' Lá'ayi icja lādxi'do'gaquiē' yugu' bōnni' tu'ē didza' uláz queē', chigusól-lē'ē gubáz lá'ayi queē' para uluí'inē' yugu' huen dxin queē' le ral-la' gácatē.

⁷ Caní rnnē' Jesucristo: ¡Chizóa huōda'! ¡Bica' ba nu run ca rnna didza' ruá'a uláz queē' Dios, le nazúaj lu guichi ni!"

⁸ Neda', Juan, biyōnda', en bilé'eda' yugu' lē ni. Gudōdi biyōnda', en bilé'eda' yugu' lē ni, buzóa zxiba' xini'ē gubáz lá'ayi na' buluí'inē' neda' yugu' lē ni para guna' lē' zxōn.

⁹ Ní'irō lē' gudxē' neda': "Biti' gunu' caní, tu' naca' neda' huen dxin queē' Dios ca nacu' li', en ca nácagaquiē' bōchi' luzó'o na' tu'ē didza' uláz queē' Dios, enca' ca nácagaca yúgu'tē nupa tun ca rnna le nazúaj lu guichi ni. ¡Ben zxōn Dios!"

¹⁰ Gudxē' ca' neda': "Biti' ucachu'u xtídzē'ē Dios ni, didza' ruá'a uláz queē', en nazúaj lu guichi ni, tu' chizóa ilaca yugu' lē ni.

¹¹ Nu ruá' dō' guática'sō dō'. Nu run le cabí naca tsahui' gúntica'sō le cabí naca tsahui'. Nu run dxi'a, gúntica'sō dxi'a, ate' nu nequi quez queē' Dios, guéquitica'sō quez queē'."

¹² Rnnē' Jesús: "¡Chizóa huōda'! Nu'a lu na'a le nadéli'gaca bōnachi, ate' ubi'a que queēguequi tsca naca le gulúngaca.

¹³ Neda' naca' Nu zoa zí'atēlō, enca' Nu rōjsete, ca naca le risí lo, en le ruúdxitē. Naca' ca' Nu run ga risí lo, en Nu rusiúdxí."

¹⁴ Ní'irō gunnē': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuē' le ribía yaga le runna yöl-la' na'bán, en gaca ila'yaza gapa nu riyaza lu yōdzō na'!"

¹⁵ Nupa nácagaca xihuí', en nupa nácagaca udzá', en nupa tun le ruá' dō', en nupa tuti bōnachi, en nupa ta'yéaj lādxi'gaca budó' guiój budó' yaga, en nupa ta'yaza lādxi'gaca ta'zí' yē' ila'cuá' ní'ilō ra' yōdzō na'.

¹⁶ Neda', Jesús, gusól-la'a gubáz lá'ayi quia', ate' buluí'inē' libí'ili' yugu' lē ni, libí'ili' na' dzágali' yugu' cō' bōnachi quia'. Neda' naca' di'a dza queē' David, enca' xzí'ini xi'sóē'. Naca' ca' bōlaj hui sila."

¹⁷ Tu'ē didza' Dios Bō' Lá'ayi, enca' bi'i nigula utsaga ná'alēnbi'-nē' Bōnni' náquiē' Bō'cu' Zxíla'do', ta'nnē': "¡Gudá!"

Nu riyöni didza' ni ral-la' inná: “¡Gudá!”

¡Nu ribidxi nisa, en nu rizé ladxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lè'e didza' ni, Dios ubi'è que nu na'. Gunë' lè' xíguia' ca naca le nazúajgaca lu guichi ni.

¹⁹ Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi lè ni rnnë': “¡Ön! ¡Huödatea'!”

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxe'ë queéli' yúgu'tèli'. ¡Ca' gaca!

YUGU' SALMO

1

1 Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios,
 en biti' ridálenë' tsözxön nupa tun dul-la',
 en biti' runë' tsözxön le tun nupa ta'zí' quidza' Dios.
 2 Le raza ládxë'ë náca gaca xibá naguixjé' Xanru',
 en ca náca gaca xibá na' rëla, en te dza rulaba ládxë'ë.
 3 Bönni' ni náquië' ca tu yaga dxe' ga naca ra' nisa,
 le ribía sizxöni cate' ridxín dza que,
 en biti' ca' rizóa gubá' ayisö.
 Yúgu'të le runë' ta'rúaj dxi'a.
 4 Biti' raca caní quégaca nupa tuá' dö'.
 Náca gaca ca bëbu zxe café ruá' le bö'.
 5 Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë'
 quégaquië',
 en biti' ila'cu'ë bönni' dul-la' ga tu'dubë' bönni' tsahui'.
 6 Rapa chi'ë Xanru' Dios nöza ga ta'dë' bönni' tsahui' na',
 pero uniti tsaz nu ridá gapa ta'dá nupa tuá' dö'.

2

1 ¿Bizx que tu'tsatsa bönachi yugu' yödzö
 en tu'pá'a nítisö le ilúngaca?
 2 Bönni' ta'nná bë'ë luyú ta'dá'baguë'ë Dios.
 Tun tuz xtídza'gaca nupa dë lu ná'agaca
 para ila'dá'baga' Xanru', en Nu na' nabö cazë' para inná bë'ë,
 3 ta'nná: "Uzxuzxaj uquínajru' le ta'nná bë'enë' rë'u,
 en chú'unaru' yugu' le tu'zenë' bach rë'u."
 4 Dios na' zoë' yehua' yubá uzxídxisë'.
 Xanru' Dios utitaj cazë' léguequi.
 5 Ní'irö lu yöl-la' rilé queë' güi'ilenë' léguequi didza',
 en lu yöl-la' ridzá'a queë' uzenë' bach léguequi.
 6 Innë': "Nuzóa caza' bönni' nabö caza' xilatjé' ga inná bë'ë.
 Inná bë'ë lu Guí'a Sión, le naca guí'a lá'ayi quia'."
 7 Quíxjö'ida' libí'ili' didza' nuzóë' tsaz Dios.
 Xanru' Dios gudxi cazë' neda': "Li' nacu' Zxí'ina'.
 Na'a dza nuzóa caza' Li'.
 8 Gunábini neda', ate' guna' ga ilequi quiu' yugu' yödzö.
 Guequi ca' quiu' idútë yödzölió.
 9 Quitsju' léguequi len tu xiyaga guíë.
 Uzxuzxju' léguequi ca run nu rilá'a tu zxiga' yö'öna."
 10 Que lë ni na', libí'ili' na' rinná bë'ëli', guli'tséajni'i.
 Guli'sedi cuinli', núlöli' ruchi'a rusöröli' le raca luyú.
 11 Lu yöl-la' ba'a ladxi' queëli' guli'gún xichinë' Xanru'.
 Lu yöl-la' rixxizi queëli' buli'sí' xibé'.
 12 Guli'gún bal Zxí'inë' Dios para cabí ilétenë',
 en para cabí udxi queëli' la' nöza.
 La' ilentë yöl-la' rilé queë'.
 ¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.
Zián nupa ta'dá'baga' neda'.

² Zián nupa ta'nné quia', ta'nná:
"Biti' usölé' Dios lé'."

³ Pero Li', Xan, run chí'tica'su' neda'.
Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',
ate' Lë' biyönnë' chi'a ga na' zoë' lataj lá'ayi queë'.

⁵ Neda' rata', en rasia',
ate' rubana', tu' nazóntica'së' Xanru' Dios neda'.

⁶ Biti' gádxida' gayuá' gayuá' bönachi,
nupa na' nagú'ugaca neda' lé'ajlö.

⁷ ¡Guyasa, Xan! ¡Busölá neda', Dios quia'!
Budxía huë' xága'gaca nupa tu'dí'i neda',
en buquínajda' nupa nácagaca xihui'.

⁸ Xan, rusólá cazu' bönachi quiu'.
Ben ga gaca dxi'a quégaca bönachi quiu'.
¡Ca' gaca!

4

¹ Bubí'i didza' cate' rulidza' Li', Dios.
Nacu' Nu ruchi'a rusörö le raca quia'.
Cate' gurö'a böniga, bida cazu' Li' ga zoa', en gúcalenu' neda'.
Ruhuéchi' ladxi' neda', en ruzé nagu' le rinábida' Li'.

² Rnnë' Dios: "Libí'ili', bönachi, ¿gáca'xte ulidza dítajli' neda'?'
¿Gáca'xte caz idxí'ili' le cabí nazaca', en güi'i ládxi'li' le cabí naca?"

³ Guli'tsöjné nabö cazë' Xanru' nu radxi Lë',
ate' riyönnë' neda' cate' rulidza'-në'.

⁴ Guli'gadxi Lë', en bíti'rö gunli' dul-la'.
Guli'sá' ladxi' ca naca lë ni cate' dëli' ga ráta'li', en guli'sóa dxisö.

⁵ Guli'cú'u lahuë' Xanru' le naca dxi'a,
en buli'zxöni ladxi' Lë'.

⁶ Zián nupa ta'nná: "¿Nuzxi caz gun ga gaca dxi'a queëru'?"
Lu yöl-la' dxi'i ladxi' quiu' buyú netu', Xan.

⁷ Runu' ga rudzëjade'eröda'
ca tu'dzeja nupa tu'zí' xibé zxoá' za guizxi yu, en xisi lubá uva.

⁸ Cate' rata', la' rásitia' lu yöl-la' riböza dxi ladxi' quia',
tu' run cazu' Li', Xan, ga riböza' dxi'a tsáhui'do'.

5

¹ Ruzé nagu' didza' ruá'a, Xan.
Buyú ca rinnëda' ládxa'a lu yöl-la' ruhuí'ini quia'.

² Dios quia', Nu rinná be'e neda', ruzé nagu' cate' rinábida' Li'
gúcalenu' neda', na' güi'ilena' Li' didza'.

³ Yugu' zila yönnu' chí'a.
Zílado' idxina' lo', en cöza' didza' ubi'u.

⁴ Nacu' Li' Dios bití' raza ládxi'u le cabí naca,

en biti' ru'u lataj ibiga' ga zu' nu ruá' dō'.

⁵ Biti' ru'u lataj nupa tun ba rahui ila'dxín lo',
en biti' rilé'enu' dxi'a nupa nácgaca xihui'.

⁶ Rusunítu' dērō nupa ta'zǐ' ye'e luzé'eguequi,
en biti' rilé'enu' dxi'a nupa tuti bōnachi, en ta'zǐ' yē'.

⁷ Gaca tsu'a neda' lu yu'u lidxu', tu' nadxǐ'ide'enu' neda'.

Lu yōl-la' ba'a ladxi' quia' tsu'a ga naca yudo' lá'ayi quiu', en tseaj ládxa'a
Li'.

⁸ Tu' nacuá' zǐán nupa ta'lé neda', buluí'i neda' le naca dxi'a rē'ēnu' guna',
Xan.

Busēdi neda' para gaca guna' ca rē'ēnu' Li'.

⁹ Biti' gaca nu tseajlé' didza' tuí'i nupa na' ta'lé neda'.

Nácgaca xihui' icja ládxi'do'guequi.

Naca ruá'agaca ca tu yeru ba nayalaj,

en lu yōl-la' rizǐ' yē' quéguequi tuí'i yulaj didza'.

¹⁰ Ben léguequi xiguia', Dios.

Ben ga biti' udxín xtídza'guequi.

Gurú'una léguequi tu' túntica'sō dul-la',

en tu' ta'dá'baga' xtídzu'u.

¹¹ Ulu'dzeja nupa tu'zxōni ladxi' Li'.

Lu yōl-la' rudzeja quéguequi gúl-lagaca quiu' tu' rácalenu' léguequi.

Tu'zǐ' xibó' nupa nadxǐ'igaca Li'.

¹² Run cazu' Li' ga raca dxi'a quégaca nupa tun ca rnna xtídzu'u, Xan.

Lu yōl-la' dxi'i ladxi' quiu' run chí'u léguequi.

6

¹ Biti' uzenu' bach neda' lu yōl-la' rilé quiu', Xan.

Biti' gunu' neda' xiguia' lu yōl-la' ridzá'a quiu'.

² Buéchi' ladxi' neda', Xan, tu' rudú ládxa'a.

Bun neda', Xan, tu' riguí'i rizáca'a.

³ Rō'ō bōniga idútē le naca'.

¿Gáca'xte caz gaca caní, Xan?

⁴ Gudá dusoló' neda', Xan.

Tu' nadxǐ'inu' neda', busölá neda' lu yōl-la' guti.

⁵ Lu lataj chul-la cuntu nu tsōjné Li'.

Cuntu nu zoa ni' nu gaca cu'u Li' yōl-la' ba.

⁶ Rudú ládxa'a tu' rinnética'sō ládxa'a.

Yugu' dzō' ribisa le ráti'da' len nisa ribōdxi quia'.

Rusubisa' xcúgua' len nisa ribōdxi quia'.

⁷ Rō'ō gui guiój lahua' tu' ribōdxitica'sa'.

Biti' gaca ilé'eda' tu' nōzigaca nupa tu'dí'i neda'.

⁸ Guli'cuíta ga zoa', libí'ili', ruá'ali' dō',

tu' riyōnné' Xanru' ribōdxa' neda'.

⁹ Ruzé naguē' le rulidza', ráta'yua' lahuē',

en rubi'ē didza' cate' bi rinábida' Lē'.

¹⁰ Ulu'tuí'i nupa tu'dí'i neda', en ila'bō' bōniga.

Lu yōl-la' rutuí'i quéguequi ulu'biga' ga zoa'.

7

¹ Ruzxōni ládxa'a Li', gácalenu' neda', Xana' Dios.

Busölá neda' lu ná'agaca nupa ta'bía no neda', en gúcalen neda'

² para cabí soa nu cuéaj neda' ca runba' bēdxi guixi',
en para cabí usuniti neda' ga cuntu nu zoa gácalen neda'.

³ Xana' Dios, channō caní nuna':

Channō nabága'a xiguia',

⁴ o channō bubí'a dō' que nu gúcalen neda',
o channō bí'a dō' que nu bití' bi ben quia' lu bití' rilé'e neda' dxi'a,

⁵ bē' lataj soa regu' neda' nu na' bití' rilé'e neda' dxi'a, en ucul-la neda'.

Bē' lataj nu na' quin neda' lu yu,

en ucá'ana neda' cá'asō.

⁶ Lu yōl-la' rilé quiu' guyasa, Xan.

Gudá'baga' nupa na' lu yōl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchí'a rusörö le raca quia'.

⁷ Ben ga ulu'dubi quiu' yúgu'tē bönachi,
en gunná be'e léguequi ga ni' zu' xitsá'tērō.

⁸ Ruchí'a rusöröu' quéguequi yúgu'tē bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú
tsahui'.

⁹ Ben ga udxí que le xihui' tun nupa tuá' dō',

pero buzóa tsutsu nupa tun le naca dxi'a,

tu' nacu' Li' idú tsahui', Dios, en ruchí'a rusöröu'

le ta'zá' ládxi'gaca bönachi, en le ta'guínnaj ícaguequi.

¹⁰ Naca cazē' Dios Nu run chí'i neda'.

Rusölē' nupa náca'gaca idú ládxi'.

¹¹ Dios ruchí'a rusöröē' queēru' ca naca le naca tsahui',

en richúgutica'sē' quégaca nupa tuá' dō'.

¹² Channō cabí ulu'bí'i ládxi' bönachi, utuchē' guíe tuchi' queē'.

Chinucözē' uxiti' yaga queē'.

¹³ Chinupē'ē' yugu' le rudí'inē' lu gudil-la,

en nudxiē' lu du uxiti' yugu' yaga túchi'do' zoa guí' láhuiguequi.

¹⁴ Buyútsöca', riguínnaj icjē' bönni' ru'ē dō' le xihui' gunē'.

Ruí'i ládxi'ē' le naca dō', en rizí' yē'ē.

¹⁵ Nachō'önē' ga rē' tu yeru zxön ga nu ibixi,

pero lē cazē' yōjbixē' lu yeru na' guchō'önē'.

¹⁶ Budxín la' queézē' dō' na' bí'ē,

en dxiē' huē' ca naca xiguia' nabáguē'ē.

¹⁷ Guía'-nē' Xanru': "Xclenu" tu' náquiē' tsahui',

en gul-la' yōl-la' ba que Lē' Xanru', Nu nayépisētērō.

8

¹ Xana' Dios,

bica' ba Lo' idútē yōdzölió!

¡Xitsá'tērō ca lúzhiba nayépisu' Li'!

² Túl-labi' bí'ido', enca' bí'i huē'énido' yōl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' bití' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzhiba quiu', le nunu' len xibön na'zu',

enca' beu', en yugu' bōlaj bení' nuzú' xilátjaguequi,

⁴ ní'irö rnnía': ¿Bizxi caz bönni', tu' röjné cazu' lē'?

¿Bizxi caz nu naca bönáchisö, tu' ru'í ládxi'u Li' nu na'?

⁵ Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca tu le néquini oro dxía icjë'.

⁶ Nunu' ga rinná bé'ené' yugu' le nun cazu' Li'.

Yúgu'tè nuzú' xini'è lé'.

⁷ Nuzú' xini'è yúgu'tèba' bö'cu' zxila', en yúgu'tèba' bédxi,

⁸ en lès caní nunu' ca' quégacaba' biguínido',

en quégacaba' böla dzö'öba' nísado',

enca' quégacaba' yúgu'tèba' böa' ta'dödiba' lu nísado'.

⁹ ¿Xana' Dios,

bica' ba lo' idütè yödzülió!

9

¹ ¡Idú ládxa'a rigu'a Li' yöl-la' ba, Xan!

¿Usiyönda' bönachi ca naca yúgu'tè yöl-la' huáca nunu'!

² ¿Udzéjada', en uzi'a xibó'!

¿Gul-la' yöl-la' ba que Lo', tu' nayépisëtëru'!

³ ¿Ta'zxunnaj nupa ta'dá'baga' neda'!

¿Ta'dzö'ö, en tu'niti lo' Li',

⁴ tu' nubéaju' tsahui' le naca dxi'a runa'!

¡Rö'u ga rinná bé'u, en ruchi'a rusöröu' queëtu' ca naca le naca tsahui'!

⁵ Bulidza zi'u yugu' yödzü, en busunítu' nupa tuá' dö'.

Tsaz busulu' lu guichi quiu' gapa gula'zúaj léguequi.

⁶ Chigula'niti nupa gula'dá'baga' Li'.

Tsaz naguúnnajgaca gapa gula'cuá'.

Busunítu' yugu' yödzü gapa na' gula'cuá',

ate' cuntu nu zoa röjné yugu' yödzü na'.

⁷ Zóatica'së' Xanru' Dios.

Naguijë' tsaz lataj ga rö'è rinná bé'è en ruchi'a rusöröë' quégaca bönachi.

⁸ Uchi'a usöröë' quégaca bönachi yödzülió lu le naca tsahui'.

Uchi'a usöröë' quégaca yugu' yödzü lu le nácatë.

⁹ Gun chi'è Xanru' Dios nupa nácacaga yechi'.

Gácalenë' léguequi cate' nu gun léguequi zi'.

¹⁰ Ulu'zxöni ladxi' Li' nupa núnbë'gaca Lo'.

Caní gaca, Xan, tu' cabí nusán ládxi'u nupa tu'guilaj Li'.

¹¹ Guli'gul-la yöl-la' ba queë' Xanru', zoë' ga na' nazí'i le Sión.

Buli'siyön bönachi yugu' yödzü ca naca yugu' le nunë'.

¹² Bití' ral-la ládxi'è nupa ta'gu'í ta'zaca' cate' tu'lidza Lë',

tu' röjné léguequi Nu na' ruzí' lëbi nu ruti bönachi.

¹³ Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

¹⁴ para gaca usiyönda' bönachi yöl-la' ba quiu' Li'.

Ga naca ga nu tsaza yödzü quiu' nazí'i le Sión,

udzéjada' tu' nusöló' neda'.

15 Yöjbíxigaca bönachi yugu' yödzo lu yeru gula'chö'öna ga tsöjbíxigaca luzé'eguequi.

Bila'röli ni'aguequi lu yöxaj bulu'cachi' para ila'zön léguequi.

16 Chinuné' Xanru' Dios ga núnbë'gaca bönachi Lë' tu' buchi'a busöröë' quéguequi.

Lu lë na' nun nu ruá' dö' zön la' cuinsi.

17 Ila'yaza lataj chul-la nupa tuá' dö',

yúgu'të nupa na' nal-la ládxi'gaca Dios.

18 Calëga tsaz ulu'gá'ana cá'asö nupa ta'yadzaj ta'yudxi,

en biti' initi tsaz yöl-la' run löza quégaca nupa nácgaca yechi'.

19 Guyasa, Xan.

Biti' gu'u lataj tsépisë nu naca bönáchisö.

Buchi'a busörö quégaca bönachi yugu' yödzo.

20 Buxös léguequi, Xan.

Ben ga ulu'únbë' le nácgaca, tu' nácgacasö bönachi.

10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

2 Lu yöl-la' run ba rahui quégaca nupa tuá' dö'

ta'bía no nupa nácgaca yechi'.

Ben ga ila'zön du yalaj na' nucáchi'gaca la' léguequisö.

3 Run ba zxön cuinë' bönni' ru'ë dö' ca naca le xihui' rizë ládxi'ë.

Bönni' ruhuidi'në' rulidza ditjé' luzé'ë, en ruzóë' Dios tsölá'alö.

4 Lu yöl-la' run ba zxön cuinë' bönni' huía' dö' biti' ru'í ládxi'ë Dios.

Rizá'asö ládxi'ë, rnnë': Biti' ca' zoa Dios.

5 Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca bönachi.

Ruzóë' tsölá'alö nupa biti' ta'lé'e lë' dxi'a.

6 Rë' la' cuinsë': "Gatga ichíxida'.

Catu caz bi gaca quia'."

7 Didza' ru'ë nácgaca le rudxía dö', enca' le rizí' yë', en le rudidza' yudxi yugu' luzé'ë.

Ru'ítica'së' didza' le cabí nácatë, en le naca xihui'.

8 Rucachi' cuinë' yugu' lu yödzo.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

9 Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

10 Riguinë' luyú nu na' nazönë'.

Zián nupa rucul-lë' len në'ë nal-la.

11 Rë' la' cuinsë': "Nal-la ládxi'ë Dios.

Nucachi' lahuë', en biti' ca' rilé'enë' le runa'."

12 ¡Guyasa, Xan!

¡Gulís no'o, Dios!

¡Biti' gal-la ládxi'u nupa ta'gu'í ta'zaca'!

13 ¿Bizx que bönni' na' ru'ë dö' nuzóë' Dios tsölá'alö?

Gudxë' la' cuinsë': Biti' uzí' lë' Dios neda'.

14 Li' bilé'e quézinu' lë ni, Xan.

Ruí'i ládxi'u nu riguí'i rizáca', en nu risëbi ladxi',
en zóatica'su' gácalenu' léguequi.

Nu naca bayechi' rigú'u cuini lu no'o, Xan,
tu' zóatica'su' gácalenu' nu riyadza riyudxi.

15 Bugúa yöl-la' unná bē' quégaca nupa tuá' dō', en nácagaca xihui'.
Bubí'i quéguequi ca naca xiguia' nabága'gaca.

16 Inná bē'tica'sē' Xanru' Dios.

Nupa tu'béaj ícaguequi Xanru' ulu'niti tsaz lu xiyú cazē'.

17 Ruzé nagu', Xan, le ta'nábini Li' nupa nácagaca do' ladxi'.

Rutipu' ládxi'guequi, en ruzé nagu' chí'iguequi.

18 Ruchi'a rusöröu' quégaca nupa nácagaca uzëbi,
en nupa zoa nu ribía no léguequi,

para cabirö ulu'xösa bönachi yödzölió ni luzé'eguequi.

11

1 Ruzxöni ládxa'a Xanru' gácalenē' neda'.

¿Naru' guíétso' neda':

“Buzxúnnaj lu guí'a ca runba' biguínido?”

2 Buyútsöca', zóngaca nupa tuá' dō' yaga uxiti'.

Nuzóagaca yágado' lahui tuchi' lu du rusé,
para ilútiē' bagáchi'sö nupa nácagaca dxi'a.

3 Channö ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

4 ¿Zoa cazē' Xanru' yudo' lá'ayi queé'!

Yehua' yubá zoa ga rö'ē rinná bē'ē Xanru' Dios.

Rilé'e guíöj lahuē' para uyúē' le tun bönachi.

5 Rizí' bē'ē Xanru' nu naca tsahui'.

Biti' rilé'enē' dxi'a nu ruá' dō', en nu raza ladxi' ta'dá'baga' yúlahuí'.

6 Gunē' ga sáca'gaca nupa tuá' dō' le usuniti léguequi.

Ubi'ē quéguequi guí', en le ruquéla' guí', en tu bö' régui.

7 Caní gunē' Xanru' tu' náquiē' tsahui', en nadxi'inē' le naca tsahui'.

Nupa tun le nácate ila'lé'e lahuē'.

12

1 Busölá neda', Xan, tu' cabirö zoa nitú nu naca dxi'a,

en bití' gaca nu idzöli nitú nu run ca rnna xtídz'a'a.

2 Ta'zí' ye'e yúgu'tē bönachi luzé'eguequi.

Lu yöl-la' rizí' yē' quéguequi tu'ílen luzé'eguequi didza' yúlajdo'.

3 Xan, buzóa dxisö nupa na' tuí' didza' yúlajdo',

en buzaga' ruí'igaca nupa tun ba zxön cuínguequi.

4 Ta'nná: “Gü'iru' didza' ca rizësö ládxi'ru',

ate' cuntu nu tá'baga' rē'u.

¿Nuzxi caz inná be'e rē'u ca naca didza' ruí'iru'?”

5 Rnnē' Xanru': “Na'a guída' tu' nacuá' nupa tun zi' nupa ta'yadzaj
ta'yudxi,

ate' rinnē ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi.”

6 Huáca uzxöni ládxi'ru' didza' ru'ē Xanru'.

Nácagaca ca guíë plata ba nequi,
le nudxi'a gadxi luzuí tu lu guí' lálë'e.

⁷ Li' caz, Xan, gun chi'u léguequi,
en usöló' léguequi lu ná'agaca nupa tuá' dö' na'a dza.

⁸ Gáti'tës nacuá' nupa tuá' dö',
cate' tun zxön bönachi le ruá' dö'.

13

¹ ¿Gáca'xte caz gal-la ládxa'u neda', Xan?

¿Naru' tsaz gal-la ládxa'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö biti' gaca ila'nná nupa ta'dá'baga' neda', biti' ila'nná: "Bucúl-laru'
lë'."

Biti' gaca ulu'dzeja tu' nőtjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',
tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz, rnnë': Biti' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyúë' luyú ni ga nacuá' bönachi

para ilé'enë' channö zoa nu réajni'i, nu na' riguilaj Dios.

³ Yúgu'të' nadödigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Biti' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' bönachi tsahui'.

⁶ Tu'titaj xtídza'gaca nupa nácagaca yechi',

pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,

ulu'dzeja xzí'ini xí'sóë' Jacob, bönachi Israel, en ulu'zì' xibë' Dios.

15

¹ ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

2 Nu na' naca idú ladxi', en run le naca tsahui',
en lu icja ládxi'da'ahui ruí'i didza' le nácatê.

3 Nu na' biti' rizi' quidza' bônachi,
en biti' ruá' dō' que luzê'e,
en biti' ruzê naga nu rizi' quidza' luzê'e.

4 Nu na' biti' run bal nu ruá' dō',
pero run bal nupa tun zxôn Dios,
en sal-la' bi uniti cate' chinún xtidza', biti' ca' rutsá' didza' na'.

5 Nu na' biti' rizi' icja dumí cate' runödzej dumí que tu chí'ido'sō,
en biti' rizi' dumí para si' yê' ca naca le nun nu biti' nabaga' xigua'.
Nu na' run yúgu'tê le caní biti' ca' idzá' xilataja.

16

1 Ben chí'i neda', Dios, tu' ruzxöni ládxa'a Li'.

2 Lu icja ládxi'da'ahua' gudxa'-nê' Xanru':

“Li' nacu' Xana'.

Bíti'rō bi zoa quia' le naca dxi'a, pero tuzu' Li'.”

3 Riyaza ládxi'lēna' nupa nácatagaca queê' Dios luyú ni,
en nupa nácatagaca idú ladxi'.

4 Ila'yán le ila'guí'i ila'zaca' nupa ta'yéaj ladxi' yugu' dios izá'a.
Biti' ca' cu'a láhuiguequi rōn ca tun bônachi na',
en biti' ulidza' lágaca dios na'.

5 Náquiê' Xanru' Dios Nu nabánida', en Nu ruzi'a xibé.

6 Li', Xan, nuzú' xilatja'.

Lataj na' nuzú' quia' naca le ruzi'a xibé,
en lachi naca lataj na' nequi quia'.

7 Gul-la' yöl-la' ba queê' Xanru', Nu rigú'u yöl-la' neda' le naca tsahui',
ga ridxintê ruzéajni'inê' neda' cate' ni' rasia'.

8 Chinuna' ga zóatica'sê' Xanru' lahua'.

Tu' zoê' cuita' biti' bi utsá' neda'.

9 Que lē ni na' budzeja ládxa'a, en buzi' xibé ládxi'da'ahua',
atē' gun löza le naca' cate' igácha'a yeru ba,

10 tu' cabí ucá'anu' neda' lataj chul-la,
en biti' gu'u lataj uniti nu nequi quez quiu'.

11 Nunu' ga núnbē'a nöza ichê' neda' ga soa' ibana'.

Ga zu' Li' gata' quia' yöl-la' rudzeja idú,
ate' cuitu' Li' uzí'tica'sa' xibó'.

17

1 Ruzê nagu' neda', Xan.

Lu le naca tsahui' quia' rulidza' Li'.

Bê' ladxi' le rinábida' Li' tu' cabí ca' rizi' yê'a.

2 Buchi'a busörö quia'

tu' runu' Li' le naca tsahui'.

3 Núnbē'u Li' le yu'u ládxi'da'ahua'.

Ruyú' neda' chí'i dzö'ölö.

Guzxi' bē'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

4 Runa' ca rinná bē' xibá quiu',

en biti' ca' ruá'a dö' ca tun bal-la bönachi.

⁵ Ridática'sa' la' nöza tsahui' quiu',

en biti' ca' ridöda' tsölá'alö.

⁶ Rulidza' Li', Dios, tu' rubi'u didza'.

Ruzé nagu' yugu' didza' ruá'a.

⁷ Buluf'i lahui yöl-la' dxi'i ladxi' quiu'.

Rusölá cazu' nupa tu'zxöni ladxi' Li'

lu ná'agaca nupa ta'dá'baga' léguequi.

⁸ Ben chi'i neda' ca run chi'u la' guiöj lo cazu'.

Bucachi' neda' cuitu' Li' ca runba' böra, rucáchi'gacaba' börado' zxan xílaba',

⁹ para cabí bi ilún quia' nupa tuá' dö',

nupa na' ta'lé neda', en nagú'ugaca neda' lé'ajlö.

¹⁰ Biti' ca' zóalen léguequi yöl-la' ruhuéchi' ladxi',

ate' tuf'i didza' lu yöl-la' run ba zxön cuínguequi.

¹¹ Gátitës ga ridöda' ta'gú'u neda' lé'ajlö,

en tē'ēni ila'guín neda' luyú.

¹² Nácagaquiē' ca yugu' bēdxi guíxi'do'.

Tē'ēnē' ulu'sunítiē' neda'.

Nácagaquiē' ca yugu' bēdxi guixi'.

Nucachi' cuíngaquiē' para ila'zönē' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guié tuchi' quiu'.

¹⁴ Lu yöl-la' huáca zxön quiu' busölá neda', Xan,

lu ná'agaca nupa tu'zí' xibé na'a dza,

nupa na' nuhuölej nudzé'egaca yöl-la' tsahui' quiu'.

Nayángacabi' xzí'inigaquiē',

ate' tu'cá'anē' lu ná'agacabi' le dē sizzöni quégaquiē'.

¹⁵ pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

18

¹ ¡Nadxi'ide'eda' Li', Xan!

¡Li' rutipa cazu' ládxa'a!

² Ruzóē' Xanru' neda' tsutsu, en rapa chi'ē neda', en rusölē' neda'.

Náquiē' Dios quia', en Nu rutipa ládxa'a,

ate' ruzxöni ládxa'a Lē'.

Rácalenē' neda' lu gudil-la: Rusölē' neda', en rizönē' neda'.

³ Rulidza'-nē' Xanru' Nu ral-la' cú'uru' yöl-la' ba,

ate' usölē' neda' lu ná'agaca nupa tu'dí'i neda'.

⁴ Ia'láti'sö la' gútiá',

ate' yöjbaga' neda' le usuniti neda', le ben ga gúdxida'.

⁵ Ia'láti'sö la' yöjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-nē' Xanru'.

Bulidza'-nē' Dios quia' para gácalenē' neda'.

Ga na' zoē' lataj lá'ayi queē' biyönnē' chi'a.

Buzé naguē' le gunabi yúdxida' Lē'.

⁷ Ní'irö gudödi budó' xzu', en guzxizi luyú.

Guzxízida' xilíbigaca yugu' guí'a sibi.

Guzxízigaca tu' gulénë' Lë'.

⁸ Birúaj dzön zxínë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

⁹ Benë' ga bôtaj lúxiba, en bôtajë' Lë cazë',

ate' guzóa znan ni'ë le naca chul-la.

¹⁰ Gudödë' lu bö'ös dxië' tu le nayëpisë nazí'i le querubín.

Carelö gudödë' tu lu bö' budunu'.

¹¹ Busubaga' cuinë' le naca chúl-lasö.

Lë na' naca böaj gasaj le richë'lë'e nisa.

¹² Lu le rëpi yösa queë' lu böaj gasaj na'

bila'rúaj bo' yalaj, en guiöj bögui' yöla sunna.

¹³ Gunnë guziú' que chi'ë Xanru' lúxiba xitsá'.

Biyön chi'ë Dios nayëpisëtërë',

lu dzön, en yugu' lu bo' yalaj, en lu guiöj bögui' yöla sunna.

¹⁴ Gusöl-lë'ë yugu' yaga lahui tuchi' queë', en bësilásië' nupa na' tu'dí'i neda'.

Gusöl-lë'ë yugu' yösa queë' yugu' le bulu'cul-la léguequi.

¹⁵ Ní'irö bilá' lahui le zoa znan nísado',

ate' bilá' lahui xilibi yödzölió,

cate' buzenu' bach nupa biti' ta'lé'e Li' dxi'a, Xan,

en lu yöl-la' rilé quiu' bulidza zí'u léguequi.

¹⁶ Bötjë' zaca' xitsá'alö, en gudélë'ë neda'.

Bubéajë' neda' lu nisa zili.

¹⁷ Busölë' neda' lu na' nu biti' rilé'e neda' dxi'a, en nál-latërö,

enca' lu ná'agaca nupa tu'dí'i neda', en nál-lágacatërö ca neda'.

¹⁸ Cate' ni' chizóa inítia' gula'zóa régu'ë neda',

pero Xanru' gúcalenë' neda'.

¹⁹ Bubéajë' neda', en buzóë' neda' tu lu lataj zxön.

Busölë' neda' tu' guyaza ládxe'ë neda'.

²⁰ Bubi'ë Xanru' quía' tsca le tsahui' naca',

en benë' quía' le naca dxi'a tu' cabí nabága'a xiguía',

²¹ tu' runa' ca naca le rusëdinë' Xanru' neda',

en biti' ca' ridá'baga'a Lë'.

²² Runa' ca ta'nná xibá nunë' Xanru',

en biti' ridá'baga'a le rinná bé' naguixjë' Lë'.

²³ Biti' bi le naca dö' nabága'a lahuë' Lë',

ate' ben chi'a le innía' para cabí gu'a dö'.

²⁴ Que lë ni na' bubi'ë Xanru' quía' tsca le tsahui' naca',

en tu' cabí nabága'a xiguía' lahuë' Lë'.

²⁵ Ruhuéchi' ládXu'u nupa tu'huechi' ladxi' luzë'eguequi,

en nacu' idú dxi'a len nupa ná'agaca idú dxi'a.

²⁶ Ruluí'i cuinu' idú ladxi' len nupa ná'agaca idú ladxi',

pero ridá'bagu'u nupa ta'dá'baga' xtídzu'u.

²⁷ Rusöló' nupa ta'guí'i ta'zaca',

pero ruzötju' nupa tun ba rahui.

²⁸ Ruquéla' cazú' guí' quía', Xana' Dios,

en rigú'u quía' bení' cate' ridá' ga chul-la.

29 Lu yöl-la' huáca queë' Dios rucul-la' bönni' guizxi yu röjáquië' gudil-la.

Tu' zóalenë' Dios quia' neda',
rixíti'a ribixa' lu zö'ö run chi'i léguequi.

30 Idú dxi'a nácacaca le runë' Dios.

Nurúaj tsahui' xtídzë'ë.

Rapa chi'ë yúgu'të nupa ta'nábini Lë' gácalenë' léguequi.

31 ¡Tuzë' Xanru' náquië' Dios!

¡Tuzë' Dios rapa chi'ë rë'u!

32 Dios ni ruzalë' neda',
en runë' ga naca' idú ládxa'a.

33 Runë' ga nácacaca ni'a ca ní'agacaba' bidxina' guixi',
en ruzóë' neda' yugu' lu guí'a zxön.

34 Rusédinë' neda' para gaca tseja' gudil-la,
en para gaca uguna' dxin uxiti' yaga néquini guié bronze.

35 Lu yöl-la' rusólá quiu' run chi'u neda'.

Len no'ó nál-la rizönu' neda',
en lu yöl-la' dxi'i ladxi' quiu' nunu' ga nayëpisëtëra'.

36 Ruchi'u nöza ga ral-la' töda',
en runu' ga biti' cuila'.

37 Guzóa régu'a nupa tu'dí'i neda', en bucul-la' léguequi.

Biti' buécja' ga bidxintë busunítia' léguequi.

38 Gudina' léguequi luyú, ate' biti' guca ulu'huöása.

Gula'dzö'ö zxañ ni'a.

39 Benu' neda' nál-la para tseja' gudil-la,
en benu' ga bucul-la' nupa gula'dá'baga' neda'.

40 Benu' ga bulu'zxunnaj lahua' nupa biti' ta'lé'e neda' dxi'a,
ate' busunítia' nupa na' bulu'dí'i neda'.

41 Bulu'lidza nu gácalen léguequi,
pero cuntu nu zoa usólá léguequi.

Bulu'lidza ca' Xanru', pero biti' bubí'ë didza'.

42 Buzxuzxja' léguequi ca bëchtö yu nachë' lu bö'ös.

Buliba' léguequi ca ruliba' guna' la' nöza.

43 Busöló' neda' lu ná'agaca nupa ta'dá'baga',
en nunu' ga rinná bé'eda' bönachi zían yödzö.

Tun ca rnna xtídzá'a bönachi biti' núnbë'a zí'alö.

44 Cate' ta'yöni neda', la' tun ca rnna xtídzá'a.

Tadxi neda' bönachi zían yugu' yödzö izá'a.

45 Ta'cuidi' ladxi', en lu yöl-la' rixxizi quéguequi
ta'rúaj yugu' lu yödzö tsutsu quéguequi.

46 ¡Zoë' nabanë' Xanru'!

¡Yöl-la' ba Nu na' run chi'i neda'!

¡Guli'gún zxön Dios Nu rusólá neda'!

47 Náquië' Dios Nu rizí' la nupa tu'dí'i neda',
en runë' ga tadxi bönachi guizxi yu neda'.

48 Rusólë' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',
en rusólë' neda' lu na' bönni' ridzá'a.

49 Que lë ni na' guía' Li: Xclenu' Xan, lógaca bönachi zían yödzo, en gul-la' yöl-la' ba que Lo' La'ayi.

50 Rusölá cazë' Xanru' bönni' rinná bē'ë uláz queë', en nadxí'tica'së' nu na' nabö cazë', nu na' naca David, en yugu' xzí'ini xi'sóë' ga idxinrö dza udxi.

19

1 Yugu' le nacua' lúzxiba tu'luí'i lo yöl-la' zxön queë' Dios, atë' yugu' le raca lu bö'ös náacagaca bē' le nunë'.

2 Yugu' dza tu'zéajni'i, en yugu' dzö' tu'luí'i lo yöl-la' réajni'i.

3 Biti' zoa didza' tuí'i, en bití' riyón tu le ta'nná. Bití' riyón chí'iguequi.

4 Le tu'zéajni'i ridxín ga naguéla'të luyú, en le tu'sedi ridxín idútë yödzülió.

Ga na' nacua' nuzóë' Dios xilataj gubidza,

5 le naca ca tu bönni' utsaga nē'ë rirúajë' yu'u, en naca ca' ca tu bönni' nál-la rudzéjanë' cate' zéajë' carelö lu huitaj.

6 Ga naguela' lúzxiba rilén gubidza, en ridödi ga ridxintë ga ribía.

Bití' bi zoa le cabí rutsë'e gubidza na'.

7 Tshui' naca ca rinná bē'ë Xanru', en run ga huóaca ládxi'ru'. Idútë li naca didza' nuzóë' Xanru', le run ga réajni'i nu naca nöxaj ladxi'.

8 Tshui' náacagaca xibá queë' Xanru', le tun ga rudzeja ládxi'ru'. Náacagaca idú dxi'a le gunná bē'ë Xanru', en ta'gú'u bení' icja ládxi'do'oru'.

9 Dxi'ado' naca gádxiru'-në' Xanru', para sóatica'siru'.

Idú li naca ca ruchi'a rusöröë' Xanru' bönachi, en idú tshui'.

10 Nazáca'gacatërö didza' na' ca oro, enca' ca oro ba nequi.

Nácagacatërö zxixi ca bidxina' buz, en ca le zxixi queëba'.

11 Didza' na' tu'zéajni'i neda', huen dxin queë'.

Uzí'tërö xibé nu run ca rnna xtídzë'ë na'.

12 ¿Nuzxi caz gaca inöz channö richixi rinigui?

Busölá neda' lu dul-la' nuna' le cabí gúquibe'eda' bena'.

13 Ben chí'i neda' para cabí udödi cuina' lu dul-la', para cabí inná be'e neda' lë na' naca dul-la'.

Ní'irö ugá'ana' tshui', en bití' ibága'a xiguia'.

14 Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

20

1 Rinábida'-në' Xanru' uzë naguë' li' cate' idxín dza qui'i sacu'u. Dios queë' Jacob gácalenë' li'.

2 Rinábida'-në' isól-lë'ë le gácalen li' le irúaj lataj lá'ayi queë'.

Lë na' irúaj Sión gun ga gacu' tsutsu.

3 Rinábida'-në' tsöjnenë' yúgu'të le gulú'u queë', en si' lu në'ë le buzégui'u lahuë'.

4 Rinábida'-në' gunné' quiu' tscá naca le rizé ládxi'u, en guné' ga gácatë yúgu'të le rizá' ládxi'u.

5 Udzéjatu' cate' usölë' li',
 en uchísatu' le gaca bë' rulidztu'-në' Dios queéru'.
 Rinábida'-në' Xanru' gunnë' quiu' yúgu'të le rinábinu' Lë'.
 6 Na'a nõzda' rusölë' Xanru' nu nabõ cazë'.
 Riyõnnë' nu na' nabõë' ga ni' zoë' yehua' yubá la'ayi queë'.
 Isól-lë'ë yöl-la' huáca idú queë' le usólá nu na'.
 7 Nacuá' nupa tu'zxõni ladxi' yugu' carreta que gudil-la,
 ate' nacuá' bõnachi yúbölö tu'zxõni ladxi' yugu' böa',
 pero rë'u ruzxõni ládxi'ru' Lë' Xanru' Dios.
 8 Ta'cuídi'në' nupa na', en ta'dzõ'ë,
 pero rë'u ni zuíru', en zóaru' tsutsu.

9 Busólá netu', Xan, tu' nacu' Nu rinná be'e netu'.
 Rinábitu' Li' uzë nagu' netu' cate' ulídzatu' Li'.

21

1 Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.
 Tu' busóló' lë', yënni'tërö rudzéjanë'.
 2 Bunõdzju' queë' le rizë ládxi'ë.
 Biti' gudá'bagu'u le gunábinë' Li'.
 3 Tu' raza ládxi'u lë' ruzú' queë' yugu' le naca dxi'a.
 Nudxíu' icjë' tu le néquini oro idú.
 4 Gunábinë' Li' gu'u queë' yöl-la' na'bán, ate' bë'u le queë'.
 Nunu' ga sóatica'së' íbanë' yugu' dza si' zaca.
 5 Zxõntë naca yöl-la' zxõn queë' tu' nusóló' lë'.
 Nunu' lë' bal, en nunu' ga nayëpisë'.
 6 Zóatica'sö le naca dxi'a nuzú' queë'.
 Runu' ga rudzéjade'enë' tu' zóalenu' lë'.

7 Caní raca queë' bönni' na' rinná bë'ë tu' ruzxõni ládxi'ë Xanru'.
 Biti' bi utsá' lë' tu' ruhuéchi' ládxi'ë Dios nayëpisëtë'rë' lë'.

8 Huadeli' no'o ga nacuá' yúgu'të nupa ta'dá'bagá' Li'.
 Huadeli' no'o íbëla ga nacuá' nupa tu'dí'i Li'.
 9 Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítu' léguequi, Xan, lu yöl-la' rilé quiu',
 ate' tséguiguequi tu lu guí' zxõn.
 10 Ucuítu' yugu' xzí'ini xí'sóagaca nupa na' luyú ni,
 en ubéaju' yugu' xzí'iniguequi ládjagaca bõnachi.
 11 Caní gunu' tu' gulë'éniguequinë' ilu'ë dö' quiu'.
 Gulún xtídza'gaquië' bi ilunë', pero bití' gaca ilunë' ca rnna xtídza'gaquië',
 12 tu' gunu' Li' ga ulu'zxúnnejë'.
 Ichisu' uxítu' yaga quiu', en gunu' léguequi huë'.
 13 Len yöl-la' huáca quiu', Xan, uxícju' lu gudil-la.
 Gúl-latu', en cú'utu' yöl-la' ba que yöl-la' huáca quiu'.

22

1 Dios quia', Dios quia', ¿bizx que nusán no'o neda'?
 ¿Bizx que bití' riyõnnu' le rinnëda' ládxa'a, en bití' rácalenu' neda'?
 2 Dios quia', idú dza rulidza' Li', pero bití' bi didza' rubi'u.

Idú yëla rulidza', en biti' ca' rasia'.

³ Lá'ayi nacu' Li'.

Zu' ga riyón yöl-la' ba ta'gú'u bönachi Israel Li'.

⁴ Bulu'zxöni ládxe'ë xuz xtó'otu' Li'.

Bulu'zxöni ládxe'ë Li', ate' busöló' légaquië'.

⁵ Bulu'lidzë' Li', ate' gúcalenu' légaquië'.

Bulu'zxöni ládxe'ë Li', en biti' bulu'tuí'inë'.

⁶ Naca' neda' ca tuba' bëla guna', en calëga bönni'.

Tu'dí'i bönachi neda', en tu'cá'ana neda' cá'asö.

⁷ Yúgu'të nupa ta'l'é'e neda' tu'titaj neda'.

Ta'salaj ru'iguequi lu yöl-la' rutitaj, en tu'tá ícjaguequi, ta'nná:

⁸ "Lë' buzöni ládxe'ë Xanru' para usölë' lë'.

Xanru' usölë' lë' channö tsaza ládxe'ë lë'."

⁹ Nacu' Li' Nu guléaj neda' lë'ënu xiná'a.

Benu' ga ruzxöni ládxa'a Li'

cate' ni' gúdx'a'a luchú'unu xiná'a.

¹⁰ Nagá'ana' lu no'o Li' ga gudéla'të gulja'.

Ga gudéla'të buzóanu xiná'a neda' nacu' Dios quia'.

¹¹ Biti' su' zi'tu' ga ni' zoa', tu' zoa' gagu le gun neda' zi',

ate' cúnturö nu zoa nu gácalen neda'.

¹² Gula'gu'ë neda' lë'ajlö ca tunba' yugu' bëdxi.

Ca yugu' bëdxi que yödzo Basán gula'bía di'ë neda'.

¹³ Ta'salaj ru'agaquië' lahua' neda'

ca runba' bëdxi guixi', ridunba', en ribödxi'aba'.

¹⁴ Nuhuóaca' ca nisa nalalaj luyú, ate' nazángaca bëch dxita quia'.

Nuhuóaca ládxi'da'ahua' ca bidxina' buz la lu lë'a.

¹⁵ Nacuidi' yöl-la' huáca quia' ca tu rö'ö nalá'a,

ate' da' lúdx'a'a chichja'.

Nuzú' neda' lu bëchtö yu que yöl-la' guti.

¹⁶ Ta'gu'ë neda' lë'ajlö ca tunba' yugu' bö'cu'.

Nagú'ugaquië' neda' lë'ajlö bönni' tu'ë dö'.

Nuzóagaquië' yeru blaga na'a, en ni'a.

¹⁷ Nalá'gaca yúgu'të dxita néquinida'.

Ta'në'ë neda', en tu'yú yënnië' neda'.

¹⁸ Ta'guísië' zxa' que queëgaquië',

en tu'yúë' le gaca bë' lahui lari' rixóa cúdza'a.

¹⁹ Biti' gá'anú' zi'tu', Xan.

Gúcalentë neda', Li', Nu naca yöl-la' huáca quia'.

²⁰ Busölá neda' lu guíë tuchi'.

Busölá yöl-la' na'bán quia' lu ruá'agacaba' bö'cu'.

²¹ Busölá neda' lu ruá'agacaba' bëdxi guixi',

en lu lúzugacaba' bëdxi gú'una.

Li' riyón quézinu' chí'a.

²² Usiyönda' yugu' böchi' luzá'a ca naca Lo'.

Gatsaj lahui'lö ga na' tu'dubi bönachi lo' cu'a Li' yöl-la' ba.

²³ ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'tëli' zxi'ini xi'sóé' Jacob!

¡Guli'gadxi Lë', yúgu'tëli' zxi'ini xi'sóé' Israel!

²⁴ Caní ral-la' gunli' tu' cabí bucá'anë' cá'asö,

en biti' budí'inë' nupa gula'guí'i gula'zaca',

en bití' bucachi' lahuë' para cabí ilé'enë' léguequi,
pero cate' bulu'lidza Lë', biyönnë' léguequi.

²⁵ Cu'a Li' yöl-la' ba ga tu'dubi bönachi guizxi yu lo'.
Lógaca nupa tadxi Li' usudxina' le guzxi' lu na'a guna' quiu'.

²⁶ Ilágugaca nupa nácagaca nōxaj ladxi', en ulu'huölaj ulu'dzë'e.
Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.

²⁷ Bönachi idütë yödzölió tsöjnégaca Xanru', en ulu'huóáca queë'.
Bönachi yúgu'të yödzö luyú ila'gú'u Lë' yöl-la' ba.

²⁸ Caní gaca tu' dë lu në'ë Xanru' inná bë'ë.
Inná bé'enë' yúgu'të bönachi luyú.

²⁹ Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.
Yúgu'të nupa ila'niti ulu'zechu zxfbigaca lahuë' Lë',
nupa na' bití' ca' gaca ilún chí'i yöl-la' na'bán queguequi.

³⁰ Zxi'ini xi'sóali' ilún xichinë'.
Ila'guixjö' lë ni ca naca queë' Xanru' para ila'yöni nupa tsöjsëtégaca luyú
ni.

³¹ Ilidë', en ulu'luí'inë' lahui náquië' Xanru' tsahui'.
Ulu'siyönnë' ca' nupa ral-la' ilalaj ca naca yugu' le benë' Lë'.

23

¹ Ruyú cazë' Xanru' Dios neda' ca tu nu ruyú bö'cu' zxila'.
Bití' bi riyádzjada'.

² Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda'
le iláguba'.

Ga naca ra' nisa rizá' tsahui' ládxi'do' richë'ë neda'.

³ Runë' ga ruhuóáca ládxa'a.
Richë'ë neda' ga naca nōza tsahui' tu' nadxi'inë' neda'.

⁴ Sal-la' ridá' ga zoa bönadxi gátia',
bití' bi gádxida' tu' zóalen cazu' neda', Dios.
Len xiyaga quiu', en no'o rutipu' ládxa'a.

⁵ Ga nacué' nupa ta'zóa regu' neda', ni' rucú'u quia' le gahua'.
Rigú'u icja' le za rilá' zxixi, en ruliru' le guí'jada'.

⁶ Le nácate' dusóalengaca neda' le naca dxi'a,
en yöl-la' dxi'i ladxi' queë' yúgu'të dza soa' ibana',
ate' lu yu'u lidxë' Xanru' sóatica'sa'.

24

¹ Nequi queë' Xanru' Dios luyú ni, en yúgu'të le dë lahui.
Nequi queë' yödzölió, en yúgu'të nupa nacué' ni'.

² Naguixjë' le lahui nísado' rō'ō zxánilō,
en nuzóë' xilibi luyú ga rë' zcan nísado'.

³ ¿Nuzxi caz bönni' dë lu në'ë cuenë' guí'a lá'ayi queë' Xanru'?'
¿Nuzxi caz gaca tsaza lu lataj lá'ayi queë'?

⁴ Huáca bönni' na' naca dxi'a ca runë', en ca rizá' ládxe'ë,
bönni' na' bití' runë' bal budó' guiój budó' yaga,
en bití' rizí' yë'ë cate' rizí' lu në'ë bi gunë'.

⁵ Gunë' Xanru' ga gaca dxi'a queë' bönni' na'.
Caní gunnë' Dios, Nu rusölá lë', en náquië' tsahui'.

6 Caní nácagaca nupa ta'dxín lahuë' Dios,
nupa na' ta'biga' lahuë' Dios quégaca zxi'ini xi'sóë' Jacob.

7 Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayépisëtëré'.
8 ¿Nuzxi caz Bönni' unná bë' nayépisëtëré' na'?
Náquië' Xanru' nál-latëré', en nápatëré' yöl-la' huáca,
Lë', Xanru', Nu rideli' lu gudil-la.

9 Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayépisëtëré'.
10 ¿Nuzxi caz Bönni' unná bë' nayépisëtëré' na'?
Náquië' Xanru' Dios quéquequi ni'a në'ë guizxi yu.
Lë' náquië' Bönni' unná bë' nayépisëtëré' na'.

25

1 Idú ládxa'a rulidza' Li', Xan.

2 Ruzxöni ládxa'a Li', Dios quia'.

Ben ga cabí utuí'ida',
en cabí ulu'dzeja nupa biti' ta'lé'e neda' dxi'a.

3 Biti' ila'bö' bönniga nupa tun löza Li',
pero ulu'tuí'i nupa ta'dá'baga' xtídzü'u.

4 Buluí'i neda' le ré'ënu' guna', Xan,
en buzéajni'i neda' le raza ládxi'u Li'.

5 Busedi neda' para guna' ca naca le naca idútë li quiu'.
Tu' nacu' Dios, Nu rusölá neda'
gúntica'sa' löza Li'.

6 Yöjné ca naca yöl-la' dxi'i ladxi' quiu', Xan,
en yöl-la' ruhuéchi' ladxi' quiu', yugu' le nacuá'tica'sö.

7 Buniti lo neda' ca naca dul-la' bena',
en le gudá'baga'a Li' cate' ni' zoa' iz cuidi' quia'.

Lu yöl-la' ruhuéchi' ladxi' quiu',
en yöl-la' dxi'i ladxi' quiu' yöjné neda', Xan.

8 Náquië' Xanru' dxi'a tsahui', en li ladxi'.

Que lë ni na' ruluí'inë' nupa tun dul-la' le ral-la' ilún.

9 Ca naca le naca tsahui' richë'ë Dios nupa nácagaca nöxaj ladxi',
en ruluí'inë' nupa nácagaca do' ladxi' le ré'ënë' ilún.

10 Lu yöl-la' ruhuéchi' ladxi' queë', en yöl-la' rusudxín didza' queë',
richë'ë Xanru' nupa tun ca rinná bë' xibá naguixjë',
en ca naca didza' rucá'ana tsahui' nunë'.

11 Tu' nacu' dxi'i ladxi', Xan,
buniti lo neda' ca naca dul-la' nuna', le naca dul-la' zxön.

12 Nupa tun bal Xanru'
uluí'i quézinë' léguequi le naca dxi'a le ral-la' ilún.

13 Ulu'zí' xibé le naca dxi'a gunnë' quéquequi,
ate' guequi quégacabi' zxi'ini xi'sóaguequi luyú ni.

14 Xanru' zóaléntica'së' nupa tun ca rnna xtídzë'ë,

en ruzéajni'inë' léguequi ca naca didza' rucá'ana tsahui' nunë'.

15 Ruyútica'sa' guídë' Xanru' gácalenë' neda',
tu' usölë' neda' lu na' nu ré'ëni sôn neda'.

16 Buécja quia', Xan, en buéchi' ladxi' neda',
tu' zoa' tuza', en nacuídi'da'.

17 Nayán le tu'quí'i tu'saca' neda'.

Busölá neda' lu le ruúbi ruguí'i ládxi'da'ahua'.

18 Buyú ca riguí'i rizáca'a, en rudú ládxa'a.

Buniti lo neda' ca naca yugu' dul-la' nabága'a.

19 Buyú ca nayán nupa tun neda' zi'.

Buyú ca tu'dí'i neda'.

20 Ben chi'i neda', en busölá neda'.

Biti' gu'u lataj utuí'ida' tu' ruzxöni ládxa'a Li'.

21 Ben ga ilún chi'i neda' le naca idú ladxi',

en le naca li ladxi', tu' runa' löza Li'.

22 Buá'au' bönachi Israel,

Dios lu yugu' le raca quéguequi.

26

1 Guléaj neda' tsahui', Xan, tu' runa' le naca dxi'a,
en idú ládxa'a ruzxöni ládxa'a Li'.

2 Buyú lu icja ládxi'da'ahua', Xan, en guzxi' bë' neda'.

Buyú le rizá' ládxa'a, en le ribequi icja',

3 tu' richë' yöl-la' dxi'i ladxi' quiu' neda',

ate' runa' ca naca le naca idütë li quiu'.

4 Biti' runa' tsözxön nupa ta'zí' yë',

en biti' ridálëna' nupa tu'lú'isö cuínguequi tsahui'.

5 Biti' raza ládxa'a udúbilëna' nupa tuá' dö',

en biti' guna' tuz didza' len nupa náca'gaca xihui'.

6 Richisa na'a lo' Li', Dios, cabi dxía dö' na'a,

en idú ládxa'a ribíga'a lo bucugu quiu', Xan,

7 para gul-la' le guía' Li': "Xclenu"

en usiyönda' bönachi ca náca'gaca le zxön nunu'.

8 Nadxí'ida' yu'u lidxu' ga na' zu', Xan,

enca' lataj ga na' yu'u bení' lá'ayi quiu'.

9 Biti' usunítu' neda' tsözxön len nupa tun dul-la',

en biti' gútiu' neda' len nupa tuti bönachi,

10 nupa na' ta'yaza ladxi' tuá' dö',

en nacuí'tica'só ila'guizxaj dumí para ulu'rúaj tsahui'.

11 Gúntica'sa' neda' le naca dxi'a.

Buzá' ladxi' quia', en buá'uó neda'.

12 Nuzóë' Dios neda' ga zoa' tsutsu ladja bönachi guizxi yu
nudúbigaca queë' para cu'a-në' yöl-la' ba Xanru'.

27

1 Náquië' Xanru' Dios bení' quia', en Nu rusölá neda'.

¿Nuzxi caz ral-la' gádxida'?

Rapa chi'ë Xanru' Dios caz yöl-la' na'bán quia'.

¿Nuzxi caz gaca gun ga gadxi idzöbida'?

2 Cate' gula'dá'baga' neda' nupa tuá' dö' para iluti neda',

nupa na' bití' ta'lé'e neda' dxi'a, en tu'dí'i neda',

yöjchëgu'gaca, en yöjbíxigaca.

³ Sal-la' ila'dá'baga' neda' bönachi guizxi yu,
biti' ca' tsaza yöl-la' radxi ládxi'da'ahua'.

Sal-la' ila'díl-lalen bönachi neda',
naca' neda' tsutsu ladxi'.

⁴ Tu le rinaba' lahuë' Xanru' Dios, lë na' güi'i ládxi'sa',
le naca para sóatica'sa' lidxë' Xanru' yúgu'të dza soa' ibana',
para gaca uyúa' yöl-la' lachi queë' Xanru' Dios,
en para sa' ládxa'a ca naca queë' lu yu'u lá'ayi queë'.

⁵ Cate' idxín dza soa bönadxi quia', ucáchë'ë Lë' neda' lu yu'u lidxë'.
Ga nagachi' lu yu'u lidxë' ucáchë'ë neda'.

Uzóë' neda' tsutsu ca tu lu guiöjto'o.

⁶ Gunë' ga ucul-la' nupa tu'dí'i neda',
ate' lu yöl-la' rudzeja quia' códxi'atica'sa'
cate' bi unödza' queë' lu yu'u lidxë'.

¡Gul-la' queë'! ¡Ön, gul-la' queë' Xanru' yöl-la' ba!

⁷ Buzë nagu', Xan, cate' ulidza' Li'.

Buzá' ladxi' quia', en bubí'i didza' ca naca le inábida' Li'.

⁸ Cate' Li' gudxu' neda': "Buguilaj neda'",
idú ládxa'a bubí'a didza', gunniá': Uguilja' Li', Xan.

⁹ Biti' ucachi' lo' lahua' neda'.

Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.

Biti' ucá'anú' neda', en bití' usán no'o neda'.

Nacu' Dios, Nu rusólá neda'.

¹⁰ Huáca ulu'sán ládxe'ë xuz xiná'a neda',
pero uzí' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.

Buluí'i neda' para guna' le naca tsahui',
tu' nacua' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e neda' dxi'a
para cabí ilún quia' le té'ëni.

Ta'dá'baga' neda' nupa ta'zí' yë',

en nupa té'ëni iluá' dö' quia'.

¹³ Guzxí' lu në'ë Xanru' Dios gunë' ga ilé'eda' le naca dxi'a,
en le naca tsahui' queë' ga nacua' nupa nabángaca.

La'tu' cabí réajlë'a lë ni, chiböaj ládxa'a.

¹⁴ ¡Guli'gún lözë' Xanru'!

¡Guli'gaca tsutsu, en buli'tipa ládxi'li'!

¡Ön, guli'gún lözë' Xanru'!

28

¹ Rulidza' Li', Xan.

Nacu' Guiöj le ruzóa neda' tsutsu.

Ruzë nagu' chí'a, tu' channö usayju' ru'u,
gaca' ca tu bönní' razië' lataj chul-la.

² Ruzë nagu' le rulidza' Li' cate' rinábida' Li' gácalenu' neda',

cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxön len nupa tuá' dö',
en tsözxön len nupa nácgaca xihui',
nupa na' tuí'i didza' dxi'a lahui' lógaca dzaga yu'u quéguequi,
pero yu'u ládxi'do'guequi le cabí naca tsahui'.

⁴ Bubí'i quéguequi tsca naca le tun, en tsca naca dö' ruí'igaca.
Bubí'i quéguequi tsca naca le tun nē'eguequi.
Bubí'i quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunë' Xanru',
en bití' tun bal le nun nē'ë.
Uquínajë' léguequi, en bití' ca' uchisé' léguequi.

⁶ jYöl-la' ba Xanru',
tu' riyönnë' cate' rinábida' Lë' gácalenë' neda'!

⁷ Xanru' caz náquië' yöl-la' huáca quia', en le run chi'i neda'.
Ruzxöni ládxa'a Lë', ate' rácalenë' neda'.
Que lë ni na' ruzí' xibë' ládxi'da'ahua',
ate' gul-la' le guía' Lë': "Xclenu'."

⁸ Naca cazë' Xanru' yöl-la' huáca quéguequi bönachi queë',
en náquië' ca' Nu run chi'i Bönni' na' bubéajë' quez queë' para inná bē'ë.

⁹ Busölá bönachi quiu', Dios, en ben ga gaca dxi'a quéguequi nupa
néquiguequi quiu'.
Ben chi'i léguequi ca run tu nu ruyú bö'cu' zxila', en guchë'tica'sö léguequi.

29

¹ jGuli'cu'ë yöl-la' ba Xanru', libí'ili', nácali' zxi'inigaquië' bönni'
nayëpisëgaquië'!

jGuli'cu'ë yöl-la' ba Xanru', en guli'guié': "Napu' yöl-la' huáca idú'!"

² jGuli'cu'ë yöl-la' ba Xanru' le ral-la' gata' que Lë' tu' náquië' lá'ayi!
jGuli'gún bal Xanru', tu' naca lachi le naca lá'ayi queë'!

³ Riyón chi'ë Xanru' lu nísado'.
Riyón chi'ë Xanru' nayëpisë' ca riyón guziú' rinnë.
Riyón chi'ë Xanru' lu nísado'.

⁴ Nál-latërö naca chi'ë Xanru'.
Nayëpisëtërö chi'ë Xanru'.

⁵ Chi'ë Xanru' rilá'a yugu' yaga zxön.

Ön, chi'ë Xanru' riguitsaj yugu' yaga lu guí'a Líbano.

⁶ Runë' Xanru' ga ta'xiti' guí'a ca tunba' bëdxido'.
Ta'xiti' guí'a Líbano, en guí'a Sirión ca tunba' bëdx guí'a.

⁷ Chi'ë Xanru' run ga rëpi yösa.

⁸ Ruxizi chi'ë Xanru' la' guixi' ga dë lataj.
Ruxizi chi'ë Xanru' la' guixi' nazí'i le Cades.

⁹ Chi'ë Xanru' run ga ta'bëquiba' bidxina' guixi' böa' huë'ënido' quégacaba',
en run ga ta'guínaj yúgu'të laga' dxíagaca yugu' yaga.

Lu yudo' queë' tuí'i didza' yúgu'të le nacua', ta'nná: "jYöl-la' ba Lë'!"

¹⁰ Gurö'ë gunná bē'ë Xanru' cate' gurö'ö nisa lu iduté yödzölió.

Ön, rö'ë rinná bē'tica'së' Xanru'.

¹¹ Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a quégaca bönachi queë',
en gunë' ga ila'böza dxi'a tsáhui'do'.

30

¹ Guna' Li' zxön, Xan, tu' buchisu' Li' neda',
en bití' bē'u lataj bi ilún quia' nupa bití' ta'lé'e neda' dxi'a.

² Rigu'a Li' yöl-la' ba, Xana' Dios,
tu' bulidza' Li' gácalenu' neda', ate' bunu' neda'.

³ Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí' tsu'a lataj chul-la ga dzö'ö nupa nátigaca.

⁴ ¡Guli'gul-la yöl-la' ba queë' Xanru', libí'ili' néquili' quez queë'!
¡Guli'guíë': "Xclenu'" ca naca Lē' le naca lá'ayi!

⁵ Tu chí'isö rilenë',
pero ruzá' ládxi'tica'së' queëru'.
Channö cödxiru' tu yëla,
lu yöl-la' rudzeja queëru' cödxí'aru' itö yu.

⁶ Cate' guca dxi'a quia', ní'irö gunní'a':
"Gatga bi utsá' neda'."

⁷ Tu' buzá' ládxi'u quia', Xan, buzú' neda' ga zoa' tsutsu,
en cate' bucachi' lo', gurö'a böniga.

⁸ Bulidza' Li', Xan,
en gúta'yua' lo'.

⁹ ¿Bizxi xibé uzi'tso' channö gátia', en tsöjtsázia'
lataj chul-la ga dzö'ö nupa nátigaca?

¿Naru' huácatsö cu'a Li' yöl-la' ba channö huóaca' bëchtö yu?

¿Naru' huácatsö ulu'a lo le naca idú quiu'?

¹⁰ Ruzé nagu', Xan, en ruzá' ládxi'u quia'.

Gúcalen neda', Xan.

¹¹ Buí'nida', ate' benu' ga buyá'a lu yöl-la' rudzeja quia'.

Bugú' lari' cá'asö gúcu'a', en bugacu' neda' le ruzí'a xibé.

¹² Bil-la bö' naca caza' yöl-la' ba quiu', en bití' soa dxisö.

Guíética'sa' Li': "Xclenu'", Xana' Dios.

31

¹ Ruzxöni ládxa'a Li', Xan.

Bití' gu'u lataj utuí'ida'.

Tu' nacu' tsahui', busölá neda'.

² Ruzé nagu' quia', en rusöló' neda'.

Gacu' ca tu guiöjto'o ga soa' tsutsu,
en ca tu ga soa' dxi'a tsáhui'do' lu gudil-la.

³ Nacu' Li' guiöjto'o ga zoa' tsutsu, en le run chí'i neda'.

Para gaca yöl-la' ba que Lo' guchë' neda', en buluf'i neda' le dxi'a guna'.

⁴ Uhéaju' neda' lu du yalaj nucáchi'gaquië' bönni' tu'é dö',
tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Böá'au' neda', Xan, Dios idú.

⁶ Bití' rilé'eda' dxi'a nupa tun zxön budó' guiöj budó' yaga,
pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',

tu' bilé'e quézinu' le gudí'i guzxáca'a.

Nöz quézinu' yugu' le raca quia'.

⁸ Biti' bucá'anu' neda' lu na' nu bití' rilé'e neda' dxi'a,
pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxa', en rudú ládxa'a.

¹⁰ Riyechi' dza quia' tu' ruhuí'inide'eda',

en tu' rinné ládxa'a, en riyechi' iz quia'.

Rudú ládxa'a tu' nōzi dö' nu'a,

ate' nadxita idútē le naca'.

¹¹ Tu' nōzi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa núnbé'gaca neda' tadxi neda'.

Nupa ta'lé'e neda' la' nōza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rō'ō nayuzxaj naguinnaj.

¹³ Biyōnda' didza' zi' ta'nné bōnachi zían quia' bagáchi'sō.

Gátitēs zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxōni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'tē dza soa' ibana'.

Busölá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busölá neda'.

¹⁷ Biti' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga bití' gaca bi inná nu rizí' yē',

nu na' rinné zi' queē' bōnni' tsahui',

en run ba zxōn cuini, en rulidza ditaj luzé'e.

¹⁹ ¡Bica' zxōn yöl-la' dxi'i ladxi' quiu',

lē na' napu' para gácalenu' nupa tadxi Li'!

Runu' caní quégaca nupa tu'zxōni ladxi' Li'

lógaca nupa tun ba zxōn cuíniguequi.

²⁰ Rucáchu'u légaquiē' ga na' zu' bagáchi'sō,

ga bití' gaca idxín nu bōnni' xihui'.

Run chí'u légaquiē' bagáchi'sō ga bití' gaca idxín didza' bizxaj.

²¹ ¡Yöl-la' ba Xanru' Dios,

tu' buluí'inē' neda' ca nadxí'inē' neda' cate' ni' zoa' tu yōdzō

ga nagú'ugaquiē' lē'ajlō bōnni' tu'tíl-lalenē' neda'!

²² Lu yöl-la' radxi ridzōbi quia' gunnía': "Ilútiē' neda' lo' Li', Xan",

pero biyōnnu' le gunábida' Li', cate' ni' bulidza' Li'.

²³ ¡Guli'dxí'i-nē' Xanru', libí'ili' néquili' queē'!

Rapa chí'ē Xanru' nupa ta'yéajlē' Lē',

en rubi'ē ca sa'yéaj queē' bōnni' run ba zxōn cuinē'.

²⁴ ¡Guli'gaca tsutsu, en buli'tipa ládxi'li',

yúgu'téli' na' runli' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca dö' bi'ë, en bugúë' dul-la' queë'!

² ¡Bica' ba bönni' na' Dios rnnë' biti' nabáguë'ë xiguia', en biti' zóalen lë' yöl-la' rizí' yë'!

³ Cate' guzóa' dxisö ca naca dul-la' quia', budú ládxa'a tu' gunnética'sö ládxa'a.

⁴ Rëla, en te dza buquí'i busácu'u neda', Dios.

Budú ládxa'a ca raca cate' rö' böchila.

⁵ Ní'irö guxóalëpa' dul-la' nabága'a lo' Li', en biti' bucácha'a le xihui' bena'.

Gunnía': "Ixóalëpa' dö' bi'a lahuë' Xana", ate' buniti lo' neda' ca naca xiguia' gubága'a.

⁶ Que lë ni na', núti'tës nu nunbë' Li', Dios, ral-la' ulidza Li' cate' dë lataj güi'ilen Li' didza'.

Cate' rö' nisa bach uyú ni, biti' ca' ideli' idxín ga zoa nu na'.

⁷ Li' nacu' ga gaca ucachi' cuina' cate' zoa bönadxi quia'.

Li' caz gun chi'u neda' para cabí bi gaca quia'.

⁸ Li' gunu' ga gúl-latíca'sa' quiu' Li' tu' rusólo' neda'.

Rnnë' Dios: "Neda' uzéajni'ida' li', en uluí'ida' li' le ral-la' gunu'. Usédida' li', en uyútica'sa' li'.

⁹ Biti' gacu' ca tu böa' o tu mula cabí ta'yéajni'iba'.

Ral-la' cu'u guíë en du rú'ugacaba' para inná bé'enu' lé'gacaba'."

Channö cabí gunu' caní, biti' ca' ilunba' ca rë'ënu'.

¹⁰ Zián le tun ga tu'huí'iniguequi nupa tuá' dö',

pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

¹¹ Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.

Lu yöl-la' rudzeja queëli' guli'cödxí'a, libí'ili' nácali' idú dxi'a.

33

¹ Lu yöl-la' rudzeja queëli' guli'gul-la lahuë' Xanru', libí'ili' nácali' tsahui' lahuë' Lë'.

Nupa ná'cagaca tsahui' ral-la' ila'gú'u Lë' yöl-la' ba.

² Guli'guíë' Lë': "Xclenu'", quínnili' lë'e bihuél-la.

Guli'gul-la yöl-la' ba queë', quínnili' le zë chi du que.

³ Guli'gul-la queë' tu le rul-la cubi.

Guli'quinnaj dxí'ado', en lu yöl-la' rudzeja queëli' guli'cödxí'a.

⁴ Xtídzë'ë Xanru' naca idú tsahui', ate' idú ládxe'ë runë' yúgu'të bi runë'.

⁵ Nadxí'inë' le naca dxi'a, en le naca tsahui'.

Nalá' lahui yöl-la' dxi'i ladxi' queë' Xanru' idútë yödzülió.

⁶ Len didza' bé'ësë' Xanru', benë' lúzxiba,

en benë' yúgu'të böljaj bení' len bö' rirúaj ru'ë.

⁷ Rutubë' nisa rö'ö nísado' para gaca ca tu guí'a.

Napa chí'ë nisa rö'ö zili ga na' nupé'ë xilataj.

⁸ Yúgu'të bö'nachi ral-la' ila'dxí'i Xanru'.

Bönachi idútë yödzülió ral-la' ila'cuá' nöxaj lahuë' Lë'.

9 Bě'ēsē' didza' Xanru', ate' la' gúcatē ca na' gunně'.

10 Gunná bē'ē, ate' guca tsutsu le nunē'.

Runē' Xanru' ga tu'huōáca cá'asō didza' túngaca bōnachi yugu' yōdzō.

Runē' ga bití' ilaca le tē'ēni ilúngaca bōnachi.

11 Sóatica'sō tsutsu didza' nunē' Xanru'.

Le rizá' ládxe'ē ulu'gá'anatica'sō quéguequi xzí'ini xi'sóaru'.

12 Bica' bágaca bōnachi yōdzō na' náquiē' Xanru' cazē' Dios quéguequi,

bōnachi na' nabō cazē' Dios para ilaca quez queē'.

13 Zoa cazē' Xanru' yehua' yubá, ruyúē' ga zóaru'.

Rilé'enē' le tun yúgu'tē bōnachi nacua' idútē yōdzólió.

14 Ga na' zoa cazē' ruyúē' idú gásibi'iló,

en rilé'enē' yúgu'tē nupa nacua' idútē yōdzólió ni.

15 Nun cazē' Lē' ládxi'do'gaca yúgu'téguequi.

Réajni'i quézinē' ca naca yúgu'tē le túngaca.

16 Biti' ca' ulē' bōnni' unná bē' nacua' queē' bōnni' guizxi yu rōjáquiē' gudil-la.

Biti' ulē' bōnni' zoē' gudil-la tu' nál-latērē'.

17 Biti' nazaca' gunru' lōza bōa' para idéli'ru' lu gudil-la,

tu' cabí gaca usōlaba' nu bōnni' tu' nál-latērōba'.

18 Buli'yú, ruyútica'sē' Xanru' nupa tadxi Lē',

nupa na' tun lōza yól-la' dxi'i ladxi' queē',

19 para usölē' léguequi lu yól-la' guti,

en para ugahuē' léguequi cate' tsu'u gubín.

20 Idú ládxi'ru' runru' lōza Lē' Xanru'.

Rácalen cazē' rē'u, en rapa chí'ē rē'u.

21 Rudzeja ládxi'lenru' Lē',

en uzxōni ládxi'ru' Lē', tu' náquiē' lá'ayi.

22 Lu yól-la' dxi'i ladxi' quiu' gúcalen netu', Xan,

tu' runtu' lōza Li'.

34

1 ¡Innética'sa' queē' Xanru' náquiē' dxi'a!

¡Cú'utica'sa' Lē' yól-la' ba!

2 Bō' naca caza' gun zxōn Xanru'.

Nupa nácacaca nōxaj ladxi' ila'yōni lē ni, en ulu'dzeja.

3 Guli'gúí' zxōnē' Xanru' tsōzxón len neda',

en tsōzxón usiyōnru' bōnachi ca naca Lē' La'ayi.

4 Bulidza'-nē' Xanru', ate' bubi'ē didza' quia',

en busölē' neda' lu yugu' le gúdxida'.

5 Nupa nácacaca queē' bila'dxín lahuē', en bulu'zí' xibē'.

Bíti'rō caz ulu'tuí'i nupa na'.

6 Bulidza'-nē' Xanru', ate' biyōnnē' quia' neda', bōnni' yechi',

en busölē' neda' lu yúgu'tē le guca quia'.

7 Gubáz lá'ayi que ya'abá queē' Xanru' tapa chí'ē nupa tadxi Lē',

en tu'sölē' léguequi lu yúgu'tē le raca quéguequi.

8 Guli'sí' bē'ē, ate' inōzili' náquiē' Xanru' dxi'a.

¡Bica' ba bōnni' ruzxōni ládxe'ē Lē'!

9 Guli'gadxi Xanru', libí'ili' nácali' quez queē',

tu' cabí bi ila'yadzaj nupa tadxi Lë'.

¹⁰ Ta'yadzaj ta'yúdxiba' bédxi guixi', en ta'dunba',
pero nupa tu'lidza Xanru' biti' ca' ta'yadzaj le naca dxi'a.

¹¹ Guli'dá libí'ili', bí'ido', en buli'zé nágali' xtídza'a.

Uzájni'ida' libí'ili' para gádxili'-në' Xanru'.

¹² ¿Nuzxi caz bönni' ré'ënë' soë' ibanë',
en ré'ënë' soë' iz zían para uzi'ë xibé le naca dxi'a?

¹³ Ben chi'i lúdxu'u para cabí gu'u didza' xihui',
en para cabí si' yé'enu' luzó'o.

¹⁴ Bucá'ana le cabí naca tsahui', en ben le naca dxi'a.

Bë' ladxi' cözu' dxi'a tsáhui'do',
en ben bayudxi gunu' yugu' lé ni.

¹⁵ Ruyútica'sé' Xanru' nupa nácgaca tsahui',
en riyón quézinë' cate' tu'lidza Lë'.

¹⁶ Uzáguë'ë Xanru' xinözgaca nupa tuá' dö',
en gunë' ga cuntu nu tsöjné léguequi.

¹⁷ Nupa nácgaca tsahui' tu'lidza Xanru', ate' riyönnë' quéguequi,
en rusölë' léguequi lu yugu' le raca quéguequi.

¹⁸ Xanru' zóalen cazë' nupa tu'huí'ini ladxi',
en rusölë' nupa nácgaca nöxaj ladxi'.

¹⁹ Zían le riguí'i rizáqué'ë bönni' tsahui',
pero Xanru' rusölë' lë' lu yúgu'të lë na'.

²⁰ Xanru' rapa chi'ë yúgu'të dxita yu'ë,
ate' biti' gatsaj nitú dxita queë'.

²¹ Le xihui' run nu ruá' dö' gun ga gati nu na',
ate' ila'baga' xigua' nupa biti' ta'lé'e dxi'a le naca tsahui'.

²² Xanru' caz ruhuóá'uë' bö' nácgaca caz huen dxin queë',
ate' biti' irugu que nitú nupa na' tu'zxöni ladxi' Lë'.

35

Tu le bil-lë' David

¹ Xana' Dios, gudá'baga' nupa biti' ta'lé'e neda' dxi'a.

Butíl-lalen nupa ta'díl-lalen neda'.

² Guzxón le gun chi'i neda' lu gudil-la,
en gudá gácalenu' neda'.

³ Guzxón yaga tuchi' quiu' para uzagu'u xinözguequi nupa ta'zóa regu'
neda'.

Gudxi bö' naca caza' nacu' Li' Nu rusölá neda'.

⁴ Ben ga ulu'tuí'i, en ulu'gá'ana cá'asö nupa té'ëni iluti neda'.

Ben ga ulu'huécaj, en ulu'gá'ana cá'asö nupa té'ëni iluí'i dö' quia'.

⁵ Ben ga ilaca ca bëbu zxe café zeaj lu bö'ös,
en ben ga ulaguë' gubáz lá'ayi que ya'abá quiu' léguequi.

⁶ Ben ga gaca chul-la nöza yú'ugaca, en ga cuílágaca,
ate' soa régu'ë gubáz lá'ayi quiu' léguequi.

⁷ Bulu'cáchi' du yalaj le sön neda', en biti' bi nuna' quéguequi.

Gula'chö'öna yeru ga tsöjbixa', en biti' bi nuna' quéguequi.

⁸ Ben ga idxín quéguequi tsárido'os le usuniti léguequi,
en ben ga du yalaj na' bulu'cáchi' sön la' cuínguequi quez.

Ben ga ila'bixi lu yeru na' gula'chö'öna.

⁹ Udzeja ládxi'lëna'-në' Xanru',

en uzi'a xibé yöl-la' rusölá queë'.

¹⁰ Ila'nná dxita néquinida': "Xan, ¿nuzxi caz naca ca nacu' Li'?

Rusöló' nu riguí'i rizáca' lu na' nu nál-latêrô ca le.

Rusöló' nu riguí'i rizáca', en riyadzaj riyudxi lu na' bönni' ribanë' le nequi que."

¹¹ Ta'dá'baguë'ë bönni' xihui' neda', en ta'nnë' quia'.

Ta'nabi yúdxinë' neda' ca naca yugu' le cabí nözda'.

¹² Tu'bi'ë quia' le naca dô' cate' runa' le naca dxi'a, ate' ruhuí'inide'e ládxa'a.

¹³ Pero neda' gúcua' lari' cá'asô cate' guláquië' huë'.

Bena' gubasa, en busaca' zi' bö' naca caza',

en uláz quéguequi bulidza'-në' Dios zían luzuí.

¹⁴ Bu'ínide'eda' tsca guca luzá'a o bi'i böchi' caza' nu na' guca huë'.

Gurödxí yecha'a ca huí'inide'eda' channö gátinu xiná' caza',

¹⁵ pero cate' guchixi guníguida' neda', bulu'dzéjade'e, en bulu'dubi tsözxön.

Yugu' bönni' na' bulu'cá'anë' neda' cá'asô bulu'dubë' para ilunë' ga cõ'a baguí'i.

Yugu' bönni' na' biti' núnbë'a gulúnnatica'së' neda'.

¹⁶ Bulu'saca' zi'ë neda', en bulu'titjë' quia'.

Lu yöl-la' rilé quégaquië' neda' gulagu zxea láyi'gaquië'.

¹⁷ Xan, ¿gáca' xte caz uyú iná'asu' le tunë'?

Busölá neda' lu dô' tu'ë quia'.

Busölá neda' lu ná'agaquië' bönni' na' nácagaquië' ca yugu' bëdxi guixi'.

¹⁸ Guía' Li': "Xclenu'" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

¹⁹ Biti' gu'u lataj ulu'dzeja nupa ta'dá'baga' neda', en ta'zì' yë',

en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.

²⁰ Catu caz tu'í didza' le gun ga soa dxisö didza' bizxaj.

Lu yöl-la' rizí' yë' quéguequi ta'nnë' quégaca nupa ta'bõ' dxi'a tsáhuí'do' yödzülió ni.

²¹ Bulu'salaj ru'iguequi, en gula'nnë quia', gula'nná:

"¡Ön, bilé' quézitu' le nunë'!"

²² ¡Bilé' quézinu' Li' lë ni, Xan! ¡Biti' su' dxisö!

¡Biti' ucá'anú' neda', Xan!

²³ ¡Guyasa, Xan! ¡Busubán ládxi'u, Xan, para uchi'a usöróu' quia'!

¡Gúcalen neda', Xana' Dios!

²⁴ ¡Tu' nacu' tsahuí', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

²⁵ ¡Biti' gu'u léguequi lataj ila'nná:

"Ön, bidéli'ru' le guzé ládxi'ru'!"

¡Biti' gu'u lataj ila'nná: "Chibucúl-laru' lë"!"

²⁶ ¡Ben ga ulu'tuí'i, en ulu'gá'ana cá'asô nupa tu'dzeja cate' ruhuí'inida'!

¡Ben ga ulu'tuí'i, en ulu'gá'ana cá'asô nupa ta'dá'baga' neda'!

²⁷ ¡Ben ga ila'bõdxi'a lu yöl-la' rudzeja quéguequi,

en ulu'zì' xibé nupa tu'í ládxi'gaca urúaja' tsahuí'!

¡Bë' lataj ila'nnáca'sö: "Nayëpisëtêrë' Xanru' Dios,

tu' raza ládxi'ë' gunë' ga gaca dxi'a quégaca huen dxin queë"!"

28 Ní'irö guna' ba nalí quiu', inníá': "¡Nacu' tsahui'!"
en cu'a Li' yöl-la' ba idú dza.

36

1 Le naca xihui' ru'ílen bönni' nucá'anë' Dios lu icja ládxi'da'ahuë'.

Biti' ca' rádxinë' Dios.

2 Tu' run ba zxon cuinë'

réquinë' bití' nözinë' Dios nabáguë'ë lë' dul-la', en bití' ichúguië' Dios
queë'.

3 Ru'ë didza' xihui', en rizí' yë'ë.

Bití' réajni'inë', en bití' runë' le naca dxi'a.

4 Cate' ni' dë' lu le ráti'në' rizá' ládxi'ë ca naca le xihui' gunë'.

Ruí' ládxi'ë gunë' le cabí naca dxi'a,

en bití' rusanë' runë' le naca xihui'.

5 Zxöntë' ca yehua' yubá naca yöl-la' dxi'i ladxi' quiu', Xan,
ate' gúntica'su' ca rnna xtídz'u, tsca zoa yehua' yubá.

6 Naca tsutsu le tsahui' nacu' ca nácgaca tsutsu yugu' guí'a zxon quiu'.

Ca ruchi'a rusöröu' naca ca naca nísado', tu' cabí gaca nu gúnbë'e le.

Run chí' casu' bönachi, en yugu böa' guixi', Xan.

7 Nazáca'të' yöl-la' dxi'i ladxi' quiu', Dios.

Run chí'u yúgu'të bönachi ca runba' yöjede, run chí'iba' yugu' bórado' zxan
xílabá'.

8 Tu'huölaj tu'dzë'e bönachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'i ladxi' quiu'.

9 Yúgu'të le nacua' nabánigaca Li'.

Tu' naca casu' bení' rilé'etu' bení'.

10 Bidxí'itica'sö nupa núnbë'gaca Li',

en ben le naca dxi'a quégaca nupa nácgaca tsahui'.

11 Bití' gu'u lataj bi ilún quia' nupa tun ba zxon cuínguequi,

en bití' gu'u nupa tuá' dö' lataj ulu'laga' neda'.

12 Nadzö'ögaca nupa tuá' dö'.

Déguequi luyú, en bití' ca' gaca ulu'huöása.

37

1 Bití' ubi uguí' ládxi'do'oli' tu' tu'zí'gaca xibé nupa tuá' dö'.

Bití' uzxé'eli' nupa bití' tun le naca dxi'a.

2 Huadóditë quéguequi ca raca que guixi' nacuadi,

en udxi quéguequi ca raca quégaca guíxi'do' narúgugaca.

3 Buli'zxöni ládxi'ë Xanru', en guli'gún le naca dxi'a.

Buli'gá'ana luyú queë', en guli'cöz dxi'a tsáhuí'do'.

4 Buli'sí' xibë' Xanru',

ate' gunnë' queéli' le rizé ládxi'li'.

5 Buli'dödi cuinli' lu në'ë Xanru'.

Buli'zxöni ládxi'ë Lë', ate' gunë' le gácalen libí'ili'.

6 Gun cazë' Lë' ga urúajli' tsahui', en gácali' ca bení',

en cate' uchi'a usöröë' queéli', gaca queéli' ca lahui' dza.

7 Guli'sóa dxisö lahuë' Xanru', en guli'cöza le gunë'.

Bití' cuéqui ícjali' tu' nözi bönni' ruzi'ë xibé,

bönni' na' ru'ë dö'.

8 Bítí'rö leli', en buli'sán yöl-la' ridzá'a.

Bití' ubi uguí' ládxi'do'oli' tu' gun lë ni ga guá'ali' dö'.

9 Dios caz uzáguë'ë xinözguequi nupa tuá' dö',
pero nupa tu'zxoñi ladxi' Xanru', guequi quéguequi luyú.

10 Ia'láti'sö xidzé, en bíti'rö soë' böñni' na' ru'ë dö'.
Uguíjali' xilatjé', pero bíti'rö soë' ni'.

11 Nupa náçagaca nöxaj ladxi', guequi quéguequi luyú,
ate' ulu'zì' xibé yöl-la' tsahui' que.

12 Tun didza' nupa tuá' dö' bi ilúngaca quégaca nupa náçagaca tsahui',
en lu yöl-la' rilé quéguequi tagu zxea láyi'guequi.

13 Ruzxidxi cazë' Xanru' quéguequi,
tu' rilé'enë' dza udxi quéguequi.

14 Nupa tuá' dö' chigula'béaj guíë tuchi' quéguequi,
en nuá'gaca uxiti' yaga quéguequi
para ulu'xícja nupa ta'zaca' zì', en ta'yadzaj ta'yudxi,
en para ilutí nupa tun le naca dxi'a.

15 Guíë tuchi' quéguequi ila'chiza la' ládxi'do' guequisö,
ate' ila'guítsaj uxiti' yaga quéguequi.

16 Dxi'atërö le do' dësö queë' böñni' tsahui'
ca le zían dë queë' böñni' ru'ë dö'.

17 Huayúzxjagaca ná'agaca nupa tuá' dö',
pero Xanru' caz rácalenë' nupa náçagaca tsahui'.

18 Ru'í ladxi' cazë' Xanru' nupa bití' bi xigua' nabága'gaca,
ate' guéquitica'sö xiyúgaca quéguequi.

19 Bití' ca' ulu'tuí' cate' idxín dza bití' gaca dxi'a,
en cate' tsu'u gubín, gáta'dëra le ilágugaca.

20 Ulu'niti tsaz nupa tuá' dö',
ate' nupa bití' ta'lé'e dxi'a Xanru' ilaca ca yöl-la' lachi que guixi'.
La' töditë quéguequi, en ilaca ca dzön le rinítitë.

21 Ta'nábini nu bi gunna quéguequi tu chí'isö, pero bití' ca' ulu'b'fí' lë na'.
Nu naca tsahui' ruzá ladxi' quéguequi, en runödzej quéguequi.

22 Gaca luyú quégaca nupa run lá'ayë' Xanru',
pero ila'niti tsaz nupa rudxíë' Lë' dö'.

23 Le runë' böñni' dxi'a naca le nuluí'inë' Xanru' lë',
ate' raza ládxe'ë Lë' le runë' böñni' na'.

24 Cate' röjtsö'ë, bití' ca' röjtsö'ë tsaz,
tu' röjzönë' Xanru' caz böñni' na'.

25 Guca' ra'bando', pero na'a nagula',
en catu caz bilé'eda' nusán në'ë Dios böñni' tsahui',
en catu caz bilé'eda' riyadzaj le ilágubi' xzí'inë'.

26 Yugu' dza ruzá ládxe'ë böñni' tsahui' quéguequi luzë'ë
en runödzjë' le ta'nábini lë' unödzjë' tu chí'isö,
Náçagacabí' xzí'ini xi'sóë' tu le run ga raca dxi'a queëru'.

27 Bulí'cá'ana le cabí nácatë, en guli'gún le naca dxi'a.
Channö caní gunlí', sóali' tsaz,

28 tu' nadxí'inë' Xanru' nu run le naca tsahui',
en catu caz usán në'ë nupa néquiguequi quez queë'.

Gun chí'ítica'së' léguequi,
pero usunítië' xzí'ini xi'sóagaca nupa tuá' dö'.

29 Guequi luyú quégaca nupa náçagaca tsahui',
ate' ila'cuá'tica'sö luyú na'.

30 Ru'ë böñni' tsahui' didza' le napa yöl-la' réajni'i,

ate' raca yöl-la' ruchi'a rusörö ni'a que didza' na' ru'ë.

³¹ Yu'u icja ládxi'da'ahuë' le gunná bē'ë Dios.

Que lë ni na' catu caz ichixi iníguinë'.

³² Ruyuda' nu ruá' dö' le runë' bönni' tsahui',
en rigulaj nacxi gaca guti lë'.

³³ Xanru' biti' gu'ë nu na' lataj bi gun queë' bönni' tsahui' na',
en biti' gu'ë lataj irugu queë' cate' nu uchi'a usörö queë'.

³⁴ Buli'zxöni ládxe'ë Xanru', en guli'gún ca rē'ënē' gunli',
ate' uchisē' libí'ili' para guequi queéli' luyú.

Cate' udxi quégaca nupa tuá' dö', hualé'e quézili' le.

³⁵ Bilé'eda'-nē' bönni' huía' dö'.

Gúquië' ca tu yaga zxön, en buzí'de'enē' xibé.

³⁶ Ní'irö gudödi queë', en bití'rö zoë'.

Yöjdilja' lë', pero biti' ca' guca udzölida' lë'.

³⁷ Buli'yú ca náquië' bönni' tsahui'.

Cuntu nu gaca bi innē' queë',

tu' ila'cuá'abi' zxi'ini xi'sóë' bönni' zxön ladxí'.

³⁸ Ulu'niti tsaz nupa tu'cá'ana le gunná bē'ë Dios.

Usiúdxë' Xanru' yugu' zxi'ini xi'sóagaca nupa tuá' dö',

³⁹ pero rusólá cazë' nupa nácagaca tsahui'.

Rutipë' ládxi'guequi cate' bi raca quéguequi.

⁴⁰ Rácalenë' léguequi, en rusölë' léguequi.

Rubéajë' léguequi lu ná'agaca nupa tuá' dö', en rusölë' léguequi,
tu' tu'zxöni ládxi'guequi Lë'.

38

¹ Biti' ilenu' neda', Xan, en biti' uzenu' neda' bach.

Biti' gunu' neda' xiguaia' lu yöl-la' rilé' quiu'.

² Ben zi'u neda', en budxíu' neda' huë'.

Nuzötju' neda' len no'o.

³ Yu'a yödzöhuë' zxön tu' rilenu' neda'.

Dxía huë' idütë' le naca' tu' nözi dul-la' nabága'a.

⁴ Xiguaia' nabága'a naca ca tu nísado' ga ruchicja' nisa.

Naca ca tu yua' zi'i nabága'a neda'.

⁵ Tu' bena' yugu' le cabí naca dxi'a,

dxía' huë' le rilá' siguti, en rudzu'.

⁶ Narecji' cúdza'a, en nagá'ana' cá'asö.

Idú dza ruhuí'inide'eda'.

⁷ Idütë' le naca' yú'uda'a xilá,

ate' nazxí xipéla'a.

⁸ Rudú ládxa'a, en ricuídi'da'.

Rinnëda' ládxa'a tu' ruúbi ruguf'i ládxi'da'ahua'.

⁹ Nöz quézinu' Lí', Xan, le rizé ládxa'a,

en riyönnu' le rinnética'sö ládxa'a.

¹⁰ Richunchu ládxi'da'ahua', en ricuidi' ládxa'a,

ga ridxintë richul-la guiój lahua'.

¹¹ Bití'rö ta'dzaga neda' yugu' luzá'a, en yugu' böcha'a, tu' nözi xihuë'a,

ate' tu'biga' di'a dza quia' ga zoa'.

¹² Nupa tē'ëni iluti neda' ta'bequi le ila'zön neda',

ate' nupa tē'ëni ulu'cul-la neda' tun xtídza'guequi nacxi ulu'suniti neda'.

Idú dza ta'bequi ícaguequi bi ilún quia'.

13 Naca' ca tu bönni' nacödzuë', en bití'rö riyönda'.

Naca' ca tu bönni' narugu lúdxë'ë, en bití' risaljë' ru'ë.

14 Naca' ca tu bönni' bití'rö riyönnë',
en que lë ni na' bití' bi didza' rubi'ë.

15 Tuzu' Li' ruzxöni ládxa'a, Xan.

Ubí'i cazu' didza', Xana' Dios.

16 Bití' gu'u lataj ulu'dzeja ni'a que le raca quia'.

Bití' gu'u lataj ilún ba zxon cuínguequi tu' nagá'ana' cá'asö.

17 Chizóa' tsöjbixa',

en zóalenticá'sö xihuë'a neda'.

18 Que lë ni na' rixóalépa' xiguia' nabága'a,

en risëbida' ládxa'a tu' nözi dul-la' nabága'a.

19 Nacúa' dxi'a, en nál-lagaca nupa téqui neda' zi'.

Nayánda' nupa tu'dí'i neda', en bití' bi nuna' quéguequi.

20 Ta'dá'baga' neda' nupa tu'bí'i le cabí naca dxi'a que nu run le naca dxi'a.

Caní tun tu' ruí'i ládxa'a guna' le naca dxi'a.

21 Bití' usán no'o neda', Xan.

Bití' ubigu' ga zoa', Dios quia'.

22 Gudáchi gácalenu' neda', Xan,

tu' naca cazu' Li' Nu rusólá neda'.

39

1 Gunnía': Gun chí'i cuina' ca naca le runa',

en bití' guna' dul-la' ca naca didza' ruá'a.

Bití' bi didza' gu'a

cate' nacúa' nupa tuá' dö' gal-la' ga zoa'.

2 Guzóa' dxisö, en bití' bë'a didza' ga bidxintë

bití' gunnía' le naca dxi'a, pero biyali' xihuë'a.

3 Bubi buguí'i ládxi'da'ahua',

en cate' guzá' ládxa'a que, guyegui gulá ládxi'da'ahua'.

Que lë ni na' gunábida'-në' Xanru', gunnía':

4 Xan, ¿gáca'xte caz soa' ibana'?

Buluí'i neda' tsca iz soa' ibana'.

Ben ga inözda' channö chizóa' caz gátia'.

5 Nabábasö dza nuzú' quia' soa' ibana'.

Yugu' iz soa' ibana' bití' bi zeaj naca lo' Li'.

Le nácatë bití' bi nácacaca yúgu'të bönachi nacúa' luyú ni.

6 Nácacacasö ca tu zxul-la rigú'u böaj.

Nítisö tu'úbi tu'guí'i ládxi'do'guequi, en tun dxin.

Tu'tubi yöl-la' tsahui', pero bití' nözguequi nuzxi guequi que.

7 ¿Bizxi caz gaca guna' löza, Xan?

Ruzxöni ládxa'a Li'.

8 Busólá neda' lu xiguia' nabága'a,

en bití' gu'u lataj ulu'titaj quia' nupa nácacaca canöz.

9 Soa' dxisö, en bití' bi didza' gu'a,

tu' ben cazu' Li' ga riguí'i rizáca'a lë ni.

10 Bití'rö gunu' neda' xiguia'.

Chizóa' gátia' tu' rusaca' zi'u neda'.

11 Runu'-në' xigua' bönni' dul-la', en ruzenu' lë' bach.
 Ca tu'töba' bëlado' que le yú'uba', rusunítu' le ruí'í ládxi'ë bönni' na'.
 Biti' bi naca cazë' bönni' dul-la' na'.

12 Buzë' nagu' le rulidza' Li', Xan, en le rinábida' Li'.
 Biti' su' dxisó cate' ribödxa' lo' Li',
 en biti' gaca' ca tu bönni' zi'tu' lo' Li',
 en ca tu bönni' ridasë' ca guláquië' xuz xtó'otu'.

13 Benna neda' lataj idipa ládxa'a
 zí'aló ca uzá'a yödzülió ni, en bíti'rö soa'.

40

1 Lu yöl-la' riböza zxon ladxi' quia' gulöza' gácalenë' Xanru' neda'.
 Ní'irö buzë' naguë' quia', en biyönnë' le bulidza'-në'.

2 Bubéajë' neda' ca tu lu yeru ga rë', en lu guna' zili.
 Buzóë' neda' tu lu guiöjto'o, en guléquië' neda' tsutsu.

3 Busëdinë' neda' tu le cubi le rul-la' le naca yöl-la' ba queë' Dios queëru'.
 Zían nupa ila'lé'eni lë ni, en ilún Lë' zxon,
 ate' ulu'zxon ladxi'-në' Xanru'.

4 Bica' ba bönni' ruzxon ládxi'ë Xanru'.
 Biti' runë' tsözxön nu run ba zxon cuini, nu na' run zxon yugu' dios
 núngaca bönachi.

5 Zíántërö naca le nunu' queëtu', Xana' Dios, yugu' le tun ga rubánitu'.
 Zíántërö le yu'u icja ládxi'do'o ca naca le gunu' queëtu'.

Biti' ca' gaca nu ulaba lo' Li' tsca nácagaca.
 Channö guë'ënda' nu usiyönda' tsca nácagaca,
 nayántërö tsca le gaca ulaba'.

6 Biti' ré'ënu' gútigaca'-ba' böa' guixi' lo', en calëga bi cu'a lo'.
 Biti' rinabu' uzégui'gaca'-ba' böa' bëdxi lo',
 en calëga tu le guna' lo' para ugúa dul-la',
 pero gusalju' naga' para yönda' le guío' neda'.

7 Que lë ni na' gunnía': Ni zoa caza' neda' quiu'.
 Lu guichi lá'ayi quiu' nazúaj caz ca naca quia'.

8 Raza ládxa'a runa' ca ré'ënu' Li', Dios quia'.
 Nagu'a icja ládxi'da'ahua' xibá naguixju' Li'.

9 Ga tu'dubi bönachi guizxi yu quiu', Xan,
 busiyönda' léguequi nacu' tsahui'.

Biti' ca' guzóa' dxisó.
 Nöz quëzinu' lë ni, Xan.

10 Biti' bucáchi'za' icja ládxi'da'ahua' ca ruúnu' tsahui' bönachi.
 Bulu'a lahui ca runu' ca rnno', en ca rusöló' bönachi.
 Ga nudúbigaca bönachi quiu' bití' guzóa' dxisó,
 pero bë'a didza' ca nacu' dxi'í ladxi', en ca ru'u didza' le nácatë.

11 Biti' ugú' quia' yöl-la' dxi'í ladxi' quiu', Xan.
 Yöl-la' dxi'í ladxi' quiu', en ca runu' ca rnna xtídzu'u ilún chí'ítica'sö neda'.

12 Zían le raca quia' nagú'ugaca neda' lë'ajlë, le cabí' gaca nu ulaba.
 Nabága'a yugu' dö' bí'a, en bíti'rö gaca ilé'eda'.

Nayanrö ca guitsa' icja', ate' rudú ládxa'a.

13 ¡Busölá neda', Xan!

¡Gudáchi gácalenu' neda', Xan!

14 Ben ga ulu'tuí'i, en ila'bó' baguí'i
nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö
nupa na' té'ëni gaca quia' le cabí naca dxi'a.

15 Ben ga ulu'dú ládxi'gaca tu' nabíxigaca
nupa na' tu'titaj neda', ta'nná: "¡Buyútsöca' le raca queë'!"

16 Ben ga ulu'dzeja, en ulu'zí' xibó' yúgu'té nupa tu'guilaj Li'.
Ben ga ila'nnática'sö nupa ta'dxi'i yöl-la' rusólá quiu',
ila'nná: "Nayépsètèrè' Xanru'."

17 Nacuídi'da', en bití' bi gaca guna',
pero ruí'i ladxi' casu' Li' neda', Xan.

Naca casu' Nu rácalen neda', en Nu rusólá neda'.
Bití' tsenu' guídu' quia', Dios quia'.

41

1 Bica' ba bönni' ruí'i ládxi'ë nupa nácagaca yechi'.

Xanru' gácalen cazë' bönni' na' cate' bi gaca queë'.

2 Xanru' Dios gun chi'ë lé', en gunë' ga soë' ibanë'.
Gunë' ca' ga uzi'ë xibé xiyú cazë'.

Bití' usán në'ë lé' lu ná'agaca nupa bití' ta'lé'e lé' dxi'a.

3 Xanru' utipë' ládxi'ë bönni' na' cate' ré'enë'.

Uchisé' lé' lu da'a le ráti'në', en gunë' ga soë' dxi'a.

4 Gunnía': Bena' dul-la' lo' Li', Xan.

Buéchi' ladxi' neda', en bun neda'.

5 Nupa bití' ta'lé'e neda' dxi'a ta'nnë quia', ta'nná:
"¿Bátaxi gátië', en huáca gal-la ládxi'gaca bönachi lé'?"

6 Channö uduyúgaquië' neda', ta'zí' yë'ë.

Ta'gúë' didza' ca naca le raca quia',
en cate' ta'rúajë', tu'siyönnë' bönachi.

7 Tu'dubi nupa bití' ta'lé'e neda' dxi'a, en ta'nnë quia'.

Ta'zá' ládxi'gaca zían le naca dö' le ilún quia'.

8 Ta'nnë quia', ta'nná: "Yu'ë yödzöhuë' le guti lé'.

Bítirö caz huóásë' ga na' dë' lu le denë'."

9 Lësca caní benë' böchi' luzá'a ruzxóni ládxa'a-në'.
Bönni' gudágulenë' neda' tsözxón ridá'baguë'ë neda'.

10 Buéchi' ladxi' neda', Xan, en bun neda',
ate' ubí'i caza' quégaca nupa na' bití' ta'lé'e neda' dxi'a.

11 Gácabe'eda' raza ládxi'u neda',
tu' cabí ulu'xicja neda' nupa bití' ta'lé'e neda' dxi'a.

12 Gáclen casu' neda' tu' runa' le naca dxi'a.
Gunu' ga sóatica'sa' lo' Li'.

13 ¡Yöl-la' ba Xanru', Dios quégaca bönachi Israel!

¡Gulí'cu'ë yöl-la' ba na'a dza, en yugu' dza sí' zaca!

¡Ca' gaca!

¡Ön, ca' gaca!

42

1 Ca rizë ládxi'ba' bidxina' guixi' nisa yégudo',

lësca' caní rizě ládxa'a Li', Dios.

² Ribidxi ládxa'a Li' cazu', Dios.

¿Bátaxi udxina' ga dē quia', en tsu'a le yúbölö yudo' lá'ayi quiu'?

³ Rëla, en te dza ribödxa', en biti' bi rahua'.

Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"

⁴ Risëbi ládxa'a cate' rōjneda' ca guca zí'alō,

cate' guzá'lena' bōnachi guizxi yu, en yōjnōrua' láhuilōguequi ra' yu'u queë'
Dios.

Lu yöl-la' rudzeja queëtu' bıl-latu', en guyéaj ládxi'tu'-në' Xanru', en bentu'
laní.

⁵ ¿Bizx que risëbida' ládxa'a, en bizx que rō'a bōniga?

Uzxōni ládxa'a-në' Xanru' Dios, tu' huadxín dza cu'a-në' yöl-la' ba le
yúbölö.

Náquië' Nu rusölá neda', en náquië' Dios quia'.

⁶ Risëbida' ládxa'a, Dios quia'.

Que lē ni na' tsōjneda' Li' tsanni ni zoa', ridá' rizxúnna' ra' yegu Jordán,
en tsanni ni ridá' lu guí'a Hermón, en lu guí'a Mizar.

⁷ Ca tu guziú' rinnē lu nísado', en ca bō ruí'i tu budoá' nísado' queë' Dios,
caní rinnē ladxí' bō' naca caza' lu yöl-la' risëbi ladxí'.

⁸ Rinábida'-në' Xanru' huéchi' ládxe'ë neda' yugu' dza.

Yugu' dzō' rul-la' yöl-la' ba queë' Lē',

en rulidza' Dios, ruí'lena'-në' didza', Nu na' runna quia' yöl-la' na'bán.

⁹ Guía'-në' Dios, Nu ruzóa neda' tsutsu, innía': ¿Bizx que nál-la ládxi'u
neda'?

¿Bizx que run bayúdx quí'i sáca'tica'sa' lu ná'agaca nupa biti' ta'lé'e neda'
dxi'a'?

¹⁰ Rutsaba yúgu'tē dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bizx que risëbida' ládxa'a, en bizx que rō'a bōniga?

Uzxōni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

43

¹ Guléaj neda' tsahui', Dios, en bē' didza' uláz quia' lógaca bōnachi tuá' dö'
quia'.

Busölá neda' lu na' nu rizi' yē', en biti' naca tsahui'.

² Li' cazu' nacu' Dios, Nu rutipa ládxa'a. ¿Bizx que nusán no'o neda'?

¿Bizx que ruhuí'inida' tu' ta'bía no neda' nupa tu'dí'i neda'?

³ Gusöl-la' quia' bení' quiu', en le naca idútē li quiu' para ulu'lú'i neda'
nōza.

Ben ga ilá'chē' neda' ga naca lá'ayi quiu', ga na' zoa cazu' Li'.

⁴ Tsu'a ra' bucugu queë' Dios.

Ibíg'a lahuē' Dios, Nu run ga rudzėjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bizx que risëbida' ládxa'a, en bizx que rō'a bōniga?

Uzxöni ládxa'a-në' Xanru' Dios,
tu' huadxín dza cu'a-në' yöl-la' ba le yúbölo,
tu' náquië' Nu rusólá neda', en náquië' Dios quia'.

44

1 Biyõn quézitu' le, Dios.

Bulu'siyönnë' netu' xuz xtó'otu'
ca naca yugu' le zxön benu' dza ni'te,
cate' ni' gula'cu'ë légaquië' luyú ni.

2 Bulaga cazu' Li' bönachi yugu' yödzö izá'a,
en bucuásu' légaquië' luyú ni.

Busaca' zi'u bönachi izá'a na', en gurú'unu' léguequi.

3 Biti' gula'déli'në' xuz xtó'otu' luyú ni rácasö queégaquië',
en biti' bulu'sólá la' cuíngacasë',
pero ben cazu' Li' lë na' len yöl-la' huáca zxön quiu',
en lu yöl-la' zxön que le naca cazu',
ate' bulú'u lahui ca nadxí'inu' légaquië'.

4 Naca cazu' Li' Dios quia', en Nu rinná be'e neda'.

Busólá bönachi quiu', yugu' xzí'ini xi'sóë' Jacob.

5 Uguntu' dxin yöl-la' huáca quiu', uxícjatu' nupa ta'dá'baga' netu',
ate' tu' zóalen cazu' netu', ucúl-latu' nupa biti' ta'lé'e netu' dxi'a.

6 Biti' uzxöni ládxa'a uxiti' yaga quia',

en biti' uzxöni ládxa'a guië tuchi' quia' para ilácalen neda',

7 tu' rusólá cazu' Li' netu' lu ná'agaca nupa biti' ta'lé'e netu' dxi'a,
en ruzötju' nupa tu'dí'i netu'.

8 Cú'utica'stu' Li' yöl-la' ba,

en guiética'stu' Li': "Xclenu'."

9 Pero na'a nusán no'o netu', Dios, en bë'u lataj nu buxicja netu'.

Bíti'rö réajlenu' bönni' queëtu' röjáquië' gudil-la.

10 Benu' ga buzxúnnajtu' lógaca nupa ta'díl-lalen netu',
ate' gula'güë' yugu' le nequi queëtu'.

11 Bë'u lataj gulútië' ziantu' ca nu rúti-gacaba' bö'cu' zxila'.

Bësilásiu' netu' ládjagaca yödzö izá'a.

12 Naca tsca bëti'u netu', en láti'do'os guzxi'u.

Biti' ca' buzi'u xibé tsca guzxi'u.

13 Bönachi yugu' dzaga yödzö queëtu' bila'lé'e lë na' benu' queëtu',
ate' tu'cá'ana netu' cá'asö, en tu'titaj netu'.

14 Benu' ga tu'didza' yudxi bönachi yugu' yödzö netu'.

Tu'tá ícjaguequi lu yöl-la' rucá'ana netu' cá'asö.

15 Yugu' dza rutuí'ida' ca raca queëtu',

en rö'a böniga lu yöl-la' rutuí'i quia',

16 tu' riyönda' nupa tu'didza' yudxi neda', en tu'cá'ana neda' cá'asö,
nupa na' biti' ta'lé'e neda' dxi'a, en tu'dí'i neda'.

17 Guca queëtu' yúgu'të lë ni sal-la' biti' nál-la ládxi'tu' Li',

en biti' nucá'anatu' didza' dzaga bénlenu' netu'.

18 Biti' ca' böaj ládxi'tu' ca réajlë'ëtu' Li',

en biti' gudá'baga'tu' le buluí'inu' netu' guntu'.

19 pero nusán na' cazu' netu' ladaj nupa ná'cagaca ca yugu' böa' gui'a sínia',
en nucá'anu' netu' ga chizóa' tseajtsázatu' lataj chul-la.

20 La'tu' gul-la ládxi'tu' Li', Dios queëtu',

o la'tu' guyéaj ládxi'tu' tu dios izá'a,
 21 la' gáquibe'etënu' lë ni, Dios,
 tu' nôz quézinu' le rizá' ládxi'tu'.
 22 Tu' néquitu' quiu' Li' zóatica'sô nu guti netu'.
 Nactu' ca yugu' bö'cu' zxíla'do' lo nu guti légacaba'.

23 ¡Bubán, Xan! ¿Bizx que rásitso' Li'?
 ¡Guyasa! ¡Biti' usán no'o netu' chadía chacanna!
 24 ¿Bizx que nucachi' lo' lotu' netu'?
 ¿Naru' nál-la ládxi'u ca raca queétu', en ca riguf'i rizáca'tu'?
 25 Naguíngaquië' netu' luyú.
 Nadínitu' lu bëchtô yu.
 26 ¡Gudáchi gácalenu' netu',
 en lu yöl-la' dxi'i ladxi' quiu' busölá netu'!

45

1 Rizá' ládxa'a tu le naca dxi'a.
 Ru'a didza' que le runë' bönni' rinná bë'ë.
 Naca lúdxa'a ca le ruzúajlenë' bönni' nabé'ede'enë' ru'ë didza'.

2 Nácatëru' Li' lachi ca yúgu'të bönachi.
 Nabé'ede'enu' ru'u didza'.
 Que lë ni na' nunë' Dios gaca dxi'a quiu' chadía chacanna.
 3 Bega' lë'u guië tuchi' quiu', bönni' nayëpisë',
 lu yöl-la' lachi quiu', en lu yöl-la' unná bë' quiu'.
 4 Lu yöl-la' unná bë' quiu' idéli'nu' lu gudil-la,
 ugunu' dxin le naca idütë li, en yöl-la' nöxaj ladxi', en le naca tsahui'.
 Yöl-la' huáca zxön quiu' gun ga ilá' lahui yugu' le zxöntëro.
 5 Natúchi'gacada' yaga lahui tuchi' quiu'.
 Bönachi yugu' yödzö zi'tu' ta'dzö'ö lo', nupa na' ta'díl-lalen li'.
 Yugu' yaga lahui tuchi' quiu' nachöza'gaca ládxi'do'guequi.

6 ¡Chadía chacanna naguixju' ga rö'u rinná bë'u, Dios!
 ¡Ca naca le naca tsahui' rinná bé'enu' bönachi quiu'!

7 Nadxí'inu' le naca tsahui', en biti' rilé'enu' dxi'a le biti' nácatë.
 Que lë ni na' Dios quiu' nabó cazë' li'.
 Nachízirë' icja ládxi'do'o yöl-la' rudzeja ca le nápagaca ia'zíca'rö bönachi.
 8 Rilá' zxixi lari' nacu' len zi' mirra, en zi' áloe, en zi' casia.
 Tunë' bönni' huil-la ga rudzéjanu' lu yu'u lidxu' zxön.
 9 Yugu' nigula zxí'inigaquië' bönni' ta'nná bë'ë
 nútsa'gacabi' bi'i nigula nacua'abi' lidxu'.
 Nigula quiu' rinná bé'enu' zuínu' cuitu' ibëla,
 en nácunu le nazí'i biquitaj oro nazaca'.

10 Bë' ladxi' neda', nigúlado'.
 Bë' ladxi' neda', en biyön xtídza'a.
 Gul-la ladxi' bönachi yödzö quiu', en yugu' di'a dza quiu'.
 11 Ní'irö së ládxi'ë bönni' rinná bë'ë yöl-la' lachi quiu'.
 Buzóa' xzibu' lahuë' tu' náquië' xanu'.
 12 Ní'irö bönachi yödzö Tiro ila'dxín lo' nuá'gaca le nazáca'da' le ilunna
 quiu'.

Yugu' bönni' ta'lé'enë' yöl-la' tsahui' ila'nábinë' li' bi unödzu' quégaquië'.
 13 Yugu' bi'i nigula queë' bönni' rinná bē'ë zóagacabi' lidxë', en
 nácatërögacabi' lachi.

Lari' nácuti' nadíalen du oro.

14 Ila' chē'ë-bi' lahuë' bönni' rinná bē'ë, nácuti' lari' nazáca'da'.

Ila'dabi' yugu' bi'i nigula ra'bando' cúdzi'löbi',
 ate' ila' chē'ë légacabi' lahuë' bönni' na' rinná bē'ë.

15 Lu yöl-la' rudzeja, en lu yöl-la' ruzi' xibé quégacabi' ila'dxinbi',
 en ila'yázabi' yu'u lidxë' bönni' na' rinná bē'ë.

16 Ila' cuá'abi' bi'i bönni' quiu' uláz quégaquië' xuz xto'o.

Gunu' ga ila'nná bē'ëbi' idútë yödzölió.

17 Gunu' ga tsöjnégacatica'sö bönachi ca nacu' Li'.

Que lë ni na' yúgu'të bönachi ilë li' "Xclenu'" yugu' dza si' zaca.

46

1 ¡Náquië' Dios Nu run chi'i rë'u, en Nu ruzóa rë'u tsutsu!

¡Zóatica'së' gácalenë' rë'u cate' bi' raca queëru'!

2 Que lë ni na' biti' gádxiru' sal-la' izxizi idútë yödzölió,
 en ila'niti yugu' guí'a lu nísado',

3 en sal-la' chasa idxía, en tsu'u bö nísado' na',
 en ila'zxizi guí'ado' tu' nözi le raca.

4 Zoa tu yegu le run ga tu'dzeja nupa nacuá' ladzë' Dios,
 ga na' röz'ö yudo' lá'ayi ga zoë' Dios nayëpisëtërë'.

5 Zoa cazë' Dios yödzö na', le catu caz iníti.
 Cate' ni' soa itó yu gácalenë' nupa nacuá' ni'.

6 Tadxi ta'dzöbi bönachi yugu' yödzö,
 ate' ta'bö' baguí'i nupa ta'nná bē',
 tu' ru'ë didza' Dios, ate' riniti luyú ni.

7 Xanru' nayëpisëtërë' zóalen cazë' rë'u.

Dios quégaca xzí'ini xi'sóë' Jacob rapa chi'ë rë'u.

8 Guli'dá ilé'eli' le nunë' Xanru'.

Bulí'yú ca nusunítië' luyú ni.

9 Ruzóa dxíë' gudil-la rácagaca idútë yödzölió.

Riguitsjë' yugu' uxiti' yaga,
 en rusunítië' yugu' yaga lahui tuchi' que gudil-la.

Ruzéguí'ë yugu' carreta que gudil-la tu lu guí' zxön.

10 Rnnë': "Guli'sóa dxisó, ate' guéquibe'eli' naca caza' Dios.

Nayëpisëtëra' yugu' lu yödzö, en lu idútë yödzölió."

11 Xanru' nayëpisëtërë' zóalen cazë' rë'u.

Dios quégaca xzí'ini xi'sóë' Jacob rapa chi'ë rë'u.

47

1 ¡Lu yöl-la' rudzeja queëli' guli'capa' ná'ali', bönachi yúgu'të yödzö!

¡Gulí'cu'ë yöl-la' ba Dios, len yugu' le rúl-lalenlí'!

2 Ral-la' gunru' bal Xanru' Dios nayëpisëtërë'.

Náquië' Nu rinná bē' idútë yödzölió.

3 Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzö.

4 Gurõ cazë' luyú ga ni nuzóë' rë'u.

Naca tu luyú lachi quégaca zxi'ini xi'sóë' Jacob, nupa na' nadxí'i quézinë'.

5 Len yöl-la' ba zxön ribenë' Dios ga rö'ë rinná bë'ë.

Le zían le tu'cödxë' cate' ribenë' Xanru' ni'.

6 ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

7 ¡Rinná bë'ë Dios idútë yödzölió ni!

¡Idú ládxi'li' guli'gul-la yöl-la' ba queë'!

8 ¡Zoa cazë' Dios lataj lá'ayi queë' ga rö'ë rinná bë'ë!

¡Rinná bé'enë' bönachi yúgu'të yödzö!

9 Tu'dubi nupa ta'nná be'e yugu' yödzö

tsözxön len bönachi queë' Dios queë' Abraham.

10 ¡Nequi queë' Dios yöl-la' zxön quégaca yúgu'të yödzö nacua' yödzölió!

¡Nayëpisëtërë' Lë'!

48

1 Nayëpisëtërë' Xanru', ate' run bayudxi cú'uru'-në' yöl-la' ba idú ládxi'ru' ga zoa lu yödzö queë' Dios queëru' le zoa lu gu'a lá'ayi queë'.

2 Lachi, en sibi naca gu'a lá'ayi na',

ate' raza ládxi'gaca bönachi idútë yödzölió ca naca.

Caní naca gu'a Sión le rö'ö tsölá'alö ga za' bö' ziaga.

Lu yödzö na' dë ga zoa Bönni' Unná Bë' nayëpisë'.

3 Rulu'ë lahui Dios sóaru' tsutsu cuitë' Lë'

ga zoa lu yu'u lidxë'.

4 Gula'dá'baga' nupa ta'nná bë' lu yu ni,

en gula'bígui'ë ra' yödzö lá'ayi na'.

5 Cate' bila'lé'enë' yödzö na' bulu'báininë'.

Gula'bö'ë böniga, en la' bulu'zxúnnajtë'.

6 Ra' yödzö na' gula'zxízië'.

Gula'zaca' zi'ë ca raza queënu nigula chizóa uzóanu-bi' bí'ido'.

7 Risól-lë'ë Dios tu bö' budunu',

le rusuniti yugu' barco zxön que yödzö Tarsis.

8 Biyönru' ca náçagaca le zxön benë' Dios,

ate' na'a rilé'e quéziru' le runë',

lu yödzö lá'ayi queë' Dios quégaca ni'a në'ë guizxi yu,

en náquië' ca' Dios queëru'.

Tsaz naguixjë' yödzö na'.

9 Ga zoa lu yudo' quiu', Dios,

röjnetu' ca naca yöl-la' dxi'i ladxí' quiu'.

10 Ca nayëpisëtërö Lo', Dios,

ca' ta'gu'u Li' yöl-la' ba bönachi idútë yödzölió.

Ca naca le naca tsahui' rinná bë'u.

11 Ulu'dzeja bönachi nacua' yödzö Sión.

Ulu'zí'inu xibé nigula zxi'ini xi'sóë' Judá

tu' ruchí'a rusöróu' netu' ca naca le naca tsahui'.

12 Guli'dá idú gásibi'ilö ga dë yödzö Sión,

en buli'laba yugu' yu'u sibi tun chí'i yödzö na'.

13 Buli'yú ca naca zö'ö run chí'i yödzö na',
 en buli'yú ca' le nuzóagaca le tsutsu,
 para gaca quíxjöi'ili' xzí'ini xi'sóali' ca náquië' Dios zxön ni.
 14 Tsaz náquië' Dios queëru', na'a dza, en dza si' zaca.
 Ulu'inë' ré'u nôza tôdi gátiru'.

49

1 Guli'yöni lë ni, libí'ili', bönachi yúgu'të yödzö.
 Buli'zé nágali', libí'ili', zóali' idútë yödzölió.
 2 Libí'ili', nayépsëtëróli', en libí'ili', nácali' cá'asö.
 Libí'ili', dë yöl-la' tsahui' queéli', en libí'ili', nácali' yechi'.
 3 Tsöjsá' ládxa'a ca naca le nápagaca yöl-la' réajni',
 en gu'a didza' le nápagaca yöl-la' raca yenni'.
 4 Güi'i ládxa'a ca naca tu le rucudzu' didza',
 en quíxjö'a ca nápagaca tsanni quinnia' lë'e bihuël-la.
 5 Biti' bi rádxida' cate' ridxín bi raca quia',
 cate' ta'gu'ë neda' lé'ajlö bönni' tuá' dō' biti' ta'lé'enë' neda' dxi'a.
 6 Tu'zxöni ládxe'ë bönni' na' yöl-la' tsahui' quégaquië',
 en tun ba zxön cúngaquië' ca nápagaca le dë quégaquië'.
 7 Biti' gaca huóá'uë' la' cuinsë' nitúë' bönni' na'.
 Biti' gaca bi unödzjë' queë' Dios le gun ga usölë' lë',
 8 tu' naca zxöntëro' le huóá'u yöl-la' na'bán que nu bönni',
 ate' catu caz gaca nu bönni' quizxjë' ca naca,
 9 para idéli'në' sóatica'së' ibanë',
 en cabí tsázië' yeru ba ga yú'ugaquië' bönni' nati.
 10 Rilë'enë' tatië' ca' bönni' ta'yéajni'inë',
 en ta'nitië' tuz ca tati nupa biti' bi nözigaca, en nupa biti' ta'yéajni',
 ate' tu'cá'anë' yöl-la' tsahui' quégaquië' le ulu'z' xibé bönachi yúbölö.
 11 Téquinë' ila'cuá'tica'sö lídxigaquië' bönni' na',
 ate' tsaz ila'cu'ë ni',
 ate' ta'gu'ë lágaca xiyúgaquië' ca naca la' lágacasë'.
 12 Pero yöl-la' ba zxön napë' bönni' na' biti' gun ga sóatica'së'.
 Gati cazë' ca tátiba' böa' guixi'.
 13 Caní naca le gaca quégaquië' bönni' tu'zxöni ládxe'ë yöl-la' tsahui'
 quégaquië',
 enca' quégaca xzí'ini xi'sóagaquië',
 yugu' bi'i na' ta'yaza ládxi'gacabi' didza' gulu'ë xúzgacabi' na'.
 14 Ilátië' ca tátiba' bö'cu' zxila',
 ate' yöl-la' guti gaca quégaquië' ca tu nu uyú bö'cu' zxila'.
 Yugu' bönni' tsahui' ila'nná bé'enë' légaquië' cate' itō yu zila.
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa
 nátigaca.
 15 Huóá'u cazë' Dios yöl-la' na'bán quia' lu yöl-la' guti,
 tu' ichë'ë neda' ga tsöjsóalena' Lë'.
 16 Biti' gádxinu' cate' idéli'në' nu bönni' yöl-la' tsahui' zxön,
 en cate' xön yöl-la' lachi que yu'u lidxë',
 17 tu' cabí bi u'ë cate' gátië',
 en biti' tséajlen lë' yöl-la' lachi que le guta' queë'.
 18 Sal-la' cate' ni' zoë' nabanë' buzí' xibé bö' naca cazë',
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.

19 Tsázië' ga na' dzö'ë xuz xtá'ahuë',
en bítí'rö ilé'enë' bení'.

20 Náquië' bönni' napë' yöl-la' zxön, pero riyádzjanë' yöl-la' réajni'i,
ca böa' guixi' tati cázaba'.

50

1 Ru'ë didza' Xanru' Dios nayëpisëtë'rë'.

Nutubë' dërö nupa nacua' yödzölió ga naguéla'të ga rilén gubidza ga
ridxintë ga ribía.

2 Lu yödzö Sión rigu'ë Dios bení'.

Napa yödzö na' yöl-la' lachi idú.

3 Zë'ë Dios queéru', en bití' soë' dxisö.

Tsöjnöru lahuë' tu guí' zxön,
ate' tsecja tu bö' budunu' idú gasibí'ilë'.

4 Ulidzë' lúzxiba xitsá', enca' luyú
cate' uchi'a usöröë' quégaca bönachi queë'.

5 Rnnë' Dios: "Guli'túbi nupa néquiguequi quez quia',
nupa na' gulunlen neda' didza' dzaga,
en bulu'lalaj rön lahua' le ben tsutsu didza' dzaga na'."

6 Naca bë' náquië' tsahui' Dios lúzxiba xitsá',
tu' uchi'a usöröë' Dios bönachi queë'.

7 Rnnë': "Buli'zë nágali', bönachi quia', ate' gu'a didza'.
Buli'zë nágali', bönachi Israel, ate' uzéguia' libí'ili' didza'.

Naca caza' Dios.

Ön, naca' Dios queëli'.

8 Bití' uzéguia' libí'ili' didza' ca naca le rúnнали' quia',
en calëga ca nácagacaba' böa' bëdxi ruzéguili'-ba' lahua'.

9 Bití' riquinda'-ba' bëdxi queëli',
en calëga chivo biguiú' nacua'aba' queëli',

10 tu' néquigacaba' quia' yúgu'tëba' böa' guixi',
enca' böa'-bëdxi nacua'aba' lu gayuá' gayuá' guí'ado'.

11 Néquigacaba' ca' quia' yúgu'tëba' böa' zoa xiligacaba',
enca' yúgu'të le zoa nabán la' guixi'.

12 La'tu' riduna' bití' guía' ca' libí'ili',
tu' nequi quia' yödzölió, enca' yúgu'të le nacua' ni'.

13 ¿Naru' gágutsa' xipéla'gacaba' bëdxi,
o guí'jatsa' xichöngacaba' chivo?"

14 Le ral-la' unödzjali' queë' Dios naca yöl-la' rë Lë': "Xclenu"
ate' ral-la' gunli' lahuë' Dios nayëpisëtë'rë' ca naca le guzxí' lu ná'ali'
gunli'.

15 Rnnë' ca': "Ral-la' ulídzali' neda' cate' bi gaca queëli'.
Gácalen caza' libí'ili', ate' gunli' neda' bal."

16 Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlëna' bönachi?

17 Bití' runnu' lataj usédida' li',

pero rucá'anu' cá'asö didza' ruá'a.

18 Cate' rilé'enu'-në' bönni' gubán rácalenu' lë',

en runu' tsözxön nupa ta'guitsaj xibá que yöl-la' nutsaga na'.

¹⁹ Zóatica'su' gu'u didza' xihui',

en ru'ítica'su' didza' bití' nácatē.

²⁰ Zóatica'su' uzéguii'-nē' böchi' casu',

en rudidza' yudxu' böchi'-zan casu'.

²¹ Caní benu', ate' bití' bi gunnía',

ate' gúquinu' naca' ca naca casu' li',

pero na'a uzégua' li' didza', en ulu'a lahui le nunu'.

²² Bulí'zē nágali' didza' ni, núlöli' ruzóali' neda' tsólá'alō.

Channō cabí, usunítia' libí'ili', ate' cuntu nu gaca usólá libí'ili'.

²³ Nu rē neda': Xclenu', runna quia' le run neda' bal,

ate' nu run ca rnna xtídza'a, usólá caza' nu na'."

51

1 Dios quia', buzá' ladxi' quia' tsca naca yöl-la' dxi'i ladxi' zxön quiu',

en tsca naca le zían le ruzá' ládxi'u quia', bugúa yugu' le gudá'baga'a lo'

Li'.

² Buguíbitica'sō neda' tsca naca dö' bi'a.

Buchi'a neda' lu dul-la' nuna'.

³ Nöz quézida' le gudá'baga'a,

en rōjnétiqui'sida' yugu' dul-la' nuna'.

⁴ Lo' Li' casu' bena' dul-la',

en lo' Li' ca' bi'a dö'.

Naca bē' nacu' tsahui' cate' ru'u didza',

en idú dxi'a, en tsahui' nacu' cate' ruchi'a rusöróu' queétu'.

⁵ Buyútsōca', nabága'a dö' cate' gusí lotē gulja',

en lu dul-la' zoa caza' cate' buzóanu xiná'a neda'.

⁶ Rē'enu' soa le naca idútē li icja ládxi'do'otu'.

Guchiza icja ládxi'da'ahua' yöl-la' réajni'i.

⁷ Buchi'a neda' len le ruchi'aninu', ate' gaca' dxi'a.

Buguibi neda', ate' huóaca' zxíla'do'os.

⁸ Ben ga yōnda' le nachē' yöl-la' ruzí' xibé, en yöl-la' rudzeja,

para huóaca' ládxa'a lu le raca quia' tu' benu' ga réquibe'eda' nabága'a dul-

la'.

⁹ Biti' uyú' yugu' dul-la' nuna',

en busulu yúgu'tē le naca dö' nabága'a.

¹⁰ Dios quia', bun dxi'a ládxi'da'ahua',

en guchiza neda' tu bö' cubi le nuzú' tsutsu.

¹¹ Biti' ucuítu' neda' ga zoa' lo' Li',

en bití' ugú' Dios Bö' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusólá quiu',

en ben ga guna' ca rnna xtídzu'u idú ládxa'a.

¹³ Ní'irō usédida' nupa ta'guitsaj xibá quiu' ca nácagaca le rē'enu' ilúngaca,

ate' yugu' bönni' dul-la' ulu'huécja quiu'.

¹⁴ Dios quia', benna neda' lataj cabí ibága'a xiguia'.

Naca casu' Dios, Nu rusólá neda'.

Lu yöl-la' rudzeja quia' gul-la' ca naca casu' tsahui'.

¹⁵ Xana' Dios, gusalaj ruá'a,

ate' usiyōnda' bōnachi yöl-la' ba quiu'.

¹⁶ La'tu' raza ládxi'u-ba' böa'-bēdxi' gútitu'-ba' lo', la' gúntea' caní.

Biti' raza ládxi'u-ba' nu böa' uzégui'tu'-ba' lo'.

17 Le rě'ëně' Dios le naca ca tu le cú'uru' lahué'
naca bö' naca cáziru' le nõtaj nagula ladxi'.

Dios quia', biti' ucá'anú' cá'asö ládxi'do'otu'
le ruhui'ini ladxi', en le naca nõxaj ladxi'.

18 Lu yöl-la' ruzá' ladxi' quiu' ben le naca dxi'a
quégaca bõnachi yõdzõ Siõn.

Buchisa zõ'õ le run chi'i yõdzõ Jerusalén.

19 Ní'irõ tsaza ládxi'u yugu' le cú'utu' lo' le naca idú dxi'a,

yugu' böa' guíxi'do' gútitu'-ba' lo',

en yugu' böa'-bédxido' uzégui'tu'-ba' lo'.

Ní'irõ ilútié'-ba' yugu' bédxi biguiú'do',

en ila'gu'ë-ba' lu bucugu quiu'.

52

1 ¿Bizx que run ba zxõn cuinu' ni'a que dö' ru'u, bõnni' nál-la?
Zóatica'sõ yöl-la' dxi'i ladxi' queë' Dios.

2 Len lúdxu'u rúnlenú' luzó'o didza' para usunítuu' bõnachi.

Naca lúdxu'u, bõnni' rizí' yě', ca tu guíé' tuchi'.

3 Nadxí'irõnu' le naca dö' ca nadxí'inu' le naca dxi'a,

en nadxí'irõnu' le cabí nácate' ca nadxí'inu' le naca idútë li.

4 Nadxí'inu' yúgu'të didza' tun ditaj bõnachi,

li' na', bõnni' rizí' yě'ë.

5 Tsaz uzõtaj cazë' Dios li'.

Sõnë' li', en ubéajë' li' lu yu'u lidxu',

en ucuítë' li' ga nacuá' nupa nabángaca.

6 Yugu' bõnni' tsahui' ila'lé'enë' lë ni, en iládxinë' Dios.

Ulu'zxidxë' queë' bõnni' na' rizí' yě'ë, ila'në':

7 “¿Buli'yútsõca! Bõnni' ni biti' gú'unnë' uzxõni ládxe'ë Dios,

pero buzzõni ládxe'ë yöl-la' tsahui' queë',

en le zián le guzé ládxe'ë le cabí bi nazaca'.”

8 Naca' neda' ca tu yaga olivo ya'a le rö' ra' yu'u lidxë' Dios.

Uzxõni ládxa'a yöl-la' dxi'i ladxi' queë' Dios yugu' iz si' zaca.

9 Guíética'sa' Li': “Xclenu” tu' ben cazu' Li' ga naca caní,

ate' guna' lõza Lo' le naca dxi'a lógaca nupa néquiguequi quez quiu'.

53

1 Ta'zá' ládxe'ë bõnni' canõz, ta'nnë':

“Biti' ca' zoë' Dios.”

Nácagaquië' xihui' bõnni' caní, en núngaquië' le nácaterõ xihui'.

Cuntu nu bõnni' zoë' runë' le naca dxi'a.

2 Ga na' zoë' Dios yehua' yubá ruyúë' gátitës,

en rilé'enë' bõnachi nacuá' idútë yõdzõlió,

para inõzinë' channõ zoa nu réajni'i,

o channõ zoë' nu bõnni' ruí' ládxe'ë Dios.

3 Yúgu'të bõnachi sõjáquië' ga yúbóló.

Yúgu'të' nácagaquië' xihui'.

Cuntu nu zoa run le naca dxi'a, nitüë' bõnni'.

4 ¿Naru' cabí nápagaquië' yöl-la' réajni'i bõnni' na' tu'ë dö'?

Tu'sunítie' bõnachi quia' ca tu nu ragu yõta,

en bití' ca' tu'lidzē' neda'.

⁵ Tadxi ta'dzöbinē' bönni' caní, en bití' bi nuna' quégaquiē'.
Caní raca tu' rusunítíē' Dios caz nupa ta'díl-lalen libí'ili'.
Gunli' ga ulu'tuí'inē' tu' chigurú'unē' Dios légaquiē'.

⁶ Raca ládxi'ru' irúaj Sión Nu usölá bönachi Israel.
Cate' uchisa cazē' Dios bönachi queē' nadzúngaca,
ulu'dzeja xzí'ini xí'sóē' Jacob, en ulu'zí' xibé bönachi Israel.

54

¹ Busölá neda', Dios, para gaca yöl-la' ba que Lo'.
Len yöl-la' huáca quiu' guléaj neda' tsahui'.

² Ruzē' nagu' le rulidza' Li', Dios.
Ruzē' nagu' didza' ruá'a.

³ Ta'díl-lalen bönni' zítu' neda',
tu' té'ēnē' bönni' zidzaj ilútiē' neda'.

Bití' ca' tádxinē' Dios.

⁴ Bulí'yútsöca', naca cazē' Dios Nu rácalen neda'.

Ruzóē' tsutsu Xanru' yöl-la' na'bán quia'.

⁵ Ubi'ē' quégaca nupa ta'díl-lalen neda' le usuniti léguequi.

Tu' runu' ca rna xtídz'u, Dios, busuniti léguequi.

⁶ Idú ládxa'a gútia'-ba' böa'-bēdxi lo'.

Guía' Li': "Xclenu" Xan, tu' naca dxi'a Lo'.

⁷ Busölá cazu' Li' neda' lu yugu' le guca quia',
ate' rilé'eda' zeaj nanítitica'sö nupa ta'díl-lalen neda'.

55

¹ Ruzē' nagu' le rulidza' Li', Dios,
en bití' tá'bagu' le rinábida' Li'.

² Ruzē' nagu' neda', en rubí'u didza'.
Rulidza yúdxida' Li', en rö'a böniga

³ ni'a que chi'ē bönni' bití' rilé'enē' neda' dxi'a,
en tu' tu'tsá' neda' nupa tuá' dö', en tu'saca' zítu' neda',
en lu yöl-la' rilé' quéguequi ta'bía no neda'.

⁴ Réqui zítu' ládxi'da'ahua',
ate' yöl-la' radxi que yöl-la' guti röjtsaza ládxi'da'ahua'.

⁵ Chígula'yaza yöl-la' radxi, en yöl-la' rizxizi neda',
ate' nabaga' yöl-la' radxi ridzöbi neda'.

⁶ Gunnía': "Gaca ládxa'a gata' quia' xílaba' gu'dödo',
para gaca töda' lu bö'ös, en idxina' tu lataj ga gaca uzí' ládxa'a.

⁷ Raca ládxa'a tseja' zítu',
en tsöjsó'a' la' guixi' ga dē lataj.

⁸ Uyija' carelô tu lataj ga tsöjsó'a' tsutsu,
para cabí bi gun quia' le naca ca bö' budunu'."

⁹ Busuniti légaquiē', Xan, en buxí ruá'agaquiē',
tu' bilé'eda' ta'dil-lē', en tu'tsatsē' lu yödzo.

¹⁰ Rēla, en te dza ta'dödē' nöza lu yödzo.

Tu'ē dö', en tunē' le xihui' idú gásibi'ilö yödzo.

¹¹ Tu'sunítíē' le nacua' ní'.

Tu'saca' zítu' bönachi, en ta'zí' yē'ē la' nöza que yödz.

12 Calëga bönni' biti' rilë'enë' neda' dxi'a nu rudidza' yudxi neda',
 tu' huáca guá' ilena' le gunë',
 en calëga bönni' rudí'inë' neda' nu ridíl-lalen neda',
 tu' huáca ucachi' cuina' lahuë',
 13 pero nacu' lí', tu bönni' ca neda'.
 Nacu' böchi' luzá'a, en nacu' tuz len neda'.
 14 Lu yöl-la' dxi'i ladxi' queëru' gúcaru' tuz.
 Ladaj bönachi zián gударu', en bidxinru' lidxë' Dios.

15 Xana' Dios, bë' yöl-la' guti lataj idxín quëgaquië' bagáchi'sö.
 Ben ga tsöjtsázagaquië' nabánagaquië' lataj chul-la ga nacuá' nupa nátigaca,
 tu' yu'u le xihui' lídxigaquië', en lu yu'u ca' gapa tu'dubë'.

16 Pero neda' ulidza'-në' Dios,
 ate' usölá cazë' Xanru' neda'.
 17 Chi'i dzö'ölö, en zílado', en gatsaj dza ulidza yúdxida' Lë',
 en innë ládxa'a lahuë', ate' yön cazë' chi'a.
 18 Huöá'uë' yöl-la' na'bán quia' lu na' nupa ta'díl-lalen neda'
 en uzöë' neda' lataj ga cöza' dxi'a tsáhui'do',
 tu' nayánda' nupa ta'díl-lalen neda'.
 19 Huayön quëzinë' Dios, en ubi'ë quëgaquië'.
 Rö'ë rinná bë'tica'së' Lë'.
 Caní gunë' Dios tu' cabí tu'sanë' ca tunë',
 en biti' tádxinë' Dios.
 20 Bönni' ru'ë dö' ribía nahuë' nu riböza dxi'a tsáhui'do',
 en rucá'anë' cá'asö didza' dzaga nunë'.
 21 Bë'ë didza' yúlado',
 pero yu'u icja ládxi'da'ahuë' yöl-la' ridzá'a.
 Bë'ë didza' zxi'ido',
 pero didza' na' bë'ë gulaca ca guíë tuchi'.

22 Gulú'u le nabágu'u lu në'ë Xanru', ate' utipa cazë' ládxi'u.
 Biti' gu'ë lataj iguínmaj tsaz nu naca tsahui'.

23 Chú'unë' bönni' tu'ë dö' na' lataj chul-la
 ga nacuá' nupa nátigaca ga na' ila'nítigaquië'.
 Biti' ila'cuá' gatsaj tsca ral-la' ila'cu'ë nabánagaquië' bönni' tutië' bönachi,
 en bönni' ta'zì yë'ë.

Pero neda' uzxöni ládxa'a Lí'.

56

1 Buéchi' ladxi' neda', Dios, tu' ta'dá'baga' bönachi neda'.
 Yugu' dza nupa tu'dí'i neda' ta'bía no neda'.

2 Yugu' dza nupa biti' ta'lé'e neda' dxi'a tuá' dö' quia'.
 Zián nupa ta'díl-lalen neda' lu yöl-la' run ba zxon cuínguequi.

3 Cate' radxi ridzöbida', uzxöni ládxa'a Xanru'.

4 Ruzxöni ládxa'a-në' Dios, en rigu'a yöl-la' ba xtídzë'ë.
 Ruzxöni ládxa'a-në', en biti' bi gádxida'.

¿Bíxzi caz gaca ilún quia' bönachi?

5 Yugu' dza tun nigui neda' nupa biti' ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

⁶ Tu'dubë' ga nagáchi'sö, en tu'yúlanë' yúgu'të le runa',
para gata' quégaquië' lataj ilútië' neda'.

⁷ Bubi'ë quégaquië', Dios, ca naca dö' tu'ë,
en lu yöl-la' rilé quiu' busuniti légaquië'.

⁸ Nöz quézinu' Li' ca rö'a böniga.

Nurixu' Li' nisa ribödxu quia'.

¿Naru' cabí nuzú' léguequi lu guichi quiu'?

⁹ Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.
Nöz quézida' rácalen cazu' neda', Dios.

¹⁰ Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

¹¹ Ruzxöni ládxa'a-në', en biti' bi gádxida'.

¿Bizxi caz gaca ilún bönachi quia'?

¹² ¡Gunna' quiu', Dios yugu' le guzxi' lu na'a!

¡Cu'a Li' yöl-la' ba!

¹³ Busöló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

57

¹ ¡Buéchi' ladxi' neda', Dios!

¡Buéchi' ladxi' neda' tu' ruzxöni ládxa'a Li' gun chí'u neda'!

Guxóa no'o neda' ca runba' böra run chí'igacaba' bórado' zxan xílabá',
ga idxinrö tödi bönadxi raca quia'.

² Rulidza'-në' Dios nayépisëtërë'.

Náquië' Dios Nu run ga raca dxi'a quia'.

³ Ga zoa cazë' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

⁴ Naca quia' tsa zoa' ládjagacaba' bëdxi guixi'.

Yugu' bönni' zidzaj nagú'ugaquië' neda' lé'ajlö.

Nácagaca láyi'gaquië' ca yugu' yaga tuchi' que gudil-la,
ate' nácagaca lúdxu'gaquië' ca yugu' guié' tuchi'.

⁵ Dios quia', buluí'i lahui lúzxiba yöl-la' zxön quiu',

en yödzöliö ni buluí'i lahui yöl-la' bení' quiu'.

⁶ Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rö'a böniga.

Gula'chö'önë' yeru ga tsöjbixa' neda',

pero gula'bixë' la' légacasë' lu yeru na'.

⁷ ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

⁸ ¡Bubán, bö' naca caza'!

¡Gulí'bán arpa, en bihuël-la!

¡Zílado' ubana',

⁹ en gul-la' quiu' Li', Xan, ladaj bönachi yugu' yödzo!

¡Cu'a Li' yöl-la' ba lógaca yúgu'tè bönachi!

¹⁰ Zxöntèrö naca yöl-la' ruhuéchi' ladxi' quiu', le ridxintè yehua' yubá, ate' ridxintè yöl-la' idú ladxi' quiu' lúzxiba xitsá'.

¹¹ Dios quia', buluí'i lahui lúzxiba yöl-la' zxön quiu',

en yödzo! ni buluí'i lahui yöl-la' bení' quiu'.

58

¹ ¿Naru' ruí'ili' didza' idútè li, libí'ili' na', rinná bè'èli'?

¿Naru' ruchi'a rusöröli' ca naca le naca tsahui'?

² ¡Biti' ca'! Rizá' ládxi'li' yugu' le xihui',

en rusaca' zí'ili' bönachi len yugu' le cabí nácatè runli'.

³ Ta'dödi tsölá'alö nupa tuá' dö' ga gudéla'tè gúl jagaca.

Ta'zí' yè' ga gudéla'tè bulu'cuá'anu xiná'aguequi léguequi.

⁴ Yu'u ruí'iguequi le naché' yöl-la' guti ca le dxía láyi'gacaba' bèla sínia'.

Nácagaca ca tuba' bèla sínia' nacöd zuba',

⁵ bèla na' biti' riyönba' chi'è bönni' gudzá',

o le rul-lè' bönni' runè' gudzá'.

⁶ ¡Dios quia'! ¡Buzxuzxaj láyi'gaquiè'!

¡Guladzu' yugu' layi' tuchi' quégaquiè'

nácagaca ca layi' tuchi' quégacaba' bédxi guixi'!

⁷ ¡Ben ga ila'nítiè' ca raca que nisa yegu gubó'o cate' ruhuí'!

¡Ben ga ila'cuádiè' ca raca que guixi' rö'ö la' nōza!

⁸ ¡Ben ga ila'nítiè' ca yugu' bōruhuinna tu'únaba' lu gubidza,

o ca tubi' bí'ido' nuzóanu-bi' nigula zí'alö ca ral-la' gáljabi', en chinátitèbi'!

⁹ Zí'alö ca gaca utsè'e yusu' tu guí' zxön,

ugúè' Dios légaquiè' lu yöl-la' ridzá'a queè',

bönni' nabángaquiè', en bönni' chizóa ilátiè'.

¹⁰ Ulu'dzeja nupa nácagaca tsahui' cate' ila'lé'e

uzi' lèbè' Dios bönni' tu'è dö' na'.

Ulu'zxinè' len ná'agaquiè' xichóngaca nupa na' tuá' dö'.

¹¹ Ila'nná bönachi: "Le nácatè zoa le rubi'è Dios quégaca nupa nácagaca tsahui'.

Le nácatè zoè' Dios Nu ruchi'a rusörö quégaca nupa nacuá' yödzo!."

59

¹ Busölá neda', Dios, lu ná'agaca nupa ta'zóa regu' neda'.

Buzóa neda' tsutsu ga biti' gaca ila'dxín nupa ta'díl-lalen neda'.

² Busölá neda' lu ná'agaca nupa tuá' dö',

en guléaj neda' lu ná'agaca nupa tuti bönachi.

³ Buyútsöca', ta'bõ' nísie' neda' para ilútiè' neda'.

Ta'zóa régu'è bönni' zidzaj neda',

calèga tu' gudá'baga'a légaquiè', o tu' ben zi'a légaquiè', Xan,

⁴ en calèga tu' bétia' bönachi, pero ta'zé'è carelò para tíl-lalenè' neda'.

Gudá gácalenu' neda', ate' ilé'enu' naca caní.

⁵ Xantu' Dios quégaca ni'a no' o guizxi yu,

en Dios quégaca bönachi Israel,

gudá dujenu' xiguia' bönachi yúgu'tè yödzo.

Biti' uzá' ládxa'u quégaca nupa tuá' dö' lu yöl-la' rizí' yë' quéguequi.

⁶ Tu'dxinë' chi'i dzó'ölö, ta'bödxi yechë'ë ca runba' bö'cu' ragu yéchi'ba' beo',
ate' ta'dödë' idú gásibi'ilö yödzö.

⁷ Buyútsöca', didza' tu'ë nácagaca ca le rëbigaquië'.

Nácagaca didza' tu'ë ca yugu' guië tuchi'.

Ta'nnë': "¿Nuzxi caz yöni?"

⁸ Ruzxidxu' ca naca le tunë', Xan.

Rutitju' ca naca le tun bönachi yúgu'të yödzö.

⁹ Tu' nal-la cazu' Li' guna' löza Li'.

Nacu' Dios Nu run chi'i neda'.

¹⁰ Tu' náquië' Dios quia' dxi'i ladxi', dutságuië' neda'.

Uxijca cazë' Dios nupa ta'díl-lalen neda'.

¹¹ Biti' gútiu' nupa na' tuá' dö' para cabí ilal-la ladxi' bönachi ladza'.

Lu yöl-la' huáca zxön quiu' bësílasi nupa tuá' dö', en buzötaj léguequi luyú.

Naca cazu' Xantu', Nu run chi'i netu'.

¹² Ben ga sön légaquië' yöl-la' run ba zxön cuíngaquië'

tu' nözi dul-la' tunë' ca tu'isë' didza',

enca' tu' tu'dxië' dö' luzá'agaquië', en ta'zí' yë'ë.

¹³ Lu yöl-la' rilé quiu' busuniti légaquië'.

Busuniti légaquië' tsaz para cabí ila'cuá'arë',

en para iléquibe'e bönachi Dios caz rinná bé'enë' xzí'ini xi'sóë' Jacob,

ga ridxintë idútë yödzölió.

¹⁴ Tu'dxinë' chi'i dzó'ölö, ta'bödxi yechë'ë ca runba' bö'cu' ragu yéchi'ba'

beo',

ate' ta'dödë' idú gásibi'ilö yödzö.

¹⁵ Ta'dë' ta'guiljë' le ilahuë',

ate' ta'bödxi'ë channö cabí ulu'huölaj ulu'dzé'enë'.

¹⁶ Gul-la' neda' ca naca yöl-la' huáca zxön quiu'.

Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',

tu' naca cazu' Li' Nu run chi'i neda',

en nacu' Nu rácalen neda' cate' bi raca quia'.

¹⁷ ¡Naca cazu' Li' Nu rutipa ládxa'a!

¡Gul-la' quiu' yöl-la' ba,

tu' nacu' Li' Nu run chi'i neda', Dios, en Nu nadxí'i neda'!

60

¹ Nusán no'o netu', Dios, en nuzötju' netu'.

Buécja queëtu' na'a, en gúcalen netu'.

² Ben cazu' ga gudödi budó' zxu', en guyalaj luyú.

Bun luyú ni tu' chizóa iguinnaj.

³ Sizxöni busaca' zi'u bönachi quiu'.

Le guca queëtu' guca tsca bugui'ju' netu' xis uva nal-la

le ben ga yöjchégu'tu' ca tu bönni' nazúdxinë'.

⁴ Bunödztju' quégaca nupa tadxi Li' tu lari' ulu'chisa,

le sôjácálen cate' bi raca quéguequi,
 5 para ulu'lágaca nupa na' nadxí'i quézínu'.
 Len yöl-la' huáca zxôn quiu' busölá netu', en bubí'i didza' cate' rulidztu'
 Li'.

6 Lu le naca lá'ayi queë' bë'ë didza' Dios, gunné':
 "Uzi'a xibé, en quísia' xiyúgaca bônachi Siquem, en urixa' luyú dë cuita
 yegu Sucot.

7 Nequi quia' xiyúgaca bônachi Galaad, enca' xiyúgaca zxi'ini xi'sóë' Man-
 asés.

Naca ca tu le rusubín icja' xiyúgaca zxi'ini xi'sóë' Efraín.
 Xiyúgaca zxi'ini xi'sóë' Judá naca ga rinná bë'a.

8 Xiyúgaca bônachi Moab naca ca tu ga riguibi na'a,
 ate' cu' a löla' uléaja' xiyúgaca bônachi Edom.
 Cödxí'a tu' uxicja' bônachi Filistea."

9 ¿Nuzxi caz gaca iché' neda' lu yödzo zoa zö'ö idú gásibi'ilö le run chi'i
 yödzö na'?

¿Nuzxi caz iché' neda' lu xiyúgaca bônachi Edom?

10 ¿Naru' cabí nusán ládXu'u netu', Dios?

¿Naru' cabí tséajlenu' bönni' queëtu' rójáquië' gudil-la'?

11 Gúcalen netu' cate' tíl-lalenu' nupa ridíl-lalen netu',
 tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru'
 tu' uxicja' cazë' Lë' nupa ta'díl-lalen netu'.

61

1 Ruzé nagu' le rulidza' Li', Dios.

Ruí'i ládXu'u le rinábida' Li'.

2 Ga ni zoa' zi'tu' ga dë ladza' rulidza' Li' tu' rudú ládxa'a.

Guché' neda' ga zoa Nu na' naca ca tu guiöjto'o, Nu na' nál-latërö ca neda'.

3 Nacu' Li' Nu run chi'i neda'.

Nacu' Nu rácalen neda' cate' zoa nu ribía no neda'.

4 Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado' ta'yázaba' zxan xílaba'
 yöjede.

5 Biyón quézínu' Li' le guzxí lu na'a guna' quiu' Li', Dios.

Benu' ga nequi quia' le runödzju' quégaca nupa tadxi Li'.

6 Gunu' ga soë' xidzé bönni' na' rinná bë'ë uláz quiu'.

Zián iz soë' ibanë'.

7 Sóatica'sé' lo' Li', Dios.

Bë' queë' yöl-la' dxi'i ladxi', en le naca idútë li, yugu' le ilún chi'i lë'.

8 ¿Gúl-latica'sa' yöl-la' ba que Lo',
 para gaca guna' tu tu dza le guzxí lu na'a!

62

1 ¡Tuzë' Dios ruzxöni ládxa'a, en rizé ládxa'a Lë'!

¡Lë' cazë' rusölë' neda'!

2 ¡Tuzë' Lë' rapa chi'ë neda', en rusölë' neda'!

¡Ruzöë' neda' tsutsu, ate' biti' gaca nu uzötaj neda'!

³ ¿Gáca'xte caz gü'i ládxi'li' ucúl-lali' neda'?
Rë'ënisili' uzõtjali' neda' ca tu zö'ö chizóa iguinnaj,
o ca tu lë'aj yaga le chinatëbi.

⁴ Rë'ënisili' uzõtjali' neda' ga ni tunë' neda' bal.
Ruzí'ili' xibé yugu' didza' biti' nácatë.
Ruí'ili' dxi'a didza' láchui'sö,
pero lu icja ládxi'do'oli' rudidza' yúdxili' neda'.

⁵ ¡Tuzë' Dios ruzxöni ládxa'a,
en runa' löza Lë'!

⁶ ¡Tuzë' Lë' rapa chi'ë neda', en rusölë' neda'!
¡Ruzóë' neda' tsutsu, ate' biti' gaca nu uzõtaj neda'!

⁷ ¡Tuzë' Dios rusölë' neda', en runë' ga naca' bica' ba!
¡Dios nuzóë' neda' tsutsu, en rapa chi'ë neda'!

⁸ Libí'ili', bönachi, buli'zxöni ládxi'ë Dios yúgu'të dza.
Buli'siyönnë' yugu' le raca queéli', tu' run chi'i cazë' rë'u.

⁹ Le nácatë nácgaca yúgutë bönachi ca tu bö' ridödisö,
en biti' bi nazáca'gaca nupa na' nadéli'gaca lataj lo.
Tu lu zzigóns biti' bi nál-lí'guequinë'.

Nácgacarë' dzá'asö ca tu bö' riguéla'siru'.

¹⁰ Biti' uzxöni ládxi'li' bi idéli'li' len yöl-la' nál-la queëzili'.

Biti' uzí'ili' xibé le cuanli'.

Channö gata' queéli' yöl-la' tsahui', biti' gü'i ládxi'li' le.

¹¹ Tu luzuísö bë'ë didza' Dios.
Chopa luzuí biyönda' ca naca lë ni rnna:

“Nápatërë' Dios yöl-la' huáca,

¹² ate' zóatica'sö yöl-la' dxi'i ládxi' queë'.”

Ubí' cazu', Xan, quegaca bönachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.
Ribidxi ládxa'a Li', ate' idútë le naca' rizë ládxi' Li'.
Zoa' tu luyú bidxi ga ni rudú ládxa'a, ate' biti' bi dë nisa.

² Ben ga ilé'eda' Li' lu lataj ga na' zoa cazu',
para ilé'eda' yöl-la' huáca quiu', en yöl-la' bení' quiu'.

³ Tu' nácatërö dxi'a yöl-la' dxi'i ládxi' quiu' ca yöl-la' na'bán caz.
Que lë ni na' cu'a Li' yöl-la' ba.

⁴ Guía' Li': “Xclenu” tsanni ni zoa' nabana'.

Uchisa' na'a, en ulidza' Lo'.

⁵ Ruhüölaj rudzë'e icja ládxi'da'ahua' le nácatërö dxi'a,
ate' lu yöl-la' rudzeja quia' rigu'a Li' yöl-la' ba.

⁶ Røjneda' Li' cate' déa' lu le ráti'da'.

⁷ Rizá' ládxa'a ca nacu' cate' rina'sa' yëla.

Rácalen cazu' neda',

en tu' run chi'u neda', lu yöl-la' rudzeja quia' rul-la' quiu'.

⁸ Nazön cazu' Li' bö' naca caza'.

Rizön cazu' Li' neda',

⁹ pero ila'yaza lataj chul-la

nupa té'ëni iluti neda'.

¹⁰ Ilátigaca lu guié tuchi'.

Ilágugaca bö'cu' zuga' léguequi.

¹¹ Nu rinná bē' uláz queë' Xanru' udzeja ladxi' lahuë' Dios.
Ulu'zì' xibé yúgu'tè nupa tu'zxöni ladxi' Lè',
tu' usayaj cazè' Lè' ru'ígaca nupa ta'zì' yè'.

64

¹ Dios, buzè nagu' chí'a le rinabi yúdxida' Li',
para gun chí'u yöl-la' na'bán quia' tu' rádxida' bi gun nu ridíl-lalen neda'.
² Bucachi' neda' para cabí bi ilún quia' bagáchi'sö nupa tuá' dö',
en para cabí ila'bía di'è neda' bönni' tutië' bönachi.
³ Nácagaca lúdxì'gaquië' ca yugu' guié tuchi',
ate' nácagaca didza' zì' tu'è ca yugu' yaga lahui tuchi'.
⁴ Bagáchi'sö tu'zè yugu' yaga lahui tuchi' na'
para ilunë' huë' nupa bitì' bi nabága'gaca.
Tsárido'os tu'zè léguequi, en bitì' bi tádxinë'.
⁵ Bitì' ca' tu'cá'anë' le naca dö' tē'ënë' ilunë'.
Tu'è didza' ca gaca ulu'cáché'è yugu' du yalaj quégaquië', ta'nnë':
“¿Nuzxi caz gaca ilé'e yugu' du na'?”
⁶ Tunë' didza' ca naca le naca dö' ilunë', ta'nnë': “Chinabá'a le gunru'.”
Tu'cáchi'gaquië' le ta'zá' ládxxë'è, en le ta'bequi icjë'.

⁷ Uzal-lè' Dios tu yaga lahui tuchi' le ideli' légaquië'.
Tsárido'os gunë' légaquië' huë'.

⁸ La' didza' tu'isè' ilún ga tsejchégu'gaquië'.
Lu yöl-la' rubani quéguequi ulu'tá' ícjaguequi nupa ila'lé'e légaquië'.
⁹ Ní'irö yúgu'tè bönachi iladxi Dios,
en ulu'siyón luz'èguequi ca naca le nunë' Dios,
en ila'zá' ládxi'gaca ca naca lë na' nunë'.
¹⁰ Nu bönni' tsahui' uzi'è xibé' Xanru', en gunë' löza Lè'.
Yúgu'tè nupa nácagaca idú ladxi' ulu'zì' xibé'.

65

¹ Dios, nupa nacuá' yödzo Sión ila'gú'u Li' yöl-la' ba,
en ilunna quiu' le gula'zì' lu nē'eguequi,
² tu' riyón quézinu' Li' cate' tu'lidza Li',
ate' yúgu'tè bönachi ila'dxín lo'.
³ Tun nigui neda' dul-la' nuna',
pero runiti lo cazu' netu' ca naca le ridá'baga'tu' Li'.
⁴ Bica' ba nupa nabö cazu' quiu', en nulidzu' quiu',
para ila'cuá' yugu' lataj lá'ayi quiu'.
Huölaj udzé'etu' le nácagaca dxì'a yú'ugaca lidxu',
enca' le yú'ugaca yudo' lá'ayi quiu'.
⁵ Tu' nacu' tsahui' rubi'u didza', en runu' yugu' le zxön le tácalen netu'.
Naca cazu' Dios Nu rusólá netu'.
Nupa nacuá' idútè yödzo'lió ulu'zxöni ladxi' Li',
enca' nupa nacuá' zì'tu' ia'tsólá'alö nísado'.
⁶ Len yöl-la' huáca quiu' nucu'u yugu' gu'a zxön,
le naca bē'gaca nál-latèrö cazu' Li'.
⁷ Ruzóa dxíu' le riyasa ridxía lu nísado', en le ru'u bö que.
Ruzóa dxíu' bönachi cate' tu'tsatsa.

8 Bönachi idütë yödzülió tadxi Li' ni'a quégaca le zxön nunu'.

Le run cazu' Li' tun ga tu'dzeja bönachi idapa la'a yödzülió.

9 Ruí'i ládzu'u luyú, en risól-lu'u nisa guiøj.

Runu' ga ruhuóaca yu ya'a.

Nucú'u luyú na' yugu' yegu yúdzugaca nisa zila,

le run ga dética'sö zxoá'-za, tu' caní raza ládzu'u Li'.

10 Risól-lu'u nisa guiøj gapa dégaca na, en rusubisu' gapa chinadúz.

Ruúnu' yúludo' luyú zidzaj, en runu' ga ta'gula guixi' cuando'.

11 Runu' ga rulá' yöd_x yana' le nadúz luyú ni tu iz tu iz,

en ga zóatica'sö le ilë'aj ilágugaca bönachi.

12 Nacuá'aba' böa'-bëdxi la' guixi',

ate' tu'dzeja bönachi yugu' lu guí'ado'.

13 Gapa naca lachi' nacué'aba' bö'cu' zxila',

ate' dxíada' zxoá' xtila la' yëla.

Lu yöl-la' rudzeja quéguequi ta'bödxi'a,

en tul-la bönachi quiu'.

66

1 ¡Guli'güi' zidzaj didza' lahuë' Dios

lu yöl-la' rudzeja queëli' yúgu'tëli' zóali' yödzülió!

2 ¡Guli'gul-la ca naca yöl-la' ba que Lë'!

¡Guli'cu'ë yöl-la' ba!

3 Guli'guié' Dios: "¡Zxöntëro nácagaca le nunu'

tu' naca zxöntëro yöl-la' huáca quiu'!"

Nupa bití' ta'lé'e Lí' dxi'a ulu'luí'i cuini

ca nupa tun ca rnna xtídz'u.

4 Yúgu'të nupa nacué' yödzülió ilún Li' zxön,

en ilúl-la yöl-la' ba quiu'.

Ilúl-la yöl-la' ba que Lo'.

5 Guli'dá ilé'eli' yugu' le nunë' Dios.

Nayëpisëtëre' Dios lu le runë' quégaca bönachi.

6 Benë' ga böáca ca luyú bidxi ga dë nísado'.

Gula'dödë' gatsaj láhui'lö yegu, ta'zë'esó ní'agaquië'.

Ni' udzëjade'eru' ca náquië' Lë'.

7 Len yöl-la' unná bë' queë' rinná bë'tica'së'.

Ruyútica'së' bönachi yúgu'të yödzü.

Bití' ral-la' ilún ba zxön cuínguequi nupa ta'dá'baga' xtídzë'ë.

8 ¡Guli'gún zxönë' Dios queëtu', libí'ili' bönachi yúgu'të yödzü,

en guli'cu'ë yöl-la' ba gáti'tës!

9 ¡Run cazë' Lë' ga zóaru' nabanru',

en bití' ru'ë lataj cuila ní'atu'!

10 Guzxí' bë' cazu' netu', Dios.

Buchi'u netu' ca run nu ruchi'a guié plata lu guí'.

11 Bë'u lataj bidzuntu' lu du yalaj.

Busubágu'u netu' tu yua' zi'i.

12 Benu' ga gula'libé' icjtu' bönni' dxíagaquië'-ba' böa'.

Gudödítu' lu guí', en lu nisa,

pero guchë' cazu' netu' tu lataj ga bölaj budzë'etu'.

13 Tsu'a lidxu', en cu'a-ba' lo' böa'do' uzégui'a-ba' lo'.

Guna' lo' Li' le guzxi' lu na'a guna',

14 læ na' bë'a didza' que,

le gunniá' cate' ni' riguf'i rizáca'a.

15 Cu'a-ba' lo' Li' böa'-bëdxi renni' uzégui'a-ba' lo',

tsözxön len dzön quégacaba' chivo biguiú'.

Gútia'-ba' lo' yugu' bëdxi, en yugu' chivo biguiú'.

16 Guli'dá uzé nágali', yúgu'tëli' rádxili'-në' Dios,

ate' usiyönda' libí'ili' yugu' le benë' le gulácalen neda'.

17 Len ruá' cuinsa' bulidza' Lë',

en bena' Lë' zxon len lúdxá'a.

18 Channö rucácha'a le naca dö' lu ládxida'ahua',

biti' yönnë' Xanru' Dios didza' gu'a,

19 pero le nácatë biyönnë' Dios didza' bë'a.

Buzë naguë' cate' bulidza' Lë'.

20 ¡Yöl-la' ba Dios!

¡biti' gudá'baguë'ë neda' cate' bulidza'-në',

en biti' bugüë' yöl-la' nadxí'i queë' neda'!

67

1 Xantu' Dios, buzá' ladxi' queëtu', en ben ga gaca dxi'a queëtu'.

Lu yöl-la' dxi'i ladxi' quiu' buyú netu',

2 para gaca bë' le rë'ënu' guntu' yödzölió ni,

en para ila'nözi bönachi yúgu'të yödzö ca naca yöl-la' rusölá quiu'.

3 Ral-la' ila'gú'u bönachi Li' yöl-la' ba, Dios.

Yúgu'të bönachi ral-la' ila'gú'u Li' yöl-la' ba.

4 Ral-la' ulu'dzeja bönachi yúgu'të yödzö,

en ilúl-la lu yöl-la' rudzeja quéguequi.

Tu' uchi'a usöröu' bönachi ca naca le naca tsahui',

5 ral-la' ila'gú'u Li' yöl-la' ba bönachi, Dios.

Yúgu'të bönachi ral-la' ila'gú'u Li' yöl-la' ba.

6 Yödxi yana' runödzej luyú ni.

Dios queëru' runë' ga raca dxi'a queëru'.

7 Runë' Dios ga raca dxi'a queëru',

para iladxi Lë' yúgu'të nupa nacuá' yödzölió.

68

1 Raca ládxiru' chasë' Dios, en usulásië' nupa ta'díl-lalen Lë',

en gunë' ga ulu'zxunnaj nupa biti' ta'lé'e Lë' dxi'a.

2 Ca rulaga tu bö' recja dzön, ca' bulaga léguequi.

Ca na' ruúna' lu guí' quíxiba' buz,

ca' ila'niti nupa tuá' dö' lahuë' Dios.

3 Ulu'dzeja nupa nácgaca tsahui', en ulu'zí' xibë' Dios.

Lu yöl-la' rudzeja quéguequi ulu'zí' xibë'.

4 ¡Guli'gul-la queë' Dios!

¡Guli'gul-la yöl-la' ba que Lë'!

Buli'pá'a nōza ga tödë' gapa dë lataj.

¡Nazí'i lë' Xanru'!

¡Buli'dzeja lahuë' Lë'!

⁵ Náquië' ca xúzgacabi' bi'i uzébidó',
enca' Nu ruchí'a rusöró quégacanu nigula uzébi.

Caní náquië' Dios ga na' zoë' lataj lá'ayi queë'.

⁶ Rucu'ë Dios nupa nagá'anagaca bayechi' tu yu'u.

Rubéajë' nupa nadzúngaca, en runë' ga raca dxi'a quéguequi,
pero ulu'gá'ana tu luyú bidxi nupa ta'dá'baga' Lë'.

⁷ Yöjnöru casu' lógaca bönachi quiu', Dios,
cate' guchë'u léguequi la' guixi' ga na' dë lataj.

⁸ Gudödi budó' zxu' dza ni'.

Lësca' gula guiöjsiu' lahuë' Dios.

Guzzizi guí'a Sinaí lahuë' Dios quégaca bönachi Israel.

⁹ Benu' ga gulaj guiöjsiu', Dios.

Benu' ga böáca ya'a xiyú' ga ni' guca yu bidxi.

¹⁰ Yöjcuá' nupa néquiguequi quiu' luyú na'.

Lu yöl-la' dxi'i ladxi' quiu', Dios,

bucözu' le gácalen nupa nácagaca yechi' luyú na'.

¹¹ Bë' cazë' didza' Xanru' Dios.

Ta'guísinu nigula zían didza' dxi'a queë', ta'nnanu:

¹² "¡Ta'zxúnnajë'! ¡Ta'zxúnnajë' bönni' ta'nná bë'ë,
enca' bönni' röjáquië' gudil-la guizxi yu quégaquië'!"

Nigula gula'bözanu lídxigacanu bulu'zí'ínu xibé le gutá' quégaquië'.

¹³ Sal-la' bucachi' loli' gapa tun chí'ili' bö'cu' zxila',

gáculi' le naca lachi ca nácagacaba' gu'dödo' néquiguequiniba' guíë plata,
en xitúbigacaba' néquiguequini guíë oro.

¹⁴ Cate' bësílásië' Dios bönni' na' gula'nná bë'ë lu guí'a Salmón,

benë' ga gula guiöj bögui' lu guí'a na'.

¹⁵ Nequi queë' Dios guí'a Basán.

Naca guí'a Basán na' tu guí'a zxön.

¹⁶ ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzë ládxe'ë Dios tsöjsóë' ga na'?

Le nácatë tsaz soë' Dios ni'.

¹⁷ Gayuá', en gayuá' nácagaca carreta que gudil-la queë' Dios.

Rizë'ë Xanru' lu guí'a Sinaí ga na' tseajtsazië' lataj lá'ayi queë'.

¹⁸ Buëpu' yehua' yubá richë'u bönachi zían gula'dzúngaca.

Nu'u yugu' le bulu'nödzej bönachi quiu',

en le gulunna quiu' nupa ta'dá'baga' Li',

para tsöjsóë' Dios ni' tsaz.

¹⁹ ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusölá rë'u!

²⁰ ¡Dios queëru' rusölë' rë'u!

¡Rusölë' Xanru' Dios rë'u lu yöl-la' guti!

²¹ Le nácatë Dios udxíë' huë' ícjagaca nupa ta'dá'baga' Lë'.

Udxíë huë' icjë' bönni' biti' gusanë' ca naca dö' ru'ë.

²² Ru'ë didza' Xanru', rnnë': "Ubéaja' léguequi lu guí'a Basán, en ubéaja' léguequi lu nísado',

²³ ate' ulíbili' léguequi ga idxintë irúaj rön quégequi, ate' ilé'ajba' zxiculi' xichóngaca nupa ta'dil-lalen libí'ili'."

²⁴ Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

²⁵ Nupa tul-la, en nupa ta'guínnaj lé'egaca bihuël-la, ta'dá ni', ate' bi'i nigula ra'bando' tunbi' léguequi tsözxön, ta'gápabi' lé'egaca guídido'.

²⁶ Buli'lidzë' Dios dxi'a tsáhui'do' gapa na' rudúbili' queë', tu' náquië' Xanru', libí'ili' zxi'ini xi'sóë' Israel.

²⁷ Nacu'ë zxi'ini xi'sóë' Benjamín ga na', bönni' gúcarë' cuidi', ate' ta'nná bë'ë.

Bönni' lo quégaquië' zxi'ini xi'sóë' Judá nútsa'gaquië' ladjagaquië', enca' ladjagaquië' bönni' lo quégaquië' zxi'ini xi'sóë' Zabulón, en Neftalí.

²⁸ Buluí'i lahui yöl-la' huáca quiu', Dios.

Buluí'i lahui yöl-la' huáca quiu', Dios, tu' chibenu' zián le gulácalen netu'.

²⁹ Tu' dë yudo' quiu' lu yödzö Jerusalén, bönni' ta'nná bë'ë ila'ché'ë ni' le ilunnë' quiu'.

³⁰ Buzé le bach bönachi yödzö na' nácagaca ca böa' guixi', enca' bönachi yugu' yödzö nácagaca ca yugu' bëdxi tsözxön len zxi'iniguequi.

Tu'libi bönachi yechi' tu' ta'zé lãdxi'gaca dumí.

Bësilási nupa na' ta'yaza ladxi' røjaca gudil-la.

³¹ Bönni' gubáz quégaca bönachi Egipto ila'dxinë' lo'.

Bönni' Etiópia ila'chisa ná'agaquië' lo', Dios.

³² ¡Guli'gul-la queë' Dios, bönachi yúgu'të yödzö!

¡Guli'gul-la yöl-la' ba queë' Xanru'!

³³ Rö'ë yehua' yubá xitsá'tërö, le zoa caz dza ni'te.

Buli'yútsöca', ru'ë zidzaj didza', en naca chi'ë ca guziú' rinnë.

³⁴ ¡Guli'gún zxönë' Dios!

Yöl-la' nayëpisë queë' rusubaga' bönachi Israel.

Yöl-la' huáca zxön queë' nalá' lúzxiba xitsá'.

³⁵ Rubániru' ca nacu' Li', Dios, lu lataj lá'ayi quiu'.

Runnu' quégaca bönachi quiu' yöl-la' nal-la, en yöl-la' huáca.

Náquië' Dios quégaca bönachi Israel.

¡Yöl-la' ba Lë' Xanru' Dios!

69

¹ Busölá neda', Xana' Dios, tu' raca quia' tsca nabága'a nisa ga ridxintë ruchicja' nisa.

² Raca quia' tsca ruhuötja' ga rë' lu guna', en biti' zoa ga gaca uliba'.

Zoa' ca tu lu nisa zila, en chizóa uchicja' nisa.

³ Rudú ládxa'a tu' rulidza' nu gácalen neda', ate' da' lubá'a.
Chirichul-la guiöj lahua' tu' ruyúa' ga guídu' dusöló' neda'.

⁴ Nayántërö ca guitsa' icja' nupa biti' ta'lé'e neda' dxi'a,
en biti' bi nuna' quéguequi.

Nál-lagaca nupa ta'díl-lalen neda', en t'ëni iluti neda',
en biti' bi nuna' quéguequi.

Tunë' bayúdx ubi'a dumí le cabí gulana'.

⁵ Nöz quézinu' Li', Dios, yöl-la' canöz quia',
en biti' nagachi' lo' Li' dul-la' nuna'.

⁶ Biti' gu'u lataj nupa tu'zxöni ladxi' Li' ulu'tuí' ni'a quia' neda',
Xana' Dios nayépisëtëru'.

Biti' gu'u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.

⁷ Tu' nadxí'ida' Li' tu'lidza ditjë' neda',
en que lë ni na' rutuí'ida'.

⁸ Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquië' di'a dza quia'.

⁹ Tu' ruí'í ládxa'a yudo' quiu' régui rilá ládxi'da'ahua'.
Naca ca tu'lidza ditaj neda' nupa tu'lidza ditaj Li'.

¹⁰ Ruzötaj cuina', en runa' gubasa,
en que lë ni na' tu'didza' yudxi neda'.

¹¹ Rácuu' lari' cá'asö ca run nu ribödx yechi',
ate' tu'titaj neda'.

¹² Ta'nnë' quia' yugu' la' nöza,
ate' nupa nazúdxigaca tul-la ca naca quia',

¹³ pero neda' ulidza' Li', Xan.

Bubí'í didza', Dios, cate' idxín dza raza ládXu'u Li'
tu' nadxí'ide'enu' neda',
en tu' guzxi' lu no'o usóló' neda'.

¹⁴ Guléaj neda' para cabí huötja' lu le naca ca guna'.
Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

¹⁵ Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',
enca' cabí huötja' tu lu yeru ba.

¹⁶ Bubí'í didza', Xan, tu' nacu' dxi'í ladxi',
en tu' ruhuéchi' ládXu'u neda', gudá quia'.

¹⁷ Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

¹⁸ ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

¹⁹ Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.
Rilé'e quézinu' yúgu'të nupa biti' ta'lé'e neda' dxi'a.

²⁰ Rudú ládxa'a tu' tu'didza' yudxi neda', en biti' bi gaca guna'.

Gulöza' nu huéchi' ladxi' neda', pero cuntú nu guzóa.
 Gú'unida' nu hué tsahui' neda', pero cuntú nu bidzöli.
 21 Cate' guduna' bulu'gahuë' neda' tu le silá',
 en cate' gubidxa' nisa, bulu'gui'jè' neda' nupe zi.

22 Ben ga huóaca laní quégaquië' ca tu le sön légaquië',
 en ben ga huóaca le tu'zi'è xibé ca tu le gun ga ila'chixi ila'níguinë'.
 23 Ben ga ichul-la guiöj lógaquië' para cabirö ila'lé'enë'.
 Ben ga ila'zéchutica sò cúdzu'gaquië' zxan yua' nuá'gaquië'.
 24 Busubaga' légaquië' lu yöl-la' rilé quiu',
 en bè' quégaquië' yöl-la' ridzá'a quiu'.
 25 Ben ga cuntú nu soa ládzaqaquië',
 en ga bití'rö nu soa lu yu'u lídxigaquië'.

26 Ta'zóa régu'ë nupa na' benu' léguequi xigua'.
 Tu'siyönnë' ca ta'guí'i ta'zaca' nupa na' nunu' léguequi huë'.
 27 Buzúaj lu guichi yugu' dul-la' tunë',
 en bití' gu'u légaquië' lataj ila'déli'në' yöl-la' rusölá quiu'.
 28 Busulu lágaquië' nazúajgaca lu guichi quégaca nupa nabángaca.
 Bití' gu'u légaquië' lataj ila'bábalenë' nupa nácagaca tsahui'.
 29 Neda' riguí'i rizáca'a, en rudú ládxa'a.
 Guchisa neda', Díos, en busölá neda'.

30 ¡Cu'a-në' yöl-la' ba Dios len tu le gul-la'!
 ¡Guna' Lë' zxön, en guía'-në': "Xclenu"!"

31 Chaza ládxe'ë Xanru' Dios lë ni
 ca raza ládxe'ë-ba' böa'-bëdxi rúti'a'-ba' lahuë',
 o ca raza ládxe'ë-ba' tuba' bëdxi zxön chinagúlaba'.
 32 Nupa ta'guí'i ta'zaca' ila'lé'eni lë ni, en ulu'dzeja.
 Ila'dipa ládxi'gaca nupa tu'guilaj Dios.
 33 Ruzé naguë' Xanru' Dios nupa ta'yadzaj ta'yudxi,
 en bití' ral-la ládxe'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni,
 enca' nísado', en yúgu'të le nacué' tu tu lataj na'!

35 Usölá cazë' Dios bönachi Sión,
 en uchisë' yugu' yödzo quégaca xzí'ini xisóë' Judá.
 Ila'cuá' bönachi queë' ga na', ate' guequi quéguequi luyú na'.
 36 Xzí'ini xisóagaquië' huen xichinë' ila'zíb'i luyú na',
 ate' ila'cuá'tica sò ni' nupa nadxí'igaca Lë'.

70

1 ¡Busölá neda', Dios!
 ¡Gudáchi gácalenu' neda', Xan!
 2 Ben ga ulu'tuí'i, en ila'bö' böniga nupa na' tē'ëni iluti neda'.
 Ben ga ulu'huécja, en ulu'gá'ana cá'asö nupa na' tē'ëni gaca bi gaca quia'.
 3 Ben ga ulu'huécja lu yöl-la' rutuí'i quéguequi
 nupa na' tu'titaj neda', ta'nná: "Ja, ja."
 4 Ben ga ulu'dzeja, en ulu'zí' xibó' yúgu'të nupa tu'guilaj Li'.
 Ben ga ilu'ítica sò didza' nupa ta'dxí'i yöl-la' rusölá quiu', ila'nná:

“¡Zxöntèrö náquië’ Dios!”

⁵ Neda’ nacuídi’da’, en biti’ bi gaca guna’.
 ¡Gudáchi gácalenu’ neda’, Dios!
 Nacu’ Nu rácalen neda’, en Nu rusölá neda’.
 ¡Biti’ ca’ tsenu’ guídu’ quia’, Xan!

71

¹ Nuzóa cazu’ neda’ dxi’a tsáhui’do’ ga na’ zu’, Xan.

¡Biti’ gu’u lataj utuí’ida’!

² ¡Tu’ nacu’ tsahui’ gúcalen neda’, en busölá neda’!

¡Buzé nagu’ neda’, en busölá neda’!

³ Nacu’ le uzóa neda’ tsutsu,

en le gun chí’i neda’ ga gaca ucachi’ cuina’.

Chigunná bé’enu’ nu usölá neda’ tu’ nacu’ Nu ruzóa neda’ tsutsu,
 en Nu run chí’i neda’.

⁴ Dios quia’, busölá neda’ lu na’ nu ruá’ dö’,

en lu na’ nu ridá’baga’ Li’, en run dzatsa.

⁵ Tuzu’ Li’ runa’ löza, Xan.

Ruxxöni ládxa’a Li’ ga gudéla’tè naca’ bí’ido’.

⁶ Ruxxöni ládxa’a Li’ ga gudéla’tè gulja’,

tu’ guzóalen cazu’ neda’ cate’ ni’ buzóanu xiná’a neda’.

¡Cú’utica’sa’ Li’ yöl-la’ ba!

⁷ Zián nupa tu’bani ca naca quia’,

tu’ run chí’i cazu’ Li’ neda’.

⁸ ¡Rigú’utica’sa’ Li’ yöl-la’ ba,

en tu dza tu dza rulu’a lahui yöl-la’ ba quiu’!

⁹ ¡Biti’ usán no’o neda’ na’a, ni naca’ bönni’ gula!

¡Biti’ uca’anu’ neda’ na’a cate’ ni rudú ládxa’a!

¹⁰ Tu’i didza’ nupa biti’ ta’lé’e neda’ dxi’a ca gaca bi ilún quia’,

ate’ tun tuz xtídza’ gaca nupa tē’ēni iluti neda’.

¹¹ Ta’nná: “¡Nusán nē’ē Dios lē’!

¡Guli’dá sönru’-nē’ tu’ cuntu nu zoa gácalen lē’!”

¹² ¡Dios, biti’ su’ zì’tu’ ga ni zoa!

¡Dios quia’, gudáchi gácalenu’ neda’!

¹³ Ben ga ulu’tuí’i, en ila’niti nupa tē’ēni iluti neda’.

Ben ga ulu’tuí’inē’, en ila’bö’ē böniga bönni’ tē’ēnē’ ilu’ē dö’ quia’.

¹⁴ ¡Neda’ gúntica’sa’ löza Li’,

en cú’utica’sa’ Li’ yöl-la’ ba!

¹⁵ Idú dza usiyönda’ bönachi nacu’ tsahui’,

en rusöló’ yúgu’té bönachi.

Biti’ nözda’ bal-laxi luzuí busöló’ neda’.

¹⁶ ¡Gu’a didza’ ca nácgaca le zxön benu’ Li’, Xana’ Dios!

¡Usiyönda’ bönachi tuzu’ Li’ nacu’ tsahui’!

¹⁷ Dios, rusédinu’ neda’ ga gudéla’tè ni’ naca’ bí’ido’,

ate’ ga ridxintè na’a dza ruá’a didza’ ca nácgaca le zxön nunu’.

¹⁸ Na’a naca’ bönni’ gula, en chinagucha’.

¡Biti’ usán no’o neda’, Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',
ate' quíxjöi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxintë lúzxiba!
¡Nunu' Li' yugu' le zxöntëró!
¡Cúnturö nu zoa nu naca ca nacu' Li', Dios!

20 Gusöl-la' cazu' quia' yugu' le guca quia' le gulún neda' zi',
pero ruúnu' neda' tsutsu,
en le yúbölö uchisu' neda' para cabí gátia'.

21 Gunu' ga tsépisea',
en huë tsahú'u neda' le yúbölö.

22 ¡Le nácatë cu'a Li' yöl-la' ba, en gul-la' tu bihuël-la, Dios!
¡Gul-la' ca runu' ca rnno', en nacu' Nu naca lá'ayi lógaca bönachi Israel!

23 ¡Lu yöl-la' rudzeja quia' cödxí'a cate' gul-la' quiu',
en idú ládxa'a gul-la' tu' busóló' neda'!

24 ¡Idú dza gu'a didza' ca nacu' tsahui'!
¡Tu'tuí'i, en ta'bör' baguí'i nupa gulé'ëni iluá' dö' quia'!

72

1 Dios, buzéajni'inë' bönni' rinná bë'ë
para gaca uchi'a usöröë' ca ruchi'a rusöröu' Li'.

Ben ga ilácagacabi' tsahui' xzí'inë' ca nacu' Li' tsahui'.

2 Bë'ë lataj uchi'a usöröë' quégaca bönachi quiu' ca naca le naca tsahui',
enca' quégaca bönachi quiu' ta'guí'i ta'zaca'.

3 Ben ga ila'cuá' dxi'a tsáhui'do' bönachi quiu' yugu' lu guí'a,
en ilácagaca tsahui' yugu' lu guí'ado'.

4 Bë'ë lataj ubéajë' tsahui' nupa ta'guí'i ta'zaca' ladaj bönachi quiu',
en usölë' yugu' xzí'inigaca nupa ta'yadzaj ta'yudxi,
en ucul-lë' nu ribía no léguequi.

5 Ben ga iladxi bönachi quiu' Li' tsanni ni' soa gubidza,
enca' tsanni ni' soa beo' ga idxintë dza udxi.

6 Ben ga gáquië' bönni' rinná bë'ë ca nisa guiöj ribixi lu guíxi'do',
en ca yugu' guiöj gúpa'do' tu'subisa luyú.

7 Ben ga gaca dxi'a quégaca nupa nátagaca dxi'a yugu' dza inná bë'ë lë',
en ila'cuá' dxi'a tsáhui'do' ga idxintë bití'rö soa beo'.

8 Ben ga inná bë'ë idapa la'a yödzölió,
ga naguela' ra' yegu Eufrates ga idxintë idútë luyú.

9 Ben ga ulu'zachu xzíbigaca lahuë' lë' nupa nacua' luyú bidxi,
en iladxi lë' nupa ta'díl-lalen lë'.

10 Ben ga ila'dxinë' lahuë' bönni' ta'nná bë'ë luyú Tarsis en yugu' lu yödzö,
nuá'gáquië' yugu' le ulu'nödzjë' queë'.

Bönni' ta'nná bë'ë luyú Sabá, en luyú Seba ila'dxinë' bi ulu'nödzjë' queë'.

11 Ben ga ulu'zachu xzíbigaquië' lahuë' yúgu'të bönni' ta'nná bë'ë,
en ilúngaca xichinë' bönachi yúgu'të yödzö.

12 Usölë' nu riyadzaj riyudxi cate' ulidza lë',
enca' nu riguí'i rizaca', en nu bití' zoa nu gácalen nu na'.

13 Huéchi' ládxe'ë nupa nátagaca yechi', en nupa ta'yadzaj ta'yudxi,
en gun chi'ë yöl-la' na'bán quégaca nupa nátagaca yechi'.

14 Usölë' léguequi lu ná'agaca nupa tun léguequi zi',

en lu ná'agaca nupa tuá' dō',
 en gü'i ládxe'è léguequi cate' nu gué'ëni guti léguequi.
 15 Soë' ibanë', ate' iluá'gaca bönachi queë' oro que lu xiyúgaca bönachi
 Sabá.

Ben ga ulu'lidza Dios bönachi, ila'nábitica'sö Li' gácalenu' lë'.
 Ben ga ulu'lidza lë' dxi'a tsáhui'do' idú dza.
 16 Ben ga unödzejada' zxoá' luyú queë', enca' yugu' lu guí'ado',
 le unödzej yödxi yana' xiyúë' ca run guí'a Líbano.
 Ben ga ila'yán nupa nacuá' ladzë' ca rö'ö guíxi'do' lu xiyúë'.
 17 Ben ga tsöjnégaca le lë' ga idxintë dza udxi.
 Ben ga gaca yöl-la' ba que lë' tsanni ni' soa gubidza.
 Ben ga ila'nabi bönachi Li' yúgu'të yödzö
 gunu' ga gaca dxi'a quéguequi ca benu' queë' lë'.
 Ben ga ila'gú'u lë' yöl-la' ba bönachi yúgu'të yödzö.

18 ¡Yöl-la' ba Xanru' Dios, Dios quégaca bönachi Israel!
 ¡Tuzë' Lë' runë' le túngaca ga rubániru'!
 19 ¡Yöl-la' ba Lë' le naca lachi ga idxintë dza udxi!
 ¡Rizé ládxi'ru' ilí idútë yödzölió le naca bení' queë'!

¡Ca' gaca! ¡Ön, ca' gaca!

20 Chibudxi le rinábida'-në' Dios neda', David, zxi'inë' Isaí.

73

1 Le nácatë runë' Dios ga raca dxi'a quégaca bönachi Israel,
 nupa na' naca dxi'a tsahui' ládxi'do'guequi.
 2 Ia'láti'sö guchixi guníguida'.
 Ia'láti'sö tsöjdöda' tsölá'alö,
 3 tu' buzé'eda' nupa tun ba zxön cuínguequi,
 en tu' dëda' yöl-la' tsahui' quégaca nupa tuá' dō'.
 4 Biti' ca' téquinë' zi' bönni' tu'ë dō' na'.
 Nácagaquië' tsutsu, en nacu'ë dxi'a.
 5 Biti' ta'guí'i ta'záquë'ë ca ta'guí'i ta'zaca' ia'zica'rö bönachi.
 Biti' ca' raca quégaquië' ca raca quégaca bönachi yúbölö.
 6 Naca yöl-la' run ba zxön cuini quégaquië'
 ca tu le néquini oro dxía ícjagaquië'.
 Yöl-la' rutsatsa quégaquië' naca ca zxágaquië' nácugaquië'.
 7 Tu'zi'ë xibë le ta'dödi bë'ë té'aj tahuë',
 en ta'zá' ládxi'gaquië' quégaca le zían le ila'déli'në'.
 8 Tu'titjë' ia'zica'rö bönachi,
 en tu'ë didza' lu yöl-la' run ba zxön cuini quégaquië'.
 Tun ba zxön cuíngaquië',
 en té'ënë' ila'bía nahuë' ia'zica'rö bönachi.
 9 Ta'nnë' queë' Dios zoë' yehua' yubá,
 en tu'didza' yudxë' nupa nacuá' yödzölió.
 10 Que lë ni na' ta'dá' bönachi queë' Dios légaquië',
 en ta'yéajlë' didza' tu'ë.
 11 Ta'nnë': "Biti' ca' nözinë' Dios,
 en bití' ilé'e lë ni Nu na' zoa xítsá'alö."
 12 Caní nácagaca nupa tuá' dō'.

Dëda' yöl-la' tsahui' quéguequi, en ta'zítica'sò ia'lati'.

¹³ ¿Naru' nítisö ben chi'i cuina' para gaca' dxi'a en para cabí ibága'a dul-la'?

¹⁴ Dios, benu' ga gudí'i guz xáca'a idú dza. Yugu' zila benu' neda' zi'.

¹⁵ La'tu' bē'a didza' ca nácagaca lē ni guzxi' yé'eda' bönachi quiu'.

¹⁶ Que lē ni na' bē' lādxa'a tséajni'ida' lē ni, sal-la' gúcada' böniga

¹⁷ ga bidxintē dza guyu'a yudo' quiu' en guyéajni'ida' ca gaca quégaca nupa tuá' dö'.

¹⁸ Le nácate nuzú' léguequi ga ta'chixi ta'nigui, en runu' ga ila'niti tsaz.

¹⁹ La' ila'nítitē, en ila'yaza ga udxi quéguequi.

²⁰ Nácagaca ca tu le rinetu' yēla le ridödi que cate' ritö yu. Cate' chasu', Xan, la' udöditeu' léguequi tsölá'alö.

²¹ Cate' yöjdín icja' le nácagaca ca tu le silá', en guzá' lādxa'a yugu' le gúquida' zi',

²² guca' tu' canöz, en biti' bi guyéajni'ida'. Guca' ca tuba' böa' guixi' lo' Li'.

²³ Zóatica'sa' lo' Li', ate' rizóncazu' neda'.

²⁴ Rigú'u yöl-lu'u neda' le rugú'u neda' nöza quiu', en ga údxité uzi'u neda', en gunu' neda' bal.

²⁵ ¿Núzxirö zoa yehua' yubá nu gácalen neda'? ¡Tuzu' Li'!

Tu' rácalenu' neda' cúnturö nu zoa yödzölió nu riquinda'.

²⁶ Ricuidi' le naca', en rudú lādxa'a.

Le ruzóa tsutsu lādxi'da'ahua', en le ruzítica'sa' xibé naca'cazu' Li', Xan.

²⁷ Le nácate ila'niti nupa tu'cá'ana Li'.

Usunítiu' yúgu'tē nupa tu'zóa Li' tsölá'alö.

²⁸ Raca dxi'a quia' cate' ribiga' ga zu' Li', Dios.

¡Naca'cazu' Li', Xana' Dios, Nu run chi'i neda' para ulu'a lahui yúgu'tē le nuncazu'!

74

¹ Dios, ¿naru' tsaz nusán lādxi'u netu'?

¿Riléde'enu' netu', bö'cu' zxila' queécazu'?

² Yöjné netu', bönachi tu'dubi quiu', nupa böá'ucazu' dza ni'te, nupa böá'ucazu' para gácatu' bönachi queécazu'.

Yöjné guí'a Sión, ga ni guzóa'cazu' Li'.

³ Gudá tōdu' ga ni naguinnajdērö yödzö lá'ayi quiu'.

Bulu'sunítidērö nupa gula'dá'baga' Li' yúgu'tē le gula'cuá' lataj lá'ayi quiu'.

⁴ Tu'tsatsa nupa na' gula'dá'baga' Li' idú gásibi'ilö ga ni budúbitu' quiu'.

Nucúa'gaquië' ni le naca bë'gaca
nuxícjagaquië' yödzo lá'ayi quiu'.

⁵ Nalá' lahui yödzo ni ca nalá' tu guí'a cate' nu gulú'u le bidín,
en nurixi nu na' yugu' yaga gula'cuá' lu guí'a na'.

⁶ Bulu'zxuzxjë' le náacagaca lachi lu yödzo ni
len yugu' guíë huága quégaquië', en yugu' yaga zidzaj.

⁷ Bulu'zégui'ë idútë lataj lá'ayi quiu'.
Nucá'anagaquië' cá'asö lataj ga benru' bal Lo'.

⁸ Lu icja ládxi'do'gaquië' gula'né': "Nuxícjadërötu' bönachi ni."
Idútë lu xiyutu' bulu'zégui'ë yúgu'të yu'u ga na' budúbitu' lo'.

⁹ Bítirö caz rilé'etu' yugu' le bulu'subán ládxi'tu' gulísatu' lu xiyutu'.
Bítirö zoa nu bönni' ru'ë didza' uláz quiu'.

Bítirö zóalen netu' nu bönni' nözinë' gáca'xte caz gaca caní queëtu'.

¹⁰ Dios, ¿gáca'xte caz ulu'lidza ditaj netu' nupa ta'díl-lalen netu'?
¿Gáca'xte caz ulu'cá'ana ditaj Lo' nupa ta'dá'baga' Li'?

¹¹ ¿Naru' cabí gácalenu' netu'?

¿Bizx que nucáchu'u yöl-la' huáca zxön quiu'?

¹² Rinná be'e quézinu' netu' Li', Dios, dza ni'te quez,
en rusölá cazu' bönachi idútë yödzölió.

¹³ Len yöl-la' huáca zxön quiu' bubéaj cazu' choplö nísado'.

Gulá'a cazu' ícjagacaba' böa' zxön nacuá'aba' nísado'.

¹⁴ Bzxuzxja cazu' ícjagacaba' böa' sínia' lëba' Leviatán.

Ben cazu' ga guláguba' yugu' böa' guixi' xipéla'ba' böa' sínia' na'.

¹⁵ Gusalaj cazu' yugu' beaj nisa, en gapa rálajda' nisa.

Busubidxi cazu' yugu' yegu nisa gula'yúdzutica'sö nisa.

¹⁶ Nequi queë cazu' lahui' dza, en nequi ca' quiu' chi'i dzó'ölö.

Ben cazu' Li' bení', enca' gubidza.

¹⁷ Naguixaj cazu' Li' yúgu'të buzá' nacuá' yödzölió.

Nun cazu' Li' beo' la, en beo' ziaga.

¹⁸ Yöjné lë ni, Dios. Nupa ta'dá'baga' Li' nucá'anagaca ditaj Lo',
ate' nupa náacagaca canöz nucá'anagaca cá'asö Lo'.

¹⁹ Bítirö usán no'o nupa nadxi'inu' lu ná'agaca nupa náacagaca ca yugu' böa'
guixi' sínia'.

Bítirö gal-la ládxi'u tsaz nupa néquiquequi quiu', en ta'guí'i ta'zaca'.

²⁰ Yöjné didza' dzaga na' núnlenu' netu',

tu' nacuá' nupa tuti bönachi gapa naca chul-la lu xiyutu'.

²¹ Bítirö gu'u lataj ulu'gá'ana cá'asö nupa náacagaca bayechi'.

Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.

²² ¿Guyasa, Dios, en ben ca rnna xtídzu'u!

¿Ruzë nagu' ca rulidza ditjë' Li' bönni' canöz idú dza!

²³ Bítirö gal-la ládxi'u didza' zi' tuí'i nupa ta'dá'baga' Li'.

Yöl-la' dzatsa tun nupa tu'cá'ana Li' cá'asö riyöntica'sö.

75

¹ ¿Rëtu' Li': "Xclenu', Dios"!

¿Rëtu' Li': "Xclenu'";

tu' zóatica'su' gal-la' ga zóatu'!

¿Tuí'i didza' bönachi ca náacagaca le zxön nunu'!

² Rnnë' Dios: "Nuzóa' dza cate' uchi'a usöröa' bönachi.
Uchi'a usörö caza' léguequi ca naca le nácatë.

³ Tu'suniti yödzölió, en nupa nacuá' ni,
pero tsaz nuzóa caza' le."

⁴ Gudxa' nupa tun ba zxön cuínguequi, gunnía': "Biti' gun ba zxön cuinli'",
en gudxa' nupa tuá' dö': "Biti' huë tsahui' cuinli'.

⁵ Biti' huë tsahui' cuinli',
en bití' gü'ili' didza' lu yöl-la' run ba zxön cuinli'."

⁶ Calëga ga rilén gubidza, en calëga ga ribía gubidza,
en calëga la' guixi' ga dë lataj irúaj le huë tsahui' bönachi,
⁷ pero uchi'a usörö cazë' Dios bönachi.

Uzötjë' tuë' bönni', en uchisë' ia'túë'.

⁸ Nuá' cazë' Xanru' lu në'ë tu zxiga' yudzu xisa le ribía lubá uva le ribixi
rilëbi.

Chinugútsi'dërë' le, ate' rigu'ë le para ilë'aj le nupa tuá' dö' yödzölió ni,
ate' ilë'jadërö le silá' que.

⁹ Neda' usiyöntica'sa' bönachi lë ni,
en gul-la' yöl-la' ba queë' Dios queë' Jacob.

¹⁰ Ugúë' yöl-la' unná bë' quégaca nupa tuá' dö'.

Quíxjë' tsaz yöl-la' unná bë' quégaca nupa nácgaca tsahui'.

76

¹ Zxí'ini xi'sóë' Judá núnbë'gaquië' Dios.

Nayépisë le lë' ladaj bönachi Israel.

² Zoa caz lataj lá'ayi queë' lu yödzö Jerusalen,
ate' nazí'i le Sión lataj ga na' zoa cazë'.

³ Ni' guditsjë' yugu' yaga lahui tuchi' zoa gu' láhuiguequi,
enca' yugu' guíë la, en yugu' le ta'díl-lalen bönachi lu gudil-la.

⁴ ¡Yöl-la' ba Li', Dios!

¡Nayépisëtëru' ca yugu' guí'a zxön!

⁵ Buxicju' bönni' nál-lagaquië'.

Gudödi yëla guiöj lógaquië' bönni' röjáquië' gudil-la,
en bití' guca ila'chisa ná'agaquië'.

⁶ Cate' Li', Dios queë' Jacob, gudíl-lalen cazu' légaquië'
gulátiba' böa', ate' gulati ca' nupa dxíagaca légcaba'.

⁷ Li' caz ral-la' gádxitu',
tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usöröu' bönachi.

Ní'irö guladxi nupa nacuá' lu yu, en gula'cuá' dxisö,

⁹ cate' guzuínë' Dios para uchi'a usöröë' quégaca bönachi,
para usölë' nupa nácgaca nöxaj ladxi' yödzölió ni.

¹⁰ Sal-la' ta'léde'e bönachi, gaca yöl-la' ba queë' Lë'.

Uzi'ë xibégaca nupa ulu'gá'ana ladjaguequi.

¹¹ Guli'sí' lu ná'alí' bi gunli' lahuë' Xanru' Dios,
en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nödzej queë',
tu' náquië' Nu ral-la' gádxiru'.

12 Ubéaj cazë' bö' nácaḡaca caz nupa nadéli'gaca lataj lo.
Bönni' ta'nná bē'ē luyú ni tádxinë' Lē'.

77

1 Rulidza'-nē' Dios, en ruá'a zidzaj didza'.

Rulidza'-nē' Dios, ate' riyönnē' chí'a.

2 Cate' bi guca quia' bulidza'-nē' Dios.

Chi'i dzö'ölö guchisa na'a lahuē', en biti' busana' rulidza'-nē'.

Biti' guca nu huē' tsahui' neda'.

3 Cate' röjneda'-nē' Dios, rö'a böniga.

Cate' rinné ládxa'a, ní'irö rudú ládxa'a.

4 Bubéaj casu' yēla guiöj lahua'.

Tu' ribö'a böniga biti' gaca gu'a didza'.

5 Chiguzá' ládxa'a ca guca dza ni'te,

ca guca yugu' iz chigula'dödi.

6 Tsöjneda' le bulá' chi'i dzö'ölö,

en tsöjsá' ládxa'a ca naca que, ate' rinábini cuina':

7 ¿Naru' tsaz nusán Xanru' neda'?

¿Naru' cabirö uzá' ládxe'ē quia'?

8 ¿Naru' cabirö gáquiē' dxi'i ladxi'?

¿Naru' cabirö tsöjnenē' le guzxi' lu nē'ē gunē'?

9 ¿Naru' nál-la ládxe'ē Dios tu' cabirö ruzá' ládxe'ē queēru'?

¿Naru' bíti'rö huéchi' ládxe'ē rē'u tu' rilenē'?

10 Ní'irö gudxi cuina': Raca caní quia' tu' risébida' ládxa'a,

en que lē ni na' réquida' nadzá' yöl-la' unná bē' queē' Dios nayēpisē'.

11 Tsöjneda' yugu' le nun casu' Li', Xantu'.

Tsöjneda' yugu' yöl-la' huáca benu' dza ni'te.

12 Sa' ládxa'a ca nácaḡaca le nunu',

en cuéqui icja' ca nácaḡaca le runu'.

13 Naca lá'ayi ca run casu' Li', Dios.

Cúnturö nu zoa naca dios ca nacu' Li', Dios queētu'.

14 Naca casu' Li' Dios, runu' yugu' yöl-la' huáca zxon.

Bulú'u lahui yöl-la' huáca quiu' lógaca bönachi yúgu'tē yödzö.

15 Len yöl-la' huáca zxon quiu' busöló' bönachi quiu',

nupa nácaḡaca zxi'ini xi'sóagaquiē' Jacob, en José.

16 Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilē'e yugu' nísado'.

17 Bulu'lalaj böaj lúzxiba nisa.

Lúzxiba xitsá' gunnēda' guziú'.

Guyēpi yōsa ca yugu' yaga lahui tuchi'.

18 Lu bö' budunu' biyön guziú' quiu' gunnēda'.

Yōsa gula'yēpi bulu'zení' luyú.

Gudödida' budó' zxu', en guzxi' luyú.

19 Bilá' lahui nöza quiu' gatsaj láhui'lö nísado',

ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

20 Guchë' cazu' bönachi quiu' ca runë' bönni' richë'ë-ba' bö'cu' zxila'
huë'ërido'.
Guchë'u léguequi lu ná'agaquië' Moisés, en Aarón.

78

1 Buli'zë nágali' le uzéajni'ida' libí'ili', bönachi quia'.

Buli'zë nágali' didza' gu'a.

2 Usalja' ruá'a, en ucúdu'a didza'.

Gu'a didza' tu le nagachi' dza ni'te quez,

3 tu didza' chibiyönru', en núnbë'ëru',

le gulë' xuz xtó'oru' rë'u.

4 Biti' ucáchi'ru' didza' na' lógacabi' xzí'iniru'.

Usiyönru' yugu' xzí'ini xi'sóaru' yöl-la' ba queë' Xanru',

ca naca yöl-la' huáca queë', en yugu' le zxön benë'.

5 Gudixjë' tu didza' naca bë' queë' Jacob,

en nuzóë' le rinná bë'ë quégaca bönachi Israel,

le gunná bé'enë' yugu' xuz xtó'oru'.

Ulu'zéajni'inë' xzí'inigaquië' ca naca,

6 para ilúnbë'gacabi' le, bi'i si' zá'gacabi', enca' bi'i si' iláljabi',

para ulu'luí'ibi' ca' xzí'inigacabi' ca naca lë na' gunná bë'ë Dios.

7 Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácagaca le gunná bë'ë,

8 en biti' ilácagacabi' ca guláquië' xuz xtó'ogacabi'.

Guláquië' zidzaj ladxi' tu' gula'dá'baguë'ë xtídzë'ë Dios,

en biti' guláquië' nōxaj ladxi',

ate' lu icja ládxi'do'gaquië' biti' gula'yéajlë'ë Dios.

9 Yugu' xzí'ini xi'sóë' Efraim guluá'gaquië' yaga uxiti',

pero bulu'zxúnnejë' lu gudil-la.

10 Biti' gula'dá'gaquië' didza' dzaga Dios bënlenë' légaquië',

en biti' gulunë' ca naca le gunná bé'enë' légaquië'.

11 Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

12 Benë' Dios le gulún ga bulu'bájinë' xuz xtó'ogaquië'

luyú Egipto, en luyú Zoán.

13 Gusaljë' nísado', en benë' ga gula'dödë' gatsaj láchui'lö nísado' na'.

Benë' ga guca nísado' na' ca yugu' guí'ado' tsölá'a huéaj.

14 Buluí'inë' légaquië' nōza lahui' dza, bugunë' dxin tu böaj,

ate' chí'i dzó'ölö bugunë' dxin tu böaj ruzeni' ca guí'.

15 Bulë'ë tu guiój ga naca la' guixi' ga dë lataj,

en bë'ë le gulë'ajë' le guca ca tu nísado'.

16 Gulë'ajë' nisa yegu le gulén lu guiójto'o.

Benë' ga birúaj nisa ca tu yegu zxön lu guiójto'o na'.

17 La' ní'isö gulunë' dul-la' lahuë' Lë',

en gula'dá'baguë'ë Dios nayëpisëtërë' la' guixi' na'.

18 Lu icja ládxi'do'gaquië' gula'zí' bë'ë Dios quégaquië',

cate' gula'nábinë' Lë' ugahuë' légaquië' ca gula'zësö ládxi'gaquië'.

19 Ní'irö gula'nnë' queë' Dios, gula'nnë':

“¿Naru' huáca cu'ë Dios le gáguru' la' guixi' ni ga dë lataj?

20 Buli'yútsöca', bë'ë guiójto'o, ate' birúajda' nisa,

le guca ca nisa yegu gubó'o zxön.

¿Naru' huáca gunnë' ca' queëru' yöta gáguru'?

¿Naru' gaca ugahuë' bönachi queë' le naca bëla'?"

21 Biyönnë' Xanru' Dios didza' ni, en guléde'enë',
ate' gulén tu gu' le buzegui zían zxí'ini xi'sóë' Jacob,
tu' guléde'enë' bönachi Israel,

22 tu' cabí gula'yéajlë'ë Dios,
en bití' bulu'zxöni ládxi'gaquië' Lë' usölë' légaquië'.

23 Gunná bé'enë' Lë' yugu' böaj lúzxiba,
en gusaljë' yehua' yubá.

24 Gusöl-lë'ë yöta maná le ilahuë',
en bugahuë' légaquië' la' huagu que yehua' yubá.

25 Gulahuë' bönni' ni' yöta tahuë' gubáz que yehua' yubá.
Gusöl-lë'ë guizxi yu le ilahuë'.

26 Benë' ga guyecja bö' birúaj ga rilén gubidza,
ate' len yöl-la' huáca queë' gunná bé'enë' bö' recja
le birúaj tsölá'alö ga ridödi gubidza beo' ziaga.

27 Benë' ga böxaj bëla' ca bëchtö yu ládjalö ga na' nacu'ë,
le naca böa' zoa xíligacaba' gurö'öba' ca yuzxi dé tu ra' yegu zxön.

28 Benë' ga böxjagacaba' gatsaj láchui'lö ga na' nacu'ë,
en ládjagaca yugu' yu'u guídido' quégaquië'.

29 Ca' guca, gulahuë', en bulu'huöla'j gula'dzé'enë',
tu' bë'ë quégaquië' le gula'zësö ládxi'gaquië'.

30 Zí'alö ca budxi bulu'huöla'j gula'dzé'enë',
tsanni ni' yu'u ruá'agaquië' le tahuë',

31 gulénë' Dios légaquië',
en bëtië' bál-lagaquië', bönni' nál-latërögaquië' ládjagaquië',
en bucul-lë' bönni' Israel nayëpisëtërögaquië'.

32 Sal-la' guca caní, gulunrë' dul-la',
en bití' gula'yéajlë'ë Lë' ni'a quégaca le zxön benë'.

33 Que lë ni na' benë' ga böáca nítisö dxin gulunë',
ate' lu yöl-la' radxi gula'zöë' yugu' lu iz quégaquië'.

34 Cate' bëtië' zíangaquië', ní'irö bulu'lidzë' Lë'.
Bulu'bí'i ládxi'gaquië', en yöjtá'gaquië' Dios.

35 Ní'irö yöjnéguequinë' náquië' Dios Nu run chi'i légaquië',
en náquië' Dios nayëpisëtërë' Nu böá'uö légaquië'.

36 Gula'zí' yé'enë' Lë' len didza' gulu'ë,
tu' gulu'ë diza' bití' nácatë lahuë' Lë' len ruá'agaquië'.

37 Bití' gudá'gaquië' Lë' idú ládxi'gaquië',
en bití' gulunë' ca rna didza' dzaga na' bënlenë' légaquië'.

38 Tu' buéchi' ládxi'ë Dios légaquië',
buniti lahuë' ca naca xigua' gulunë', en bití' busunítie' légaquië'.
Bubequi lahuë' quégaquië', en bití'rö gulénë' légaquië',
en bití' benë' ca sa'yéaj yöl-la' ridzá'a queë'.

39 Ca' guca, yöjnenë' nácagaquië' bönáchisö.
Nácagaquië' ca tu bö' recja le ridódisö, en bití' rudxín.

40 Zían luzuí gula'dá'baguë'ë Lë' ga na' naca la' guixi',
en bulu'suhu'ínë' Lë' lu yu bidxi na'.

41 Zían luzuí gula'zí' bë'ë Dios,
en gulunë' zí' Dios Lá'ayi quégaca bönachi Israel.

- 42 Biti' yōjnéguequinē' yōl-la' huáca zxōn queē',
le bulu'e lahui dza ni' bōá'uē' légaquiē'
lu ná'agaca nupa biti' bila'lé'e légaquiē' dxi'a,
43 cate' ni' benē' le gulaca bē' luyú Egipto,
en benē' yugu' yōl-la' huáca queē' luyú Zoán,
44 cate' benē' ga bōáca nisa rōn yugu' lu yegu luyú Egipto,
enca' nisa yugu' lu beaj quégaquiē' para cabí guca ilé'ajé' le.
45 Gusól-lē'ē ládjagaquiē' bōtsugayu guizxi yu,
bōa' gula'guídxiba' légaquiē'.
Gusól-lē'ē ca' riu bulu'sunítiba' le nequi quégaquiē'.
46 Budödē' le naz nuzóagaquiē' lu ruá'agacaba' bōchi' zu,
ate' guláguba' bōchi' zu na' le rō'ō yugu' la' yēla quégaquiē'.
47 Busunítiē' yugu' lubá uva quégaquiē' len nisa guióy yōla sunna na',
en busunítiē' yugu' yaga higo quégaquiē' len bōgui'.
48 Bētiē'-ba' bōa'-bēdxi quégaquiē' len nisa guióy yōla sunna na',
en lu yōsa gula'yēpi.
49 Lu yōl-la' rilé queē' gusól-lē'ē quégaquiē' yugu' lē ni,
en lu yōl-la' ridzá'a queē' busaca' zī'ē légaquiē',
en gusól-lē'ē quégaquiē' gubáz que yehua' yubá para bulu'sunítiē'
légaquiē'.
50 Biti' bubequi lahuē' quégaquiē' para cabirō lenē' légaquiē',
en biti' buniti lahuē' légaquiē' para cabí ilátíē'.
Budödē' légaquiē' lu yōl-la' guti,
51 en bētiē' yúgu'tēbi' bi'i bōnni' lo quégaquiē' bōnni' Egipto,
yugu' bi'i bōnni' lo quégaquiē' zxi'ini xi'sóē' Ham.
52 Guchē'ē bōnachi queē' ca yugu' bō'cu' zxi'la'do',
en buluf'inē' légaquiē' nōza la' guixi' ga dē lataj.
53 Guchē'ē légaquiē' lu nē'ē para cabí bi iládxinē',
pero gubaga' nísado' nupa biti' bila'lé'e légaquiē' dxi'a.
54 Ca' guca, guchē'ē légaquiē' ga zoa luyú lá'ayi queē',
luyú ni bidéli'nē' uláz quégaquiē' len yōl-la' huáca queē'.
55 Bulágui'ē bōnachi izá'a luyú ni lógaca bōnachi queē',
en burixē' que quégaquiē' xiyúgaquiē' ga ila'cu'ē,
en benē' ga gula'cu'ē bōnachi Israel yugu' lu yu'u guídido'.
56 Le yúbóló gula'zī' bē'ē Lē', en gula'dá'baguē'ē Dios nayépisētērē',
en biti' gulunē' yugu' le gunná bé'enē' légaquiē'.
57 Bulu'huōa ládxi'gaquiē', en bulu'cá'anē' Lē' ca gulunē' xuz xtó'gaquiē'.
Gula'dödē' tsólá'aló ca run tu yaga lahui tuchi' biti' nácatē li.
58 Gulún lenē' Lē' tu' gulunē' xilátjagaca budó' guióy budó' yaga yugu' lu
guí'a,
en gulunē' ga budúli'nē' légaquiē' ni'a quégaca budó' na'.
59 Cate' bilé'enē' lē ni Dios, guléde'enē',
en budf'inē' bōnachi Israel.
60 Ní'irō bucá'anē' xilatjē' lu yōdzō Siló,
ga na' guzóa yu'u lá'ayi queē' ládjagaquiē' bōnni' ni'.
61 Bē'ē lataj gula'ché'ē bōnni' zī'tu' guí'ina lá'ayi queē',
guí'ina na' buluf'i lahui yōl-la' zxōn queē'.
62 Budödē' bōnachi queē' lu ná'agaca nupa bētigaca léguequi,
63 en gúquinē' zī' nupa nácatē quez queē'.
Buzegui tu guí' zxōn yugu' bi'i bōnni' quégaquiē',

ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

64 Yugu' bixúz quégaquië' gulatië' lu guié' tuchi',
ate' biti' guca ila'bódxinu nigula uzëbi quégaquië'.

65 Ní'iró gúquië' Xanru' ca tu bönni' rubanë' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

66 Bulágui'ë yugu' bönni' gula'díl-lalenë' bönachi queë',
en tsáido'os burixë' légaquië'.

67 Lësca' budödë' tsölá'aló yugu' zxi'ini xi'sóë' José,
en biti' guröë' yugu' zxi'ini xi'sóë' Efraín.

68 Guröë' yugu' zxi'ini xi'sóë' Judá,
en yödzö Sión le nadxi'i quézinë' Lë'.

69 Ni' benë' tu lataj lá'ayi queë' le naca ca tu gu'a zxön,
le zoa tsutsu ca yödzölió ni nuzóë' tsaz.

70 Guröë' ca' David, huen dxin queë',
en bubéajë' lë' ga na' zoë' ruyüë'-ba' yugu' bö'cu' zxíla'do'.

71 Bubéajë' lë' ga na' rapa chí'ë-ba' yugu' bö'cu' zxíla' guná',
nacuá'aba' böa' huë'énido' quégacaba',
para gáquië' nu uyú bönachi queë', yugu' zxi'ini xi'sóë' Jacob,
en bönachi Israel, nupa na' nácagaca quez queë'.

72 Ca' guca, idú ládxë'ë buyüë' David bönachi na',
en lu yöl-la' rácada' queë' guchë'ë légaquië' lu në'ë.

79

1 Dios, nacué' bönachi izá'a lu xiyúgaca bönachi quiu'.

Nucá'anagaca cá'asó yudo' lá'ayi quiu',
en nusunítigaca yödzö Jerusalén.

2 Bulu'cá'anë' bönachi quiu' nátigaca luyú para iláguba' bíchulab léguequi,
en bëla' rön quégaca huen xichinu' ga iláguba' böa' guixi' le.

3 Bulu'laljé' xichóngaca bönachi quiu' ca nisa idütë' lu yödzö Jerusalén,
ate' cuntu nu bugá'ana nu ucache' léguequi.

4 Bönachi yugu' dzaga luyú queëtu' tu'titaj netu'.
Tu'zxidxë', en tu'didza' yudxi netu'.

5 ¿Naru' tsaz ilenu' netu', Xan?

¿Naru' sóatica'só yöl-la' rilé quiu' ca tu gu' ruzegui netu'?

6 Gulégaca bönachi yugu' yödzö zi'tu' biti' tun Li' bal,
enca' bönachi biti' tu'lidza Li'.

7 Bétigaca bönachi quiu' nácagaca zxi'ini xi'sóë' Jacob,
en nusunítigaca xiyutu' ga zoa cazu' Li'.

8 Biti' gunu' netu' xiguia' tu' nözi dul-la' gulunë' xuz xtó'otu'.
Buéchi' ladxi' netu' na'a, tu' rudú ládxi'tu'.

9 Gúcalen netu', Dios, Nu rusólá netu', para guntu' bal Lo'.
Busólá netu', en buniti lo netu' ca naca dul-la' nabága'tu' para idxí'itu' Lo'.

10 ¿Bizx que ta'nabi bönachi yugu' yödzö izá'a netu',
ta'nná: "Gáxxitë' zoa Dios queëli'?"

Bë' lataj ilé'etu', en ben ga gaca bë' lógaca yúgu'të bönachi
rizi' lo' nupa tu'lalaj xichóngaca huen xichinu'.

11 Buzé nagu' ca ta'nnë' ládxi'gaca nupa nadzúngaca.

Len yöl-la' huáca zxön quiu' busólá nupa na' narugu' quéguequi ilátigaca,

12 en bubí'i quégaca bönachi yugu' dzaga yödzö queëtu'

ia'gadxi cò'lò ca' tsca naca didza' zi' gula'nně quiu' Li', Xan.

¹³ Netu', bònachi quiu', enca' bõ'cu' zxila' ruyú cazu' Li',
guìetica'stu' Li': "Xclenu",
en cú'utica'stu' Li' yõl-la' ba na'a dza, en dza si' zaca.

80

¹ Ruzě nagu' netu', Dios, Nu rapa chi'i bònachi Israel.

Nacu' Nu ruyú yugu' xzí'ini xi'sóě José ca nu ruyú yugu' bõ'cu' zxila'.
Buzení' queětu', Li' na' rō'u rinná bē'u ga nacuá'
nupa nál-lágacatēřo quiu' légaca querubín.

² Buluí'i yõl-la' huáca quiu' lógaca xzí'ini xi'sóagaquiě' Efraín, en Benjamín,
en Manasés.
Gudá queětu', en busölá netu'.

³ Ben ga huécjatu' quiu' Li', Dios.
Buluí'i netu' nadxí'inu' netu', ate' ulatu'.

⁴ Xantu' Dios quéguequi ni'a no'o guizxi yu,
¿gáca'xte caz ilenu' netu', en biti' yõnnu' le rulidztu' Li'?

⁵ Rugagu' netu' nisa ribõdxi queětu',
en ruguí'ju' netu' sizxõni nisa ribõdxi.

⁶ Nunu' ga bònachi dzaga yõdzõ queětu' tu'zxidxi queětu',
ate' nupa biti' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ni'a no'o guizxi yu.
Buluí'i netu' nadxí'inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.
Bulagu' bònachi izá'a yugu' lu yõdzõ luyú ni, en budó'o lubá na' ni.

⁹ Buchi'u lataj ga guzxõn lubá na'.
Benu' ga ben luí ga rē', ate' bulí idútě luyú ni.

¹⁰ Gulú'u zxul-la lubá na' yúgu'tě lu guí'ado',
ate' ni'a nē'e gula'baga' yugu' guí'a zxõn.

¹¹ Gula'tunna ni'a nē'e ga bidxintě ra' nísado',
enca' ga bidxintě ra' yegu Eufrates.

¹² ¿Bizx que buquínnaju' yugu' lě'aj gulún chi'i lubá na',
en ru'u lataj nupa ta'dõdisõ ta'bán le ribía lubá uva na'?

¹³ Tu'líbigacaba' cuchi guixi' le,
ate' táguba' bõa' guixi' le.

¹⁴ Buécja queětu', Dios quégaca ni'a no'o guizxi yu.
Ga ni' zu' yehua' yubá buyú ca raca que lubá quiu', en busölá netu'.

¹⁵ Gudá dusóló' lubá ni budá' cazu',
le naca ca tu lubá huě'eni buxõn cazu' Li'.

¹⁶ Nupa biti' ta'lé'e netu' dxi'a gula'chugu ni'a nē'e lubá na', en bulu'quela'
le guí'.

Buyú ca tun, en lu yõl-la' rilé quiu' busuniti lěguequi.

¹⁷ Gúcalen bõnni' na' gurõ cazu' quiu',
netu', bònachi na' nuzóa cazu' tsaz quiu'.

¹⁸ Caní gaca, bíti'rõ ucá'anatu' Li'.
Bunna queětu' yõl-la' na'bán, ate' uzxõni ládxi'tu' Lo'.

19 Ben ga huécjatu' quiu' Li', Dios quégaca ni'a no'o guizxi yu.
Buluí'i netu' nadxí'ínu' netu', ate' ulatu'.

81

1 Lu yöl-la' rudzeja queéli' guli'gul-la queë' Dios.
Lë' náquië' yöl-la' nál-la queéli'.
Lu yöl-la' rudzeja queéli' guli'còdxi'a lahuë' Dios queë' Jacob.
2 Guli'gul-la tu le gúl-lali', cápa'li' lë'e guídido'.
Guli'quinnaj lë'egaca bihuël-la.
3 Guli'còdxi luzu chivo cate' zoa beo' huë'ëni,
en cate' zoa beo' nál-la, en cate' raca laní.
4 Lë ni naca tu xibá quégaca bönachi Israel,
le naca tu le gunná bé'enë' Xanru' Dios zxi'ini xi'sóë' Jacob.
5 Gudixjë' le para gaca tu le gun ba nali' queë' lógaca zxi'ini xi'sóë' José,
le gudixjë' cate' gudödë' luyú Egipto,
ga ni' biyönda' didza' izá'a bití' guyéajni'ida'.
6 Rnnë' Dios: "Gudúa' yua' zxoá ya'zxi'cagaquië',
en bucuíta' le nuá'gaquië' le bulu'subaga' légaquië'
nupa bití' bila'lé'e légaquië' dxi'a.
7 Bulídzali' neda' cate' bi guca queéli', ate' busölá' libí'ili'.
Bubi'a didza' cate' bi gunábili' neda', ni' nucachi' cuina' tu lu böaj gasaj.
Guzxí' bë'a libí'ili' ga zoa nisa na' lë Meriba.
8 Buli'zë nágali', libí'ili', bönachi quia', ate' uxösa' libí'ili'.
Raca ládxa'a uzé nágali' neda', bönachi Israel.
9 Bití' ral-la' soa tu dios izá'a ga na' zóali',
en bití' gunli' zxön tu dios quégaca bönachi zi'tu'.
10 Neda', Xanli', naca' Dios queéli'.
Guléaja' libí'ili' luyú Egipto.
Guli'salaj ruá'ali', ate' cu'a ruá'ali' le gáguli'.
11 Bití' bulu'zë nágagaca bönachi quia' chí'a.
Bití' gulún bönachi Israel ca rnna xtídza'a.
12 Que lë ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.
13 Guzá' ládxa'a ulu'zë nágagaca bönachi quia' xtídza'a,
para ilún bönachi Israel ca rë'ënda' neda'.
14 La'tu' ilún caní, uxicja caza' nupa bití' ta'lé'e léguequi dxi'a,
en tíl-lalena' nupa ta'díl-lalen léguequi.
15 Ulu'lúfi' cuínguequi nupa bití' ta'lé'e neda' dxi'a,
ca nupa tun ca rnna xtídza'a,
pero tsaz guna' léguequi xigua'.
16 Lësca' uguhua' libí'ili', bönachi quia', zxoá xtila dxi'ado',
en guna' ga huölaj idzé'eli' le zxi' que buz, le irúaj lë'e guió'j."

82

1 Zuínë' Dios ladaj nupa tu'dubi queë' ni' yehua' yubá.
Ruchi'a rusöröë' nupa ta'nná bë'.
2 Rnnë': "¿Gáca'xte caz uchi'a usöröli' quégaca bönachi
lu yöl-la' bití' naca tsahui' queéli'?
Caní naca tu' rubéajli' tsahui' nupa tuá' dö'.
3 Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'guí'i ta'zaca',
en quégaca nupa ta'yadzaj ta'yudxi.

⁴ Buli'sólá nupa ta'cuidi', en nupa nácagaca yechi'.

Buli'sólá léguequi lu ná'agaca nupa tuá' dō'.

⁵ Biti' nōziguequi, en bití' ta'yéajni'i.

Ta'dá ga chul-la.

Rizzizi xilibi yōdzölió."

⁶ Rnna caza' neda': "Nácali' ca yugu' dios.

Nácali' yúgu'téli' xzí'iné' Dios nayépisëtèrè',

⁷ pero gátíli' ca tati bōnachi,

en ibíxili' lu gudil-la ca ta'bixi xzí'iné' bōnni' lo."

⁸ Guyasa, Dios, en buchi'a busörö quégaca bōnachi yōdzölió ni,
tu' nácagaca queë cazu' yúgu'tè yōdzö bōnachi.

83

¹ Biti' ugá'anu' dxisö, Dios.

Biti' su' dxisö, Dios, en bití' usayaj ru'u,

² tu' tu'tsatsa nupa ta'dá'baga' Li',

ate' nupa bití' ta'lé'e Li' dxi'a tun ba zxön cuínguequi.

³ Tun tuz xtídza'guequi bi ilún quégaca bōnachi queë cazu',
en tu'pá yugu' le ilún quégaca nupa nadxí'i quézinu', ta'nná:

⁴ "Guli'dá, usunítiru' léguequi para cabirö ilaca tu yōdzö bōnachi,
en para cünturö nu tsójné bōnachi Israel."

⁵ Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bōnni' Edom, en yugu' bōnni' Ismael,

en yugu' bōnni' Moab, en yugu' bōnni' Agar,

⁷ en yugu' bōnni' Gebal, en yugu' bōnni' Amón, en yugu' bōnni' Amalec,

en yugu' bōnni' Filisteo, en yugu' bōnni' Tiro,

⁸ enca' yugu' bōnni' Asiria núngaquië' légaquië' tsözxön.

Rácalengaquië' yugu' bōnni' xzí'ini xí'sóé' Lot.

⁹ Ben quégaquië' ca benu' quégaca bōnachi Madián, nupa na' busunítiru'
dërö,

en ca na' benu' queë' Sísara, en ca na' benu' queë' Jabín ra' yegu Císón,

¹⁰ nupa na' busunítiru' lu yōdzö Endor,

ate' gulaca ca xiqué'ëba' bēdxi luyú ni'.

¹¹ Ben quégaquië' bōnni' lo quéguequi

ca benu' quégaquië' Oreb, en Zeb,

en ben quégaquië' bōnni' ta'nná bé'enë' léguequi

ca benu' quégaquië' Zeba, en Zalmuna,

¹² nupa na' gula'nná: "Ilequi queëru'

yugu' lataj gapa na' gulequi queë' Dios."

¹³ Dios quía', ben ga ilácagaquië' ca bëchtö yu le riché' bö',

en ca bëbu zxe café le ruá' bö' budunu'.

¹⁴ Ca run tu guí' zxön, ruzegui' yugu' yaga zxön,

o ca run tu guí', ruzegui' tu guí'a zxön,

¹⁵ gusí regu' léguequi tu lu bö' budunu',

en ben gadxi léguequi tu lu nisa guiöjsiu' zili.

¹⁶ Ben ga ulu'tuí'i

para ulu'guilaj Li', Xan.

¹⁷ Ben ga ulu'tuí'i, en ila'bõ' tsaz bõniga.

Ben ga ulu'gá'ana cá'asõ, en tsaz ila'niti,

¹⁸ para iléquite'e nayépisètèru' tuzu' Li' idútè yõdzõliõ
en ulu'zõa xzibiguequi lo', Xantu' Dios.

84

¹ ¡Bica' lachi gapa zoa cazu' Li', Dios!

¡Nacu' Xángaca ni'a no'o guizxi yu!

² Rizè ládxa'a soa' lu yu'u lidxu', Xana' Dios.

Lu yõl-la' rudzeja quia' idú ládxa'a rul-la' quiu' Li', Dios ban.

³ Bidzõliba' biguínni chulí lataj ga nuzõaba' lídxiba',
en bidzõliba' xiguichi guziú' ga budxiaba' xicá'aba',
ga na' rigú'uba' biguínido' queëba',
gala' ga dè lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

⁴ ¡Bica' ba nupa ta'yaza lu yu'u lidxu'!

¡Ta'gú'utica'sõ Li' yõl-la' ba!

⁵ ¡Bica' ba bõnni' nápagaquiè' yõl-la' nál-la le nequi queè cazu',
en ta'zè ládxi'gaquiè' ila'yu'è nõza le ridxín yõdzõ Siõn!

⁶ Cate' ta'dödè' lu yu bidxi tunè' ga ruhuõáca gapa ralaj nisa beaj.

Tun ga rizi' xibé yu bidxi na' yugu' nisa guiõj ta'dxin bayõn.

⁷ Lu yõl-la' huáca quégaquiè' rõjáquiè', en tu'zì'rõnè' yõl-la' huáca.
Ta'dxinè' yúgu'tègaquiè' lo' Li', Dios, lu yõdzõ Siõn.

⁸ Ruzè nagu' le rulidza' Li', Dios, Xángaca ni'a no'o guizxi yu.

Ruzè nagu' neda', Dios queè' Jacob.

⁹ Buyúè' bõnni' rinná bé'enè' netu', Dios.

Buyúè' bõnni' na' nabõ cazu'.

¹⁰ Nácáro dxi'a soa' tu dza lu yu'u lidxu' ca le soa' idú chi gayuá' dza ga
yúbölõ.

Cõa' zì'alõ gaca' huen dxin ga nu riyaza yu'u lidxè' Dios

ca le soa caza' tu yu'u zxõn ga biti' zoa Dios.

¹¹ Náquiè' Xanru' Dios ca gubidza, en le rusubín rè'u.

Xanru' caz runnè' queëru' yõl-la' ruzá' ladxi' queè', en yõl-la' zxõn queè'.

Biti' ugüè' nitú le naca dxi'a gapa nacuá' nupa tun le naca tsahui'.

¹² ¡Li', Xángaca ni'a no'o guizxi yu,

bica' ba bõnni' ruzxõni ládxe'è Li'!

85

¹ Buzá' ládxu'u quégaca bõnachi quiu', Xantu' Dios.

Buchè'u Li' xzí'ini xi'sóè' Jacob gula'dzunè'.

² Buniti lo' bõnachi quiu' ca naca xiguia' gula'baga'.

Bucáchu'u yugu' dul-la' gulúngaca.

³ Buzõa dxíu' yõl-la' rilé quiu'.

Bugú' yõl-la' ridzá'a quiu'.

4 Buzóa netu' xilátjatu' le yúbölö, Dios, Nu rusölá netu',
en bití'rö lenu' netu'.

5 ¿Naru' tsaz ilenu' netu'?

¿Naru' tsaz ilenu' yugu' xzí'ini xsoatu'?

6 ¿Naru' cabí usabanu' ládxi'tu' le yúbölö,
para udzeja ládxi'lentu' Li' netu', bönachi quiu'?

7 Lu yöl-la' dxi'i ladxi' quiu' gúcalen netu',
en busölá netu', Xan.

8 Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a quéguequi,
nupa na' nácgaca quez queë',

pero run bayúdx bití' ulu'huóá ládxi'gaca.

9 Le nácatë chizóë' usölë' nupa tun Lé' bal,
para soa yöl-la' ba queë' luyú queëtu'.

10 Dzágagaca yöl-la' dxi'i ladxi', en le naca idútë li.

Tagu zxixi luzé'eguequi nu naca tsahui', en nu riböza dxi'a tsáhuí'do'.

11 Luyú caz rilén le naca idútë li,

ate' yehua' yubá rirúaj le naca tsahui'.

12 Le nácatë Xanru' unödzejë' queëru' le naca dxi'a,
ate' xiyuru' unödzej le uláparu'.

13 Le naca tsahui' röjnöru lahuë' Xanru',
en gun ga soa nöza gátí'tës ga ulibë'.

86

1 Ruzé nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.

2 Ben chí'i bö' naca caza', Dios, tu' naca' quiu' Li'.

Busölá neda', huen dxin quiu', Dios quia', tu' ruzxöni ládxa'a Li'.

3 Buzá' ladxi' quia', Xan,

tu' rulidza' Li' idú dza.

4 Ben ga udzeja ládxa'a neda', huen dxin quiu',
tu' rigu'a lu no'o bö' naca caza', Xan.

5 Nacu' dxi'a, Xan, en chizú' uniti lo' bönachi quiu'.

Nadxí'tica'su' yúgu'të nupa tu'lidza Li'.

6 Ruzé nagu' le rulidza' Li', Xan,
en ruí'i ládxi'u' gunu' yugu' le inábida' lo'.

7 Cate' bi gaca quia' ulidza' Li',
tu' ubí'i cazu' didza' bi gunu' quia'.

8 Cúnturö nu zoa ládjagaca dios nu naca ca nacu' Li', Xan,
en bití' zoa ia'tú nu run ca nácgaca le runu' Li'.

9 Ila'dxín bönachi yúgu'të yödzö naguixju' Li', Xana' Dios,
en ila'yéaj ládxi'gaca Li', en ilún zxön Lo'.

10 Nayépisëtërosu' Li', en tuzu' Li' runu' yugu' yöl-la' huáca zxön.
Tuzu' Li' nacu' Dios.

11 Busëdi neda' ca naca le rë'ënu' guna', Xan.

Guna' ca naca le naca idútë li naguixju' Li'.

Ben ga gádxida' Lo' idú ládxa'a.

12 Idú ládxa'a guía' Li': "Xclenu'", Xana' Dios,
en guna' zxön Lo' yugu' iz si' zaca.

13 Nadxí'ide'enu' neda',

en chibusöló' bö' naca caza' lu lataj chul-la ga nacua' nupa chinátigaca.

¹⁴ Dios quia', nupa ta'dá'baga' neda' ta'díl-lalen neda',
ate' yugu' bönni' zidzaj ladxi' té'ëné' ilútié' neda',
yugu' bönni' na' biti' tuné' Li' bal.

¹⁵ Nacu' Dios ruhuéchi' ládxi'u netu', Xan, en ruzá' ládxi'u queétu'.
Ridzenu' para ilenu' netu', en nadxí'ide'enu' netu', en runu' ca rnna
xtídz'u.

¹⁶ Buyú neda', en buzá' ladxi' quia'.
Butipa ládxa'a neda', huen dxin quiu',
en busölá neda', zxi'ininu nigula huen dxin quiu'.

¹⁷ Buluí'i neda' tu le gaca bē' gaca dxi'a quia',
para ila'lé'e le nupa biti' ta'lé'e neda' dxi'a.
Ulu'tuí'i, tu' gúcalenu' neda',
en bué tsahú'u neda', Xan.

87

¹ Nuzóé' Dios xilibi zō'ō que yōdzō queé' lu guí'a lá'ayi.

² Nadxí'irōnē' Xanru' lataj ga na' tu'chi'a tu'sörō bönachi Sión
ca nadxí'inē' ia'zica'rō lataj gapa nacua' bönachi Israel.

³ Zián le lachi ta'nná bönachi ca naca
yōdz na' nequi queé' Dios.

⁴ Cate' ulidza' bönachi núnbē' gaca neda', Dios,
ulidza' bönachi nníta' gaca Egipto, en Babilonia.
Ca naca quégaca bönachi Filistea, en Tiro, en Etiopía
innía' nabábagaca yōdzō lá'ayi na'.

⁵ Cate' gu'a didza' que yōdzō Sión innía':
Bönachi ni, en bönachi izá'a ni nabábagaca le,
ate' neda', Dios nayépisētērē', uzóa' tsutsu yōdzō na'.

⁶ Cate' ulabē' Xanru' nupa nácagaca queé' inné':
"Bönni' ni nababē' yōdzō quia'."

⁷ Ní'irō ilu'í didza' nupa tul-la, en nupa tu'cōdxi gui, ila'ná:
"Ruzí'itu' xibé tuzi yōdzō ni."

88

¹ Xana' Dios, Nu rusölá neda',
rulidza' Li' rēla, en te dza.

² Bē' lataj idxín lo' le rulidza' Li'.
Ruzē' nagu' le rinaba yúdxida' Li'.

³ Ruúbi ruguí'i ládxi'da'ahua',
en chizóa tsöjtsázia' lataj chul-la.

⁴ Chinabábalena' nupa chinátigaca.
Naca' ca tu bönni' nudú dērō ládxi'ē,

⁵ en nagá'anē' cá'asō ladaj nupa chinátigaca,
en ca nupa dēgaca yeru ba,
nupa na' bítí'rō rōjnenu',
en nusán no' o léguequi.

⁶ Nuzú' neda' tu lu yeru zila,
ga naca chul-la, en le nácada' zila.

⁷ Rilenu' neda',
en rusaca' zí'u neda' tu lu nísado' quiu'.

8 Nucuásu' yúgu'të nupa núnbë'a.
 Nunu' neda' ca tu le ta'guti bônachi.
 Nadzuna', en biti' gaca írúaja'.
 9 Tu' riguí'i rizáca'a nudú guiøj lahua'.
 Tu dza tu dza rulidza' Li', Xan.
 Richisa na'a zaca' ga na' zu'.

10 ¿Naru' guntso' yugu' yöl-la' huáca zxön
 para gácalenu' nupa chinátigaca?
 ¿Naru' ulu'yasa nupa yú'ugaca lataj chul-la,
 en ila'gú'u Li' yöl-la' ba?
 11 ¿Naru' ulu'luí'i lahui yöl-la' dxi'i ladxi' quiu'
 nupa nagáchi'gaca yeru ba?
 ¿Naru' ulu'luí'i lahui nupa yú'ugaca lataj chul-la
 ca runu' ca rnna xtídzu'u?
 12 ¿Naru' gaca bē' le zxön runu' ga na' naca chul-la?
 ¿Naru' gaca bē' nacu' tsahui' ga na' cuntu nu bi rōjné?

13 Rulidza' Li' neda' para gácalenu' neda',
 ate' yugu' zila ridxín lo' le rinábida' Li'.
 14 ¿Bizx que nusán lādxi'u neda', Xan?
 ¿Bizx que rucachi' lo' lahua' neda'?
 15 Riguí'i rizáca'a, en chizóa gátia' ga gudela' naca' bí'ido'.
 Réquida' zi' tu' ruxōsu' neda', en rudú lādxa'a.
 16 Nabága'a neda' yöl-la' rilé quiu',
 ate' chizóa usuniti neda' le ruxōsu' neda'.
 17 Idú dza naca quia' ca nabaga' neda' nisa.
 Nagú'ugaca neda' lē'ajlō yugu' nisa.
 18 Nucuásu' ga zoa' nu nadxí'i neda', enca' luzá'a.
 Zóalensō le naca chul-la neda'.

89

1 Gúl-latica'sa' ca naca yöl-la' dxi'i ladxi' quiu', Xan.
 Usiyōnda' zxi'ini xsoatu' ca runu' ca rnna xtídzu'u.
 2 Gunnía': "Sóatica'sō yöl-la' dxi'i ladxi' quiu'.
 Tsaz naca bē' yehua' yubá ca runu' ca rnna xtídzu'u."

3 Rnnē' Dios: "Naguixja' tsaz didza' dzaga núnlēna' nupa nabō caza' quia'.
 Bena' tsutsu xtídzá'a ca guna' queë' David, huen dxin quia'.
 4 Gunnía': Ucuá'a tsaz zxi'ini xi'sú'.
 Guna' ga sóatica'sō nu inná bē' uláz quiu'."

5 Nupa nacuá' yehua' yubá quiu' ila'gú'u yöl-la' ba le nunu' le tun ga
 rubánitu', Xan.
 Ga nudúbigaca nupa nácagaca quez quiu' ila'gú'u yöl-la' ba ca runu' ca
 rnna xtídzu'u.
 6 ¿Nuzxi caz zoa ni' yehua' yubá naca ca nacu' Li', Xan?
 ¿Nuzxi caz zoa ladaj nupa nayēpisēgaca naca ca nacu' Li', Xan?
 7 Nupa nácagaca lá'ayi tun Li' bal, Dios.
 Ral-la' gúnrōru' Li' bal ca tun nupa nacuá'len Li'.
 8 Dios, Xángaca ni'a no'o guizxi yu, ¿nuzxi caz naca ca nacu' Li', Xantu'
 nayēpisētērōu'?

Naca bë' rúntica'su' ca rnna xtídzu'u.

⁹ Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

¹⁰ Busuniti cazu' bönachi Egipto, ate' gulaca ca nupa chinátigaca.

Bësilásiu' léguequi len no'o nál-la.

¹¹ Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

¹² Naguixaj cazu' le dë tsölá'a ga za' bö' ziaga,

en le dë tsölá'a ga ridödi gubidza beo' ziaga.

Lu yöl-la' rudzeja quéguequi ta'bödxi'a guí'a Tabor,

en guí'a Hermón cate' ta'yöni Lo'.

¹³ ¡Nál-latërö naca no'o!

¡Nápatërö no'o yöl-la' huáca!

¡Nayëpisëtërö no'o ibëla!

¹⁴ Le naca dxi'a, en le naca tsahui' tun tsutsu le rinná bë'u.

Nacuá'len Li' yöl-la' dxi'i ladxi', en le naca idútë li.

¹⁵ Bica' bágaca nupa ta'yöni didza' que yöl-la' rudzeja.

Ta'dá lu bení' que lo', Xantu' Dios.

¹⁶ Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayëpisëtërö.

¹⁷ Naca cazu' Li' yöl-la' zxön que yöl-la' huáca quéguequi,

en tu' ruzá' ládXu'u queëtu' nazxönda' yöl-la' nál-la queëtu'.

¹⁸ Nequi queë' Xanru' le run chi'i rë'u,

ate' néquinë' queë' Dios bönni' rinná bé'enë' rë'u.

Dios na' náquië' lá'ayi ladaj bönachi Israel.

¹⁹ Dza ni'te bë'lenu' nupa néquiguequi quiu' didza'

lu yugu' le buluí'inu' léguequi,

gunnö': "Gúcalena' tu nu nayëpisëtërö.

Nuchisa' tu nu gurö caza' quia' ladaj bönachi.

²⁰ Budzövida'-në' David, huen dxin quia'.

Gulu'a-në' le za le naca lá'ayi quia'.

²¹ Len na' caza' naguixja' lë',

ate' len na'a ca' utipa' ládXë'ë.

²² Biti' si' ye'e lë' nu rilé lë',

en biti' usaca' zi' lë' nu ruá' dö'.

²³ Uquínaja' lahué' nupa ta'díl-lalen lë',

en gu'a nupa biti' ta'lé'e lë' dxi'a.

²⁴ Sóalena' lë' lu yöl-la' run ca rnna xtídz'a,

en lu yöl-la' dxi'i ladxi' quia',

ate' tu' ulidzë' La', uxöna' yöl-la' nál-la queë'.

²⁵ Guna' ga inná bë'ë ga naguela' ra' nísado',

ga idxintë ra' yegu Eufrates.

²⁶ Ulidzë' neda', innë': Li' nacu' Xuza', en Dios quia',

enca' Nu run chi'i neda', en Nu rusölá neda'.

²⁷ Gun caza' neda' ga gáquië' ca bi'i lo queë' caza',

ate' tsëpisëtërë' ca yugu' bönni' ta'nná bë'ë yödzölió.

²⁸ Lu yöl-la' dxi'i ladxi' quia' gun chí'tica'sa' lë',

en uzóa' tsaz queë' didza' dzaga quia'.

²⁹ Ucuá'a tsaz zxí'ini xi'sóë',

ate' sóatica'só lataj ga inná bē'ë, tsca soa yehua' yubá.

³⁰ Channö ulu'cá'anē' zxí'ini xi'sóë' xibá quia',

en cabí ilunē' ca naca le buchí'a busöröa',

³¹ en channö ila'guitsjē' xibá que le gunná bē'a,

en cabí ilunē' ca nácagaca le gunná bé'eda' légaquiē',

³² ní'irö guna' légaquiē' xigua' ca sa'yéaj le ta'dödi bē' tunē',

en gu'a léguequi ca naca xigua' nabága'gaquiē'.

³³ Pero bití' ugúa' queë' yöl-la' dxi'i ladxi' quia',

en bití' usana' guna' ca rnna le guzxi' lu na'a guna'.

³⁴ Bití' ucá'ana' cá'asö didza' dzaga nuna',

en bití' utsá'a didza' bē'a.

³⁵ Tu le nuzó'a' tsutsu, en nuna' ba nalí que le naca lá'ayi quia'.

Bití' ca' si' yé'eda' David.

³⁶ Gunnía' ila'cuá'tica'sē' zxí'ini xi'sóë',

en ga rö'ë rinná bē'ë sóatica'só lahua' ca gubidza.

³⁷ Naguixja' le tsaz ca nuzó'a' tsaz beo',

ate' nacuá'tica'só lúzxiba le tun ba nalí."

³⁸ Pero nuzú' tsölá'alö, en nusán ládxi'u,

en riléde'enu' nupa na' gurö cazu' quiu'.

³⁹ Nuzú' tsölá'alö didza' dzaga bēnlenú' huen dxin quiu'.

Nuzötju' luyú yöl-la' unná bē' queë'.

⁴⁰ Nuquínajú' zö'ö gulún chi'i lē',

en nusunítu' yugu' lataj tsutsu queë'.

⁴¹ Yúgu'tē nupa ta'dódisö ta'bán le nequi queë',

ate' bönni' dzaga yu'u queë' tu'cá'ana lē' cá'asö.

⁴² Nuchisu' nupa ta'dá'baga' lē',

en runu' ga tu'dzeja nupa bití' ta'lé'e lē' dxi'a.

⁴³ Runu' ga bití' sequi' idéli'nē' lu gudil-la,

ate' cuntú nu sequi' ucul-lē' lu gudil-la na'.

⁴⁴ Bugú' yöl-la' lachi queë',

en nuzötju' yöl-la' unná bē' queë' lu yu.

⁴⁵ Benu' ga chinagulē' sal-la' ni zoë' iz cuidi',

en nunu' ga rutuí'nē'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sö yöl-la' rilé quiu' ca tu guí' réguide'e?

⁴⁷ Yöjné nabábasö iz soa' ibana',

en tu chí'isö nacuá' bönachi yödzölió ni.

⁴⁸ ¿Nuzxi' caz bönni' gaca sóatica'sē' ibanē', en cabí gatiē'?

¿Naru' huáca usólá cuin cazē' lu yöl-la' unná bē' que lataj chul-la?

⁴⁹ ¿Gáxxitē' zoa yöl-la' dxi'i ladxi' quiu' guzóa zí'alö, Xan,

lē na' buzú' tsutsu xtídzú'u gunu' queë' David,

len yöl-la' run ca rnna xtídzú'u?

⁵⁰ Yöjné ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bönachi zían yödzö izá'a.

⁵¹ Tu'cá'ana neda' cá'asö nupa bití' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

52 ¡Yöl-la' ba Xanru' Dios iz si' zaca!
 ¡Ca' gaca! ¡Ön, ca' gaca!

90

1 Naca cazu' Li', Xan, ca yu'u lidxa'.
 2 Zí'atëlö ca gulata' yugu' guí'a, o ca guta' yödzölió,
 ga naguela' cate' gusí lo ga idxintë dza udxi, tsaz naca cazu' Dios.
 3 Runu' ga tu'huöáca bönachi bëchtö yu cate' rno':
 "Guli'huöáca le néquinili', bönachi."
 4 Quiu' Li' chi gayuá' iz nácagaca
 ca dza neje le chigudödi que,
 o ca tu chí'isö chi'i dzö'ölö.
 5 Bugacu' bönachi ca tu lu yegu gubó'o, ate' gúcagaca ca tu yëla rineru'.
 Cate' naca zila zéaj naca ca tu guíxi'do' rilentë luyú.
 6 Cate' naca lahui' dza rizxön, en rö' ni'a në'e,
 pero cate' chiral-la, ricuadi', en ridödi que.
 7 Rinítitu' tu' rilenu' netu',
 ate' tu' ridzó'o ruúbi ruguí'tu'.
 8 Nuzú' lo' xiguia' nabága'tu',
 en nubéaju' lu bení' quiu' dul-la' yu'u ládxi'do'otu'.
 9 Tu' riléde'enu' netu' ridödi quégaca dza queétu',
 ate' chibú'u iz queétu' ca tu le rinnë ládxi'tu'.
 10 Tsónnalalaj yu' chi ízisö zóatu' nabantu',
 o channö nál-latu', huazóatu' idú tápalalaj iz,
 pero runtu' dxin bayudxi, en ruhuí'initu' yugu' iz na',
 tu' ridödité quéguequi iz na', ate' uzá'atu'.
 11 ¿Nuzxi caz réajni'í tsa naca yöl-la' rilé quiu'?
 ¿Nuzxi caz nözi ca naca tsöbi yu'u nu na' rilenu'?
 12 Que læ ni na' busëdi netu' para guéquibe'etu' tsa gácagaca iz zóatu',
 para gácatu' bönachi ta'yéajni'í lo' Li'.
 13 ¿Gáca'xte caz biti' huéchi' ládxi'u netu', Xan?
 Buéchi' ladxi' netu', yugu' huen dxin quiu'.
 14 Tu zila tu zila buluf'i netu' ca naca yöl-la' dxi'i ladxi' quiu',
 para gúl-latu' lu yöl-la' rudzeja queétu', en uzí'itu' xibé yugu' dza na'.
 15 Ben ga udzëjatu' tsa chigulaca dza busaca' zi'u netu',
 en tsa gulaca iz biti' guca dxi'a queétu'.
 16 Buluf'i netu', yugu' huen dxin quiu', ca naca le nunu',
 en buluf'i xzí'initu' ca naca yöl-la' zxön quiu'.
 17 ¡Buzá' ladxi' queétu', Xantu' Dios,
 en ben ga irúaj dxi'a dxin runtu'!
 ¡Ön, ben ga gaca dxi'a lo' dxin runtu'!

91

1 Nu bönni' ruzxöni ládxi'ë Dios para gun chi'ë læ',
 en rizi'ë Dios Nu napa idútë yöl-la' huáca, para gácalenë' læ',
 2 gaca guië' Xanru': "Nacu' Nu run chi'i neda', en Nu ruzóa neda' tsutsu.
 Nacu' Dios quia', ate' ruzxöni ládxi'a Li'."
 3 Usölá cazë' Dios Li' lu du yalaj que nu rizön bönachi,
 en lu yödzöhuë' le rusuniti.
 4 Usubáguë'ë li' ca rusubága'ba' böra yugu' bórado' queëba',

ate' gaca chi'u lu në'ë ca raca quégacaba' börado' zxan xilaba' yøjede.
Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë
cheë'.

⁵ Biti' gádxinu' le run gadxi bönachi chi'i dzö'ölö,
en bití' gádxinu' yaga lahui tuchi' tu'sé bönachi lahui' dza,

⁶ en bití' gádxinu' yödzhüé' le rilén ga naca chul-la,
en bití' gádxinu' le naca xihui' le ruti bönachi lahui' dza.

⁷ Ilátigaca chi gayuá' bönachi cuitu' li',
en ia'chí cö' chi gayuá' cuitu' ibëla,
pero bití' bi gaca quiu' li'.

⁸ Le nácaté uyú iná'asu',
en ilé'enu' le rubí'i quégaca nupa tuá' dö'.

⁹ Tu' nuzú'-në' Xanru' Nu run chi'i li',
nuzú'-në' Dios nayépisëtëré' Nu gácalen li',

¹⁰ bití' bi gaca quiu' le cabí naca dxi'a,
en nitú' le naché' yödzhüé' bití' tsu'u lidxu',

¹¹ tu' cu'u cazé' Dios li' lu ná'agaquié' gubáz lá'ayi queé',
para ilún chi'ë li' gátí'tës ga ridó'.

¹² Lu ná'agaquié' ila'ché'ë li',
para cabí tsöjchegu'u guiöj.

¹³ Uléaj ulibu' bédxi guixi', en bëla sínia'.

Usunu' lé'e labu' bédxi guixi'do', en bëla xitsiní'.

¹⁴ Rnnë' Dios: "Nadxi'inë' neda', ate' que lé ni na' usölá' lé'.

Uzóa'-në' tsaz xitsá'tërö tu' núnbë'ë La'.

¹⁵ Ulidzë' neda', ate' ubi'a didza'.

Sóalena' lé' cate' bi gaca queé'.

Usölá' lé', en guna' lé' bal.

¹⁶ Uzánda'a dza soë' ibanë',
en uluí'ida'-në' ca gaca usölá' lé'."

92

¹ ¡Bica' tsahui' naca rigú'utu' Li' yöl-la' ba, Xan,
en rúl-latu' le tun Li' bal, Dios nayépisëtëré',

² en rusiyöntu' bönachi yugu' zila ca ruhuéchi' ládxi'u netu',
en rulu'itu' lahui yugu' dzö' ca runu' ca rnna xtídzü'u!

³ Rúl-latu' len yugu' bihuël-la,
en rúl-latu' yugu' le lachi ca tul-la.

⁴ Le zxön nunu' Li', Xan, run ga rudzójatu',
ate' ruzi'tu' xibé le núngaca lu no'o.

⁵ Bica' zxön nácgaca le nunu' Li', Xan.
Zxöntëré' le rizá' ládxi'u gunu'.

⁶ Zoa tu le cabí gaca inözínë' bönni' nazxí icjé',
en bití' gaca tséjni'inë' bönni' canöz le.

⁷ Nupa nucá'anagaca Dios ila'yán ca ta'yán guixi'do',
en ulu'zí' xibé le tun nupa tuá' dö', pero ila'niti tsaz,

⁸ tu' nayépsëtëru' Li' tsaz, Xan.

⁹ Naca bë' le gaca quégaca nupa bití' ta'lé'e Li' dxi'a, Xan.
Naca bë' ila'niti nupa bití' ta'lé'e Li' dxi'a.

Ulu'gá'ana cá'asó yúgu'të nupa tuá' dö'.

¹⁰ Nunu' ga nácatëra' nal-la ca nácaba' bédxi.
Nagú'u neda' le za le run ga rudzójada'.

11 Ilé'e quézida' cate' uxicju' nupa biti' ta'lé'e Li' dxi'a,
 en yönda' cate' ila'bödxi yechi' nupa tuá' dö', nupa na' ta'díl-lalen neda'.
 12 Ila'yán nupa nácacaca tsahui' ca ta'yán yaga zina' ca'.
 Ila'zxón ca ta'zxón yaga rō'gaca lu guí'a Líbano.
 13 Nácacaca ca yaga nudá'gacu' ra' yu'u lidxu', Xan,
 le ta'zxón lu lö'a lataj quiu', Dios queétu'.
 14 Cate' ni' yú'ugaca iz zían ila'bía le zxixi quéguequi.
 Ilácacaca tsutsu, en ila'cuá'tica'sö ya'a.
 15 Caní gaca para gaca bē' náquiē' tsahui' Xanru', Nu run chi'i neda'.
 Biti' bi zóalen Lē' le cabí naca tsahui'.

93

1 ¡Rinná bē'ē Xanru'!
 ¡Nácuē' yöl-la' ba zxön queē'!
 ¡Nácuē' zxē' Xanru', en núguiē' lē'ē yöl-la' unná bē'!
 ¡Nuzōē' tsutsu yōdzōlió, ate' biti' utá cuini!

2 ¡Tsaz nuzú' tsutsu ga rō'u rinná bē'u, Xan,
 en zóatica'su' Li'!
 3 Riyasa ridxía nisa yugu' lu nísado', Xan.
 Riyasa ridxía nisa, en ru'u bō que.
 Riyasa ridxía nisa yugu' lu nísado', en yugu' lu yegu.

4 Xanru' Dios yehua' yubá nápatēre' yöl-la' unná bē'
 ca bō ru'u lu nísado' le riyón ca guziú' rinnē,
 enca' ca le riyasa ridxía nisa lu nísado'.

5 Tsaz naguixju' xibá quiu', Xan,
 ate' idú lá'ayi naca ga zoa cazu' Li'.
 Caní zóatica'sö na'a dza, en dza si' zaca.

94

1 Nacu' Dios, Xan, Nu ruzí' lēbi bōnachi.
 Buluí'i cuinu', Dios, Nu ruzí' lēbi.
 2 Ruchi'a rusōró cazu' yúgu'tē bōnachi.
 Guzē, ate' len yöl-la' huáca zxön quiu' bubí'i quégaca nupa tun ba zxön
 cúnguequi.

3 ¿Gáca'xte caz ulu'z'í' xibé nupa tu'cá'ana Li', Xan?
 ¿Gáca'xte caz ulu'z'í' xibé?
 4 ¿Gáca'xte caz ilún ba zxön cúnguequi, en iluí'i didza' zi'?
 ¿Gáca'xte caz ilún ba zxön cúnguequi ni'a que dö' tuá'gaca?
 5 Tu'sunítiē' nupa néquiguequi quiu', Xan.
 Tu'saca' zi'ē nupa néquiguequi quez quiu'.
 6 Tútigaquiē' nigula uzēbi, enca' yugu' bi'i uzēbido',
 en tunē' le naca xihui' ladaj bōnachi zi'tu'.
 7 Ta'nñē': "Biti' ilé'enē' Xángaquiē' rē'u,
 en biti' ruí'i lādxe'ē Dios queē' Jacob lē ni."

8 Guli'tséajni'i, bōnachi biti' nōzguequi,
 ate' libí'ili', bōnachi catún bal, ¿bátaxi tséajni'ili'?
 9 Benē' Dios guídi nágaru'. ¿Naru' cabí riyón quézinē'?
 Benē' Dios guiōj loru'. ¿Naru' cabí rilé'e quézinē'?

10 Ruzéajni'i quézínë' Dios bönachi yúgu'të yödzö.

¿Naru' cabí gunë' léguequi xiguia'?

Ruchiza cazë' icja ládxi'do'oru' yöl-la' réajni'i.

¿Naru' cabí réquibe'enë' bi runli'?

11 Nöz quézínë' Xanru' yugu' le ta'zá' ládxi'gaca bönachi.

Nózinë' canöz naca le ta'zá' ládxi'gaca.

12 Bica' ba bönni' na' ruzéajni'i quézinu'-në', Xan,
en rusedi quézinu'-në' ca naca xibá naguixju' Li'.

13 Gunu' ga uzí' ládxi'ë cate' bi gaca queë',
ga idxinrö dza tsú'ugaca yeru ba nupa tuá' dö'.

14 Biti' usán në'ë Xanru' bönachi queë',
en bití' ucá'anë' nupa néquiquequi quez queë'.

15 Ca naca le naca tsahui' uchi'a usöröë' rë'u le yúbölö,
ate' ulu'zí' xibé nupa nácgaca tsahui'.

16 ¿Nuzxi caz tíl-lalen nupa tuti bönachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

17 La'tu' cabí gúcalenë' Xanru' neda',
la' yöjtsú'utea' lataj chul-la que yöl-la' guti.

18 Gunnía': "Chizóa' ibixa",
ate' lu yöl-la' dxi'i ládxi' quiu' guzxönu' neda', Xan.

19 Cate' ruúbí ruguí' ládxi'da'ahua',
ruhuë tsahú'u neda', en runu' ga rudzédada'.

20 Biti' ca' gunu' tsözxön nupa tu'chi'a tu'sörö netu' ca naca le cabí naca
tsahui',
nupa na' tu'béaj tsahui' le cabí naca tsahui'.

21 Tu'dubë' tsözxön para ilútië' nupa nácgaca tsahui',
en ta'chúguië' quégaca nupa bití' bi nabága'gaca ilátigaca,

22 pero run chi'i cazë' Xanru' Dios neda'.
Nuzóë' neda' tsutsu, ate' ruzxöni ládxa'a lé'.

23 Ubi'ë quégaquië' ca naca dö' tu'ë,
en usunítíë' légaquië' tu' nözi xiguia' nabága'gaquië'.
Usunítíë' dërö Xanru' Dios légaquië'.

95

1 Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxi'aru' que Nu na' naca ca tu guiöjto'o ga
nuláru'.

2 Uyéajru' lahuë', en guiëru'-në': "Xclenu'."

Lu yöl-la' rudzeja queëru' cödxi'aru' lahuë', gúl-laru' yugu' salmo.

3 Xanru' Dios náquië' Dios nayëpisëtërë'.

Nápatërë' yöl-la' unná bë' ca yúgu'të dios izá'a.

4 Lu na' cazë' yu'u le dë ga rë' znan luyú,
ate' néquiquequi ca' queë' guí'a sibi.

5 Nequi queë' nísado', tu' nun cazë' le,
en len ná'asé' benë' luyú bidxi.

6 Guli'dá, gunru'-në' zxön, en uzóa zxíbiru' lahuë'.

Uzóa zxíbiru' lahuë' Xanru' Nu ben rë'u.

7 Naca cazë' Lë' Dios queëru',
 ate' nácaru' bönachi rugagu cazë', en ca bö'cu' zxila' richë' cazë'-ba' lu në'ë.
 Rnna cazë' Dios: "Na'a, channö rë'ënili' yönili' chi'a,
 8 biti' gunli' zidzaj icja ládxi'do'oli' ca gulunë' xuz xtó'oli' lataj na' lë
 Meriba,
 en calëga ca gulunë' la' guixi' ga dë lataj lë Masa,
 9 cate' ni' gula'zí' bë'ë xuz xtó'oli' neda'.
 Gula'zí' bë'ë neda' sal-la' bila'lé'enë' yugu' le bena'."
 10 Idú choá' iz gúquida' zi' bönachi gula'cuá' dza ni',
 ate' gunniá': "Ta'chixi ta'níguinë' lu icja ládxi'do'gaquië',
 en biti' nözguequinë' le rë'ënda' ilunë'."
 11 Que lë ni na' lu yöl-la' rilé quia' bena' tsutsu xtídza'a,
 gunniá': "Biti' ca' ila'yázië' ga ulu'zí' ládxi'ë tsözxön len neda'."

96

1 ¡Guli'gul-la queë' Xanru' tu le cubi!
 ¡Guli'gul-la queë' Xanru', yúgu'tëli' zóali' yödzölió!
 2 ¡Guli'gul-la queë' Xanru'! ¡Guli'gún zxön lë'!

Tu dza tu dza buli'siyön bönachi didza' dxi'a ca rusölë' rë'u.
 3 Buli'siyön bönachi yúgu'të yödzö yöl-la' ba queë'.
 Buli'siyön yúgu'të bönachi le náca gaca zxön nunë'.
 4 Zxöntëro náquië' Xanru', ate' runda' bayúdx cú'uru'-në' yöl-la' ba.
 Ral-la' gádxitëru' Lë' ca tadxi bönachi izá'a dios quéguequi.
 5 Yugu' dios qué gaca bönachi izá'a náca gacasö budó' guiój budó' yaga,
 pero Xanru' Dios nunë' lúzxiba xitsá'.
 6 Nacuá' yöl-la' bení', en yöl-la' ba lahuë' Lë'.
 Nacuá' yöl-la' huáca, en yöl-la' lachi ga zoa cazë'.

7 ¡Guli'cu'ë Xanru' yöl-la' ba, bönachi yúgu'të yödzö!
 ¡Guli'cu'ë yöl-la' ba, en yöl-la' huáca!
 8 ¡Guli'cu'ë Xanru' yöl-la' ba ni'a que Lë'!
 ¡Guli'guá' le unödzjali', en guli'dá lahuë'!
 9 ¡Guli'gún Lë' zxön, náculi' le naca ba'a!
 ¡Guli'zxizi lahuë', bönachi idútë yödzölió!

10 Guli'nná lógaca bönachi yúgu'të yödzö: "Rinná bë'ë Xanru'.
 Naguixjë' tsaz luyú, ate' bití' utá cuini.
 Ca naca le naca tsahui' uchi'a usöröë' qué gaca yúgu'të bönachi."

11 Ral-la' udzeja lúzxiba, en ulu'zí' xibé luyú.
 Ral-la' cödxí'a nísado', en ila'bödxi yúgu'të le nacua' lu nísado'.
 12 Ral-la' udzeja guixi' caz, en yúgu'të le nacua' la' guixi'.
 Lu yöl-la' rudzeja quéguequi ilúl-la yaga
 13 lahuë' Xanru', tu' si' ulë'.

Guidë' duchi'a dusöröë' nupa nacua' yödzölió.
 Ca naca le naca tsahui' uchi'a usöröë' qué gaca yúgu'të bönachi,
 enca' qué gaca bönachi yúgu'të yödzö para ilunë' ca rnna xtídze'ë.

97

1 ¡Rinná bē' cazē' Xanru' Dios!
 ¡Ral-la' ulu'dzeja bōnachi idútē yōdzōlió!
 Buli'sí' xibē', libí'ili' zóali' yúgu'tē yōdzō izá'a.
 2 Rō'gaca bōaj, en le chul-la idú gásibi'ilō ga na' zoē'.
 Le naca dxi'a, en le naca tsahui' tu'zóa tsutsu le rinná bē'ē.
 3 Rinōru tu guí' zxōn lahuē',
 le uzegui' nupa ta'dá'baga' Lē'.
 4 Tu'zení' le ta'yēpi yōsa yōdzōlió.
 Ril'é e luyú lē ni, en rizxizi.
 5 Tu'úna' guí'ado' ca ruún bidxina' buz lahuē' Xanru'.
 Náquiē' Xani idútē yōdzōlió.
 6 Lúzxiba xitsá' naca bē' náquiē' tsahui',
 ate' ta'lé' e bōnachi yúgu'tē yōdzō yōl-la' zxōn queē'.
 7 Tu'tuí' yúgu'tē nupa tun zxōn budó' guiōj budó' yaga,
 nupa na' tun ba zxōn cuínguequi ní'a quégaca budó' quéguequi na'.
 Ulu'gá'ana cá'asó yúgu'tē dios quégaca bōnachi izá'a lahuē' Xanru'.
 8 Bila'yōni bōnachi Sión, en bulu'dzeja,
 enca' yugu' xzí'ini xi'sóē' Judá.
 Tu'dzéjanē' ca ruchi'a rusōróu' netu', Xan.
 9 Nayépisētērō casu' Lí', Xan, ca yúgu'tē nupa nacuá' yōdzōlió.
 Nayépisētērō casu' Lí' ca yúgu'tē dios quégaca bōnachi izá'a.
 10 Núlōli' nadxí'ili'-nē' Xanru', guli'guequi zí' le naca dō'.
 Run chí'i cazē' bō' nácagaca caz nupa néquiguequi queē'.
 Rusölē' léguequi lu ná'agaca nupa tuá' dō'.
 11 Ruzení'tica'sō bení' queē' nupa nácagaca tsahui',
 ate' tu'zí' xibē' nupa nácagaca dxi'a.

12 ¡Buli'sí' xibē' Xanru' núlōli' nácali' tsahui'!
 ¡Buli'subán ládxi'li' ca nunē' Dios Lá'ayi, en guli'cu'ē yōl-la' ba!

98

1 ¡Guli'gul-la queē' Xanru' tu le cubi,
 tu' nunē' le tun ga rubániru!
 Len yōl-la' unná bē' zxōn queē', en yōl-la' huáca lá'ayi queē' nadéli'nē' lu
 gudil-la.
 2 Nunē' Xanru' ga naca bē' le nadéli'nē'.
 Nuluí'inē' bōnachi yúgu'tē yōdzō náquiē' tsahui'.
 3 Len yōl-la' dxi'i ladxí' queē', en yōl-la' li ladxí' queē'
 benē' ca rnna xtídzē'ē le guzxi' lu nē'ē gunē' quégaca bōnachi Israel.
 Bila'lé' e bōnachi idútē yōdzōlió ca busölē' rē'u Dios queēru'.
 4 ¡Lu yōl-la' rudzeja queēli' guli'gul-la queē' Xanru', yúgu'tēli' zóali'
 yōdzōlió!
 ¡Idú ládxi'li' guli'cu'ē yōl-la' ba, en guli'gul-la queē' le naca lá'ayi!
 5 ¡Guli'gul-la queē' Xanru' yugu' salmo, en guli'quinnaj yugu' bihuēl-la!
 ¡Guli'quinnaj lē'egaca arpa, en guli'gul-la yōl-la' ba queē'!
 6 ¡Guli'cōdxi lúzugacaba' chivo, en lúzugacaba' bēdxi
 lahuē' Xanru' Dios, Nu rinná bē'!

7 ¡Buli'lidza zidzaj, nísado', en yúgu'tè le nacua' nisa na'!

¡Guli'gul-la yödzo'lió, en yúgu'tè nupa nacua' ni'!

8 ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libí'ili', gu'ado',

9 tu' zè'è duchi'a dusöröë' quégaca bönachi yödzo'lió!

Ca naca le naca tsahui' uchi'a usöröë' quéguequi,
en ca naca le naca dxi'a tsahui' inná bé'enë' yúgu'tè bönachi.

99

1 ¡Rinná bē'ē Xanru' Dios! Ta'zxizi yúgu'tè bönachi.

Rö'ē rinná bē'ē ladaj nupa nápagacatērö yöl-la' huáca,
légaca Querubín, ate' rizzixi luyú.

2 Nayëpisëtērë' Xanru' lu yödzo' Sión,

ate' rinná bé'enë' bönachi yúgu'tè yödzo' izá'a.

3 Ral-la' ila'gu'u Lë' yöl-la' ba yúgu'tè bönachi,

tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxí'i quézinu' le naca tsahui', Li', Bönni' unná bē' nayëpisë.

Tsaz naguixju' le naca dxi'a tsáhui'do',

en nuzú' quégaquië' zxi'ini xi'sóë' Jacob le naca tsahui', en le naca iduté
li.

5 ¡Guli'gún zxönë' Xanru' Dios!

Buli'zechu zxi'bili' lahuë' Lë' ga rö'ē rinná bē'ē.

¡Lá'ayi náquië' Lë'!

6 Guláquië' Moisés, en Aarón bixúz queë',

ate' benë' Samuel tsözxön nupa gula'yéaj ládxi'gaca Lë'.

Bulu'lidzë' Xanru', ate' bubí'i cazë' didza'.

7 Tu lu böaj bē'lenë' légaquië' didza'.

Gulunë' ca ta'nná bē' xibá queë', en yugu' le gunná bé'enë' légaquië'.

8 Bubi'u didza' lógaca bönachi quiu', Xantu' Dios.

Bulu'ínu' légaquië' nacu' Dios, en runiti lo' bönachi,

pero rubi'u quégaquië' ca sa'yéaj dö' tu'ë.

9 ¡Guli'gún zxönë' Xanru' Dios!

¡Buli'zechu zxi'bili' lahui' lo guí'a lá'ayi ga zoa cazë',

tu' náquië' lá'ayi Xanru' Dios!

100

1 ¡Lu yöl-la' rudzeja queëli' guli'gul-la queë' Xanru',
libí'ili' zóali' iduté yödzo'lió!

2 ¡Lu yöl-la' rudzeja queëli' guli'cu'ë yöl-la' ba Xanru'!

¡Guli'dá lahuë' Lë', en lu yöl-la' rudzeja queëli' guli'gul-la queë'!

3 ¡Guli'tsojné Xanru', náquië' Dios!

Buzá' cazë' rë'u, en calëga rácasö queëru' zóaru'.

Nácaru' bönachi queë', en nácaru' ca bö'cu' zxila' queë'.

⁴ Guli'tsaza zaca' ra' yu'u queë', guiëli'-në': "Xclenu'."

Guli'tsaza gapa naca lö'a queë', cú'uli'-në' yöl-la' ba.

Guli'guië': "Xclenu'", en guli'gunë' zxön.

⁵ ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!

¡Zóatica'sö yöl-la' run ca rnna xtídzë'ë queë'!

101

¹ ¡Gul-la' ca runu' ca rnna xtídzü'u, en ca nacu' tsahui'!

¡Gul-la' yöl-la' ba quiu' Li', Xan!

² Güi'i ládxa'a guna' le naca idú dxi'a.

¿Bátaxi huécju' quia' neda'?

Lu yu'u lidxa' guna' le naca idú ladxi'.

³ Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' lé'guequi tsözxön.

⁴ Biti' ca' gaca' chopa ladxi'.

Biti' ca' guna' le naca dö'.

⁵ Usunítia' dërö nu bönni' rinnë' que luzë'ë balándo'os.

Biti' ca' guá' ilena' nu run ba zxön cuini.

⁶ Uyúa' dxi'a tsáhui'do' nupa tun ca rnna xtídzá'guequi luyú ni, para
ila'cuá'len neda'.

Nu biti' bi xiguia' nabaga' huáca gun xichina'.

⁷ Biti' ca' tsójsóa lidxa' nu rizi' yë'.

Biti' gu'a lataj ugá'ana lahua' nu ruí'i didza' le cabi naca.

⁸ Yugu' zila usunítia' yúgu'të nupa tuá' dö' luyú ni,

para ucuíta' lu yödzö queë' Xanru' yúgu'të nupa tuti bönachi.

102

¹ ¡Buzë nagu' le rulidza' Li', Xan!

¡Bë' lataj ídxín lo' le rinaba yúdxida' Li'!

² Biti' ucache' cuinu' lahua' cate' bi rusaca' zi' neda'.

Buzë nagu' neda', en gudáchi ubi'u didza' cate' rulidza' Li'.

³ Yöl-la' na'bán quia' ruúlu ca dzön,

ate' régui rilá lu dxita lu bin quia' ca tu guí'.

⁴ Rudú ládxa'a ca raca que guixi' nabitxi,

en bítirò rizé ládxa'a bi gahua'.

⁵ Tu' rinnëda' ládxa'a nadxítalë'a.

⁶ Naca' ca tuba' bigúinni zóaba' luyú bidxi,

o ca tuba' cuturú dxíaba' tu lu yu'u nadachi.

⁷ Nabéaj yëla guiöj lahua',

ate' naca' ca tuba' biguinnido' dxíaba' túziba' ícjo'o yu'u.

⁸ Yugu' dza nupa biti' ta'lé'e neda' dxi'a tu'didza' yudxi neda'.

Nupa tu'titaj neda' tu'gún dxin la' cate' nu tu'dxía dö'.

⁹ Naca le rahua' ca dódo'sö,

en nutsi' nisa ribödxa' le rë'ja'.

¹⁰ Caní raca quia' tu' rilenu' neda', en réquinu' neda' zi'.

Gulusu' neda', en gurú'unu' neda' tsölá'alö.

¹¹ Naca yöl-la' na'bán quia' ca tu zxul-la rilá' cate' ribía gubidza,

en rudú quia' ca raca que guixi' ricuádi.

12 ¡Li', Xan, zóatica'su',
 en zóalentic'a'sö Lo' bönachi!
 13 ¡Chasu', en huéchi' ládxi'u bönachi yödzo Sión!
 ¡Chibidxín dza gü'i ládxi'u léguequi!
 ¡Ön, chibidxín dza na'!

14 Netu', huen dxin quiu', nadxí'itu' yugu' guiöj nacuá' lu zö'ö run chí'i
 yödzo Sión,
 en ruí'i ládxi'tu' ga ridxintë bëchtö rö'ö la' nöza que.
 15 Bönachi yugu' yödzo izá'a iladxi Lë' Xanru',
 ate' nupa ta'nná bë' yödzölió iladxi yöl-la' zxön queë'.

16 ¡Nuchisë' Xanru' caz yödzo Sión,
 ate' uluf'i lahuë' ni' lu yöl-la' zxön queë'!
 17 Riyönnë' le tu'lidza Lë' nupa ta'yadzaj ta'yudxi.
 Biti' ca' uzöë' tsölá'alö le tu'lidza yudxi Lë'.

18 Buli'zúaj lë ni lu guichi para ulu'laba xzí'ini xi'sóali' le,
 ate' nupa si' ilalaj ila'gú'u Xanru' yöl-la' ba.
 19 Ga ni' ribözë' Xanru' xitsá' lu lataj lá'ayi queë',
 ga ni' zoë' Xanru' yehua' yubá, ruzé naguë'.
 20 Riyönnë' le ta'nnë' ladxi' nupa nadzúngaca,
 en usanë' nupa narugu quéguequi ilátigaca.
 21 Soa nu usiyöni bönachi yödzo Sión ca naca Lë' Xanru',
 ate' ila'gú'u Lë' yöl-la' ba lu yödzo Jerusalén,
 22 cate' ulu'dubi tsözxön bönachi yugu' yödzo izá'a,
 en bönachi yugu' luyú,
 ate' tsözxön ila'gú'u yöl-la' ba Xanru'.

23 Benë' Xanru' ga gucuídi'da' la' nöza,
 en nunë' ga soa' nabábasö dza.
 24 Gunnía': Dios quia', biti' gútiu' neda'
 cate' ni zoa' gatsaj iza ral-la' soa' ibana'.
 Zóatica'sö cazu' Li'.
 25 Dza ni'te gudixju' yödzölió,
 ate' len na' cazu' benu' lúzxiba.
 26 Huadödi quéguequi, pero Li', tsaz idi'u.
 Ilexu' yúgu'tëguequi ca riyexu' lari',
 en ca tu lari' utubu' léguequi, en utsó'o léguequi.
 27 Li', biti' ca' utsá' cuinu', en biti' ca' guexu'.
 28 Xzí'inigaca huen dxin quiu' ila'böza dxi'a tsáhu'i'do',
 ate' ucú'u tsutsu xzí'ini xi'sóagaquië' lo'.

103

1 ¡Bil-la yöl-la' ba queë' Xanru', li', bö' naca caza',
 ate' idütë le naca', bil-la yöl-la' ba que Lë' lá'ayi!
 2 ¡Bil-la yöl-la' ba queë' Xanru', li', bö' naca caza',
 en biti' gal-la ládxi'u yúgu'të le ruzi'u xibë'!

3 Runiti lo cazë' neda' ca naca yúgu'të dul-la' nabága'a,

en rugüë' yúgu'të xihuë'a.

⁴ Ruhuöá'uë' neda' lu lataj chul-la,
en ruzá' ládxe'ë quia' yöl-la' dxi'i ladxí', en yöl-la' ruhuéchi' ladxí'.

⁵ Rigu'ë xinöza' yugu' le naca dxi'a,
lë na' run ga ruhuöáca' ca tu bönni' zoë' iz cuidi' queë',
ca na' raca queéba' bisia'.

⁶ Runë' yugu' le naca dxi'a,
en ruchí'a rusöröë' quégaca yúgu'të nupa zoa nu rusaca' léguequi zi'.

⁷ Buzéajni'inë' Moisés yugu' le gun cazë' Lë',
en bulu'inë' bönachi Israel yugu' le zxön runë'.

⁸ Xanru' ruhuéchi' ladxí' cazë' bönachi, en ruzá' ládxe'ë quéguequi.
Biti' rilétenë', pero nadxí'itiqui'sinë' léguequi.

⁹ Biti' ruzétiqúi'sinë' rë'u le bach,
en bití' rilétiqúi'sinë'.

¹⁰ Biti' runë' rë'u xiguia' ca sa'yéaj dö' nuá'aru',
en bití' rubí'ë queëru' ca naca le xihui' nabága'ru'.

¹¹ Naca caní tu' ca na' naca xitsá'tërö lúzxiba ca luyú ni,
la' canísö naca zxön ca nadxí'inë' Xanru' nupa tadxí Lë'.

¹² Tsa nácátërö zi'tu' ga rilén gubidza ga ridxintë ga ribía,
la' canísö rucuitë' yugu' le ta'bága'ru' Lë'.

¹³ Ca na' ruhuéchi' ládxe'ë xúzgaca cázabi' yugu' zxí'inë',
la' canísö ruhuéchi' ládxe'ë Xanru' nupa tadxí Lë'.

¹⁴ Caní runë' tu' nözinë' le nácaru'.
Röjnenë' néquiniru' bëchtö yu.

¹⁵ Tsa nácagaca dza zóaru' nabanru',
nácagaca ca raca que xiyija guíxi'do'.

¹⁶ Cate' recaj bö', ruúlu runítisö xiyija na',
en bití' naca bë' ga na' guzóa.

¹⁷ Xanru', tsaz nadxí'inë' nupa tadxí Lë',
en runë' quégaca zxí'iniguequi le naca dxi'a.

¹⁸ Caní runë' quégaca nupa tun ca rinná bë' xibá queë',
en quégaca nupa tun ca rinná bë' xibá queë'.

¹⁹ Naguixjé' Xanru' xilatjé' yehua' yubá ga na' rö'ë rinná bë'ë.
Rinná bé'enë' yúgu'të le dë.

²⁰ ¡Guli'cu'ë yöl-la' ba Xanru', libí'ili', gubáz lá'ayi queë',
nápatëröli' yöl-la' huáca zxön, en runli' ca rnna xtídzë'ë,
libí'ili' na' runli' ca rnna didza' ru'è!

²¹ ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,
libí'ili', huen dxin queë' na', runli' ca ré'ëni quézinë' Lë'!

²² ¡Guli'cu'ë yöl-la' ba Xanru', yúgu'téli' na' nucu'ë libí'ili',
libí'ili' zóali' yúgu'të lataj ga na' rinná bë'ë Lë'!
¡Bil-la yöl-la' ba queë' Xanru', li', bö' naca caza'!

104

¹ ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

² ¡Nusubaga' cuinu' bení' ca zxo' nacu' cazu',
ate' naguixaj cazu' lúzxiba ca tu lari' zxön!

3 Naguixju' xilataj lidxu' lahui nisa dē xitsá'alö.
 Dxía cazu' lu böaj ca tu lu carreta, en ridó' lu bö'ös.
 4 Rugunu' dxin bö' raca ca tu gubáz quiu',
 enca' yugu' guí' ca huen dxin quiu'.
 5 Nuzú' tsutsu luyú ni lu xilibi,
 en biti' ca' gaca nu utsá' xilataj.
 6 Gudixju' nisa zxön luyú ni ca tu lari' nabaga' le,
 ate' yöjbaga' nísado' na' yugu' guí'a.
 7 Buzenu' le bach nisa na', ate' burúaj,
 en cate' biyön chi'u, bayúdx buzunnaj nisa na'.
 8 Gurén yugu' lu guí'a, en bötaj ga naca ra' yegu,
 ga bidxintē yöjsóa ga nupó'o que nisa na'.
 9 Gudixju' buzá' que nísado' ga biti' gaca tödi.
 Bítirö caz tseajbaga' nisa na' luyú bidxi.
 10 Runu' ga ralaj beaj yugu' lē'e guí'ado',
 enca' ga ta'dödi yegu ga rö'ögaca röga'.
 11 Yudzu yugu' yegu na' nisa té'ajba' böa' guixi',
 le rugúa yöl-la' ribídx quégacaba' burro ta'dásiba' la' guixi'.
 12 Yugu' ra' yegu rö'ögaca yaga ga tu'dxiaba' biguínido' xcá'agacaba',
 en túl-laba' yugu' lu ni'a né'eguequi.
 13 Rigú'u nisa guiöj quiu' yugu' lu guí'a,
 en runu' ga tu'huöla tu'dzé'e yugu' le dzö'ö luyú.
 14 Runu' ga rizzön yö le táguba' böa' bēdx,
 en yugu' cuan guixi' tu'gún dxin bönachi,
 le ilagu ni'a que le nudó'o luyú,
 15 en xisi uva le run ga tudzeja lādxi'guequi,
 en za olivo le ta'gú'u láhuiguequi lu yöl-la' ruzí' xibé quéguequi,
 en yöta le nabániguequi.
 16 Tu'zí' xibé nisa guiöj yaga cedro dzö'ö lu guí'a Líbano,
 yugu' yaga na' budó'o, Xantu'.
 17 Ni' tu'dxiaba' biguínni xcá'agacaba',
 ate' tunba' biyúz lídxigacaba' ni'.
 18 Nunu' Li' yugu' guí'a sibi ga dzö'öba' bdxina' guixi',
 enca' yugu' znan bulóaj gapa tapa chi'i cuíngacaba' bizxidxu'.
 19 Benu' beo' le naca bē' yugu' beo' que iz,
 ate' ribía gubidza ga ral-la' cuía.
 20 Benu' chi'i dzö'ölö, en cate' naca chul-la
 ta'rúajba' ta'daba' böa' guixi'.
 21 Ta'bödxí'aba' bēdxí guíxi'do', ta'zóa régu'ba' le ila'zönba'.
 Tu'guílajba' le nuzóé' Dios iláguba'.
 22 Cate' rilén gubidza tu'dxinba' lídxigacaba',
 en röjóxagacaba' yugu' lu znan bulóaj quégacaba'.
 23 Ní'irö ta'rúaj bönachi sōjaca huen dxin,
 en tun caz dxin ga ridxintē ribía gubidza.
 24 Xan, zióntērö yugu' le nunu' Li'.
 Len yöl-la' réajni'i zxön quiu' nunu' yúgu'tē.
 Nalí luyú yödzölió ni yugu' le dxi'a nunu'.
 25 Ni' zoa nisa nácatērö zxön,
 ga na' nacuá'aba' böa' guizxi yu,
 böa' cuidi', enca' böa' zxön.

26 Ni' ta'dödi barco zxön,
enca' böa' zxön lëba' leviatán, böa' na' nuzóa cazu'.

27 Yúgu'tëba' ta'bözaba' Li,
cate' idxinrö ugagu' légacaba'.

28 Rugagu' légacaba', ate' táguba'.
Runödzu' le iláguba', ate' tu'huólaj ta'dzé'eba'.

29 Cate' ruhuecju' quiu', tádxiba',
en cate' ruzi'u bö' quiu', tátiba',
en ruhuóaca yu le néquinigacaba'.

30 Cate' rigú'u légacaba' bö', nabángacaba'.
Rucubu' yúgu'të le nacua' yödzölió.

31 ¡Ral-la' gácatíca'sö yöl-la' ba queë' Xanru'!
¡Ral-la' ila'yaza ládxi'tíca'sö bönachi le nun cazë' Lë'!

32 Ruyúë' Xanru' luyú, ate' ríxxizi.
Riganë' yugu' gu'a, ate' rírúaj dzön.

33 ¡Gul-la' queë' Xanru' yúgu'të dza soa' ibana'!
¡Gul-la' yöl-la' ba queë' Dios tsanni ni zoa' nabana'!

34 ¡Zxixi naca le rízá' ládxa'a ca naca queë'!
¡Udzéjalenda'-në' Xanru'!

35 Ila'nítíë' bönni' dul-la' nacu'ë yödzölió ni,
en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!
¡Yöl-la' ba Lë' Xanru'!

105

1 ¡Guli'guíë' Xanru' Dios: "Xclenu"!

¡Buli'lídzë' Lë'!

¡Buli'siyön bönachi ca náca gaca le benë'!

2 ¡Guli'gul-la queë'! ¡Guli'gul-la yöl-la' ba queë'!

¡Guli'gú' didza' ca náca gaca le zxön nunë'!

3 ¡Buli'sí' xibé Lë' lá'ayi!

Ral-la' ulu'dzeja ládxi' yúgu'të nupa ta'guilaj Xanru'.

4 Guli'guiljë' Xanru', enca' yöl-la' huáca queë'.

Guli'gú' ládxi'tíca'sö idxinli' lahuë'.

5 Guli'tsöjné le náca gaca zxön benë' Lë',

lë na' tun ga rubániru', enca' ca náca gaca didza' bë'ë cate' buchi'a busöröë'
bönachi,

6 lib'íli', xzí'ini xi'sóë' Abraham, huen dxin queë' Dios,
en lib'íli', xzí'ini xi'sóë' Jacob, nácali' nupa gurö cazë' queë'.

7 Lë' náquië' Xanru' Dios.

Idütë yödzölió naca bë' ca buchi'a busöröë' bönachi.

8 Röjnétiqí'siné' didza' dzaga nunë',

didza' na' gunná bë'ë ila'zí' lu ná'agaquië' chi gayuá' cö' xzí'ini xi'sóë'
Abraham,

9 didza' dzaga na' bënlenë' Abraham,

le naca didza' na' benë' tsutsu Dios ca gunë' queë' Isaac.

10 Ní'irō benē' tsutsu didza' na' lahuē' Jacob,

le naca tu le rinná bé'enē' lē' gunē',

para gaca quégaca bōnachi Israel tu didza' dzaga le zoa tsaz.

11 Gunnē': "Gunna' queēli' xiyúgaca bōnachi Canaán,
le guequi tsaz queēli', en quégaca zxi'ini xi'sóali'."

12 Caní gunnē' Dios cate' ni' gula'cu'ē nabábagaquiē' bōnni' Israel.

Tu chópasē' guláquiē', en guláquiē' bōnni' zi'tu luyú.

13 Gula'dē' tu ia'tú yōdzō izá'a.

Bulu'zē'ē tu ga nu gunná bē', en bila'dxínē' ga nacuá' bōnachi izá'a,

14 pero bití' bē'ē lataj Dios nu usaca' zi' bōnachi queē' na',

en buzenē' le bach bōnni' gula'nná bē'ē para gulácalenē' bōnachi queē'.

15 Gunnē': "Bití' bi gunlí' quégaca bōnachi nabō caza' quia',

en bití' bi dō' guá'ali' quégaquiē' bōnni' tu'ē didza' uláz quia'."

16 Benē' ga guyú'u gubín yōdzōlió,

en benē' ga biyadzaj yōta ilahuē'.

17 Gusól-lē'ē tubi' bi'i bōnni', bi'i bidxinbi' ni' zí'aló ca légaquiē',

tu' gulúti'ē-bi' José para gácabi' bi'i nadó'o.

18 Gulúgui'ē bōnni' Egipto ní'abi' len du guíē,

en bulu'dē'ē yen ná'abi' bregui' guíē,

19 ga bidxintē dza budxín xtídzē'ē Xanru',

tu' guzxi' bē'ē Xanru' Dios José na'.

20 Ní'irō gusól-lē'ē bōnni' gunná bē'ē luyú Egipto nu busán-bi'.

Bōnni' na' gunná bé'enē' yōdzō izá'a zían busólē'-bi'.

21 Benē' ga gúcabi' xan yu'u queē',

ate' guta' lu ná'abi' yúgu'tē le dē queē' bōnni' na' rinná bē'ē.

22 Guta' lu ná'abi' gulú'ubi' lidxi guíē bōnni' ta'nná bē'ē tsca ré'ēni quézibi',

para busédibi' bōnni' gula queē' yól-la' réajni'.

23 Ní'irō bila'dxín ca' bōnachi Israel luyú Egipto.

Caní guca, guzóē' Jacob lu xiyúgaca zxi'ini xi'sóē' Ham.

24 Benē' Dios ga gula'yántērō bōnachi queē' luyú ni',

ate' guláquiē' ziantērē' ca nupa gula'díl-lalen légaquiē'.

25 Benē' Dios ga gulunē' zi' bōnni' Egipto bōnachi queē'.

Lu yól-la' banís quégaquiē' gula'zì yé'enē' nupa na' nácagaca huen dxin queē' Lē'.

26 Ní'irō gusól-lē'ē Moisés, huen dxin queē', lógaquiē',

enca' Aarón, bōnni' na' nabō cazē' Lē'.

27 Gulunē' chopē' ni zían yól-la' huáca zxon queē' Dios lógaca bōnachi Egipto na'.

Gulunē' zían yól-la' huáca que yehua' yubá lu xiyúgaca zxi'ini xi'sóē' Ham.

28 Gusól-lē'ē Dios le naca chul-la, ate' bōáca chul-la lahui' dza,

en bití' guca ila'dá'baguē'ē xtídzē'ē.

29 Benē' ga nisa yegu nacuá' lu yegu quégaquiē' bōáca rōn,

en benē' ga gulátiba' bōla dzō'ōba' yugu' yegu na'.

30 Gula'yanba' riu lu xiyúgaquiē',

ga bidxintē gula'yázaba' yu'u lidxē' bōnni' rinná bé'enē' légaquiē'.

31 Bē'ē didza' Dios, ate' gulátsjaba' bōtsugayu guizxi yu,

en gulátsjaba' ca' bō'iyudo' idútē lu xiyúgaquiē'.

32 Benē' ga guró'ō guiōj bōgui' yōla sunna uláz que nisa guiōj,

ate' bōxaj ca' guí' lu xiyúgaquiē'.

33 Guditsjē' yugu' lubá uva quégaquiē', en yugu' yaga higo,

en busunítië' yaga rô'gaca lu xiyúgaquië'.

³⁴ Bë'ë didza', ate' bila'dxinba' bõchi'zu guizxi yu,
enca' bõchi'zu hué'enido', cuntu nu gaca ulaba légaçaba',

³⁵ ate' guláguba' ca' idútë le naz nudá'agaquië' lu xiyúgaquië',
en guláguba' ca' idútë le naz nudá'agaquië' lu xiyúgaquië'.

³⁶ Benë' ga gulátibi' yúgu'tëbi' bi'i bõnni' lo idútë lu xiyúgaquië'.
Bi'i lo na' quégaquië' bõnni' nál-la.

³⁷ Ní'irõ bubéajë' Dios yugu' bõnni' Israel luyú na', nuá'agaquië' dumí
plata, en oro,

ate' cuntu nu yõjchegu' nu nutsa' légaquië'.

³⁸ Bulu'dzeja bõnachi Egipto cate' bulu'zë'ë bõnni' Israel lu xiyúgaquië',
ate' guladxi gula'dzõbi tu' nõziguequinë' bõnni' Israel na'.

³⁹ Gusõl-lë'ë Dios tu böaj le gulú'u bõnachi queë' zzul-la,
ate' chi'i dzõ'õlõ gusõl-lë'ë guí' le buzení' quégaquië'.

⁴⁰ Gula'nábinë' Lë', ate' gusõl-lë'ë böra guíxi'do' zían le ilahuë',
en benë' ga bulu'huõlaj gula'dzé'enë' yõta que yehua' yubá.

⁴¹ Bulu'ë lahui tu guiõjto'o, ate' gulalaj nisa yégudo'.

Gudõdi nisa na' luyú bidxi ni' ca tu nisa yegu gubõ'o.

⁴² Caní benë' Dios tu' yõjnenë' didza' lá'ayi queë',
le guzxi' lu në'ë gunë' queë' Abraham, huen dxin queë'.

⁴³ Bubéajë' bõnachi queë' lu yõl-la' rudzeja quéguéqui,
ate' lu yõl-la' rudzeja quéguéqui gula'bõdxi'a bõnachi gurõ cazë' queë'.

⁴⁴ Bunõdzjë' xiyúgaca bõnachi yugu' yõdzõ izá'a quégaquië'.

Bulu'zi'ë xibé le ilá' luyú ni'a que dxin gulún bõnachi izá'a na'.

⁴⁵ Caní benë' Dios para ilunë' ca rnna le gunná bé'enë' légaquië' ilunë',
en ilunë' ca rinná bë' xibá gudixjé' Lë'.

¡Guli'cu'ë yõl-la' ba Xanru'!

106

1 ¡Guli'cu'ë yõl-la' ba Xanru'!

¡Guli'guié' Xanru': "Xclenu" tu' náquië' idú dxi'a!

¡Zóatica'sõ yõl-la' dxi'i ladxi' queë'!

2 ¿Nuzxi caz gaca quixjõ' ca nácagaca le zxõn nunë' Xanru',
en uluf'i lahui ca naca yõl-la' ba queë'?

3 ¡Bica' ba nupa tun le naca tsahui',
nupa na' túntica'sõ le naca dxi'a!

4 Yõjnë neda', Xan, cate' ruzá' ládxi'u quégaca bõnachi quiu'.

Buzá' ladxi' quia' yõl-la' rusõlá quiu',

5 para gaca ilé'eda' gata' yõl-la' tsahui' quégaca nupa narõ cazu' quiu',
en para gaca udzëjalenda' bõnachi quiu' cate' tu'dzeja,

en para gaca uzí'lëna' xibé nupa néquiquequi quiu'.

6 Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

7 Cate' gula'cu'ë xuz xtó'otu' luyú Egipto,
biti' gula'yéajni'inë' le nácagaca zxõn benu'.

Biti' yõjnëguéquinë' yugu' le benu' quégaquië' lu yõl-la' dxi'i ladxi' quiu',
pero gula'dá'baguë'ë xtídzu'u cate' gula'cu'ë ra' nísado' lë Nísado' Xíná.

- 8 Busölë' Xanru' Dios légaquië' para gaca bë' runë' ca rnna xtídzë'ë, en para ulu'e lahui yöl-la' huáca zxön queë'.
- 9 Caní guca, buzenë' le bach Nísado' Xiná na', ate' la' gubídxitë. Guchë'ë légaquië' ga rë'do' lu nísado' na', ate' gula'dë' lu yu bidxi ga na' gurö'ö nisa.
- 10 Caní guca, busölë' légaquië' lu na' nu na' benë' légaquië' zi', en buá'uë' légaquië' lu na' nu na' gudíl-lalen légaquië'.
- 11 Ní'irö gubaga' nísado' na' nupa gula'sí regu' légaquië'.
- Cuntu nu bugá'ana nu bidzaga léguequi.
- 12 Ní'irö gula'yéajlë' bönachi queë' xtídzë'ë, ate' gulul-la yöl-la' ba queë'.
- 13 Pero la' gulál-latë ládxi'gaquië' yugu' le benë'.
- Biti' gula'nábinë' Lë' ulu'ínë' légaquië' le ral-la' ilunë'.
- 14 Zián le gula'zé ládxë'ë cate' ni' gula'cu'ë la' guixi' ga dë lataj, en gula'zi' bë'ë Dios la' guixi' na'.
- 15 Ní'irö bë'ë Dios quégaquië' le gula'nábinë' Lë', pero gusöl-lë'ë quégaquië' tu yödzöhuë' le bëti zióngaquië'.
- 16 Cate' bulu'zxë'enë' Moisés ga ni' gula'cu'ë tsözxön, en bulu'zxë'enë' ca' Aarón, bönni' nubéajë' Xanru' quez queë',
- 17 la' ná'asö gualaj luyú, en bucachi' Datán.
- Bucachi' ca' nupa gulún tsözxön Abiram.
- 18 Gulaj tu guí' zxön ga na' nudúbigaquië', en buzegui' nupa na' guluá' dö'.
- 19 Lu guí'a Horeb gulunë' tu bédxido' néquiniba' oro, en gula'yéaj ládxë'ë budó' oro na'.
- 20 Caní guca bulu'cá'anë' Dios nayëpisëtë'rë', para gula'yéaj ládxë'ë budó' oro le naca ca tu bédxi ráguba' guixi'.
- 21 Gulal-la ládxë'ë Dios Nu busölá légaquië'.
- Lë' benë' zión le zxön le gulácalen légaquië' luyú Egipto.
- 22 Benë' zión le tun ga rubániru' lu xiyúgaca zxi'ini xi'sóë' Ham, en zión le tun ga rádxiru' Lë' le benë' ra' Nísado' Xiná.
- 23 Que lë ni na' gunné' Dios usunítië' légaquië', ate' la' cá'asö gunë' la'tu' cabí guzuinë' Moisés, bönni' rö queë', lahuë' Lë', en buzóa dxié' yöl-la' rilé queë' para cabí usunítië' légaquië'.
- 24 Ní'irö biti' gulë'enë' ila'yázië' luyú dxi'a na' dë lógaquië' tu' cabí gula'yéajlë'ë xtídzë'ë Dios.
- 25 Gula'nnë' zi'ë queë' Dios gapa naca lu yu'u guídi quégaquië', en biti' bulu'zé náguië' chí'ë Xanru'.
- 26 Que lë ni na' benë' tsutsu Dios xtídzë'ë le bé'lenë' légaquië', gunné' gunë' ga ilátië' ga na' naca la' guixi' ga dë lataj.
- 27 Gunnë' gunë' ga ilasi lásië' zxi'ini xi'sóagaquië' ladaj zión yödzö izá'a, en gúsië' légaquië' gapa nacuá' bönachi zi'tu'.
- 28 Ní'irö bulu'dödi cuíngaquië' lu na' budó' guié' lë Baal-peor, en gulahuë' xipéla'gacaba' böa' guixi' gulútië'-ba' para gulunë' zxön yugu' dios nati.
- 29 Ca' guca, gulún lenë' Dios ni'a que le gulunë', ate' gulén tu yödzöhuë' zxön ládjagaquië'.
- 30 Ní'irö guzuinë' Finees, en benë' le raza ládxë'ë Dios, ate' guzóa dxi yödzöhuë' zxön na'.
- 31 Buzöë' Dios queë' Finees na' náquië' tsahui' ni'a que

lë na' benë' le nuzóë' tsaz ca naca queë'.

³² Lësca' gulún lenë' Dios ga na' zoa nisa lë Meriba,
ate' Dios gulénë' Moisés tu' nözi lë na' gulunë'

³³ tu' gula'dá'baguë'ë xtidxë'ë Bô' Lá'ayi queë',
ate' Moisés, lu yöl-la' ridzá'a queë', gunné lizë'.

³⁴ Biti' bulu'sunítië' bönachi tuá' dö' gula'cuá' lu yu ni,
ca na' gunná bé'enë' Xanru' légaquië' ilunë'.

³⁵ Gulunë' léguequi tsözxón

en bila'zédë' ilunë' ca gulún bönachi na',

³⁶ ate' gula'yéaj ladxë'ë budó' guiöj budó' yaga quéguequi,
le guca quégaquië' ca tu du yalaj le guzxón légaquië'.

³⁷ Gulútië'-bi' zxi'inigaquië' lógaca bô' xihui',
yugu' bi'i bönni', en nigúlado',

³⁸ en bulu'laljë' xichóngaca nupa bití' bi nabága'gaca

tu' bulu'laljë' xichóngacabi' bi'i bönni' quégaquië', en bi'i nigula
quégaquië',

yugu' bi'i na' gulútië'-bi' lógaca budó' guiöj budó' yaga nacúa' luyú
Canaán,

ate' gúcada' xihui' luyú ni tu' nözi rön na' bulu'laljë'.

³⁹ Ca' guca, guláquië' xihui' ni'a que le gulunë'.

Guláquië' ca tu nigula udá dzaga tu' bulu'cá'anë' Dios quégaquië'.

⁴⁰ Que lë ni na' guléde'enë' Xanru' Dios bönachi queë',
en bití' bilé'enë' dxi'a nupa na' néquiquequi queë'.

⁴¹ Ní'irö budödë' légaquië' lu ná'agaca bönachi zían yödzo izá'a,
ate' nupa bulu'dí'i légaquië' gula'nná be'e légaquië'.

⁴² Nupa na' bití' bila'lé'e légaquië' dxi'a gulunda' légaquië' dxin,
en bulu'zxicaj légaquië' lu yöl-la' unná bé' quéguequi.

⁴³ Zían luzuí gú'unë' Dios usölë' légaquië',

pero gula'dá'baguë'ë le ré'enë' ilunë',

ate' guzxöntëro xigua' nabága'gaquië'.

⁴⁴ Bilé'enë' Dios yöl-la' bayechi' quégaquië'

en biyönnë' ta'bödxi yechë'ë.

⁴⁵ Yöjnenë' didza' dzaga núnnenë' légaquië',

ate' bubequi lahuë' quégaquië' tu' nazxöntëro yöl-la' dxi'i ladxi' queë'.

⁴⁶ Benë' Dios ga bulu'huéchi' ladxi' légaquië'

nupa na' gula'ché' légaquië' nadzúngaquië'.

⁴⁷ ¡Busölá netu', Xantu' Dios!

Guléaj netu' ladjagaca yödzo izá'a

para guiëtu' Li': "Xclenu'" ni'a que Lo' lá'ayi,

en lu yöl-la' rudzeja zxón queëtu' cú'utu' Li' yöl-la' ba.

⁴⁸ ¡Yöl-la' ba Lë' Xanru', Dios quégaca bönachi Israel

na'a dza, en yúgu'të dza si' zaca!

Ral-la' ila'nná yúgu'të bönachi: "¡Ca' gaca!

¡Guli'cu'ë yöl-la' ba Xanru' Dios!"

107

¹ ¡Guli'guië' Xanru': "Xclenu'" tu' náquië' dxi'a,
en tu' zóatica'sö yöl-la' dxi'i ladxi' queë'!

² Ral-la' ila'nná caní nupa na' buá'uë' Xanru',

nupa na' buá'uë' lu ná'agaca nupa gulún léguequi zì',
 3 en nubéajë' léguequi zían lu yödzo ízá'a,
 saca' ga rilén gubidza, en saca' ga ribía,
 saca' ga za' bõ' ziaga, en saca' ga ridõdi gubidza beo' ziaga.

4 Bal-lë' gula'dë' nanítigaquië' la' guixi' ga dë lataj,
 en ga ni' biti' zoa nõza.
 Biti' guca ulu'dzölinë' tu yödzo ga gaca tsöjcu'ë.
 5 Gula'dunë', en gula'bidxë' nisa,
 en gudú lãdxi'gaquië'.

6 Ní'irõ lu lë na' raca quégaquië' bulu'lidzë' Xanru',
 ate' busölë' légaquië' lu zían le gula'guí' gula'záquë'ë.

7 Guchë'ë légaquië' tu la' nõza tsahui',
 en guchë'ë légaquië' tu lu yödzo ga tsöjcu'ë.

8 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',
 en rugahuë' nupa ta'dún le nácgaca dxi'a queë'.

10 Bal-lë' gula'cu'ë ga chul-la, en ga zoa bõnadxi ilátië'.
 Gula'dzunë' yugu' lu du guié, en gula'guí' gula'záquë'ë
 11 tu' gula'dá'baguë'ë xtídzë'ë Xanru' Dios,
 en bulu'zóë' tsólá'alõ le rigu'ë icja lãdxi'do'gaquië'.
 12 Tu' gulunë' bayúdx dxin, gudú lãdxi'gaquië'.
 Gula'dzõ'ë lu yu zcan yua' nuá'agaquië',
 ate' cuntu nu zoa gácalen légaquië'.

13 Ní'irõ lu lë na' raca quégaquië' bulu'lidzë' Xanru',
 ate' busölë' légaquië' lu zían le gula'guí' gula'záquë'ë.

14 Bubéajë' légaquië' ga na' gula'cu'ë ga chul-la,
 en ga guzóa bõnadxi ilátië',
 ate' gudítsjë' yugu' du guié núga'gaquië'.

15 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.

16 Ruquínnejë' le tá'baga' gapa nu riyaza lidxi guié le néquiniguequi guié
 bronze,
 en ruzxuzxjë' yugu' vara néquiniguequi guié.

17 Bal-lë' gula'guí' gula'záquë'ë tu' gula'dá'baguë'ë Dios,
 en tu' nõzi dö' gulu'ë.

18 Gula'gúti'në' bíti'tës la' huagu,
 en gula'zóa ilátië'.

19 Ní'irõ lu lë na' raca quégaquië' bulu'lidzë' Xanru',
 ate' busölë' légaquië' lu zían le gula'guí' gula'záquë'ë.

20 Gusöl-lë'ë quégaquië' xtídzë'ë, en bunë' légaquië',
en busölë' légaquië' lu yöl-la' guti.

21 Ral-la' ilë' Xanru': "Xclenu" tu' nadxí'inë' légaquië',
en tu' benë' yugu' le zxön, gúcalenë' légaquië'.

22 Ral-la' ilë' Dios: "Xclenu", en bi ulu'nódzjé' queë',
en lu yöl-la' rudzeja quégaquië' ilul-lë' ca nácagaca le nunë'.

23 Bal-lë' gula'dödë' lahui nísado' yugu' lu barco zxön,
en gulunë' dxin yugu' lu nísado'.

24 Bila'lé'enë' yugu' le nunë' Xanru',
en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',
ate' guyasa gudxía nísado'.

26 Gula'yasa barco ca tu lu gu'ado' nisa,
en la' bótjatë ga rö'ö röga' lu nisa na'.
Tu' guzóale'ë bönadxi ilátië' gudú ládxi'gaquië'.

27 Gula'zxízië', en yójchégu'gaquië' ca bönni' ta'zúdxinë',
ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'gu'i gula'záquë'ë.

29 Benë' Dios ga guzóa dxisö bö' budunu' na' recja,
ate' guzóa dxi le rasa ridxía lu nísado'.

30 Bulu'dzëjanë' tu' guzóa dxi lu nísado',
en tu' guchë'ë Dios légaquië' dxi'a tsáhui'do' ga na' sójáquië'.

31 Ral-la' ilë' Xanru': "Xclenu" tu' nadxí'inë' légaquië',
en tu' benë' yugu' le zxön, gúcalenë' légaquië'.

32 Ral-la' ulu'lu'ë lahui yöl-la' zxön queë' ga nudúbigaca bönachi queë',
en ila'gu'ë Lë' yöl-la' ba ga nudúbigaquië' bönni' gula tu'chi'a tu'söröë'.

33 Runë' Xanru' Dios ga tu'hu'i dërö yugu' yegu,
enca' yugu' beaj nisa.

34 Ga naca yu ya'a runë' ga ruhuóaca yu bidxi,
ni'a que le xihui' nabága'gaca nupa nacuá' ni'.

35 Ga naca yu bidxi runë' ga ruhuóaca yu nabisa,
ate' ralaj nisa ga biti' bi nisa guzóa.

36 Ni' ru'ë lataj ila'cuá' nupa ta'dún
para ilunë' ni' yödzö ga ila'cu'ë.

37 Tazë' yugu' le tazë', en tu'dë'ë yugu' lubá uva,
yugu' le ta'bía yödxí yana'.

38 Runë' Xanru' ga raca dxi'a quégaquië',
en ga ta'cuá'bi' zíanbi' bi'i quégaquië',
en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjé' bönachi queë',
en tu'zötjë' léguequi,

en tu'saca' zi'ë léguequi, en tu'ë dö' quéquequi,

40 rucá'anë' Dios bönni' na' dë lu ná'agaquië' cá'asö,

en runë' ga ta'dë' la' guixi' ga dë lataj, en tu luyú bidxi.

⁴¹ Rusölë' yugu' bönni' yechi' lu le ta'guí' ta'záquë'ë,

en runë' ga ta'yanbi' xzi'inigaquië' ca ta'yanba' bö'cu' xzila'do'.

⁴² Ta'lé'e lë ni nupa nácagaca tsahui', en tu'dzeja,

pero biti' bi ta'nná nupa tuá' dō.

⁴³ Nupa ta'yéajni'i ral-la' sa' ládxi'gaca ca nácagaca lë ni,

ate' iléquibe'e náquië' Xanru' Dios dxi'i ladxi'.

108

¹ ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

² ¡Guli'bán, libí'ili' riguínali' bihuël-la!

¡Gúl-laru' cate' ni' ritó yu!

³ ¡Guía' Li': "Xclenu" Xan, ládjagaca bönachi yugu' yödzö izá'a!

¡Gul-la' yöl-la' ba quiu' lógaca yúgu'të bönachi!

⁴ ¡Zxöntëro naca yöl-la' dxi'i ladxi' quiu', le ridxintë lúzxiba xitsá'!

⁵ Buluí'i lahui lúzxiba yöl-la' zxön quiu', Dios,

ate' lahui yödzölió ni buluí'i lahui yöl-la' bení' quiu',

⁶ para usöló' netu', bönachi quiu', nupa nadxí'inu'.

Len yöl-la' huáca zxön quiu' busölá netu', en bubí'i didza'.

⁷ Lu lataj lá'ayi queë' bë'ë didza' Dios, gunnë':

"Uzi'a xibé, en quísia' xiyúgaca bönachi Siquem,

en urixa' luyú dë cuiti yegu Sucot.

⁸ Nequi quia' xiyúgaca bönachi Galaad,

enca' xiyúgaca xzi'ini xi'sóë' Manasés.

Naca ca tu le rusubín icja' xiyúgaca xzi'ini xi'sóë' Efraín.

Naca ga rinná bë'a xiyúgaca xzi'ini xi'sóë' Judá.

⁹ Naca ca tu ga riguibi na'a xiyúgaca bönachi Moab,

ate' lu xiyúgaca bönachi Edom chú'una' löla'.

Cödxí'a tu' uxicja' bönachi Filistea."

¹⁰ ¿Nuzxi caz gaca ichë' neda' lu yödzö

dë zö'ö idú gásibi'ilö le run chi'i yödzö na'?

¿Nuzxi caz gaca ichë' neda' lu xiyúgaca bönachi Edom?

¹¹ ¿Naru' cabí nusán ládxi'u netu', Dios?

¿Naru' cabí tséajlenu' bönni' queëtu' röjáquië' gudil-la'?

¹² Gúcalen netu' cate' tíl-lalentu' nupa dutíl-lalen netu',

tu' naca dádusö gácalen netu' nu naca bönáchisö.

¹³ Len yöl-la' huáca queë' Dios idéli'ru'

tu' uxicja cazë' Lë' nupa ta'díl-lalen rë'u.

109

¹ Rigu'a Li' yöl-la' ba, Xana' Dios.

Biti' su' dxisö,

² tu' ta'nná quia' nupa tuá' dō, en ta'zí' yë'.

Lu yöl-la' rizí' yë' quéguequi tuí' didza' le tu'zegui' neda'.

³ Nagú'ugaca neda' lé'ajlō,

en lu yöl-la' biti' rilé'e neda' dxi'a tuí'tica'sö didza'.

4 Sal-la' nadxí'ida' léguequi, tu'zegui' neda' didza',
pero neda' rulidza' Li'.

5 Bena' quéguequi le naca dxi'a, pero bulu'bí'i quia' le naca dō'.
Nadxí'ida' léguequi, pero biti' ta'lé'e neda' dxi'a.

6 Buzóa tu bönni' huía' dō'
para uchi'a usöröë' que nu na' biti' rilé'e neda' dxi'a.
Ben ga soa gagu nu uzegui' nu na' didza'.

7 Cate' nu uchi'a usörö bönni' na', biti' gu'u lataj urúajë' dxi'a.
Buyú le rinábinë' Li' tsca naca dul-la' nabáguë'ë.

8 Ben ga ilaca nabábasö dza soë' ibanë'.
Ben ga tsu'u nu yúbölö uláz queë'.

9 Ben ga ilácabi' zxi'inë' bi'i uzëbi,
en ga gácanu nigula queë' nigula uzëbi.

10 Ben ga ila'dásöbi' zxi'inë' ila'nábibi' nu bi unödzej quégacabi'.
Ben ga ila'guíljabi' le ilágubi' zi'tu' ga zoa lídxigacabi' le nadachi.

11 Ben ga ugúa nu bi benna lë' tu chí'sö idütë le dë queë',
en ben ga ila'banë' bönni' zi'tu' le rulá dxin runë'.

12 Ben ga biti' soa nu huéchi' ladxi' lë',
en biti' soa nu uzá' ladxi' quégacabi' zxi'inë' nácagacabi' bi'i uzëbi.

13 Ben ga udxí' quégaca zxi'ini xi'sóë',
en ga idxín dza bíti'rö soa nu si' la ca guzxi' lë'.

14 Yöjnética'sö le xihui' gula'báguë'ë xuz xtá'ahuë', Xan,
en biti' gal-la ládxi'u dul-la' bennu xinë'ë.

15 Ben ga ila'cuá'tica'sö dul-la' na' lo' Li', Xan,
para cabirö nu soa yödzölió nu tsöjné lë'.

16 Biti' buéchi' ládxi'ë luzë'ë,
pero gudxía nahuë' nupa gula'guí'i gula'zaca',
en nupa gula'yadzaj gula'yudxi,
enca' nupa gula'sébi ladxi', ate' bëtië' léguequi.

17 Bidxí'inë' le rudxía luzë'ë dō'.
Ben ga ulu'bí'i ca' queë'.

Biti' raza ládxi'ë gaca dxi'a que luzë'ë.
Ben ga biti' gaca dxi'a queë'.

18 Gulaca ca zxë' nácuë' didza' xihui' bë'ë,
ate' gula'yaza le nayá' nabanë' ca nisa,
en gula'yú'u ca' dxita queë' ca le za.

19 Ben ga ilaca queë' ca tu lari' rixóa cúdzë'ë,
en ca xipanë' rúgui'ë lë'ë.

20 Bubí'i caní quégaca nupa tu'zegui' neda' didza', Xan,
enca' quégaca nupa tu'i didza' zi' que bö' naca caza'.

21 Li', Xana' Dios, ben quia' le naca dxi'a
para gaca bë' runu' ca rnna xtídz'u.
Tu' naca dxi'a yöl-la' dxi'i ladxi' quiu', busölá neda'.

22 Riguí'i rizáca'a, en riyadzaj riyúdxida',
en raca zi' ládxi'da'ahua'.

23 Ridödi quia' ca raca que tu zzul-la cate' ribía gubidza.
Naca' ca tuba' böchi'zu, richë' bö' recja lëba'.

24 Ta'cuidi' zxiiba' tu' runa' gubasa.

Nadxita', en bíti'rö rö'ö za lu bëla' rön quia'.

25 Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

²⁶ Gúcalen neda', Xana' Dios.

Lu yöl-la' dxi'i ladxi' quiu' busölá neda'.

²⁷ Ben ga iléquibe'e rácalen cazu' neda'.

Nun cazu' Li' lè ni, Xan.

²⁸ Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',
pero udzëjada' neda', huen dxin quiu'.

²⁹ Ben ga ulu'gá'ana cá'asö nupa tu'zegui' neda' didza',
en ben ga gaca yöl-la' rutuí' quéguequi ca tu lari' nabaga' léguequi.

³⁰ Len ruá' cuina', zían luzuí guía'-në' Xanru': "Xclenu",
en ladaj bönachi zían cu'a Lë' yöl-la' ba,

³¹ tu' zuínë' cuita lë'e ibëla nu riyadzaj riyudxi
para usölë' nu na' lu ná'agaca nupa tu'siúdxí bö' naca caz nu na'.

110

¹ Xanru' Dios gudxë' Xana': "Gurö'i cuita lë'a ibëla
cate' gunra' ga ulu'zechu zxíbigaca lo'
nupa biti' ta'lé'e Li' dxi'a."

² Ga zoë' yödzo Sión gusöl-lë'ë Xanru' yöl-la' unná bë' quiu',
gunné': "Gunná be'e nupa biti' ta'lé'e Li' dxi'a."

³ Ulu'dödi cúinguequi lu no'o bönachi quiu'
cate' si'u yöl-la' unná bë' quiu'
tu' napu' yöl-la' lachi que le naca lá'ayi."

Ila'cuá' bi'i bönni' ga zu' ca ribö'ö buzén zílado'.

⁴ Runë' tsutsu xtídzë'ë Xanru', en biti' utsë'ë le, rnnë':
"Tsaz nacu' bixúz ca na' gúquië' Melquisedec bixúz."

⁵ Zoa cazë' Xanru' cuita lë'u ibëla.
Ucul-lë' bönni' ta'nná bë'ë cate' idxín dza usiúdxë' luyú.

⁶ Uchi'a usöröë' quégaca bönachi yúgu'të yödzö izá'a,
ate' ilí yödzoilió len bëla' rön quéguequi.

Uzötjë' nupa ta'nná bë' zían lu yödzö izá'a.

⁷ Guí'jë' nisa beaj ra' nöza,
en ni'a que lë ni huöáca ládxe'ë.

111

¹ ¡Guli'cu'ë yöl-la' ba Xanru'!

Idú ládxa'a rea'-në' Xanru': "Xclenu'."

Runa' caní tsaxzön len bönni' tsahui' zían ga na' nudúbigaca bönachi queë'.

² Zxön náca'gaca le nunë' Xanru'.

Yúgu'të nupa ta'yaza ládxi'gaca lë na' benë' tu'sëda ca náca'gaca.

³ Idütë dxi'a náca'gaca, en nayëpisetë'rogaca le nunë' Lë',
ate' idiá'tica'sö le naca tsahui' queë'.

⁴ Chinunë' ga tsöjneru' yugu' le benë', le tun ga rubániru'.

Náquië' Xanru' dxi'i ladxi', en ruí'i ládxe'ë rë'u.

⁵ Rugahuë' nupa tadxi Lë'.

Röjnetica'së' didza' dzaga núnlenë' bönachi queë'.

⁶ Buzëajni'inë' bönachi queë' ca naca yöl-la' huáca quégaca le nunë',
le benë' ga gula'déli'në' xiyúgaca bönachi izá'a.

⁷ Tsahui', en idütë li náca'gaca le núngaca lu në'ë.

Nácagaca tsutsu yúgu'të xibá gunná bē'ë.

⁸ Rucua'tica'së' tsutsu xibá queë',
en rusudxinë' léguequi lu le naca idútë li, en le naca tsahui'.

⁹ Gusöl-lë'ë Nu buá'uö bönachi queë'.

Tsaz nuzóë' didza' dzaga nunë'.

Lá'ayi, en ba'a ladxí' naca Lë'.

¹⁰ Lu yöl-la' radxi queëru' Lë' risí loru' ridéli'ru' yöl-la' réajni'i.

Yúgu'të nupa tun ca ta'nná bē' xibá queë' nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

112

¹ ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',

bönni' na' raza ládxë'ë runë' ca gunná bē'ë Dios!

² Tsépisëgaca xzí'ini xi'sóë' bönni' na' yödzöliö ni.

Gáquië' bica' ba bönni' na' runë' le naca dxi'a.

³ Lu yu'u lidxë' gata' yöl-la' tsahui',

ate' idía'tica'sö le naca tsahui' runë'.

⁴ Gulén bení' ga ridë' bönni' tsahui' ga na' naca chul-la.

Ruzá' ládxë'ë que luzë'ë, en ruí'í ládxë'ë lë', en runë' le naca dxi'a.

⁵ Gaca dxi'a queë' bönni' ruzá' ládxë'ë que luzë'ë,

en runnë' que tu chí'só le riyadzaj que.

Urúajë' dxi'a cate' nu uchi'a usörö queë'.

⁶ Catu caz gaca nu utsá' bönni' na',

ate' sóatica'sö nu tsöjnë lë'.

⁷ Biti' gádxinë' cate' nu usiyöni lë' le cabí' raca dxi'a.

Ridipa ládxë'ë tu' ruzxöni ládxë'ë Xanru' Dios.

⁸ Dios rutipë' ládxë'ë, ate' bití' gádxinë'

cate' idxinrö dza ilé'enë' nuhuótjagaca nupa ta'díl-lalen lë'.

⁹ Idú ládxë'ë runödzejë' quégaca bönachi yechi'.

Idía'tica'sö le naca dxi'a runë'.

Dios uchi'së' lë' ga tsépisë'.

¹⁰ Ila'lé'e lë ni nupa tuá' dö', en ila'bö' baguí'sö.

Ilagu zxe láyi'gaca, en ila'niti cuínguequi.

Tsaz initi le ta'zë ládxi'gaca nupa tuá' dö'.

113

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

² ¡Cú'uru' yöl-la' ba Lë' Xanru',

cate' risí lo na'a, en yugu' iz sí' zaca!

³ ¡Ga naguela' ga rilén gubidza ga ridxintë ga ribía,

cú'uru' yöl-la' ba Lë' Xanru'!

⁴ ¡Nayëpisëtëre' Xanru' Dios ca yúgu'të yödzö izá'a!

¡Naxzöntëre' yöl-la' zxon queë' ca naca lúzxiba!

⁵ ¿Nuzxi caz zoa naca ca náquië' Xanru' Dios?

Rö'ë rinná bē'ë ga na' nayëpisëtëre'.

6 Ruzötaj cuinë' para uyüé'

le dë lúzxiba, en le dë luyú ni.

7 Ruchisë' nupa nácagaca yechi', rubéajë' léguequi lu bëchtö yu.

Ruchisë' nupa ta'yadzaj, rubéajë' léguequi lu dō bëbu.

8 Runë' ga ta'bō'len nupa ta'nná bē'.

Ta'bō'len nupa ta'nná be'e bönachi queë'.

9 Runë' ga zóanu nigula huödx yu'u lídxinu.

Rudzeja ládxi'nu tu' runë' ga nacuá'abi' zxf'ininu.

¡Guli'cu'ë yöl-la' ba Xanru'!

114

1 Cate' bila'rúaj bönachi Israel luyú Egipto

bila'rúajë' zxi'ini xi'sóë' Judá ladaj nupa tufi' didza' izá'a.

2 Zxi'ini xi'sóë' Judá guláquië' ca lidxë' Xanru' Dios,

ate' gulaca bönachi Israel nupa rinná bé'enë' Dios.

3 Lahuë' Dios bubiga' nísado',

ate' bubí'i nisa yegu Jordán.

4 Gula'xiti' guí'a zxön ca yugu' bö'cu' zxila' biguiú',

ate' gula'xiti' ca' guí'ado' ca yugu' bö'cu' zxila'do'.

5 ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

6 ¿Bi raca queëli', guí'a zxön, tu' rixíti'li' ca yugu' bö'cu' zxila' biguiú'?

¿Bi raca queëli', guí'ado', tu' rixíti'li' ca yugu' bö'cu' zxila'do'?

7 Guzxizi lahuë' Xanru', yödzölió.

Guxxizi lahuë' Dios queë' Jacob.

8 Benë' Dios ga gulaj nisa tu' lë'e guiöjto'o,

en benë' ga böáca le guca guiöj jara tu' ga rilén nisa.

115

1 Calëga queëtu', Xan, calëga queëtu',

pero que lo' gaca yöl-la' ba

tu' nacu' dxi'i ladxi', en le naca idútë li.

2 ¿Bizx que ta'nná bönachi yugu' yödzö izá'a:

“Gazxi caz zoë' Dios quégaquië'”?

3 Zoë' Dios queëru' yehua' yubá.

Runë' le raza ládxe'ë gunë'.

4 Néquiguequini plata, en oro budó' quégaca bönachi izá'a na',

yugu' le núngaca lu ni'a lu na' bönachi.

5 Nacuá' ruí'iguequi, pero biti' gaca iluf'i didza'.

Nacuá' guiöj lógaca, pero biti' gaca ila'lë'e.

6 Nacuá' nágagaca, pero biti' gaca ila'yöni.

Nacuá' zxiniguequi, pero biti' gaca ila'lë'e.

7 Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

8 Nupa tun budó' guiöj budó' yaga ilaca ca nácagaca budó' na',

núti'tës nu ruzxöni ladxi' budó' guiöj budó' yaga.

9 Libí'ili', bönachi Israel, buli'zxöni ládxë'ë Xanru' Dios.
Rácalen cazë libí'ili', en rapa chi'ë libí'ili'.

10 Libí'ili', zxi'ini xi'sóë Aarón, buli'zxöni ládxë'ë Xanru' Dios.
Rácalen cazë libí'ili', en rapa chi'ë libí'ili'.

11 Libí'ili' na' rádxi'li'-në' Dios, buli'zxöni ládxë'ë Xanru' Dios.
Rácalen cazë libí'ili', en rapa chi'ë libí'ili'.

12 Xanru' Dios ruí'i ládxë'ë rë'u, en gunë' ga gaca dxi'a queéru'.
Gunë' ga gaca dxi'a quégaca bönachi Israel.

Gunë' ga gaca dxi'a quégaca zxi'ini xi'sóë Aarón.

13 Gunë' ga gaca dxi'a quégaca nupa tadxi Lë',
nupa na' nácagaca cá'asö, en nupa na' nayëpisiëgaca.

14 Gunë' Xanru' Dios ga tsan le nequi queéli',
lë na' nequi queéli', en le nequi quégaca zxi'inili'.

15 Raca ládxa'a gunë' Xanru' ga gaca dxi'a queéli'.
Náquië' Nu ben lúzxiba, en luyú ni.

16 Nequi queë' Xanru' Dios lúzxiba xitsá',
pero nudödë' lu ná'agaca bönachi luyú ni.

17 Nupa chinátigaca bití' gaca ila'gú'u Xanru' yöl-la' ba,
en calëga nupa nacuá' dxisö lataj chul-la que yöl-la' guti.

18 ¡Cú'uru' yöl-la' ba Xanru' Dios
na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

1 Nadxí'ida'-në' Xanru' Dios, tu' riyönnë'
le rulidza' Lë', en le rinábida'-në'.

2 Ruzë' naguë' chi'a.

Que lë ni na' ulidza' Lë' tsanni ni zoa' nabana'.

3 Guzóa bönadxi quia' gátia',
en guyu'a tsöbi que lataj chul-la que yöl-la' guti,
ate' gusëbi ládxa'a, en buí'inide'eda' ládxa'a.

4 Ní'irö bulidza'-në' Xanru' Dios, gunnía':
"Ráta'yua' lo', Xan, usóló' neda'."

5 Xanru' Dios ruzá' ládxë'ë queéru', en náquië' tsahui'.
Dios queéru' ruí'i ládxë'ë rë'u.

6 Rapa chi'ë Xanru' nupa nácagaca do' ladxi'.
Bulu'xicja bönachi neda', ate' busólë' neda'.

7 Buzí' ladxi' bö' naca caza',
tu' runë' Xanru' Dios ga raca dxi'a quia'.

8 Busóló' bö' naca caza', Xan, lu yöl-la' guti.
Benu' ga buí'i nisa ribödxi guiöj lahua',
en ga bíti'rö cuílagaca ni'a.

9 Ta'a lahuë' Xanru' Dios
ga nacuá' nupa nabángaca.

10 Guyéajlé'a Lë' cate' gunnía':

"Zoa le rusaca' neda' zi'."

11 Lu yöl-la' rô' böniga quia' gunnía':

“Ta’zì’ yè’ yúgu’tè bönachi.”

¹² ¿Bizxi caz gu’a-nè’ Xanru’ Dios

ni’a que yugu’ le runè’ le ruzi’a xibé?

¹³ Si’ lu na’a yöl-la’ rusölä queè’ Xanru’,
en ulidza’-nè’ Xanru’ Dios.

¹⁴ Unödza’ queè’ Xanru’ le guzxí’ lu na’a unödza’.

Raca ládxa’a gaca guna’ caní lógaca yúgu’tè bönachi queè’.

¹⁵ Rúndë’è Xanru’ bal

yöl-la’ guti quégaca nupa néquiquequi quez queè’.

¹⁶ Le nácatè naca’ huen dxin quiu’, Xan.

Naca’ huen dxin quiu’, enca’ zxi’ininu nigula huen dxin quiu’.

Busedxu’ le biröli neda’.

¹⁷ Cu’a lo’ le unödza’ quiu’, en guía’ Li’: “Xclenu”,
en ulidza’ Li’, Xan.

¹⁸ Unödza’ queè’ Xanru’ le guzxí’ lu na’a unödza’.

Raca ládxa’a gaca guna’ caní lógaca yúgu’tè bönachi queè’.

¹⁹ Ga zoa lö’a que yu’u lidxè’ Xanru’,

lu yödzo Jerusalén guna’ caní.

¡Guli’cu’è yöl-la’ ba Xanru’ Dios!

117

¹ ¡Guli’cu’è yöl-la’ ba Xanru’ Dios, libí’ili’, bönachi yúgu’tè yödzo izá’a!

¡Guli’cu’è yöl-la’ ba yúgu’tèli’,

² tu’ buxönè’ queèru’ yöl-la’ dxi’i ladxi’ queè’,
en zóatica’sö le naca idú ladxi’ queè’!

¡Yöl-la’ ba Lè’!

118

¹ ¡Guli’guié’ Xanru’: “Xclenu”, tu’ náquié’ dxi’a!

¡Zóatica’sö yöl-la’ dxi’i ladxi’ queè’!

² Ral-la’ ila’nná bönachi Israel:

“¡Zóatica’sö yöl-la’ dxi’i ladxi’ queè’!”

³ Ral-la’ ila’nná zxi’ini xi’sóè’ Aarón:

“¡Zóatica’sö yöl-la’ dxi’i ladxi’ queè’!”

⁴ Ral-la’ ila’nná nupa tadxi Xanru’ Dios:

“¡Zóatica’sö yöl-la’ dxi’i ladxi’ queè’!”

⁵ Cate’ gudí’i guzxáca’a bulidza’-nè’ Xanru’,

ate’ bubí’è didza’, en busölé’ neda’.

⁶ Zoè’ Xanru’ cuita’ neda’, ate’ bití’ bi gádxida’.

¿Bizxi caz gaca ilún bönachi quía’?

⁷ Zoè’ Xanru’ cuita’ neda’ ladaj nupa tácalen neda’.

Que lè ni na’ idéli’da’ láhuigaca nupa bití’ ta’lé’e neda’ dxi’a.

⁸ Nácarö dxi’a uzxöni ládxa’a-nè’ Xanru’,

en bití' uzxöni ládxa'a nu naca bönáchisö.

⁹ Nácáro dxi'a uzxöni ládxa'a-në' Xanru',
en bití' uzxöni ládxa'a nupa ta'nná bë'.

¹⁰ Bönachi yúgu'të yödzö izá'a gula'gú'u neda' lé'ajlö.
Len yöl-la' huáca queë' Xanru' buxicja' léguequi.

¹¹ Gula'gu'ë neda' lé'ajlö. Ön, gula'gu'ë neda' lé'ajlö,
pero len yöl-la' huáca queë' Xanru' buxicja' léguequi.

¹² Gula'gu'ë neda' lé'ajlö ca yugu' buzú' rön,
pero gula'nítië' ca tu lu guí' guixi' yötsi' bidx.
Len yöl-la' huáca queë' Xanru' buxicja' léguequi.

¹³ Bulu'dxíguë'ë neda' ga bidxintë guzóa tsöjtsö'a,
pero gúcalenë' Xanru' neda'.

¹⁴ Naca cazë' Xanru' yöl-la' huáca quia', en le rul-la'.
Naca cazë' yöl-la' rusölá quia'.

¹⁵ Lu yu'u lídxigaca nupa nácagaca tsahui'
ru'u bö que nupa ta'bódxí'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!

¹⁶ ¡Nayëpisëtë'rö në'ë ibëla Xanru'!

¡Runda' dxin në'ë ibëla Xanru'!

¹⁷ Bití' ca' gátia', pero soa' ibana',
ate' usiyönda' bönachi le nunë' Xanru'.

¹⁸ Xanru' bëndë'ë neda' xigua',
pero bití' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.

Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.
Ila'yazë' ni bönni' tsahui'.

²¹ ¡Guía' Li': "Xclenu'" Xan, tu' bubi'u didza' quia',
en tu' nacu' Nu rusölá neda'!

²² Zoa tu guió'j bulu'zóë' tsölá'alö bönni' tu'cu'ë zö'ö.
Na'a naca guió'j na' guió'j len squin zö'ö.

²³ Benë' Xanru' Dios ga naca caní.
Naca tu le run ga rubániru'.

²⁴ Dza ni naca dza nunë' Xanru' Dios.
Udzéjaru', en uzí'iru' xibé.

²⁵ Ráta'yutu' lo', Xan, usöló' netu'.
Ráta'yutu' lo', Xan, gunu' ga gaca dxi'a queëtu'.

²⁶ Bica' ba bönni' na' zë'ë uláz queë' Xanru'.
Guntu' Li' zxön lu yu'u lidxë' Xanru'.

²⁷ Dios náquië' Xanru', ate' bennë' queëru' bení'.

Buli'nödzej queë Dios yugu' bēdxi renni' uzégui'ru'-ba' lahuë' lu bucugu queë'.

28 Naca cazu' Li' Dios quia', ate guía' Li': "Xclenu'."
Naca cazu' Li' Dios quia', ate' guna' Li' zxön.

29 ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' rë'u

1 ¡Bica' ba nupa nácgaca idú dxi'a tsáhui'do',
nupa na' tun ca rnna xibá naguixjé' Xanru'!

2 ¡Bica' ba nupa tun ca nácgaca le benë' ba nalí,
en idú lādxi'gaca ta'zë ladxi' Lë'!

3 Biti' bi le cabí naca tsáhui' tun,
pero tun ca nácgaca le nulu'ë lahui.

4 Nuzú' queëtu' xibá quiu', Xan,
para idú lādxi'tu' guntu' ca ta'nná.

5 Raca lādxa'a gúntica'sa' ca ral-la' guna',
en guna' yugu' le gunná bē'u.

6 Ní'irö bití' ca' utuí'ida'
channö gapa chí'a yugu' le gunná bē'u.

7 Lu yöl-la' ba'a ladxi' quia' guía' Li': "Xclenu'"
cate' chinazi'a le buchí'a busöröu' le naca tsáhui'.

8 Guna' ca ta'nná le gunná bē'u.
Biti' usán no'o neda' tsaz.

Ral-la' gunru' ca gunné' Dios

9 ¿Nacxi gaca gunbí' tu bi'i bönni' ga ugá'ana tsáhui' lādxi'do'obi'?
Ral-la' gunbí' ca rnna xtídz'u.

10 Idú lādxa'a rizé lādxa'a Li', Xan.
Biti' gu'u lataj ucá'ana' yugu' le gunná bē'u.

11 Lu icja lādxi'da'ahua' runa' ca rnna xtídz'u,
para cabí guna' dul-la' lo' Li'.

12 ¡Bica' xibó', Xan!
Busedi neda' yugu' le gunná bē'u.

13 Len ruá' cuina' ru'a didza'
ca nácgaca yúgu'të le rusedi quézinu' netu'.

14 Rudzējada' ca nácgaca le nunu' ba nalí
ca nu rudzeja tu' dë yöl-la' tsáhui' que.

15 Sa' lādxa'a ca nácgaca xibá quiu'
en gü'i lādxa'a yugu' le nulú'u lahui.

16 Udzējada' ca nácgaca le gunná bē'u.
Biti' gal-la lādxa'a xtídz'u.

Rudzėjade'eru' runru' le rnna cazë' Dios

17 Ben ga gaca dxi'a quia' neda', huen dxin quiu', Xan,
para soa' ibana', en guna' ca rnna xtídz'u.

18 Gusalaj guió'j lahua' para gaca ilé'eda'
le tun ga rubánitu' nazúajgaca lu xibá naguixju' Li'.

19 Zoa' yödzölió ca tu bönni' ridasö.

Biti' ucachu'u yugu' xibá nunu' ga bití' gaca ilé'eda' léguequi.

²⁰ Yúgu'tè dza ruhuí'ini ládxa'a tu' rizé ládxa'a yugu' le nusédinu' netu' ca ral-la' guntu'.

²¹ Ruzenu' le bach nupa tun ba zxôn cuínguequi, en nupa nudxiágaca dö', nupa na' tu'zóa sólál'aló yugu' xibá gunná bē'u.

²² Biti' gu'u lataj nu guequi neda' zi' o nu ucá'ana neda' cá'asö, tu' runa' ca ta'nná le nunu' ba nalí.

²³ Sal-la' ta'bö' nupa ta'nná bē', en ta'nné quia', rizá' ládxa'a neda', huen dxin quiu', ca nácagaca le gunná bē'u.

²⁴ Raza ládxa'a yugu' le nunu' ba nalí.

Nácagaca le tu'zėjni'i neda'.

Idú ládxi'ru' gunru' ca gunná cazē' Dios

²⁵ Nadinni lu yu bö' naca caza'.

Busubán ládxa'a, ugunu' dxin xtídz'u.

²⁶ Buluí'ida' Li' yugu' le nuna', ate' bubi'u didza'.

Busedi neda' yugu' le gunná bē'u.

²⁷ Buzėjni'i neda' ca nácagaca xibá quiu', ate' sa' ládxa'a ca nácagaca le nunu', le tun ga rubánitu'.

²⁸ Ribödxi bö' naca caza' tu' risébida' ládxa'a.

Butipa ládxa'a, ugunu' dxin xtídz'u.

²⁹ Ben ga bití' guna' le cabí sa'yéaj, en buzá' ladxi' quia' xibá naguixju' Li'.

³⁰ Guröa' le naca idútè li para guna' ca rnna.

Nuzóa' lahua' yugu' le nusédinu' netu'.

³¹ Nazí' lu na'a yugu' le nunu' liná' lo.

Biti' gu'u lataj bi gun ga utuí'ida', Xan.

³² Guna' ca ta'nná xibá gunná bē'u, tu' rutipa cazu' ládxa'a.

Rě'ėniru' tsėjni'iru' xtídzě'ė Dios

³³ Busedi neda', Xan, ca ta'nná le gunná bē'u, ate' gun chí'a léguequi ga idxinrö dza udxi.

³⁴ Benna quia' yöl-la' réajni'i para gun chí'a xibá quiu', en para idú ládxa'a guna' ca ta'nná.

³⁵ Ben ga guna' ca ta'nná le gunná bē'u, tu' raza ládxa'a guna' ca ta'nná xibá na'.

³⁶ Ben ga güi'i ládxa'a yugu' le nunu' ba nalí, para cabí güi'i ládxa'a yöl-la' ruhuidí'.

³⁷ Buchi'a guiöj lahua' para cabí uyúa' le cabí nazaca'.

Butipa ládxa'a para guna' le uluí'inu' netu'.

³⁸ Ben tsutsu didza' bē'lenu' neda', huen dxin quiu', para gádxida' Li'.

³⁹ Bucuita ga zoa' nu rudidza' yudxi neda', lē na' rádxida' tu' nácagaca dxi'a tsahui' le nusédinu' netu' ca guntu'.

⁴⁰ Buyútsöca', rizé ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzě'ė Dios

⁴¹ Lu yöl-la' dxi'i ladxi' quiu' buyú neda', Xan, en busölá neda' ca rnna xtídz'u' u gunu'.

⁴² Ubi'a didza' bi guía' nu run ga rutuí'ida', innía':

“Ruzxöni ládxa'a xtídzu'u”, Xan.

43 Biti' ucuítu' tsaz didza' idútë li lu ru'a tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li' yúgu'të dza, en yúgu'të iz si' zaca.

45 Lu yöl-la' rusólá quiu' soa' ibana' tu' bë' ládxa'a guna' ca ta'nná bë' xibá quiu'.

46 Gu'a didza' que le nunu' ba nalí lógaquië' bönni' ta'nná bë'ë en biti' ca' utuí'ida'.

47 Tsaza ládxa'a yugu' xibá gunná bë'u, yugu' lë na' nadxí'ida'.

48 Guna' ca' ca ta'nná xibá nunu', lë na' së ládxa'a, en sa' ládxa'a ca nácagaca le gunná bë'u.

Zóatica'sö xtídzë'ë Dios

49 Yöjnë didza' na' bë'lenu' neda', huen dxin quiu', tu' benu' ga runa' löza le.

50 Didza' na' ruhué tsahui' neda' cate' riguí'i rizáca'a, tu' tu' subán ládxa'a didza' bë'u.

51 Tu' títjalë'e neda' nupa tun ba zxon cuínguequi, pero biti' ca' usana' xibá naguixju' Li'.

52 Röjneda' yugu' le busédinu' netu' dza ni'te, Xan, ate' lë na' ruhué tsahui' neda'.

53 Lu yöl-la' ridzá'a quia' rö'a böniga ni'a quégaca nupa tuá' dö', nupa na' tu' cá'ana xibá naguixju' Li'.

54 Rul-la' ca nácagaca le gunná bë'u.

Zoa' ni ca tu bönni' ridë' zi'tu'.

55 Chi' dzó'óló röjneda' Lo', Xan, en run chi'a xibá naguixju' Li'.

56 Nacuá'len neda' le ruzi'a xibé ate' runa' ca rnna yugu' xibá quiu'.

Raza ládxi'ru' xtídzë'ë Dios

57 Nacu' Li', Xan, le ruzi'a xibé.

Chigunnía' guna' ca rnna xtídzu'u.

58 Idú ládxa'a inábida' Li' sóalenu' neda'.

Buéchi' ladxi' neda' ca rnna xtídzu'u gunu'.

59 Guzá' ládxa'a ca nácagaca le runa',

ate' bubí'i ládxa'a para guna' ca rnna le nunu' liná' lo.

60 Bénda'a bayúdx, en biti' gudzedá'

para guna' ca rinná bë' xibá quiu'.

61 Bönachi zían bönachi tuá' dö' gula'gú'u neda' lë'ajlô,

pero biti' gul-la ládxa'a xibá naguixju' Li'.

62 Gulahuéla riyasa', en rigú'a Li' yöl-la' ba tu' nácagaca tsahui' yugu' le nusédinu' netu'.

63 Runa' tsözxön nupa tadxi Li',

enca' nupa tun ca rnna xibá quiu'.

64 Ridxín idútë yödzölió yöl-la' dxi'i ladxi' quiu', Xan.

Busedi neda' yugu' le gunná bë'u.

Naca le saca' le gunná cazë' Dios

65 Benu' quia' neda', huen dxin quiu', le naca dxi'a, ca rnna xtídzu'u gunu', Xan.

66 Busedi neda' yöl-la' réajni'i idú, en yöl-la' raca yenni',
tu' réajlé'a yugu' xibá gunná bë'u.

67 Zí'alò cate' buzötju' neda' gudá' nanitia',
pero na'a runa' ca rnna xtídz'u.

68 Idú dxi'a tsahui' nacu', en runu' le naca dxi'a.
Busedi neda' yugu' le gunná bë'u.

69 Nupa tun ba zxön cuínguequi ta'zì' yë' ca naca quia',
pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi,
pero raza ládxa'a neda' xibá naguixju' Li'.

71 Naca dxi'a buzötju' neda'
para bizédida' yugu' le gunná bë'u.

72 Nácagacarö dxi'a quia' xibá rinná bë'u
ca nácagaca gayuá' gayuá'sö dumí oro, en plata.

Naca tsahui' le gunná cazë' Dios

73 Len no'o benu' neda', en buzú' neda'.
Buzéajni'i neda' para gúnbë'a xibá gunná bë'u.

74 Nupa tadxi Li' ila'lé'e neda', en ulu'dzeja ládxi'guequi,
tu' runa' löza xtídz'u.

75 Nözda' naca tsahui' ca ruchi'a rusöröu' quia' neda', Xan,
ate' lu yöl-la' li ladxi' quiu' busaca' zi'u neda'.

76 Na'a, lu yöl-la' dxi'i ladxi' quiu' buë tsahui' neda',
ca rnna didza' chibë'lenu' neda', huen dxin quiu'.

77 Gudá duhuechi' ládxi'u neda' para soa' ibana',
tu' raza ládxa'a xibá naguixju' Li'.

78 Ben ga ulu'tuí'i nupa tun ba zxön cuínguequi,
tu' gula'nnë quia', en biti' bi bena' quéquequi,
pero neda' sa' ládxa'a ca naca xibá quiu'.

79 Ral-la' udxín quia' nupa tadxi Li',
nupa na' núnbë'gaca le nunu' ba nalí.

80 Ben ga udxín ca rnna le gunná bë'u,
para cabí utuí'ida'.

Runë' Dios ca rnna xtídzë'ë

81 Rudú ládxa'a tu' riböza' yöl-la' rusölá quiu',
pero runa' löza xtídz'u.

82 Chirequi ichul-la lahua' tu' rizëda' ládxa'a xtídz'u,
rnnía': "¿Bátaxi huë tsau'u neda'?"

83 Caní raca tu' naxú'unida' ca tu buzudi guídi nal-la' lahui guí',
pero catu caz gal-la ládxa'a yugu' le gunná bë'u.

84 ¿Bál-laxi dza soa' ibana' neda', huen dxin quiu'?'
¿Bátaxi usiúdxu' nupa ta'bía no neda'?"

85 Nupa tun ba zxön cuínguequi gula'chö'öna tu yeru ga tsöjbixa',
nupa na' biti' tun ca rnna xibá naguixju' Li'.

86 Idütë li nácagaca yúgu'të xibá gunná bë'u.
Lu yöl-la' rizí' yë' quéquequi ta'bía no neda'.

¡Gúcalen neda'!

87 Gula'zóa ulu'sunítie' neda' lu yödzölió ni,
pero biti' busán na'a xibá quiu'.

88 Lu yöl-la' dxi'i ladxi' quiu' busubán ládxa'a,
para gapa chi'a le nunu' ba nalí len ruá' cuinu'.

Réajlë'ëru' xtídzë'ë Xanru'

89 Rulidza' Li', Xan.

Tsaz naguixju' xtídzu'u yehua' yubá.

90 Gunu' ca rnna xtídzu'u quégaca bônachi na'a dza, en yúgu'të dza si' zaca. Gudixaj cazu' yödölió, ate' idía'tica'sö.

91 Ni'a que le gunná bë'u nacuá' caz yúgu'të ga ridxintë na'a dza, tu' tun xichinu' yúgu'të lë na'.

92 La'tu' cabí raza ládxa'a xibá naguixju' Li', chigunítia' lu le busaca' zi' neda'.

93 Catu caz gal-la ládxa'a yugu' xibá quiu', tu' busubanu' ládxa'a ni'a quéguequi.

94 Néquida' quiu'.

¡Busölá neda', tu' ruí'i ládxa'a xibá quiu'!

95 Nupa tuá' dö' ta'bö' nisi neda' para ulu'suniti neda', pero neda' güi'i ládxa'a le nunu' ba nalí.

96 Chibilé'eda' ruúdxí que yúgu'të le naca idütë yödölió ni, pero catu caz udxi que le gunná bë'u guntu'.

Nadxí'iru' xtídzë'ë Xanru'

97 Nadxí'ide'eda' xibá naguixju' Li'.

Idú dza rizá' ládxa'a ca naca que.

98 Réajni'iröda' ca nupa ta'dá'baga' neda' tu' ruí'i ládxa'a yugu' le gunná bë'u, en tu' dá'tica'sa' léguequi.

99 Réquibe'eröda' ca yúgu'të nupa tu'sedi neda', tu' rizá' ládxa'a le nunu' ba nalí.

100 Réajni'iröda' ca yugu' bönni' gula, tu' rapa chi'a xibá quiu'.

101 Gudapa chi'i cuína' para cabí guna' le cabí naca tsahui', en para guna' ca rnna xtídzu'u.

102 Biti' ca' nucá'ana' yugu' le nusédinu' netu', le nusedi quézinu' neda'.

103 Bica' zxixi nácgaca xtídzu'u.

Ön, nácgacarö zxixi ca le zxixi que buz.

104 Tu'zéajni'i xibá quiu' neda'.

Que lë ni na' réquida' zi' yúgu'të le cabí naca.

Xtídzë'ë Dios ruzení' lu icja ládximo'oru'

105 Ca tu bení' naca xtídzu'u ga ridá', en le ruzení' nöza ga ral-la' tóda'.

106 Guzxí' lu na'a bi guna', en nuna' tsutsu xtídza'a. Gapa chi'a le nusédinu' netu' le naca tsahui'.

107 Zoa le rusaca' zi' neda'. Busubán ládxa'a, Xan, ugunu' dxin xtídzu'u.

108 Guzxí' yöl-la' ba rigu'a Li' len ru'a, Xan, en buzéajni'i neda' yugu' le nusédinu' netu'.

109 Zóatica'sö bönadxi gátia', pero biti' ral-la ládxa'a xibá naguixju' Li'.

110 Nupa tuá' dö' bulu'zé tu du yalaj le sön neda', pero biti' bucá'ana' xibá quiu'.

111 Tsaz nazí' lu na'a le nunu' ba nalí, ate' run ga rudzeja ládxa'a.

112 Ruí'i ládxa'a gúntica'sa' ca ta'nná le gunná bē'u.
Guna' caní ga idxintē dza udxi.

Nagá'anaru' dxi'a ni'a que xtídzē'ē Dios

113 Réquida' zi' nupa nácagaca chopá ladxi',
pero nadxí'ida' xibá naguixju' Li'.

114 Nacu' ca tu ga rucachi' cuina', en le run chi'i neda'.

Runa' löza xtídzu'u.

115 Gulí'cuíta ga zoa', libí'ili' ruá'ali' dö',
tu' guna' ca ta'nná le gunná bē'ē Xana' Dios.

116 Buzóa neda' tsutsu, ugunu' dxin xtídzu'u, ate' soa' ibana'.

Biti' gu'u lataj utuí'ida' ca naca le runa' löza.

117 Buzóa neda' tsutsu, ate' ulá',
en güí'tica'sa' ládxa'a le gunná bē'u.

118 Nusán no'o yúgu'tē nupa nusángaca le gunná bē'u,
tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bēbu.

Que lê ni na' nadxí'ida' le nunu' ba nalí.

120 Rixxizi idútē le nayá' nabana' tu' rádxida' Li',
en rádxida' le gaca cate' usiúdxu' bönachi.

Ral-la' gunru' ca rnna xtídzē'ē Dios

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bē' gaca dxi'a quia'.

Biti' gu'u lataj ulu'saca' zi' neda' nupa tun ba zxon' cuínguequi.

123 Richí'guiój lahua' tu' riböza' yöl-la' rusólá quiu',
enca' didza' tsahui' quiu'.

124 Lu yöl-la' dxi'i ladxi' quiu' ben quia' neda', huen dxin quiu',
ca rē'ēni quézinu' gunu'.

Busedi neda' yugu' le gunná bē'u.

125 Naca' huen dxin quiu'.

Benna quia' yöl-la' réajni'i para gaca gúnbē'a le nunu' ba nalí.

126 Chibídxín dza bi gunu', Xan,

tu' gula'guítsjē' xibá naguixju' Li'.

127 Que lê ni na' nadxí'iröda' xibá naguixju' Li' ca nadxí'ida' oro.

¡Ön, ca oro banéquiní,

128 en réquida' nácagacarö dxi'a xibá quiu' ca yúgu'tē le dē!

Biti' rilé'eda' dxi'a yúgu'tē le cabí naca.

Raca ládxi'ru' gunru' ca rnna xtídzē'ē Dios

129 Run ga rubánida' le nunu' ba nalí.

Que lê ni na' bö' naca caza' nazí' lu nē'e le.

130 Cate' nalá' lahui' xtídzu'u, ruzení' queétu'.

Run ga ta'yéajni'i nupa nácagaca nōxaj ladxi'.

131 Gusalja' ru'a, en gunné ládxa'a,

tu' guzē ládxa'a xibá gunná bē'u.

132 Buyú neda', en buzá' ladxi' quia',

ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',

para gaca guna' ca naca xibá quiu'.

135 Ben ga gaca bē' nazí' lu no'o neda', huen dxin quiu',
en busedi neda' yugu' le gunná bē'u.

136 Raca nisa ribōdxi guiōj lahua' ca tu yegu gubó'o,
tu' cabí tun bōnachi ca rinná bē' xibá quiu'.

Idutē li naca le rnna cazē' Xanru'

137 Nacu' Li' tsahui', Xan.

Dxi'a tsahui' naca le ruchi'a rusōrōu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' ribōza' le naca quiu' run ga régui rilá ládxi'da'ahua',
ate' gulal-la ladxi' xtídz'u nupa ta'dá'baga' neda'.

140 Idú dxi'a tsahui' naca xtídz'u.

Que lē ni na' neda', huen dxin quiu', nadxí'ida' le.

141 Nōxaj ladxi' naca', ate' tu' cá'ana bōnachi neda' cá'asö,
pero bití' ral-la ládxa'a le gunná bē'u.

142 Zóatica'sö le naca tsahui' quiu',
en idútē li naca xibá naguixju' Li'.

143 Ba bidxín le raca quia', en le rusaca' zi' neda',
pero raza ládxa'a xibá gunná bē'u.

144 Nácatíca'sö tsahui' le nunu' ba nalí.

Buzéajni'i neda' para soa' ibana'.

Ral-la' ulaba ládxi'ru' le gunná cazē' Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bē'u.

146 Rulídzatica'sa' Li'.

Busölá neda', ate' guna' ca naca le nunu' ba nalí.

147 Riyasa' zí'aló ca ritō yu zila, en rulidza' Li' para gácalenu' neda'.

Ribōza' yugu' didza' gu'u.

148 Chi'i dzō'ölö rubéaja' yēla guiōj lahua',
para ulaba ládxa'a ca naca xtídz'u.

149 Lu yöl-la' dxi'i ladxi' quiu' buzē nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dō' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idútē li naca le gunná bē'u.

152 Dza ni'te quez núnbē'a le nunu' ba nalí,

en nōzda' tsaz nuzú' le.

Le gunná cazē' Dios run rē'u tsahui'

153 Buyú le rusaca' zi' neda', en busölá neda',

tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídz'u.

155 Zí'tu' zoa yöl-la' rusölá ga naca' nupa tuá' dō',

tu' cabí tuí'i ládxi'gaca le gunná bē'u.

156 Zxōntērō naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziāngaca nupa ta'bía no neda', en ta'dá'baga' neda',

pero bití' nucá'ana' le nunu' ba nalí.

158 Biti' rilé'eda' dxi'a nupa nucá'anagaca Li',
en biti' tun ca rnna xtídz'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútë li nácagaca yúgu'të xtídz'u,

en tsaz nacuá' yúgu'të le nusédinu' netu' le nácagaca tsahui'.

Ral-la' udödi cuinru' lu në'ë Dios

161 Ta'bía no neda' nupa ta'nná bë', en biti' bi bena' quéguequi,
pero runa' bal xtídz'u lu icja ládxi'da'ahua'.

162 Rudzéjalenda' xtídz'u,

ca rudzeja nu rudzöli tu yöl-la' tsahui' zxön.

163 Réquida' zi', en biti' rilé'eda' dxi'a le cabí nácaté,

pero nadxí'ida' xibá naguixju' Li'.

164 Gadxi luzuí tu dza rigu'a Li' yöl-la' ba,

ni'a que le nusédinu' netu', le naca tsahui'.

165 Ta'böza dxi'a tsáhu'i'do' nupa nadxí'igaca xibá naguixju' Li',
en biti' bi run ga röjchégu'gaca.

166 Runa' löza yöl-la' rusölá quiu', Xan,

en runa' ca rnna xibá nunu'.

167 Yugu' le nunu' ba nalí tun chi'i bö' naca caza',

ate' nadxí'ide'eda' léguequi.

168 Runa' ca ta'nná xibá quiu', en yugu' le nunu' ba nalí

tu' rilé'e quézinu' yúgu'të le runa'.

Rudzéjalenru' xtídzë'ë Dios

169 Ruzé nagu' le rulidza' Li', Xan.

Ruzéajni'i neda' ca rnna xtídz'u.

170 Ruzé nagu' le rinábida' Li',

en busölá neda' ca rnna xtídz'u gunu'.

171 Bë' neda' lataj cu'a Li' yöl-la' ba,

tu' rusédinu' neda' le gunná bë'u.

172 Bë' lataj gul-la lúdxa'a ca naca xtídz'u,

tu' nácagaca tsahui' yúgu'të xibá nunu'.

173 Guzóatë gácalenu' neda',

tu' naböa' xibá quiu'.

174 Rizé ládxa'a yöl-la' rusölá quiu', Xan,

en raza ládxa'a xibá naguixju' Li'.

175 Bë' lataj soa ibán bö' naca caza' para cu'a Li' yöl-la' ba,

en ben ga gácalen neda' le nusédinu' netu'.

176 Ridöda' tsölá'alö ca tuba' bö'cu' zxila' nanítiba'.

Gudá dudilju' neda', huen dxin quiu', tu' cabí ral-la ládxa'a xibá nunu'.

120

1 Cate' gudí'i guxzáca'a bulidza'-në' Xanru',

ate' Lë' bubí'ë didza'.

2 Busölá bö' naca caza', Xan, lu na' nu rizí' yë',

en lu na' nu biti' run ca gunná caz.

3 ¿Bizxi gunë' quiu' Dios, en bizxi ubi'ë quiu', li' na' rizí' yë'u?

4 Ichizë' li' yugu' yaga lahui tuchi' que nu reaj gudil-la,

en cu'ë icju' bo' yalaj que ya' yörído'.

5 Bica' bayechi' neda' tu' zóasa' yödzö Mesec,

en zoa' tu lu yu'u guídi quégaca bönachi Cedar.
 6 Xidzélè'ë chiguzóa bö' naca caza'
 len nupa tu'suniti yöl-la' riböza dxi'a tsáhui'do'.
 7 Ré'ënda' cöza' dxi'a tsáhui'do', pero cate' ruá'a didza'
 té'ënné' ila'díl-lalen neda'.

121

1 Uchisa icja' uyúa' le raca yugu' lu guí'a.
 ¿Gazxi za' le gácalen neda'?
 2 Le gácalen neda' za' lu në'ë Xanru'.
 Lè' benè' lúxiba, en luyú.
 3 Biti' gu'ë lataj cuilu' ga ridó'.
 Biti' ca' gasi Nu na' run chi'i li'.
 4 Buyútsöca', bití' ridódi yëla guiöj lahuë',
 en bití' rásie', Lè' na' rapa chi'ë bönachi Israel.
 5 Run chi'ë Xanru' Dios lí'.
 Zoë' Xanru' Dios cuitu' ibëla, rigu'ë li' zxul-la.
 6 Biti' uzegui' gubidza li' lahui' dza,
 en bití' bi gun beo' quiu' chi'i dzó'ölö.
 7 Gun chi'ë Xanru' Dios lí' ga rizó'o, en ga rudxinu',
 dza ni zóaru' na'a, en yugu' dza si' zaca.
 8 Xanru' Dios gun chi'ë lí' ga rizó'o, en ga rudxinu',
 dza ni zóaru' na'a, en yugu' dza si' zaca.

122

1 Budzėjada' cate' gulë bönachi neda', gula'nná:
 "Uyeajru' yu'u lidxë' Xanru' Dios."
 2 Na'a zuíru' ni
 ga nu riyaza yödzö Jerusalén.
 3 Dxi'ado' gulunë' yödzö Jerusalén,
 ate' naca lachi, en tuz ca röjlözgaca yu'u xön que.
 4 Ta'yaza yugu' cö' bönachi queë' Xanru' ga ni
 ca na' nusédinë' Dios bönachi Israel,
 para ila'gú'u yöl-la' ba Xanru' Dios.
 5 Ta'bö' nupa tu'chi'a tu'sörö queëru' ga ni,
 ga ta'bö' ta'nná bë' xzí'ini xi'sóë' David.
 6 Guli'nábinë' Dios gunë' ga gaca dxi'a que Jerusalén,
 en ga ulu'zí' xibé nupa ta'dxi'i yödzö ni yöl-la' tsahui'.
 7 Dios gunë' ga ila'böza dxi'a tsáhui'do' nupa nacuá' yödzö ni,
 en ga ulu'zí' xibé nupa ta'nná bë' yöl-la' tsahui'.
 8 Tu' nadxí'ida' yugu' böcha'a, en yugu' böchi' luzá'a,
 rnnía': "Gaca yöl-la' riböza dxi ladxi' lu yödzö ni."
 9 Tu' nadxí'ida' lidxë' Xanru' Dios,
 rinábida'-në' gunë' ga gaca dxi'a que yödzö ni.

123

1 Uchisa lahua' uyúa' ga zu' Lí',
 rö'u rinná bë'u yehua' yubá ni'.
 2 Ca runë' bönni' nadó'o, ruyúë' bi ulu'ë xanë',
 ate' ruyubi' bi'i nigula nadó'o bi ulú'unu nigula xanbi',
 lësca' caní ruyuru' rë'u bi ulu'ë Xanru' Dios,

ga idxinrö dza uzá' láchxé'ë queëru'.

³ Buzá' ladxi' queëtu', Xan. Buzá' ladxi' queëtu',
tu' nacuá' nupa tu' cá'ana netu' cá'asö.

⁴ Rudú láchxi'tu' tu' tu'titaj netu' nupa tu'z'í' xibé yúgu'tè le dë,
en tu' tu' cá'ana netu' cá'asö nupa tun ba zxön cuínguequi.

124

¹ "La'tu' cabí gúcalenë' Xanru' rë'u",

ral-la' ila'nná bönachi Israel:

² "La'tu' cabí gúcalenë' Xanru' rë'u

cate' nupa biti' ta'lé'e rë'u dxi'a gula'díl-lalen rë'u,

³ la' gulútitë rë'u

tu' gula'léde'e rë'u.

⁴ Guca queëru' ca la' usubága'tè rë'u nisa,
en la' uchícjatëru' lu nisa na'.

⁵ La' uchícjatëru' tu lu nisa zila."

⁶ ¡Bica' lá'ayi Xanru' Dios

tu' cabí bi'ë lataj nupa biti' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.

Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.

Lë' benë' lúzxiba, en lu yu.

125

¹ Nupa tu'zxöni láchxi'gaca Xanru' Dios nácgaca ca guí'a Sión,
tu' cabí bi gaca utá guí'a na', pero tsaz zoa caz.

² Ca rő'gaca guí'a idú gásibi'ilö yödzo Jerusalén,
la' canísö zoë' Xanru' Dios idú gásibi'ilö bönachi queë',
na'a dza, en yúgu'tè dza si' zaca.

³ Biti' ral-la' ila'nná bë' nupa tuá' dö' lu xiyúgaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa nácgaca dxi'a,
en quégaca nupa idú láchxi'gaca tun ca rnna xtídzu'u.

⁵ Nupa tu'dödi cuínguequi lu le cabí nácatë,
ben léguequi xiguia' tsözxön len nupa tuá' dö'.
Ben ga ila'cuá' bönachi Israel dxi'a tsahui'do'.

126

¹ Cate' Xanru' Dios buchë'ë bönachi yödzo Sión
nupa gula'dzún zi'tu', gúquiru' yélasö rineru'.

² Ní'irö idú láchxi'ru' buzxidxi'ru',
en lu yöl-la' rudzeja queëru' gurödx'aru'.

Ní'irö guluf'i didza' bönachi yugu' yödzo izá'a, gula'nná:
"Dios, Xángaquië', benë' le nácgaca zxön, gúcalenë' légaquië'."

³ Xanru' Dios benë' le nácgaca zxön, gúcalenë' rë'u,
ate' ruzi'iru' xibë'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bödxi'a cate' ila'lapa

nupa lu yöl-la' ribödxí queguequi röjözagaca.

⁶ Nu bönni' lu yöl-la' ribödxí rizé'ë, nu'ë bínnedo' röjözé',
lu yöl-la' rudzeja cödxí'ë cate' udxiné', nu'ë le nulapé'.

127

¹ Channö cabí runé' tsutsu Xanru' Dios tu yu'u,
nítisö tuné' dxin bönni' tuné' yu'u na'.

Channö cabí run chí'ë Xanru' Dios tu yödzö,
nítisö ruyúé' bönni' na' yu'u lu në'ë yödzö na'.

² Nítisö naca rubanu' zílado', en röjöxu' cate' chigúl-lada',
en ragu' le guzxi'u ni'a que le busaca' zi' cuinu',
tu' runné' Xanru' Dios que nu nadxí'iné' cate' ni' rasi nu na'.

³ Buli'yú, nácacagabi' zxi'iniru' le runné' Xanru' Dios queëru',
ate' bí'ido' tu'cuá'anu nigula queëru'
nácacagabi' le rubi'ë Xanru' Dios queëru'.

⁴ Ca nácacagaca yaga lahui' tuchi' lu na' nu bönni' rejé' gudil-la
nácacagabi' zxi'iné' bönni' zoé' iz cuidi' queé'.

⁵ Bica' ba bönni' nacuá'abi' queé' zióntëröbi'.

Biti' ca' utuí'iné' cate' ru'ë didza' láhui'gaquié'
bönni' tu'chi'a tu'söröé' queé', en lógaca nupa ta'díl-lalen lé'.

128

¹ Bica' ba yúgu'té nupa tadxi Xanru' Dios,
nupa na' tun ca ré'ëni quéziné' Lé'.

² Cate' gagu' le gata' quiu' ni'a que dxin nun cazu',
uzi'u xibé lé na', en gaca dxi'a quiu'.

³ Gácanu nigula quiu' ca tu lubá uva dxía ga naca lö'a lidxu',
ate' ilácabi' zxi'inu' ca yugu' yaga olívodo' ta'bö'öbi' ga ni' ráguli'.

⁴ Buli'yútsöca, caní gáquié' bica' ba
bönni' na' rádxiné' Xanru' Dios.

⁵ Xanru' Dios zoé' Sión guné' ga gaca dxi'a quiu',
en gu'ë li' lataj ilé'enu' le dxi'a gaca que yödzö Jerusalén
yúgu'té dza su' ibanu'.

⁶ Dios gu'ë li' lataj ilé'enu' yugu' zxi'ini xi'sú',
en guné' ga ila'böza dxi'a tsáhui'do' bönachi Israel.

129

¹ "Zian luzuí gula'bía no netu' ga gudela' nácatu' ra'bando",
huáca ila'nná bönachi Israel:

² "Zian luzuí gula'bía no netu' ga gudela' nácatu' ra'bando',
pero biti' gula'deli' ulu'xicja netu'.

³ Guca tsca bulu'gá'ana-ba' bédxi lu bëla' cúdzu'tu',
en gulún tunna ga gudödi xiyágaba' bédxi quégaquié'."

⁴ Tsahui' náquié' Xanru' Dios.

Chinachúgué' du quégaca nupa tuá' dö' le gulúgui'ni netu'.

⁵ Ben ga ulu'tuí'i, en ulu'huécja guz cúdzu'lö
yúgu'té nupa biti' ta'lé'e dxi'a netu', bönachi Sión.

⁶ Ben ga ilácagaca ca guíxi'do' da' ícjo'olö yu'u,
le ribídxité cate' ni' naca hué'ënido'.

⁷ Biti' gaca uli në'e nu tsöjchugu le,

en biti' gaca nu gachi tsölén guizxi que,
 8 en biti' ta'nná nupa ta'dódi ni':
 "Rinábitu'-nē' Xanru' Dios gunē' ga gaca dxi'a quiu'.
 Lu Lē' Xanru' rinábitu' Lē' gunē' ga gaca dxi'a quiu'."

130

1 Ga ni nótjada' rulidza' Li', Xan.
 2 Ruzě nagu' chi'a, Xana' Dios.
 Ruzěda' nagu' le rinábida' Li'.
 3 La' nnaru' tsójnenu' xiguia' nabága'gaca bönachi,
 ¿nuzxi caz urúaj tsahui' lo', Xan?
 4 Runiti lo cazu' netu', Xan,
 para guntu' Li' bal.
 5 Runa' löza Li', Xana' Dios. Run löza bö' naca caza' Li',
 ate' runa' löza gaca ca rnna xtídz'u.
 6 Bö' naca caza' runrö löza Li', Xan,
 ca tunē' bönni' tapa chi'ē yódzö chi'i dzö'ölö ta'bözē' itö yu zila,
 ca tunē' löza itö yu zila yugu' bönni' na'.
 7 Guli'gún löza Xanru' Dios, libí'ili', bönachi Israel,
 tu' náquiē' dxi'i ladxi' Xanru',
 en ruhuá'uē' bönachi Israel.
 8 Xanru' Dios huóá'uē' bönachi Israel
 lu yúgu'tē xiguia' nabága'gaca.

131

1 Biti' run ba zxön cuina', Xan, en biti' rigú'u cuina' yöl-la' ba,
 en biti' ulapa' na'a le nácgaca zxön, en le nácgaca böniga.
 2 Idú ládxa'a nuzóa cuina' nōxaj, en zoa' dxisö.
 Ca runbi' bi'i huē'ēni ruzí ládxi'bi' cuítanu xiná'abi',
 ca' riböza bö' naca caza' lu icja ládxi'da'ahua'.
 3 ¡Libí'ili', bönachi Israel, guli'gunē' löza Xanru' Dios
 ga naguela' na'a dza, en yúgu'tē dza si' zaca!

132

1 Rinábida' Li', Xan, uláz queē' David tsójnenu'
 yúgu'tē le gudí'i guzxáque'ē,
 2 en ca benē' tsutsu xtídzē'ē, Xan, en guzxi' lu nē'ē bi gunē' lo',
 nacu' Nu nál-latērö láhuigaquiē' xzí'ini xi'sóē' Jacob, gunnē':
 3 "Biti' ca' tsu'a lidxa',
 en biti' gáta'a le ráti'da',
 4 en biti' gu'a lataj tōdi yēla guiój lahua',
 en biti' utsudi' lahua',
 5 ga idxinrö dza ucōza' tu lataj ga soē' Xanru' Dios,
 le gaca yu'u lidxi Nu na' nál-latērö láhuigaquiē' xzí'ini xi'sóē' Jacob."
 6 Biyönitu' didza' que guí'ina lá'ayi queē' Dios cate' ni' zóatu' Efrata,
 ate' budzölitu' le lu xiyúē' Jaar.
 7 Uyéajru' ga na' zoa cazē' Xanru' Dios.
 Tseaj ládxi'ru'-nē' ga naca xilibi ni'ē.
 8 Gudödi, Xan, ga na' soa cazu' Li'.
 Gudá tsözxön len guí'ina lá'ayi que yöl-la' zxön quiu'.

9 Ben ga sóalen le naca tsahui' yugu' bixúz quiu'
ca tu lari' ta'xóë' cúdzu'gaquië'.
Ben ga ilúl-la bönachi quiu' lu yöl-la' rudzeja quéguequi.

10 Uláz queë' David, huen dxin quiu', rinábida' Li'
cabí ucá'anu' bönni' na' gurö cazu' Li'.

11 Xanru' Dios benë' tsutsu xtídzë'ë bi gunë' queë' David,
le naca idütë li, ate' Lë' biti' unítie' xtídzë'ë na', gunnë':
"Uzóa' tuë' xzí'ini xi'sú' xilatju' ga inná bë'ëbi'.

12 Channö ilunbi' xzí'ini xi'sú' ca rna didza' dzaga quia',
en le nuna' ba nalí para uzéajni'ida' légacabi',
ila'nná bë'ëbi' ga rō'u rinná bë'u yúgu'të dza si' zaca."

13 Xanru' Dios nabö cazë' queë' yödzö Sión.
Raca lácxë'ë gaca Sión ga soa cazë' Lë'.

14 Rnnë': "Nácatica'sö lataj ni ga soa caza' neda'.
Soa' ni tu' raca lácxa'a soa' ni.

15 Guna' ga gátada' le ilágugaca bönachi ni,
en guna' ga ulu'huölaj ila'dzë'e yöta xtila
nupa ta'yadzaj ta'yudxi lu yödzö ni.

16 Guna' ga sóalen yöl-la' rusölá yugu' bixúz quia'
ca tu lari' ila'xóa cúdzu'gaquië',
ate' ilúl-la bönachi quia' lu yöl-la' rudzeja quéguequi.

17 Guna' ni ga ilá' lahui yöl-la' unná bë' queë' David.
Guna' ga sóatica'sö nu inná bë' xilatjë' bönni' na' nabö caza'.

18 Guna' ga sóalen nupa biti' ta'lé'e lë' dxi'a yöl-la' rutuí'i
ca tu lari' ilácuguequi, pero tsëpi yösa bení' le dxía icjë'."

133

1 Buli'yútsöca': ¡Bica' dxi'a tsahui' naca
cate' nupa nácagaca böchi' luzë'e
ta'böza lu yöl-la' tuz quéguequi!

2 Naca ca le za ta'gú'u ícjaguequi bönachi,
le ridzún lu guitsa' láhuiguequi,
en bidzún lu guitsa' lúzxuë' Aarón,
le bidzún ga ridxintë lu yení zxë'.

3 Naca ca buzén le ridinni lu guí'a Hermón,
en ca le ribö'a lu guí'a Sión,
tu' gunná bë'ë Xanru' gaca dxi'a queëru' lu guí'a na',
en gata' yöl-la' na'bán idú queëru'.

134

1 ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',
yúgu'tëli' na' zóali' yu'u lidxë' Xanru' chi'i dzö'öló!

2 ¡Guli'chisa ná'ali' ga zóali' lataj lá'ayi queë',
en guli'nná dxi'a queë'!

3 Xanru' Dios, zoa cazë' yödzö Sión, gunë' ga gaca dxi'a queëli'.
Naca cazë' Nu ben yehua' yubá, en yödzölió ni.

135

¹ ¡Guli'cu'ë yöl-la' ba Xanru' Dios!

¡Guli'cú'u yöl-la' ba La la'ayi queë' Xanru' Dios!

¡Guli'cu'ë yöl-la' ba, libí'ili' runli' xichinë' Xanru',

² libí'ili' na' zulí' yu'u lidxë' Xanru',

ga na' zóali' lö'a que yu'u lidxë' Dios queëru'!

³ ¡Guli'cu'ë yöl-la' ba Xanru' Dios tu' náquië' dxi'a!

¡Guli'gul-la yöl-la' ba que La la'ayi queë', tu' naca lachi!

⁴ Nabö cazë' Xanru' xzí'ini xi'sóë' Jacob para ilaca quez queë'.

Guröë' bönachi Israel para ilequi queë'.

⁵ Nözda' nayëpisë' Xanru' Dios.

Nayëpisëtërë' ca yugu' dios quégaca bönachi izá'a.

⁶ Run cazë' Xanru' ca riyaza ladxi' cazë' yehua' yubá ni',

en luyú ni, en lu nísado', en xzan lu yu.

⁷ Runë' ga rö' böaj gáti'tës luyú ni,

en runë' ga rëpi yösa cate' ralaj guiöj.

Rubéajë' bö' recja ga rapa chi'ë le nequi queë'.

⁸ Bëtië' yugu' bi'i bönni' zí'alö quégaca bönachi Egipto,

xzí'inigaca bönachi, en böa' huë'énido' quégacaba' böa' guixi'.

⁹ Benë' yugu' yöl-la' huáca zxön le gulaca bé' luyú Egipto,

yugu' lé na' gulaca queë' Faraón, en quégaca huen xichinë'.

¹⁰ Busunítië' Dios bönachi zían yödzö izá'a,

en bëtië' bönni' lo ta'nná bë'ë.

¹¹ Bëtië' Sehón, bönni' gunná bé'enë' bönachi Amorreo,

en Og, bönni' gunná bé'enë' bönachi Basán,

en bönni' gula'nná bé'enë' bönachi yödzö nacuá' luyú Canaán.

¹² Budödë' xiyúgaquië' bönni' na'

lu ná'agaquië' bönni' Israel, bönachi queë' cazë'.

¹³ Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

¹⁴ tu' uchi'a usöröu' bönachi queu', Xantu' Dios,

en huéchi' ládxu'u nupa tun xichinu'.

¹⁵ Budó' quégaca bönachi yugu' yödzö izá'a néquiniguequi plata, en oro, yugu' le núngaca lu ni'a lu ná'agaca bönachi.

¹⁶ Zóagaca ru'iguequi, pero biti' bi didza' tuí'i.

Zóagaca guiöj lóguequi, pero biti' bi ta'lé'e.

¹⁷ Zóagaca náagaca, pero biti' bi ta'yöni,

en biti' ta'guela' bö' ru'igaca.

¹⁸ Nupa tun léguequi ilaca ca náagaca budó' na',

en caní ilaca yúgu'të nupa tu'zxöni ladxi' léguequi.

¹⁹ Libí'ili', bönachi Israel, guli'guié' Xanru' náquië' dxi'a.

Libí'ili', xzí'ini xi'sóë' Aarón, guli'guié' Xanru' náquië' dxi'a.

²⁰ Libí'ili', xzí'ini xi'sóë' Leví, guli'guié' Xanru' náquië' dxi'a.

Libí'ili', núlöli' rádxili'-në' Xanru', guli'guié' Xanru' náquië' dxi'a.

²¹ Núlöli' zóali' yödzö Sión ral-la' guiëli'-në' Xanru' náquië' dxi'a, tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

136

- 1 ¡Xclenë' Xanru' Dios tu' náquië' dxi'a!
Zóatica'sö yöl-la' dxi'i ladxi' queë'.
- 2 ¡Xclenë' Dios nayépisëtêrë' ca yugu' dios ízá'a!
Zóatica'sö yöl-la' dxi'i ladxi' queë'.
- 3 ¡Xclenë' Xanru', nayépisëtêrë' ca yugu' xángaca bönachi!
Zóatica'sö yöl-la' dxi'i ladxi' queë'.
- 4 ¡Xclenë' Dios, tuzë' Lë' runë' yugu' yöl-la' huáca zxön!
Zóatica'sö yöl-la' dxi'i ladxi' queë'.
- 5 ¡Xclenë' Dios, len yöl-la' rácada' queë' benë' lúzxiba!
Zóatica'sö yöl-la' dxi'i ladxi' queë'.
- 6 ¡Xclenë' Dios, gudixjë' luyú láhuilö nísado'!
Zóatica'sö yöl-la' dxi'i ladxi' queë'.
- 7 ¡Xclenë' Dios, benë' gubidza, en beo'!
Zóatica'sö yöl-la' dxi'i ladxi' queë'.
- 8 ¡Benë' Dios gubidza para tsení' lahui' dza!
Zóatica'sö yöl-la' dxi'i ladxi' queë'.
- 9 ¡Benë' Dios beo', en yugu' bōlaj para ulu'zení' chi'i dzō'ölö!
Zóatica'sö yöl-la' dxi'i ladxi' queë'.
- 10 ¡Xclenë' Dios, bëtië' yugu' bi'i bōnni' lo quégaca bönachi Egipto!
Zóatica'sö yöl-la' dxi'i ladxi' queë'.
- 11 ¡Bubéajë' bönachi Israel ladaj bönachi Egipto na'!
Zóatica'sö yöl-la' dxi'i ladxi' queë'.
- 12 ¡Len yöl-la' huáca zxön queë', en lu yöl-la' nadxi'i queë' benë' caní!
Zóatica'sö yöl-la' dxi'i ladxi' queë'.
- 13 ¡Xclenë' Dios, bubéajë' choplö Nísado' Xiná!
Zóatica'sö yöl-la' dxi'i ladxi' queë'.
- 14 ¡Benë' ga gula'dōdi bönachi Israel gatsaj láhui'lö nísado' na'!
Zóatica'sö yöl-la' dxi'i ladxi' queë'.
- 15 ¡Lu nísado' na' busunítië' Faraón, en bōnni' queë' rōjáquië' gudil-la!
Zóatica'sö yöl-la' dxi'i ladxi' queë'.
- 16 ¡Xclenë' Dios, guchë'ë bönachi queë' la' guixi' ga ni' naca yu bidxi!
Zóatica'sö yöl-la' dxi'i ladxi' queë'.
- 17 ¡Xclenë' Dios, bëtië' bōnni' gula'nná bë'ë, guláquië' nal-la!
Zóatica'sö yöl-la' dxi'i ladxi' queë'.
- 18 ¡Bëtië' bōnni' gula'nná bë'ë, dëda' lu ná'agaquië' yöl-la' unná bë'!
Zóatica'sö yöl-la' dxi'i ladxi' queë'.
- 19 ¡Bëtië' Sehón, bōnni' gunná bé'enë' bönachi Amorreo!
Zóatica'sö yöl-la' dxi'i ladxi' queë'.
- 20 ¡Bëtië' Og, bōnni' gunná bé'enë' bönachi Basán!
Zóatica'sö yöl-la' dxi'i ladxi' queë'.
- 21 ¡Budödë' xiyúgaquië' lu ná'agaca bönachi queë'!
Zóatica'sö yöl-la' dxi'i ladxi' queë'.
- 22 ¡Budödë' le lu ná'agaca bönachi Israel, bönachi tun xichinë'!
Zóatica'sö yöl-la' dxi'i ladxi' queë'.
- 23 ¡Yōjnenë' rë'u cate' ni' bugá'anaru' cá'asö!
Zóatica'sö yöl-la' dxi'i ladxi' queë'.
- 24 ¡Busölë' rë'u lu ná'agaca nupa gula'díl-lalen rë'u!

Zóatica'sò yöl-la' dxi'i ladxi' queë'.

²⁵ ¿Rugahuë' yúgu'të bönachi!

Zóatica'sò yöl-la' dxi'i ladxi' queë'.

²⁶ ¿Xclenë' Dios, zoa cazë' yehua' yubá!

Zóatica'sò yöl-la' dxi'i ladxi' queë'.

137

¹ Ra' yegu nacuá' lu yu Babilonia guró'ötu',
en gurödxí yéchi'tu', cate' yöjnetu' yödzö Sión.

² Lu yaga rō'gaca yugu' ra' yegu ni'
bugála'tu' yugu' le rúl-lalentu'.

³ Caní bentu' tu' gula'nabi yudxi nupa gulachë' netu' nadzuntu' ni' gúl-
latu'.

Nupa bulu'saca' zi' netu' gula'naba queëtu' yöl-la' ruzxidxi, gula'nná:
“Gulí'gul-la queëtu' tu le rul-la que yödzö Sión.”

⁴ ¿Nacxi caz gaca gúl-latu' le rul-la queë' Xanru'
ga ni nadzuntu' tu lu yödzö izá'a?

⁵ Channö gal-la ládxa'a yödzö Jerusalén,
rinábida'-në' Dios ugúë' yöl-la' raca que na'a ibëla.

⁶ Rinábida'-në' gunë' ga ta' lúdxa'a chichja'
channö cabí tsöjneda' ladza',
en channö cabí huí' zxonra' yödzö Jerusalén ca ia'tú le ruzí'ida' xibé.

⁷ Yöjné le gulunë' zxi'ini xi'sóë' Edom, Xan,
le gulunë' dza busiúdxu' yödzö Jerusalén,
ca na' gula'nnë': “Gulí'quinnaj dëra.
Gulí'quinnaj dëra ga idxintë xilibi zö'ö yödzö na'.”

⁸ Libí'ili', bönachi Babilonia, libí'ili' rusunítíli',
bica' ba nu ubí'i queéli' ca na' benlí' queëtu'.

⁹ Bica' ba nu quela' yugu' bí'ido' queéli'
en uzxuzxaj lé'gacabi' yugu' lu guió'j.

138

¹ Idú ládxa'a guía' Li', “Xclenu” Xan.

Gul-la' yöl-la' ba quiu' lógaca le tun zxon bönachi yugu' yödzö izá'a.

² Uzóa zxiba' saca' yudo' lá'ayi quiu', en guía' Li', “Xclenu”
ni'a que Lo', tu' nacu' dxi'i ladxi', en runu' ca rna didza' bë'u,
tu' benu' ca naca lu xtídu'u, en lu le naca ca nazí'i lo.

³ La' dza ná'asö cate' bulidza' Li', bubi'u didza'.
Tu' butipu' ládxa'a, guca' rugu ladxi'.

⁴ Yúgu'të bönni' ta'nná bë'ë ilë' Li': “Xclenu” Xan,
cate' ila'yönnë' didza' ru'u.

⁵ Ilul-lë' ca ná'agaca le runë' Xanru' Dios,
tu' nácatë'ö zxon yöl-la' ba queë' Xanru'.

⁶ Sal-la' nayëpisëtë're' Xanru' Dios
ruí'i ládxe'ë nupa ná'agaca cá'asö,
pero zi'tu' zí'tu'sö ruyúë' nupa tun ba zxon cuínguequi.

⁷ Sal-la' ridá' ga zoa bönadxi quia', Li' utipa cazu' ládxa'a.

Tíl-lalen cazu' nupa ta'díl-lalen neda',
ate' len yöl-la' huáca quiu' usöló' neda'.

⁸ Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'i ladxi' quiu', Xan.
Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en nunbë' cazu' neda'.

² Nöz quézinu' cate' ribö'a, en cate' riyasa'.

Nózinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nözinu' yúgu'të le runa'.

⁴ Zí'atëlö ca bi didza' ru'a,
chi nöz quézinu' bi innía', Xan.

⁵ Röjnöru cazu' lahua', en za' cazu' cúdza'a,
en naxóatica'sö no'o neda'.

⁶ Run ga rubánida' tu' nöz quézinu' Li'.
Biti' séqui'da' tséajni'ida' ca naca.

⁷ ¿Naru' huáca tseja' ga bití' idxín Bö' quiu'?

¿Naru' huáca izxúnna' ga bití' zoa cazu' Li'?

⁸ La'tu' huabena' lúzxiba, ni' soa cazu' Li',
en la'tu' huötja' lataj chul-la, ni' zoa cazu' ca'.

⁹ La'tu' uyija' ga rilén gubidza,
o la'tu' huadóda' ia'tsölá'alö nísado',

¹⁰ ni' caz ichë'u neda',
ate' len no'o ibëla sön cazu' neda'.

¹¹ La'tu' innía': "Ucachi' neda' le naca chul-la",
en la'tu' huóaca chul-la bení' zóalen neda',

¹² bití' gaca chul-la lo' Li' lë na' naca chul-la quia',
pero chi'i dzó'ölö gaca quiu' ca lahui' dza.

Tuz ca nácagaca lo' Li' le naca chul-la, en le naca lahui' dza.

¹³ Nun cazu' Li' le zoa icja ládxi'da'ahua'.

Benu' ga guyá' lë'ënu xiná'a le naca caza'.

¹⁴ Guía' Li': "Xclenu'" tu' run ga rubánida' ca nun cazu' neda',
ate' rádxida' Li' tu' tun le nunu' ga rubánida',

ate' bö' naca caza' nōzi caz naca caní.

¹⁵ Bití' bigachi' lo' le naca caza' cate' ni' si' galja',
cate' ni' yu'a lë'ënu xiná'a.

¹⁶ Bilé'e quézinu' neda' cate' ni' si' galja',
tu' chinuzúajgaca lu guichi quiu'

yugu' dza ral-la' soa' ibana',
sal-la' bití' ridxini nitú dza na'.

¹⁷ Nazáca'tërögaca quia' le rizá' ládxi'u, Dios.
Ziántërö nácagaca lë na' rizá' ládxi'u.

¹⁸ La'tu' huáca nu ulaba léguequi,
ilácagaca ziántërö ca nácagaca guiöj yuzxi.

Cate' rubana', ni' zóalena' Li'.

¹⁹ Raca ládxa'a usunítu' nupa tuá' dö', Dios.

Que lë ni na', guli'cuíta ga zoa', núlöli' rútili' bönachi.

20 Tuí'i didza' zi' ca nacu' Li', Dios,
ate' nupa ta'dá'baga' Li' ta'nné liz que Lo'.
21 ¿Naru' cabí rileda' nupa ta'lé Li', Xan?
¿Naru' cabí ruzóa' tsölá'alò nupa ta'dá'baga' Li'?
22 Idú ládxa'a bití' rilé'eda' léguequi dxi'a.
Nuzóa' léguequi ca nupa ta'díl-lalen neda'.

23 Buyú neda', Dios, en gúquibe'e le zoa icja ládxi'da'ahua'.
Guzxí' bē' neda', en gúquibe'e le rizá' ládxa'a.
24 Buyú channö zóalen neda' le naca dö',
en buluí'i neda' nöza tsahui' quiu' zóatica'sö.

140

1 Busölá neda', Xan, lu ná'agaca nupa tuá' dö'.
Ben chí'i neda' para cabí bi ilunē' bönni' zi' quia'.
2 Ta'zá' ládxe'ē le náagaca xihui' ilunē',
en tunē' ga ila'díl-lalen bönachi luzē'eguequi.
3 Didza' tu'ē tun ga náagaca lúdxí'gaquiē' ca yugu' bēla sínia'.
Yu'u ruá'agaquiē' le nachē' yöl-la' guti ca le dxía lu láyi'ba' bēla na'.
4 Ben chí'i neda', Xan, para cabí bi ilunē' bönni' tu'ē dö' quia'.
Ben chí'i neda' para cabí bi ilunē' bönni' zidzaj quia',
bönni' na' té'ēnē' ilunē' ga ichixi iníguida'.
5 Nupa tun ba zxön cuínguequi nucáchi'gaca le sön neda',
enca' du yalaj iröli neda'.
Nucáchi'gaca du yalaj ga ral-la' töda'.
Nucözagaca le ila'zön neda'.

6 Gudxa'-nē' Xanru': "Nacu' Dios quia'.
Ruzē' nagu', Xan, yugu' le rinábida' Li'.
7 Xana' Dios, naca cazu' Nu rusölá neda' len yöl-la' huáca quiu'.
Ben chí'i cazu' icja' cate' ni' zoa' lu gudil-la.
8 Bití' gu'u lataj, Xan, gaca quia' le ré'ēnē' gunē' bönni' ru'ē dö'.
Bití' gu'u lē' lataj idéli'nē' le rizá' ládxe'ē, para cabí tsépisé'.
9 Nacuá' nupa nagú'ugaca neda' lē'ajlō.
Busubaga' ícjagaquiē' dö' té'ēnē' ilu'ē quia'.
10 Ben ga ila'bixaj bo' yalaj lahui ícjagaquiē'.
Bē' lataj tsöjtsázagaquiē' tu lu guí' zxön,
en yugu' lu yeru zila ga bití' ila'zéqui'nē' ulu'rúajē'.
11 Bití' gu'u lataj soē' bönni' rizí' yē'ē luyú ni.
Ben ga udxín queē' bönni' zidzaj dö' ru'ē."

12 Nözda' gunē' Xanru' ga ulu'rúaj tsahui' nupa ta'guí'i ta'zaca',
en uchi'a usöröē' quégaca bönachi yechi'.

13 Le nácatē ilé Li': "Xclenu'" nupa náagaca tsahui' tu' tu'lidza Lo'.
Ila'cuá' ga zoa cazu' Li' nupa náagaca dxi'a.

141

1 Rulidza' Li', Xan. Gudáchi ga zoa'.
Ruzē' nagu' chí'a cate' rulidza' Li'.
2 Buyú le rulidza' Li' ca dzön yalaj le ridxín lo',

en cate' richisa na'a, buzí' le ca tu böa'do' uzégui'a-ba' lo'.

³ Ben chí'i ruá'a, Xan,

en gudapa chí'i guídi ruá'a para cabí gu'a didza' zi'.

⁴ Biti' gu'u lataj gaca ládxa'a le cabí nácatë,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxön.

⁵ Bë' lataj gu'ë neda' bönni' tsahui' lu yöl-la' nadxí'i queë'

para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ila'ládu'gaquië' bönni' lo quéguequi lë'e guí'a guiöj,

ate' iléquibe'e gulaca dxi'a didza' bë'a.

⁷ Ca raca cate' nu rugá'ana-ba' bëdxi, en rulá'a yu,

ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lë na' nucáchi'gaca,

en ga bití' tsöjtsaza' lu du yalaj nucözagaca nupa tuá' dö'.

¹⁰ Bë' lataj ila'yaza la' cuíngacasö lu du yalaj bulu'cachi' nupa tuá' dö',

pero benna lataj tódisa' neda' ga na' nagachi' du yalaj na'.

142

¹ Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' ládxe'ë quia'.

² Rudöda' lahuë' yöl-la' rinaba yudxi quia',

en rusiyönda' Lë' le rácagaca quia'.

³ Cate' budú ládxa'a,

gunözi quézinu' Li' le guca quia'.

La' nöza ga ridá' neda'

bulu'cachi' le sön neda'.

⁴ Buyú cuita' ibëla

tu' cuntu nu zoa nu ruí'i ladxi' neda'.

Biti' bi zoa le gácalen neda'.

Cuntu nu run chí'i bö' naca caza'.

⁵ Gurödxi'a lo' Li', Xan, gunnía':

Run chí'i cazu' neda' Li',

en naca cazu' Nu rácalen neda' ladaj nupa nabángaca.

⁶ Ruzë nagu' le rulidza' Li',

tu' nagá'ana' cá'asö.

Busölá neda' lu ná'agaca nupa ta'zóa regu' neda',

tu' nácatërögaca nál-la ca neda'.

⁷ Guléaj bö' naca caza' lu yu'u lidxi guíë,

para gaca guía' Li': "Xclenu" tu' rulidza' Lo'.

Nupa nácgaca tsahui' ulu'dubi idú gásibi'ilö ga zoa',

tu' gunnu' sizxöni quia' le riquinda'.

143

¹ Ruzě nagu' le rulidza' Li', Xan.

Ruzě nagu' le rinabi yúdxida' Li'.

Tu' runu' ca rnna didza' bē'u, en nacu' tsahui' gunnú'

² biti' ichē'u neda' lo' ga uchi'a usöröu' quia', huen dxin quiu'.

Cuntu nu zoa naca tsahui' lo' Li'.

³ Nu biti' rilé'e neda' dxi'a zoa regu' bö' naca caza'.

Nuzötjē' yöl-la' na'bán quia' lu yu.

Benē' ga zoa' lataj naca chul-la ca raca quégaca nupa gulati dza ni'te.

⁴ Que lē ni na' rudú ládxa'a, en rō'a böniga.

⁵ Rōjneda' dza chigula'dödi.

Rizá' ládxa'a ca nácgaca le benu' Li'.

Ribequi icja' ca nácgaca le nun no'o.

⁶ Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiój.

⁷ Bubí'tē didza', Xan, tu' rudú ládxa'a.

Biti' ucachi' lo' lahua' neda',

para cabí gaca' ca tu bönni' ru'ē lataj chul-la ga nacua' nupa nátigaca.

⁸ Ben ga yōnda' yugu' zila ca naca yöl-la' dxi'i ladxi' quiu',

tu' ruzxōni ládxa'a Li'.

Busēdi neda' ca ral-la' guna',

tu' ruchisa' lo' Li' bö' naca caza'.

⁹ Busólá neda', Xan, lu ná'agaca nupa bití' ta'lé'e neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca rē'ēnu' Li',

tu' naca cazu' Li' Dios quia'.

Bē' lataj ichē' Bö' Lá'ayi quiu' neda' lu nöza tsahui'.

¹¹ Butipa ládxa'a, Xan, para gaca yöl-la' ba que Lo'.

Tu' nacu' tsahui' busólá neda' lu le raca quia'.

¹² Lu yöl-la' dxi'i ladxi' quiu' guchugu quégaca nupa bití' ta'lé'e neda' dxi'a.

Busuniti yúgu'tē nupa tu'saca' zi' bö' naca caza',

tu' naca' huen dxin quiu'.

144

¹ ¡Yöl-la' ba Lē, Xanru' Dios!

¡Náquiē' ca tu guiój ga zoa' tsutsu!

Rutipē' na'a para gaca tseja' gudil-la,

en rutipē' ca' xibōn na'a para gaca tíl-lalena' bönni' nácgacquiē' nál-la.

² Naca cazē' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusólé' neda', en náquiē' ca tu ga zoa' tsaz.

Náquiē' ca tu le run chí'i neda' lu gudil-la, ate' rucachi' cuina' ga na' zoē'.

Runē' ga tun nupa rinná bé'eda' ca rnna didza' ru'a.

³ ¿Bízcatē caz náquiē' bönni' tu' runu' lē' ba lá'ana, Xan?

¿Bízcatē caz náquiē' bönni' tu' ru'í ladxi' cazu' lē'?

⁴ Naca cazē' bönni' na' ca tu bö'do' recja,

ate' yugu' dza zoē' nabanē' nácgacasō ca tu zxul-la le rigú'u tu böaj ridōdisō.

⁵ Buzötaj lúzxiba, en bдинne ni, Xan.

Gudán yugu' guí'a, ate' irúaj dzōn lé'eguequi.

⁶ Ben ga tsēpi yösa quiu', en bēsilasi léguequi.

Busé yugu' yaga lahui tuchi', en ben ga ila'bö' baguí'sö.

⁷ Bulí no'o ga na' zu' xitsá'alö.

Busölá neda', en guléaj neda' lu ná'agaca bönachi zi'tu',
le gaca ca rubéaju' neda' lu nisa zila.

⁸ Ta'zí' yë' bönachi na',

ate' le cabí nácatë naca yöl-la' unná bë' quéguequi.

⁹ ¡Gul-la' quiu' Li', Dios, tu le cubi!

¡Gul-la' quiu' yöl-la' ba, en quínnia' bihuël-la nuá' chi du que!

¹⁰ Rusölá cazu' bönni' ta'nná bë'ë.

Busöló' David, huen dxin quiu', lu guië tuchi' queë' bönni' ru'ë dö'.

¹¹ Gúcalen neda', en busölá neda' lu ná'agaca bönachi zi'tu'.

Ta'zí' yë' bönachi na',

ate' le cabí nácatë naca yöl-la' unná bë' quéguequi.

¹² Ben ga ilácabi' bi'i bönni' queëtu' ni yu'ugacabi' iz cuidi'

ca yugu' yaga nazxöngaca,

en ben ga ilácabi' bi'i nigula queëtu'

ca nácacaca ya'zxén que tu yu'u nazaca'.

¹³ Ben ga ilígaca yu'u queëtu' zxa' za utúbitu',

en ben ga iláljaba' gayuá' gayuá'aba' chíbodo',

en bö'cu' zxíla'do' ga nucuá'atu'-ba'.

¹⁴ Ben ga ulu'cuá'aba' böa' hué'enido' quégaca böa' guixi' queëtu',

en ga biti' bi gaca quégacaba' bédxi zxön, en bédxido' ca'.

Biti' gu'u lataj soa nu cödxí yechi' la' nöza que lászatu'.

¹⁵ ¡Bica' bágaca bönachi raca caní quéguequi!

¡Bica' bágaca bönachi na' Xanru' Dios náquië' Dios quéguequi!

145

¹ ¡Guna' Li' zxön, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

² ¡Tu dza tu dza cu'a Li' yöl-la' zxön,

en cú'utica'sa' Lo' yöl-la' ba!

³ ¡Nayëpisëtë'rë' Xanru' Dios, ate' cú'uru'-në' yöl-la' ba!

¡Biti' ca' gaca gúnbë'ëru' ca naca yöl-la' zxön queë'!

⁴ Yúgu'të bönachi ila'gú'u yöl-la' ba le nun cazu' Li',

para ulu'siyön zxí'inigaca,

en ulu'lui'i lahui le nácacaca zxön benu'.

⁵ Sa' ládxa'a ca naca yöl-la' zxön que yöl-la' unná bë' quiu',

en ca nácacaca yöl-la' huáca zxön runu'.

⁶ Iluí' didza' yúgu'të bönachi ca naca yöl-la' zxön

quégaca yöl-la' huáca runu'.

Usiyönda' bönachi ca naca yöl-la' zxön quiu'.

⁷ Idú ládxi'gaca iluí' didza' cate' tsöjnégaca yöl-la' dxi'i ládxi' zxön quiu'.

Lu yöl-la' rudzeja quéguequi ila'bödxí'a tu' nacu' tsahuí'.

8 Xanru' Dios ruzá' láchxë'ë queéru', en ruhuéchi' láchxë'ë rë'u.
 Biti' ilética'së', ate' zxöntërö naca yöl-la' dxi'i ladxi' queë'.
 9 Runë' Xanru' Dios le naca dxi'a quégaca yúgu'të bönachi,
 en ruhuéchi' láchxë'ë yúgu'të le nunë'.

10 Yúgu'të le nunu' ilé Li': "Xclenu" Xan,
 ate' nupa néquiquequi quez quiu' ilún Li' zxön.
 11 Ilu'i didza' ca naca yöl-la' zxön que le rinná bë'u,
 en ulu'luf'i lahui yöl-la' zxön quiu',
 12 para ulu'siyön bönachi ca nácagaca le zxön runu',
 en ca naca yöl-la' zxön que le rinná bë'u le nayëpisëtërö.

13 ¡Zóatica'sö le rinná bë'u,
 ate' idía'tica'sö yöl-la' unná bë' quiu'!
 ¡Lu le naca idú ladxi' queë' runë' Dios ca rnnágaca yúgu'të didza' ru'ë,
 en lu yöl-la' dxi'i ladxi' queë' runë' yúgu'të le runë'!
 14 ¡Röjzönë' Xanru' yúgu'të nupa röjtsö'ögaca,
 en ruchisé' yúgu'të nupa ndínnegaca!

15 ¡Yúgu'të bönachi tu'yú Li', Xan,
 ate' runödju' le ilágugaca cate' ridxín dza que!
 16 ¡Rusalaj cazu' no'o
 en rugagu' yúgu'të le nacuá' nabángaca!

17 Náquië' tsahui' Xanru' Dios ca naca yúgu'të le runë'
 en náquië' ca' dxi'i ladxi'.
 18 Zoë' Xanru' gala' ga nacuá' yúgu'të nupa tu'lidza Lë',
 nupa na' tu'lidza Lë' idú láchxi'guequi.
 19 Gunnë' le ta'zë láchxi'gaca quégaca nupa tadxi Lë'.
 Riyönnë' cate' tu'lidza Lë', en rusölë' léguequi.
 20 Run chi'i cazë' Xanru' yúgu'të nupa nadxí'igaca Lë',
 pero usunítie' nupa tuá' dö'.
 21 Len ru'a cuina' cu'a-në' Xanru' yöl-la' ba,
 ate' yúgu'të bönachi ilúntica'sö Lë' zxön.

146

1 ¡Guli'cu'ë yöl-la' ba Xanru'!
 ¡Li', bö' naca caza', gulu'ë yöl-la' ba Xanru'!
 2 ¡Cu'a-në' Xana' yöl-la' ba tsanni ni zoa' nabana'!
 ¡Gul-la' yöl-la' ba queë' Dios quia' tsanni ni zoa' bö' naca caza'!

3 Biti' uzxöni láchxi'li' bönni' ta'nná bë'ë,
 en calëga bönni' tati cazë', bönni' bití' ca' gaca ulu'sölë' rë'u.
 4 Rurúaj bö' yu'ë nu bönni', ate' ruhuóáquië' yu.
 La' dza ná'asö riniti le rizá' láchxë'ë gunë'.
 5 Bica' ba bönni' rácalenë' Dios queë' Jacob lë',
 bönni' na' runë' löza Xanru' Dios.

6 Nunë' Xanru' Dios lúzxiba, en luyú ni,
 enca' nísado', en yúgu'të le nacuá' yugu' lataj na'.
 Rúntica'së' Lë' ca rna didza' bë'ë,
 7 en ruchi'a rusöröë' nupa zoa nu rusaca' zi' léguequi.

Rugagu cazë' nupa ta'dún.

Rusanë' Xanru' Dios nupa nadzúngaca.

⁸ Rusaljë' Xanru' Dios guiøj lógaca nupa nácagaca lo chul-la.

Ruchisë' Xanru' Dios nupa nadzõ'ögaca.

Nadxí'inë' Xanru' Dios nupa nácagaca tsahui'.

⁹ Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula uzëbi,

pero ruzaguë' xinözguequi nupa tuá' dö'.

¹⁰ Inná bé'tica'së' Xanru' Dios.

Náquië' Dios queëli', bönachi Sión.

¡Guli'cu'ë yöl-la' ba Xanru'!

147

¹ ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queëru'!

¡Naca lachi, en le ral-la' gunru', cú'uru'-në' yöl-la' ba!

² Runë' Xanru' Dios ga rixxón yödzo Jerusalén.

Rutubë' bönni' Israel násilasigaquië'.

³ Ruúnë' bönni' nácagaquië' yechi' ladxi',

en rudë'ë lari' ga dxíagaquië' huë'.

⁴ Rulabë' tsca nacua' böljaj lúxiba.

Nucu'ë lágacaba' tu tuba' yúgu'të böljaj na'.

⁵ Nayëpisëtëre' Xanru' Dios, en nál-latëre'.

Ga rë'ë dzu réajni'inë' yúgu'të.

⁶ Xanru' Dios rácalenë' nupa ta'gui'i ta'zaca'.

Ruzötjë' nupa tuá' dö' lu yu.

⁷ ¡Guli'gul-la queë' Xanru' Dios, guiëli'-në': "Xclenu"!

¡Guli'gul-la yöl-la' ba queë' Xanru', quínnili' lë'egaca bihuël-lado'!

⁸ Riguísië' yugu' böaj lúxiba,

en risöl-lë'ë nisa guiøj luyú.

Runë' ga rilén yö yugu' lu guí'ado'.

⁹ Rugahuë' yugu' böa' guíxi'do',

enca' bóiquiajdo' ta'bõdxi'aba'.

¹⁰ Biti' raza lãdxë'ë yöl-la' nál-la queëba' böa',

en biti' ruzi'ë xibé yöl-la' nál-la queë' bönni'.

¹¹ Raza lãdxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

¹² ¡Guli'cu'ë yöl-la' ba Xanru', libí'ili' zóali' Jerusalén!

¡Guli'cu'ë yöl-la' ba Dios queëli', libí'ili' zóali' Sión!

¹³ Bucu'ë tsutsu le tu'baga' gapa nu riyaza yödzo queëli',

en runë' ga raca dxi'a quégaca zxí'inili' ga na' zóali'.

¹⁴ Runë' ga ribözali' dxi'a tsáhui'do',

en runë' ga ruhuölaj ridzé'eli' zxoa' xtila dxí'atëro.

¹⁵ Rinná bé'enë' yödzülió ni,

ate' xtídzë'ë ridóditë gáti'tës.

16 Risöl-lë'ë guiöj bögui' ca zxila',
en riguísië' buzén ca dö.

17 Riguísië' bögui' ca yugu' guiöj ruaj.

¿Nuzxi caz gaca guá' ilén le naca ziaga queë'?

18 Risöl-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóáca nisa.

19 Ru'ilenë' xzí'ini xí'sóë' Jacob didza',
en riguíxjë' xibá queë' para ilún bönachi Israel ca rnna.

20 Biti' benë' caní ni'a quégaca bönachi ia'tú yödzö izá'a,
ate' biti' nözigaca ca nácagaca le gunná bë'ë.

¡Guli'cu'ë yöl-la' ba Xanru'!

148

1 ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'aló!

2 ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscali' dá'ali' Lë'!

3 ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' bôlaj bení'!

4 ¡Guli'cu'ë yöl-la' ba, libí'ili' zóali' zxon lúzxiba!

¡Guli'cu'ë yöl-la' ba, libí'ili' nisa, zxóali' láhuiló lúzxiba!

5 ¡Guli'cu'ë yöl-la' ba La la'ayi queë' Xanru', yúgu'tëli',
tu' bë'ësë' didza', en canísö benë' libí'ili'!

6 Naguixjë' tsaz libí'ili'.

Naguixjë' xtídzë'ë le catu caz tödi que.

7 ¡Guli'cu'ë yöl-la' ba Xanru' idútë yödzölió,

en libí'ili' böa' ridali' lu nísado', en nísado' caz,

8 en libí'ili' guí', en guiöj bögui' yöla sunna, bögui', en böaj,

enca' lí, bö' budunu', runu' ca rnna xtídzë'ë,

9 en libí'ili' yugu' guí'a, en yúgu'të guí'ado',

en libí'ili' yaga dxíagaca le ta'bía, en yugu' yaga dxi'a,

10 en libí'ili' böa' guixi', en böa' bëdxi,

böa' tá'ayöj lë'ëba' lu yu, en böa' zoa xíligacaba',

11 enca' libí'ili' rinná bë'ëli' yödzölió, en bönachi yugu' yödzö izá'a,

yugu' xzí'inigaquië' bönni' ta'nná bë'ë, en bönni' ruchi'a rusöröli' yödzölió,

12 enca' libí'ili' bi'i bönni', en bi'i nigúlado',

yugu' bönni' zxon, en yugu' bí'ido'!

13 ¡Guli'cu'ë yöl-la' ba La la'ayi queë' Xanru'

tu' nayépisëtëro tuzë' Lë'!

¡Nayépisëtëro yöl-la' ba queë' ca luyú ni, en ca lúzxiba xitsá'!

14 Nuchisë' tu le nuzóa tsutsu bönachi queë',

le naca yöl-la' ba ta'gú'u Lë' nupa néquiguequi queë',

yugu' xzí'ini xí'sóë' Israel, nupa na' nadxí'inë'.

¡Guli'cu'ë yöl-la' ba Xanru'!

149

1 ¡Guli'cu'ë yöl-la' ba Xanru!
 ¡Guli'gul-la queë' Xanru' Dios tu le cubi,
 en guli'gul-la yöl-la' ba queë' ga nudúbigaca nupa néquiquequi quez queë'!

2 Ral-la' ulu'zí' xibë' Xanru' Dios bönachi Israel,
 tu' náquië' Nu ben léguequi.

Ral-la' ulu'dzéjalen Dios nupa nacua' Siön,
 tu' náquië' Nu rinná be'e léguequi.

3 Ral-la' ila'gú'u yöl-la' ba La la'ayi queë',
 en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queë', ila'capa' lë'e guídi,
 en ila'quinni lé'egaca bihuél-lado',

4 tu' raza ládxë'ë Xanru' Dios bönachi queë'.
 Uchisë' nupa ta'gu'i ta'zaca', en usölë' léguequi.

5 Nupa néquiquequi quez queë' ral-la' ulu'dzeja ládxi'gaca lu bení' queë'.
 Lu yöl-la' rudzeja quéguequi ral-la' ilúl-la queë' cate' ni' dëgaca lu le
 rati'gaca.

6 Yöl-la' ba queë' Xanru' Dios ral-la' sóatica'sö ru'igüequi,
 en tu guié tuchi' natuchi' iropa la'a lu ná'agaca,

7 para ulu'zí' lëbi bönachi yugu' yödzö izá'a,
 en ilún xigua' bönachi izá'a na',

8 para ilúguë'ë bregui' guié ná'agaquië' bönni' ta'ná bé'enë' bönachi yödzö
 izá'a na',

en ulu'cu'ë bregui' guié yen ná'agaquië' bönni' lo quégaquië',

9 para ilunë' quéguequi ca nachuguë' Dios gaca quéguequi.
 Naca lë ni le run bal nupa néquiquequi quez queë' Dios.

¡Guli'cu'ë yöl-la' ba Xanru'!

150

1 ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë'!

2 ¡Guli'cu'ë yöl-la' ba ca nácagaca le zxön nunë'!

¡Guli'cu'ë yöl-la' ba ca naca yöl-la' zxön queë'!

3 ¡Guli'cu'ë yöl-la' ba, ucódxili' lúzugacaba' chivo!

¡Guli'cu'ë yöl-la' ba, quínnili' lé'egaca bihuél-la ca'!

4 ¡Guli'cu'ë yöl-la' ba, cápa'li' lë'e guídi, en uya'ali'!

¡Guli'cu'ë yöl-la' ba, quínnili' lé'egaca bihuél-la, en ucódxili' gui!

5 ¡Guli'cu'ë yöl-la' ba, utíl-lali' guié lë'e luzë'e!

¡Guli'cu'ë yöl-la' ba, utíl-lali' guié zxön lë'e luzë'e!

6 ¡Guli'cu'ë yöl-la' ba Xanru', tscali' rizi'ili' bö'!

¡Guli'cu'ë yöl-la' ba Xanru'!